


Diidz ne rdeed
guielmban



New Testament in Zapotec, Mixtepec (MX:zpm:Zapotec,
Mixtepec)

Diidz ne rdeed guielmban
New Testament in Zapotec, Mixtepec (MX:zpm:Zapotec, Mixtepec)

copyright © 1998 Wycliffe Bible Translators, Inc.

Language: Mixtepec Zapotec (Zapotec, Mixtepec)

Translation by: Wycliffe Bible Translators, Inc.

Zapoteco, Mixtepec [zpm], Mexico

Copyright Information

© 1998, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Zapotec, Mixtepec

© 1998, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2018-11-16

Contents

MATEO	1
MARCOS	45
LUCAS	73
JUAN	120
HECHOS	155
ROMANOS	197
1 CORINTIOS	216
2 CORINTIOS	235
GALATAS	248
EFESIOS	256
FILIPENSES	263
COLOSENSES	268
1 TESALONICENSES	273
2 TESALONICENSES	277
1 TIMOTEO	279
2 TIMOTEO	285
TITO	289
FILEMON	292
HEBREOS	293
SANTIAGO	307
1 PEDRO	312
2 PEDRO	318
1 JUAN	322
2 JUAN	327
3 JUAN	328
JUDAS	329
APOCALIPSIS	331

XTIIDZ NDZON DIOS MINE PQUIAA MATEW

¹ Jesús meñ ne pxeel Dios ga, lo xtií Abraham, lo xtií David, ga brieequia me. Lëë grë xmengoldoo me nu:

² Abraham goc pxoz Isaac, Isaac goc pxoz Jacob,

Jacob goc pxoz Judá (bio zla xpëed Jacob),

³ Judá goc pxoz Far ni Zar (Tamar brieelë tsiel Judá),

Far goc pxoz Srom, Srom goc pxoz Aram.

⁴ Aram goc pxoz Minadab, Minadab goc pxoz Naasón, Naasón goc pxoz Salmon.

⁵ Salmóngoc pxoz Booz (Rahab brieelë tsiel Salmon), Booz goc pxoz Obed (Rut brieelë tsiel Booz),

Obed goc pxoz Isái.

⁶ Isái goc pxoz rey David, David goc pxoz Salomón (lëë Salomón ga gop tsiel Urí wnaa ne bionie David).

⁷ Salomón goc pxoz Roboam, Roboam goc pxoz Abí, Abí goc pxoz Asá,

⁸ Asá goc pxoz Josafat, Josafat goc pxoz Joram, Joram goc pxoz Uzí.

⁹ Uzí goc pxoz Jotam, Jotam goc pxoz Acáz, Acáz goc pxoz Ezequí.

¹⁰ Ezequí goc pxoz Manasés, Manasés goc pxoz Amón, Amón goc pxoz Josí,

¹¹ Josí goc pxoz Jeconí (bio zla xpëed Josí). Leñ dze ne nac Jeconí mëed, leñ dze co güeybee zhoo zha Babiloin grë zha Israel, beynie zho zho Babiloin.

¹² Babiloin, ga gol tib xpëed Jeconí brieelë Salatiel,

Salatiel goc pxoz Zorobabel.

¹³ Zorobabel goc pxoz Abiud, Abiud goc pxoz Liaquim, Liaquim goc pxoz Azor.

¹⁴ Azor goc pxoz Sadoc,

Sadoc goc pxoz Aquim, Aquim goc pxoz Liud.

¹⁵ Liud goc pxoz Leazar, Leazar goc pxoz Matán, Matán goc pxoz Jacob.

¹⁶ Jacob co nagon goc pxoz José, meñ ne ptsieelnia Marí.

Marí goc xniaa Jesús, Meñ ne nacle diidz ga cxeel Dios guiaad lo guidzliu.

¹⁷ Zig choopchop bdziñ lo dii co, dzigoraa brieequia Jesús. Tsiida zho wban desde Abraham haxta David; stsiida zho wban desde Salomón haxta leñ dze ne bey zho Babiloin; stsiida zho wban desde leñ dze co haxta bdziñ dze ne goc me mëed.

Gol Jesús

(Lc. 2:1-7)

¹⁸ Znu bzhaac Marí grop José leñ dze ne ziaadyob gal Jesús. Gard ctsieelnia Marí loxaque xtiidz me no ne laa me ycaa José, zeene bnabey Espíritu Sant pquialo tib mëed zdo me. ¹⁹ Zeene bien Joséw, mine been me gocladz me mazd nsaan me Marí; sac sca rnabey ley ni zienalpaa me mine rnabey ley; per laa me gocladz zhlianse nzozit me, sacne racladzd me nriee xquielto Marí. ²⁰ Zhgab co no me, tibaque blulo tib xanjl Dios lo me lo mcaal.

—José (xiag David) —rëb anjl co—, peet tsienied guic luu, pcaania Marí gac me tsiel luu; sac gon mëdyeen ne zoney me ga, Espíritu Sant bnabey pquialo win zdo me. ²¹ Zeene gal dze ne laa win gal, JESUS cueelë luu win, sca grieelë win sac win csilaa grë menladz win lo dol.

²² Ga brieequia mine bnee Dios padzeela, zeene bzeet zha ne biadne xtiidz mew, rëb zho:

²³ Bii zan to ganle zeene laa tib mëedbgui yquiaalo zdo tib wnaayeen ne gard gnee mgui lo.

Zeene laa win gal, Emanuel grieelë win. (Emanuel nac zig nacne rnee ne: Dioszhal ziaad lo ne.)

²⁴ Zeene bna José laa guic me goc tibli; bin me xtiidz anjl co laa me ptsieelnia Marí. ²⁵ Laa me wban tipse grop me per ib bgaald me Marí, haxta bded dze ne laa mëdyeen co gol. Bdziñ dzew, laa win gol, dzigo bleelë José win JESUS.

2

Güeygañ bla zha rac Jesús

¹ Tib guiedz win ne ndxie xtan Judé lë Belén, ga gol Jesús. Lëetse len dze co zob men ne lë Herod nac me rey ne rnabey dan co.

Goc palal dzew, laa bla zha ne runbey lo mel ziaad nëz ne rlan ngbidz bdziñ Jerusalén, ² bñabdiidz zho rëb zho:

—¿Pa lo dien no mëed ne gac men ne gnabey ladz to nu, mëed ne griin gol ga? Bdzion no tib mel nëz ne no no, mel co blu lo no laa win gol-le, min co ne ziaad no nu ziaaddzian no win.

³⁻⁴ Grë men guiedz Jerusalén, zeene bin zhow bzee zdoo zho. Laa Herod, rien draa me zha gon me, bnabey me pcaalsa grë zha ne nac pxoz non, grë zha ne rseed miech ley, bnabdiidz me lo zho dien pa lo nac diidz gal Men ne nole diidz cxeel Dios guiaad lo guidzliu ga. ⁵ Dzigo rëbcha zho lo me:

—Belén, guiedz ne ngab Judé ga none gal men co, sac scale zhobnee lo guits ne pquiaa zha ne pxeel Dios padzeela biadteed xtiidz me, zeene psiaab me guic zho znu bnee zho:

⁶ Tel Belén, niicle ne winraaw lo grë guiedz ne ngab Judé, per nroob nona; sac gon ga grieequia tib men ne gnabey, men ne so yquiaanap grë men Israel, ne nac zho zha ne ngab lo naa.

⁷ Nacne zhlianse bnabey Herod gocredz gza zha rac co, bnabdiidz me lo zho dien blapaa dze rac psilo gon zho blan mel co.

⁸ Blozhse ga, dzigo pxeel me zho Belén, rëb me lo zho:

—Ga golt sie golt sieguib mëed co. Zigne gdziel to win, goltëniegash diidz lo naa nu, zeena ye naa ga gagan naa win.

⁹ Blozhse sca pso me diidz lo zho, laa zho bio nëz stib laa zho zie. Laa mel ne gon zho brieequia nëz ne ziaad zho ga, laa ma neraque lo zho; haxta bdziñ ma ngali guic yu ne no mëdyeen co, gataa laa ma blëz.

¹⁰⁻¹¹ Zeene gon zho laa mel co blëz ga, per nli rley zho. Bzëeb zho len yu co, gon zho laa mëdyeen co no ga grop xniaa win, dzigo pquitsgzhiz zho lo win, bnee zho tib xtiidz zho lo win. Blozh ga blee zho ncuaane

zienie zho lo win, blee zho or, blee zho tiblo yaalnex, ni tiblo nceit nex rnee zho mirr, bgad zho lo win.

¹² Zeene laa gza zha rac co wbi Belén, laa ne nieted zho Jerusalén, stible nëz bzhen zho zey zho; sac bnee Dios lo zho lo mcaal, rëb me tsienied zho diidz lo Herod.

¹³ Laa gza zha rac co zey, zeene güeylulo tib xanj Dios lo José lëetse nixguies me, rëb anjl co lo me:

—José, na zeena guche i pcaanie mëdyeen qui nëz grop xniaa win, golt së nëz Egipt, sac laa Herod yquiaguib win gut me win. Egipt, ga cuëznie to win, na naaque guialnie diidz lo to zeene laa to gbi ga.

¹⁴ Guieel cogazh guche José, pcaanie me mëdyeen co nëz grop xniaa win, laa zho ziese nëz Egipt; ¹⁵ ga blëz me haxta bdziñ dze ne laa Herod gut. Ga brieequia mine bnee zha ne biadteed xtiidz Dios padzeela, zeene znu bnee zho: “Nëz Egipt no xpëed naa, zeene bredz naa me.”

Bnabey Herod gut grë mëedlas

¹⁶ Laa zeene gon Herod wbiredraa gza men rac co nienie zho diidz lo me, per nli blëe me. Ntseeb rac me, pxeel me zha ne güey Belén ni grëraa guiedz ne ndxie gax ga, güeygut zho grëse mëedbgui yeen ne no grë guiedz co, desde win ne golnëz, haxta win ne rap chop iz. Tibaque nan me sca ngaa mëdyeen ne nac Jesús ga niet win, sac blee me cuent zhile gac chop iz psilo gon gza zha rac co blan mel co. ¹⁷ Guieñëdox ne bio grë miech co, ga brieequia mine bzeet Jeremí men ne biadteed xtiidz Dios padzeela, zeene znu rëb me:

¹⁸ Tib redz nroob ne zëeb len guiedz Ramá. Grë wnaa Judá, zha ne ziaad lo xti Raquel, mbanse rac zho, roon zho no zho xquieñë xpëed zho;

zha rna zha ne cchoobladz zdoo zho, sac laa xpëed zho gut.

¹⁹ Goc palal dzew laa Herod gut, dzigo pxeel Dios tib xanj me güeynee lo José lo mcaal zaatne no José nëz Egipt, rëb me lo José:

²⁰ —José, guche i, pcaanie mëdyeen qui nëz grop xniaa win, golt bire nëz Israel stib; laa zha ne quiana win ga gutle.

²¹ Dzigo brieenie José mëdyeen co ga grop xniaa win, bio me nêz laa me wbire zeynie win nêz Israel. ²² Per zeene bin José lëëque tib xpëed Herod men ne lë Arquela, men co biaan xlugar Herod zobnabey xtan Judé, bdieb José ndzinnie me mëdyeen co nêz co. Dzigo bneequa Dios lo me lo mcaal tsie me nêz Galilé.

²³ Gol zho Galilé, bdzinaque zho guiedz Nazaret, ga wbannie zho mëdyeen co. Ga brieequa mine bzeet grë zha ne biadteed xtiidz Dios padzeela, zeene rëb zho: men Nazaret guiab miech nac Jesús.

3

Psilo Juan Bautist noseed me miech (Mr. 1:1-8; Lc. 3:1-9, 15-17; Jn. 1:19-28)

¹ Len dze ne psilo Juan Bautist noseed Juan miech xtan zha Judé, dan zit ne no me ga; ² rnee me lo zho:

—iGolsaan xquieintseeb to, golnab lo Dios gun me to perdon grëtaa dol ne ziyun to; sac gon laa dze bdzinle laa me csilo gnabey!

³ Lëe Juan Bautist ga bzeet profet Isá, zeene znu pquiaa me:

Bii zon miech ganle zeene laa tib tsi men zëeb tib dan zit, rnee me:

“Golzhixcuuaa nêz ne ted men ne rnabey, golsaan grë guieintseeb ne run to.”

⁴ Niapse guits lad camell niaa xab Juan, guid nac ncuaane ndxie len me, ni niapse nguzhanch ni dzin dan row me.

⁵ Nzian grë menguedz Jerusalén, grë men Judé, grë men ne no gax ro guiubee Jordán, rrie zho riequiaadiag zho zhiwseed me.

⁶ Grë zha ne rxobdol grëse xtol zho, dzigo rchoobnis me zho ro guiubee co.

⁷ Laa zeene ran me grë zha farisé, zha saducé ne rdzin lo me ga racladz zho ye zho chobnis, dzigo rnee me lo zho:

—iMiech ngoopdol, masaque nac to zig nac mee! Nan to na lëe, loxaque chobnis to laa to laale lo grë guieinëdox ne ziaadyob.

⁸ Led scada gon, none zaacse gban to zeena glu nli dib zdo to psaan to grë xquieintseeb to. ⁹ Ni gacniatsde to guiab to loxaque por nase to xtii Abraham, laa Dios csilaale to; sac gneli naa lo to ganle telne gacladz Dios, haxta grë quie zac gnabey me tsaalow miech ne gac zha xtii Abraham.

¹⁰ Nanle to ganle, grë yag nex, zeene rquiad nex low led rruga, rlozh ga rliaala lo gui, ga reca. Scadaa nagon gdzieelo miech ne gband zigne racladz Dios, sac rriequia laa me nzhenle xquibyag me cchug me yag ne sca nac.

¹¹ Nli tib wrobnisse nu rnedz naa lo to, nacesw zig tib señ, sac lëe gdib rluw laa to psaan xquieintseeb to, laa to bzëeb xnëz Dios. Sangue men ne no guiaad ga, mesi Espiritu Sant gdeed me lo zha ne gliladz me; ni scagaa zha ne gliladz me, sonëz me zho zaatne nitlo zho. Ne nligaa tib men non nac me, tel naa peet nond naa, per ni par tib ngundziin ne glit lab me raguiald naa gac naa. ¹² Laa me guiaad zig tib zha ne rbeeguizh zhobxtil, sac zha co rlozhse runmbe zho zhob, rgotsow zhow, laa paj rielaal zho lo gui, ga reca. Per gui ne gzëeg grë paj ne guiadbee me ga, gdzind dze guiuuw.

Brobnis Jesús

(Mr. 1:9-11; Lc. 3:21-22)

¹³ Len dze co brie Jesús nêz Galilé zie me nêz ro guiubee Jordán, laa me zie par cchoobnis Juan me. Bdzin me ¹⁴ nêd Juan cchoobnis Juan me, rëb Juan lo me:

—Lëda i gon, naa none guial lo luu cchoobnis luu naa.

¹⁵ Dzigo rëb me lo Juan:

—Nli scaw, per mazd pchoobnis naa, sac gon ib nonguieła dziuun ne mine rnabey Dios.

Dzigoraa pchoobnis Juan me. ¹⁶ Laa me zieriee lo nis zeene laa zhan gbaa bzial, gonpaa me zig rlu tib palom rlu Espiritu Sant laa me ziad-zëeb bdzin me guic me, ¹⁷ ni blu zëeb tib tsi men co nêz gbaa rnee me:

—Xpëed naa gon nac men qui, rleynie naa me, men nziuu nac me lo naa.

4

Gocladz mendox niungüet ma Jesús (Mr. 1:12-13; Lc. 4:1-13)

¹ Zeene blozh brobnis Jesús, dzigo güeynie Espiritu Sant me tib dan zit, zaatne guieñd miech; ga gocladz mendox niungüet ma me niun me mine racladz ma.

² Zeene goc choo ngbidz choo guieel no me dan co ni tib lë peet rowd me, laa me

pcaabedz ³ hor co bdziñ men̄dox zaatne no me ga, rëb ma:

—Tel̄ne nli Xpëed Dios nac luu, bnabey tsaalo grë quie rii ncuaañe gow luu.

⁴ Dzigo pquiab me rëb me lo ma:

—Znu zhobnee lo Xtiidz Dios: “Niapse por xtiidz Dios mban miech, yquiamband zho loxaque guiel̄wagwse.”

⁵ Blozh ga güeynie ma me Jerusalén, blep ma me glaa guic yadoo nroob ne zob lad guiedz co, ⁶ rëb ma lo me:

—Tel̄ne nli Xpëed Dios nac luu, bringaa nu, ben̄que led znu zhobnee lo Xtiidz Dios: “Znabey Dios grë xanj̄l me yquiaanap luu, zha queedz luu, zeena ni tib quie ycaañ̄ ni luu.”

⁷ Pquiab me rëb me lo ma:

—Psoladz gan̄le, noque stib zaatne znu rnee lo Xtiidz Dios: “Bien̄, Dios nac men̄ ne rnabey luu, nodne quitnië luu me gnab luu lo me ncuaañe nod gun̄ me.”

⁸ Blozh ga bii güeynie ma me glaa tib guic gui, ga blu ma grëse guiedz ne ndxie dib lo guidzliu lo me, ni blu ma grëse ncuaañ̄ ndaan ne rap tib tib guiedz co, ⁹ rëb ma lo me:

—Bui gan̄le, grëse ncuaañ̄ qui gon̄ gnedz naa lo luu tel̄ne squiitsgzhib luu lo naa niina, gun̄non luu naa.

¹⁰ Horco pquiab me rëb me lo ma:

—iBiche lo naa nu men̄dox! Znu gon̄ zhobnee lo Xtiidz Dios: “Diosse nac men̄ ne rnabey, mese none gun̄non luu, lo me rieguial̄ yquiitsgzhib luu; ni miñe rnabey me miñ co none gun̄ luu.”

¹¹ Dzigoraa biche ma lo me, dzigo bdziñ bla anj̄l bdeed zho ncuaañe dow me.

Psilo Jesús pseed me miech nëz Galilé

(Mr. 1:14-15; Lc. 4:14-15)

¹² Zeene bin Jesús laa Juan biab ladzguiib, dzigo brieë me ga güey me nëz Galilé, guiedz ne lë Nazaret.

¹³ Zhisaque goca, brieëque me ga güey me Capernaum tib guiedz ne ndxie gax ro Nisdoo Galilé, zaatne nac xtan zha xtii Zabulón ni zha xtii Neftalí. ¹⁴ Ga brieëquia miñe bzeet Isá (men̄ ne pxeel̄ Dios padzeela biadnee xtiidz me), zeene psiaab Dios guic Isá rëb Isá:

¹⁵ Grëse men̄zit ne ndxie xtan Galilé,

nëz dan ro guiubee Jordán, gax ro Nisdoo Galilé, zaatne gocchen̄ Zabulón ni Neftalí;

¹⁶ miech ne no lo ncow nac zho, per niina tib biini nroob biab lo zho.

Ladzniale guiel̄gut no zho, per laa biini co biab lo zho par grieë zho ga.

¹⁷ Ga psilo Jesús pseed me miech, rnee me lo zho csaan zho xquiel̄ntseeb zho, gbig zho lo Dios, sac laa dze ne csilo gnabey Dios ziaadgaxle.

Bredz Jesús tap ngoozmel

(Mr. 1:16-20; Lc. 5:1-11)

¹⁸ Len̄ dze co, tib dze zieded Jesús gax ro Nisdoo Galilé gon̄ me chop ngoozmel̄, tib zho lë Simón Pedr, stib zho lë Ndrés; grop bets zho lëetse laa zho noron̄ guieë ne rgaa mel̄ lo nis. ¹⁹ Dzigo bredz me zho, rëb me lo zho:

—iGoltë goltënal̄ zhits naa! iLaa naa cxel̄ to tsie to stib gooz, tsietop to grë miech ne sëëb xnëz Dios!

²⁰ Horcogazh psan̄ zho guieë ne rgaa mel̄ ga, laa zho zienal̄ zhits me.

²¹ Zhisaque bzë me ro nis co, gon̄ me laa Jacob ni Juan (lëë grop xingan men̄ ne lë Zebedé ga) no tib len̄ barcw gza pxoz zho, noquiaabdie zho guieë ne rgaa mel̄; dzigo bredz me zho. ²² Zigne bredz me zho biaan̄nieque pxoz zho barcw ga, laa zho zienal̄ zhits me.

Zëëb diidz grëtaa milagr ne run Jesús

²³ Dipse xtan zha Galilé, guiedz ne rdziñtaa Jesús rie me grë yadoo ne zob lad guiedz co rseed me miech Xtiidz Dios, rnee me lo zho zha racladz Dios gban zho, ni run̄guiac me grë men̄ rzacnë, tel̄ pe guiel̄guiidztaa rzac zho.

²⁴ Tel̄ pa lotaaw zëëb diidz scataa run me grë milagr, haxta nëz Siria bin miecha. Nzian grë men̄ co brieë ga bdziñnie zho grë zhimguidz zho lo me: no grë men̄ rzacnë co noguitnie men̄dox, no zho rlan guiel̄guidz gutye, no zho gutoo dipse xcuerp, no zho rlan grë pe stib guiel̄guidz, nogaa zho rlan grë pe yoob; grëse zho beenguiac me zho.

²⁵ Zaatne zieetaa me, miech guizhiu ne nal̄ zhits me, grë zha Galilé, grë zha Decápolis, grë zha Jerusalén, grë zha Judé, haxta grë zha ne no stib nëz ro guiubee Jordán.

5

Cho nac zha ne wen zie
(Lc. 6:20-23)

¹ Tib dzew, gon Jesús laa grë miech guizhiu co bdziñ lo me, dzigo bzoquia me glaa tib guic gui win. Ga zob me, bdziñ grë xpëëdsuel me lo me, ² dzigo psilo me pseed me zho, rëb me:

³ —iWen zie zha ne rien ib none gbig zho lo Dios, sac ib zdziñ zho zaatne rnabey me!

⁴ 'iWen zie zha ne mban rac roon niina, sac schoobladz Dios zdoo zho!

⁵ 'iWen zie zha ndooladz, zha ne zienie guic gban zigne rnabey Dios, sac scaania zho guidzliu ne gdeed me lo zho!

⁶ 'iWen zie zha ne racladz gun grë mine rnabey Dios, rzac zhow zigne rzac zha ne rcaabedz, zha ne rnabгаа zhis, sac ible zacnie Dios zho parne grieelo gun zhow!

⁷ 'iWen zie zha ne rquia zdoo miech, sac zigne rquia zdoo zho samiech zho scaque Dios squia zdoo me zho!

⁸ 'iWen zie zha ne mbele zdoo, zha ne biaanmbele lo xtol, sac zanlo zho Dios!

⁹ 'iWen zie zha ne noxco zaacse gban miech, til d zho, sac masaque mëed gac zho lo Dios!

¹⁰ 'iWen zie zha ne loxaque porne quiayun zho mine rnabey Dios, rquianal miech zho, sac ible zdziñ zho zaatne rnabey me!

¹¹ 'Zig nac to, zeene csilo grë miech yquiaago zho to, ctsidil zho to, yquiadidzguizh zho to loxaque ne rliladz to naa, iwen zie to ga! ¹² iNley golco zdoo to, nguieel golgac, sac gon tib guieñzaac nroob ne gneedz Dios lo to! Golsoladz ganle, scaque been zho grë zha ne pxeel me padzeela biadnee xtiidz me.

Nac to zig nac zed, zig nac biini
(Mr. 9:50; Lc. 14:34-35)

¹³ 'Masaque nac to lo guidzliu rii zig nac zed. Nanle to ganle pa lotaa rquiin zed, per telne nzhida, ¿pa dieñ rquiina? iLëë gdib rliaala lo guizh, zaatne rded rzë miech rzëëni zhow!

¹⁴ 'Nac to zig tib biini ne noziini lo guidzliu. Griyelod tsongueets to, sac tib guiedz ne ndxie glaa tib guic gui, griyelod tsongueetsa. ¹⁵ Golguieñ ganle nacd biini parne tsolana, sinque parne gziiniw lo grë

miech ne no len yu. ¹⁶ Zaacse sca golgac, mine rquiin min co golgun, masaque lëëw gac zig tib biini; zeena zeene gan miech biini co zien zho ganle pa lotaa men nroob nac PxoZ to men ne no gbaa.

¹⁷ 'Guiabde to togo bod laa naa zial zialtichee naa ley ne psan Moisés, o grëгаа mine bnee zha ne biadteed xtiidz Dios padzeela; sac led mincod zial naa, sinque laa naa zial gun naaw zigne no gaca.

¹⁸ Gneli naa lo to ganle: Laga niaa guidzliu rii, laga niaa gbaa, ib none gac mine zhobnee lo ley, mine bneгаа zha ne biadteed xtiidz Dios, ni tib lé paat gdzëëda.

¹⁹ Gacxe waa zha ne quiits tib ley niicle mine mazdraa wina, ni cseed zho miecha zigne run zho ga, ib tedsod zha nac zha ne mazdraa win guiaan lo grë zha ne yгаа zaatne rnabey Dios. Sangu zha ne guna zigne rnabeya, ni cseed zho miech scaque tsienal zhow, zha cosi nroob gacnon zho lo grë zha ne gdziñ zaatne rnabey Dios.

²⁰ 'Rso naa diidz lo to sca, zaacse golgac gunde to zigne run grë maistr ley, grë zha farisé; sac telne tsoxcode to gban to zigne racladz Dios, griyelod gdziñ to zaatne rnabey me.

Nodne gut miech
(Lc. 12:57-59)

²¹ 'Led nanle to ganle, no tib ley ne biaan lo xmengol to padzeela, rneew: "Gute luu samiech luu"; rnabeya zha ne gut samiech, ib none guetaque zho, quizhgazh zho dol co. ²² Sca rnee ley co, per zig nac zha ne gon në rac zdoo ran samiech, rrieequia beetle zho ga, ye zho riegual quizh falt co. Zig nac zha ne gnee pe tib diidznë lo samiech, none gacredz zho lo wxtis zeena gunquizh zho zho dol co; zha ne quieгаа samiech, lëëque zha rguib guey zho gabil ga.

²³ 'Gacxe waa tel ziesan to tib gon, per lo pcoogle zo to rsoladz to rdilnie to tib samiech to, ²⁴ gase golsan gon co, goltsie goltsienabgazh perdon lo zha ne rlëë to lo ga, gbireraa to dzigo gdeed to gon co. ²⁵ Zha ne sca rlëënie to, goltsoxco pront golguiaan wen; zeena tsiezod zho to lo wxtis, sac tel laa zho tsiezo to lo wxtis ib znabey wxtis tso to ladzguib. ²⁶ Gneli naa lo to ganle

grieede to ga, haxtaque lozh quizh to grë dimi ne gnab wxtis lo to.

Nodne tsonie miech zha ne led tsieeld zho

²⁷ 'Nanlaque to ganle zha rnee stib ley ne biaan lo xmengol to, rneew: "Zha ne nole tsieel, zigtaa mguiw zigtaa wnaaw, nodne tsonie zho zha ne led tsieeld zho." ²⁸ Per zig nac zha ne gon, ran tib wnaa ni rsilo zho riogui zho tsonie zho wnaa co, laa zho bdiitsle ley co.

²⁹ 'Gacxe waa, bziaalo to mine rquiaqui runctal to xtol to, mazd golcueegazha; niicle tel bziaalo derech tow. Peet nacd nitlo tib leque xcuerp to, ledle dib nacesw tsietsobe gabil. ³⁰ Laa tel niagaa tow, mine rquiaqui runctal to xtol to, niicle tel nia derech tow, golchuggazha. Peet nacd nitlo tib nia to, ledle nitlo to len gabil dib nace xcuerp to.

Nodne csëbtsieel miech
(Mt. 19:9; Mr. 10:11-12; Lc. 16:18)

³¹ 'No stib ley znu rnee: "Mgui ne racladz csaan tsieel, zac ctso zho; totsaque gdeed zho tib guits lo wnaa, zaatne raquiet ne laa zho psaan wnaa." ³² Per gni naa lo to ganle: telne quiangobd tsieel zho stib mgui, ni rsëbtsieel zho, lëëque zha rguib ga yquianie tsieel zho stib mgui. Mgui ne ctsieelnia wnaa co, dol ga gun zho, sac gon nole tsieel wnaa co.

Nodne yquidie miech

³³ 'Ziyon to ganle zha nac stib ley ne biaan lo xmengol to rneew: "Zha ne gzeet lë Dios par glu zun zho mine bnee zho, yase zeene gdeed zho tib gona, gunгаа zho pe tib dziina, ib none gun zhow." ³⁴ Per gni naa lo to ganle: nodne sca gzeet to lë Dios, per ni gbaa nodne ne sca gzeet to, sac gon ga nac zaatne zob Dios; ³⁵ per ni guidzliu, sac lo guidzliu nac zaatne zo ni me; per ni Jerusalén, sac ga nac guiedz nroob ne rnabey me; ³⁶ guiaabгаа to gzeet to guic to. Gunscade to, sac gon zig nac guic to, per ni tib guitsguic to grieelod csañ nquits to, grieelodгаа csañ ngas tow. ³⁷ Gacxe waa ncuaane rgobey to zrieelo gun to, golguiab: "zun naaw", togo riengaa to grieeloda, golguiab: "grieeloda"; tsoode to dieen cho gzeet to, sac gon led Diosdraa rnabey min co.

Nodne ctsire miech guielnë
(Lc. 6:27-36)

³⁸ 'No stib ley znu rnee: "Tel cuee zho tib bziaalo luu, guiaand luu scase bleequ stib bziaalo zho, tel cueegaa zho tib lay luu, scaque been blee stib lay zho." ³⁹ Sangue naa laa naa rso diidz lo to gon, gunscade to; zha ne gacntseeb lo to, gacndaande to lo zho. Tel cap zho lo to, tiblise golgac, ib gunde to glisaque nia to.

⁴⁰ 'Zha ne tsiezo to lo wxtis, ni lozh ga haxta gla zho xibiaagw to, golsaan güey zhow haxta xabnal to goldeed lo zho. ⁴¹ Zeene grieequia zha ne gnabey to güey to xyo zho tib grol hor, golgüeya, haxta tib hor goltsie güey tow. ⁴² Zha ne gnabtaa pe cos lo to, goldeeda; zig nac zha ne ziadtiin, goldeed ncuaane ziadtiin zho, ctsirede to zho scase.

⁴³ 'Ziyonle to ganle no zha ne znu rnee: "Zha ne rdzieel xtiidz luu bleynie zho, sca-gaa zha ne rlëe lo luu, blëenie zho." ⁴⁴ Per led scada gon, inone zaacse gac to lo zha ne rlëe lo to! ;Zha ne rgodee to, golnab lo Dios gunlay me zho! ⁴⁵ Zeena sca glu nli xpëed men ne zob gbaa nac to. Golgan ganle tel me rnabey me rziini ngbidz lo grëse miech, zigtaa lo zha wena, zigtagaa lo zha ntseeba; scaque nisguie me rsiaaba rquiin zho grëse zho, rbed me dien cho ngable lo me, chogaa ngabd lo me. ⁴⁶ ;Gase nasca golwi! Tel loxaque zha ne ndzieeldidz to zha cose rleynie to, ;niacxe zgaa to guielnzaac ne gdeed Dios? Haxta zha ne mazdraa ntseeb run min co. ⁴⁷ Tel loxaque zha ne nace menlidz to, lo zha cose zaacse rnee to, ;pe lëe guielenwen ga na rlu to? Haxta zha ne runbeyd Dios run min co. ⁴⁸ Goltsoxco sca ndzinli golgac, zigne rleynie Pxoz to (men ne zob gbaa) grëse miech, scaque none gun to.

6

Zha ne run xyudar samiech

¹ 'Zeene gun to xyudar samiech to, ib gunde to zaatne ndxiepaa miech ga so to glu to xquielwen to, par gan zho mine run to. Telne sca gun to, ygaade to guielnzaac ne gdeed Pxoz to men ne zob gbaa. ² Gacxe waa, zeene gun to xyudar zha ne guiend pe yquiin, gooldide tow zigne run grë zha ne rquiaalo rquia zdoo samiech; sac zha co tel

pe ncuane rgad zho, rzo zho len yadoo, rzo zho ro nêz rlozhd yquiaabdzie zhow par gacnanpaa miecha, zeena zha ne gona guiab zho: ¡Zha wentaa zha qui! ¡Gneli naa lo to ganle ne sca rianzuiuu zho lo miech, lëele gdib guielnzaac ne yгаа zho ga!

³ Golguien sca, zeene gun to xyudar zha ne no tib liaadz, choot lo gzodiidzde tow, per ni zha ne mazdraa ndzieeldidz to nodne gacnaa. ⁴ Dzigo scagaa Pxoꝝ to nroob guielnzaac ne gneedz me lo to, sac tel me grësew ran me.

Zha gzodiidznie miech Dios

(Lc. 11:2-4, 34-36; 12:22-31, 33-34; 16:13)

⁵ Scaque zeene gzodiidznie to me, gunde to zigne run grë zha ne rquiaalo miech wen nac zho. Sac tel zha co zeene rzodiidznie zho me, rzo zho zaatne ganpaa miech zho, zig nac len yadoo, zig nac len guiedz zaatne rded rzë miech. Gneli naa lo to ganle lëele guielnzaac ne yгаа zho ga. ⁶ Golguien zeene gzodiidznie to me, golseëb len lidz to dziits golsioog ro yu, ga golzodiidznie me. Ible ted-sod nroob guielnzaac gneedz me lo to, sac niicle ncuane mazdraa ngueets zhliana, ran mew.

⁷ Ni zeene nozodiidznie to me, gunde to ncuane nonee to lëew rlozh, lëew rsilo zigne run grë zha ne runbeyd me. Sac zha co rzac zho por nroob diidz gnee zho, por nzian vuelt gnee zhow dzigo squiaadiag mew. ⁸ Gunscade to, sac me ne nac me Pxoꝝ to gardle gnee to xliaadz to lo me laa me nanle pe nac ncuane rquiin to. ⁹ Gacxe waa zeene gzodiidznie to me, znu golnee: Dios, luu ne nac luu Pxoꝝ no, zob luu gbaa; luuse nac men ne mazdraa ndzon.

¹⁰ Luu nac men ne gnabey no, mine gnabeytaa luu zigne raca gbaa, scaque none gaca lo guidzliu nu.

¹¹ Been guielnzaac bneedz ncuane dioow no nadze.

¹² Bzhiguiel been no perdon grëse dol ne ziodziuuu no lo luu, zigne rdziuuu no samiech no perdon grë falt ne run zho lo no.

¹³ Gdeete luu diidz yquuil mendox no, been guielnzaac bla no lo ma.

Luu nac men ne rnabey, men ne rap poder, men ne mazdraa nroob. Mine rnab no nu, ndionpaa no zun luuw.

¹⁴ Sca nagon none gnee to. Ni golgona ganle, zha ne gon gun samiech zho perdon tel pe nactaa falt ne been zho lo zho, scaque Pxoꝝ to men ne zob gbaa, zun me zho perdon. ¹⁵ Zha ne gund samiech zho perdon, niicle megaa gund me perdon xtol zho.

¹⁶ Stiba, zeene nocuan to nozodiidznie to me, gunmbande to lo to. Sac grë zha ne rquiaalo miech wen nac zho, sca run zho; zeene nocuan zho xtsiinpaa run zho runmban zho lo zho par gan miech laa zho nocuan. Gneli naa lo to ganle, zha ne sca run lëele guielnzaac ne yгаа zho ga. ¹⁷⁻¹⁸ Gunscade to, nguieel golgac ine golzëë biegw guic to, golquib lo to, zeena ni tib choot guiend laa to nocuan, loxaque Pxoꝝ to gacnaa, sac grëse ncuane rac ngueets ran mew. Grëse ncuane rac, me rana, me nac men ne gneedz tib guielnzaac nroob lo to.

¹⁹ Tsienalde to loxaque dien zha gapchen to lo guidzliu rii, sac nac ncuane lo guidzliu rii rban ngbaana, rnitlo mxila, haxta noxtseeb guioochena. ²⁰ Mazd goltsoxco yгаа to guielnzaac ndzon ne no gbaa, sac mine no gbaa, led yed min co guioochen, led yed min co cuan ngbaan, led yedgaaw gnitlo mxil. ²¹ Golgona ganle, guielnzaac ne gon gunlo to, ga glu pa gdzin xalm to, sac zaatne gunlo to guielnzaac co ga nac zaatne gdzin xalm to.

²² Rrieequia nac bziaalo to zig nac tib biini. Telne niapse lo grë ncuane ndzinli rwi to, dzigo gdipse xcuerp to no lo guielbiini. ²³ Laa telne loxaque lo grë ncuane nonguield rwi to, dzigo gdipse xcuerp to no lo guielcow ga. ¡Zha rnazhe lo guielcow co, tel lëëque biini noyac guielcow!

²⁴ Golgona ganle, grielod gon gleynie to dimi, ni gleynieque to Dios. Ib none telne Dios rleynie to, me none gleynie to, togo dimigaaw, dimi golleynie.

²⁵ Gacxe waa, gni naa lo to ganle: Tsoꝝe to zhgab dien zha gban to lo guidzliu rii, pa griee pe gow to, pe guie to, pe gacwxabgaa to. Stiba, ¿niacxe mazdraa non guielwagw lo xquielmban to? Xabgaa tow, ¿niacxe mazdraa nona lo xcuerp to? ²⁶ Golwi lo grë mguin ganle, led yed ma rquia gon, led yed ma rquia wlaap, led yed ma rgotsow pe guielgon, per row ma, sac Pxoꝝ to men ne

zob gbaa, men co rdeed ncuaane row ma. jTel to gon, mazdraa non to lo gre mguin co! ²⁷ Ni lalnu paat rquiinda tant tso to zhgab. Telne guiab to tso to zhgab dien zha gacnool xtse to spalal yeense, zniacxe zrieelo to gunnool tow?

²⁸ 'Zig nac lar, zpe nacne tant tso to zhgab dien pe gacwxab to? Pe rwide to lo gre guiee ne ganle zeeb dan, zha rrooba, led yeda rio zhgab dien zha gacwxaba, per niow rnaw; ²⁹ gni naa lo to ganle, per ni rey Salomón con gre xab niazh me, blud me scataa niow.

³⁰ 'Gase na ganle golwi, niicxe gre guiee dan co na, zna dze zob nguiaw, gzhe widz laaw bidzle, laaw tsele, ni scataa niow rgacwxab Diosa, zpe lel to dzigo ygacwxab me, niicle ne squi gard guien to dib zdoo to gnalo to me?

³¹ 'Tso de to zhgab sca guiab to: "zBay pa griee pe dioow ne, pa griee pe dio ne, pa griee pe dziaacwxab ne?" ³² Gre miech ne runbeyd Dios, tibaque zhgab co rio zho. Sangue to golsoladz ganle, Pxoz to men ne zob gbaa, nanle me pe nac gre xliadz to, ³³ me nac men ne gneedz ncuaane yquiin to, per ib none glo tsoxco to gban to zigne rnabey me. ³⁴ Golguien sca tso de to zhgab dien zha ted to gzhe widz, sac gzhe widz co zhaalae xco ne ziaad. Tib tib dze zhaase zhaase zhgab ne ziaadniew.

7

Nodne gzee zdoo ne cho zha rac

(Lc. 6:37-38, 41-42)

¹ Blozh ga rebcha me lo zho:

—Golguien, ib gunde to ne gac zdoo to zeene ran to ncuaan nonguield ne run stib miech, sac to tozhal gunquizh zhow; zeena scagaa Dios, gunscad me to. ² Sac gon tel zha rzac to samiech to, scasaque sac Dios to.

³ jLeda ga gon tso to lozhd gzee zdoo to dien cho pe run, ni nenda mazdraa mine run to! ⁴ zPe ro to glisqui to mine run stib zho, ni tel mazdraa nac mine run to? ⁵ jGolguien sca glude to ncuaane nacde to! Glo goltsoxco ndzinli gac to, dzigo lozh ga zac tsienee to lo stib zho zha gacndzinli zho.

⁶ 'Ndzon nac Xtiidz Dios, gdeete tow lo zha ne rleeniew, sac gon rriequia lo mecw ga gdeed tow, ib zun zho mine run mecw zactseeb zho lo to. Naca zig nac quie perl, gdeete tow lo zha ne rleynieda, sac gon rriequia lo nguts ga gdeed tow, tel ngutsa niicle ncuaane mazdraa non glaal zho lo ma, loxaque gzeeni maw.

Ncuaane gnabtaa ne zгаа new

(Mr. 1:22; Lc. 6:31, 43-44, 47-49; 11:9-13; 13:24-27)

⁷ 'Ncuaane rquiin to, golnaba lo Dios, scagaa me zneedz mew. Golguib tel pe racladz to, me nac men ne gacnie to gdziel tow. Golcuedzle me, scagaa me scaania me to. ⁸ Sac grese zha ne rbig lo me rnab zho ncuaane rquiin zho, rdeed mew. Zha ne rguib ncuaane racladz, racnie me zho rdziel zhow. Zha ne rbedzle me, rcaania me zho.

⁹ 'Golwi ganle, zig nac to zeene rnab xpeed to quiet gow win, zniacxe ziazh to co to tib quie nia win? ¹⁰ Zeene rnabгаа win mel, zniacxe zdeed to tib meel lo win? ¹¹ Led rioxco to lee niapse ncuaane wen rdeed to lo xpeed to, niicle ne miech ntseeb nac to. Telne sca rioxco to xpeed to, pelej Pxoz to dzigo, men ne zob gbaa, tsoxcod me to. Ib tedsod grese zha ne gnab lo me gdeed me ncuaane rquiin zho, zdeed mew.

¹² 'Zha ne racladz ndzinli gac miech lo zho, none glo zho zaacse gac zho lo miech. Zigtaa ley ne psan Moisesa, zigtagaa mine bnee gre zha ne biadteed xtiidz Dios padzeelaw, sca rnabeya.

¹³⁻¹⁴ 'Goltsoxco sca tsienal to mine rnabey Dios, niicle ne nac guielmban co zig nac zeene rzene ne tib nez nia. Zhis zha ne rzeeb nez co, per nez co zгаа miech guielmban ndzon ne rdeed Dios. Sac gon zha ne mban zigne notaa guic zho, rriequia tib nez nzhen ga zie zho; ndal miech ne zie nez co, per nez ne nitlo zho ga zie zho.

¹⁵ 'Nsin golso lo zha ne gacladz yquidie to gne zho xtiidz Dios noteed zho, niicle ndooladz rlu zho pale cho gre mecwxiiil yeen, per zha ntseeba, masaque nac zho zig gre coyot ble. ¹⁶ Zigne runbey miech tib yag por nex ne rquia low, scaque wen wen golwi zha nac ncuaane run zho, dzigo ga gunbey to cho nac zho. Sac gon zig

nac uv, rquiada lo yag guiets; niicle guig-wgaaw rquiada lo grë lbë guiets. ¹⁷ Tib tib yag nex rdeedsew xnexa. Tib yag wen, nex wen rquia low; scagaa yag ncuaana, nex ncuaan rquia low. ¹⁸ Grieelod yquia nex ncuaan tib lo yag ne rquia nex wen, ni grieelodgaa yquia nex wen tib lo yag ncuaan. ¹⁹ Gacxe waa grë yag ne rquia nex ncuaan, paat rquiinda, lëë gdib rruga, rlozh ga rzëëg zhow. ²⁰ Miñ co nagon rne naa lo to, zha ne sca guiaad, por ncuaane run zho ga gunbey to cho nac zho.

²¹ 'Grë zha ne rnee noxco zho mine rnabey Dios, no zho lega rneesew. Nenda haxta rnee zho, naa nac men ne rnabey zho, per gdziñd zho zaatne rnabey Pxoza naa. Sac zha ne nlipaa run mine rnabey me, zha cose gdziñ ga. ²² Gal dze co, nzian zha ne griequia gnë lo naa: "Conque rdziuuñbey no luu, blactaa name bio no bionee no Xtiidz luu lo miech, nzian milagr ne bdziuuñ no, haxta mendox bdziuuñcxooñ no zeene bzeet no lë luu." ²³ Niicle sca gnë zho, ib ycaaniad naa zho, sonëz naa zho; sac ni lalnu beend zho ncuaane ndzinli.

²⁴ 'Zha ne rquiaadiag mine rne naa, ni rioxco zho rban zhow zigne naca, rriequia nac zho ga zig tib zha ndzielguic ne bzaa lidz zaatne nac tib lo quie. ²⁵ Niicle riab guiedox per peet racd lidz zho, niicle rrie medox, nis naal ne raclo rded zaatne zoba ga, per rbixcheda.

²⁶ 'Laa grë zha ne rquiaadiag xtidz naa, ni rioxcd zho gban zhow zigne naca, ziaad gac zho ga zig tib zha nxen ne güeyzoob lidz zaatne nac tib lo yuzh. ²⁷ Znuse bnitlo lidz zho, sac zeene biab guiedox, lo medox ne brieë, lo nis naal ne goclo bded zaatne zoba, znuse bixchew, ni stib lëw biaand.

²⁸ Zeene blozh bnee Jesús, grë miech ne noquiaadiag ga, per nli rzee zdoo zho gon zho zha rseed me, ²⁹ sac rlu men rnabey nac me, led yed me rseed miech zig rseed grë maistr ley.

8

Biac tib mgui ne rlan lepr

(Mr. 1:40-45; Lc. 5:12-16)

¹ Laa Jesús ziad-zëëb cho gui win co, miech guizhiu ne nal zhits me, ² tibaque

briequia tib mgui ne rlan guiedzdox ne lë lepr, wbig me pquiitgzhil me lo Jesús, rëb me:

—Tebaa siguiel luu gunguiac luu naa.

³ Dzigo pxobnia Jesús guic mgui, rëb Jesús:

—Zunguiac naa luu. ¡Niinagazh laa luu guiaanmbe!

Horcogazha laa grë guiedz co bnitlo.

⁴ Dzigo rëbchaa Jesús lo me:

—Bina ganle, choot lo gzodiidzd luu gon zha biac luu; sinque güey lo pxoz güeyson gon ne rieguial gdeed luu zigne rnabey ley ne psan Moisés, zeena gan zho ganle laa luu biacle.

Biac tib zha ne rquia dziin tib lo menquiib (Lc. 7:1-10)

⁵ Loxaque bdziñ Jesús guiedz Capernaum, laa tib men ne rnabey lo xmenquiib zha Roma bdziñle lo me, rnab men co gunguiac Jesús tib zha ne quia xtsiñ me, rëb me:

⁶ —Been tib guielnzaac beenguiac tib zha ne rquia xtsiñ naa, laa zho nix lidz naa ib gacd grial zho, mban rac zho yoobdox ne rquia zho.

⁷ Dzigo rëbchaa Jesús:

—Peet nacda, na së naa guio ne gunguiac naa zho.

⁸ —Coo —rëb menquiib co—, rieguiald csodziin naa luu sëë luu haxta lidz naa. Nanpaa naa zrieelo luu nugazh gnabey luu guiac zho. ⁹ Sac zig nac naa no zha ne rnabey lo naa, ni ron naa mine rnabey zho; scagaa tel guiep naa tib lo zhaguiib ne rnabey naa: "Güey nu", rie zho; rnegaa naa: "Dë nu", riaad zho; zha ne rungaa dziin lo naaw, mine rnabeytaa naa zho, run zhow. Scaque luu nagon nanpaa naa zrieelo sca gnabey luu guiac xmoz naa.

¹⁰ Zeene gon Jesús sca rnee men co, rley me, rëb me lo grë zha ne zienal zhits me ga:

—Lo grë zha Israel, gard gon gan naa tib zha ne squitaa dib zdoo rnalo Dios. ¹¹ Ni golquiaadiaga ganle, zdziñ dze grële zha zit ne squi gnalo Dios, zha co yгаа sobnie Abraham, sobnie Isaac ni Jacob zaatne rnabey Dios. ¹² Laa grë zha Israel, niicle nac zho zha ne nac diidz gdziñ ga, lel lo ncow nëz ley guiaan zho, ga tso zho goonnë zho, haxta gow lay zho lo guielnedox co.

¹³ Blozh ga rëbcha me lo men_guiib co:
—Bzë nasca, gocnan_n gan_le zigne
bliladzse luu guiac xmoz luu, sca gaca.
Horcogazha laa moz co biac.

Biac xniadzoop Pedr
(Mr. 1:29-34; Lc. 4:38-41)

¹⁴ Laa zeene bdzi_n Jesús lidz Pedr, gon_n
me laa xniadzoop Pedr nix rlan xlëe.
¹⁵ Dzigo bded me zaatne nix zhuz co,
zigne bzhen_n me nia zhuz laa xlëe co
blëz. Horcogazh guche zhuz been_lo zhuz
ncuaane dow zho.

¹⁶ Ziedzele dzew, laa ngbidz rzëëblew,
zeene bdzi_n grë miech co, nzian grë zha ne
nosacsi men_dox bdzi_nnie zho lo me. Grëse
zho been_guiac me, goctox me lo grë men_dox
ne nosacsi zho ga, be_nc_xoo_n me ma; ni
zha ne rlangaa pe stib guiel_guidz, grëse zho
been_guiac me. ¹⁷ Ga brieequia mine bzeet
Isá, men_n ne biadteed xtiidz Dios lo miech
padzeela, zeene rëb me: “Grëse xquiel_ne
ne, grëse guiel_guidz ne rziac ne, me biw.”

Zha ne racladz sëeb xnëz Jesús
(Mr. 4:35-41; Lc. 8:22-25; 9:57-62)

¹⁸ Zeene gon_n Jesús scataa ndal miech ne
goclo lo me ga, dzigo bnabey me xpëedscuel
me gzhixcuaa zho, sac laa zho no tedquia
stib nëz ro nisdoo co. ¹⁹ Dzigo wbig tib men_n
ne nac maistr ley lo me, rëb maistr co:

—Zaatne tsietaa luu gon_n, sēnal_n naa zhits
luu.

²⁰ Dzigo rëbcha me:

—Gocnana gan_le, naa ne nac naa Mgui
ne pxeel Dios, peet rapd naa nu, mazd zig
nac grë mēz, grë mguin_n, rap ma zhibliee
ma, rap ma zhiptsieez ma; per naa per ni
zaatne gaguies naa quianied naa.

²¹ Wbigaque stib zha ne rzēnal_le zhits
me, rëb zho:

—Ye naa gon_n sēnal_n naa zhits luu,
per bzhiguiel_n bneedz diidzbey cuēz naa
gangazh naa tsoliu pxoz naa.

²² Pquiab me rëb me:

—Dēnal_n zhits naa. Psaan, nzian grë zha
gut no, tsow tsiequeets zho samengut zho.

²³ Dzigo laa me bzëēbnie xpëedscuel me
tib len_n barcw, laa zho zie. ²⁴⁻²⁵ Laa zho
zie lo nis co, tibaque zeene psilo brieet tib
medox, masaque rlis me lo nis co, laaw
psilo rzëeb len_n barcw. Dzigo lëelëd güey

zho güeycuaan zho me, sac lëētaque nixguies
me.

—Ligier gan_le —rëb zho—, blee mcaal_n lo
luu. ¡Bui gan_le laa ne nitlo lo nis rii, csaand
luu guet ne nu!

²⁶ Dzigo rëbcha me lo zho:

—¿Pe nacne squitaa rdzieb to? ¡Gardaque
dzigo lëe gliladz to cho nac naa!

Dzigo guche me, bnee me lo me co, bnee
me lo nis co cuedzew. Horcogazha blëz me
co, niicle nis cow laaw bredze. ²⁷ Zeene gon_n
zhow, bzee zdoo zho.

—Bay chozhe waa nac men_n rii —rnee
zho—. ¿Zha nac ne haxta me, haxta nis ron
xtiidz me?

Men Gadar ne nosacsi men_dox
(Mr. 5:1-20; Lc. 8:26-39)

²⁸ Laa zho bdzi_ndze stib nëz ro nisdoo co,
zaatne nac xtan zha Gadar, zeene brie-
quia chop mgui ne nosacsi men_dox, bdzi_n
lo Jesús ga. Zha ntseeba, rdzieb miech zho,
choot rdete nëz co. Len_n baa brieet grop
mgui co bdzi_n zho ga, ²⁹ nguietz roptsie
zho rnee zho:

—¡Peet gund luu no Jesús, psaan no! Rdz-
iuunbey no luu, Xpëed Dios nac luu. Ne nli-
gaa been_guiel_nzaac csacsid luu no niinaga.

³⁰⁻³¹ Zitlaaque ga ndxie tib dzoön nguts
notop lag, dzigo bnab grë men_dox co lo
Jesús rëb ma:

—Tel_ne cuee luu no nu, bzhiguiel_n bneedz
diidz lose grë nguts qui gdzi_n no.

³² —Niinaga sca gol_tsie —rëb me.

Zigne psaan men_dox co grop mgui co,
güey ma bdzi_n ma lo grë nguts co. Horco
psilo grë nguts co, rquiaa ma corr güeypix
ma tib ro yeedox ne quia ro nisdoo co,
blial_n ma lo nis, grëse ma gut.

³³ Zha ne quianap grë nguts co, gzase zho
bzhoon_n. Güey zho lad guiedz güeyzodiidz
zho zha goc grë nguts co, ni bzodiidz zho
zha biac grop mgui ne nosacsi men_dox ga.

³⁴ Grëse miech co, brieet zho zieso zho.
Zeene bdzi_n zho gon_n zho laa Jesús zo ga,
dzigo bnab zho lo me siguiel_n me gbi me
xtan zho.

9

Biac tib men_n ne gutoo
(Mr. 2:1-12; Lc. 5:17-26)

¹ Dzigo wbiireque bzëeb zho len barcw, bdziñ zho guiedz Capernaum stib, sac ga nac zaatne rbëz Jesús len dze co. ² Zhisaque goc bdziñ me, laa zho bdziñniele tib men rzacnë lo me, dipse men co gutoo, ib gacd së me. Lo yag zhoob me bdziñnie zho me ga.

Zeene gon Jesús dib zdoos grë zha co rnalo zho ne me gunguiac men rzacnë co, rëbchaa me lo men rzacnë co:

—iNley bloo zdoos luu xin! iLaa naa benle perdon grëse xtolu luu!

³ Ga zob blalaa maistr ley, zeene gon zho sca bnee me, bza zdoos zho rëb zho: “iQuia-guitnie men qui Dios gon squi rzë xtiidz me!” ⁴ Bienga Jesús sca rza zdoos zho, dzigo rëbchaa me:

—Lëda i gon squi rza zdoos to. ⁵ Nli nganda guiab ne lo miech: “Laa naa benle perdon grëse xtolu luu”; per grieelod lega guiab ne laa ne gunguiac zho. ⁶ Gacnan to sca ganle naa ne nac naa Mgui ne pxeel Dios, ible rap naa poder par gun naa miech perdon.

Dzigo rëbchaa me lo men rzacnë co:

—iNiinagazh guche i, bi yag ne bzhoob luu i, zeen bzë!

⁷ Zigne sca bnee me, laa mgui co bzoli, laa me zey. ⁸ Grë miech guizhiu ne ndxie ga, zeene gon zho sca beenguiac me mgui co, bdzieb zho. Psilo zho rdeed zho xquizh lo Dios, scataa poder ne bdeed Dios lo me.

Bredz Jesús Matew

(Mr. 2:13-17; Lc. 5:27-32)

⁹ Blozh ga laa Jesús brie ga. Ro nëz zieded me gon me tib men lë Matew, lëetaque laa men co zob lo mezh zaatne razh dimi ne rey lo zha Roma; sac me rcaania dimi co. Dzigo bredz Jesús me tsienal me zhits Jesús. Ga guso me, laa me zienal.

¹⁰ Bded ga güeynie me Jesús tib wagw lidz me. Grë zha ne rcaania dimi ne razh lo zha Roma, grë zha ne zëeb diidz nac zha ntseeb, tipse brenie Jesús zho grë xpëedscuel me.

¹¹ Blalaa zha farisé, gon zho sca tipse zobnie me grë zha co, bded ga, rëbchaa zho lo xpëedscuel me:

—iMod scataa na rownie xmaistr to grë zha ngoopdol, grë zha beed ne nac recaudador!

¹² Bin Jesús sca quianee zho, dzigo rëbchaa me lo zho:

—Nanle to ganle, zha ne run rmed, zaatne no zha rzacnë ga rquiin zho, i niacxe squiin zho zaatne no zha ne ndip ndaan?

¹³ Golsoladz ganle znu rnee Dios: “Laa naa racladz gacndooladz miech, yquia zdoos zho samiech zho, racladzdaxe naa waa guiaad zho dieen peraa guiaadlogon zho lo naa.” Mazd ganle goltsie, tsow golsob golguien dien zha nacne sca rnee me. Tel naa, zialguibd naa miech wen, sinque laa naa zialguib grë zha ngoopdol.

iPe nacne rcuand xpëedscuel Jesús?

(Mr. 2:18-22; Lc. 5:33-39)

¹⁴ Bdzinaque xpëedscuel Juan Bautist, bn-abdiidz zho lo Jesús, rëb zho:

—iPe nac waa ib rcuand xpëedscuel luu? Ni no grë no zha farisé, zhiga zhiga laa no rcuanle.

¹⁵ Pquiab me rëb me lo zho:

—Zaatne nadien noyac tib guieltsieel, ipe niacxe lega csilo grë zha ne ndxie lo lni tso zho guielnë, ycuan zho, ni ran zho laa mgui ne notsieelnia zo lo zho? Per dzin dze zeene laa mgui co gbiche, ni zeene laa dze co gdzin, dzigosi nagon rieguial tso zho guielnë, rieguial ycuan zho.

¹⁶ Ranle to ganle, zha ne rquiaabdie tib lë lar, yquiaad zho lar cub lad lar gox, sac zha ne sca gun paat yquiind wquiaabdie co. Zeene laa lar cub gbe, lëëque lëëw gunnat zaatne nriez lar gox. ¹⁷ Scaque tsod zha ne cotsow vin cub tib len guid ne padzeela noquiin, sac stsiez nziu cuba; dzigo nicle guid cow, niicle nziugaaw laaw nitlo ga. Gacxe, tel nziu cuba none len guid cubaque tsotsowa.

Brieaban tib mëdwnaa yeen

(Mr. 5:21-43; Lc. 8:40-56)

¹⁸ Lëetaque sca quianee Jesús lo xpëedscuel Juan Bautist, zeene bdziñ tib mgui ne nac zha non yadoo. Zigne bdzin me pquiitgzhib me lo Jesús, rëb me:

—Been tib guielnzaac së luu guio ne lidz naa. Laa tib xpëdwnaa naa blozh niina, per nanpaa naa telne cxobnia luu guic win, zbeeban luu win.

¹⁹ Dzigo bio Jesús nëz zienal me zhits men co, gza xpëedscuel me. ²⁰ Lad grë

miech ne zienal ga, lad co no tib men wnaa, gocle tsiipchop iz rlan me tib guielguidz, rzac me zigne rzac grë men wnaa gzob mëë, tibaque rlan mew ib rbëzda.

Ga zie me, zeene wbig me nëz zhits Jesús, bzhen me ro lar ne mbix Jesús, ²¹ sac tibaque güeynie guic me, ziac me totsaque ygaa xab Jesús nia me. ²² Dzigo w bire lo Jesús, dze bui Jesús lo me.

—Xin —rëb Jesús—, peet tsienied guic luu. Laa luu biac sacne bliladz luu naa.

Gataa laa wnaa co biac lo guielguidz co.

²³ Laa zeene bdzin Jesús lidz men rnabey co, laa zha ne rool ndxieie, noquiaa zho grë di ne rac lo ngutoo, grëraa zha ne ndxie ga, nguiedz zëëb tsi zho roon zho, tib ruid ne rac. ²⁴ Dzigo rëbchaa me lo zho:

—Golrieë nëz ley, sac gon gute mëëd qui, nixguiesse win.

Zha ne rlëë, zha ne rzhidzniegaa me, laa zho brieë ley. ²⁵ Dzigo laa me bzëëb len yu zaatne nix mëëd co, bzhen me nia win. ¡Horcogazha laa win guche!

²⁶ Grëse guiedz ne ndxie dib gax ga, gonañ miech scataa milagr nroob ne been me, bleeban me mëëd co.

Biac chop zha ne rold lo ni tib zha ngop

²⁷ Zeene laa Jesús wbi ga, nëz zie me brieena chop zha ne rold lo zhits me, nguiedz rbedz zho rnee zho:

—¡Jesús, xingan David, pquia zdoo no!

²⁸ Bdzin Jesús yu ne rbëz me, laa zho wbig lo me. Dzigo rëbchaa me lo zho:

—¿Dib zdoo to dzigo lëë rliladz to zrieelo gunguiac naa to?

—Dib zdoo now —rëb zho.

²⁹ Dzigo pquiaania me zhits bziaalo zho, ni rëb me:

—Mine bliladz to i nasca, laaw gac niina zigne bliladz tow.

³⁰ ¡Horcogazha laa lo grop zha co biac!

Dzigo pso Jesús diidz lo zho choot lo gzodiidzd zho zha biac zho, ³¹ ni zigne brieë zho ga, laa zho bzodiidzlew. Blozh ga, grëse guiedz ne ndxie dib gax ga, gonañ miech scataa nac milagr ne run me.

³² Loxaque wbi grop zha ne biac lo ga, laa bla zho bdzinlaque, bdzinnie zho tib men ne nosacsi mendox, psanngop ma men co.

³³ Dzigo benxoon Jesús mendox co, zeene

laa ma bzhoon laa men co psilo bnee. Grë miech guizhiu ne ndxie ga, per nli rzee zdoo zho, rnee zho:

—¡Wlaltaa gard dzian ne tib men ne squitaa gun grë milagr qui!

³⁴ Laa grë zha farisé rnee:

—Ma ne rnabey lo mendox nacie men qui, gane rrieelo runxoon me mendox.

³⁵ Grëse guiedz ne ndxie gax ga, zigtaa guiedz nrooba, zigtagaa guiedz lasa rie Jesús rieseed me miech. Zaatne rdzintaa me, rie me xyadoo zho rnee me lo zho zha racladz Dios gban zho, ni runguiac me zho tel pe nactaa guielguidz ne rzac zho.

³⁶ Zeene ran me grë miech guizhiu ne rcaalsa lo me, rquia zdoo me zho, sac ran me mban rac zho guiend cho tib zha ne gacnie zho, rac zho zig grë mëcwxiiil yeen ne guiend xbaxtor.

³⁷⁻³⁸ Tib vuelt haxta rëb me lo xpëëdscuel me:

—Golnab lo Dios cxeelraa me zha ne gun xtsiin me. Golwi ganle pe zhidaa grë miech qui, quiambëz zho dien cho gnee Xtiidz Dios lo zho. Masaque nac zho niina, zig tib guielgon ne golle gliiap.

10

Bzo Jesús zha ne tsienee xtiidz me

(Mr. 3:13-19; Lc. 6:12-16)

¹ Blozhse sca bnee Jesús, dzigo bredz me gza tsiipchop zha ne nac xpëëdscuel me ga, bzo me zho tsienee zho Xtiidz Dios lo miech, bdeed me poder lo zho gunxoon zho mendox zaatne nosacsi ma miech, ni gunguiac zho grë men rzacnë.

²⁻⁴ Znu lë gza tsiipchop zha co:

Simón (zha ne rneeque zho Pedr),

Ndrés (bets Simón),

Jacob ni Juan (zha co nac xingan Zebedé),

Lip,

Bartol,

Mazh,

Matew (zha ne ptop dimi ne razh lo zha Roma),

Jacob (xingan Alfé),

Lebeo (zha ne rneeque zho Tadé),

Simón (zha ne no lo partid ne racladz grieë zha Roma Israel),

ni Judas Iscariot (zha ne güeyto Jesús).

*Pxeel Jesús zha ne tsienee xtiidz me
(Mr. 6:7-13; Lc. 9:1-6)*

⁵ Blozhse ga, pso me diidz lo zho zha tsie zho, rëb me lo zho:

—Nanle to nagon, tsiede to zaatne no grë zha ne nacd zha Israel, niicle sëëbde to grë guiedz ne ndxie xtan zha Samar.

⁶ Zaatne no grë zha Israel, gase goltsie; lëë grë mëcwxil ne nonziaab ga.

⁷ 'Goltsie, goltsienee lo zho gacnan zho ganle laa dze ziaadgaxle zeene laa Dios csilo gnabey.

⁸ 'Grëse zha ne rzacnë, golgunguiac zho; zha ne rlan guiedz lepr, golsanmbe zho; zaatne nix zha ne gutle, golcueeban zho; grë zha ne nosacsi mendox, golguncxoon ma. Peet gnabde to lo miech, golguien ganle lega bnedz naa poder qui lo to, bzhiide tow.

⁹⁻¹⁰ 'Peet güeyde to, xab tow, lab tow, minë nacwse to, minë quiase ni to, mincose goltsienie. Güeyde to dimi, per ni tib quiet güeyde to; sac zaatne tsiegun to dziin rii, ib ga none gneedz zho ncuaane gow to.

¹¹ 'Guiedz ne gdziintaa to, golguib dien pa lo no tib zha ne ndzinli, dzigo lidz zha co goltsiebëz, haxta gza dze ne laa to gbi guiedz co. ¹² Zeene noguib to pa cuëz to, yu ne tsie to, zaacse golgac, golquiaabdiuzh zha ne no yu co, ¹³ golnab gunlay Dios zho. Telne wen gac zho lo to, zunlay me zho, togo guncasdga zho to, dzigo toque gunlay me. ¹⁴ Zha ne sca siguield ycaania to, golrieegazh lidz zho; guiedz ne siguield zho yquiaadiag zho minë nonee to, golbigazh guiedz co; gollit grë yudie co ni to, gollu lo zho ganle led xtoldraa to ga tel laa zho nitlo. ¹⁵ Gneli naa lo to ganle zeene gal dze ne laa Dios gun xquielwxtis me, bii lëëtaa gac guielnë ne ygaa grë miech ne bio guiedz Sodom, guiedz Gomorr, lëdle guielnë ro ne ygaa grë miech ne sca siguield ycaania to.

¹⁶ 'Nsin golso, golguien ganle rrieequia tib mëcwxil yeense nac to, ni laa naa rxel to zaatne no grë coyot dox. Ndooladz golgac, niowse golgac lo miech zig rac grë palom, per scagaa con cuidad goltsie, golgan ganle zha rzë meel. ¹⁷ Nligaa nsin golso, sac gon ib ziezo miech to lo wxtis, ni lëëque len yadoo ga quin zho to, ¹⁸ haxta ziezo zho to lo grëraa zha nroob ne rnabey. Laa zho

guna, loxaque ne nac to zha ne no xnëz naa, ni gagaa nagon gdeeda diidz gnee to xtidz naa lo grë zha co, ni lo grëragaa miech ne nacd zha Israel.

¹⁹ 'Zeene sca tsiezo zho to lo grë zha rnabey co, tsode to zhgab dien pe gnee to, dien zhagaa gnee tow; sac zeene sca tsie-gala, Dios gneedz diidz ne gnee to. ²⁰ Led tod gnee, sinque, jzhiEspiritu Pxoz to men ne zob gbaa, men co gnee ga!

²¹ 'Zlëëniëdox miech zha ne no xnëz naa. Zio zha ne lëëque bets zho, zha ne lëëque pxoz zho, zha ne lëëque xpëëd zho ctsidil zho, tsielo zho zho ladznia zha ne gut zho.

²² Tel to, guiets yag gan miech to, per telne dziits so to tel pe nactaa lo guielnë ne ted to, ib zgaa to tib guielmban ndzon ne gdziindraa dze lozh. ²³ Guiedz ne no to, zeene laa miech csilo yquiaanal to, golrieë ga, goltsie stib guiedz. Gneli naa lo to ganle, niicle stib guiedz stib guiedz tsie to, gardaque lozh tsieted to grë guiedz ne ndxie Israel zeene gal dze ne laa Mgui ne pxeel Dios guiaad stib.

²⁴ 'Golwi ganle zha ne nac mëëdscuel, tsod zha ne ndziibraa non lo maistr, zha ne rquiagaa dziin, tsod zha ne nonraa lo zha ne rree zho. ²⁵ Tel zha gun miech maistr, scaque gun zho mëëdscuel; tel pe cteed zho bizhuan dziin, mincoque cteed zho zha ne quia dziin. Gacxe waa peet tsienied guic to, tel pe nactaa ncuaane gnee miech to, sac gon niicxe naa name ne nac naa Dad, mendox rnee zho nac naa.

²⁶ 'Gdziebde to, zdziin dze ne glu ganle cho zienal minë nac diidzli, chogaa zienal guielntseeb, gal dze co grësew xoobnen.

²⁷ 'Grëse minë rne naa lo to zeene nese rziodiidza, golneew lo miech, haxta glaa guic yu golso, nguiedz golneew. ²⁸ Gdziebde to miech, golguien ganle no tib men nroobraa, lëë men co nac Dios. Tel miecha, loxaque cuerpse zrieelo zho csacsi zho, sangue Dios, zrieelo me gnitlo me miech dib xcuerp zho, dib xalm zho len gabil.

²⁹ 'Nligaa gdziebde to, csaand Dios lega pe gac to. Golwi ganle, zig nac grë mguin niicle ne rzac miech peet nond ma, haxta chop ma rdeed zho por tib gaaycentav; per Pxoz to gon men ne zob gbaa rsaanladzd

me ma, ni tib ma guete telne gdeete me didz. ³⁰ Pelel to dzigo csaan me, haxta guits guic tow, grësew ngaba lo me. ³¹ Gdziebde to sca, golguien ganle nonraa to lo tib dzoon mguin.

³² 'Gneli naa lo to ganle, zha ne glu lo miech nacie zho naa, scaque naa zeen gal dze co zlu naa lo Pxoze naa men ne zob gbaa, nacie naa zho. ³³ Sañgue zha ne ctoladzie naa lo miech, scaque naa ziep naa lo me runbeyd naa zho.

³⁴ 'iGuiabde to togo laa naa zial loxaque par cuin wense miech! Lëda gon, ye zial naa zialgunctil naa zho. ³⁵ Sac zha ne sëeb xnëz naa, zläenie xpëed zho zho, tel mëedgaaw, zläenie pxoz zho zho; scaque men wnaaw, zläenie xinzhih zho zho, zha ne nacгаа nguzhizha, zläenie xniaa tsieel zho zho. ³⁶ iLëeque menlidz miech gac zha ne glëe gan zho!

³⁷ 'Zha ne mazdraa rquia zdoo glëenie pxoz zho zho, glëenie xniaa zho zho, glëeniegaa xpëed zho zho, porne gun zho mine rnabey naa, peet xtsiind zha co par ygab zho xnëz naa. ³⁸ Scaque zha ne yquia zdoo cueeladz zho zho guiaadnal zho zhits naa, grieelod ygab zho lo naa. ³⁹ Sac grëse zha ne rquia zdoo guielmban ne rap zho lo guidzliu rii, ygaad zho guielmban ndzon ne gneedz Dios; sañgue zha ne cueeladz xquielmban, niicle tel csaci miech zho loxaque ne no zho xnëz naa, ib zgaa zho guielmban ndzon co.

⁴⁰ 'Niina gon ne squi tsie to, grëse zha ne zaacse ycaania to, zaacse gnee zho lo to, rrieequia naa ga sca ycaania zho; ni zha ne sca ycaania naa, rrieequia men ne pxeelle naa ga sca ycaania zho. ⁴¹ Zha ne cuëzlo tib men ne noteed xtiidz Dios lo miech, guielnzaac ne gdeed Dios lo men co, ye zho ygaa guielnzaac co. Zha ne cuëzlo tib miech ndzinli, guielnzaac ne gdeed Dios lo zha co, ye zho ygaaw. ⁴² Ni zha ne gneedz maase tib zhigaque nis yag lo cho tib zha win ne nac to ne nac to xpëedscuel naa, ib tedsod zdeed Dios guielnzaac ne tsieguial zho.

11

*Zha ne pxeel Juan Bautist
(Lc. 7:18-35)*

¹ Zeene blozh pso Jesús diidz lo gza tsiipchop zha co, dzigo laa zho zie. Blozh ga laa me brieque, güey me grë guiedz ne ndxie gax ga, güeyseed me grë miech co.

²⁻³ Len dze co no Juan Bautist ladzguiib, ga no Juan bin Juan zha nactaa grë milagr ne run Jesús, dzigo pxeel Juan bla xpëedscuel Juan güeynabdiidz zho lo me, dien pe lëele Men ne zëeble diidz cxeel Dios lo guidzliu ga nac me, te dzigoraad gdzin men co ye. ⁴ Dzigo rëbchaa me lo zho:

—Grë ncuaane bin to rne naa, grëgaa ncuaane gon to run naa, goltsie golzodiidza lo Juan. ⁵ Ran to ganle grë zha ne rold lo, grë zha ne gacd së, grë zha ne rlan guiedz lepr, grë zha ne rcuaat, laa zho riac; haxta grë zha ne gutle, laa zho rrieeban. Xtiidz Diosa, laaw quiagaaz lo grëse zha ne rquiina. Grësew, golzodiidza. ⁶ Ni golguiab lo me, dichos zha ne racchopd guic, sinque tiblque rac zho rliladz zho cho nac naa.

⁷⁻⁸ Zeene laa xpëedscuel Juan zey, dzigo psilo me bzeet me Juan lo miech guizhiu ne ndxie lo me ga, rëb me:

—Zeene güey to dan ngan co, güey to lo Juan, i zha dien güeynie guic to nian to me? i Pe rëb to rlu me zig tib goobgui ne nëzrii nëzrec rey me, te rëb to ye masaque grë lar niazh ne racw zha non nacw me? Per nanle to ganle zha ne scataa racwxab riid zho dan. ⁹ Nligaa cho dien güeynie guic to nac me, i te rëb to ye tib men ne noteed xtiidz Diosa? Gacnan to ganle tib men ne noteed xtiidz Dios gon nac me, ni me nac tib zha ne mazdraa nroob lo grë zha ne ziyun dziin co. ¹⁰ Me ga raquiet lo Xtiidz Dios zaatne znu rnee:

Sxel naa tib zha ne tednerga lo luu, zha co gzhixcuaa nëz ne ted luu.

¹¹ Ne nligaa lo grëse mguie ne zieded lo guidzliu gard grieequia tib zha ne mazdraa non lo Juan Bautist; per zha ne gon winraa zaatne rnabey Dios, nonraa zha co lo me.

¹² 'Desde psilo Juan noseed me miech zhapaad racladz Dios gban zho, ni rchoobnis me zho, hor co psiloque brieequia zha ne rlëenie zhiwseed Dios, gacxe waa zha ne nlipaa rdziebd, zha cose rcaaniaw, rzëeb zho xnëz me. ¹³ Mazd glo tibaque raquiet ne laa men ne cxeel Dios ga guiaad, zigtaa lo leya, zigtagaa grë zha ne biadteed xtiidz

Diosa, bzeet zhow. Ni niina ne laa Juan biaad, laa men co blanso. ¹⁴ Juan gon biaad niina zig no diidz guiaad Li; golgacnan sca ganle cho nac me. ¹⁵ Zha ne racladz guien zho zha nac gre mine none naa nu, iyquiaadiag zhow!

¹⁶⁻¹⁷ 'Nac gre miech rii, riend zho pe racladz zho. ¿Cho ganle run zig run zho? Lëe zho run mine run mëedlas ne rio wguite ro nêz, niicle rool xcompañer win di nguieel ried win, niicle roolga zho di ngan, roond win. ¹⁸ Sac gon biaad Juan, ran zho rowd me tel pe ncuane row zho, ried me ncuane rie zho, dzigo laa zho rnee mendox nacie me. ¹⁹ Blozh ga ziaad Mgui ne pxeel Dios, ran zho row me, rie me, laa zho rneeque, lega rowcho me, lega riecho me, ib riend me cho rtsielsa me, haxta gre zha ngoopdol, haxta gre zha yozh ne rtop dimi ne razh lo zha Roma rzënie me. Sca rnee zho, sangue zha ne rgaa guielbiini ne rdeed Dios, rien zho cho nac zha ne ziaadgun xtsiin me.

Miech ne bzhiguield ncaania xtiidz Jesús (Lc. 10:13-15, 21-22)

²⁰ Blozhse ga, dzigo psilo Jesús bzeet me mine ygaa gre zha ne pcaaniad xtiidz me; sac nzian guiedz ne güey me niicle gon zho greeta milagr ne been me, per ib psaand zho xquielntseeb zho, rëb me:

²¹ —¡Probsaxe gre men guiedz Corazín, gre men guiedz Betsaid! Sac gon gonpaa zho gre poder ne rap Dios, per ib psaand zho xquielntseeb zho. Tel niaca mine nian gre men guiedz Tiro, gre men guiedz Sidón, gre milagr ne gon zho ben naa, ib nded-sod mban niac gre zha co nio zho guielnë, zëeb nsaan zho xquielntseeb zho, mbig zho lo Dios. ²² Gacnan zha Corazín, gacnan zha Betsaid sca ganle, gal dze ne gun Dios guielwxtis, lëeta caxtigw ne ygaa zha Tiro ni zha Sidón, mazdraa mine ygaa zho. ²³ Scaque zha Capernaum, masaque rzac zho niina zha nziuuraa lo Dios, per gacnan zho ganle haxta guiet lo ncowdoo ne guey mendox ga guey zho; sac gon tel niaca mine nian zha Sodom gre milagr ne ran zho noyun naa, ible nsaan zha co xquielntseeb zho, nitlod zho. ²⁴ ¡Gacnan zha Capernaum ganle gal dze ne gun Dios guielwxtis, lëeta

caxtigw ne ygaa zha Sodom, mazdraa mine ygaa zho!

²⁵ Dzigo bzodiidznie Jesús Dios, rëb me:

—Dios luu ne nac luu Pxoza naa, luu rnabey gbaa luu rnabey guidzliu, rnedz naa xquizh lo luu sac gre mine noyun luu nu niina bdeete luu diidz niacnan gre zha raca, sinque laaw blu luu lo gre zha ne nac zig gre mëedlas. ²⁶ Sca quiayun luu, sac ib scale racladz luu gaca.

²⁷ Blozh ga rëb me lo gre miech ne ndxie ga:

—Grëse ncuane ran to quiayun naa, Dios men ne nac Pxoza naa, me bneedz poder rii lo naa; sac ib laa me bzo naa, naa guna. Xpëed me nac naa, wen wen runbey me naa, scagaa naa wen wen runbey naa me. Choot runbeyd me zigne runbey naa me, per zha ne gacladz naa gunbey me, zunbey zho me.

²⁸ 'Grëse to ne nac to zha ne në noded, rdib rdzag to quiaguib to dien zha guiaanwen zdoo to, goltë lo naa, naa gneedz tib wdziiladz ndzon lo to. ²⁹ Nligaa golbig lo naa, goltënal zhiwseed naa, golgac tib miech tibliladz, tib miech ndooladz zigne nac naa; zeena gap to descans co. ³⁰ Nacda ncuane ngan, nacda ncuane guiab to glëbde to gun tow.

12

Dze ne rdziiladz zha Israel lo dziin (Mr. 2:23-28; Lc. 6:1-5)

¹ Len dze coquew, tib dze lëetaque dze ne rdziiladz zha Israel lo dziina, bded Jesús zaatne zëeb zhobxtil gre xpëedscuel me. Ga zie zho rcaabedz zho, dzigo psilo zho ptop zho mzion co dow zho zhobxtil co. ² Gon bla zha farisew, dzigo rëb zho:

—¡Lëda i gon noyun to, noguuits to ley i! Golguien ganle dze nda nac dze rii.

³ Pquiabchaa me rëb me lo zho:

—¿Pe gard glab to zaatne ziaad ganle zha been rey David, tib dze zeene pcaabedz me gre me zha ne ziegza me, ni zienied zho pe gow zho? ⁴ Rneew, bzëeb me len yadoo güey nab me guietxtil ne nac gon, downie me gre zha ne ziegza me ga, ni loxaque zha ne nace pxoz row guietxtil co, ¿pe led bdiitsd me ley ga? ⁵ Lo xley Moisés name zhobnee ganle zha haxta dze ne rdziiladz

to lo dziin run grë pxoz dziin len yadoo, ni rneeda dol ga sca run zho. ⁶ Golwi ganle zha rats ley par gac dziin len yadoo, ni yadoose ga, gacnan to ganle lo to nu zo men ne mazdraa non lo yadoo.

⁷ Rnee Dios lo Xtiidz me, quiambëzd me dien peraa gun miech, dien peraa cogon zho lo me, sinque mine racladz me guien zho yquia zdoo zho samiech zho. Tel niaca mine nli rien to min co, zien to gdziibdolde to zha ne rapd dol. ⁸ Gacnan to ganle naa ne nac naa Mgui ne pxeel Dios, naa rnabey dze rii, nanpaa naa pe nonguiel gac.

Biac tib mgui ne mband tib nia
(Mr. 3:1-6; Lc. 6:6-11)

⁹ Bded ga, gol stib dze ne rdziiladz zho lo dziina, güey Jesús len yadoo win ne zob lad guiedz co. ¹⁰ Lad grë miech ne ndxie len yadoo co, no tib mgui ne mband tib nia; porque laa zha farisé bñabdiidzlaque lo me dien pe nonguiela gunguiac me miech dze ne rdziiladz zho lo dziin. Sca bñabdiidz zho, sac quiaguib zho dien pe yquiaaqui zho me tsiezo zho me lo wxtis.

¹¹ Dzigo pquiab me rëb me lo zho:

—Togase dien, zha run to zeene lëetse dze rii rietsobe tib xpëcwxiiil to tib len blë nroob, led zëeb lëe rie to riebee to ma? ¹² Tel sca rquia zdoo to mëcwxiiil, igolguien ganle mazdraa gon non miech lo tib mëcwxiiil! Gacxe waa ible nonguiela gun ne xyudar samiech ne, niicle maase dze nda nac dze co.

¹³ Dzigo rëbchaa me lo mgui ne në nia ga:

—iBzigaa nia luu!

Zigne bzigaa mgui nia mgui, biacgazha, biaana zig nac stib mine ndaantaque ga.

¹⁴ Grë zha farisé co, zigne brie zho ga laa zho psilo bñediidz dien zha gdeeda diidz gut zho Jesús. ¹⁵ Bien Jesús sca no guic zho, dzigo mazd brie me ga. Miech guizhiu ne zienal zhits me, grëse men rza-cnë ne zienal ga, beenguiac me zho; ¹⁶ per pso me diidz lo zho, choot lo gzodiidz d zhow.

¹⁷ Ga briequia mine pquiaa Isá, tib men ne biadteed xtiidz Dios padzeela, zeene rëb me:

¹⁸ Lëe men rii bzooblo naa gun xtsin naa, rleynie naa me, rzac zdoo naa grë ncuaane run me.

Zded naa zhiEspíritu naa gacnie me, me nac men ne cxobnen xtidz naa lo grëse miech.

¹⁹ Tilnied me miech, sedzd yan me lo zho, sod me ro nëz goptsie me.

²⁰ Grë zha ne gzhe gzhele rac, zig tib goobgui ne quiaxweele, zig tib lë guier ne noyiidiele,

csand me zdoo zho;

zha ne mban rac lo xliaadz zho,

csaand me zho.

Min co tsoxco me, haxta gan me grëse miech gacnan mine nac diidzli, ni tsienal zhow.

²¹ Haxta zeene gan me ye grë zha ne nac-draa zha Israel, laa zho gnalo me.

Rëb zho mendox nacie Jesús

(Mr. 3:20-30; Lc. 6:43-45; 11:14-23; 12:10)

²² Dzigo güeynie zho tib mgui lo Jesús rold lo mgui ni gacdaque gnee mgui, sac nosacsi mendox mgui. Znuse beenguiac me mgui, gagazh psilo gon mgui, psilo bnee mgui. ²³ Grë miech ne ndxie lo me ga, per nli bzee zdoo zho, rnee zho:

—iBay pe lëe men qui naye nac Men ne zëeble diidz ga cxeel Dios!

²⁴ Zeene gon zha farisé sca rnee grë miech co, rzachaa zdoo zho rnee zho: “Pe Dios nazho cxeel me, ma ne rnabey lo mendox ma co nacie me, gane rrieelo runcxoon me mendox.”

²⁵ Bien Jesús sca rza guic zho, dzigo rëbchaa me lo zho:

—iNcuaane gacd gon rnee to! Tel tib wxtis nadien lëëque zha ne nacie zho csilo tilnie zho, niacxe zac gnabey zho? Tib guiedza, tel lëëque zha guiedz co tilnie menladz zho, led znuse lozh guiedz co; tib diigaa miecha, tel lëëque zha tilnie menlidz zho, niacxe nitlod dii co? ²⁶ Scaque mendox nagon, telne lëëque lëe ma guncxoon samendox ma, ipe nale na bnitlo ma! ²⁷ Nana ne squi rnee to Beelzebú nacie naa gane rrieelo runcxoon naa mendox, zha ne nacgrë to dzigo, cho nacie zho ne ye zho runcxoon ma? Gase naganle rlu dolox i quiayun to, squi rnee to. ²⁸ Sangue tel naa zhiEspíritu Dios nacie naa gane runcxoon naa mendox, ni ga rlu ganle laa Dios psilo quianabeyle nu.

²⁹ ¡Masaque nac mendox zig tib zha ne no xfuers, zha ne gacladz cuee grë ncuane no lidz zha co, none cxidoogazh zho zho!
³⁰ Tel mendoxa rlëenie ma naa, ni nanle to ganle zha ne rlëe lo ne, gacnied zho ne.

³¹⁻³² 'Gacnan to ganle, grëse dol ne run miech, grë tel zha rguie zho, rdzibdee zho, niicle tel haxta gneenë zho naa, bii zun Dios zho perdon min co; sangue zha ne gneenë zhiEspíritu me, ib gundraa me zho perdon.

³³ 'Nanle to ganle zig nac yag nex, mine nac yag, min co nac nex ne rdeeda. Tel yag wena nex wen rquia low, togo yag ncuangaaw, nex ncuanaque rquia low.

³⁴ ¡Scaque to nagon zhin mendox! ¿Zha nan to nadien gac to miech wen, tel desde zdo to ntseeb? Miech ntseeb to gane squi rzë xtiidz to, sac gon, ¡grëse diidz ne rrie ro miech, zdo zho rzaw! ³⁵ Gacxe waa, zha ne mbe zdo, niapse diidz wen, diidz ndooladz nac xtiidz zho. Sangue zha ne ntseeb zdo, niapse diidz ntseeb, niapse diidznë rrieche ro zho. ³⁶ Ni gal dze ne gon gun Dios guielwxtis, ib tedsod zunquizh me miech tib tib diidz ntseeb, tib tib diidznë ne sca rrie ro zho. ³⁷ Sac gon zigne rzë xtiidz zho niina, min co cueequia zho gal dze co, o mincogaa cteedquie zho.

Racladz zha farisé gan zho milagr
 (Mr. 3:31-35; 8:12; Lc. 8:19-21; 11:24-26, 29-32)

³⁸ Tib dze wbig zla zha farisé lo Jesús gza zho zla maistr ley, rëb zho lo me:

—Maestro, racladz no dzian no gun luu tib milagr, milagr ne glu nli Dios pxeel luu.

³⁹ Pquiab me rëb me lo zho:

—Nazdpaa ntseeb to, squitaa gocndip zdo to nëz lo Dios, ¿zha nacraa milagr ne racladz to gan to? ⁴⁰ Stibaque milagr gon gan to, lëe min co gac zeen gal dze ne laa Mgui ne pxeel Dios, tso len liu tson dze, tson guieel zigne bio Jonás len mel nroob co tson dze ni tson guieel. ⁴¹ Ni gal dze ne gon gun Dios xquielwxtis me, ib steedquie zha Nínive miech ntseeb ne nac to i; sac gon zeene güeynee Jonás lo zho, grëse zho psaan xquielntseeb zho wbig zho nëz lo Dios, laa to nëde to gon to diidz niicle ne lo to nu zo tib men ne mazdraa non lo Jonás.

⁴² Scaque rein ne bzob nëz Sabá, steedquie me to gal dze co, sac tel rein co golwi ganle pa lo guidzliu ne brie me biaadgan me rey Salomón, biadquiaadiag me grë xtiidz Salomón. Ni to lo to nu zo men ne mazdraa non lo Salomón, ni ib ronde to xtiidz me.

⁴³ 'Telne csaande to xquielntseeb to i gon, low lozh to. Sac to zig bzhaac tib zha ne psaci mendox. Zeene brie ma zdo zho, güey ma güeyquianzë ma grë dan zit güeyguib ma dien pa cuëz ma. Gonse ma rdzield zaatne cuëz ma, ⁴⁴ rëb ma: "Mazd laa naa gbireque guia naa zaatne brie naa ga." Zeene biire ma bdzin ma zdo zha co, gon ma nroob lugar no, pale tib yu dets, ⁴⁵ nacne güeyaque ma güeyxi ma zgadz samendox ma, ma ne mazdraa ntseeb blëznë ma zdo zha co. ¡Dzigole mazdraa mban biaan zha co, lëdlegaa zigne goc zho glo! Scadaa nagon gdzieelo to.

⁴⁶ Laa me bii noneeque, zeene laa xniaa me ni zha bets me bdzin, racladz zho gzodidznë zho me. Per brielod nzëeb zho haxta len yu, sac scataa miech guizhiu ne ndxie lo me ga. ⁴⁷ Dzigo rëb tib zho lo me:

—Laa xniaa luu gon ni zha bets luu quiambëz luu nëz ley, racladz zho gzodidznë zho luu.

⁴⁸ Pquiab me rëb me:

—¿Xnia naa ye, bets naa ye?

⁴⁹ Blis nia me, blu me grë xpëedscuel me, dzigo rëbcha me:

—Zha ne gon nac zig zha rii, lëe xnia naa ga, lëe bets naa ga. ⁵⁰ ¡Sac grëse zha ne run mine rnabey Pxo naa men ne zob gbaa, grëse zha co nac bets naa, nac bzian naa, nac xnia naa!

13

Nac Xtiidz Dios zig zhobxtil
 (Mr. 4:1-20; Lc. 8:4-15)

¹ Blozh ga brie Jesús güey me ro nisdoo. Ga zob me, ² zeene gon me nzian miech ne nocaalsa lo me ga, nacne bie me güey sob me tib len barcw zo gax ro nis co, psilo me pseed me zho.

³⁻⁴ Ndal grë ncuane pseed me zho, per niapse con cuent rnee mew lo zho. Lëe tib cuent ne bzodiidz me ga nu, rëb me:

—Tib zha name güey gon zhobxtil. Zeene laa zho quialaal zhob co, now bliaal gax

ro nēz, now bliaal lad quie, now bliaal len yag guiets. Mine bliaal gax ro nēz ga, güey grē mguin znuse dow maw. ⁵ Mine bliaal zaatne nac lad quie, znuse znuse blana, ⁶ per zeene laa lo ngbidz brie, znusaque bgoola, bidzgaw; sac guiend nroob low. ⁷ Mine bliaal zaatne nac len yag guiets co, zeene laa yag guiets pxii, bnitlogaw. ⁸ Sanguē mine bliaal zaatne nac lo liu naal, blana, brooba ni goca; lo tib tib zhob co no zhimziona brie galptsii zhob, now brie tsongala, nogaaw brie haxta tib gayoow.

⁹ Blozh ga, rēbcha me:

—Zha ne racladz guien mine rne naa nu, yquiaadiag zhow.

¹⁰ Zeene laa grē miech co zey, dzigo wbig xpēēdscuel me bnabdiidz zho lo me dien pe nac ne sca niapse con cuent rseed me grē miech. ¹¹ Pquiab me rēb me:

—Tel to, Dioszhal rlu lo to zha rnabey me, niicle ncuaane mazdraa ngeetsa; laa grēraa miech ne gard gbig lo me, grielod guien zhow. ¹² Sac zha ne noxcole dien zha rnabey me, zdedraa me guielbiini lo zho guien zhow, laa zha ne noxcoda, mine riense zho, stiche mew. ¹³ Sca rseed naa zho parne tsoguic zho zha rnabey Dios, per nac zho niicle nzhal lo zho rwi zho, per peet rand zho; niicle nzhal diag zho per peet rond zho; ib peet riend zho. ¹⁴ Lēē mine nac zho i bzeet Isá, zeene znu rēb me: Nac miech qui, niicle peraa ron zho, per peet riend zho;

niicle rwiraa zho, per peet rand zho.

¹⁵ Ne nlipaa miech nad, miech ndip zdo nac zho, rriequia ntse zho diag zho, ntse zho lo zho;

parne peet gond zho, peet gand zho.

Ib riend zho zha gbig zho lo naa, ygab zho xnēz naa, parne csilaa naa zho.

¹⁶ 'Sanguē to —rēb Jesús lo zho—. ¡Dichos to porne rien to pe ran to, ni riengaa to mine ron to! ¹⁷ Blactaa zha ne biadteed xtiidz Dios padzeela, blactaa zha ne güeynal mine nac diidzli, bzoobladz zho nian zho grē ncuaane ran to niina, per bgaad zho nian zhow; bzoobladz zho nquiaadiag zho grē ncuaane noquiaadiag to, per bgaad zho nion zhow.

¹⁸ 'Golquiaadiag sca ganle zha nac xcuent zha ne güey gon ga. ¹⁹ Ro nēz ne sca bliaal zhob co, sca nac palal miech ne riepaa zha ne rienee Xtiidz Dios lo zho, per rioguicd zhow, rlozh ga rdzinaque mendox, rietiche ma tel palalse mine rien zho. ²⁰ Lad quie ne bliaal spalal zhob co, sca nac grē zha ne rley rcaania Xtiidz Dios; ²¹ per led dib zdood zho rcaania zhow, gane zeene laa miech rsilo rlēē lo zho, laa miech rtsidil zho porne riladz zhow, rsaanga zhow. ²² Nogaa zho nac zig nac len yag guiets co. Rquiaadiag zho Xtiidz Dios, per rsilo zho lel grē ncuaane no lo guidzliu rii mazdraa rionie guic zho, rquidie grē dimi zho. Grē ncuaan co rioxcora zho, laa ne tsonie Xtiidz Dios guic zho, min co rquiaqui ib rund zho mine rnabey me. ²³ Laa liu naal ne bliaal mine scataa goc ga, sca nac grē zha ne dib zdo rquiaadiag Xtiidz Dios, rien zho zha naca, ni rban zhow zigne rnabeya. Rriequia grē ncuaane run zho, no zho nac zig mzion ne brie galptsii zhob ga, no zho nac zig mine brie tsongala, nogaa zho nac zig mine brie tib gayoow ga.

*Zha nac xquielrnabey Dios
(Mr. 4:30-34; Lc. 13:18-21)*

²⁴ Biire pcaalsa miech lo me stib, dzigo psiloque me pseed me zho con stib cuent, rēb me:

—Ziaad gac xquielrnabey Dios lo guidzliu rii zig bzhaac tib men ne gon zhobxtil. Niapse zhob wen, zhob nal gon me, ²⁵ per no tib zha ne rlēē lo me, gol tib pcow liu, horne grēse miech nixgues, güey zho güeylaal zho xmidz guizh ncuaan zaatne gon me.

²⁶ 'Zeene laa zhobxtil co psilo blan mzion, hor coraa blu laa guizh ncuaan co no lada. ²⁷ Grē zha ne quia xtsiin me, zeene gon zhow güey zho rēb zho lo me: "Tebaa gan luu ganle, dipse lad xoob luu zēēb guizh ncuaan, ¿dieen pa brieew gochniw ga?" ²⁸ Dzigo rēb me: "Rien naa no cho tib zha ne rlēē lo naa, zha co been dziin co."

'Gocladz zho, hor cogazh nielaadz zhow per bzhiguield me, ²⁹ rēb me lo zho: "Tsielaadzde tow, sac tel glaadz tow niina ye zhobxtil gliaadzniew. ³⁰ Golsaan sca zēēba ga, na zeene laa wlaap gac, hor co

gnabey naa zha ne quiits zhob, ctopgazh zhow gdziin zhow tib lad tseca; lozhraa ga quiits zho zhob, tsasa ga, glansow ro yu.”

³¹ Blozh ga bzeet me midz moxtaz, rëb me:

—Nac xquielrnabey Dios zig nac tib midz moxtaz ne ran miech dan rii. Nan to ganle midz moxtaz nac midz ne mazdraa win, ³² ni tel gacbniw, rrooba ni lëew rroobraa lo grë guizh ne ran zho ro yu, raca lal tib yag nex, haxta rdziin grë mguin rzhixcuua ma zhiptsieez ma lo grë zhicwa.

³³ Rëbaque me:

—Nac xquielrnabey Dios zig nac ncobi ne rquiaa men wnaa lad ncob ne riaa guietxtil. Niipaque ncobi riots tson lmud rin, ni dib nacse ncob co rzibe.

³⁴ Grëse mine pseed Jesús grë miech co, niapse con cuent bnee mew lo zho. ³⁵ Ga briequia mine bzeet zha ne biadteed xtidz Dios padzeela, zeene rëb zho: “Niapse con cuent cseed naa miech, sca gnee naa lo zho grëtaa ncuaane gard gacnan miech wlal ne bre guidzliu.”

Zha nac xcuent guizh ncuaan co

³⁶ Blozhse bnee Jesús lo grë miech co guey zho, yeque me laa me zey gza xpëëdscuel me. Bdziin zho ro yu, ga bnaab zho lo me siguiel me gnee me lo zho dien zha nac xcuent guizh ncuaan ne bzeet me ga. ³⁷ Dzigo rëbchaa me lo zho:

—Golgona sca, znu gon nac cuent co. Rriequia gon naa ga nac men ne gon zhob co. ³⁸ Liu ne bniaaw ga, nac lo guidzliu, zhobxtil co nac grë miech ne nole xnëz Dios, laa guizh ncuaan co nac grë zha ne no ladznia mendox. ³⁹ Zha ne güeygan guizh ncuaan co, lëe mendox ga. Dze lo wlaap co, gac dze ne gon Dios xquielwxtis me, zha ne tsie wlaap ga, lëe anjl ga. ⁴⁰ Ni zigne sca cuee zho guizh ncuaan co lad zhobxtil, gzëeg zhow, scapaa nagon gal dze ne gac xquielwxtis Dios, ⁴¹ sxel naa grë xanjl naa tsie zho tsiebee zho grë zha ntseeb, zha ne sca runctal xtol grëraa miech, lad zha ne no xnëz naa. ⁴² iGrëse zha ntseeb co, hor co laa zho guey lo guidox ne rieguiäl zho! Ga tso zho goonnë zho, haxta gow lay zho lo guielnëdox co. ⁴³ Laa grë zha ne

güeynal mine nac diidzli, zha co gdziin zatne rnabey Pxoz naa, masaque zig xbiini ngbidz glu zho ga. iZha ne racladz guiena yquiaadiag zhow!

⁴⁴ 'Ziaad gac xquielrnabey Dios zig tib ncuaan non ne noliu tib lo xcuaa miech. Zha ne gdziel tib ncuaane sca non, ib ted-sod zie zho sto zho grëse ncuaane rap zho grieedimi si zho liu co, parne gunchen zho ncuaan non co.

⁴⁵ 'Zha ne rzëeb lo xquielrnabey Dios ziaad gac zho zig tib zha ne rzi quie perl mine mazdraa niazh. ⁴⁶ Zeene ron zho pa no tib perl co, rto zho grëse ncuaane rap zho, rie zho rzi zhow.

⁴⁷ 'Nacaque xquielrnabey Dios, zig tib guiey nroob ne rgaa mel niina, zeene rsëeb ngooz mela lo nis grë lose mel rtopa. ⁴⁸ Rlozhse riodzëw, dzigo rbeequia zhow ro nis, garaa rzob zho rbe zho grë mel co; ma ne rquiin laa tib chicuid zole rio ma, laa ma ne rquiind rsëeb zho. ⁴⁹ Scapaa nagon gac miech gal dze ne gon Dios xquielwxtis me, ziaad grë xanjl me cuee zho grë zha ntseeb lo zha ne no xnëz me, ⁵⁰ tsieron zho zho lo guidox ne rieguiäl zho. Ga tso zho goonnë zho, haxta gow lay zho lo guielnëdox co.

⁵¹ Blozhse ga, rëb me lo zho:

—iPe bien to na zha nac grë mine blozh bne naa lo to nu?

Grëse zho pquiab rëb zho:

—Bien now.

⁵² Dzigo rëbchaa me:

—Tib zha ne rienle zha nac grë ley ne psan Moisés, ni squi guien zho zha nac zhiwseed Dios mine zialnie naa niina, masaque nac zho zig tib zha gol ne quianie chop lo ncuaan non lidz zho, quianie zho grë min gol-le ni quaniequegaa zho min cub.

Güey Jesús ladz me

(Mr. 6:1-6; Lc. 4:16-30)

⁵³ Blozhse sca bzodiidz me grë cuent co lo zho, laa me brieeg zie me nëz ladz me.

⁵⁴ Bdziin me ga güey me yadoo, psilo me pseed me grë miech co. Per nli rzee zdoo zho ron zho grë mine rnee me, rnabdiidzlsa zho rnee zho:

—iPazhe waa squitaa pseed men qui? iZha nac guielbiini ne squitaa rap me i, ne rnee miech ndal grë milagr ne run me?

⁵⁵ Tib zhinse ngurëyag name nac me. Led lëë xingan Marí i, bets me name nac Jacob, nac José, nac Simón ni Judas; ⁵⁶ grë bzian mew, nu no zho grë zho. ¿Pa dzigo güey me wseed qui?

⁵⁷ Ib been_{casd} zho me, haxta rlëë zho lo me. Zeene gon me sca rac zho, rëb_{chaa} me lo zho:

—Zha ne rteed xtiidz Dios, mazd wen rnee miech lo zho stib dan, stib guiedz, lëdle ladz zho ni men_{lidz} zho ni men_{ladz} zho nëd gun_{bey} zho.

⁵⁸ Beend me nzian milagr ga, sac sca ndip zdoo grë miech co ib nëd zho nliladz zho cho nac me.

14

Gut Juan Bautist

(Mr. 6:14-29; Lc. 9:7-9)

¹ Len dze co bin rey Herod (men ne rnabey Galilé) grë ncuaane run Jesús, sac tel pa lotaaw zëëb xtiidz me; ² dzigo rëb Herod lo grë zha ne run dziin lo me:

—Rien naa lëë Juan Bautist ga quiayun grë min co, segur brieegan me.

³ Sca rnee Herod sac nanwen me zha been me Juan. Me bnabey bgaa Juan bzoob zho Juan caden bio Juan ladzguiib, ⁴ loxaque ne rnee Juan lo me nonguiel_{da} ga lëëque Herodí ptsieelnia me, sac tsieelpaa bets me Lip nac Herodí. ⁵ Gocladz Herod niut me Juan, per bdzieb me men_{guiedz}, sac rleynie zho Juan, rien zho xtiidz Dios ziadteed Juan lo miech.

⁶ Laa tibtaa dzew, lëëtaque noyac zhilni Herod dze ne bloozh me stib iz, bded tib xindzoo Herodí squi ndxie grë zha ne zobnie me psilo ndzoo biee ndzoo. Bdzi-ladz me gon me zha biee ndzoo, ⁷ haxta brieer ro me rëb me: “Ncuaane gacladztaa luu gnab luu, znedz naaw.” ⁸ Per glole pquiil Herodí ndzoo, nacne rëb ndzoo lo me: “Mïne racladz naa, xoob guic Juan tib len bandej gneedz luuw lo naa niinagazh.”

⁹⁻¹⁰ Zeene bin Herod sca rëb ndzoo, mbanse rac me; per rdeetraaw diidz niab me grieeloda, sac grëse zha ne zobnie me ga, bin zho rëb me zdeed me ncuaane gnabtaa ndzoo. Dzigo racse me pxeel me zha ne güeychug guic Juan len ladzguiib.

¹¹ Zeene wbire zho, zhoobse guic Juan tib

len bandej bdeed zhow lo ndzoo, dzigo güey ndzoo güeydeed ndzoo pa lo xniaa ndzoo.

¹² Zeene gocnan xpëëdsuel Juana, güey zho güeylis zho me ga güeyqueets zho me. Blozh ga güeyzodiidz zho lo Jesús zha bzhaac me.

Bguiaan Jesús gaay mil miech

(Mr. 6:30-44; Lc. 9:10-17; Jn. 6:1-14)

¹³ Zeene bin Jesús sca bzhaac Juan, dzigo brieer me ga bzëëb me barcw zie me tib zaatne guiend miech. Per znuse bien diidza, nzian grë guiedz co zha ne gocnana, tib ro nis güey zho, glole zho bdziin zaatne no gdziin me ga.

¹⁴ Laa me noyet len barcw, zeene blis lo me gon me laa grë miech guizhiu co ndxiele ga; pquia zdoo me zho, beenguiac me grë mguidz ne zienie zho.

¹⁵ Laa dze ziedzelew, wbig xpëëdsuel me rëb zho lo me:

—Mazd gudz lo grë miech qui guey zho na, zeena guiob tsie zho grë guiedz win ne ndxie gax i tsiesi zho ncuaane gow zho; sac gon laa dze bdzele.

¹⁶ Pquiab me rëb me lo zho:

—¿Pe nacne guey zho squise? To none gdeed ncuaane gow zho.

¹⁷ Rëb_{chaa} zho:

—¿Per pe dien yguiaan no zho? Pe rnase gaay quietxtil ni chop mel ne ziaadnie no nu, lo grëtaa miech qui.

¹⁸ Dzigo bnabey me zho güeynie zho guietxtil co, güeynie zho mel co lo me, ¹⁹ ni bnabey me grë miech co bzob zho lo grë guizh nguia ne zëëb ga. Horco bzhen me gza quietxtil co ni grop mel co, blis lo me nëz gbaa, bdeed me xquizh lo Dios. Blozhse bdeed me xquizh, beengrol me gza quietxtil co, mel co ne, zigse rdeed mew lo xpëëdsuel me scase scase bdiiz zhow lo grë miech co. ²⁰⁻²¹ Grëse zho dow zho haxta zaatne bieltaa zdoo zho. Miech tafa, zha bguise rgaa zig gaay mil, nandragaa grë men wnaa, grë mëëdas; ni zeene blozh dow zho, scase ncuaane nroob biaan, biodzë tsiipchop chicuid bio grë quietxtil co, bio grë mel co.

Rzë Jesús lo nisdoos

(Mr. 6:45-56; Jn. 6:16-21)

²² Zeene blozh ga, bnabey Jesús xpëedscuel me bzëeb zho len barcw, zeena zienerga zho tedquia zho stib nëz ro nis co; laa me bii blëz ga, nozonëz me grë miech co. ²³ Blozhse bzonëz me zho, dzigo güey me tib guic gui zob gax ga, güeyzodiidznie me Dios, tipse me zo ga laa liu pcow.

²⁴ Horco laa barcw ne zie xpëedscuel me ga no lo nis co, ib gacd csëeniob zhow, sac rriee me rtsire mew, nëzrii nëzrec raca lo nis. ²⁵ Merle guini liuw, tibaque zeene laa me bdziñ zaatne zie zho ga, tib lo nis co ziezë me.

²⁶ Zeene gon zho laa men co sca ziaad-zë lo nis co, bdzieb zho, broptsie zho rnee zho:

—jTib ndziin i gon ziaad i!

²⁷ Dzigo bnee me lo zho rëb me:

—jGdziebde to, naa zial nu!

²⁸⁻²⁹ Pquiab Pedr rëb Pedr:

—Telne luu i ziaad i, bneedz diidz së naa lo nis glanso naa lo luu i.

—jDë sca! —rëb me.

Lëelëd biet Pedr len barcw, laa Pedr ziezële lo nis co ³⁰ zeene gon Pedr scataa rlis me low, bdzieb Pedr. Tibaque zeene bien Pedr laa Pedr nodedquiele low, hor co broptsiedan Pedr, rbedz Pedr me, tsiebee me Pedr ga.

³¹ Dzigo wbig me bzhen me nia Pedr, bzoli me Pedr lo nis co.

—jAque luu gon Pedr! —rëb me—. jPe nacne gocchop guic luu? jGard gon gliladz wen luu cho nac naa?

³² Zeene laa me biepnie Pedr len barcw, laa me co blëz. ³³ Grëraa zha ne no len barcw ga, rleynie zho me, rzee zdoo zho rnee zho:

—jNasi nagon ndion no nli Xpëed Dios nac luu!

³⁴ Zeene bdziñ zho stib nëz ro nis co, zaatne rnee zho Genesaret, ga biet zho barcw. ³⁵ Grë miech co zeene gocnan zho laa me bdziñ ga, znuse znuse pxoon zho diidz grëraa guiedz ne ndxie gax ga. Dzigo brieë grë miech co, güeynie zho grë men rzacnë lo me, ³⁶ rnab zho lo me siguiel me maase ni xabse me xen grë men rzacnë co. Grëse zha ne bzhen ni xab me, biac zho.

15

*Ncuaane runctal xtol miech
(Mr: 7:1-23)*

¹ Tib dze, bdziñ bla zha farisé ni zla maistr ley ne ziaad nëz Jerusalén, lo Jesús; rëb zho lo me:

² —jPe nacne dien zienald xpëedscuel luu mine blu xmengol ne, pe nacne zeene laa zho row, ib rguiibd zho nia zho zigne nopaa tsara?

³ Pquiab me rëb me lo zho:

—jTo waa, pe nacne quiaguiits to xley Dios? Golguien ganle laa ne gon to mine rnabey Dios zigne naca, lel ncuaane blu xmengol to, min co zienal to. ⁴ Led znu gon rnee lo xley Dios: “Gon pxoz luu, gon xnial luu”, ni rneew: “Zha ne quie pxoz, quiegaa zho xnial zho, ib none guet zho.” ⁵ Laa to gon rnee to: “Peet nacda gund zho xyudar xmengol zho niicle no me liaadz, totsaque gdeed zho gon.” ⁶ Tib lad rsan to xley Dios, mine blu xmengol to min co noxcora to. ⁷ jLoxaque guielwquidie qui no to! Rquiaalo to miech wen nac to, per lëepaa mine run to i ga bzeet Isá zeene rëb me:

⁸ Grë miech rii, rquiaalose zho runnon zho naa, rond zho diidz gon zho mine rnabey naa.

⁹ Zhlëse nac grë ncuaane run zho, rnee zho laa zho riaadgan naa; sac niapse guicle zho riab grë wseed ne quialu zho lo miech.

¹⁰ Dzigo bnee me lo grë miech ne ndxie lo me ga, rëb me:

—Golquiaadiag mine gni naa lo to nu, ni goltsoxco guien to zha naca. ¹¹ Golgacnan ganle, grë ncuaane rdziñ zdoo miech, led mincod runctal xtol zho; sinque grë ncuaan ntseeb ne rza guic zho, diidz ntseeb ne rriee ro zho, min co runctal xtol zho.

¹² Horco wbig xpëedscuel me, rëb zho:

—jPe bien luu ganle blëe zha farisé gon zho sca rëb luu lo zho?

¹³ Pquiab me rëb me:

—Grëse yag ne squi beenbnid Pxoz naa men ne zob gbaa, ib none laaw gliadz zolo zolow. ¹⁴ Golsaan zho, nli zha noseed miech per nac zho zig nac zha ne rold lo. Ni nanle to ganle, tel tib zha ne sca roldle lo ni xenaque zho nia stib zha ne rand, zaatne nac tib len blë, ib tedsod grop xcuaa zho tsietsobe ga.

¹⁵ Bdedse ga, wbig Pedr lo me rëb Pedr:

—Bzhiguiel bnë lo no dien zha nac diidz ne në luu ga, ne rnee luu led ncuane rowd miech runctal xtol zho.

¹⁶ Pquiab me rëb me:

—¿Pe niicle to riendaquew dzigo lëë?

¹⁷ ¿Pe riende to grë ncuane row miech, led mincod runctal xtol zho? Sac grë ncuane row zho rdzinda len zdoomban zho, zhaa zaatne rdzina; tib rietedsew xcuerp zho, rlozh ga rrieegaw. ¹⁸ Sanguë grë diidznë ne rrieë ro zho, zdoomban zho ga rzaw, ni lëë min co nac mine runctal xtol zho. ¹⁹ Zdoomban zho nac zaatne rza grë ncuana ntseeb ne run zho, zig nac:

zeene rio zho grë zhgab yozh,
zeene rut zho samiech zho,
zeene rionie zho zha ne nole tsieel,
zeene rionie zho zha ne nacd tsieel zho,
zeene run zho guielgbaan,
zeene lega rnexuu zho samiech zho,
zeene rneenë zho samiech zho.

²⁰ Grë ncuana ntseeb co nagon nac mine runctal xtol miech, gunctald zho xtol zho niicle tsard nia zho zigne nacpaa grë zhiwseed mengol.

Biac xpëed tib wnaa zit

(Mr. 7:24-30)

²¹ Ga brieë Jesús, güey me haxta nëz Tiro ni nëz Sidón.

²² Nëz co no me güey tib wnaa ne ziaad lo xtii zha Canaán lo me, nguiedz zëëb tsi wnaa co rnab me lo Jesús siguiel Jesús tsiegunguiac tib xpëdwana me nosacsi menodox. ²³ Per ib pquiabd Jesús lo xtiidz wnaa co, dzigo wbig xpëedscuel me, rëb zho:

—Mazd bzhiguiel pquiaadiag mine rnee wnaa qui, bui ganle zha ncuëtaa zëëb tsi me nal me zhits ne.

²⁴ Pquiab Jesús rëb me:

—Ziald naa par gun naa xyudar zha zit, sinque laa Pxoza naa pxeel naa par gun naa xyudar grë zha Israel ne rzac zig grë mëcwxiil ne zonziaab lo xbaxtor.

²⁵ Scaque nonee me laa wnaa co wbig pquiitsgzhib lo me.

—Bzhiguiel —rëb me—, been tib guielnzaac been xyudar naa.

²⁶ Rëbcha Jesús lo me:

—Nonguielda gon, cob ne quiet ne no nia mëed gdeed new lo mëcw.

²⁷ —Nliw, scaw —pquiab wnaa co—, per niicle mëcwa name rsaanaque bizhuan ma rbig ma row ma mine rrieengaa nia mëed.

²⁸ Horco pquiab Jesús rëb me:

—¿Squiw nagon! ¿Rlu nli dib zdoo luu rnalo luu naa! Gacxe waa mine rnab luu i gun naa, niinagazh laaw gac.

Horcogazh biac xpëed wnaa co.

Nzian miech ne beenguiac Jesús

(Mr. 8:1-10)

²⁹ Nëz co wbi Jesús bdzin me ro Nisdoo Galilé.

Ro nis co no me, miech guizhiu ne pcaalsa lo me. Tib dze gon me scataa nzian miech co, dzigo güey me güeysob me tib guic gui win zob gax ga. ³⁰ Ga zob me rdzin grë miech co rdzinie zho grë zhimguidz zho lo me, no zho zienie grë zha ne në ni, no zho zienie grë zha ne rold lo, grë zha ne guien tib nia, grë zha ne guien tib ni, grë zha ngop, ni grëragaa zha ne rlan pe stib guielguidz; grëse zho beenguiac me.

³¹ ¿Ncuane gzee zdoo ne goc ga! Grë zha ne ni tib diidz gard gnee, per nli rley zho laa zho psilo rnee; grë zha ne guien tib ni, guien tib nia, laa ni zho laa nia zho biana zigne no gaca; grë zha ne rgob ni, haxta rias zho laa ni zho goc-wen; grë zha ne rold lo, rlozhd gzee zdoo zho grë ncuane ran zho. Grëse miech ne ndxie ga, rzee zdoo zho, rley zho rolnie zho Dios.

³² Dzigo bredz me xpëedscuel me rëb me lo zho:

—Rquia zdoo naa grë miech rii. Nadzele rac tson ngbidz blanso zho lo ne nu, ni na quianiedraa zho pe gow zho. Telne squise gzonëz naa zho, nend pa lo zie zho nëz ycow zho.

³³ Pquiab zho rëb zho:

—¿Per pe yguiaan ne zho? ¿Pa guioxi ne guielwagw ne yquiin grëtaa miech qui dan rii, naca zaatne guien miech?

³⁴ Dzigo bnabdiidz me lo zho, rëb me:

—¿Bla quietxtil ziaadnie to i?

—Gadzaquew no —rëb zho—, ni chop tson mel win.

³⁵⁻³⁶ Dzigo bnabey me grëse miech co bzob zho lo liu. Blozh bzhen me gza gadz quietxtil co, ni gza mel co, bdeed me xquizh lo Dios; blozhse bdeed me xquizh, zigse rungröl me quietxtil co scase scase rdeed

mew lo xpëedscuel me rguiz zhow lo grë miech co; scaque been me gza mel co.

³⁷⁻³⁸ Grëse miech co dow zho haxta zaatne bieltaa zdo zho. Miech guizhiuw, zha bguise rgaa zho maase tap mil, nan dragaa grë men wnaa, grë mëëdla; ni zeene blozh ga bii biodzë gadz chicuid bio grë mine biaan.

³⁹ Blozhse bnee me lo grë miech co, blozhse bzonëz me zho, dzigo laa me bzëëb len barcw zie ne nëz xtan zha Magdal.

16

Gocladz zha farisé niungüet zho Jesús
(Mr. 8:11-21; Lc. 12:54-56)

¹ Magdal no Jesús, bdziñ bla zha farisé ni zla zha saducé lo me, gocladz zho niungüet zho me dien pe nxiñd me tib diidz, pe tib ncuane nonguieldgaa niun me. Rquiaalo zho rnab zho lo me gun me pe tib milagr, zeena gliladz zho nli Dios pxeel me.

²⁻³ Dzigo pquiab me rëb me lo zho:

—iPe nlipaa rnee to riende to zha nac grë ncuane noyac len dze rii! Zha zëëb dzigo runbey to pe rlu lo xcow. Zeene ran to rquia xcow nizhnie bdze dze, riende to quiet stib dze co zriee lo ngbidz. Sil ne rangaa to quia xcow nizhnie, quia xcow nlaan zhan gbaa, riende to guixoo guiab dze co. ⁴ Nazdpaa ntseeb to, squitaa gocndip zdo to nëz lo Dios, ¿zha rnaraa milagr ne racladz to gan to? Stibaque milagr gon gan to, tib mine gac zigne bzhaac Jonás.

Blozhse sca rëb me lo zho, zoque zho ga, ziega me.

⁵ Zeene brie zho ga, zoladz xpëedscuel me ney zho quietxtil ne niow zho. ⁶ Lega nacle psilo me nonee me lo zho, rëb me:

—Golguien gon, napaa noyab to lo zhincobi zha farisé, lo zhincobigaa zha saducé.

⁷ Zeene gon zho sca rëb me, rneechaa zho:

—Porne nagon ziaadnied ne quietxtil, gane squi rnee me lo ne.

⁸ Bien me sca nonee zho, dzigo rëb me lo zho:

—iGardaque lëë guien to cho nac naa! ¿Pe nacle tso to zhizgab quietxtil? ⁹ iNi lalnu lëë peet riende to! ¿Pe rsoladzde to zeene gaayaque quietxtil bguiaan ne gaay mil miech, bla chicuida biaan? ¹⁰ Scaque zeene

gadzaque quietxtil ni bgaaw dow tap mil miech, ¿pe niicle min co rsoladzdraa to?

¹¹ ¿Zha nac dzigo rzac to quietxtil nozet naa? Golguien ganle zhincobi zha farisé, zhincobi zha saducé ni naa.

¹² Dzigoraa bien zho led ncobidpaa rzeet me, sinque rëb me lo zho gap zho cuidad lo zhiwseed zha farisé, lo zhiwseedgaa zha saducé.

Bnee Pedr cho nac Jesús
(Mr. 8:27-30; Lc. 9:18-21)

¹³ Bdziñ Jesús nëz xtan zha Cesarea de Filipino grë xpëedscuel me, nëz co no me bnabdiidz me lo zho rëb me:

—¿Cho dien ron to rnee miech nac naa?

¹⁴ Pquiab zho rëb zho:

—No zho rnee Juan Bautista, no zho rnee Lív, no zho rnee Jeremíw, men ne biadteed xtiidz Dios padzeela; nogaa zho rnee no cho stib men ne ziadteed xtiidz Diosa zig baaad zha ne baaad padzeela.

¹⁵ Dzigo rëb me lo zho:

—¿To waa? ¿Cho rzac to nac naa?

¹⁶ Pquiab Pedr, rëb Pedr:

—iLuu nac Men ne zëëble diidz ga cxeel Dios! iXpëed Dios nac luu!

¹⁷ Dzigo rëbchaa me:

—Dichos luu Simón (xingan Jonás) brie diidz qui ro luu, sac gon Pxo naa men ne no gbaa, men co bneedz guielbiini qui lo luu, nacda ncuane cho miech nëw lo luu.

¹⁸ Ye naa gon niina laa naa gni ganle cho nac luu, luu nac zig tib quie, ni quie ne gon squi nac gzhixcuaa naa xyadoo naa; tsod zha ne grieelo gnitlo yadoo co, per ni guielgut gnitloda. ¹⁹ Laa naa rzo luu, luu gnee Xtidz naa lo miech zeena gacnan zho zha grieelo ygaa zho zaatne rnabey Dios; luu gac zig tib zha ne rey liow, tel zha cow, zha zac cxal ro yu, ni zha zac csiooga.

²⁰ Dzigo pso me diidz lo zho choot lo gneed zho, me nac Men ne zëëble diidz ga cxeel Dios.

Bzeet Jesús zha gun miech me
(Mr. 8:31-9:1; Lc. 9:22-27)

²¹ Len dze co psilo Jesús bzeet me lo xpëedscuel me zha csacsi miech me. Rëb me nroob ncuane cteed zho me, zeene laa me tsie Jerusalén; grë zha non lo menguedz,

grë pxoz ne rnabey, grë maistr ley, ible stidil zho me ni haxta zut zho me; per zeene gac tson ngbidz gut me, laa me grieaban.

²² Gon Pedr zha rnee me, dzigo bredzaque Pedr me blisqui Pedr lo me dien pe nacne rnee me laa me guet. ²³ Zeene bin mew, zoque Pedr ga, biecw me rëb me:

—¡Biche lo naa nu mendox! ¡Loxaque no luu par gungüet luu naa! Zienied guic luu mine rnabey Dios, sinque mine rleynie miech, min co zienie guic luu.

²⁴ Dzigo bnee me lo zho, rëb me:

—Zha ne racladz sëeb xnëz naa, none cueeladz zho zho, none lëb zho guiaadnal zho mine rnabey naa, niicle tel min co yquiaaqui csacsi miech zho. Nodne yquia zdoo zho xquielmban zho, ²⁵ sac zha ne yquia zdoo xquielmban, lel znu nitlo zho; sangue zha ne sca cueeladz xquielmban porne no zho xnëz naa, ib zгаа zho tib guielmban ndzon ne gdzind dze lozh. ²⁶ Zha ne zienie guic loxaque gapchen, ¿pa dien yquiina lo zho, tel lëew yquiaaqui guey zho gabil? ¿Niacxe zrieelo gdziib zho dimi, laa zho len gabil? ²⁷ Naa ne nac naa Mgui ne pxeel Dios, dzin dze ne gbiire guial naa stib, guialnie naa grë xanj l naa, glu naa ganle pa lotaa men nroob nac Pxoza naa; dze co gded naa mine tsieguial tib tib miech, tel zha wban zho. ²⁸ Ib tedsod lo grë zha ne ndxie nu niina, bii no zha ne gan ganle, zeene laa naa csilo gnabey lo guidzliu rii.

17

Bdzëëlo Jesús

(Mr. 9:2-13; Lc. 9:28-36)

¹ Goca xoop ngbidz, bredz Jesús Pedr, Jacob ni Juan bets Jacob güeynie me zho tib guic gui glaa.

² Guic gui co no zho, zeene gon zho laa me bdzëëlo. Masaque biinidoo rree lo me, pale lo ngbidz; xab mew, per nli rquiabniw, masaque biini ne rrona. ³ Tibaque zeene gon zho laa Moisés ni Lí men ne biadteed xtiidz Dios padzeela, nozodiidznie me. ⁴ Rdzieb zho, lo dzeb co brieer ro Pedr rëb Pedr:

—Maestro, ¡tebaa zha grieelo guiaan ne nu! Telne racladz luu, na maase gzaa no

tson yu yag xiid nu, tiba cuëz luu, tiba cuëz Moisés, stiba cuëz Lí.

⁵ Scaque nonee Pedr, zeene znuse pquia tib xcow ngali zaatne zo zho ga, masaque biini ne rron xcow co, lo xcow co bin zho zëeb tsi tib men co, rnee me:

—Lëe xpëed naa i gon, rleynie naa me, rzac zdoo naa mine quiayun me. Mine rnee me, golgona.

⁶ Mazdraa bdzieb zho bin zho sca rnee men co, lëelëd pquiitsgzhib zho haxta bdzin lo zho lo liu. ⁷ Dzigo wbig Jesús, pcaannia me zho, rëb me:

—Golsoli, gdziebde to.

⁸ Zeene blis lo zho bui zho, mese zo ga, gondraa zho schop men co.

⁹ Blozhse ga, laa zho wbi ga. Cho gui co ziad-zëebnie me zho, pso me diidz lo zho mine gon zho ga, choot lo gzodiidz d zhow, nieeda gal dze ne laa me brieaban.

¹⁰ Dzigo bnabdiidz zho lo me, rëb zho:

—¿Bay zha nacne rnee maistr ley, glo Lí no guiaad stib, dzigora a guiaad Men ne zëeble diidz ga cxeel Dios?

¹¹ Rëbchaa me:

—Nliw, ible nacle diidz ne glo Lí guidaed miech gon zho xtiidz Dios. ¹² Ni gacnan to ganle laa me biaadle, per beenbeyd miech me, lel psacsi zho me been zho me mine gocladztaa zho; ni ib tedsod gon, scaque csacsi zho Mgui ne pxeel Dios.

¹³ Zeene blozh sca rëb me, dzigo bien zho Juan Bautist ga rzeet me.

Biac tib mëed ne nosacsi mendox (Mr. 9:14-29; Lc. 9:37-43)

¹⁴ Zeene blozh biet zho cho gui co, gon zho miech guizhiu ndxie ga quiambëz Jesús. Lad co brieer tib mgui, wbig me lo Jesús, pquiitsgzhib me lo Jesús, rëb me:

¹⁵ —Laa naa rnab lo luu, bzhiguiel beenguiac xpëed naa, nrooble nosacsi guidz gutye win. Blactaa ziyobe win lo gui, ziyobe win lo nis ne. ¹⁶ Blansonie naa win lo xpëedscuel luu nu, per rrieelod zho gunguiac zho win.

¹⁷ Dzigo rëbchaa Jesús lo xpëedscuel me:

—¡Pe na squitaa miech ntseeb nac to, ib nëde to gnalo to Dios! ¿Palal tiemp ne so naa gne naa lo to? ¡Ncuane cxecwdraa naa lo to squi nac to! ¡Goltënie mëed qui nu!

18 Dzigo goctox Jesús lo mendox ne nosacsi mēēd co, beñcxoon me ma, hor cogazh laa mēēd co biac.

19 Haxta wbiraa zho ga, wbig zho lo me bñabdiidz zho dien pe nacne brieelod zho niuñcxoon zho mendox ne nosacsi mēēd co. 20-21 Dzigo rēbchaa me:

—Brieelode to niuñcxoon to ma, sacne rnalode to Dios. Tel niaca mine rnalole to Dios siquier palal yeen, gzoob ne siquier lal tib midz moxtaz, niicxe ncuaane mazdraa ngañ gnab to lo me, zuñ mew; tsod ncuaane grieelod gun to.

*Bzeet Jesús laa miech csacsi me
(Mr. 9:30-32; Lc. 9:43-45)*

22 Xtan zha Galilé no zho, tib dzew rēb me lo zho:

—Naa ne nac Mgui ne pxeel Dios, ib znaaz miech naa, 23 haxta zut zho naa; per zeene gac tson ngbidz gut naa, zriebaanaa.

Zeene bin zho sca rnee me, bio zho guielnē, mbanse rac zho.

24 Bdzin me guiedz Capernaum, loxaque bzēēb me lad guiedz, laa zha ne rtop dimi ne razh yadoo wbigle lo Pedr, bñabdiidz zho dien pe rguizh me dimi co. Pquiab Pedr rēb Pedr lo zho:

25 —Rguizh mew, ¿pe nacne quizhd mew?

Zeene bdzin zho len yu ne rbēz me, gardle guiab Pedra lo me, glole me bñabdiidz rēb me lo Pedr:

—Zig nac dimi ne razh lo men ne nac rey dien, ¿pe ye xpēēd me rguizha, te loxaque zha zit rguizha ye?

26 Pquiab Pedr rēb Pedr:

—Zha zitse rguizha.

—Nligaa sca naca —rēb Jesús—. Zha ne nac mēēd nodne quizh zho, 27 per par guiabd zho rdziond ne diidz, güey güeyron xanzuel luu lo nis. Mel ne glopaa yгаа low, bzhen ma pxal ro ma, ga gdziel luu dimi; dimi co güeynie bdiizh mine no dizh ne grop ne.

18

*¿Cho nonraa?
(Mr. 9:33-37, 42-48; Lc. 9:46-48; 15:3-7; 17:1-3)*

1 Len dze co bñabdiidz xpēēdscuel Jesús lo me, dien cho tib zho gac zha ne mazdraa gacnon lo grē zha ne no xnēz Dios.

2 Dzigo bredz me tib mēēdbgui win, bzo me win glowtaa lo zho, 3 rēb me:

—Gneli naa lo to ganle, telne csaande to xquielntseeb to, telne gacnguudzladzde to, gac to zig mēēdwin rii, per ni xnēz Dios grieelod sēēb to. 4 Zha ne racladz gac zho zha non, none gac zho tib miech ndooladz, none gac zho zig tib mēēdlas. 5 Miech ne gacnie zha ne sca nac, zha ne rleynie naa, rriequia naale ga racnie zho.

6 'Per miech ne yquuil zho gunctal zho xtol zho, jprobsaxe zha co! Mazd zhi guielnēw lo zho ygadoo tib quie molin zhobxtil yan zho tsieron zho zho nisdoo. 7 jNac lo guidzliu rii, runfalte guielntseeb low! Runfalte ncuaane gunctal xtol miech, jper probsaxe zha ne yquuil zha ne nole xnēz naa, gunctal zho xtol zho!

8 'Golguien telne tib nia to, tib nigaa to rquiaqui runctal to xtol to, goltichegazha. Peet nacda maase tibaque ni to, tibaque nia to zob totsaque yгаа to guielmban ndzon ne gdziñd dze lozh, lēdle zob gropa ni laa to guey gabil, lo beldox ne gdziñd dze guiuu. 9 Scaque bziaalo to, mine rquiaqui runctal to xtol to, goltichegazha, peet nacd maase tibaque lo to zob totsaque yгаа to guielmban ndzon ne gdziñd dze lozh, lēdle zob gropa ni laa to guey lo beldox ne nac gabil.

10 'Ib gunde to csañwin to grēraa zha ne no xnēz naa, zha ne nac zha mban, sac gon non zho lo Dios, anjl ne quianap zho, tibaque zo me lo Pxoza naa men ne zob gbaa.

11 'Nziuu miech lo Dios, tel naa ne nac naa Mgui ne pxeel me, ib laa naa zial zialsilaa naa grē zha ne zonziaab lo me.

12 'Rzac Dios miech zig tib men ne rquianē zdoo xpēcwxiiil. Telne quianie zho tib gayoo ma, ni gziaab tib ma, led zēēb lēē rsañ zho stapgal tsiimtap ma ne zo lo zho, rbire zho rieguib zho ma ne bziaab ga.

13 Zeene rdziel ma lo zho, rlozhd gleynie zho ma, lēē ma rac guielbley que grēraa xcompañer ma. 14 Scadaa nagon rzac Pxoza

naa miech, grë zha ne nole xnëz me, ib racladzd me gziaab zho.

¹⁵ 'Golguien sca, tib tib to zeene cho tib zha ne nacgrë to gun pe tib falt lo to, goltsie goltsienee lo zho; gropse to golzodiidz pe nac mine pxin zho. Telne siguiel zho guiaan to mpas, laa to beenle gan ga gneewen to stib.

¹⁶ Laa telne nëd zho, dzigo golguib tib zha ne së, chopgaa zha ne së gan ganle zha rac zho. ¹⁷ Tel niicle scaw nëdaque zho guiaan to mpas, dzigo mazd golguiab lo grëse zha ne nacgrë to gnee zho lo zho. Telne niicle xtiidz zha co nëd zho gon zho, dzigotaa mazd golsaan zho, sacdraa to bets to ga, golcuee zho lad to, golsac zho zig rzac miech grë zha ne ziana guielntseeb.

¹⁸ 'Gneli naa lo to ganle, grëse zha ne gon xtiidz to zeene rnee to lo zho gac-wen zho, scagaa Dios scaania me zho; per zha ne gonda, ycaaniad me zho.

¹⁹ 'Ni racladz naa gacnan to ganle, grë zha ne no xnëz naa, niicle tib nëzaque zho, per telne tipse rac zho, ncuane gnabtaa zho lo Pxoz naa men ne zob gbaa, zdeed mew. ²⁰ Sac zeene rcaalsa zho roolnie zho naa, ga zo naa lo zho; niicle maase chopaque, tsonaque zho.

²¹ Dzigo wbig Pedr rëb Pedr lo me:

—Zha ne sca dzigo gun falt lo naa, ¿blataa vuilt no gun naa zho perdon? ¿Gadztaaw lëe?

²² Pquiab me rëb me:

—Lëda gon Pedr, led loxaque gadzdse vuelta. Tel blataa vuilt gun zho falt lo luu, none gun luu zho perdon.

Zha ne beend perdon

²³ 'Grë zha ne no xnëz Dios, ib none gun zho perdon samiech zho.

'Tib rey name, tib dzew bredz me grë zha ne rquia dziin lo me, par dien zha quiayun zho dziin. ²⁴ Loxaque psilo me, zeene laa xcuent tib zha co blozh brieë, nroob brieëquia zho lo me; ²⁵ par quizh zhow, peet nzhend zho. Dzigo bnabey me to zho grop tsieel zho, xpëed zho ne, ni grëse ncuane rap zho, parne grieelo gazh xquielqui zho. ²⁶ Zeene gon zho sca rëb me, pquitsgzhiz zho lo me, rëb zho: "¿Been guielnzaac, gop tib paciens, na dien zha gun naa quizh naa xquielqui naa lo luu!" ²⁷ Gon

me zha rac zho, pquia zdoo me zho, psilaa me zho, beenquizhdaque me zho xquielqui zho.

²⁸ 'Loxaque brieë zho ga, bdzieel zho tib zha ne nzëeb palal yeen dimi lo zho, tib zha ne rquiaque xtsiin rey cow. Zigne gon zho zha co, zolinëz wbig zho bdie zho yan zho, rnab zho gagazh quizh zho xtimi zho. ²⁹ Dzigo pquitsgzhiz zha co lo zho, rnab zho siguiel zho gap zho paciens, dien zha gaclo dimi co quizh zhow. ³⁰ Pe nquiaadiag zho ga, bnab zho bio zha co ladzguiib, haxta bdiizh zho dimi ne zëeb zho ga. ³¹ Grëraa zha ne rquia dziin lo rey co, zeen gocnan zhow, bdeednë zho, güey zho güeyzodiidz zhow lo me. ³² Zeene bin mew, bnabey me gocredz zho, goctox me lo zho rëb me: "¿Pe clas miech nac luu! Pe rsoladzd luu zha rac luu bnab luu pquia zdoo naa luu, haxta beenquizhd naa luu guielquidox ne zëeb luu ga. ³³ ¿Pe nacre pquiad zdoo luu zha co, zigne pquia zdoo naa luu?" ³⁴ Blëë me gon me sca been zho, bnabey me bio zho ladzguiib, haxta blozh bdiizh zho grëse xquielqui zho.

³⁵ 'Scadaa nagon gun Pxoz naa to, telne gunde to samiech to perdon, tel pe nac falt ne gun zho lo to.

19

Zha ne rsëbtsieel (Mr. 10:1-12; Lc. 16:18)

¹ Blozhse sca bnee Jesús lo zho, brieënie me zho ga güeyted zho grë guiedz ne ndxie xtan zha Judé, grë mine riaan nëz dan ro guiubee Jordán, nëz ne rlan ngbidz.

² Miech guizhiu ne rrieë grë guiedz co, rdzin lo me; grë men rzacnë ne rdzinne zho, beenguiac me zho.

³ Ga no me, bdzin bla zha farisé gocladz zho niungüet zho me, par dien pe nxind me tib diidz; bnabdiidz zho lo me rëb zho:

—Pe gnë luu dien, ¿pe wena csëbtsieel zha bgui ne gacladztaac csëbtsieel?

⁴ Pquiab me rëb me:

—¿Mod rande to zha zhobnee lo Xtiidz Dios? Lo co zhobnee ganle zeene psan me miech, tib nëz zho psan me, tib mgui ni tib wnaa. ⁵ Ni rneew, ib none grieezhaa mgui lo pxoz zho, lo xniaa zho par gbannie zho wnaa ne nac tsieel zho, gac zho tibaque

miech grop zho. ⁶ Nligaa nacdraa zho chop miech, sinque laa zho rac tibaque. Dios nac men ne psan ycatsieel miech, cho dzigo nac miech par quiits zho mine rnabey me.

⁷ Dzigo rëb zho lo me:

—¿Pex nac dzigo waa bdeed Moisés diidz csëbtsieel mgui ne racladz csëbtsieel? Rëb Moisés, zac csëbtsieel zho, totsaque yquia tib guits gdeed zho lo wnaa zaatne raquiet laa zho psaan wnaa.

⁸ Pquiabchaa me rëb me:

—Ne squitaaxe waa miech nad, miech ndip zdoo goc xmengol to, gane bdeed Moisés diidz csëbtsieel zho; sangue Dios psand me diidz csëbtsieel miech. ⁹ Gacnan to ganle, zha ne csëeb wnaa ne nac tsieel zho, ni tel peet guielyozh beend wnaa co, dol ga gun zho csëeb zho tsieel zho ycaa zho stib wnaa. Scaquegaa mgui ne ycaa wnaa ne psëeb zho ga, dol ga gun zho sac gon no tsieel wnaa co.

¹⁰ Dzigo rëbchaa xpëedscuel me:

—Tel scataa nac xcuent guieltsieel, mazd lëequew dzigo ctsieelniad ne.

¹¹ Pquiab me rëb me:

—Nligaa no mgui ne rtsieelniad, per zhis zho, ni no pe nacne sca riaan zho. ¹² No zho desde rac zho mëed, nacd zho zha ne grieelo tsonie wnaa; no zho ib miech sca rsan zho. Nogaa zha ne ib zha rbeeladz zho ctsieelniad zho, parne grieelo tsoxco-raa zho gun zho xtsiin Dios. Zha ne sca rquiabladz ctsieelniad, maase ctsieelniad zho.

Beenlay Jesús mëedlas
(Mr. 10:13-16; Lc. 18:15-17)

¹³ Ga no Jesús, ndal zha ne bdzin bdzinne zho xpëedlas zho lo me, parne cxobnia me guic win gunlay me win. Grë zha ne nac xpëedscuel me, lel psilo zho rtsidil zho pe nacne nodzinne zho grë mëedlas co lo me.

¹⁴ Zeene gon me sca quiayun zho, rëbchaa me lo zho:

—Ctsirede to grë mëedlas yeen qui, golsaan guiaad win lo naa. Sac gon grë mëedlas yeen, ni zha ne nac zig nac win, zha co nac zha ne sëeb ygab lo Dios.

¹⁵ Dzigo psilo me pxobnia me guic grë mëedlas yeen co, beenlay me win. Blozhse ga, laa me brieeg ga.

Bzodiidznie tib zha ricw Jesús
(Mr. 10:17-31; Lc. 18:18-30)

¹⁶ Laa me zieriee ga, zeene bdzin tib mgui nguieg, tib zha ricwa, rëb zho lo me:

—Nan naa luu nac tib men ne noseed miech, ni tib men wen nac luu. Bnë dien, ¿pe nac mine gun naa parne grieelo yгаа naa guielmban ndzon ne gdzind dze lozh?

¹⁷ Pquiab Jesús rëb me:

—Rnee luu lëe tib men wen nac naa. ¡Nligaaw, Diosse nac men wen! Telne nli racladz luu yгаа luu guielmban co, none tsoxco luu gban luu mine rnabey Dios.

¹⁸ Pquiab zho rëb zho lo me:

—¿Pa min waa?

Rëbchaa me:

—Mine rnee:

Gute luu samiech luu,
telne nole tsieel luu, tsonied luu zha ne led tsieeld luu,

cuand luu samiech luu,
yquiadiidzguizhd luu samiech luu,

¹⁹ gon pxoz luu, gon xnгаа luu, cued luu xquielto me.

Bleynie samiech luu, zigne rleyne luu luu.

²⁰ Dzigo rëbchaa zho:

—Ni tib mine rnee luu i gard quits naa, grësew zanal naaw zigne naca. Racladz naa gacnan naa, dien peraa no gun naa.

²¹ Horco rëb me lo zho:

—Tel racladz luu gac luu tib zha ne gban grëse mine rnabey Dios, güey sca güeyto grëse ncuaane rap luu, dzigo güeytiiz dimi co lo grë zha ne guieend pe yquiin. Lozh ga, dë dënal zhits naa. Min co nagon gun luu, dzigo zgaa luu guielmban ndzon co; ni scagaa nroob guielnzaac ne yгаа luu nëz lo Dios.

²² Zeene bin zho sca rëb me, mbanse rac zho laa zho zey, sac nroob ncuaane quianie zho.

²³ Dzigo rëbchaa Jesús lo xpëedscuel me:

—Gneli naa lo to ganle, grë zha ne squi rapchen rzacxuu zho par sëeb zho xnëz Dios gnabey me zho. ²⁴ ¡Ne nligaa ngan rzac zhow! Mazd ngandse rded tib camell guieer guzh lëdle sëeb tib zha ne squi rapchen xnëz Dios.

²⁵ Zeene bin zho sca rëb me, rzee zdoo zho, rnee zho:

—Bay, ¿chomezhe dzigo waa nac zha ne zrieelo sëeb xnëz Dios?

²⁶ Dze bui me lo zho, dzigo rëbchaa me:

—Nligaa par miech zootle tsod zha ne grieelo sëëb xnëz me; sangue me nan me no zho. Sac tel me, tsod ncuaane grieelod gun me.

²⁷ Horco pquiab Pedr rëb Pedr lo me:

—No dzigo waa, ¿pe nac mine yгаа no? Nanle luu ganle, tel no grëse ncuaane rdzi-aap no, laa no psana, ziaadnal no zhits luu.

²⁸ Pquiab me rëb me:

—Golgona ganle, dze ne gacncub grëse ncuaane no, zeene laa Mgui ne pxeel Dios zob lo xcan ne zo zaatne nac lo guielndzon ne no me, dze co lo gza to ne nac to zha ne biaadnal zhits naa, sob to lo gza tsiipchop xcan ne rieguial to. To gac zha ne gun guielwxtis lo gza tsiipchop dii ne nac zha Israel. ²⁹ Grëragaa zha ne psan lidz, psan zho bets zho, bzian zho, xniaa zho, pxoz zho, tsieel zho, xpëed zho, liun zho porne noyun zho xtsin naa, na lo guielmban riique laa zho gana stib tib gayoogaw tib tiba; ni ib tedsod zгаа zho tib guielmban ndzon ne gdziindraa dze lozh.

³⁰ 'Nli zig nac niina, nzian zha ne rzac zha non nac zho, nogaa zha ne rzac zho peet nond, per zeene gal dze co lalga gac zho grë zho.

20

Lalga nac grë zha ne no xnëz Dios

¹ Grë zha ne no xnëz Dios, zac zho lo me zig bzhaac grë zha ne güey xtsiin tib men co.

² Tib men co name nroob dziin quianie me, tib dzew zigne biini liu brie me güeyguib me zha ne tsielaap xuv me.

³ Bdzial me palal zho, biaan zho diidz palal quizh me zho dze, laa zho bzëëb lo dziin.

⁴ Glaale ngbidza brie me güeyted me len guiedz, lëetse güeytsib me lo bla zha ne zob ga racladz dziin. ⁵ Dzigo bree me zho, rëb me: “Goltsie xtsin naa, na quizh naa to mine non xtse to.”

⁶ 'Rwe ngbidza, biire me güey me güeyguib me spalal zho. Maase las treza güeyaque me stib.

⁷ Zhile sëëb ngbidza, biire me güey me len guiedz. Ga bdzieel me zla zho, gon me scase zob zho ga. Dzigo rëbchaa me lo zho: “¿Pe nacne squise noded dze to?” ⁸ Pquiab

zho rëb zho: “Choot rneedzdaxe dziin waa yquiaa no.” Rëbchaa me: “Nasca zeena tsie to lo xtsin naa, maase quizh naa xtse to.” Dzigo laa zho zie.

⁹ 'Zeene laa dze blozh bdze, bnee me lo zha ne zo lo xtsiin me, rëb me: “Bredz grë zha qui na, bdiizh xtse zho grëse zho. Zha ne bza bzëëb lo dziin, zha co glo bdiizh, lozhraa ga quizh luu zha ne glo bzëëb.”

¹⁰ Dzigo bded zha ne bdzele dze bzëëb lo dziin ga, tib tib zho pcaase zho mine non zho tib dze. ¹¹ Grë zha ne glo bzëëb lo dziin, zeene gon zhow, tibaque güeynie guic zho nroobraa nguizh me zho. Per zeene laa zho gozh, lalgaque pcaa zho.

¹² 'Zeene gon zho lalga pcaa zho grë zho, blëe zho, güey zho güeylisqui zhow lo men ne nacchen dziin ga, rëb zho: ¹³ “Psacsi luu no i gon squi been luu. Bui ganle gdipse dze ptsuu ngbidz no pquiaa no xtsiin luu, ¿zha nac dzigo lalga quizh luu no grë no zha qui, ni niipyeeaque been zho dziin?” ¹⁴ Pquiab me rëb me: “Bets, nosacsid naa to, biaanle ne diidz name palal quizh naa xtse to.

¹⁵ Nana sca golgüey xtimi to i, zeena golsë. Ib zdoo naa rala lalga quizh naa to grëse to.

¹⁶ ¿Stiba, xtimi naaw, zrieelo gundziin naaw zigne racladz naa! ¿Te në rac zdoo to ye, ran to rquia zdoo naa miech?”

¹⁷ 'Scapaa nagon gac zha ne no xnëz Dios. Lal gacnon zho, zigtaa zha ne glo bzëëb xnëz mew, zigtagaa zha ne sëëb bzaw.

Bzeet Jesús stib laa miech csacsi me (Mr. 10:32-45; Lc. 18:31-34)

¹⁸ Nëz no Jesús zie me nëz Jerusalén, tibaque bredz me gza tsiipchop xpëedscuel me, ¹⁹ bzeet me lo zho zha gun miech me zeene laa zho gdziin Jerusalén, rëb me:

—Ib ziaab naa ladznia grë pxoz ne rnabey grë zho maistr ley, zha gnab guet naa. ²⁰ Zha co naa ladznia zha zit, parne gunnguzee zha co naa, parne quin zho naa, ni haxta squiaa zho naa lo cruz. Per zeene gac tson ngbidza, zriebaan naa.

²¹ Tibaque zeene wbig tsieel Zebedé wbignie me grop xingan me Jacob ni Juan, pquiitgzhil me lo Jesús rnab me gun Jesús tib favor ne racladz me. ²² Dzigo bnaabdiidz Jesús lo me, pe nac favor ne racladz me. Pquiab me rëb me:

—Racladz naa gneedz luu diidz sob tibga xpëed rii naa cue luu zeene gdziñ dze ne laa luu zob zobnabey luu; tib zho nêz derech, stib zho nêz revés.

²² Pquiab Jesús rëb me lo wnaa co:

—¡Ni luu gon riend pe rnab luu! ¿Niacxe zlëb zho gan zho grë guielnë ne gan naa, tedgaa zho grë miñe teed naa?

Pquiab zho rëb zho:

—Zlëeb no.

²³ Rëbchaa me lo zho:

—Nli nenda zan to grë guielnë ne gan naa, ni zdedgaa to miñe teed naa; per ne gnedz naa diidz sob to cue naa nêz derech, nêz revésgaa, led naad raguial miñ co; sac laa lugar co biaanle par zha ne tsieguiala, ni Pxoza naa men ne zob gbaa men cose nan dien chow.

²⁴ Grëraa xpëedscuel me, zeene bin zho pe nac miñe rnab Jacob grop Juan, blëe zho lo zho. ²⁵ Dzigo bredz Jesús zho grë zho, rëb me lo zho:

—Ran to ganle zha ran grë zha ne rnabey grë guiedz ne ndxie lo guidzliu, ni grë zha ne nac zha non, masaque rnabey zho samiech zho zigne racladztaa zho. ²⁶ Sañgue to gon gunscade to. Zha ne racladz gac zho zha non lo to, laa ne glu zho zha non zho, none glo zho guiaanwin, gac zho zig tib ngundziin lo to. ²⁷ Scaquegaa zha ne racladz gnabey zho lo to, none glo cseed zho gon zho miñe gnabey to zho. ²⁸ Golgan ganle, niicle naa ne nac naa Mgui ne pxeel Dios, ziald naa par gnabey naa miech, sinque laa naa zial par gac naa tib ngundziin lo zho, ni gded naa xquielmban naa zeena laa zho lo grëtaa ncuane ngadoo zho. Ni nanpaa naa miech guizhiu ne laa.

Biac chop zha ne rold lo

(Mr. 10:46-52; Lc. 18:35-43)

²⁹ Miech guizhiu nal zhits Jesús, laa me zieriee guiedz Jericó. ³⁰ Ro nêz co zob chop zha ne rold lo, zeene bin zho laa me ziaad ga, psilo zho nguiedz rbedz zho rnee zho:

—¡Jesús, men xtii rey David, pquia zdoo no!

³¹ Blalaa zha ne zie ga, psilo zho ndox zho lo grop zha co parne guioog ro zho, per lel hor cole nguiedzraa rbedz zho me.

³² Nacne zeene bdziñ me zaatne zob zho, blëz me, bnabdiidz me lo zho rëb me:

—¿Pe nadien gon to naa?

³³ Pquiab zho rëb zho:

—¡Racladz no guiac lo no!

³⁴ Pquia zdoo me zho gon me sca rac zho, dzigo pquiaania me zhits guidlo zho. Horcogazh laa lo zho biac, laa zho zienal zhits me.

21

Bdziñ Jesús Jerusalén

(Mr. 11:1-11; Lc. 19:28-40; Jn. 12:12-19)

¹ Sca no Jesús nêz grë xpëedscuel me, laa me bdziñ guiedz Betfagé. Gaxle ga riaan Jerusalén, nêz danse squi riaan Gui Oliv. Dzigo pxeel me chop xpëedscuel me, rëb me lo zho:

² —Goltsie guiedz win ne ndxie danse lo ne i. Ga gdziñ to zaatne quiadoo tib burrgus grop xpëed, dzigo golxadz ma goltënie ma nu. ³ Tel cho gnabdiidz pe nacne noxadz to ma, golguiab lo zho: Men ne rnabey ne, men co rquiin ma, na zigne lozh xtsiin ma guiaadsan no ma.

⁴ Ga briequia miñe bnee tib men ne biadteed xtiidz Dios lo miech padzeela, zeene rëb me:

⁵ Golguiab lo men Jerusalén:

“Golwi ganle, laa men ne nac zhirey to ziaad i.

Tib men ligase rlu me, zob me lad tib burrwin,

tib ladse ma ne rey yo zob me.”

⁶ Laa zho zie, zigne bnabeyse me zho ga, scase been zho. ⁷ Zeene wbire zho, laa zho bdziñnie burr co grop xpëed ma. Pxob zho lar ne rbix zho lad xpëed ma, laa me bzob ma. ⁸ Zigse zie me, no grë miech guizhiu co, rta zho lar ne rbix zho ro nêz rded burr ne zob me ga; nogaa zha ne rchoo nia grë yag nguia, rdziin zhow ro nêz rded me. ⁹ Grëse zho, zigtaa zha ne nera, zigtaa zha ne nala, nguiedz roptsie zho rnee zho:

—¡Golgotsaa co ne xviv xingan David! ¡Golgotsaa gleyne ne me! ¡Zha ndzontaa Dios, pxeel me men nroob qui lo ne!

¹⁰ Zeene bdziñ me Jerusalén, rlozhd gzee zdoo grë miech ne ndxie ga, rnabdiidzlsa zho rnee zho:

—¿Bay cho nac men qui?

¹¹ Rquiab grë zha ne nal zhits me ga, rnee zho:

—¡Lëë Jesús! ¡Lëë men Galilé qui, noteed xtiidz Dios lo miech!

Blee Jesús miech len yadoo
(Mr. 11:15-19; Lc. 19:45-48; Jn. 2:13-22)

¹² Biini liu co, zeene bdziñ Jesús Jerusalén stib, güey me yadoo nroob ne zob lad guiedz co. Bdziñ me gon me nzian miech ne ndxie ga, masaque tib lgui quiayun zho, zha ne no wto, zha ne no wzi. Nacne güey me ptiixche me xmezha zha ne notsëë dimi, ptiixche me xmezha zha ne no wto palom; blee me zho ga grëse zho, ¹³ rëb me lo zho:

—Led znu gon zhobnee lo Xtiidz Dios: “Zaatne nac lidz naa nu, nu none guiaad grëse miech sodiidznie zho naa.” Laa to gon, quiayun to lugar rii zig tib zhibliee ngbaan.

¹⁴ Ga no me bdziñ bla zha ne rold lo, zla zha ne në ni, wbig zho lo me. Gzase zho beenguiac me. ¹⁵ Nzian mëedlas yeen ne ndxie len yadoo ga, psilo win nguiedz rnee win: “¡Zha ndzontaa xingan rey David!”

Grë zha ne nac pxoz ne rnabey, ni grë maistr ley, zeene gon zho milagr ne been me ga, ni gon zho zha rnee grë mëedlas co, rlëë zho, ¹⁶ rëb zho lo me:

—¿Pe ib rond luu ganle pe nonee grë mëedlas qui?

Pquiab me rëb me:

—Ron naaw. ¿To waa, pe rande to ganle zha zhobnee lo Xtiidz Dios, zaatne raquiet mino noyac nu? Led rneew lëë: Haxta grë mëedlas ne bii radz, ye win rley win roolnie win me.

¹⁷ Blozhse sca rëb me, zoque zho ga, laa me bio nëz zie me nëz Betain. Ga blëz me wdze co.

Wbidz tib yag guigw
(Mr. 11:12-14, 20-33; Lc. 20:1-8)

¹⁸ Sil co zeene no me nëz gdziñ me Jerusalén, pcaabedz me. ¹⁹ Gon me zob tib yag guigw gax ro nëz, dzigo güey me güeyso me low dien pe ndziel tib nex low niow me. Bdziñ me gon me loxaque zhiblagsew zëëb, nacne rëb me low:

—¡Lëë blozh xtse luu nu gon! ¡Gdziñdraa dze ne yquia nex lo luu!

²⁰ Biini liu, zeene laa zho zie Jerusalén stib, gon xpëëdsuel me, laa yag guigw co

bidzle. Bzee zdoo zho, bnabdiidz zho lo me rëb zho:

—¿Bui ganle, bay zha nacne squi znuse wbidz yag guigw qui?

²¹ Pquiab me rëb me:

—Gneli naa lo to ganle, telne dib zdoo to rnalo to Dios, niicle ncuaane mazdraa ngan gnab to lo me, zun mew. Lëëraasi none dib zdoo to gliladz to zaca, ni palal gacchopd guic to. ²² Grëse ncuaane gnab to zeene rzodiidznie to me, zneedz mew, totsaque dib zdoo gliladz to laa to ycaaniaw.

²³ Bdziñ me Jerusalén, wbiire güey me len yadoo. Ga noseed me miech, zeene bdziñ bla zha ne nac pxoz ne rnabey ni zla zha ne nac men non lo menquiedz, bnabdiidz zho lo me rëb zho:

—¿Cho dzigo nac luu ne squitaa zi-aadnabey luu len yadoo? ¿Cho rnabey luu?

²⁴ Pquiab me rëb me lo zho:

—Ye naa laa naa gun tib wbnabdiidz lo to. Telne stsire to low, dzigo gni naa lo to ganle cho rnabey naa ne laa naa noyun grë ncuaane noyun naa. ²⁵ Golnë dien, ¿cho pxeel Juan Bautist biaad me pchoobnis me miech? ¿Pe Dios pxeel me, te miechsew ye?

Psilo zho rnabdiidzlsa zho dien zha tsire zho lo xtiidz me, rnee zho:

—Telne dzieets ne Dios pxeel Juan, dzigo laa me gnë: “¿Pex nac dzigo waa bliladzde to mine bnee me?” ²⁶ Tel na dzieetsгаа ne, miechse pxeel Juan, grieequiadaque ne.

Rdzieb zho niab zho miechse pxeel Juan, sac nan menquiedz nli Dios pxeel Juan biadteed Juan xtiidz me lo miech.

²⁷ Dzigo mazd mine been zho rëb zho lo me:

—Ndiond no dien cho pxeel Juan.

Dzigo rëbchaa me lo zho:

—Niicle naagaa nagon, grieelod gni naa lo to cho rnabey naa quiayun naa grë min rii.

Zha nac zha ne rond diidz

²⁸ Golquiaadiaga ganle. Tib mgui, quianie me chop mëëdbgui. Tib dzew, bredz me tib zho rëb me lo zho: “Xin, none gon tsie luu nadze, tsietop luu uv xcuaa ne.” ²⁹ Pquiab zho rëb zho: “¡Gad naa!” Wdzeelaaw, bien zho nonguiel da ga sca gun zho, dzigo bio zho nëz güey zho. ³⁰ Laa stib zho, zeene bredz me zho bnabey me zho tsie zho lo

dziin, rëb zho: “Peet nacda, na maase ga naa.” Blozh ga pasë zho nie.

³¹ ‘Golnë dien, lo grop mëed co, ¿cho nac zha ne bin xtiidz pxoz?

Pquiab zho rëb zho:

—Zha glo cow.

Dzigo rëbchaa me:

—Gneli naa lo to ganle, miñcodaa quiayac nu niina: Grë zha ne rzac to mazdraa ngoopdol, zig nac grë zha ne rtop dimi ne razh lo zha Roma, zig nac grë wnaa ro nëz, mazd glole zha co nozëeb xnëz Dios, lëdle to. ³² Biaadpaa Juan Bautist name biadseed me miech csaan zho xquieñtseeb zho, gban zho zigne racladz Dios, ni pe liaadz to nion to miñe rnee me. Mazd grë wnaa ro nëz, grë zha ne rtop dimi ne razh lo zha Roma, znuse psaan zho xquieñtseeb zho. Laa to, niicle ran to nosaan grë zha co xquieñtseeb zho, per ib rsaande to miñe nac to.

Xcuent zha ne pquianap liu

(Mr. 12:1-12; Lc. 20:9-19)

³³ Dzigo bzodiidz me stib cuent lo zho rëb me:

—Tib men name, nroob lbë uv beenbni me lo liun me. Psilo me ptse me igose liu co, bzaa me zaatne gzhii grë uv co, ni bzaa me tib yu glaa zaatne sob zha ne yquiaanapa. Blozh ga, blediin me liu co lo bla zha ne ran liu, dzigo laa me brieë, laa me zey zit.

³⁴ ‘Zeene gol mëe ne laa nex co gol, pxeel me bla zha ne quia xtsiin me zie lo zha ne quianap liun me ga, parne gdeed zha co uv ne rieguiäl me ycaa me. ³⁵ Per leñ bnaaz zho zho, zha ne blooquie zho, zha ne bdeedgolp zho, haxta beet zho tib zho. ³⁶ Wbiire pxeel me zla zho, hor cole nzian-raa zho pxeel me, per niapse sca psacsi zha co zho.

³⁷ ‘Tibaque zeene pxeelaque me xpëed me, bza guic me rëb me: “Ganse zho xpëed naaw, zon zho miñe gnee me.”

³⁸ ‘Pex nion zho diidz, zeene gon zho xpëed me, rëbchaa zho: “iLëe zha qui nagon guiaannie liu rii! iGolgotsoo dzuut ne zho, zeena guiaana lo ne!” ³⁹ Dzigo bnaaz zho xpëed me, güeynie zho me zaatne nac tib lad lo liu co, ga güeygut zho me.

⁴⁰ ‘¿Zha sca dien rzac to gun bizhuan liu co gza zha co, zeene laa me gbire?

⁴¹ Pquiab grë zha ne nac pxoz ne rnabey, ni zha ne nac zha non lo menquiedz ga, rëb zho:

—Ni lalnu yquiad zdo me zho, znit-logazh me zho. Lozhse ga, cuediinga me liun me lo zla zha ne gundziina, zha ne guien gdeed nex ne rieguiäl me ycaa me.

⁴² Dzigo rëbchaa me lo zho:

—Haxta lo Xtiidz Dios no tib zaatne znu rnee, ¿pe gard ganle glab tow? Rneew:

Quie ne psëeb zha ne nozaa yu, ni nan zho lëepaa quie co nac miñe rnazdziits yu.

iNcuane gzee zdo new! Sac Dios bnabey sca goca.

⁴³ ‘Gacnan to ganle, scadaa nagon gree to lad grë zha ne ngab lo Dios, parne gbig zha ne tsoxcopaa gun xtsiin me, zha cole guiaan xlgar to. ⁴⁴ Zha ne tsietsobe lo quie ne raquiet ga, zac zho zig tib ncuane rac tson tap lë; laa tel lëegaaw tsoe lad zho, zac zho zig tib ncuane die die rac.

⁴⁵ Grë zha ne nac pxoz rnabey ga, ni grë zha farisé, zeene blozh pquiaadiag zho cuent ne bzodiidz me lo zho ga, bien zho zha ga rzeet me. ⁴⁶ Nacne gocladz zho naaz zho me, per bdiebaque zho; sac ndal miech rleynie me, niicle ne rzac zho tib zha ne noteedse xtiidz Dios nac me.

22

Zha ne nëd sëeb xnëz Dios

¹ Bzodiidz Jesús stib cuent lo zho, rëb me:

² —Grë zha ne rbedz Dios ygab zho xnëz me, none tsoxco zho gon zho miñe rnee me; sac nenda gdzieelo zho zig bdieelo zha ne bredz tib rey co nie zho lo zhilni xpëed me.

³ ‘Tib rey name, ziaadyob ctsieelnia xpëed me, nzian zha ne bredz me tsie lo lni. Zeene laa dze co bdzin, pxeel me zha ne quia dziin lo me zietsedz grë zha ne bredz me lo lni ga, per nëd zho nienäl zho. ⁴ Wbiire me pxeel me zla zho rëb me: “Goltsietsedz zho, golguiab, laa guielwagw ne yquien goclole, siguiel zho na guiaad zho.”

⁵ Per ib beencasd zho zha ne pxeel me ga, no zho brieë zie lo xcuaa, no zho brieë zie zhiwto, ⁶ nogaa zho leñ bnaaz zho zha co, psacsi zho zho, beet zho zho. ⁷ Zeene gon me sca been zho, blëe me, bnabey me

grë xmen_guiib me güey zho güeygut zho grë zha ntseeb ne psacsi xmandad me ga, ni bnabey me bzëëg zho guiedz co. ⁸⁻⁹ Blozh ga biire pxeel me zla zho, rëb me: “Laa guiel_wwagw rii goclole, mine naca goltsie tib nëz yu, zha ne gdzieeltaa to, golcuedz zho guiaad zho lo lni; sac grë zha ne bredz naa ga niaad, laa zho blule ganle rieguial_d zho guiaad zho nu.”

¹⁰ 'Dzigo brieë zho güey zho, miech ne bdzieeltaa zho, zigtaa zha ndzinliw, zigtaa zha ntseeba, grëse zho bredz zho bdziñnie zho zho lo lni. Gol hor wagw, biodzëse len yu ndxie miech. ¹¹ Zeene laa rey bzëëb zienee me lo zho, gon me lad co no tib zha co nacwxabd zho zigne rieguial_gacwxab zha ne sca rie tib lo guieltsieel. ¹² Dzigo rëbchaa me lo zho: “Bets, çpe nace squise luu bzëëb luu nu, bui ganle nacwd luu lar ne bneedz zho niacw luu?”

'Dzese zob zho, rdziel_d zho pe guiab zho lo me. Gonse me sca rac zho, ¹³ bnabey me zha ne nodziib lo mez_h rëb me: “Golzobdoo zha rii, golxidoo grop nia zho, grop ni zho, golcuee zho nu goltsieron zho lo ncow nëz ley. çGa nac zaatne rieguial_g zho, ga gan zho guiel_nëdox ne no ted zho, goonnë zho, haxta gow lay zho!”

¹⁴ 'Min_codaa nagon rac len dze rii —rëb Jesús—, ndal zha ne racredz sëëb xnëz Dios, per zhis nac zha ne rioxco rzëëb.

*Pe nonguiel_g quizh miech contribucion
(Mr. 12:13-17; Lc. 20:20-26)*

¹⁵ Blalaa zha farisé ne ndxie ga güey zho bnediiz zho dien zha gun_güet zho Jesús cxin me tib diidz, zeena min co yquiaaqui tsiezo zho me lo wxtis. ¹⁶ Dzigo pxeel zho bla zha ne nacgrë zho, ni güey zla zha ne racnie Herod gocgza zho. Bdziñ zho rëb zho lo me:

—Maestro, ndion no niapse diidzli zienal_g luu, ni scagaa zeene rseed luu miech, rdziebd luu mine nac diidzli min co rnee luu lo zho. ¹⁷ Gane niina, racladz no gnë luu dien pe nonguiel_g ga rdeed no dimi ne razh lo rey ne zob Roma, te nonguiel_g da ye.

¹⁸⁻¹⁹ Bien_ga me racladz zho gun_güet zho me, dzigo rëbchaa me lo zho:

—çPe nan to na riend naa pe no guic to? Masaque rëb to na lëë, znuse gun_güet to naa. Golneedz tib pes ne rguizh to nu ganle.

Dzigo bdeed zho tib pes plat lo me.

²⁰ Blozh ga, rëbchaa me lo zho:

—çCho nu, cho lë nu quia lo pes rii?

²¹ Pquiab zho rëb zho:

—Lëë rey i, lëë lë me i quia lo qui.

Dzigo rëb me lo zho:

—Mine rieguial_g sca ycaa rey, goldeeda lo rey; scaquegaa mine rieguial_g ycaa Dios, lo Dios goldeeda.

²² Zeene gon zho sca ptsire me lo xtiidz zho, bzee zdoo zho, mazd mine been zho laa zho wbichese ga, laa zho zey.

çPe nli zrieeban miech?

(Mr. 12:18-27; Lc. 20:27-40)

²³ Dze coquew, güey bla zha saducé lo Jesús. Nac zha saducé riladzd zho zdziñ dze grieeban miech. Dzigo bdziñ zho, ²⁴ rëb zho lo me:

—Maestro, znu psan Moisés diidz: Telne glo mgui guet lo wnaa ne nac tsieel mgui, ni gopd wnaa mëëd, dzigo none betsaque zho ctsieel_nia wnaa co stib, zeena gap wnaa mëëd ne guiaan xlugar xpëëd zha ne gut ga.

²⁵ 'Bio tib dii zha co znu bzhaac, gadz bets nac zho. Ptsieel_nia zha ne nac zha gol, zeene laa zho gut biaand xpëëd zho. Dzigo ptsieel_nia stib bets zho wnaa co.

²⁶ Blozh ga gutaque zha co, pa së zho nsañ mëëd. Ptsieel_niaque me stib zho, goc zho tson, niicle zha co psandaque mëëd. Sca sca haxta bza gza gadzse zho ptsieel_nia me, ²⁷ tibaque zeene yeque me laa me gut.

²⁸ Mine racladz no gacndion no, çchopaa dzigo gac tsieel wnaa co zeene laa zho grieeban? Sac gza gadzse zho ptsieel_nia me.

²⁹ Pquiab Jesús rëb me lo zho:

—I nagon laa to rxin, mine naca riende to zha nac Xtiidz Dios, niicle riladzde to zrieelo me gun me ncuaañ ro ne gard gan miech. ³⁰ Sac gon zeene gal dze ne laa grë miech grieeban, niicle mguiw niicle wnaaw led yedraa hor co dien cho ctsieel_nia zho; sac hor co laa zho gac zig nac grë anj_l ne no gbaa. ³¹ Stiba, ib nli zrieeban men_gut. Mod ran_de to zha zhubnee zaatne raquiet zeene rëb Dios: ³² “Naa nac Dios ne riladz Abraham, naa nac Dios ne riladz

Isaac, naa nac Dios ne rliadz Jacob.” Niicle ne gutle gza zha co hor co, per zeene sca bnee Dios gase rlu mban zho no zho lo me; sac tel Dios, jnacd me xDios mengut, sinque xDios zha mban nac me!

³³ Grë miech ne ndxie ga, zeene gon zho sca ptsire me lo xtiidz zha saducé co, rzee zdoo zho.

Xley Dios mine mazdraa non

(Mr. 12:28-34)

³⁴ Grë zha farisé ne ndxie ga, gon zho sca psioog Jesús ro grë zha saducé co.

Horco biire grë zha farisé co bzodiidz zho stib. ³⁵⁻³⁶ Lad zho no tib maistr ley, dzigo wbig maistr ley co lo Jesús, rëb zho:

—Maestro, lo grë xley Dios, bzhiguiel bnë lo naa dien, ¿pa min nac mine mazdraa non?

Sca rëb zho, sac gocladz zho niungüet zho me. ³⁷⁻³⁸ Pquiab me rëb me lo zho:

—Lëë mine mazdraa non nu znu rnee: “Dib zdoo lüu, dib xalm luu, dib guielbiini ne no guic luu, bleynie Dios, men nroob ne rnabey luu.” Lëew nac mine mazdraa non, ni lëew glopaa raquiet lo grëse ley. ³⁹ No stib mine rnee: “Bleynie samiech luu zigne rleyne luu luu.” Ye min rii nona, meraque lala con min glo. ⁴⁰ Zha ne gban zigne rnabey grop ley rii, lëele grë ley ne psan Moisés ga, lëele grë zhiwseed zha ne biadteed xtiidz Dios ga, zienal zho.

¿Cho xpëed nac Crist?

(Mr. 12:35-37; Lc. 20:41-44)

⁴¹⁻⁴² Gon Jesús nzian farisé ndxie lo me ga, nacte bnabdiidz me lo zho rëb me:

—¿Zha dien rzac to guiaad Men ne zëëble diidz ga cxeel Dios? ¿Cho lo xtii griequia me?

Pquiab zho rëb zho:

—Lo xtii David griequia me.

⁴³ Dzigo rëbchaa me lo zho:

—¿Pe scaw sca? Zha nac waa zeene bdeed Espíritu Sant guielbiini lo David bzeet David men co, rëb David me nac men ne rnabey David. Golgan ganle znu bnee David:

⁴⁴ Rëb Dios lo men ne rnabey naa:

“Cue naa nëz derech, nu bzob, nieeda lozh gnaz naa grëse zha ne rlëë lo luu, csan naa zho ladznia luu.”

⁴⁵ Gase nagon telne nli zha xtii David gac Men ne cxeel Dios ga, ¿zha nac dzigo rnee David men co rnabey David?

⁴⁶ Ni tib zho ib bdziidz zho zha ntsire zho lo xtiidz me; desde dze co ni stib zho biazhdraa pe nabdiidz zho lo me.

23

Mine nac maistr ley grë zho zha farisé

(Mr. 12:38-40; Lc. 11:37-54; 13:34-35; 20:45-47)

¹ Dzigo psilo Jesús bnee me lo grë miech co, ni lo xpëedscuel me, ² rëb me lo zho:

—Grë maistr ley ni grë zha farisé ib lëë xtsiin zho ga, nac cseed zho miech zha nac ley ne psan Moisés. ³ Golguien golgon xtiidz zho, jper nsin golso, ib gunde to mine run zho! Nac zho, ni lalnu rund zho mine rseed zho miech. ⁴ Rio zho rnee zho lo miech, min rii, min rii rnabey ley gon to, ni per ni zha rioxcod zho siquier csilo zho gon zhow.

⁵ ¿Grë ncuane run zho, laaw runse zho par ganpaa miecha! Par guiab miech nguzobdiidz zho lo Dios, rio zho led zhid nzhen grë lo cint rquiaa zho Xtiidz Dios, rlozh ga rzhidoow yan nia zho, rzhidoow quia zho ne. Lar ne rbix zhow, rlozhd dieen peraa rquia lada, xab zhow, haxta zhits ni zho rbiba. ⁶ ¿Zeene rbedz miech zho tib wagw nroob, rdziladz zho zhapaa rzob groj mezh, niicle len yadoogaaw, zaatne glupaa zha non nac zho, ga rzob zho! ⁷ Ro nëza, rdziladz zho ndooladz gnee miech bdiuzh lo zho, zeene rnee miech “zha rac”, “zha non”, nac zho, rlozhd gley zho.

⁸ Sangue to gon yguibde to dien zha gnee miech “zha rac” nac to, sac tibaque men rac no, lëë me ga zëëble diidz cxeel Dios; golguien ganle tel to lalga nac to, rriequia bets to grë to. ⁹ Ib gunde to zig run grëraa miech, runnon zho tib samiech zho rnee zho lëë pxoz zho ga, sac tibaque men ne nac Pxoz to, lëë men co no gbaa. ¹⁰ Yguibde to sac miech topaa gunctsin zho lo Dios, sac loxaque Men ne nole diidz ga cxeel me, men cose zrieelo gunctsin zho lo me. ¹¹⁻¹² Nodne gacglaa to lo samiech to, mazd ndooladz golgac lo zho, sac zha ne racglaa, ziaanwin zho. Gacxe waa, telne racladz to gacnon to, none ndooladz gac to lo samiech to.

¹³ 'j;Probsaxe to maistr ley, probsaxe to zha farisé! Lëda i gon noyun to, rzac to noxco to sëëb miech xnëz Dios, per lel noca to sëëb zha ne racladz sëëb. Ni stiba, per ni to nod xnëz me. ¹⁴ [j;Probsaxe to! Guielntseeb i gon run to, rio to rlozhd gool to xlay to rzo to ro nëz, ni noque to rla to ncuaane rapse grë wnaa viud; ib tedsod gon guielndëd ne ygaa to.] ¹⁵ j;Probsaxe to, rzac to na lëew ga run to! Rio to gui dan rbix to, haxta rded to nisdoo, rquiaguib to dien cho sëëb xnëz to ni rlozh ga laa ne ygab zho nëz lo Dios, lel nëz len gabil zienie to zho. ¹⁶ j;Probsaxe to, nac diidz name to noseed miech, ni per ni to riend pe rnee to! Rnee to lo miech: "Zha ne rzeet yadoo ni tel gund zho mine rnee zho, peet nacd ga, per tel gzeet zho grë or ne no len yadoo ni gund zhow, dol ga gund zho." ¹⁷ j;Nadzpaan xen to, nadzpaan cow nac guic to! ¿Niacxe mazdraa non or lo yadoo? Golguien ganle por yadoo, naclay grë or co. ¹⁸ Rneequete to: "Zha ne gzeet lo pcoog, led dolda telne gund zho mine rnee zho; per tel gzeet zho gon ne ndziib lo pcoog ni gund zhow, dol ga gund zho." ¹⁹ j;Pe nlipaa rnee to peet riende to! ¿Niacxe mazdraa dzigo non gon que lo pcoog? ¿Pe rande to por lo pcoog co raclay gon? ²⁰ Golguien ganle, zha ne rzeet lo pcoog, yele grë ncuaane ndziib low ga quizeet zho; ²¹ zha ne gzeetgaa yadoo, haxta Diosle ga gon rzeet zho, sac ga rbëz me. ²² Scasaque zha ne gzeet gbaa, zaatne rzoble Dios ga nozeet zho, masaque rrieequia me ga rzeet zho.

²³ 'j;Probsaxe to maistr ley, probsaxe to farisé! Rzac to na demas nguzobdiidz to lo Dios, rio to haxta grë guizh bitxtil, guizh nizh, guizh comin run to tsii lal, rdeed to tib lala mine rieguial tsiesan to yadoo, laa ley ne mazdraa non zienied guic to gund to mine rnabeya. Nli rieguiala gdeed to grë gon co, per none scaque tsoxco to gund to mine nac diidzli, none yquia zdoo to samiech to, none dib zdoo to gnalo to Dios. Min rii nac mine mazdraa non.

²⁴ 'j;Ne nlipaa ib riende to pe quiayun to! Rzac to na noxco to gundtalde to xtol to, masaque ni tib ngurudz rsaande to tso lo ncuaane row to, ni riende to rrieequia

haxta tib camell rab to. ²⁵ j;Probsaxe to, masaque nac to zig tib plat, zig tib tas ne nëz zhitssew mbe rna, laa nëz lena rnadraa! Laglaase rquiaalo to miech wen nac to, per tibaque noban to, tibaque nosacsi to samiech to. ²⁶ Golguien none glo csaan to xquielntseeb to, none gac to zig tib plat zig tib tas ne zigtaa mbe nëz zhitsa, scagaa mbe nëz lena. ²⁷ j;Probsaxe to, nac to gon zig grë baa ne dieen paraa nquitsbie rna! Niow rlu nëz zhitsa, laa nëz lena loxaque grë ncuaan biodz, loxaque grë dzit ngutoo nodzë. ²⁸ Sca gon nac to, ne rac to zootxe luu waa nli miech ndzinli nac to, per nëz len zdoo to loxaque zhgab ne dien zha yquidie to miech, zha csacsi to miech no to.

²⁹ 'j;Probsaxe to maistr ley, probsaxe to farisé! Ni lalnu guielto guieud lo to, rio to rzhixcuaa to ro xpaa grë zha ne biadteed xtiidz Dios, ni lëepaa grë pxozgol to beet zho. Dieen peraa run to rquiaalo to rso-ladz to zho. ³⁰ Rnee to: "Telne niaca mine nole ne len dze co, ndeete ne diidz nsacsi xmengol ne grë men rii." ³¹ j;Lëëque to gon nobeero ga, zha nactaa lo dii ntseeb ne ziaad to! ³² j;Scaque nasca golgun! j;Goltsienal grë mine been pxozgol to ga! ³³ j;Miech ngoopdol! j;Zhin mendox! Telne csaande to xquielntseeb to i, ib tedsod gon gabil guey to.

³⁴ 'Grë zha ne cxel naa, zig nac zha ne guiadteed xtudz naa, zha ne nacie Espíritu Sant, zha ne ygaa guielbiini yquiaa zho mine gnabey Espíritu Sant zho, ib tedsod sacsi to zho. No zho gutgazh to, no zho yquiaa to lo cruz, no zho lëëque len xyadoo to gdeed yag to zho, ib gandzede to zho, stib guiedz, stib guiedz tso to ctsidil to zho. ³⁵ Blactaa grë miech ne sca peet xtold ziyut to grë xmengol to, psilow desde Abel haxta Zacarí xingan Berequí, men ne beet xmengol to zaatne nac gax lo pcoog len yadoo. Ni ye to gon zëëb xchen grëse zha co. ³⁶ j;Gneli naa lo to ganle, grë miech ne gon mban len dze rii, grë to zho ygaa guielndëd ne tsieguial to por grëtaa guielntseeb co!

³⁷ 'j;Aque tow men Jerusalén! ¿Pe nacie squitaa nac to, rut to zha ne ziadteed xtiidz Dios lo to, rgoquie to grë zha ne rxeel me lo to? Blactaa gocladz naa, niacnie naa to,

nquianaap naa to, zig run nguid rgueedz ma xpëed ma, per bzhiguiel de to. ³⁸ Gacnañ to sca ganle, nadzetaa gon laa lidz to nu guiaan nğan, ³⁹ sac gandraa to naa, haxta gal dze ne guiab to: “iZha ndzontaa men qui pxeel Dios lo ne!”

24

iNsin golso!

(Mr. 13:1-23; Lc. 17:22-24; 21:5-24)

¹ Laa Jesús zieriee len yadoo grë xpëedscuel me, zeene pcuëezdze zho me, rëb zho:

—Gotsaa gwi ne ganle zha niaataa yadoo rii.

² Blozhse bui zho low, rëbchaa me lo zho:

—Niicle squitaa nagon niaaw, per zdziñ dze ne nitlow dib nacsew. Ni stib quie qui guiaan draa zigne squi zhobxcuaawi.

³ Brie me len yadoo ga grë me zho, laa zho zie nëz Gui Oliv. Bdziñ zho cho gui co, ga bzob me grë me zho. Dzigo wbig gax bla zho lo me, bnabdiidz zho rëb zho:

—Bzhiguiel bnë lo no dien, i pa hor dzigo gac mine bzeet luu ga? iZha glu zeene laa luu ziaadyoble guiaad? Zeene nitlogaa guidzliu, i zha gacndion no laa dze co ziaadyoble?

⁴ Pquiab me rëb me lo zho:

—Nsin golso, zeena choot yquidiede to.

⁵ Sac nzian zha ne grieequia guiab zho zha nac Men ne zëëble diidz cxeel Dios; ni nzian miech ne yquidie zho. ⁶ Zeene gon to nëzrii nëzrec noxtseeb csilo dil, guiabde to togo lëele dze ne guial naa ga bdziñ; sac niicle noyacle dila, noxtseebragaa pa csilo gaca, led lëdle ne nitlo guidzliu ga. ⁷ Garaa csilo grë dildox, grë guiedz nroob laaw tilnie saguiedz nrooba; grë zha ne rnabey grë guiedz nroob, laa zho tilnie sazha rnabey zho. Nëzrii nëzrec csilo gni grë zhodox, nzian zaatne gan miech gbin. ⁸ Ni lega loxaque mine rsilosew ga, sac nroobraa guielne ne gan miech lozh ga.

⁹ Zeene laa grë ncuaan rii noyac, i nsin golso! Sac hor co laa miech tsielo to ladznia zha ne csacsi to, haxta zut zho palal to, grëse miech stsidil zho to loxaque ne nac to zha ne no xnëz naa. ¹⁰ Nzian zha ne nole xnëz naa, len dze co laa zho gbiche, laa zho csilo lëëque zha glëenie zha ne nacgrë zho,

haxta zielo zho zho ladznia zha ne gut zho. ¹¹ Len dze co zrieequia nzian zha ne yquidie miech guiab zho xtiidz Dios noteed zho, ni nzian zha ne gliladza. ¹² Grë zha ne nole xnëz naa, zeene gan zho grëtaa guielntseeb, grëtaa dol ne quiayun miech len dze co, ndal zho gleyniedraa zho Dios dib zdo zho. ¹³ Per zha ne tiblifique gac, gbiched zho lo Dios, niicle tel petaa gan zho noyac, zha co gac zha ne gdziñ lo me. ¹⁴ Niicle scataa noyac grë ncuaan co, ib none ygaaz Xtiidz Ndzon Dios lo grëse miech, grëtaa zaatne ndxie miech laa zho gacnaa; lozhraa ga dzigo laa guidzliu rii nitlo.

¹⁵ Zeene gan to zaatne nac Lugar Nda len yadoo, zo tib ncuaane rieguiald so ga, tib ncuaane ziaad gnitlo, zigne bzeet Daniel men ne biadteed xtiidz Dios (zha ne glaba, none guien zho zha naca), hor co golguib dien zha xoon to. ¹⁶ Zha ne no grëraa guiedz ne ngab Judé, none xoon zho tsie zho dan, ga tsietsolan zho. ¹⁷ Zha ne lëëtaque hor co no glaa guic lidz, none lëëléd xoon zho, ib guiabd zho sëeb zho len yu tsiebee zho ncuaane rap zho. ¹⁸ Zha ne quiagaa lo dziin dan, ib gund zho tsie zho lad guiedz tsiexi zho xab zho. ¹⁹ iProb grë men wnaa ne lëëtse len dze co zoney xpëed, men ne quaniegaa mëdyeen ne bii radz! ²⁰ Golnab lo Dios gande to guielne co len mëe ne rac nal, dze ne rdziiladzgaa to lo dziin. ²¹ Ne nligaa guielnedoxa. Wlal ne biaan guidzliu haxta lo nadze, gard gan miech tib guielnedox sca, ni gandraa zhow ted ga. ²² Telne csaan Dios nroob dze gac guielne co, ni stib miech rii guiaan draa; per na por grë zha ne bzooblo me sëeb xnëz me, gdeete me diidz gaca nroob dze.

²³ Zigne rne naa ga, len dze ne scataa gan miech grë dil co, zha ne gnë lo to: “Goltë nu ganle, lëë Men ne nole cxeel Dios ga blanso nu”, gnëgaa zho: “Goltie nec ganle, laa me bdziñ ga”, gliladzde tow. ²⁴ Sac zrieequia zha ne yquidie guiab zho zha nac men co, zrieequia zha ne guiab xtiidz Dios ziadteed zho lo miech, zun zho grë milagr nroob, parne yquidie zho miech, haxta zha ne nole xnëz Dios, zguib zho dien zha gdeeda diidz yquidie zho zho. ²⁵ iNsin sca golso! Benque laa naa nilew lo to. ²⁶ Nligaa zha ne

gnë lo to laa meñ ne pxeel Dios ga blansole, gliladzde tow. Nenda cxeel zho to tib dan zit, gnë zho: “Goltsie ganle laa me no ga”, gnëгаа zho pa tib len yu ne no me, ni tib xtiidz zho gliladzde to. ²⁷ Sac zeen gal dze ne guiaad me stib, gacda ncuaan ngueets zhlian, grëse miech gan me. Zig tel guiab tib belye nroob ne glu zhan gbaa, desde nëz ne rlan ngbidz haxta nëz ne rzëeb ngbidz, ¿niacxe gand grëse miecha? ²⁸ Zlupaa zeene laa me guiaad; nanle to ganle zaatne nix ma gut, ga rcaalsa pech.

Ziaad Jesús stib

(Mr. 13:24-37; Lc. 12:41-48; 17:26-30, 34-36; 21:25-33)

²⁹ Zeene lozhse gan miech grë guielndëdcox co, laa lo ngbidz ycow, gziinidraa mëë. Grë mel ne ndziib gbaa, laa ma gliaal; grëraa ncuane no gbaa, masaque nëzrii nëzrec gaca. ³⁰ Horco zlu ganle zeene laa Mgui ne pxeel Dios ga, ziad-zëeb lo xcow con grë guielndzon, con grë poder ne rap me, grëse miech mban gac zho, zoon zho gan zho me. ³¹ Grë xanj Dios, hor co laa Dios cxeel zho tsiecuedz zho zhitrompet zho parne ycaalsa grëse zha ne ngab xnëz me, tel pa lotaa lo guidzliu no zho.

³² Golzoob cuidad zha nac yag guigw. Led nanle to ganle, zeene laa grë zhicwa racnieen, ni rsilo rdzib zhiblaga, gase rlu ne laa mëë nëeg ziaadgaxle. ³³ Scaque nagon zeene gan to laa grë mine rne naa lo to nu rsilo noyac, dzigo nanle to laa dze ne guiaad meñ co ziaadgaxle. ³⁴ Gneli naa lo to ganle, nzian miech ne mban niina bii zan zho zeene laa grë ncuaan co csilo gac; sac ible ncuane gaca. ³⁵ Zdziñ dze ne nitlo gbaa, nitlo guidzliu, sangue mine rne naa lo to nu, nitloda; ible laaw none gac.

³⁶ Lëëraasi choot nand dien pa dzew, dien pa horgaaw, per ni grë anjl ne no gbaa, per ni naa nanda, loxaque Pxoze naa nana.

³⁷⁻³⁹ Nanle to ganle zha bzhaac miech len dze ne wban Noé, ib bliladzd zho xtiidz me. Guxt no zho lo zhilni zho, zha ne notsieelnia, zha ne nobediingaa xpëed, laa dze bdziñ laa Noé bzëeb len barcw; tibaque zeene biala zho biini laa guiedox co nonitlolle zho. Scadaa nagon sac grë miech nad

rii, tibaque zeene tsa zho biini laa Mgui ne pxeel Dios ga ziaadle. ⁴⁰ Horco zaatne quia chop mgui lo dziin dan; tib zho tsienal zhits me, stib zho guiaan. ⁴¹ Zaatne quiayot chop wnaa, tib zho tsienal zhits me, stib zho guiaan.

⁴² 'iNsin sca golso, sac gon nande to dien pa horpaa guiaad me, benque laa vis racle lo to! ⁴³ Golgan ganle, tel niaca mine gacnan miech laa ngbaan tsieban lidz zho guieel, per nand zho dien pa horpaaw; ¿niacxe zaaguies zho? Led sobna zho lëë, nsin nsin so zho. ⁴⁴ Scaque to nagon, none nsin so to, sac gon lega naclew zeen gan to laa me ziaadle.

⁴⁵ 'Golgan ganle, masaque laa to gac nagon zig tib ngundziin ne riaannie ro lidz meñ ne rquia zho xtsiin.

'Ngundziin ne ndzinli, zeene laa meñ ne quia zho xtsiin ga grie, ine niowse guiaan zho guiaannie zho grëraa zha ne no lidz me. ⁴⁶ Zha ne sca gun, jwen tsie zho, sac zeene gbire me gan me scataa noxco zho dziin ne pso me zho, ziannziiu zho lo me ⁴⁷ haxta so me zho, zha yquiaanap grëse ncuane rap me!

⁴⁸ Tel ngundziin yozhgaaw, mine tsienie guic zho guiab zho gbireniobd meñ ne quia zho xtsiin ga, ⁴⁹ csilo zho csacsi zho grëraa zha ne nac ngundziin, csilo zho ctsieelsa zho grë ngonziu tso zho loxaque gzudz zho, loxaque gowcho zho, ⁵⁰ tibaque zeene gan zho laa me bdziñle. ⁵¹ Zha ne sca gun, per peraa dien gun me, ib tedsod nroob caxtigw ne cteed me zho, sonëz me zho guey zho zaatne no grëraa zha ne rond diidz, ga tso zho grë zho zha co goonnë zho, haxta gow lay zho lo guielndëdcox ne ted zho.

25

Zha bzhaac tsii wnaa nguieg

¹ Blozh ga rëbchaa Jesús lo zho:

—Par sëeb miech zaatne rnabey Dios, masaque naca zig rzëeb miech tib lo lni zaatne noyac tib guieltsieel.

'Tsii wnaa nguieg name, brie zho zixenëz zho mgui ne ctsieelnia, tib tib zho bise zho psin win ne rec nceit ne rziini. ²⁻⁴ Gaay zho goc ligier pcodzë zho zhipsin zho nceit, ni zhaaque bi zho zniipa; laa

zgaay zho gocnroladz, zigne bzhense zho psin co scase bi zhow, bid zho nceit ne niodzëraaw.

⁵ 'Goc pa hora rio zhimcaalo zho, ni rdzindaque mgui ne ziexinëz zho ga, tibaque zeen laa zho pquia mcaal. ⁶ Gol groļ guieela, zeen laa vis rac, laa mgui co ziaadle, zha ne ziexinëz me ga, zac grieë zho tsiedzieel zho me. ⁷ Lëëled brieë mcaallo gza wnaa nguieg co, psilo zho nozhixcuaa zho zhipsin zho. ⁸ Zeene gon gza zha nroladz co ygaadraa zhinceit zho, dzigo bnab zho lo zgaay zha co, gdeed zho niip nceit yquiiin zho, sac laa zhipsin zho noyuule. ⁹ Pquiab zho rëb zho: "Grieeloda, sac mine yquiiinse zhipsin no ziaadnie no. Mazd goltsie zaatne rto zhow, ga goltsiexiw." ¹⁰ Per lo lal ne ziexi zho nceit, laa mgui co bdzin. Zeene wbiire zho, laa ro yu nioogle, loxaque gza zha ne nsinle zo ga, zha cose bzëëb leñ yu. ¹¹ Dzigo psilo zho, rcaan nia zho ro yu, rbedz zho mgui co cxal me ro yu sëëb zho. ¹² Per bdeete me diidz nzëëb zho, rëb me: "Runbeyd naa to gon, nan naa dien cho nac to."

¹³ 'iNsin sca golso! —rëb Jesús—. Sac gon nande to pa dzepaa, pa horpagaa gbiire guiaad Mgui ne pxeel Dios.

Zha ne biaannie dimi

¹⁴ 'Mgui ne pxeel Dios ga, ziaad gac me zig tib meñ ne no grieë tsie tib viaj zit.

"Tib meñ name no grieë me tsie me tib guiedz zit, dzigo bredz me zha ne run dziin lo me, bdeed me palalga xtimi me lo zho gundziin zhow leñ dze ne guiend me ga. ¹⁵ Tib zho pcaania gaay mil pes plat, tib zho chop mila, stib zho pcaania tib mila. Tib tib zho, bdeedse me mine rgobey me grieelo zho gundziin zho, dzigo laa me brieë laa me zie.

¹⁶ 'Zha ne biaannie gaay mil pes plat co, güey zho bloonon zhow, beena gan zgaay mila. ¹⁷ Zha ne biaannie chop mila, ye zho güey zho bloonon zho dimi co, scaque beena gan schop mila. ¹⁸ Laa zha ne pcaania tib mila ga, lel güey zho güeyteen zho tib guieer güeyloliu zhow.

¹⁹ 'Goc bla iza laa men co bdzin, dzigo bredz me zho tib tib zho, tsie zho gzodiidz zho dien yo dimi ne biaannie zho ga.

²⁰ 'Bdzin zha ne pcaania gaay mil pes plat co, bdzinie zho xtimi me, rëb zho: "Laa xtimi luu nu gon, lëë gaay mil pes ne psan luu lo naa nu, laa zgaay mil min rii nac mine bdziniaaw." ²¹ Rley me rëb me lo zho: "iZha squi nagon racladz naa! Rley naa ran naa squitaa ndzinli luu, squitaa nguzobdiidz luu; sac gon lo palalse dimi ne psan naa lo luu ga, bioxco luu zaacse bendziin luuw. Nana gon, nroobraa mine gnedz naa gundziin luu. iNa bded, zeena yгаа luu grë guiebley ne quiayac nu!"

²² 'Blozh ga, bdzinaque zha ne biaannie chop mila ga, ye zho laa zho bdzinie xtimi me, rëb zho: "Laa xtimi luu nu gon, lëë chop mil pes ne psan luu lo naa nu, laa schop mil min rii nac mine bdziniaaw."

²³ Pquiab me rëb me: "iSquiw nagon! Rley naa ran naa squitaa ndzinli luu, squitaa nguzobdiidz luu lo naa; sac gon lo palalse dimi ne psan naa lo luu ga, bioxco luu zaacse bendziin luuw. Nana gon, nroobraa mine gnedz naa gundziin luu. iNa bded, zeena yгаа luu grë guiebley ne quiayac nu!"

²⁴ 'Zeene bdziintaa zha ne biaannie tib mila ga, rëb zho lo me: "Nli bendziind naa xtimi luu, sac nanle naa zha nac luu, niicle paraa niundziin naaw, grëse mine niuna gan lo luu niaana; ²⁵ gane mazd bialoliu naaw. Tib mil naca bneedz luuw, ledaaw nu." ²⁶ Blëë guic me, rëb me lo zho: "iBiche nu, paat rquiind naa miech yozh, miech nroladz ne squi nac! Conque nanle luu sca nac naa, ²⁷ i pex nac dzigo waa bioxcod luu maase mbediin luu dimi qui, ndzini-aaw palal ncaania naaw niina?" ²⁸ Dzigo rëbcha me lo zha ne ndxie ga: "Niinagazh golcob tib mil pes qui lo zha qui, goldeeda lo zha ne ziaadnie tsiw i. ²⁹ Sac zha ne rioxco rundziin ncuane rcaania zho, zacnroobraa ncuane yquianie zho. Laa zha ne squi nac, haxta mine pcaaniale zho, zdiooba lo zho. ³⁰ Golxen zha yozh qui, goltsiesan zho lo ncow nëz ley. Ga gan zho guieledox ne tsieguial zho, ga goon zho haxta gow lay zho."

Zha gun Jesús guielwxtis

³¹ Blozhse bzodiidz Jesús cuent co lo zho, rëbcha me:

—Naa ne nac naa Mgui ne pxeel Dios, zeen gal dze ne laa naa guial stib, zialnie naa grë xanj naa, zlu grëtaa guielndzon ne rap naa, laa naa sob lo xcan ne raguial naa soob naa. ³² Grëse miech ne ndxie dibdoose lo guidzliu, hor co laa zho gacredz lo naa, laa naa cueextso zho zig rbeextso baxtor chiv lad xpëcwxiil zho. ³³ Zha ne no xnëz naa, zha co gdziñ naa cue naa nëz derech, laa zha ne nod xnëz naa, cue nëz revés.

³⁴ 'Lozhse ga, naa ne nac naa men ne rnabey, hor co laa naa cuedz zha ne no xnëz naa, guiep naa lo zho: "Goltë grëse to, to ne nac to zha ne nziuu lo Pxoza naa. Goltëd zeena ycaania to zaatne cuëz to, ible par to bzaa mew desde zeene bzaa me guidzliu. ³⁵ Sac zeene pcaabedz naa, bneedz to ncuaane dow naa; zeene bnab zhis naa, bneedz to ncuaane go naa; zeene bial naa ladz to, bneedz to lidz to blëz naa; ³⁶ zeene gon to guieñd xab naa, bgacwxab to naa; zeene bzhacnë naa, zeene bio naa ladzguiib, biaad to biaadgan to naa." ³⁷⁻³⁹ See zdoo zho gnë zho: "¿Per pa hor bneedz no ncuaane doow luu, ncuaane go luu, pa hor bneedz no zaatne blëz luu, pa horgaa bneedz no lar ne gotxab luu, ib bdzion no nzhaacnë luu, bdzion no niogaa luu ladzguiib?"

⁴⁰ 'Dzigo guiep naa lo zho: "Gzobtaa hor ne gon been to xyudar zha ne nacgrë to, güeygan to zho, pcaaniagaa to zho, niicle zha ne bzoob miech peet nonda, rrieequia xyudar naa ga been to, rrieequia naa ga biaadgan to."

⁴¹ 'Laa zha ne ndxie nëz revés, hor co laa naa gzonëz zho, guiep naa lo zho: "¿Golbiche lo naa nu, miech ndziibdee! ¿Golsë lo guidox ne rieguial to, zaatne no guey mendox grë xanj ma! ⁴² Sac gon, bio dze pcaabedz naa ni bneedzde to ncuaane niow naa; bnab zhis naa, ni bneedzde to pe nie naa. ⁴³ Bial naa ladz to, ni bneedzde to zaatne mbëz naa; gon to guieñd xab naa, ni ni tib lë lar bneedzde to niacw naa. Bio naa ladzguiib, bzhacnë naa, ni pe liaadz to niaadgan to naa."

⁴⁴ 'Squiab zho gnë zho lo naa: "Per pa hor bdzion no luu rcaabedz luu, rnabгаа zhis luu; pa hor bdzion no guieñd pa cuëz luu, guieñd lar ne gacw luu; pa horgaa bdzion

no no luu ladzguiib, nixgaa luu rzacnë luu."

⁴⁵ 'Dzigo guiep naa lo zho: "Grëse vuilt ne bzoliaadz to niun to xyudar zha ne no xnëz naa, bzoliaadz to niegan to zho niicle zha ne mazdraa wina, rrieequia naa ga sca been to."

⁴⁶ 'Horco grëse zha co laa zho guey lo guidox ne gdziñdraa dze grieë zho; laa zha ne bioxco wban zigne rnabey naa, grëse zho laa zho yгаа tib guielmban ndzon ne gdziñdraa dze lozh.

26

Bnediidz zho dien zha gnaaz zho Jesús (Mr. 14:1-2; Lc. 22:1-2; Jn. 11:45-53)

¹ Zeene blozh sca bnee Jesús lo grë miech co, dzigo rëbchaa me lo xpëëdsuel me:

² —Nanle to ganle schopaque ngbidz, laa lni Pascw csilo. Naa ne nac naa Mgui ne pxeel Dios, lo lni co gon gnaaz miech rii naa, tsielo zho naa ladznia zha ne yquiaa naa lo cruz.

³ Grë zha ne nac pxoz ne rnabey, grë maistr ley ni grë zha ne nac men non lo men guiedz Israel, lëëtaaque hor co laa zho ndxie lidz Caifás, men ne nac pxoz nroob. ⁴ Laa zho ndxie ga, nonediidz zho dien zha grieelo gnaaz zho Jesús, gut zho me, per tib mod ne grieelod glisqui men guiedza. ⁵ Rnee zho: "Lëëraasi choot gnabeyd yгаа me merpaa dze lni, zeena gacntseebd menguedz."

Pchoob tib wnaa nceit nex guic Jesús (Mr. 14:3-9; Jn. 12:1-8)

⁶ Betain ga no tib men ne biac lo guiedz lepr, lë Simón. Lëëtaaque no Jesús lidz men co, ⁷ zeene bdziñ tib wnaa bdziñnie tiblo nceit nex, nosew tib len ncuaan win niaa niapse quie rhebni, tiblo nceit ni-azha. Squi zob Jesús lo mezh, güey wnaa co güeychoob me nceit co guic Jesús. ⁸ Zeene gon xpëëdsuel Jesús sca been wnaa co, blëë zho, rnee zho:

—¿Pa rieguiala squi pxin zhlë wnaa qui nceit qui! ⁹ Tel niaca mine ndow, pe zhidaa dimi ne nguizh zhow, nquiinpaa dimi co ngaaza lo grë zha ne guieñd pe yquiin.

¹⁰ Gon Jesús sca rac zho, dzigo rëbchaa me lo zho:

—¿Pe nacne rlëe to lo wnaa qui? Golsaan me. Par naa nroob non minë been me i. ¹¹ Tel nli lëe racladz to gun to xyudar zha ne guiend pe yquiin, zac ygad to lo zho stib dze, sac tibaque ran to zho; sangue naa zhile laa naa gbiche lo to. ¹² Led pxin zhlëd wnaa rii zhinceit me, sac gon rrieequia laa me bzhixcuaale xcuerp naa nu gal dze ne ygueetsa. ¹³ Gneli naa lo to ganle, dipse lo guidzliu zaatne cseedtaa miech Xtiidz Dios, ible soladz zho wnaa rii, seet zho minë been me nu.

Güeyto Judas Jesús
(Mr. 14:10-11; Lc. 22:3-6)

¹⁴ Lo gza tsiipchop zha ne nac xpëedscuel Jesús ga, brieë zha ne lë Judas Iscariot güeyzodiidznie Judas grë zha ne nac pxoz ne rnabey, ¹⁵ rëb Judas lo zho:

—¿Palal quizh to naa telne gun naa Jesús ntregar lo to?

Dzigo biaan zho diidz quizh zho Judas galptsii pes plat. ¹⁶ Nacne psilo Judas noguib Judas dien zha gdeeda diidz csañ Judas me ladznia zho.

Dowxtseenie Jesús xpëedscuel me
(Mr. 14:12-25; Lc. 22:7-23; Jn. 13:21-30; 1Co. 11:23-26)

¹⁷ Mer dze ne rsilo lni Pascwa, len dze ne sca row zho quietxtil ne riotsd ncobi ga, bnabdiidz xpëedscuel Jesús lo me dien pa lo racladz me tsiegunlo zho ncuaañe gowxtseenie me zho wdze co. ¹⁸ Dzigo rëbchaa me lo zho:

—Nanle to ganle cho lidz zrieelo gdziñ ne. Goltsie Jerusalén golguiab lo zho: “Znu në xmaistr no: Gneedz luu lidz luu me dioow no xtsee Pascw rii. Niinataa laa xtse me bdziñ, gane racladz me lidz luu nu diowxtsee no nawdze grë no me.”

¹⁹ Dzigo laa zho zie. Güey zho zaatne pxeel me zho ga, ga beenlo zho xtsee co.

²⁰⁻²¹ Wdze co, laa me no xtsee grë me zho, zeene bnee me lo zho rëb me:

—Gacnan to ganle, lëëque tib to gon tsielo naa ladznia zha ne gnaaz naa nawdze rii.

²² Zeene bin zho sca rëb me, mbanse rac zho, dzigo psilo zho tibga tibga zho rnabdiidz lo me, rnee zho:

—Bnë dien, ¿cho gun min co? ¿Pe naaw?

²³ Pquiab me rëb me lo zho:

—Zha ne gan to csëeb xcuun len xquien naa, lëe zho ga. ²⁴ Naa ne nac naa Mgui ne pxeel Dios, niina laa miech gut naa zigne raquietsew lo Xtiidz Dios; per, iprobsaxe zha ne tsielo naa ladznia zho! ¿Mazd wen nie zho, ib niacd zho miech lo guidzliu!

²⁵ Yeze Judas rnabdiidz lo me rnee Judas: —Maestro, ¿pe goon naaw ye?

Rëbchaa me lo Judas:

—Luuw gon Judas, luu güeyto naa.

²⁶ Laa zho noyow, zeene bzhen Jesús tib quietxtil, bdeed me xquizh lo Dios, blozh ga beengrol mew, dzigo bdiiz mew lo zho, ni rëb me:

—Golquiina, lëe xcuerp naa i gon.

²⁷ Ni bzhen me tib cop nroob vin, bdeed me xquizh lo Dios, blozhse bdeed me xquizh, dzigo pteed me cop co lo zho grëse zho, rëb me:

—Golguie vin qui, ²⁸ sac lëe xchen naa i, minë no gzhiee par guiaanmbe grë miech lo xtol zho sëeb zho xnëz Pxoza naa, sac lëe stib mod cub nu psañ me parne sëeb miech xnëz me. ²⁹ Lëe lultm vuelt nu guie naa vin rii, sac zhaale stib vin cub ne guie naa gal dze ne guienie naa tow zaatne rnabey Pxoza naa.

Dzigo psilo me biilnie me Dios gza me zho.

Bzeet Jesús zha gun Pedr
(Mr. 14:26-31; Lc. 22:31-34; Jn. 13:36-38)

³⁰ Blozhse biilnie zho Dios, laa me brieë ga gza me zho, laa me zienie zho nëz Gui Oliv.

³¹ —Ible saan to naa nawdze rii —rëb me lo zho—, sac scale ziaad lo Xtiidz Dios zaatne rnee: “Zdeed Dios diidz csiwee zho baxtor, lozh ga nëzrii nëzrec gliaal mëcwxiil.” ³² Mincopaa nagon gun miech naa, per zeene laa naa grieëban glole naa ga Galilé, ga cuëz naa to.

³³ Dzigo rëbchaa Pedr lo me:

—Niicle telne saan grë zha qui luu, sangue naa gon csaand naa luu.

³⁴ Pquiab me rëb me lo Pedr:

—Gneli naa lo luu ganle, guieel riigazh, gardle ycuedz gall, laa luu csale tson vuelt guiab luu runbeyd luu naa.

³⁵ Per tibaque nac xtiidz Pedr, rnee Pedr lo me:

—Niicle tel zaatne guet luu guet naa, per gunscad naa. ¿Pe nacne guiep naa runbeyd naa luu?

Scaque rnee grëraa xpëedscuel me.

Bzodiidznie Jesús Pxoze me Getsemani
(Mr. 14:32-42; Lc. 22:39-46)

³⁶ Zeene bdziinne Jesús zho zaatne lë Getsemani, dzigo rëbchaa me lo zho:

—Nuse nagon gol sob, laa naa ga gazodiidznie naa Pxoze naa.

³⁷ Horco psilo mban rac zdo me, ri-abguielne me, dzigo bredz me Pedr, ni grop xingan Zebedé, bzënie me zho palal ³⁸ dzigo rëbchaa me lo zho:

—Mban rac zdo naa, zootle zig zet naa lo guielne rii. Nuse nagon golguiaan, per gol sobna.

³⁹ Bzë me spalal, dzigo pquitsgzhib me haxta bdzin lo me lo liu; psilo me bnaab me lo Dios, rëb me:

—Papá, laa naa rnab lo luu, telne zala zdo luu, bzhiguiel psilaa naa lo grë guielne rii. Min rii rnab naa lo luu, per telne grieloda, mine gnëtaa luu, min co gac.

⁴⁰ Zeene guso me, güey me zaatne biaan gza tson zha co, gon me laa zho nixguiesle; dzigo rëbchaa me lo Pedr:

—¿Pe ni palal blëbde to nzobna to?

⁴¹ Gol sobna, golnab lo Dios zeena yquild mendox to. Niicle ne squi lëbdraa xcuerp to sobna to, per golnab lo Dios, sac gon min co nac mine racladz zhiespíritu to.

⁴² Dzigo güey me stib, güeyzodiidznie me Dios; scaque mine bnaab me glo mincoque bnaab me. ⁴³ Zeene wbiire me bdzin me lo zho, gon me laa zho nixguieslaque, sac lëbdraa zho mcaal. ⁴⁴ Wbiire güey me güeynab me lo Dios, scaque mincoque bnaab me. ⁴⁵ Zeene laa me wbiretaa bion vult co, rëbchaa me lo zho:

—Lëew nagon, zacle na gaguies to, zacle gdziiladz to. Naa ne nac naa Mgui ne pxeel Dios, laa hor nagon bdzin zeene laa grë miech ntseeb rii guiadnaaz naa. ⁴⁶ Goltsieso, zeena zio ne; sac gon laa zha ne glu naa lo zho ziaadle nu.

Bnaaz zho Jesús

(Mr. 14:43-50; Lc. 22:47-53; Jn. 18:2-11)

⁴⁷ Laa Jesús bii quianeeque, zeene laa Judas (tib zha ne nac xpëedscuel me) bdzin,

bdziinne Judas tib dzoon zha ne pxeel grë pxoze ne rnabey, ni grë zha ne nac zha non lo men guiedz Israel. No zho nzhen spad, nogaa zho nzhen yag. ⁴⁸ Biaanniele Judas zho diidz zha glu Judas cho nac Jesús, rëb Judas lo zho zha ne gan zho gow Judas bzhid cuas, lëe me ga, ligier so zho gnaaz zho me. ⁴⁹ Zigne bdzin Judas pquiaabdiuzh Judas me, blozhse ga wbig Judas dow Judas bzhid cuas me. ⁵⁰ Dzigo rëbchaa me lo Judas:

—Judas, ¿pe ziaadgun luu nu?

Lëelëd wbig be grë zha co, bzhen zho me. ⁵¹ Horco biet tib zha ne rzënie me ga, bdoz zho zhispad zho psilaa zho tib niaw, bliengaa zho diag tib zha ne rquia xtsiin men ne nac pxoze nroob. ⁵² Dzigo rëb Jesús lo zha ne pquiaaw ga:

—Blootsow zhispad luu, ib gundraa luu squi cob luuw. Sac gon zha ne rdil con spad, noxtseeb ne low guet zho. ⁵³ ¿Niacxe nan to na grielod gnab naa lo Pxoze naa niina cxeel me tsiipchop partid xanj me guiaadla ne nu? ⁵⁴ Per telne sca gun naa, ¿zha dzigo gac mine zhobnee lo Xtiidz Dios, zaatne raquiet mine noyac nu?

⁵⁵ Dzigo rëbchaa me lo grë zha ne bdzin ga:

—¿Pe nacne squitaa rac to? ¿Niacxe naa cho zha ntseeb, ne squitaa nzhen to spad, nzhen to yag ziadnaaz to naa? Blactaa name gon to noseed naa miech len yadoo, ¿pe nacne bnaazde to naa ga? ⁵⁶ Per ible laa grë ncuaan rii gon noyac, zeena grieequia grë mine bzeet grë zha ne biadteed xtiidz Dios lo miech padzeela.

Horco grëse zha ne nac xpëedscuel me laa zho bzhoon, tipse me psan zho ga.

Güeynie zho Jesús lo zhiwxtis zha Israel

(Mr. 14:53-65; Lc. 22:54-55, 63-71; Jn. 18:12-14, 19-24)

⁵⁷ Ga brieenie zho Jesús bdziinne zho me lidz Caifás, men ne nac pxoze nroob. Grë zha ne rnabey lo menguiedz Israel, laa zho ndxiele ga. ⁵⁸ Ye Pedr maase zit zit nal Pedr laa Pedr bdzin xley men co. Bdzin Pedr güey sobga Pedr lo grë zha ne ndxienap, quiambëz Pedr dien zha gun zho Jesús.

⁵⁹ Grë pxoze ne rnabey, grë zha ne nac zha non lo menguiedz, grëse zha ne nac

wxtis, laa zho ndxie nëz len yu co, quiaguib zho zha ne gzhixcuaa maase diidzguizh ycaadz zho Jesús, parne gdeeda diidz gnab zho guet me. ⁶⁰ Ndal zha ne sca been, per brieequiad xtiidz zho, sac zhaase zhaase rnee zho. Tibaque zeene guso chop zho, ⁶¹ rëb zho:

—Bdzion no gon rnee me laa me ctixche yadoo ne zob lad guiedz nu, zaatne riodzian ne Dios, lozh ga tsonaque ngbidz gzaalo me stiba.

⁶² Dzigo hor co bzoli men ne nac pxoz nroob, rëb me lo Jesús:

—¿Pe nacne rquiabd luu? ¿Pe nli sca rnee luu, te nlida ye?

⁶³ Gon pxoz nroob co rquiabdaque Jesús, rëbcha me:

—Zig zob Dios mban ne no gbaa, laa naa rnab lo luu bneeli lo no dien cho nac luu. Bnë tel nli Xpëed Dios nac luu, Men ne zëëble diidz ga cxeel me.

⁶⁴ Dzigo pquiab Jesús rëb me:

—Scaw gon, naa nac men co. Naa ne nac naa Mgui ne pxeel Dios, bii zan to ganle zeene laa naa zoob cue Dios nëz derech, ni zeene laa naa guieet gbaa zialzëeb naa lo xcow.

⁶⁵ Horco ptsiez pxoz nroob co xab me, sac blëe me bin me sca rëb Jesús.

—¿Pe mazdraa textigw ne racladz ne? —rëb me—. Laa to binle ganle zha rzëtaa xtiidz me noguitnie me Dios. ⁶⁶ Nana waa, ¿pe gnë to zha dziuun ne me?

Pquiab be zho rëb zho:

—¡Ib rieguial guet me!

⁶⁷ Dzigo hor co psilo zho nosacsi zho me. Zha ne rtsuc lo me, zha ne rdeed puñet me, nogaa zho rgap lo me, ⁶⁸ rlozh ga rzhidznie zho me rnee zho:

—Luu ne nac luu men ne pxeel Dios, ¿bnë dien cho ga bdiñ luu?

Rëb Pedr runbeyd Pedr Jesús

(Mr. 14:66-72; Lc. 22:56-62; Jn. 18:15-18, 25-27)

⁶⁹ Horco laa Pedr bii zob nëz ley. Ga zob Pedr, güey tib ndzooop ne quia dziin lidz men rnabey co; rëb ndzooop lo Pedr:

—¿Ye luu lëe rzënie Jesús, men Galilé ne bdzinnie zho i?

⁷⁰ Per bneelid Pedr. Squi zob grë zha co, rëb Pedr:

—Riend naa dien cho men rnee luu.

⁷¹ Laa Pedr ziele nëz ro puert ne quia ro nëz, zeene gon stib ndzooop ne rquia dziin ga Pedr, rëb ndzooop lo zha ne ndxie ga:

—Ye mgui qui gon nacgrë men Nazaret ne bdzinnie zho i.

⁷² Scaque bneelid Pedr, haxta rzeet Pedr Dios rëb Pedr runbeyd Pedr me.

⁷³ Wdzeepaaw, rëb zha ne ndxie ga lo Pedr:

—Ne nligaa ye luu rzënie men ne bdzin i. ¡Rlupaa name zig rnee zha nëz Galilé rnee luu!

⁷⁴ Dzigo psilo Pedr rzeet Pedr Dios rnee Pedr runbeyd Pedr Jesús, haxta rnee Pedr:

—Dios zobwi ganle, telne led diidzlid nu rne naa, maase cuiibdee naa.

Loxaque blozh sca brie ro Pedr zeene laa tib gall pcuedz. ⁷⁵ Horco psoladz Pedr xtiidz Jesús zeene rëb me lo Pedr: “Gardle ycuedz gall, tsonle vuilt rëb luu runbeyd luu naa.” Dzigo mbanse rac Pedr. Brie Pedr ga, psilo Pedr biin Pedr guieñe co.

27

¹ Ziadyiinile liuw, wbiire pcaalsa grë pxoz rnabey, grë zha non lo menquiedz, bnediizd zho dien zha gnabey zho guet Jesús. ² Blozhse bzodiidz zho, dzigo laa zho bzobdoo me blee zho me ga ziesan zho me lo Pilat, men ne nac gobernador.

Gut Judas

(Mr. 15:1; Lc. 23:1-2; Jn. 18:28-32)

³ Laa Judas Iscariot zha ne pto Jesús ga, zeene bin Judas laa zho rnab guet me, lëëlëd güey Judas lo grë pxoz rnabey co, lo grë zha non lo menquiedz ga, zietsire Judas dimi ne bdiizh zho Judas ga. Mban rac Judas, ⁴ bdzin Judas rëb Judas lo zho:

—Naraa rien naa lëda nu ben naa. ¡Tib dol nrooble nu, znu bialto naa tib men ne peet xtold!

Pquiab zho rëb zho:

—¡Mincotaa gon ndiond no! ¡Xcuentzhe luu ga!

⁵ Horco pchel Judas dimi co len yadoo. Lo guieñe co brie Judas ga güey Judas lëëque Judas pxiiyan Judas.

⁶ Grë zha ne nac pxoz rnabey ga, güey zho ptop zho dimi co. Per blozh ga, riend zho dien zha gun zhow.

—¿Zha dziuun ne dimi rii? —rëb zho—. Telne guiaana yadoo, per rdzieelda, sac gon xchen tib miech bdzëew.

⁷ Dzigo bzodiidz zho dien zha gaca, nacne mazd pquuin zhow bzhii zho tib lë liu, zaatne rdieen yu ne ríaa grë ncuuan psin ne rquuin; parne lo liu co ygueets grë zha zit ne guet Jerusalén. ⁸ Nacne brieelë liu co “Liu ren”, ni sca runbey zhow len dze rii. ⁹⁻¹⁰ Ga briequia mine bzeet zha ne biadteed xtiidz Dios padzeela, zeene rëb zho: “Galptsii pes plat ne bzhii zha Israel men nziuu co, dimi co bzhii zho tib lë liu, zaatne rdieen yu ne ríaa grë ncuuan psin ne rquuin. Sca në Dios lo naa.”

Bnab zho guet Jesús

(Mr. 15:2-20; Lc. 23:3-5, 13-25; Jn. 18:33-19:16)

¹¹ Bdzinnie zho Jesús lo Pilat, ga bnabdiidz Pilat lo Jesús rëb Pilat:

—Bnë dien, ¿pe nli luu nac zhirey zha Israel?

Pquiab me rëb me:

—Nliw.

¹² Grë zha ne nac pxoz rnabey ga, ni grë zha ne nac zha non lo menguedz, rzadraa ncuuane rquiaqui zho me; per ni tib diidz rtsired me lo zho. ¹³ Dzigo rëbchaa Pilat lo me:

—¿Pe nacne rquiabd luu? ¿Pe ib rond luu grëta ncuuane rquiaqui zho luu i?

¹⁴ Bzee zdoo Pilat gon Pilat, ible rquiabd me.

¹⁵ Gzobse iz, zeene ral lni Pascw rnabey Pilat ríaa tib zha ne no ladzguiib, zha ne gnabtaa menguedz laa. ¹⁶ Len dze co no tib zha ntseeb ladzguiib lë Barrabás, zëeb xtiidz zho. ¹⁷ Nacne rëb Pilat lo grë zha ne ndxie ga:

—¿Cho racladz to csilaa naa? ¿Pe silaa naa Barrabás, te silaa naa Jesús ye, men ne nac diidz pxeel Dios lo to?

¹⁸ Sca rëb Pilat sac bien Pilat loxaque porne ndal miech nobig lo Jesús min co ne rlëenie zho me, bnabey zho bgaa me.

¹⁹ Laa Pilat zob lo xcan ne run me guielwxtis, zeene bdiin tib mandad rëb lo me:

—Znu në tsieel luu: bzhiguiel me peet gund luu men qui, rlu peet xtold me; sac nieewdze me nroob ptseb mcaal tsieel luu.

²⁰ Grë zha rnabey co, bio zho pquiil zho menguedz gnab zho csilaa Pilat Barrabás,

ni gnab zho guet Jesús. ²¹ Zeene wbiire Pilat bnabdiidz Pilat stib, dien chopaa racladz zho laa, grëse zho nguiedz pquiab be zho, rëb zho:

—¿Barrabás psilaa!

²² Dzigo rëbchaa Pilat:

—Men ne waa nac diidz pxeel Dios lo to nu, ¿zha gon naa me?

Pquiab zho rëb zho:

—¿Bnabey yquia me lo cruz!

²³ —¿Per pe nacne yquia men rii lo cruz? —rëb Pilat—. ¿Ni tib dol rapd me!

Biireque zho nguiedz roptsie zho rnab zho yquia me lo cruz. ²⁴ Gonse Pilat rquiaadiagd zho xtiidz me, lel mazdraa rac zho, dzigo bnab me nis, squi ndxie zho bdiib me me, rëb me lo zho:

—¿Nanle to nasca, led xtoldraa naa nu ne laa xchen men rii gzhiee, sac nanpaa naa peet falt rapd me!

²⁵ Pquiab be zho rëb zho:

—¿Peet nacd ga! ¿Zhits no grë xpëed no cuib dol co, na no guiotizha!

²⁶ Dzigo bnabey Pilat blaa Barrabás, laa Jesús racse me bnabey me zha ne bdiin Jesús, blozhse ga laa me psan Jesús ladznia menguiib ne tsiequiaa me lo cruz.

²⁷ Biire grë menguiib co bzëebnie zho me nëz len yulow, ga pcaalsa grëraa menguiib ne nacgrë zho, brin zho igose me. ²⁸ Blee zho xab me, bgacw zho me tib lar nizhnie nlaan, zig rna lar ne racw grë rey, ²⁹ bzieecw zho bla lë yag guiets, bzoob zhow guic me zig rzob coron guic zha ne nac rey, ni bloo zho tib lë goobgui nia me. Runguzee zho me, rquiitsgzhib zho lo me, rnee zho:

—¿Golwi ganle zha ractaa zhirey zha Israel!

³⁰ No zho rtsuc zho lo me, rgob zho goobgui ne no nia me ga, rdeed zhow guic me.

Güeyquiaa zho Jesús lo cruz

(Mr. 15:21-32; Lc. 23:26-43; Jn. 19:17-27)

³¹ Blozhse sca bdiitnie zho me, blee zho lar nizhnie co lad me, bgacw zho me xab me stib, dzigo laa zho brieenie me ga zienie zho me zaatne yquia me lo cruz. ³² Nëz zienie zho me bdiieel zho tib men Ciren lë Simón, bnabey zho men co bi me zhicruz me.

³³ Zeene bdziñ zho zaatne nac “Gui Beer-guic Ngutoo” (Gólgota), ³⁴ ga bdeed zho nziu lo me notsa tiblo guizh nlayag, per zeene pquiaaro mew bien me nziu cow, bnéd me nie mew.

³⁵⁻³⁶ Blozhse pquiaa zho me lo cruz, bzheñ zho tib xab me pchug zhow biaanñie zho tib lëgaw, laa stiba bio zho rif; dzigo laa zho bzob ga, bzobnap zho. ³⁷ Guic zhiczuz me, ga pquiaa zho bla lan diidz zaatne rnee: “LËË JESUS NU, MEN NE NAC ZHIREY ZHA ISRAEL.” Sca pquiaa zho, sac minco pquiaqui sca pquiaa zho me lo cruz. ³⁸ Ye chop ngbaan pquiaagza zho me lo cruz, tibga zhiczuz zho bzo tib nëz cho zhiczuz me. ³⁹ Grëse miech ne rdedtaa ran zho laa me quia ga, rzhidznie zho me, haxta rdzi zho guic zho ⁴⁰ rnee zho lo me:

—Led rëb luu lëe laa luu ntsil yadoo, ni tsonaque ngbidz nzaalo luu stiba, ¿pe nac dzigo rrieelod luu guieet luu i? Telne nli Xpëed Dios nac luu, biet lo qui.

⁴¹ Scaque grë pxoz rnabey, grë maistr ley, grë zha farisé ni grë zha ne nac zha non lo menquiedz, rzhidznie zho me, rnee zho:

⁴² —Stib miech scataa beenguaiac me, stib miech scataa bla me, ¿pe nac dzigo rrieelod me gla me me? ¿Goon me name nac zhirey ne, quiet me i sca zho; zeena dziuunbey ne men rnabey nac me! ⁴³ ¿Conque tant rnal me Dios, haxta rnee me Xpëed Dios nac me, guiaadsilaa Dios me i nazho!

⁴⁴ Ye ngbaan ne quiagza me lo cruz ga, mincoque rbidzgo zho lo me.

Gut Jesús

(Mr. 15:33-41; Lc. 23:44-49; Jn. 19:28-30)

⁴⁵ Zig groļ dzew, tibaque zeen goc tib ncow dipse lo guidzliu, haxta las tres biao biini stib. ⁴⁶ Horco nguiedz zëeb tsi Jesús, rnee me:

—Elí, Elí. ¿Lama sabactani?

Diidz co nac zig nac ne rnee ne: Luu nac xDios naa, luu nac xDios naa. ¿Pe nacne psaan luu naa?

⁴⁷ Zha ne ndxie ga, zeene bin zho sca rbedz me, no zho rëb Lí, men ne biadteed xtiidz Dios padzeela, men co rbedz me. ⁴⁸ Dzigo rias tib zho güeygadz tib lë zhiil lo nziu bla, bzoob zhow tib guic goobgui pquiaa zhow ro me. ⁴⁹ Laa zla zho rnee:

—Psaan, nu dzian ne dien pe ziaad Lí guiaadlit Lí me i.

⁵⁰ Tibaque zeene pquiaa me stib redz nroob, znuse blozh me.

⁵¹ Horne nolozh me ga, hor co briez nzoli lar nroob ne quia len yadoo, groļtaa goca; psilo bni tib zhodox, grë quie masaque wbiļa, ⁵² nzian ro baan grë zha ne bnalo Dios mazd padzeela bzhiäl. ⁵³ Zeen goļ dze ne brieaban me, ye zho laa zho brieaban, briea zho len baa, bzëeb zho lad guiedz; nzian miech ne gon zho.

⁵⁴ Grë menquib ne quianap me ga, ni zha ne rnabey lo zho, zeene gon zho bni zho co, ni gon zho grë ncuaane goc ga, per nli bdzieb zho.

—iNe nlipagaa —rnee zho—, Xpëed Dios nac men qui!

⁵⁵ Nzianlaa men wnaa, zit zo zho rwi zho. Lëe grë men wnaa co güeynal zhits Jesús, been zho xyudar me dipse len dze ne pseed me miech, desde dze ne psilo me nëz Galilé. ⁵⁶ Lad co no Marí Magdal, Marí tsieel Zebedé, ni Marí ne nac xniala Jacob grop José.

Bgueets Jesús

(Mr. 15:42-47; Lc. 23:50-56; Jn. 19:38-42)

⁵⁷⁻⁵⁸ Zhile sëeb ngbidza, zeene bdziñ tib mgui lë José lo Pilat, bnab me diidzbey tsielit me xcuerp Jesús lo cruz; tib zha ricwa, men guiedz Arimaté nac me, ye me zienal zhiwseed Jesús. Nacne pxeel Pilat diidz lo zha ne quianap Jesús ga, parne siguiel zho glit José me lo cruz.

⁵⁹ Dzigo güey José. Blozhse blit José me lo cruz, laa José neyle tib lë lar cub, pchel José me lar co, ⁶⁰ güeyxob José me tib len baa ne nacchen José ndieen tib cho quie gax ga; tib baa cuba. Blozhse bdzig José tib quie nroob bioog ro baa co, laa José zey. ⁶¹ Laa Marí Magdal bii biaan ga, grop me stib Marí ne nacgrop me ga; zobse zho gax ro baa co.

⁶² Biini liu co, pcaalsa grë pxoz rnabey, grë zho zha farisé, güey zho lo Pilat, ⁶³ rëb zho:

—Gun luu dispensar, laa no ziaadaque lo luu stib. Naraa rsoladz no, len dze ne bii mban men ntseeb ne sca biaadquidie miech ga, rëb me, zeene gac tson ngbidz

guet me laa me grieaban. ⁶⁴ Gane ziaad no lo luu, bzhiguiel pxeel zha ne yquiaanap ro baan me haxta gac tson ngbidz co; sac nend tsie zha ne nac xpëedscuel me tsiebee zho me, lozh ga guiab zho laa me brieaban. Nanle luu ganle, tel gac min co, cho gnë peraa gzhixcuaa zho.

⁶⁵ Dzigo rëbchaa Pilat lo zho:

—Telne sca racladz to, laa tib partid men GUIIB ndxie i. Goltsienie zho, golguiab lo zho yquiaanap zhow tel zha racladz to.

⁶⁶ Dzigo laa zho zie zienie zho grë men GUIIB co. Bdziñ zho bloo zho tib bey cho quie ne nioog ro baan Jesús ga, par glu tel cho zha ne tsiegaala, ni biaan grë men GUIIB co yquiaanapa.

28

BRIEBAN JESUS

(Mr. 16:1-8; Lc. 24:1-12; Jn. 20:1-10)

¹ Zna dze goc dze ne rdziiladz zho lo dziin ga, biini liu, dze ne rsilo zhmal, silgaw zie Marí Magdal grop me stib Marí co zieso zho ro baan Jesús.

² Lëëtaaque hor co bni tib zhodox, lo zho co biet tib xanj Dios gbaa bdoob me quie nroob ne nioog ro baa co, bdiix mew tib lad, bzobga me lada. ³ Msaque rlu me zigne rlu belye, xab mew, nquitsbie rnaw, zig rlu zaatne ndxie guieg. ⁴ Grë men GUIIB ne quianap ro baa ga, zeene gon zho anjl co, per nli bdzieb zho, rzhidz zho. Lo dzeb co, pcowgazh zho, grëse zho biab liu. ⁵ Zeene laa grop wnaa co bdziñ, rëbchaa anjl co lo zho:

—Gdziebde to. Nanle naa Jesús men ne pquiaa zho lo cruz ga, men co ziaadguib to. ⁶ Per guiendle me nu, jlaa me brieabanle zigne bneele me ga! Golwi ganle nu nac zaatne pxob zho me. ⁷ Niinagazh goltsie goltsienie diidz lo xpëedscuel me, golguiab lo zho laa me brieabanle. Galilé me cuëz me zho, ga gan zho me. Laa to nanlew nasca.

⁸ Lëëled brieegrop wnaa co ga, rias zho laa zho zienie diidz lo xpëedscuel me; lala rdzieb zho, ni lala rley zho. ⁹ Laa zho zie, tibaque zeene gon zho laa Jesús zole lo zho, ine pquiaabdiuzh me zho. Horco wbig zho pquitsgzhib zho lo me, bdeedz zho ni me.

¹⁰ Dzigo rëbchaa me lo zho:

—Gdziebde to. Goltsie goltsienie diidz lo grë zha bets naa, golguiab lo zho tsie zho Galilé, ga gan zho naa.

¹¹ Horcoraa laa bla zhaguiib ne pquianap ro baan Jesús ga bdziñ lad guiedz. Güey zho lo grë pxoz rnabey, bzodiidz zho zha gon zho bzhial ro baa co. ¹²⁻¹³ Dzigo pcaalsa grë pxoz co grë zho zha ne nac zha non lo men GUIIEDZ, dien zha gun zho. Nacne biaan zho diidz, mazd gdeed zho dimi lo grë men GUIIB co, parne gneelid zho, sinque guiab zho, segur xpëedscuelaque me güeybee me len baa, per biend zhow sac nixguies zho. Nroob dimi bdeed zho lo grë men GUIIB co, ¹⁴ rëb zho:

—Peet tsienied guic to, niicle telne gon gobernadora na no guionee lo me, zeena peet gund me to.

¹⁵ Dimi co pcaania zho, dzigo laa zho psilo pxoon diidz co zigne rëbse grë zha co lo zho. Grë zha Israel ne bina len dze co, masaque bliladz zho nli sca goca, jni haxta lo nadze sca zienie guic zho!

¹⁶ Zeene bdziñ dze ne gdieelo Jesús xpëedscuel me nëz Galilé, brieegza tsiptib zha ne bzo gaxpaa lo me ga, güey zho nëz co; bdziñ zho guic gui ne rëble me ga gdieelo me zho. ¹⁷ Zeene gon zho me pquitsgzhib zho liu.

Lo grë zha ne ndxie ga, no zho rienpaa lëe me ga, nogaa zha ne bii racchop guic. ¹⁸ Dzigo wbig me lo zho, rëb me:

—Laa to gonle nasca naa rnabey. Grëse ncuaane no gbaaw, nogaa guidzliuw, ladz-nia naa psan Pxoz naaw. ¹⁹ Niina nagon, laa naa rsan diidz lo to: goltsie dipse lo guidzliu, goltsieseed miech gac zho zha ne sëeb xnëz naa, golchoobnis zho, golguiab lo zho lëe min co rnabey Pxoz naa, rnabey naa ne nac Xpëed me, ni rnabeygaa Espíritu Sant. ²⁰ Golseed zho gban zho, grëse mine bnabey naa to gun to. Min co rsan naa diidz lo to gun to; ni gacnan to ganle, ib csaand naa to, gzataa dzew niicle haxta dze ne nitlo guidzliuw, naa gacnie to.

XTIIDZ NDZON DIOS MINE PQUIAA MARCW

¹ Nu ganle laa naa csilo gzodiidz naa, mine been Jesús, Men ne bneele Dios cxeel me lo guidzliu.

² Lo guits ne pquiaa Isá, tib men ne biadteed xtiidz Dios padzeela, lo co zhobnee ganle ible laa Dios no cxeel me. Rneew, glo cxeel me tib zha ne tedner, guiaadnie diidz. Znu zhobnee lo guits co: Sxel naa tib zha ne tedner lo luu, zeena zha co gzhixcuaa nēz ne ted luu.

³ Dan tso zho, zon miech zeene laa tsi zho zēeb gnee zho: “Golzhixcuaa nēz ne ted men ne rnabey, golsaan grē guiełntseeb ne ruł to.”

⁴ Ni nligaa scase goca, zeene laa Juan Bautist biaad, dan bio me rchoobnis me miech; rnee me lo zho csaan zho xquiełntseeb zho gbig zho lo Dios, ni chobnis zho, zeena csilaa Dios zho lo grētaa xtol zho. ⁵ Dzigo rrie miech grē guiedz ne ngab Judé, dib lad guiedz Jerusalén, riequiaadiag zho zhiwseed me; ni rxobdol zho grē xtol zho, dzigo rchoobnis me zho len guubee Jordán.

⁶ Guits lad camell niaa xab me, ncuanea rzhidoo len me guid niaaw ni niapse nguzhanch ni dzin dan row me. ⁷ Zeene rseed me grē miech co, rnee me lo zho:

—Iraa ziaad men ne mazdraa non lo naa. Tel naa peet nond naa, tib guiełnzaac nroob ga yгаа naa telne niaca mine grieelo maase lab me glit naa; per na ni mił co rdziłd naa. ⁸ Laa naa rchoobnis to niina con nis; sangue me con Espiritu Sant cchoobnis me to.

Brobnis Jesús

(Mt. 3:13-17; 4:1-17; Lc. 3:21-22; 4:1-15)

⁹ Len ngbidz coquew, laa Jesús brie guiedz Nazaret xtan zha Galilé, güey me pchoobnis Juan me len guubee Jordán.

¹⁰ Laa me norieedze lo nis, zeene gon me laa zhan gbaa bzhal, laa men ne nac Espiritu Sant biet gbaa zig tib palom laa me ziad-zēeb guic me. ¹¹ Ni lēetaque zēeb tib tsi men co gbaa, rnee me:

—Xin, rleynie naa luu gon, nziuu luu lo naa.

¹² Zeene blozh brobnis me, dzigo güeynie Espiritu Sant me tib dan ngan, zaatne no grē ma ntseeb; ¹³ bio me ga choo ngbidz. Ga no me güey Satanás (ma ne rnabey lo grēse mendox), gocladz ma niungüet ma me.

Bdedse ga, güey grē xanjł Dios güeygan zho me.

¹⁴ Len ngbidz co bnabey Herod bio Juan ladzguiib. Ladzguiible no Juan zeene brie Jesús güeyted me grē guiedz ne ngab Galilé güeyseed me miech Xtiidz Ndzon Dios, ¹⁵ rnee me lo zho:

—Laa dze ne gnabey Dios ziaadgaxle, laaw bdził dzele. ¡Golsaan grē xquiełntseeb to, golnab perdon lo Dios; dib zdoo to golliladz Xtiidz me!

Tap zha ne quia gooz mel

(Mt. 4:18-22; Lc. 5:1-11)

¹⁶ Tib dze zieded Jesús ro Nisdoo ne lē Galilé, gon me laa Simón grop Ndrés quia gooz mel lo nis co; sac ible dziin co nac xtsiil zho. Grop bets zho laa zho noron guieł ne rgaa mel lo nis. ¹⁷ Dzigo bredz me zho, rēb me lo zho:

—¡Golte, goltēnal zhits naa! ¡Laa naa cxel to tsie to stib gooz, tsietop to grē miech ne sēeb xnēz Dios!

¹⁸ Horcogazh psan zho guieł ne rnaaz zho mel ga, laa zho zienal zhits me.

¹⁹ Zhisaque bzē Jesús ro nis co, gon me laa Jacob ni Juan no tib len barcw no quiaabdie zho guieł ne rnaaz zho mel, lē grop xingan Zebedé ga; ²⁰ dzigo bredz me zho. Zigne bredz me zho, zoque Zebedé lo barcw ga grē xmoz Zebedé, laa zho zienal zhits me.

Tib mgui ne nosacsi mendox.

(Lc. 4:31-37)

²¹ Laa zho bdził guiedz ne lē Capernaum. Zeene gol dze ne rdziiladz zho lo dziin nēz Israel, güey Jesús yadoo win ne zoblad guiedz co güeyseed me miech. ²² Grē miech ne ndxie len yadoo ga, rzee zdoo zho ran zho zha rnee me, sac rlu men rnabey nac me; led yed me rseed zigne rseed grē zha ne nac maistr ley.

²³ Lad grë miech co no tib mgui ne nosacsi men_{dox}, tibaque zeene nguiedz pcooptsie ma mgui, ²⁴ rnee ma:

—¿Pe gun luu no Jesús Nazaren? ¿Ziaad luu lëe par gnitlo luu no? Runbey naa luu, tib men peet xtold nac luu ni Dios pxeel luu.

²⁵ Dzigo goctox Jesús lo ma, rëb me:

—¿Psoog ro luu! ¿Na zeena psaan men qui!

²⁶ Horco masaque beencxidz ma mgui co, ni rquiaadan ma redz laa ma psaan mgui.

²⁷ Grëse miech ne ndxie ga, bzee zdoo zho rnabdiidzlsa zho rnee zho:

—¿Bay cho nac men qui? ¿Wseed cub i gon ziaadnie me! ¿Rlu zha rnabey nac me, zha haxta men_{dox} rdzieb zeene ractox me lo ma!

²⁸ Znuse brieets bliaal diidz zha beenguiac Jesús mgui co; grëse guiedz ne ngab Galilé gocnan miecha.

Biac xniadzoop Simón Pedr

(Mt. 8:14-17; Lc. 4:38-41)

²⁹ Ga brieë Jesús güey me lidz Simón grop Ndrés gza me Jacob ni Juan. ³⁰ Bdziñ zho, lëetaque laa xniadzoop Simón nix rlan xlëe, nacte rëb zhow lo me. ³¹ Dzigo bded me zaatne nix zhuz co, bzhen me nia me, blische me me. Horcogazh laa zhixlëe me blëz, guche me ga psilo me beenlo ncuane dow zho.

³² Ziedzele dzew, laa ngbidz rzëëblew, zeene psilo grë miech co zo zo rdziñnie zho grë men rzacne, grë zha ne nosacsi men_{dox} ne; bioogse ro yu co ndxie miech. ³³ Zootle zig grëse miech ne no lad guiedz co pcaalsa ga.

³⁴ Ndal grë men rzacne co zhaase zhaase guielguidz ne rzac zho, per beenguiac Jesús zho; zha ne nosacsi men_{dox}, ben_{cxoon} me grë men_{dox} ne nosacsi zho. Goctox me lo ma, ib bdeete me diidz nee ma cho nac me, sac runbey ma me.

Pseed Jesús miech Galilé

(Lc. 4:42-44)

³⁵ Silgaw, scase bii ncow rnaw guche Jesús brieë me lad guiedz co, güey me zaatne guien_{draa} miech, güeyzodiidznie me Dios. ³⁶ Zeene rnit me choot guien_d; dzigo brieë Simón ni zla zha ne nacgza Simón güeyguib zho me. ³⁷ Zeene bdziel

me, rëbchaa zho lo me laa grë miech co quiaguible me.

³⁸ Dzigo pquiab me rëb me lo zho:

—¿Sca ye! Per ib laa ne none gon guio grëraa guiedz ne ndxie dib gax nu, zeena ye grë guiedz qui gnee naa Xtiidz Dios lo miech; sac ible min co pxeel me naa zial naa lo guidzliu.

³⁹ Dzigo güey zho grëse guiedz ne ngab Galilé. Zaatne rdziñtaa zho, rie me grëse yadoo win ne zob lad guiedz rseed me grë miech co Xtiidz Dios, ni run_{cxoon} me grë men_{dox} ne nosacsi miech.

Biac tib mgui ne rlan lepr

(Mt. 8:1-4; Lc. 5:12-16)

⁴⁰ Tib vuilt, wbig tib mgui ne rlan guiedzdox ne lë lepr lo Jesús (masaque ri-aal dipse guid lad mgui), pquiitsgzhib mgui lo me, rëb mgui:

—Tebaa siguieel luu gun_{guiaac} luu naa.

⁴¹ Pquia zdoo Jesús mgui, pxobnia me guic mgui rëb me:

—Zun_{guiaac} naa luu. ¿Niinagazh laa luu guiaan_{mbe}!

⁴² Zigne sca bnee me laa mgui co biac, mbese biaan_{xcuerp} mgui. ⁴³ Blozh ga bzonëz me mgui, ni pso me diidz lo mgui ⁴⁴ rëb me:

—Bina ganle, choot lo gzodiidz luu gon zha biac luu. Bzë, güey lo pxoz, güey_{san} gon ne rnabey xley Moisés gdeed luu; zeena gan zho ganle laa luu biacle.

⁴⁵ Ni zigne brieë mgui ga, psilo mgui grë lo miech bzodiidz mgui zha biac mgui. Grëse miech gocnaña, nacte brieelodraa nenlo ndziñ Jesús grë lad guiedz co. Mine been me, blëz me zaatne choot miech guien_d; per niicle scaw, miech guizhiu ne rrieë grë guiedz co rdziñ lo me.

2

Biac tib men ne gutoo

(Mt. 9:1-8; Lc. 5:17-26)

¹ Goc bla dzew, laa Jesús biire bdziñ lad guiedz Capernaum stib. Zeene bin zho laa me bdziñ ro yu, ² miech guizhiu ne pcaalsa zaatne no me ga, haxta ro yu ndxie grë miech co; dzigo psilo me noseed me zho Xtiidz Dios.

³ Laa grë miech co ndxie ga, zeene bdzin tap zha bgui ney zho stib men bgui, zhoobse me lo yag, ib gacd sè me sac dipse me gutoo. ⁴ Ni ne scataa miech guizhiu ne ndxie, gacd ted zho nêz ro yu gdzinnie zho me lo Jesús, nacne biepaque zho guic yu. Pخال zho ngali zaatne zob Jesús, dzigo ga pteed zho men co dib yag ne zhoob me ga. ⁵ Zeene gon Jesús ne nli dib zdo zho riladz zho me gunguac men rzacnè co, dzigo rëbchaa me lo men co:

—Xin, niinagazh laa naa gun perdon grëse xtol luu.

⁶ Blalaa zha ne nac maistr ley zob ga, zeene bin zho sca rëb me lo men rzacnè co, bzachaa zdo zho: ⁷ “iLëda i gon squi rnee men qui! Quiaguitnie me Dios i squi rzë xtiidz me. iTibaque men ne run perdon xtol miech, ni lëe men co nac Dios!”

⁸ Bienga Jesús sca rza zdo zho, dzigo rëbchaa me:

—iPe nacne rlëe to ron to mine rne naa? ⁹ Parga nli, cholze zha ne zac guiab: “Laa naa gun perdon grëse xtol luu.” ¹⁰ Per laa naa glu lo to ganle, naa ne nac naa Men ne pxeel Dios zial naa lo guidzliu, ible naa no gun miech perdon.

Dzigo bnee me lo men rzacnè co, rëb me:

¹¹ —iGuche i, bi yag ne bzhoob luu i, zeen bzë!

¹² Zigne sca bnee me laa mgui co bzoli, blis me yag co, grop lo grë miech co gon zho laa me brie ga, laa me zey. Grëse zho rzee zdo zho, rleynie zho Dios rnee zho:

—iNasi laa ne nodzian ncuaane gard dzian ne!

Bredz Jesús Leví

(Mt. 9:9-13; Lc. 5:27-32)

¹³ Blozh ga, laa Jesús brie ga laa me zie nêz ro nisdoo stib; nzian miech ne pcaalsa lo me ga, dzigo pseed me zho.

¹⁴ Ro nis co ziezë me gon me Leví, xingan Alfé, zob Leví zaatne rietizh zho contribucion, dzigo bredz me Leví tsienal Leví zhits me. Guso Leví ga, laa Leví zienal.

¹⁵ Bded ga, bredz Leví me güey me tib wagw lidz Leví. Grë zha ne nac recaudador, grë zha ne zëeb diidz nac zha yozh, tipse lo mezh bzobnie me zho grë xpëedscuel me; sac ndal grë zha co zienal zhits me.

¹⁶ Blalaa maistr ley ne nacgrë zha farisé, gon zho sca tipse noyownie Jesús grë zha co; bded ga, rëbchaa zho lo xpëedscuel me:

—iMod sca na rownie xmaistr to grë zha ngoopdol, grë zha beed ne nac recaudador!

¹⁷ Dzigo rëbchaa Jesús lo zho:

—Nanle to ganle, men ne run rmed, zaatne no zha ne rzacnè, ga rquiin zho, iniacxe squiin zho zaatne no zha ne ndip ndaan? Ni min co rac niina, tel naa zialguibd naa miech wen, sinque laa naa zialguib miech ngoopdol.

iPe nacne rcuand xpëedscuel Jesús?

(Mt. 9:14-17; Lc. 5:33-39)

¹⁸ Lëetaaque dze co nocuan xpëedscuel Juan Bautist, grë zho zha farisé. Dzigo bdzin bla zha ne bnabdiidz lo Jesús, rëb zho:

—iPe nac waa ib rcuand xpëedscuel luu? Zha grë xpëedscuel Juan Bautist ni grë zha farisé, rcuan zho.

¹⁹ Pquiab Jesús, rëb me:

—Zaatne nadien noyac tib guieltsieel, ipe niacxe lega csilo grë zha ne ndxie lo lni tso zho guielnè, ycuan zho ni ran zho laa mgui ne notsieelnia mban? ²⁰ Per dzin dze zeene laa mgui co gbiche; ni zeene laa dze co gdzin, dzigosi nagon riegual tso zho guielnè, riegual ycuan zho.

²¹ Ranle to ganle, zha ne rquiaabdie tib lë lar, rquiaad zho lar cub lad lar gox, sac zha ne sca gun paat yquiind wquiaabdie co. Zeene laa lar cub gbe, lëeque lëew gunnat zaatne nriez lar gox. ²² Scaque tsod zha ne cotsow vin cub tib len guid ne padzeelale noquiin, sac stiez vin cuba; dzigo niicle guid cow, niicle vingaaw laaw nitlo ga. Gacxe, tel vin cuba none len guid cubaque tsotsowa.

Ptop xpëedscuel Jesús mzion zhobxtil

(Mt. 12:1-8; Lc. 6:1-5)

²³ Tib dze ne rdziiladz zho lo dziin nêz Israel, bdednie Jesús xpëedscuel me zaatne zëeb zhobxtil, dzigo zigse zieded zho pchoo zho palal mzion zhobxtil co. ²⁴ Gon zha farisew, dzigo rëbchaa zho:

—iLëda i gon noyun to! iGolguien ganle dze nda nac dze rii!

²⁵ Dzigo pquiab Jesús, rëb me:

—¿Pe gard glab to zaadne ziaad ganle zha been rey David tib dze zeene pcaabedz me grë me zha ne ziegza me, ni zienied zho pe gow zho? ²⁶ Rneew, bzëeb me len yadoo güeynab me guietxtil ne nac gon, downie me grë zha ne ziegza me ga, ni loxaque zha ne nacse pxoz row guietxtil co. Len iz co nac men ne lë Abiatar pxoz nroob. ²⁷ Golgacnan sca ganle, biaand dze rii par csacsi miech xcuerp zho, sinque ne rleynie Dios miech gane psan mew. ²⁸ Naa ne nac naa Men ne pxeel Dios zial naa lo guidzliu, naa rnabey dze rii, nanpaa naa pe nac mine nonguiel gac.

3

Biac tib mgui ne mband tib nia
(Mt. 12:9-14; Lc. 6:6-11)

¹ Gol stib dze ne rdziiladz zho lo dziin, güey Jesús len yadoo win ne zob lad guiedz co. Lad grë miech ne no len yadoo co, no tib mgui ne mband tib nia. ² Nzian zha ne ndxie ga, quialeets zho Jesús dien pe zunguiac me nia mgui co dze ne rdziiladz zho lo dziin. Quiambëz zho dien pe gun me, par gdziel pe yquiaaqui zho me. ³ Dzigo bredz me mgui co, bnabey me bzo mgui groltaa lo grë zha ne ndxie ga; ⁴ blozh ga rëbchaa me lo zho:

—¿Pe nadien rzac to nonguiel gun ne dze rii? ¿Pe nonguiela gun ne ncuane yquiin, te nonguiela gun ne guientseeb ye? Zig nac samiech ne zha ne noxtseeb xquielmban, ¿pe maase csaan ne guet zho?

Ni tib zho pquiabd. ⁵ Dze bui me lo zho grëse zho, wbinladz guic me, ni mban goc zdoo me gon me scataa ntseeb zdoo zho; dzigo rëb me lo mgui co:

—Bzigaa nia luu.

Zigne bzigaa mgui nia mgui, laaw biac.

⁶ Grë zha farisé, ni grë zha ne nacie rey Herod, zigne brie zho ga laa zho psilo bnediudz dien zha gdeeda diudz gut zho Jesús.

⁷ Len dze co, tib vueltd bdzin Jesús ro nisdoo grë xpëedscuel me. Miech guizhiu ne nal zhits zho, ga zie grë zha ne ziaad nëz Galilé, grë zha ne ziaad nëz Judé, ⁸ grë zha Jerusalén, grë zha ne ziaad nëz Idumé, grë zha no dib nëz dan ro guiubee Jordán,

grë zha ne no dib gax guiedz Tiro ni guiedz Sidón. Miech guizhiuw, sac ron zho grëtaa milagr ne run me.

⁹ Dzigo bnabey Jesús xpëedscuel me, yguib zho tib len barcw zaadne gac so me zeena ctaagwd grë miech co me. ¹⁰ Zëëble diudz ndal miech ziyunguiac me, dzigo grëse zha ne rlan pe guielguidz, rbigbe zho dien zha grieelo maase lad xab me xen zho.

¹¹ Grë mendox ne noguitnie miech, zeene ran ma me, runquiitsgzhil ma zha ne noguitnie ma lo me ni rquiaadan ma redz rnee ma:

—¿Xpëed Dios nac luu!

¹² Per ractox me lo ma, rsaand me gnee ma parne xoobneud cho nac me.

Ble Jesús gza tsiipchop xpëedscuel me
(Mt. 10:1-4; Lc. 6:12-16)

¹³ Blozh ga biepe me tib guic gui win zob ga, ga bredz me zha ne gocladzse me. Zeene pcaalsa zho grë zho, ¹⁴ dzigo lad co ble me tsiipchop zha ne sënie me, zha ne cxeel me tsieseed miech Xtiudz Dios. Lë zha co bleelë me poxtl, ¹⁵ ni bdeed me poder lo zho guncxoon zho mendox.

¹⁶⁻¹⁹ Znu lë gza tsiipchop zha ne ble me ga:

Simón (lë Simón co bleelë me Pedr),
Jacob ni Juan (xingan Zebedé, zha ne bleelë me “Zhin Nguzi” “Boanerj”).

Ndrés,
Lip,
Bartol,
Matew,
Mazh,

Jacob (xingan Alfé),

Tadé,

Simón (zha ne nacgrë zha ne racladz cuee zha Roma xtan zho)

ni Judas Iscariot (zha ne güeyto me).

Rëb zho mendox nacie Jesús
(Mt. 12:22-32, 46-50; Lc. 8:19-21;
11:14-23; 12:10)

²⁰ Wbire Jesús ga, laa me bdzin ro yu grë me zho. Scasaque ndal miech ne pcaalsa ga stib, ni rdeetew diudz gownie me zho.

²¹ Zeene bin menlidz mew, dzigo brie zho ziexi zho me, sac rëb zho bod rzhinle guic me.

²² Haxta grë maistr ley, zha ne brie nëz Jerusalén bdzin ga, rnee zho:

—Beelzebú, ma ne rnabey lo mendox, ma co nacie me gane rrielo runcxoon me mendox.

²³ Dzigo bredz me zho bzodiidz me tib cuent lo zho, rëb me:

—¿Pa nan to na grieelo lëëque mendox guncxoon samendox ma? ²⁴ Tel tib guiedz nadien gac miech chop dii, csilo zho tillsa zho, ¿niacxe nitlod guiedz co? ²⁵ Tib diigaa miecha, tel csilo zho lëëque zha tilnie menlidz zho, ¿niacxe nitlod zho? ²⁶ Scaquegaa mendox nagon, telne lëëque lëë ma tilnie samendox ma, ¿pe nale na bnitlo ma! ²⁷ Masaque nac mendox zig tib zha ne no xfuers, zha ne gacladz cuee grë ncuane no lidz zha co, none cxidoogazh zho zho.

²⁸ Gneli naa lo to ganle, grëse dol ne run miech, grë tel zha rguie zho, rdzibdee zho, bii zun Dios zho perdon min co; ²⁹ sangue zha ne gneenë Espíritu Sant, dol nroob ga run zho, gdziñd dze ne gun Dios zho perdon.

³⁰ Sca rëb me lo zho, sac sca quianee zho rëb zho mendox nacie me.

³¹ Horco laa xniaa me ni zha bets me bdziñ, per leyse blëz zho; dzigo pxeel zho zha ne zietsedz me. ³² Blalaa zha ne zob gaxpaa lo me, zha co been vis rëb zho:

—Laa xniaa luu gon, ni zha bets luu zi-aadguib luu.

³³ Pquiab me rëb me:

—¿Xnia naa ye, bets naa ye?

³⁴ Dze bui me lo grë zha ne ndxie ga, dzigo rëbchaa me:

—To gon nac xnia naa, to nac bets naa.

³⁵ Sac grëse zha ne run mine racladz Dios, lëë bets naa ga, lëë bzian naa ga, lëë xnia naa ga.

4

Xcuent zha ne güey gon (Mt. 13:1-23; Lc. 8:4-15)

¹ Dze coquew, laa Jesús psilo quiaseed miech zaatne nac ro Nisdoo Galilé ga. Miech guizhiu ne pcaalsa lo me, nacie güeytsep me tib len barcw ne zo ro nis co, ga bzob me laa grë miech co bre tib ro nis. ² Ndal grë ncuane pseed me zho, per niapse con cuent rnee mew lo zho. Lëë tib cuent ne bzodiidz me ga nu, rëb me:

³ —¿Golquiaadiaga ganle! Tib mgui name, brie me güey me gon zhobxtil. ⁴ Zeene laa me quialaal zhob co, mine bliaal gax ro nëz; znuse güey grë mguin güeytow maw.

⁵ Laa mine bliaal zaatne nac lo quie, znuse znuse blana; ⁶ per zeene laa lo ngbidz brie, znusaque bgoola blozh ga bidzgaw; sac guiend nroob low. ⁷ Laa mine bliaal zaatne nac len yag guiets, zeene laa grë yag guiets co broob znuse bnitlo yag guietsa, pasëw niac. ⁸ Sangue grë mine bliaal zaatne nac lo liu naal, blana, brooba ni goca; lo tib tib zhob co no mzion co brie galptsii zhob, now brie tsongala, nogaaw brie haxta tib gayoow.

⁹ Blozh ga, rëbchaa me lo zho:

—Zha ne racladz guien mine rne naa, yquiaadiag zhow.

¹⁰ Zeene laa grë miech co zey, laa gza tsipchop xpëedscuel me, ni zla zha ne rzënie me, laa zho bnabdiidz lo me dien zha nac cuent co. ¹¹ Dzigo rëbchaa me lo zho:

—Tel to, Dioszhal rlu lo to zha rnabey me, niicle ncuane mazdraa ngueetsa; laa lo grëraa miech ne gard gbig lo me niapse con cuent rzodiidz naaw lo zho parne guien zhow. ¹² Per niicle scaw, nzhal diag zho ron zho, per peet riend zho; nzhal lo zho rwi zho, per peet rand zho; ib nëd zho gbig zho lo Dios, gnab zho gun me zho perdon.

¹³ Nana to, telne biende to zha nac cuent co, ¿zha guien to grëraa mine gne naa dzigo? Golquiaadiaga ganle, znu gon naca: ¹⁴ Mgui ne güeylaal zhob ga, rrieequia lëë zha ne rienee Xtiidz Dios lo miech ga, laa zhobxtil co nac Xtiidz Dios. ¹⁵ No miech nac zig nac ro nëz ne bliaal palal zhob co: rquiaadiag zho Xtiidz Dios, rlozh ga lëëled rdziñ mendox rquiil ma zho, rsaanga zhow.

¹⁶ Nogaa zho nac zigne nac lo quie co: zeene rquiaadiag zho Xtiidz Dios, ine rley zho rcaania zhow, ¹⁷ per led dib zdood zho rcaania zhow; gane zeene laa miech rsilo rlëë lo zho, laa miech rtsidil zho porne rliladz zhow, rsaanga zhow. ¹⁸ Zzhisgaa zho nac zigne nac len yag guiets co: nli rquiaadiag zho Xtiidz Dios, ¹⁹ per rsilo zho lel grë ncuane no lo guidzliu rii mazdraa rionie guic zho, rquidie grë dimi zho, rzoobladz zho yquianie zho grëse ncuane

racladz zho. Grë ncuuan co rioxcoraa zho, laa ne tsonie Xtiidz Dios guic zho, miñ co rquiaqui ib rund zho miñe rnabey me. ²⁰ Laa nogaa zho nac zigne nac liu naal co: rquiaadiag zho Xtiidz Dios, dib zdo zho rililadz zhow, ni rban zhow zigne naca. Grë zha co, no zho nac zig mzion ne brieegalptsii zhob ga, no zho nac zig miñe brieetsongala, nogaa zho nac zig miñe brieetib gayoow ga.

Xcuent biini ni midz moxtaz
(Mt. 13:31-32, 34-35; Lc. 8:16-18; 13:18-19)

²¹ Blozh ga, biire pcaalsa miech lo me, dzigo rëb me lo zho:

—¿Pa dien rquiin biini? ¿Pe rquiaguiw par tsolana tib len guin o soogaaw tib zhan lon? Led zeene rquiaguiw lëë, zaatne grieelo gziiniw ga rzoob zhow. ²² Scaque nagon grëse ncuane rac ngueetsa, grëse ncuane rnee miech zhliana, ib none xoobneña.

²³ Telne racladz to guien to miñe rne naa, golquiaadiaga; ²⁴ ni zigne ron tow scagaa goltsoxco golguña. Telne tsoxco to gun tow, scagaa zioguicraa tow. ²⁵ Sac zha ne tsoxcow, zdeddraa Dios guielbiini lo zho; sangue zha ne tsoxcoda, haxta tel palalse guielbiini ne bdeed me lo zho stiche mew.

²⁶ Ni rëb me lo zho:

—Znu gon nac zha ne ngab lo Dios; nac zho zig bni ne ran miech. ²⁷ Zha ne rielaal bni co, liu rcow, liu riini, laa zho raaguiw, laa zho rieche. Sca sca laa dze zie, laa bni co ratslo, laaw rlan, laaw rroob, per riend zho zha nacne laaw rroob.

²⁸ Zhal guidzliu rdeeda guielnzaac co, guizh nac zhob co zeene rlana, rac palal dzew laaw rlan mzion. ²⁹ Laa zeene laaw ral, dzigo laa zho rietiitsa, sac laa dze bdzinle ne laaw tsas.

³⁰ ¿Zha ganle gni naa lo to zeena guien to zha nac xquielrnabey Dios? —rëb Jesús—. ¿Pa tib cuent ganle gzodiidz naa lo to zeena guien to zha naca? ³¹ Naca gon zigne nac tib midz moxtaz ne ran miech dan rij. Midz moxtaz nac midz ne mazdraa win, ³² ni tel gacbniw, rrooba, ni lëew rroobraa lo grë guizh ne ran zho ro yu, haxta grë mguin riezaa zhiptsieez ma low sacne ncala.

³³ Nzian grë cuent rii pquiin me par cseed me grë miech co, ni laa me bnee

miñe rgobey me guien zho. ³⁴ Niapse sca rseed me zho, laa zha ne nac xpëedscuel me, zeene zhasew rnee mew lo zho zigne naca.

Pcuëez Jesús tib medox
(Mt. 8:23-27; Lc. 8:22-25)

³⁵ Zeene bdze dze co, rguetsle liuw rëbchaa me lo xpëedscuel me:

—Golgotsaa dieedquia ne stib nëz lo nis rii.

³⁶ Blozhse bnee me lo grë miech co, laa zho biep len barcw ne zob me ga grë me zho, laa zho zie. Ye blalaa barcw ne zob lo nis co zienal.

³⁷ Laa zho zie, tibaque zeene laa tib medox psilo brieeg, masaque rlis me lo nis co; zeene riasoli low riechoona len barcw, laa barcw psilo noyodzële nis. ³⁸ Dzigo güey zho güeycuuan zho Jesús, sac lëëtaque laa me nixguiw nëz zhan barcw ncoogse me tib lmad.

—¡Maestro! —rëb zho—. Bui ganle, ¿pe znuse csaan luu nitlo ne nu?

³⁹ Dzigo guche Jesús, bnee me lo me co, bnee me lo nis co, rëb me:

—¡Lëew ga na! ¡Golcuedze!

Zigne sca bnee me, laa me co blëz, niice nis cow laaw bredze. ⁴⁰ Dzigo rëbchaa me lo zho:

—¿Pe nacne squitaa rdzieb to? ¡Gardaque dzigo lëë gliladz to cho nac naa!

⁴¹ Riendraa zho zha gun zho lo dzeb co, ni rnabdiidzlsa zho rnee zho:

—¿Bay cho nac me, zha nacne haxta me, haxta nisdoo ron xtiidz me?

5

Men Gadar ne nosacsi mendox
(Mt. 8:28-34; Lc. 8:26-39)

¹ Bdzin Jesús nëz dan ro nisdoo co gza xpëedscuel me, ga nac xtan zha Gadar. ² Laa me bietdze len barcw, zeene laa tib mgui ne nosacsi mendox bdzin lo me. Len baa brieeg mgui co bdzin me ga, ³⁻⁴ sac len baa nac zaatne rbëz me. Miech ne lëbd zho low, nzian vuelt ziezoob zho caden nia me, ni me ne, per znuse rchug mew, rzhooḡga me. ¡Choot rlëbd lo me! ⁵ Dze, guieel quianzë me grë dan co, rietso me grë len baa. Ropt-siedan me, ni lëëque me rzhen quie rchug me guidlad me. ⁶ Laa dze co, zittraa gon me Jesús, rias me bdzin me pquiitgzhib me lo

Jesús. ⁷⁻⁸ Dzigo goctox Jesús lo mendox ne noguitnie me, rëb Jesús:

—¡Mendox, psaan men qui!

Horco pcooptsiedan mendox co mgui co, ni rnee ma lo Jesús:

—¿Pe gun luu naa Jesús? Runbey naa luu, Xpëed Dios ne no gbaa nac luu. ¡Ne nlipagaa been guielnzaac csacsid luu naa!

⁹ Dzigo bnaabdiidz Jesús lo ma dien cho lë ma. Pquiab ma rëb ma:

—Legion lë no, sac nzian nac no.

¹⁰ Rnab grë mendox co lo Jesús, gzonëdz me ma zit. ¹¹ Gaxaque zhan gui co ndxie tib dzoön nguts noyow, ¹² dzigo bnaab ma lo Jesús, rëb ma:

—Bzhiguiel lose grë nguts qui bzonëz no.

¹³ Bdeed Jesús diidz. Dzigo laa grë mendox co psaan mgui co, laa ma zie bzëëb ma zdoo grë nguts ne ndxie ga; psilo grë nguts co rquiaa ma corr güeypix ma glaa tib ro yee ne quia ro nisdoo co, bliaal ma haxta lo nis. Ga biep ma nis, grëse ma gut. Rгаа ma zig chop mil.

¹⁴ Zha ne quianap grë nguts co, gzase zho bzhoön güeyzodiidz zhow lad guiedz, ni grëraa yu ne zob gax ga. Brieë grë miech co, zieso zho. ¹⁵ Zeene bdziñ zho, per nli bdzieb zho, sac gon zho laa mgui ne sca bdziitnie mendox ga zobse lo Jesús, laa mgui nacwxable, rlu ndzinlile nac guic mgui. ¹⁶ Psilo grë zha ne gon zha biac mgui co, ni zha goc grë nguts co, psilo zho rzodiidz zhow lo grë zha ne bdziñ ga. ¹⁷ Miñ co bin grë zha co, mazd bnaab zho lo Jesús siguiel me gbi me xtan zho.

¹⁸ Zeene laa Jesús zie sëëb me len barcw, dzigo laa mgui co wbigaque lo me, nan mgui nziguiel me nienal mgui zhits me.

¹⁹ Per bdeete me diidz, rëb me:

—Wbire, güey güeyzodiidz lo grë menlidz luu ganle pa lotaa pquia zdoo Dios luu, zha nactaa milagr nroob ne been me beenguiac me luu.

²⁰ Dzigo wbire mgui. Güey mgui dib xtan zha Decápolis, güeyzodiidz mgui lo grë miech co zha beenguiac Jesús mgui. Grëse zha ne rona, rzee zdoo zho.

*Brieëban xpëdwanaa tib men lë Jair
(Mt. 9:18-26; Lc. 8:40-56)*

²¹ Zeene laa Jesús biire brieëquia stib nëz ro nisdoo co, miech guizhiu ne pcaalsa lo me ga. ²² Ga zo me zeene laa tib men ne nacgrë zha ne rnabey yadoo lë Jair bdziñ. Zigne bdziñ me lo Jesús pquiitsgzhib me, ²³ rëb me:

—Been tib guielnzaac gotsaa guio ne gunguiac luu xpëed naa. Laa win rlozhle; nanpaa naa telne cxobnia luu guic win, ziac win.

²⁴ Dzigo laa Jesús zie nëz lidz men co. Ndal miech ne zienal zhits me, haxta rtaagw zho me. ²⁵ Lad grë miech co zienal tib wnaa, gocle tsiipchop iz rlan me tib guielguidz, rzac me zigne rzac men wnaa gzob mëë, tibaque rlan mew ib rbëzda. ²⁶ Nzianle lo men ne run rmed ziye me, grëse ncuane rap me bloozh me lo rmed; per laa ne cuëz guielguidz co, lel znu rzhizhooraaw. ²⁷⁻²⁸ Ziyonle me grë milagr ne run Jesús. Bza zdoo me rëb me: “Totsaque ygaa maase lad lar ne mbix me xeen naa, ziacle naa.” Dzigo bded me lad grë miech co, wbig gax me nëz zhits Jesús, bzhen me lad lar ne mbix Jesús. ²⁹ Nligaa hor cogazh laa guielguidz co blëz, bien me laa me biac.

³⁰ Zeene bien Jesús ne laa me beenguiac wnaa co, dzigo ptsire lo me rwi me lo grë miech co, rëb me lo zho:

—¿Cho ga bzhen lad xab naa?

³¹ Rëbchaa xpëedscuel me:

—¿Zha nan luu glu dien cho bzhen lad xab luu, ni squitaa ndaagw ziaad luu lad grë miech qui?

³² Per laa me rwi lo grë miech co dien chow. ³³ Nanpaa wnaa co ne me ga, rdzieb me, rzhidz me laa me wbig pquiitsgzhib me lo Jesús bneeli me zha nacne sca been me. ³⁴ Dzigo rëbchaa Jesús lo me:

—Xin, laa luu biac sacne biladz luu naa. Bzë na, peet tsieniedraa guic luu, laa guielguidz co bichele.

³⁵ Laa Jesús bii quianeeque, zeene laa bla zha ne ziaad nëz lidz Jair bdziñ, rëb zho lo Jair:

—Csodziindraa luu lo men qui, laa xpëed luu gutle.

³⁶ Zeene gon Jesús sca rëb zha co, dzigo bnee me lo Jair rëb me:

—Peet tsienied guic luu. Dib zdoo luu bliladz naa.

³⁷ Psaandraa me cho grë miech co nienal zhits me, loxaque Pedr, Jacob ni Juan bets Jacob; zha cose zienie me.

³⁸ Zeene bdziñ zho lidz men co, tib ruid ne rac, nguiedz zëeb tsi zho roon zho no zho xquielnë mëed co. ³⁹ Dzigo bzëeb Jesús len yu, rëb me lo zho:

—¿Pe nacne squitaa roon to? Goonde to, gon led gute ndzooop win rii, nixguies ndzooop.

⁴⁰ Leñ rzhidznie grë miech co me, bin zho sca rëb me. Dzigo bnabey me brie zho ley grëse zho, loxaque pxoz mëed co, xniaa win ni gza tson xpëedscuel me zha ne nal zhits me ga bzëebnie me len yu ne nix win.

⁴¹ Wbig me bzhen me nia win, rëb me lo win:

—¿Guche i na, ndzooop yeen! (Talita, cumi.)

⁴² Zigne sca bnee me laa mëed co guche, laa win bzë. Tib mëed tsiipchop iza. Grëse miech co per nli rzee zdoo zho. ⁴³ Dzigo pso me diidz lo zho choot lo gneed zhow; blozh ga bnabey me bdeed zho ncuaane dow mëed co.

6

Güey Jesús ladz me

(Mt. 13:53-58; Lc. 4:16-30)

¹ Ga brie Jesús grë xpëedscuel me, laa me bdziñ Nazaret zaatne nac ladz me.

² Laa zeene gol dze ne rdziiladz zho lo dziin, laa me bdziñ len yadoo, psilo me pseed me grë miech co. Per nli rzee zdoo zho ron zho grë mine rnee me, rnabdiidzlsa zho rnee zho:

—¿Pazhe waa squitaa pseed men qui? ¿Zha nac guielbiini ne squitaa rap me i, ne rnee miech ndal grë milagr ne run me?

³ Tib ngurëyagse name nac me. Led lëe xingan Marí i, bets me name nac Jacob, nac José, nac Judas ni Simón, grë bzian mew, nu no zho grë zho.

Ib beencasd zho me. ⁴ Zeene gon me sca rac zho, dzigo rëb me lo zho:

—Zha ne rteed xtiidz Dios, mazd wen rnee miech lo zho stib dan, stib guiedz, lëdle ladz zho, ni menlidz zho ni menladz zho nëd gunbey zho.

⁵ Brieelod niun me nzian milagr ga, blase zha rzacnë pxobnia me guic, beenguiac me. ⁶ Bzee zdoo me gon me scataa ndip zdoo zho, ib bliladz zho cho nac me.

Blozh ga mazd güey me grë guiedz ne ndxie gax ga, güeyseed me miech.

Pxeel Jesús xpëedscuel me tsieseed zho miech

(Mt. 10:5-15; Lc. 9:1-6)

⁷ Tib dze, bredz me gza tsiipchop xpëedscuel me, bnabey me zho tsieseed zho miech. Pxeel me zho chopga chopga zho, ni bdeed me poder lo zho par guncxoon zho mendox. ⁸ Pso me diidz lo zho güeyd zho pe yquiin zho nëz, lëe gdib tib lë yag ne gzoxca zho güey zho. Zig nac ncuaane gow zho, zig nac dimi, pe tib bziudgaa, güeyd zhow. ⁹ Lab zho, mine quiase ni zho; xab zho, mine nacwse zho mincose tsienie zho.

¹⁰ Ni rëb me lo zho:

—Guiedz ne gdziñ to, zha ne gneedz zaatne cuëz to, lidz zha co golcuëz haxta gdziñ dze ne gbi to guiedz co. ¹¹ Laa zaatne ne ib gneedzd zho pa cuëz to, niicle nëdgaa zho yquiaadiag zho mine gnee to, dzigo gollit grë yudie co ni to, golrieegazh ga, zeena guien zho ganle lëda ga been zho.

¹² Dzigo laa zho brie, laa zho zie. Güey zho, güeynee zho lo grë miech csaan zho xquielntseeb zho, gbig zho lo Dios. ¹³ Nzian zha ne nosacsi mendox, bencxoon zho mendox co; grë zha ne rzacnë, bdëeb zho nceit guic zho, beenguiac zho zho.

Gut Juan Bautist

(Mt. 14:1-12; Lc. 9:7-9)

¹⁴ Bin rey Herod rzeet zho Jesús, sac tel pa lotaaw zëeb diidz grëta milagr ne run me. Grë miech co, no zho rzac brieaban Juan Bautist lëe me ga nac Jesús, gane run me grëta milagr co; ¹⁵ nogaa zho rnee Líw, men ne biaad pteed Xtiidz Dios padzeela; zzhisgaa zho rnee, no cho stib men ne ziaad noteed Xtiidz Diosa, zig biaad grë zha ne biaad padzeela.

¹⁶ Zeene ron Herod sca rnee miech, dzigo rnee me:

—Nligaa Juan ga. Naa bnabey pchug zho yan me, per lëe me ga brieaban.

¹⁷⁻¹⁸ Sca rnee Herod sac rsoladz me zha been me Juan. Me bnabey bgaa Juan bio Juan ladzguiib, loxaque ne rnee Juan lo me

nonguelda ga lëëque Herodí ptsieelna me; sac tsieelpaa bets me Lip nac Herodí.

¹⁹ Blëënie wnaa ne nac Herodí ga Juan, rzac me tebaa zha gut me Juan; per rdeetew diidz, ²⁰ sac rdzieb Herod lega pe guñ me Juan, rien me tib zha ne zienal mine nac diidzli, tib zha ne peet xtold nac Juan; dzigo ib rdeete me diidz pe guñ wnaa co Juan. Niicle ne cadque zeene rnee Juan lo me, rio me zhgab rien d me dien zha guñ me, per rdziladz me rquiaadiag me grë mine rnee Juan.

²¹ Laa tibtaa dze laa mine no guic Herodí ga goc. Dze ne bloozh Herod stib iz, bnabey Herod goc tib lni nroob, bredz me grë zha ne nacie me dziin, grë zha ne zo lo menguiib, ni grë zha non lo zha Galilé. ²²⁻²³ Laa zho no mezh noyow zho, zeene bzëëb xindzooop Herodí psilo ndzooop biee ndzooop. Bdziladz Herod gon me zha biee ndzooop, grë zha ne zob lo mezh ga ne. Dzigo rëb Herod lo ndzooop, tel petaa gnab ndzooop zdeed mew; haxta brieer ro me rëb me:

—Ncuaane gacladztaa luu gnab luu, niicle zig groļ grë ncuaane rap naaw, znedz naaw.

²⁴ Rias ndzooop güey nabdiidz ndzooop lo xniaa ndzooop. Dzigo rëbchaa me lo ndzooop:

—Bnab lo me gnabey me tsiechug zho guic Juan gneedz zhow lo luu.

²⁵ Bdzin ndzooop lo Herod rëb ndzooop:

—Racladz naa xoob guic Juan Bautist tib len plat, gneedz luuw lo naa niinagazh.

²⁶ Zeene bin Herod sca rëb ndzooop, mbanse rac me; per rdeetraaw diidz niab me grieeloda, sac grëse zha ne zobnie me ga, bin zho rëb me zdeed me ncuaane gnabtaa ndzooop. ²⁷ Dzigo race me pxeel me tib menguiib ne tsiechug guic Juan.

²⁸ Güey menguiib co len ladzguiib pchug zho guic Juan. Bdzin zho, zhoobsew tib len plat bdeed zhow lo ndzooop, dzigo güey ndzooop güeydeed ndzooopa lo xniaa ndzooop.

²⁹ Zeene bin xpëëdscuel Juana, dzigo güey zho güeylis zho me ga güeyqueets zho me.

Bguiaan Jesús gaay mil miech

(Mt. 14:13-21; Lc. 9:10-17; Jn. 6:1-14)

³⁰ Zeene laa gza xpëëdscuel Jesús bdzin lo me stib, psilo zho bzodiidz zho lo me grëse

tel zha güey zho, grëse tel zha güeyseed zho miech. Per miech guizhiu ne ndxie lo me, zha ne rbi, zha ne rdzin; haxta ni riobd gow me grë xpëëdscuel me. Dzigo rëb me lo zho:

³¹ —Mazd golgotsaa guio ne tib zaatne zitlaa lo grë miech rii, zeena grielo gdziiladz to niip.

³² Dzigo bzëëb me tib len barcw grë me zho, laa zho zie. ³³ Nzian zha ne gon zie me, beenbey zho ne mew. Dzigo ndal miech ne no grë guiedz gax co brieer, rias zho zie zho glole zho bdzin zaatne no gdzin me. ³⁴ Zeene biet me len barcw, gon me laa grë miech guizhiu co ndxiele ga. Pquia zdoo me zho gon me scataa ndxie zho zootle grë mëcwxiiil yeen ne guiend xbaxtor, dzigo psilo me nzian grë ncuaane pseed me zho.

³⁵⁻³⁶ Gol bdze dze co, wbig xpëëdscuel me lo me rëb zho:

—Mazd gudz lo grë miech qui guey zho na, zeena guiob tsie zho grë guiedz ne ndxie dib gax i, tsiesi zho ncuaane gow zho; sac gon laa dze bdzele, ni choot miech guiend nu.

³⁷ Pquiab me rëb me lo zho:

—To goldeed ncuaane gow zho.

Rëbchaa zho lo me:

—¿Pe zhizhe dimi ne yquiin gziuu quietxtil ne gow grëtaa miech qui?

³⁸ Dzigo bnabdiidz me lo zho, rëb me:

—¿Bla quietxtil ziaadnie to? ¡Golwi dien!

Zeene biire zho güeyso zho, rëbchaa zho lo me:

—Loxaque gaay quietxtil ziaad, ni ziaad chop mel.

³⁹ Dzigo bnabey me bzob grë miech co, wdzeepaaw bioogse lo guizh nguia ne zëëb ga ndxie zho. Tib dzoonga tib dzoonga zho bre, ⁴⁰ zaatne bre tib gayoo zho, zaatne bregaa groļ gayoo zho.

⁴¹ Dzigo bzhen me gza gaay quietxtil co, ni grop mel co, blis lo me bui me nëz gbaa, bdeed me xquizh lo Dios. Blozh ga, beengroļ me quietxtil co, zigse rdeed mew lo xpëëdscuel me, scase scase noguiiz zhow lo grë miech co. Scaque been me grop mel co. ⁴² Grëse miech co, dow zho haxta zaatne bieltaa zdoo zho. ⁴³⁻⁴⁴ Miech tafa, zha bguise rgaa zig gaay mil; ni zeene

blozh dow zho, scase ncuane nroob bi-aan, biodzë tsiipchop chicuid bio grë guitxtil co, bio grë mel co.

Rzë Jesús lo nisdoo

(Mt. 14:22-27, 34-36; Jn. 6:16-21)

⁴⁵ Zeene blozh ga, bnabey Jesús xpëedscuel me bzëeb zho len barcw, zeena zienerga zho tedquia zho stib nöz ro nis co, gdziñ zho guiedz ne lë Betsaid; laa me bii blöz ga, nozonöz me grë miech co.

⁴⁶ Blozhse bzonöz me zho, dzigo güey me tib guic gui zob gax ga, güeyzodiidznie me Dios.

⁴⁷ Zig rguets liuw, laa barcw ne zie xpëedscuel me ga no lo nis co. Laa me zo ga tipse me, ⁴⁸ ran me rlu ib gacd csëniob zhow, sac rriee me rtsire mew. Merle guimbe liuw, tibaque zeene gon zho laa me bdziñ zaatne zie zho ga; tib lo nis co ziezë me, rac me zig nac zeene tibted me lo zho.

⁴⁹ Zeene gon zho laa men co sca ziaad-zë lo nis co, bdzieb zho, broptsie zho rnee zho:

—;Tib ndziin i gon ziaad i!

⁵⁰ Sac grëse zho ranlo zho laa me sca ziezë lo nis co. Dzigo bnee me lo zho rëb me:

—;Gdziebde to, naa zial nu!

⁵¹ Zeene laa me biep len barcw ne zie zho ga, laa me co blöz; dzigo mazdraa bzee zdoo zho. ⁵² ;Per ib riend zho cho nac me, niicle ne gonle zho been me milagr nroob co bguiaan me miech guizhiu co!

⁵³ Zeene laa zho bdziñ stib nöz ro nis co, zaatne nac xtan zha Genesaret, dzigo laa zho pxidoo xbarcw zho ro nis ga.

⁵⁴ Loxaque biet me len barcw laa grë miech co beenbeyle me. ⁵⁵ Rias zho güey zho grë guiedz co, güeynie zho diidz laa me bdziñ ga. Dzigo psilo grë miech co rxob zho zhimguidz zho lo yag, rdziñnie zho zho lo me zaatne rontaa zho no me. ⁵⁶ Zaatne gdziñta me, niicle guiedz nrooba, niicle guiedz lasa, rbee grë miech co zhimguidz zho rienie zho zho zaatne nac len guiedz; ga rnab zho lo me siguiel me maase ni lar ne mbixse me xen grë men rzacne co. Ni grëse zha ne rzhen xab me, riac zho.

7

Ncuane runctal xtol miech
(Mt. 15:1-20)

¹ Tib dze, bdziñ bla zha farisé, ni zla maistr ley ne ziaad nöz Jerusalén, lo Jesús. ² Dzigo gon zho blalaa zha ne nac xpëedscuel Jesús, zeene laa zho row rguibd zho nia zho zigne nacpaa grë zhiwseed xmengol zho.

³ (Nac zha farisé, ni grësegaa zha Israel telne tsard nia zho zigne nac xcostumbr xmengol zho, ible rowd zho; sac zienaldox zho mine nac costumbr. ⁴ Zeene rbire zho lo lgui, ib no mod ne riar nia zho dzigoraar zob zho row zho. Nzian grë wseed co psan xmengol zho zienal zho, zig nac zha riar grë tas, grë cant, grë xtsiñ rotie zho mine niaa guib, ni grë lo bangw ne rzob zho row zho.)

⁵ Dzigo rëb zho lo Jesús:

—;Pe nacne zienald xpëedscuel luu mine blu xmengol ne? ;Pe nacne squize nia beed zho i row zho?

⁶ Pquiab Jesús rëb me lo zho:

—Nlipaa mine bnee Isá, men ne biaad pteed Xtiidz Dios, zeene znu pquiaa me: Grë miech rii, rquiaalose zho runnon zho naa, rond zho diidz gun zho mine rnabey naa.

⁷ Paat rquiind riaad zho riaadgan zho naa; sac niapse guicle zho riab grë wseed ne quialu zho lo miech.

⁸ Sac tel to gon, nosaan to grë mine rnabey Dios, lel grë xcostumbr miech zienal to.

⁹ Xcostumbr to nac mine mazdraa rioxco to, laa mine rnabey Dios quiasan to tib lad. ¹⁰ Led znu gon rnee ley ne bdeed Dios lo Moisés: “Gon pxoz luu, gon xniaa luu”, ni no stib mine rnee: “Zha ne quie pxoz, quiegaa xniaa, ib none guet zho.”

¹¹ Laa to lel rnee to, zac gund miech xyudar xmengol zho, telne bloogonle zho pe nac ncuane rieguial gdeed zho lo me. ¹² Tole rdeete diidz ga gun zho xyudar pxoz zho, xyudar xniaa zho. ¹³ Tib ladle gon rsan to Xley Dios ga sca run to, lëepaaze grë costumbr ne biaannie to, ni quiasangaa to lo zha ne ziaadquia, min co noxcora to. Ni nzianraa grë falt ne squi quiayun to.

¹⁴ Dzigo bnee me lo grëraa miech ne ndxie ga, rëb me lo zho:

—Golquiaadiag mine gni naa lo to nu, ni goltsoxco guien to zha naca. ¹⁵⁻¹⁶ Golgacnan ganle: Grë ncuane rdziñ zdoo miech,

led mincod runctal xtol zho; sinque grē ncuane ntseeb ne rza zdoo zho, min co nac mine runctal xtol zho.

¹⁷ Laa zeene laa me bdziñ ro yu grē xpēēdscuel me, dzigo bnabdiidz zho lo me dien zha nac diidz ne sca rēb me lo grē miech co. ¹⁸ Rēbchaa me lo zho:

—¿Pe niicle to riendaquew dzigo lēē? ¿Pe riende to, grē ncuane row miech, led mincod runctal xtol zho? ¹⁹ Sac grē ncuane row zho rdziñda len zdoomban zho, zhaa zaatne rdziña. Grē guielwagw, len bziuud zdoose zho, len zhitripse zho rieteda, rlozh ga rrieegaw xcuerp zho.

Ga blu me lo zho ganle, grēse ncuane nac guielwagw lēda runctal xtol miech. ²⁰ Ni rēb me lo zho:

—Mine rza zdoomban miech, min co nac mine runctal xtol zho. ²¹ Sac zdoomban zho rza grē ncuane ntseeb ne run zho, zig nac: zeene rio zho grē zhgab yozh,

zeene run zho grē guielyozh,

zeene rban zho,

zeene rut zho samiech zho,

²² zeene rionie zho zha ne nacd tsieeld zho, zeene rzoobladz zho ncuane rap stib miech,

zeene run zho grē guielntseeb,

zeene rquidie zho,

zeene rien zho run zho grē ncuane ndzinlid,

zeene nē rac zdoo zho ran zho cho zha ne stibnoded,

zeene rzhixcuaa zho diidzguizh,

zeene racniats zho,

zeene run zho grēraa ncuane paat rquiind.

²³ Grēse ncuane ntseeb rii, zdoomban miech rzaw, ni lēew nac mine runctal xtol zho.

Biac xpēēd tib wnaa zit

(Mt. 15:21-28)

²⁴ Ga brieē Jesús, laa me zie nēz Tiro. Zeene bdziñ me nēz co ga bdziel tib yu ne blēz me, gocladz me choot niacnand ne laa me no ga; per brieeloda, znuse bien diidza.

²⁵⁻²⁶ Zeene bin tib wnaa Sirofenis laa Jesús bdziñ ga, dzigo güey me, sac nogu-itnie mēdox tib xpēēd me. Zigne bdziñ me pquiitgzhib me lo Jesús, rnab me tsieguncxoon Jesús mēdox co. Tib wnaa zit nac wnaa co; ²⁷ dzigo rēbchaa Jesús lo me:

—Blēz niip dien. None glo mēēd gow, nonguielda cuee ne quiet nia mēēd gdeed new lo mēcw.

²⁸ Pquiab wnaa co, rēb me:

—Nli scaw, zigne rnee luu i; per niicle mēcwa led rio ma zhan mezh rtop ma grē mine rrieengaa nia mēēd.

²⁹ Dzigo rēbchaa Jesús:

—¿Squiw nagon! Lēēgazha i rnee luu. Peet tsieniedraa guic luu naa sca; bzē, laa mēdox ne nosacsi xpēēd luu bichele.

³⁰ Laa wnaa co zey. Zeene bdziñ me lidz me, gon me ine laa xpēēd me nixse lo lon, per laa mēdox co psaanle win.

Biac tib men ne rcuaat

³¹ Ga brieē Jesús, güeyted me nēz Sidón. Sidón brieē me bdziñ me ro Nisdoo Galilé stib, zaatne nac xtan zha Decápolis. ³² Ga bdzinnie zho tib mgui lo me, rcuaat mgui ni nca rnee mgui; bnab zho lo me cxobnia me guic mgui gunguac me mgui.

³³ Dzigo blee me mgui lad grē miech ne ndxie ga. Zitlaa güeynie me mgui, ga psēēb me mzhugnia me gropse len diag mgui ni bdēēb me zhindzuc me lo ludz mgui.

³⁴ Blozh ga, blis lo me bui me nēz gbaa, bneeladz zdoo me, dzigo rēb me:

—¿Bzhial! (¿Efata!)

³⁵ Zigne sca bnee me, laa diag mgui co bzhial, niicle ludz mguiw laaw wban, laa mgui psilo bneenal. ³⁶ Dzigo pso Jesús diidz lo grē miech co, choot lo gzodiidzd zho zha biac mgui co.

Per laa ne rso me diidz lo zho, dzigole nēzrii, nēzrec rzodiidz zhow; ³⁷ sac rzeedox zdoo zho gon zho mine been me ga.

—¿Ncuane gzee zdoo ne i been men qui! —rnee zho—. Zha haxta nguaat, haxta ngop, runguac me.

8

Bguiaan Jesús tap mil miech

(Mt. 15:32-39)

¹ Len dze co, miech guizhiu ne biire pcaalsa lo Jesús stib. Zeene goc tson ngbidza, guiendraa ncuane gow zho. Dzigo bredz me xpēēdscuel me, rēb me lo zho:

² —Rquia zdoo naa grē miech rii, tsonle ngbidz ga rac blanso zho nu, ni na quianiedraa zho ncuane gow zho. ³ Telne squise

zho gzonëz naa zho, glëbd zho, scow zho nëz, sac no zho zit brieë zho ziaad zho nu.

⁴ Pquiab zho rëb zho:

—¿Per pe yguiaan ne zho? ¿Pa guioxi ne guietxtil ne gow grëtaa miech qui dan rii, naca zaatne guien miech?

⁵ Dzigo bnabdiidz me lo zho, rëb me:

—¿Bla guietxtil ziaadnie to i?

—Gadzaquew —rëb zho.

⁶ Dzigo bnabey me grëse miech co bzob zho liu. Blozh ga bzhen me gza guietxtil co, bdeed me xquizh lo Dios; blozhse bdeed me xquizh lo Dios, zigse noyungrol mew, scase scase rdeed mew lo xpëëdscuel me rguiz zhow lo grë miech co. ⁷ Zienie zho zla mel las; bzhen me gza mel co bdeed me xquizh lo Dios, blozh ga bnabeyaque me zho bdiiz zho ma.

⁸⁻⁹ Grëse miech co, dow zho haxta zaatne bieltaa zho dzigo laa me bzonëz zho. Rгаа zho maase tap mil, ni zeene blozh dow zho bii bdop gadz chicuid mine biaan.

¹⁰ Blozh ga, laa me bzëëb len barcw grë xpëëdscuel me, laa zho zie nëz xtan zha Dalmanut.

*Racladz zha farisé gan zho milagr
(Mt. 16:1-12; Lc. 12:54-56)*

¹¹ Blalaa zha farisé ne no nëz co, zeene bin zho laa me bdzin ladz zho, güey zho rzadraa ncuaane rlisqui zho lo me. Rnab zho glu me cho nac me, rëb zho lo me:

—Racladz no dzianlo no gun luu tib milagr, telne nli gbaa ziaad luu.

¹² Zeene gon me sca rac zho, bio me guielnë; dzigo haxta bneeladz zdoo me, rëb me lo zho:

—¿Zha rnaraa milagr ne racladz to gan to? Gneli naa lo to ganle, ni stib milagr gon gandraa to.

¹³ Blozhse sca rëb me lo zho, ndxieque zho ga laa me bzëëb len barcw laa me zie stib nëz ro nis co.

¹⁴ Zeene brieë zho ga, zoladzd xpëëdscuel me ney zho ncuaane niow zho, lëë gdib tib guietxtil zienie zho len barcw. ¹⁵ Laa zho zie, tibaque zeene rëb me lo zho:

—Golguien gon, napaa noyac-wet to lo zhincobi zha farisé, lo zhincobigaa rey Herod.

¹⁶ Zeene bin zho sca rëb me, bza zdoo zho rnee zho:

—Ne gon me nagon ziaadnie ne guietxtil gane squi rnee me.

¹⁷ Bien me sca rnee zho, dzigo rëbchaa me lo zho:

—¿Pe nacne rnee to ziaadnie to guietxtil? ¿Riende to lëë zha rne naa? Ndip nac zdoo to gane riende tow. ¹⁸ ¿Pa rquiin lo to, pa rquiin diag to ne laaw zob? ¹⁹ ¿Pe rsoladzde to zeene gaayaque guietxtil ni bgaaw bguian naa gaay mil miech? ¿Bla chicuid biodzë mine biaan hor co?

Pquiab zho rëb zho:

—Tsiipchopa.

²⁰ Dzigo rëbchaa me:

—Zeene waa gadzaque guietxtil co, ni bguian naa tap mil miech, ¿bla chicuida biaan?

—Gadz chicuida —rëb zho.

²¹ Dzigo rëb me lo zho:

—¿Pe niicle nana riendaque to pe rne naa?

Biac tib men ne rcow lo

²² Bdzin Jesús guiedz ne lë Betsaid, ga güeynie zho tib mgui ne rcow lo lo me, bnab zho cxobnia me guic mgui gunguiac me mgui. ²³ Dzigo bzhen me nia mgui güeynie me mgui zaatne nacle ro guiedz co. Ga bdëëb me zhinzuc me len bziaalo mgui, ni pquiaania me zhits guidlo mgui; blozh ga bnabdiidz me lo mgui dien pe ranle mgui palal.

²⁴ Zeene laa mgui bui, rëbchaa mgui:

—Ranle naa niina nagon laa miech ziezë; per masaque ran naa zho zig rlu grë yag.

²⁵ Dzigo biire pquiaania me zhits lo mgui. Zeene laa mgui bui stib, ndiple rwi mgui laa lo mgui biacle. Grëse ncuaane ran mgui, niicle zitraaw niini ran mguiw.

²⁶ Dzigo bzonëz Jesús mgui nëz lidz mgui, pso me diidz lo mgui tib nëz guey mgui, choot lo tsiezodiidzd mguiw lad guiedz.

Bnee Pedr cho nac Jesús

(Mt. 16:13-20; Lc. 9:18-21)

²⁷ Blozhse ga, laa Jesús brieë ga grë xpëëdscuel me laa zho zie nëz Cesarea de Filipo, zieted zho grë guiedz las ne ndxie nëz co. Laa zho no nëz, tibaque zeene bnabdiidz me rëb me lo zho:

—¿Cho dien ron to rnee miech nac naa?

²⁸ Pquiab zho, rëb zho:

—No zho rnee Juan Bautista, no zho rnee LÍw, men ne biadteed xtiidz Dios padzeela; nogaa zho rnee no cho stib men ne ziadteed xtiidz Diosa.

²⁹ Dzigo rëb me lo zho:

—¿To waa, cho rzac to nac naa?

Pquiab Pedr, rëb Pedr lo me:

—¡Luu nac Men ne zëëble diidz ga cxeel Dios guiaad lo guidzliu!

³⁰ Dzigo pso me diidz lo zho choot lo gneed zhow.

*Bzeet Jesús zha gun miech me
(Mt. 16:21-28; Lc. 9:22-27)*

³¹ Bded ga, psilo Jesús bzeet me lo grë xpëëdscuel me zha csacsi miech me. Rëb me nroob grë ncuaane cteed zho me; grë zha non lo menquiedz, grë pxoz nroob, grë zha ne rseed miech ley, ible stsidil zho me, ni haxta zut zho me; per zeene gac tson ngbidz gut me laa me grieegan. ³² Grëse mine ted me, laaw nozodiidz me lo zho.

Gon Pedr sca rnee me, dzigo bredz Pedr me, blisqui Pedr lo me dien pe nacne rnee me laa me guet. ³³ Zeene gon me zha rzë xtiidz Pedr, zoque Pedr ga biecw me bui me lo grëraa xpëëdscuel me, goctox me rëb me:

—¡Biche lo naa nu mendox! Zienied guic luu mine rnabey Dios, sinque laa guic luu zienie mine racladz luu.

³⁴ Dzigo blunia me lo grë miech ne ndxie ga, yquiaadiag zho mine gnee me; rëb me:

—Zha ne racladz sëëb xnëz naa, none cueeladz zho zho, none lëb zho guiaadnal zho mine rnabey naa, niicle tel min co yquiaaqui csacsi miech zho. Nodne yquia zdoo zho xquielmban zho. ³⁵ Sac zha ne yquia zdoo xquielmban, lel znu nitlo zho; sangue zha ne sca cueeladz xquielmban porne rleynie zho naa, porne rleynie zho grë Diidz Ndzon rii, zha co ygaa tib guielmban ne mazdraa ndzon. ³⁶ Nana, tel zha ne gunlo grëse ncuaane no lo guidzliu rii. ¿Pa yquiin grë ncuaan co lo zho, tel lëew yquiaaqui laa zho guey gabil?

³⁷ ¿Niacxe zrieelo gdziib zho dimi co laa zho len gabil? ³⁸ Naa ne nac naa Men ne pxeel Dios zial naa lo guidzliu, zha ne ctoladz guiab zho lo grë miech ngoopdol rii laa zho no xnëz naa, o ctoladzniegaa zho xtidz naa, scaque naa stoladznie naa zho gal dze ne

laa naa guial stib. Dze ne guialnie naa grë anjl, ni glu naa grë guielndzon ne rap Dios.

9

¹ Ni rëb me lo grë miech co:

—Gneli naa lo to ganle, nzian grë zha ne ndxie nu niina ib tedsod gardaque guet zho, bii zan zho ganle zeene laa Dios glu ne nli men rnabey nac me.

Bdzëëlo Jesús

(Mt. 17:1-13; Lc. 9:28-36)

² Goca xoop ngbidz, brieë Jesús gza me Pedr, Jacob ni Juan, güey zho bzoquia zho tib guic gui glaa.

Bdziñ zho glaa guic gui co, tibaque zeene gon zho laa me bdzëëlo. ³ Masaque rquiabni xab me, nquitsbie rnaw; ni tib miech grieelod scataa mbe quiib lar. ⁴ Gonlo zho zeene laa Lí ni Moisés (grop zha ne biadteed xtiidz Dios glo) bdziñaque, laa zho nozodiidznie me. ⁵ Dzigo rëbchaa Pedr lo me:

—Maestro, ¡ne nligaa wena guiaan ne nu! Laa no gzaa tson yu yag xiid win nu tso to: tiba tso luu, tiba tso Moisés, stiba tso Lí.

⁶ Rdzieb Pedr gza Pedr schop zha co, lo dzeb co niicle riendaque Pedr pe rnee Pedr.

⁷ Tibaque znuse bdop tib xcow pquia ngali zaatne zo zho ga; dzigo bin zho zëëb tib tsi men co lo xcow co, rnee me:

—Lëë xpëëd naa i gon, rleynie naa me. Golgon mine rnee me.

⁸ Lëëled biecw lo zho rwi zho, choot gondraa zho, Jesússe zo lo zho ga.

⁹ Blozhse ga, laa zho wbique ga. Laa zho ziezëëb dan noyet zho cho gui co, zeene rëb me lo zho:

—Mine gon to gon, choot lo gneede tow. Golcuëz haxta gal dze ne grieegan Men ne pxeel Dios.

¹⁰ Nacne choot lo bneed zhow, per psilo zho gza tson zho rnabdiidzlsa zho, zha mod grieegan tib zha ne gutle.

¹¹ Dzigo bnabdiidz zho lo me, rëb zho:

—¿Bay zha nacne rnee maistr ley, glo Lí no guiaad stib, dzigoraa guiaad Men ne zëëble diidz ga cxeel Dios?

¹²⁻¹³ Pquiab me rëb me lo zho:

—Nliw, ible nacle diidz ne glo Lí guiadseed miech gon zho xtiidz Dios, per laa me biaadle; ni zigne bzeetse grë zha ne

biadteed xtiidz Dios ted me, scase been miech me. Scaque Men ne cxeel Dios ga, rnee lo Xtiidz Dios nroob csacsi miech me, ible gandez zho me.

Biac tib niib ngop

(Mt. 17:14-21; Lc. 9:37-43)

¹⁴ Zeene bdziñ Jesús zaatne biaan grëraa xpëedscuel me ga, gza me Pedr Jacob ni Juan; gon zho miech guizhiu ne ndxie lo zho; blalaa zha ne nac maistr ley zo lo zho ga, nodildiidznie zho. ¹⁵ Grë miech co, zeene gon zho Jesús, rley zho, rias zho güeydzieelo zho me güeyquiaa bdiuzh zho me. ¹⁶ Dzigo bnabdiidz me rëb me:

—¿Pe nadien squitaa nodildiidz to?

¹⁷ Lad grë miech co pquiab tib zho, rëb:

—Maestro, lo luu zialnie naa tib xpëed naa gunguiac luu win; ib gacd gnee win sac noguitnie mendox win. ¹⁸ Tel pataa zo win, zeene laa ma rzëeb zdo win rron ma win liu; ga nix win rdzib mtsiin ro win, ni row lay win; nrooble noyo win lëbdraa win së win. Blansonie naa win nu, dzigo bnab naa lo xpëedscuel luu guncxoon zho mendox co, per brieelod zho.

¹⁹ Dzigo rëbchaa Jesús lo zho:

—¿Pe na squitaa miech nad nac to, ib rnalode to Dios! ¿Palal tiemp ne so naa gne naa lo to? ¿Ncuane cxecwdraa naa lo to squi nac to! ¿Goltenie mëedwin qui nu!

²⁰ Güey zho güeynie zho mëedwin co lo me. Zigne gon mendox co me, psilo beencxidz ma win, znuse biab win liu, rti-ibxto win ni rdzib mtsiin ro win. ²¹ Dzigo bnabdiidz me lo pxoz win, goc palal dze psilo sca rac win.

Rëbchaa pxoz win:

—Bii mëdyeen win psilo squi rac win.

²² Pe zhidaa vult zieron mendox qui win lo gui, zieron ma win lo nis ne, racladz ma gut ma win. Bzhiguiel telne zrieelo gunguiac luu xpëed naa, ipquia zdo naa, been tib guielnzaac beenguiac win!

²³ Rëbchaa Jesús lo me:

—¿Zha rnee luu “telne zrieelow”? ¿Zha ne dib zdo rnal Dios, grëse ncuane racladz zho, zaca!

²⁴ Lëelëd pquiab pxoz mëed co, rëb me:

—Rnal naa Dios, per bzhiguiel been xyudar naa, ¿dib zdo naa gnalo naa me!

²⁵ Zeene gon Jesús laa grë miech co rbigberaa, dzigo goctox me lo mendox ne noguitnie mëed co, rëb me:

—Mendox, luu gon psan ngop mëed rii, luu psan nguaat win. ¿Niinagazh psaan win, ib gbiiredraa luu ygaal luu win!

²⁶ Horco biire beencxidz ma mëed co stib, masaque roptsiedan ma laa psaan win, nixtaque win ga, zootle gutle win. Nzian grë miech co, tibaque nan zho gutle win.

²⁷ Laa zeene bzhen Jesús nia win, blis me win ga, laa win bzoli.

²⁸ Zeene bdziñ Jesús len yu ne rbëz me grë xpëedscuel me, bnabdiidz zho lo me rëb zho:

—¿Bay pe nacne brieelod no ndziuncxoon no mendox co?

²⁹ Dzigo rëbchaa me lo zho:

—Grë mendox ne sca nac, rquiin dib zdo ne gnab ne lo Dios dzigo zrieelo guncxoon ne ma.

Bzeet Jesús laa miech csacsi me

(Mt. 17:22-23; Lc. 9:43-45)

³⁰⁻³¹ Brie Jesús ga grë xpëedscuel me, laa zho wfire nëz xtan Galilé stib. Racladz me cho gacnan pa lo no me; sac len dze co nzian grë ncuane noseed me zho. Haxta bzeet me zha csacsi miech me, rëb me:

—Naa ne nac naa Men ne pxeel Dios, ible ziaab naa ladznia miech, ni zut zho naa. Per zeene gac tson ngbidz gut naa, laa naa grieeban.

³² Per ib rien zho pe nacne sca rnee me, niicle gnabdiidzgaa zho rdzieb zho gnabdiidz zhow lo me.

¿Cho nonraa?

(Mt. 18:1-5; Lc. 9:46-50)

³³ Bdziñ zho guiedz ne lë Capernaum; grëse zho laa zho ndxie len yu ne blëz zho, tibaque bnabdiidz Jesús lo zho, rëb me:

—Golnë dien, ¿pe scataa nodildiidz to zeene ziaad ne nëz?

³⁴ Ni tib zho ib pquiabd, sac zeene ziaad zho nëz quianeelsa zho dien cho nac zha ne nonraa.

³⁵ Dzigo bzob me, bredz me zho gza tsiipchop zho rëb me lo zho:

—Zha ne racladz gac zho zha non, none guiaanwin zho gac zho zig tib ngundziin lo samiech zho.

³⁶ Dzigo bzo me tib mēēdbgui win glow-
taa lo zho; blozh ga bdeedz me win ni rēb
me lo zho:

³⁷ —Zha ne ngab xnēz naa, ni gleynie zho
tib mēēdwin zig mēēdwin rii, guṅ naa cuent
naa ga rleynie zho; ni zha ne sca rleynie
naa, yele meṅ ne pxeel naa ga rleynie zho.

³⁸ Blozh ga, rēbchaa Juan lo me:

—Maestro, bdzion no goṅ bzeet tib zha
co lē luu zeene beṅcxooṅ zho mendox;
nacne nli blisqui now lo zho, sac goṅ, led
yed zho nacgrē ne.

³⁹ Dzigo pquiab me rēb me lo zho:

—ḡGuṅscade to! Sac goṅ zha ne sca rzeet
lē naa zeene ruṅ zho milagr, niacxe lēēque
zha glēē lo naa. ⁴⁰ Zha ne nacne ne, glēēd
zho lo ne.

⁴¹ 'Golgacnaṅ sca ganle, grēse zha ne
gdeed maase tib zhigaque nis guie zha ne
ngab lo naa, ib tedsod stsire Dios miṅe
been zho ga. ⁴² Saṅgue zha ne yguib guṅctal
zho xtol zho ne nac zho zig tib mēēdla
yeen; mazd lēētaa miṅe ted zha co sobdoo
tib quie molin zhobxtil yquiaw yaṅ zho
tsieroṅ zho zho nisdoo.

Choot gdeete diidz guiab lo dol

(Mt. 18:6-9; Lc. 17:1-2)

⁴³⁻⁴⁴ 'Zha ne rien nia zho nac miṅe
rquiaqui ruṅctal zho xtol zho, mazd
cchuggazh zho nia co zho. Peet nacd
maase tibaque nia zho zob totsaque ygaa
zho guielmban ndzon ne gdziṅd dze lozh,
lēdle zob gropa ni laa zho guey gabil, lo
beldox ne gdziṅd dze guuu. ⁴⁵⁻⁴⁶ Telne
riengaa zho ni zho nac miṅe rquiaqui
ruṅctal zho xtol zho, mazd cchuggazh zho
ni co zho. Peet nacd maase tibaque ni zho
zob totsaque ygaa zho guielmban ndzon ne
gdziṅd dze lozh, lēdle zob gropa ni laa zho
guey gabil, lo beldox ne gdziṅd dze guuu.

⁴⁷ Tel tib logaa zho nac miṅe rquiaqui
ruṅctal zho xtol zho, mazd cueegazh
zho bziaalo co zho. Peet nacd maase
tibaque bziaalo zho zob totsaque ygaa zho
guielmban ndzon co, lēdle zob grop bziaalo
zho ni laa zho guey gabil. ⁴⁸ Zaatne nac
gabil, ib gdziṅd dze ne guuu lo bel co; grē
mziog ne ndxie ga, gdziṅd dze ne nitlo ma.

⁴⁹ Grēse zha ne gdziṅ ga, masaque cuib gui
lad zho zig rhib zed lad bēēl.

⁵⁰ 'Zig nac zed, rquiindoxa zeene nzhiw,
per zeene nzhida, ḡpa dien yquiina?
Scaquegaa to nagon golgac zig zed ne nzhi,
zeena yquiin to lo guidzliu rii; niowse
golbannie samiech to, glēēlsade to.

10

Zha ne rsēbtsieel

(Mt. 19:1-12; Lc. 16:18)

¹ Brieē Jesús Capernaum güeyted me grē
guiedz ne ndxie nēz xtan zha Judé, grē
guiedz ne ndxie nēz dan ro guiubee Jordán.
Miech guizhiu ne rcaalsa lo me, dzigo rsilo
me rseed me zho zigne runtaque me.

² Tib vüelt bdziṅ bla zha farisé gocladz
zho niuṅgüet zho me, par dien pe nxiṅd me
tib diidz; bnabdiidz zho rēb zho:

—Maestro, mgui ne racladz csēbtsieel, ḡpe
gnē luu pe zrieelo csēbtsieel zho?

³ Pquiab me rēb me lo zho:

—ḡZha zho psan Moisés diidz lo to?

⁴ Pquiab zho rēb zho:

—Tel Moisésa, bdeed me diidz csēbtsieel
zha ne racladz csēbtsieel, lēēraasi none
yquia tib guits gdeed zho lo wnaa zaatne
raquiet ne laa zho psaan wnaa.

⁵ Dzigo rēbchaa me lo zho:

—Ne squicxe waa miech nad nac to ib
ronde to diidz, miṅ co nacne biaan ley
co. ⁶ Per ib nodne csēbtsieel miech; sac
goṅ, zeene psan Dios grētaa ncuaane no, tib
nēz miech bzaa me: tib mgui ni tib wnaa.

⁷⁻⁸ Gacxe waa, mgui ne rtsieelnia ib none
grieezhaa zho lo pxoz zho, lo xniaa zho,
par gbannie zho wnaa ne nac tsiel zho;
laa zho gactipse grop zho. Nacdreaa zho
chop miech, sinque laa zho rac tibaque.

⁹ Dios nac meṅ ne psan ycatsieel miech,
cho dzigo nac miech par quiits zho miṅe
rnabey me.

¹⁰ Laa zeene bdziṅ me leṅ yu ne rbēz zho,
dzigo bnabdiidzaque xpēēdscuel me miṅ co
lo me stib. ¹¹ Dzigo rēbchaa me lo zho:

—Mgui ne rsēbtsieel ni rbannie zho stib
wnaa, noguitnie zho wnaa ne gocpaa tsiel
zho ga, ni dol ga ruṅ zho. ¹² Niicle wnaa-
gaaw, wnaa ne rsēbtsieel ni rbannie zho
stib mgui, lēēque dolaque ga ruṅ zho.

Beenlay Jesús mēēdla

(Mt. 19:13-15; Lc. 18:15-17)

¹³ Tib vüelt nzian meñ ne bdziñ bdziñnie zho xpëédlas zho lo Jesús, par cxobnia me guic win guñlay me win. Grë zha ne nac xpëédscuel me, leñ psilo zho ndox zho lo grë zha ne bdziñnie grë mëédlas co.

¹⁴⁻¹⁵ Zeene gon me sca quiayun zho, wbinladz guic me, dzigo rëb me lo zho:

—Ctsirede to grë mëédlas yeen qui, golsaan guiaad win lo naa. Sac gon grë mëédlas yeen, ni zha ne nac zigne nac win, zha co nac zha ne sëeb ygab lo Dios.

¹⁶ Blozhse sca bnee me, dzigo psilo me bdeedz grë mëédlas co, ni pxobnia me guic win beenlay me win.

*Bzodiidznie tib zha ricw Jesús
(Mt. 19:16-30; Lc. 18:18-30)*

¹⁷ Laa Jesús nole nëz tsie me stib guiedz, zeene rias tib niib nguieg bdziñ pquits-gzhib lo me, rëb niib lo me:

—Nan naa luu nac tib meñ ne noseed miech, ni tib meñ wen nac luu; ðbnë dien pe nac mine gun naa zeena ygaa naa guielmban ndzon ne gdzindraa dze lozh?

¹⁸ Rëbchaa Jesús lo niib:

—Rnee luu lëe tib meñ wen nac naa. ðNligaaw, Diosse nac meñ wen! ¹⁹ Nanle luu ganle zha nac Xley Dios, rneew:
Gute luu samiech luu,
telne nole tsieel luu, tsonied luu zha ne led
tsieeld luu,
cuand luu samiech luu,
yquiadiidzguizhd luu samiech luu,
yquidieed luu samiech luu,
gon pxoz luu, gon xniaa luu; bin mine
rnabey me luu.

²⁰ Dzigo pquiab niib rëb niib lo me:

—Maestro, grësew zigne bzeetse luuw i, ni tiba gard quits naa wlal ne nac naa zha nguieg.

²¹ Dze rwi Jesús lo niib, rleynie me niib.

—Stibaque mine rquiin gun luu —rëb me—, güey, güeyto grëse ncuaane quianie luu, dzigo bdiiz dimi co lo grë zha mban ne guieñd pe yquiin; sca nroobraa guieñzaac ne ygaa luu gbaa. Lozh ga, bleeladz xquielmban luu dënal zhits naa.

²² Zeene bin niib co sca rëb Jesús, biab guieñné niib, mbanse rac niib laa niib zey; sac ne nligaa nroob ncuaane quianie niib.

²³ Dze rwi me gon me laa zha nguieg co zey, dzigo rëb me lo xpëédscuel me:

—ðGrë zha ne squi rapchen, rzacxuu zho par sëeb zho xnëz Dios gnabey me zho!

²⁴ Zeene bin zho sca rëb me, rzee zdoo zho. Dzigo biire me bnee me rëb me lo zho:

—Xin, ðne nligaa tib miech ne ndziib rap chen, rzacxuu zho sëeb zho xnëz Dios gnabey Dios zho! ²⁵ Mazd znuse rded tib camell guieer guzh, lëdle sëeb tib zha ricw xnëz Dios.

²⁶ Zeene bin zho sca rëb me, mazdraa bzee zdoo zho, rnabdiidzlsa zho rnee zho:

—Bay, ðchose dzigo nac zha ne zrieelo sëeb xnëz Dios?

²⁷ Dze rwi me lo zho, dzigo rëbchaa me:

—Par miech zootle tsod zha ne grieelo sëeb xnëz me. Sangue me, nan me no zho; sac tsod ncuaane grieelod gun me.

²⁸ Dzigo rëb Pedr lo me:

—Tel no, grëse ncuaane rdziaap no laa no psana, laa no ziaadnal zhits luu.

²⁹ Pquiab me rëb me:

—Grëse zha ne psan lidz, psan zho bets zho, bzian zho, xniaa zho, pxoz zho, xpëéd zho, liun zho, porne riladz zho naa ni riladz zho Xtuidz Ndzon Dios; ³⁰ nli nroob guieñné gan zho, per gneli naa lo to ganle: grëse ncuaane sca psan zho ga, lo guielmban riique laa zho gbiire gana stib tib gay-oogaw tib tiba; ni ib tedsod zgaa zho tib guielmban ndzon ne gdzindraa dze lozh.

³¹ 'Nli zig nac niina, no zha ne rzac zha non nac zho, per zeene gal dze co peet gac-nond zho; laa zha ne rzac zho peet nond, gal dze co lalga gac zho grë zho.

*Biire bzeet Jesús laa miech csacsi me
(Mt. 20:17-28; Lc. 18:31-34)*

³² Brie Jesús ga laa me zie Jerusalén. Nzian grë zha ne zienal zhits me, nerse me lo zho laa zho zie. Grë zha ne nac xpëédscuel mew, rzee zdoo zho; laa grëraa miech co per nli rdzieb zho. Dzigo bredz me gza tsiipchop zha ne nac xpëédscuel me ga, psilo me bzeet me grëse tel zha ziaadyob ted me, rëb me lo zho:

³³ —Bii zan to ganle, naa ne nac naa Meñ ne pxeel Dios, niina ne laa ne gdziñ Jerusalén ible zielo zho naa ladznia grë zha ne nac pxoz nroob ni grë zha ne rseed miech ley. Grë zha co gnab guet naa, ni san zho naa ladznia grë zha ne nacdrea zha Israel. ³⁴ Xidznie zho naa, stsuc zho lo

naa, zguin zho naa, ni haxta zut zho naa; per dze ne gac tson ngbidz gut naa laa naa grieaban.

³⁵ Dzigo wbig gax Jacob grop Juan (xin-gan Zebedé) lo me, rëb zho:

—Maestro, laa no gnab tib favor lo luu, per racladz no siguiel luu gun luuw.

³⁶ Dzigo rëb me:

—¿Pe favor ne racladz to gun naa lo to?

³⁷ Rëbchaa zho:

—Laa no racladz, siguiel luu zioob no cue luu gal dze ne laa luu nac rey rnabey luu, tib no nëz derech stib no nëz revés.

³⁸ Pquiab Jesús, rëb me lo zho:

—¿Ni to gon riend pe rnab to! ¿Pe zlëb to gan to grë guielnë ne gan naa, pe zlëb to ted to grë mine teed naa?

³⁹ Rëbchaa zho:

—¿Zlëb no!

Dzigo rëbchaa me lo zho:

—Nli zan to guielnë ne gan naa, ni zded to mine teed naa; ⁴⁰ per ne gnedz naa diidz sob to cue naa nëz derech o nëz revésgaa, led naad raguial min co; laa lugar co bi-aanle par zha ne nole diidz ygaaw.

⁴¹ Grëraa zha ne nac xpëedscuel me, zha ne nacgza Jacob ga grop Juan, zeene bin zho zha rzë xtiidz Jacob grop Juan blëe zho lo zho. ⁴² Dzigo bredz Jesús zho grëse zho, rëb me lo zho:

—Ran to ganle zha run grë zha ne rnabey grë guiedz ne ndxie lo guidzliu, ni grë zha ne nac zha non, masaque rnabey zho samiech zho zigne racladztaa zho. ⁴³ Sangue to gon, gunscaade to. Lo gza to, zha ne racladz gac zho zha non lo to, laa ne glu zho zha non zho, none glo zho guiaanwin gac zho zig tib ngundziin lo to. ⁴⁴ Scaquegaa, zha ne racladz gnabey lo to, none glo cseed zho gun zho mine gnabey to zho. ⁴⁵ Golgan ganle, niicle naa ne nac naa Men ne pxeel Dios, ziald naa par gnabey naa miech, sinque laa naa zial par gac naa tib ngundziin lo zho, ni gded naa xquielmban naa zeena laa zho lo grëtaa ncuane ngadoo zho. Ni nanpaa naa miech guizhiu ne laa.

Biac tib men lë Bartimé
(Mt. 20:29-34; Lc. 18:35-43)

⁴⁶ Sca no grë miech guizhiu co nëz, laa zho bdzin guiedz Jericó. Laa zeene laa

grë miech taf co zieriee ro guiedz co, laa tib mguie ciegw lë Bartimé zob ga rtop gon (xingan tib men lë Timew). ⁴⁷ Zeene bin Bartimé ye Jesús (Nazaren) ziaad ga, psilo me nguiedz rbedz me, rnee me:

—¿Jesús, men xtii rey David, pquia zdoonaa!

⁴⁸ Nzian grë miech co ndox lo me nan zho guioog ro me, per dzigole mazdraa nguiedz roptsie me, rnee me:

—¿Jesús, pquia zdoonaa!

⁴⁹ Dzigo pcuëzni Jesús, bnabey Jesús güeytsedz zho me. Bdzin zho lo me, rëb zho:

—¿Ligier guso i! Dë ganle laa me rbedz luu.

⁵⁰ Zeene bin mew, haxta squi bron me lar ne mbix me, guso me ga laa me bdzin lo Jesús. ⁵¹ Dzigo rëbchaa Jesús lo me:

—Bnë nadien, ¿pe racladz luu gun naa?

Pquiab me rëb me:

—Maestro, racladz naa guiac lo naa.

⁵² Dzigo rëbchaa Jesús:

—¿Niinagazh laa lo luu gan! Laa luu biac, sacne dib zdoonaa luu bnalo luu naa. Ligier na bzë.

Horcogazha laa lo men co psilo bui, laa me ziana zhits Jesús.

11

Bdzin Jesús Jerusalén

(Mt. 21:1-11, 18-19; Lc. 19:28-40; Jn. 12:12-19)

¹ Zhile gdzin zho Jerusalén, laa zho zie gax zaatne riaan guiedz Betfagé ni guiedz Betain, nëz dan squi riaan Gui Oliv, zeene bredz Jesús chop xpëedscuel me ² rëb me lo zho:

—Goltsie guiedz win ne ndxie danse lo ne i. Zigne sëeb to lad guiedz, laa tib burr quiadoo ga, ni tib miech gard sob lad ma; dzigo golxadz ma, goltënie ma nu. ³ Tel cho gnabdiidz pe nacne noxadz to ma, dzigo golguiab: men ne rnabey ne men co rquiin ma, na zigne lozh xtsiin ma guiaadsan no ma.

⁴ Laa zho zie, nligaaw laa zho güeydziel burr co quiadoo ma tib ro nëz, gax tib ro yu.

⁵ Blalaa zha ne zo ga, zeene gon zho laa zho noxadz ma, rëbchaa zho:

—¿Pe gun to burr qui dzigo na, ne noxadz to ma?

⁶ Dzigo pquiab zho zigne rëbse Jesús lo zho ga, nacte bdeed meṅ co diidz laa zho zienie ma.

⁷ Bdzinne zho ma lo Jesús lëëque lar ne rbix zho pxob zho lad ma, bzobga me ma.

⁸ Nzian grë miech co zigse zie Jesús, scase scase ner zho rta zho lar ne rbix zho rded me, nogaa zho rchoo nia grë pe yag rdziin zho zaatne rded me. ⁹ Grëse zho, niicle zha ne ner lo mew, niicle zha ne nal zhits mew, rley zho nguiedz roptsie zho, rnee zho:

—¡Zha ndzontaa meṅ qui pxeel Dios lo ne! ¹⁰ ¡Zha wentaa ziaad me gac me zhirey ne! ¡Me gnabey zigne bnabey pxozgol ne rey David! ¡Zha ndzontaa Dios ne zob gbaa!

Sca nguiedz roptsie zho rleyne zho me, laa me bdziñ Jerusalén.

¹¹ Bdzin me Jerusalén, güey me güeyso me len yadoo. Blozhse bui me dipse len yadoo, laa me brieëque ga laa me zie nëz Betain grë xpëëdscuel me, sac bdzele dzew.

¹² Biini liu, loxaque zieriee zho Betain laa me psilo rcaabedz. ¹³ Zitlaa ziaad me gon me tib zhan yag guigw, nxii nac low zëëb zhiblaga; dzigo zie me zieso me dien pe gdziel tib guigw low gow me. Bdzin me zaatne zoba, ni tib guigw guiend low loxaque zhiblagsew scataa zëëb, sac gardpaa gdziñ mëë ne rquia guigw. ¹⁴ Dzigo rëb me lo yag guigw co:

—¡Squita nagon guiaan luu! ¡Gdzindraa dze yquia nex lo luu gow miech!

Grëse xpëëdscuel me, bin zho sca bnee me lo yag co.

Blee Jesús miech len yadoo

(Mt. 21:12-17, 20-22; Lc. 19:45-48; Jn. 2:13-22)

¹⁵ Bdzin zho Jerusalén, bzëëb me len yadoo. Psilo me blee me grëse miech ne quiayun lgui ga, zigtaa zha ne no wtow, zigtaa zha ne no wziw. Grë zha ne no wto palom, grë zha ne notsëë dimi, ptiixche me xmezho. ¹⁶ Blozh ga, pso me diidz choot nodraa sëëbnie grë ncuana co len yadoo, ¹⁷ rëb me lo zho:

—Led znu gon rnee lo Xtiidz Dios: “Zaatne nac lidz naa nu, nu guiaad grëse miech ne ndxie lo guidzliu sodiidznie zho naa.” Laa to gon quiayun to lugar rii zig tib zhibliee ngbaan.

¹⁸ Grë zha ne nac pxoz nroob ni grë zha ne rnabey lo maistr ley, bin zho sca rëb me, dzigo psilo zho rguib zho dien zha gdeeda diidz gut zho me. Per rdzieb zho lega gnaaz zho me, sac ndal miech ne rley rquiaadiag zhiwseed me. ¹⁹ Zeene laa liu pcow, laa me wbique Jerusalén stib grë xpëëdscuel me.

²⁰ Biini liu co, laa zho zieded zaatne zob yag guigw ne sca güeyguib me nex lo ga, gon zho laaw bidzle dib low. ²¹ Dzigo beencsoladz Pedr mew, rëb Pedr:

—Maestro, bui ganle laa yag guigw ne bdzibdee luu ga bidzle.

²² Pquiab me rëb me:

—Zha ne dib zdoo rnalo Dios, ²³ gneli naa lo to ganle: Niicle ncuane mazdraa ngan gnab zho lo me, zun mew; lëëraasi none dib zdoo zho gliladz zho zac mine rnee zho, ni palal gacchopd guic zho. ²⁴ Golgona sca ganle, grëse ncuane gnab to lo Dios, dib zdoo to golliladz ne zneedz mew, dzigo sca zac mine rnab to. ²⁵ Ni zeene gnab to lo Dios, golsoladz dien pe no cho rlëënie to, dzigo golgun zho perdon; zeena scagaa, Pxoz to meṅ ne zob gbaa zun me to perdon tel pe nactaa xtol to. ²⁶ Sac telne gunde to samiech to perdon, dzigo niicle megaa, gund me to perdon.

Cho rnabey Jesús

(Mt. 21:23-27; Lc. 20:1-8)

²⁷ Blozh ga, laa zho bdziinaque Jerusalén stib. Lëëtaaque laa Jesús quiawi dib len yadoo, zeene bdzin bla zha ne nac pxoz nroob, bla zha ne nac maistr ley ni zha ne nac meṅ non lo meṅguiedz, ²⁸ rëb zho lo me:

—¿Cho dien nac luu ne squitaa ziaadnabey luu len yadoo? ¿Cho rnabey luu?

²⁹ Pquiab me rëb me lo zho:

—Laa naa gun tib wnaabdiidz lo to. Telne stsire to low, dzigo gni naa lo to ganle cho rnabey naa ne laa naa noyun grë ncuane noyun naa. ³⁰ Gollnë dien, ¿cho pxeel Juan biaad me pchoobnis me miech? ¿Pe Dios pxeel me, te miechsew ye?

³¹ Psilo zho rnabdiidzlsa zho, rnee zho:

—Telne dzieets ne Dios pxeel Juan, dzigo laa me gnë: “¿Pex nac dzigo waa bliladzde to mine bnee Juan?” ³² Tel na dzieetsgaa ne: “Miechse pxeel Juan, grieequiadaque ne.”

Rdzieb zho niab zho miech pxeel Juan, sac grëse menquiedz nan ne nli Dios pxeel Juan biadteed Juan xtiidz Dios lo miech.

³³ Dzigo mazd mine been zho, rëb zho:

—Ndiond no dien cho pxeel Juan.

Dzigo rëbchaa me lo zho:

—Niicle naagaa nagon, grielod gni naa lo to cho rnabey naa quiayun naa grë ncuaan rii.

12

Xcuent zha ne pquianap liu
(Mt. 21:33-46; Lc. 20:9-19)

¹ Dzigo psilo Jesús bzodiidz me tib cuent, rëb me:

—Tib mgui name, nroob lbë uv beenbni me lo liun me. Psilo me ptse me igose liu co, bzaa me zaatne gzhii grë uv co, ni bzaa me tib yu glaa zaatne sob zha ne yquiaanapa. Blozh ga, blediin me liu co lo bla zha ne ran liu, dzigo laa me brieeg ga, laa me zey zit.

² Zeene gol mëe ne ral uv, pxeel me tib xmoz me lo zha ne quianap liu co, parne gdeed zho uv ne rieguial me ycaa me. ³ Per lel bnaaz zho moz co, bdiin zho zho; blozh ga, scase bzonëz zho zho.

⁴ Dzigo biire men ne nacchen liu co pxeel me stib moz, scasaque been zho: gocntseeb zho lo moz co, pquiaago zho zho, bdiin zho zho, blë zho guic zho.

⁵ Biireque me pxeel me stib zho, zha cole beet zho. Ni bii pxeel me nzianraa zho, no zho psiwee zho, nogaa zho beet zho. ⁶ Tibaque zeene loxaque xinganse me riaan. Rleyniedox me xpëed me, per laa me pxeel me, bza guic me rëb me: “Ganse zho xpëed naaw, zon zho mine gnee me.”

⁷ Zeene gon zho laa xpëed me bdiin, rëbchaa zho: “iLëe zha qui nagon guiaanne liu rii! iGolgotsoo dzuut ne zho zeene guiaana lo ne!” ⁸ Dzigo bnaaz zho men co, beet zho me, güeyga zho güeyron zho me tib lad lo liu co.

⁹ Sca nagon —rëb Jesús—, been zha ne quianap liu co. Golnëse nadien, ipe nac mine gun bizhuan liu co? Ib tedsod zeene laa me guiaad, znitlo me zha co; zhaale lo zha ne csañ me liun me.

¹⁰ Golsoladz ganle znu rnee lo Xtiidz Dios: Quie ne psëeb zha ne nozaa yu,

ni nand zho lëepaa quie co nac mine rnazdziits yu.

¹¹ iNcuane gzee zdoo new! Sac Dios bnabey sca goca.

¹² Zeene gon zho sca bnee me, gocladz zho naazgazh zho me ga; sac bien zho mine run zho ga bzeet me. Per bnaazd zho me, sac rdzieb zho grë miech guizhiu ne ndxie ga, nacne zeyga zho.

Pe nonguiel quizh miech contribucion
(Mt. 22:15-22; Lc. 20:20-26)

¹³ Zhisaque goca, laa zho pxeelaque zla zha farisé, ni zla zha ne nacie Herod, zie zho ziegungüet zho Jesús par dien zha cxin me tib diidz; zeena sca gdeeda diidz tsiezo zho me lo wxtis. ¹⁴ Bdiin zho lo me, rëb zho:

—Maestro, ndion no niapse diidzli rnee luu, led lega gund luu mine rnee tib miech, sac tibeyse nac miech lo luu, ni laa luu zianal cseed zho mine nac diidzli zeena sëeb zho xnëz Dios. Min co nagon, nacne racladz no gnë luu lo no dien, ipe nonguiela ga rdeed no dimi ne razh lo rey te nonguiela ye? iPe zdizhraa no dimi co, te mazd dizhdraa now ye?

¹⁵ Bienga Jesús racladz zho gungüet zho me, dzigo rëbchaa me lo zho:

—iPe nacne racladz to gungüet to naa? Golguuid tib xpes to nu ganle.

¹⁶ Dzigo bdeed zho tib pes lo me. Blozh ga, rëbchaa me lo zho:

—Golnë lo naa dien, icho nu quia lo pes rii? iCho lë nu quia low?

Pquiab zho rëb zho:

—Lëe rey Roma i, lëe lë me i quia low.

¹⁷ Dzigo rëb me lo zho:

—Mine nonguiel ycaa rey, goldeeda lo rey; scaquegaa mine nonguiel ycaa Dios, lo Dios goldeeda.

Zeene gon zho sca ptsire me lo xtiidz zho, rdzieldraa zho zha gun zho.

iPe nli zrieeban miech?
(Mt. 22:23-33; Lc. 20:27-40)

¹⁸ Bdzinaque zla zha saducé, rëb zho lo me:

¹⁹ —Maestro, znu pquiaa Moisés lo libr ley ne psan Moisés lo no: tel glo mgui guet lo wnaa ne nac tsieel mgui ni gopd wnaa mëed, dzigo none betsaque zho ctsieelnia

wnaa co stib, zeena gap wnaa mēed ne guiaan xlugar xpēed zha ne gut ga.

²⁰ 'Bio tib dii zha co znu bzhaac, gadz bets nac zho. Ptsieelna zha ne nac zha gol, zeene laa zho gut, biaan xpēed zho.

²¹ Dzigo ptsieelna stib bets zho wnaa co, blozh ga gutaque zha co, pasē zho nsañ mēed. Ptsieelnaque me stib zho, goc zho tson, niicle zha co psandaque mēed.

²² Sca sca haxta bza gza gadzse zho ptsieelna me, per ziese zho ni tib zho psand mēed; tibaque zeene yeque me, laa me gut.

²³ Mine racladz no gacndion no, ¿chopaa dzigo gac tsiel wnaa co gal dze ne laa zho grieegan; sac gza gadzse zho ptsieelna me?

Sca bnaabdiidz zho, sac nac zha saducé rliladz zho ne nli zdziñ dze grieegan zha ne ret.

²⁴ Dzigo pquiab Jesús rēb me lo zho:

—I nagon laa to rxin. Mine naca riende to zha nac Xtiidz Dios, niicle rliladzde to zrieelo me gun me ncuaan ro ne gard gan miech. ²⁵ Sac gon, zeene gal dze ne laa grē miech grieegan, niicle mguiw niicle wnaaw led yedraa hor co dien cho ctsieelna zho; sac hor co laa zho gac zig nac grē anjl ne no gbaa. ²⁶ Stiba, ible nli zrieegan men gut. ¿Pe gard ganle glab to lo guits ne pquiaa Moisés, zaatne ziaad zeene bin Moisés tsi Dios tib lo yag zarz nguia ne noyazbel? Rēb Dios lo Moisés: “Naa nac Dios ne rliladz Abraham, naa nac Dios ne rliladz Isaac, naa nac Dios ne rliladz Jacob.” ²⁷ Niicle ne gutle gza zha co hor co, per zeene sca bnee Dios, gase rlu ne mban zho no zho lo me. Sac tel Dios, nacd me xDios mengut sinque xDios zha mban nac me. Ise nagon rlu, peet riende to gane squi rnee to.

Xley Dios mine mazdraa non
(Mt. 22:34-40)

²⁸ Zeene sca nozodiidznie Jesús zha saducé co, gon tib maistr ley niapse diidzli ptsire me lo xtiidz zho. Dzigo wbig maistr ley co, bnaabdiidz me lo Jesús, rēb me:

—Bzhiguiel bnē lo naa dien, lo grē xley Dios, ¿pa min nac mine mazdraa non?

²⁹ Pquiab Jesús rēb me:

—Min rii nac mine mazdraa non, znu rneew: “Grēse to men Israel, golquiaadiaga

ganle: men ne nac Dios ne rliladz ne, tibaque me ni me nac men ne rnabey ne.

³⁰ Dib zdoo to, dib xalm to, dib guielbiini ne no guic to, dipse xfuers to golleynie me.” Lēe tiba nu, ³¹ laa stiba znu rnee: “Bleynie samiech luu zigne rleyne luu luu.” Tso-draa stib ley ne mazdraa non lo grop ley rii.

³² Dzigo rēbchaa maistr ley co lo Jesús:

—Diidzli rnee luu maestro, tibaque Dios no. ³³ Ni none dib zdoo ne, dib guielbiini ne no guic ne, dipse xfuers ne gleyne ne me; ni gleyne ne samiech ne zigne rleyneque ne ne. Min co nac mine mazdraa non, lēdle gzēeg ne pe cos cogon ne lo me o dien peragaa gun ne.

³⁴ Zeene gon Jesús sca niini rzē xtiidz me, rēbchaa Jesús lo me:

—Zhile runfalt sēeb luu xnēz Dios, gnabey me luu.

Blozh ga, grēse zha ne ndxie ga, ni stib zho biazhdraa zho pe nabdiidz zho lo me.

¿Cho xpēed nac Crist?

(Mt. 22:41-46; Lc. 20:41-44)

³⁵ Sca noseed Jesús miech len yadoo ga, zeene bnaabdiidz me lo zho, rēb me:

—¿Bay zha nacne rnee grē maistr ley, lo xtii rey David ga grieequia Men ne nacle diidz ga cxeel Dios? ³⁶ Sac zeene bdeed Espiritu Sant guielbiini lo rey David, znu bnee David:

Bnee Dios lo men ne rnabey naa, rēb Dios lo me:

“Cue naa nēz derech, nu bzob, nieeda lozh gnaz naa grēse zha ne rlēe lo luu, csañ naa zho ladznia luu.”

³⁷ Gase nagon telne nli zha xtii David gac Men ne nole diidz cxeel Dios ga, ¿zha nac dzigo ne lēeque David rnee ne me rnabey David?

Grē miech guizhiu ne ndxie ga noquiaadiag zhiwseed me, per nli rley zho ron zho zha rnee me.

Zha run grē maistr ley

(Mt. 23:1-36; Lc. 11:37-54; 20:45-47)

³⁸ Laa me noseed grē miech co, zeene pso me diidz lo zho rēb me:

—Ible tsienalde to mine run maistr ley gon. Sac grē zha ne nac maistr ley, rdziladz zho racw zho lar nool haxta zhits ni zho rbiba, rdziladz zho ndooladz yquiaabdiuzh miech zho zeene gdziel zho zho dib

ro nêz. ³⁹ Zig nac len yadoow, zha nac zha ne rzob lo xcan zaatne rzob grê zha non, zeene tsiegaa zho tib lni lidz miech, lëepaaze zha nac zha ne rzob groļ mezh zeene laa wagw gac. ⁴⁰ Ni rlozh ga, rio zho rla zho tel pe ncuaane rapse grê wnaa viud; ni parne peet guiabd miech lo zho, xtse rzo zho rzadraa pe lay ne gool zho.

'Sca gon nac zho, per ib tedsod zeene laa grê miech ngoopdol quizh xfalt, zha nac zha ne mazdraa nroob caxtigw ygaa.

*Gon ne bdeed tib wnaa viud
(Lc. 21:1-4)*

⁴¹ Blozh ga, güey Jesús güeysob me gax zaatne zhoob grê alcancí. Dzese rwi me ran me zha riesan miech gon len grê alcancí co; ndal grê zha ricw rdziñ, nroob dimi rsan zho.

⁴² Tibaque zeene bdziñ tib wnaa viud, tib men prob nac me, ye me laa me psan chop gaay win len alcancí co.

⁴³ Dzigo bredz Jesús xpëedscuel me, rëb me lo zho:

—Gneli naa lo to ganle, mazdraa gon nroob non gon ne bdeed wnaa viud qui, lëdle gon ne bdeed grëraa zha qui. ⁴⁴ Sac zha, dimi ne riaanle lo zho i rgogon zho; sangue wnaa prob qui gon, centav yeen ne quianiese me mine rnalopaa me gziuu pe gow me, per laa me bloogona.

13

*¡Nsin golso!
(Mt. 24:1-28; Lc. 17:22-24; 21:5-24)*

¹ Laa Jesús zieriee len yadoo nroob co grê xpëedscuel me, zeene rëb tib zho lo me:

—Maestro, ¡bui ganle zha niaataa yadoo rii! ¡zha rnataa grê quie ngol ne niaaw!

² Pquiab me rëb me lo zho:

—Nligaa lëe zha niaataaw. Per niicle squitaa gon ran tow niina, zdziñ dze ne nitlow dib nacsew. Ni stib quie qui guiaandraa zigne squi zhobxcuaaw i.

³ Brie me ga, laa me zie gza me zho. Bdziñ zho cho Gui Oliv, ga bzob zho grê zho. Nienenpaa ro yadoo co zaatne zob zho ga; dzigo wbig Pedr, Jacob, Juan ni Ndrés lo me, gza tap zho bnabdiidz lo me rëb zho:

⁴ —Bzhiguiel bnë lo no dien, ¿pa hor dzigo gac mine bzeet luu ga? ¿Zha nac señ ne tso zeene laaw csilo gac?

⁵ Dzigo psilo me bnee me lo zho, rëb me:

—Nsin golso zeena choot yquidiede to.

⁶ Sac nzian zha ne grieequia gnë zho zha nac Men ne zëëble diidz cxeel Dios; ni nzian miech ne yquidie zho.

⁷ 'Zeene gon to nêzrii nêzrec noyac dil, ib gdziebde to; sac ible none gac grê min co, ni lëdsew ga. ⁸ Sac garaa csilo grê dillox, grê guiedz nroob laaw tilnie saguiedz nrooba; grê zha ne rnabey grê guiedz nroob, laa zho tilnie sazha rnabey zho. Nêzrii nêzrec csilo gni grê zhodox, nzian zaatne gan miech gbin. Ni lega loxaque mine rsilosew ga, sac nroobraa guielnë ne gan miech lozh ga.

⁹ 'Zeene laa grê ncuaan rii rsilo noyac, ¡nsin golso! Sac hor co laa miech tsiezo to lo zha ne rnabey yadoo, ni lëëque len yadoo ga quin zho to; ziezo zho to lo grê zha non, lo grê zha rnabey, loxaque ne no to xnëz naa. Ga nagon gdeeda diidz gnee to Xtidz naa lo grê zha co, ¹⁰ sac ib none brieets bliaallew lo grëse miech zeene gal dze ne laa guidzliu nitlo. ¹¹ Zeene tsiezo zho to lo wxtis, tso de to zhgab dien pe guiab to lo wxtis; sac Espíritu Sant nac men ne gacniñ to, ni mine csiaab me guic to min co gnee to.

¹² 'Len dze co, zio zha ne lëëque zha tsielo bets zho ladznia zha ne gut zho; zio zha ne lëëque zha tsielo xpëed zho ladznia zha ne gut zho; scaquegaa mëëda, zio zha ne lëëque zha gut pxoz zho, lëëque zha gut xniaa zho. ¹³ Ible gandzed miech to, grëse zho glëe lo to sacne rliladz to naa; per scagaa, grëse zha ne dziits so haxta lozh grê guielnë co, ible scaania Dios zho.

¹⁴ 'Zeene gan to laa ncuaane ziaad gnitlo zo zaatne rieguiald sow, zigne bzeet profet Daniel (zha ne glaba, none guien zho zha naca), hor co golguib dien zha xoon to. Zha ne no grëraa guiedz ne ngab Judé, none tsie zho dan, ga tsietsolan zho. ¹⁵ Zha ne no glaa guic yu, none lëëléd xoon zho, ib guiabd zho sëëb zho len yu tsiebee zho ncuaane nacchen zho. ¹⁶ Zha ne zogaa dana, ib gund zho ne laa zho tsie ro lidz zho tsiexi zho xab zho. ¹⁷ ¡Prob grê men wnaa ne lëëtaque len dze co zoney xpëed, men ne quianiegaa

mëdyeen ne bii radz! ¹⁸ Golnab lo Dios gande to guielnë co len mëe ne rac nal, sac ne nligaa guielnë nrooba. ¹⁹ Wlal ne biaan guidzliu haxta lo nadze, gard gan miech tib guielnëdox sca, ni gdzindragaa dze ne gan zhow stib. ²⁰ Telne csaan Dios nroob dze gac guielnë co, ni stib miech rii guiaanndraa; per na por grë zha ne bzooblo me sëëb xnëz me, gdeete me diidz gaca nroob dze.

²¹ Len dze co, tel cho zha gnë lo to: “Golwi ganle, lëe men rii nac Men ne nole diidz ga cxeel Dios”, gnëgaa zho: “Golwi nec ganle, lëe me i”, gliladzde tow. ²² Sac ndal grë zha ne greequia guiaadquidie miech, no zho gnë zha nac men co, nogaa zho gnë zha ziadteed Xtiidz Dios lo miech; ni zun zho grë milagr parne yquidie zho miech, parne yquidie zho haxta grë zha ne ngable lo Dios. ²³ ¡Nsin sca golso! Ib cxende to, benque laa naa nilew lo to.

Ziaad Jesús stib

(Mt. 24:29-35, 42, 44; Lc. 21:25-36)

²⁴ Zeene lozhse gan miech grë guielnëdox co, laa lo ngbidz ycow, gziinidraa mëe. ²⁵ Grë mel ne ndziib gbaa, laa ma gliaal; grëraa ncuaane no gbaa, masaque nëzrii nëzrec gaca. ²⁶ Horco bii zan zho ganle, zeene laa Men ne pxeel Dios ziad-zëëb glaa lo xcow con grë guielndzon con grë poder ne rap me. ²⁷ Lozh ga laa me gnabey grë xanj me, tsie zho tsietop zho grëse zha ne ngab lo me, niicle zaatne mazdraa zit lo guidzliuw, mazdragaa zit gbaaw.

²⁸ Golzoob cuidad zha nac yag guigw. Led nanle to ganle, zeene laa grë zhicwa racnieen, ni rsilo rdzib zhiblaga, gase rlu ne laa mëe nëëg ziaadgaxle. ²⁹ Scaquegaa nagon, zeene gan to laa grë mine rne naa lo to nu rsilo noyac, dzigo nanle to lëe dze co ziaadyoble. ³⁰ Gneli naa lo to ganle, nzian miech ne mban niina bii zan zho zeene laa grë ncuaan co csilo gac; sac ible ncuaane gaca. ³¹ Zdzin dze nitlo gbaa, nitlo guidzliu, sanque mine rne naa lo to nu, nitloda, ible laaw none gac. ³² Lëëraasi choot nand dien pa dzew, dien pa horgaaw, per ni grë anjl ne no gbaa, per ni naa nanda; loxaque Pxoze naa nana. ³³ Gacxe waa, nsin golso, golnab lo Dios; sac gon nande to dien pa hora.

³⁴ Nac cuent rii zig nac tib zha ne rriece zie tib guiedz zit. Zeene laa zho rriece, rсанse zho diidz dien pe gun tib tib moz ne guiaan ro lidz zho, ni rso zho diidz lo zha ne rquianap ro puert nsin so zho, ib gaguiesd zho. ³⁵ Scadaa to nagon nsin golso, sac zig bizhuan yu co scaquegaa naa nande to pa hor guial naa, yase glanso naa tib bdze dze, tib grol guieel, wxingaa horne rcuedz gall, o ziaadyunmbegaa liu. ³⁶ Nsin golso, zeena ine zobna to zeene laa naa glanso. ³⁷ Mine rne naa lo to nu, laaw rne naa par grëse miech.

14

Bnediud zho dien zha gnaaz zho Jesús *(Mt. 26:1-5; Lc. 22:1-2; Jn. 11:45-53)*

¹ Schop ngbidz runfalt csilo lni Pascw, lni ne row zho guietxtil ne riotsd ncobi; grë pxoz nroob ni grë maistr ley, laa zho noguib dien zha ngueetsse gnaaz zho Jesús gut zho me, ² rnee zho:

—Laa me no yгаа, per lëëraasi gnaazd ne me mer dze lni, sac miech guizhiu ne ndxie lo lni dze co; zrieequia nzian zha ne glisquiw.

Pchoob tib wnaa nceit nex guic Jesús *(Mt. 26:6-16; Lc. 22:3-6; Jn. 12:1-8)*

³ Len dze co, laa Jesús no guiedz Betain. Lëëtaaque laa me no mezh lidz Simón ne blan guiedz lepr; zeene bdzin tib wnaa bdzinne tiblo nceit nex, nosew tib len ncuaan win niaa niapse quie rbebni, tiblo nceit niazha. Dzigo blë wnaa co ncuaan win co, blozh ga pchoob me nceit co guic Jesús.

⁴ Blalaa zha ne zobgrë Jesús ga, zeene gon zho sca been wnaa co, blëe zho, rëb zho:

—¿Pa rieguala squi pxin zhlë wnaa qui nceit qui? ⁵ Telne niaca mine ndow, nguizhpaa zhow tson gayoo pes plat, nquinpaa dimi co ngaaza lo grë zha mban ne guiend pe yquiin.

Laa zho nolisquiw lo wnaa co, ⁶ dzigo rëbchaa Jesús lo zho:

—Golsaan me. ¿Pe nacne rlisqui tow lo me? Led lega pxind mew, tib guielnzaac nroob i been me lo naa. ⁷ Telne nli rquia zdoo to zha ne guiend pe yquiin, zac ygad to lo zho stib dze, sac tibaque ran to zho; sanque naa dzin dze ne gbiche naa lo to,

gan₁draa to naa. ⁸ Laa wnaa qui been₁ mine brieelo lo me, laa me pchoob nceit nex rii guic naa zeena nzhixcuaale xcuerp naa gal₁ dze ne laa naa ygueets. ⁹ Gneli naa lo to gan₁le, dipse lo guidzliu zaatne cseedtaa miech Xtiidz Dios, ible soladz zho wnaa rii, seet zho mine been₁ me nu.

¹⁰ Lo gza tsiipchop zha ne nac xpëedscuel Jesús ga, brie zha ne lë Judas Iscariot güeyzodiidznie Judas grë zha ne nac pxoz nroob, rëb Judas laa Judas gun₁ me ntregar. ¹¹ Zeene bin zhow, per nli rley zho ni rëb zho zdeed zho dimi lo Judas. Dzigo psilo Judas noguib Judas dien₁ pa hor gdeeda diidz gun₁ Judas me ntregar.

Dowxtseenie Jesús xpëedscuel me
(Mt. 26:17-29; Lc. 22:7-23; Jn. 13:21-30; 1 Co. 11:23-26)

¹² Mer dze ne rsilo lni Pascw, dze ne rowxtsee zho tib carner, ni rsilo zho row zho quietxtil ne rquiad ncobi lad, dze co bnabdiidz xpëedscuel Jesús dien₁ pa lo racladz me tsiegun₁lo zho ncuane gowxtseenie me zho wdze co. ¹³ Dzigo pxeel me chop zho Jerusalén, rëb me lo zho: —Goltsie Jerusalén. Ga gan₁ to tib mgui nzobyan₁ tib re nis, dzigo goltsienal₁ zhits me. ¹⁴ Yu ne gan₁ to sëeb me, golguiab lo bizhuan yu co: “Znu në maestro: ¿Pa len₁ yu me gneedz luu gac zaatne gowxtseenie me xpëedscuel me wdze rii?” ¹⁵ Dzigo ga glu me tib len₁ yu nroob ne riaan₁ glaa, nzhixcuaale len₁, grële ncuane yquiin no ga; dzigo ga golgun₁lo zhixtsee ne.

¹⁶ Laa grop zha co brie zha zie. Bdziñ zho lad guiedz Jerusalén, nligaa laa zho bdziel yu co zigne rëbse me lo zho ga, dzigo psilo zho been₁lo zho xtsee co.

¹⁷ Bdze dzew, laa me bdziñ len₁ yu co grë xpëedscuel me.

¹⁸ Laa me no mezh noyownie me zho, zeene rëb me lo zho:

—Laa naa gni lo to gan₁le, lëeque tib zha ne gon₁ noyownie naa nu tsielo naa ladznia zha ne gut naa.

¹⁹ Zeene bin zho sca rëb me, mban rac zho, dzigo psilo zho tibga tibga zho rnabdiidz lo me, rnee zho:

—¿Pe naaw?

²⁰ Pquiab me rëb me lo zho:

—Ladaque to no zho, zha ne nosëeb xcuun₁ len₁ xquien naa, lëe zho ga. ²¹ Naa ne nac naa Men₁ ne pxeel Dios, niina laa miech gut naa zigne raquietsew lo Xtiidz Dios; per, ¿probsaxe zha ne tsielo naa ladznia zho! ¿Mazd wen nie zho, ib niacd zho miech lo guidzliu!

²² Laa zho noyow zeene bzhen₁ Jesús tib quietxtil, bdeed me xquizh lo Dios, blozh ga beengrol₁ mew dzigo bdiiz mew lo zho, ni rëb me:

—Golquiina, lëe xcuerp naa i gon₁.

²³ Ni bzhen₁ me tib cop nroob vin, bdeed me xquizh lo Dios, blozhse bdeed me xquizh, dzigo bdeed me cop co lo zho, grëse zho go vin co. ²⁴ Ni rëb me lo zho:

—Lëe xchen naa i, mine gzhiee par grëse miech ne sëeb xnëz Dios, sac lëe stib mod cub nu psan₁ Dios parne sëeb miech xnëz me. ²⁵ Lëe lultm vuilt nu guie naa vin rii, sac zhaale stib vin cub ne guie naa zeene laa naa gdziñ zaatne rnabey Pxoz naa.

Dzigo psilo me biil₁ me bla salm gza me zho.

Bzeet Jesús zha gun₁ Pedr

(Mt. 26:30-35; Lc. 22:31-34; Jn. 13:36-38)

²⁶ Blozhse biil₁nie me Dios grë me zho, dzigo laa me brieenie zho ga zienie me zho nëz Gui Oliv.

²⁷ —Ible saan to naa nawdze rii —rëb me lo zho—, sac scale ziaad lo Xtiidz Dios zaatne rnee: “Zdeed Dios diidz csiwee zho baxtor, lozh ga nëzrii nëzrec gliaal₁ mëcwxiil.” ²⁸ Sca gun₁ zho naa, per zeene laa naa grieegan glole naa ga Galilé, ga cuëz naa to.

²⁹ Dzigo rëbchaa Pedr lo me:

—Niicle tel₁ne saan grë zha qui luu, sangue naa gon₁ csaand naa luu.

³⁰ Pquiab me rëb me lo Pedr:

—Gneli naa lo luu gan₁le, guieel riigazh, gardle grop gall tson₁le vuilt rëb luu runbeyd luu naa.

³¹ Per tibaque nac xtiidz Pedr, rnee Pedr lo me:

—Niicle tel₁ zaatne guet luu guet naa, per gunscad naa. ¿Pe nacne guiep naa runbeyd naa luu?

Scaque rnee grëraa zho.

Bzodiidznie Jesús Pxoz me Getsemani

(Mt. 26:36-46; Lc. 22:39-46)

³² Bdzin Jesús zaatne lë Getsemaní gza me zho, dzigo rëbcha me lo zho:

—Nuse nagon gol sob, laa naa ga gazodidznie naa P xoz naa.

³³ Horco psilo mban rac zdoo me, ri-abguielnë me, dzigo bredz me Pedr, Jacob ni Juan, bzënie me zho palal ³⁴ dzigo rëbcha me lo zho:

—Mban rac zdoo naa, zootle zig zet naa lo guielnë rii. Nuse nagon golguiaan, per gol sobna.

³⁵ Bzë me spalal, dzigo pquitsgzhib me haxta bdzin lo me lo liu; psilo me bnab me lo Dios ne telne zrieelow mazd tete me grë guielnë ne no gan me, ³⁶ rëbcha me:

—¡Papá, par luu grëse cos zrieelo gun luuw! ¡Bzhiguiel psilaa naa lo guielnë rii! Per telne grieloda, minë gnëtaa luu, sca gaca.

³⁷ Zeene biire me bdzin me zaatne biaan gza tson zha co, gon me gzase zho nixguies; dzigo rëbcha me lo Pedr:

—Simón, ¿nixguies luu lëë? ¿Pe ni palal blëëbd luu nzobna luu? ³⁸ Gol sobna, gol nab lo Dios zeena yquild mendox to. Niicle ne squi lëbdraa xcuerp to sobna to, per gol nab lo Dios, sac gon min co nac minë racladz zhiespiritu to.

³⁹ Dzigo biire güey me stib, güeyzodiidznie me Dios; scaque minë bnab me glo mincoque bnab me stib. ⁴⁰ Zeene bdzin me lo zho, gon me laa zho bii nixguies. Ni rdziel zho pe guiab zho lo me.

⁴¹ Laa zeene goc tson vuelt biire me güeynab me lo Dios, rëbcha me lo zho:

—Lëew nagon, zacle na gaguies to, zacle gdziiladz to. Naa ne nac naa Men ne pxeel Dios, naataa laa hor bdzin zeene laa grë miech ntseeb rii guiadnaaz naa. ⁴² Goltsieso, zeena zio ne; sac gon laa zha ne glu naa lo zho ziaadle nu.

Bnaaz zho Jesús

(Mt. 26:47-56; Lc. 22:47-53; Jn. 18:2-11)

⁴³ Laa Jesús bii quianeeque, zeene laa Judas (tib zha ne nac xpëedscuel me) bdzin, bdzinie Judas tib dzoon zha ne pxeel grë pxoz ne rnabey, grë maistr ley ni grë zha non lo menquiedz Israel. No zho nzhen spad, nogaa zho nzhen yag. ⁴⁴ Biaaniele

Judas zho diidz zha glu Judas cho nac Jesús, rëb Judas lo zho:

—Nanle to gon, zha ne gow naa bzhid cuas, lëë me ga; ligier gol so golxen me, ib csaande to xoon me.

⁴⁵ Nligaaw, zigne bdzin Judas bredz Judas Jesús; blozh ga dow Judas bzhid cuas me. ⁴⁶ Horco wbig grë zha ne zienal zhits Judas ga bzhen zho me. ⁴⁷ Lo grë zha ne nacgza Jesús ga, hor co biasaque tib zho bdoz zho zhispad zho pchug zho tib diag xmoz men ne nac pxoz nroob.

⁴⁸ Dzigo rëbcha Jesús lo grë miech co:

—¿Niacxe naa cho ngbaan, zha nac ne squitaa nzhen to spad, nzhen to yag ziadnaaz to naa? ⁴⁹ Blactaa dze name gon to noseed naa miech len yadoo, ¿pe nacne bnaazde to naa ga? Per ible laa grë ncuuan rii gon noyac zeena gac grë minë raquiet lo Xtiidz Dios.

⁵⁰ Grë zha ne nac xpëedscuel me ga, grëse zho bzhoon, tipse me psan zho ga. ⁵¹ Tibaque mgui nguieg bii güeynal zhits me, tib lëse lar nquits mbix mgui; dzigo bnaaz zho mgui gocladz zho ye mgui nie-nie zho; ⁵² per znuse brie mgui len lar co, bzhoon mgui coletse mgui.

Güeynie zho Jesús lo zhiwxtis zha Israel

(Mt. 26:57-68; Lc. 22:54-55, 63-71; Jn. 18:12-14, 19-24)

⁵³ Ga brieenie zho Jesús bdzinie zho me lidz men ne nac pxoz nroob. Grë pxoz rnabey, grë zha ne rnabey lo maistr ley ni grë zha non lo menquiedz, laa zho pcaalsa ga.

⁵⁴ Ye Pedr, maase zit zit nal Pedr laa Pedr bdzin xley men co. Bdzin Pedr, güeysobga Pedr lo grë zha ne ndxienap, lëëtaque laa zho quiadzëë lo gui.

⁵⁵ Grë pxoz co, grë zha ne nac zhiwxtis zha Israel, laa zho ndxie nëz len yu co, quiaguib zho dien pe yquiaaqui zho gnab zho guet Jesús, quiaguib zho dien pe dol ne ycaadz zho me; per rdziel zho dien pew. ⁵⁶ Nzian zha ne pquidie rëb zho znu znu nac ncuane noyun me, per rrieequiad xtiidz zho; sac zhaase zhaase rnee zho. ⁵⁷ Tibaque zeene guso blalaa zho, bnexuu zho rëb zho:

58 —Bdzion no gon rëb me laa me ctixche yadoo, lozh ga tsonaque ngbidz gzaalo me stiba; per led miechdraa nzaaw.

59 Niicle scaw, rzëdaque xtiidz zho tipse.

60 Dzigo hor co bzoli men ne nac pxoz nroob, bzo me glowtaa lo grë miech co, bnaabdiidz me lo Jesús rëb me:

—¿Pe nacne rquiabd luu? ¡Diidzli dzigo lëe nac grë mine rnee zho i!

61 Dzese zo Jesús ib rquiabd me. Biireque men co bnaabdiidz me stib rëb me:

—¿Nligaa cho nac luu? Bnë tel nli Xpëed Dios nac luu, Men ne nacle diidz ga cxeel me lo guidzliu.

62 Dzigo pquiab Jesús rëb me:

—Nliw, naa nac men co. Naa ne nac naa Men ne pxeel Dios, bii zan to ganle zeene laa naa zoob cue Dios nëz derech, ni zeene laa naa guieet gbaa zialzëeb naa lo xcow.

63 Horco ptsiez pxoz nroob co xab me, sac blëe me bin me sca rëb Jesús.

—¿Pe mazdraa textigw ne racladz ne? —rëb me—, 64 laa to binle ganle zha rzëtaa xtiidz me noguitnie me Dios. ¿Pe gnë to na zha gac me?

Grëse zho pquiab rëb zho, ib rieguiala guet me.

65 Dzigo hor co blalaa zho laa zho psilo notsuc lo me. Pxidoo zho lo me ni rdeed puñet zho me, lozh ga rnee zho:

—Bnë dien, ¿cho ga bdiñ luu?

Ye grë zha ne quianap ga, rgap zho lo me.

Rëb Pedr runbeyd Pedr Jesús

(Mt. 26:69-75; Lc. 22:56-62; Jn. 18:15-18, 25-29)

66 Laa Pedr bii zoque ley. Ga zo Pedr, zeene laa tib wnaa ne nac zhicriad men rnabey co bdzin; 67 gon me laa Pedr zob gax lo gui nodzëe Pedr. Dze rwi me lo Pedr, tibaque zeene rëb me:

—¿Ye luu lëe rzënie Jesús, men Nazaret ne bdzinie zho i?

68 Per bneelid Pedr.

—Dieen pe rool luu —rëb Pedr—. Runbeyd naa men co.

Brieega Pedr zie Pedr nëz ro zawan, lëetaque hor co pcuedz tib gall. 69 Dzeque rwi wnaa co lo Pedr, dzigo rëbcha me lo grë zha ne ndxie ga:

—¡Lëew, zha ne rzënie me nac mgui qui!

70 Biire Pedr rëb Pedr runbeyd Pedr me. Wdzeepaa goca, biire zha ne ndxie ga rëb zho lo Pedr:

—Ne nligaa, ye luu rzënie men co. ¡Zha Galilé name nac luu!

71 Dzigo psilo Pedr rzeet Pedr Dios rnee Pedr runbeyd Pedr Jesús, haxta rnee Pedr:

—¡Dios zobwi ganle, telne rned naa diidzli, maase cuibdee naa!

72 Lëetaaque hor co laa gall pcuedz stib. Dzigoraa psoladz Pedr xtiidz Jesús zeen rëb me lo Pedr: “Gardle grop gall, tsonle vuelt rëb luu runbeyd luu naa.” Dzigo mbanse rac Pedr, psilo Pedr biin Pedr guielne co.

15

Güeynie zho Jesús lo Pilat

(Mt. 27:1-2, 11-14; Lc. 23:1-5; Jn. 18:28-38)

1 Ziadyiinile liuw, scase bii nchool r naw, wbiire pcaalsa grë pxoz non grë zho zha ne rnabey lo maistr ley, grë zha non lo menquiedz ni grë zha ne nac zhiwxtis zho. Blozhse bnediiz zho, laa zho pxidoo Jesús güeysan zho me lo Pilat men ne nac gober-nador.

2 Bdzin me lo Pilat, bnaabdiidz Pilat rëb Pilat lo me:

—¿Pe nli na luu nac zhirey zha Israel?

Pquiab me rëb me:

—Nliw.

3 Tibaque quia grë zha ne nac pxoz non, rzadraa grë ncuaane rcaadz zho me.

4 Nacne wbiire Pilat bnaabdiidz Pilat lo me, rëb Pilat:

—¿Pe nacne rquiabd luu? Bui ganle zha nactaa grë ncuaane rcaadzdoñ zho luu.

5 Bzee zdoo Pilat gon Pilat ible pquiabd me.

Bnab zho guet Jesús

(Mt. 27:15-31; Lc. 23:13-25; Jn. 18:38-19:16)

6 Gzobse lni Pascw rsilaa Pilat tib zha ne no ladzguiib, tel cho zha ne gnabtaa menquiedz laa. 7 Len dze co no tib mgui

lë Barrabás ladzguiib, ni zla zha ntseeb ne nacgza me, laa zho no ga sac nzian zha ne beet zho zeene gocntseeb zho lo gobiern.

8 Nacne psilo grë miech co, rnab zho lo Pilat csilaa Pilat tib zha ne no ladzguiib zigne runtaque Pilat grëraa iz.

9 Dzigo bnaabdiidz Pilat lo zho, rëb Pilat:

—¿Cho racladz to csilaa naa? ¿Pe silaa naa men ne rnee zho zhirey to nu?

¹⁰ Sca rëb Pilat lo zho, sac nanle me niapse por rlëë grë pxoz non co ran zho Jesús gane bnabey zho bgaa me güeysan zho me ga. ¹¹ Per lel psilo grë miech co rnab zho csilaa Pilat Barrabás; ni lëëque grë pxoz co pquuil zho. ¹² Dzigo rëb Pilat lo zho:

—¿Zha dzigo racladz to gac men rnee zho zhirey to nu?

¹³ Pquiab be grë miech co, roptsie zho rnee zho:

—¡Bnabey yquia me lo cruz!

¹⁴ —¿Pe nac falt ne been me? —rëb Pilat—. ¿Pe nacne racladz to yquia me lo cruz?

Biire zho roptsie zho rnee zho:

—¡Bnabey yquia me lo cruz!

¹⁵ Goñ Pilat zha rac zho ni racladzaque me guianziuu me lo zho, nacne mazd bzoob me xtiidz zho, bnabey me blaa Barrabás; laa Jesús, blozhse bnabey me bdiñ zho Jesús laa me been Jesús ntregar lo grë menguiib ne tsiequiaa me lo cruz.

¹⁶ Biire grë menguiib co bzëëbnie zho Jesús nëz len yulow, ga pcaalsa grëraa menguiib ne nacgrë zho. ¹⁷ Psilo zho rguitnie zho me, bgacw zho me tib lar morad zig rna lar ne racw grë rey, ni bzieecw zho bla lë yag guiets bzoob zhow guic me, zig rzob coron guic grë rey. ¹⁸ Dzigo psilo zho nguiedz roptsie zho rnee zho:

—¡Golwi ganle zha ractaa zhirey zha Israel!

¹⁹ Bzhen zho tib goobgui, rdeed zhow guic me, rtsuc zho lo me, rquiaalo zho rquiitsgzhib zho lo me zig rquiitsgzhib zho lo zha non.

Güeyquiaa zho Jesús lo cruz

(Mt. 27:32-44; Lc. 23:26-43; Jn. 19:17-27)

²⁰ Blozhse sca bdziitnie zho me, laa zho blee lar morad ne nacw me ga, biire zho bgacw zho me mine nac xab me; dzigo laa zho brieenie me ga zienie zho me zaatne yquia me lo cruz.

²¹ Nëz zienie zho me, bdzieel zho tib mgui Ciren lë Simón (lëë pxoz Lejandr ga grop Ruf), znu ziaad me wbire me dan. Dzigo bnabey zho me bi me zhicruz Jesús.

²² Zeene bdzinie zho Jesús zaatne lë Gólgota (nac diidz co zig nac ne rnee ne

“Gui Beerguic Ngutoo”); ²³ ga bdeed zho nziu notsa guizh rmed ne lë mirr, nan zho nie mew, per god mew. ²⁴ Dzigo laa zho pquiaa me lo cruz.

Blozhse pquiaa zho me lo cruz, bzhen zho tib xab me pchug zhow, biaan zho tib lëgaw tib tib zho, laa stiba bio zho rif. ²⁵ Zig hor wxeeren ga pquiaa zho me lo cruz.

²⁶ Glaa guic cruz ne pquiaa zho me ga, ga pquiaa zho bla lan diidz zaatne rnee pe nacne sca psacsi zho me, rneew: “LËË MEN RII QUIA NU, PORNE NAC ME ZHIREY ZHA ISRAEL.” ²⁷ Ye chop ngbaan pquiaagza zho me lo cruz, tibga zhicruz zho bzo tib nëz cho zhicruz me. ²⁸ [Ga brieequia mine raquiet lo Xtiidz Dios, zaatne rnee: “Bloo zho me lad zha ntseeb.”]

²⁹ Grë miech ne rded zaatne quia me lo cruz ga, runnguzee zho me, rzhidznie zho me, haxta rdzi guic zho rnee zho lo me:

—¡Pe led rëb luu lëë, laa luu ntsil yadoo ni tsonaque ngbidz nzaalo luuw stib! ³⁰ Nana zho, ipe gacd lëëque luu bla luu lo caxtigw qui, biet lo cruz qui!

³¹ Scasaque grë pxoz non ni grë maistr ley, rzhidznie zho me; rnee zho:

—Stib miech scataa beenguiac me, stib miech scataa bla me, pe nac dzigo rrieelod me gla me me. ³² ¡Telne nli me nac Men ne zëëble diidz ga cxeel Dios, telne nli me nac zhirey ne, niinagazh quiet me lo cruz; zeena gliladz ne me!

Ye zha ne quiagza me lo cruz ga, rbidzgo zho lo me.

Gut Jesús

(Mt. 27:45-56; Lc. 23:44-49; Jn. 19:28-30)

³³ Gol grol dzew, tibaque zeene goc tib ncow dipse lo guidzliu, haxta las tres biao biini stib. ³⁴ Horco nguiedz zëëb tsi Jesús, rnee me:

—¡Eloi, Eloi! ¿Lama sabactani?

(Diidz co nac zig nacne rnee ne: ¡Luuse name nac xDios naa! ¿Pe nacne psaan luu naa?)

³⁵ Grë zha ne ndxie ga, zeene bin zho sca rbedz me, no zho nan Lí, men ne biadteed xtiidz Dios padzeela, men co rbedz me.

³⁶ Dzigo rias tib zho güeygad zho tib lë zhiil lo nziu bla, bzoob zhow tib guic goobgui pquiaa zhow ro me.

—¡Gotsaa csaan —rnee zho—, nu dzian ne dien pe ziaad Lí guiaadlit Lí me lo cruz!

³⁷ Tibaque zeene pquiaa me stib redz nroob, znuse blozh me.

³⁸ Lëëtaaque laa me nolozh, zeene briez nzoli lar nroob ne quia len yadoo, groltaa goca. ³⁹ Gax lo me ga zo men ne rnabey lo grë menquiib co, zeene gon men co zha gut me, rëbchaa me:

—¡Ne nligaa, Xpëed Dios nac men qui!

⁴⁰ Ye blalaa men wnaa güeyso ga, zit zo zho rwi zho; lad co no Marí Magdal, Salomé ni Marí ne nac xniaa Jacob niab grop José. ⁴¹ Nzianlaa nac zho, lëë grë wnaa co been xyudar me len dze ne güeyted me dib xtan zha Galilé; ni zlagaa zha ne güeynal zhits me zeene bdziñ me Jerusalén.

Bgueets Jesús

(Mt. 27:57-61; Lc. 23:50-56; Jn. 19:38-42)

⁴²⁻⁴³ Lëëtaaque dze co nac vispr dze ne rdziiladz zho lo dziin. Zeene laa dze bdzepaa, dzigo güey José (men Arimaté) lo Pilat bnaab me diidzbey tsiequeets me Jesús. Glo zoot me tsied me, per tibaque bloo me tib valor güey me; niicle ne tib zha non nac me lad zhiwxtis zha Israel, ye me quiambëz gdziñ dze ne gnabey Dios.

⁴⁴ Bzee zdoo Pilat zeene bin me laa Jesús gutle. Bnabey me gocredz zha ne rnabey lo menquiib ne quianap Jesús; ⁴⁵ haxta bdziñraa men co rëb nliw, dzigoraa bdeed me diidz tselit José Jesús lo cruz.

⁴⁶ Nacne güey José, güeyysi me tib lë lar nroob. Zeene blozh blit me Jesús lo cruz pchel me Jesús lar co, dzigo güeyxob me me tib len baa ne ndieen tib cho quie. Blozh ga, psodan me tib quie nroob psioog me ro baa co.

⁴⁷ Ga zo Marí Magdal ni Marí xniaa José, gon zho pa lo bgueets me.

16

BRIEEBAN JESUS

(Mt. 28:1-10, 16-20; Lc. 24:1-53; Jn. 20:1-23)

¹ Bdze dze dze ne rdziiladz zho lo dziin, güey Marí Magdal, Salomé, ni Marí xniaa Jacob güeyysi zho grë nceit nex ne tsietëëb zho lad xcuerp Jesús. ² Laa zeene biini liu, dze ne rzobni zhmäl, silgaw loxaque

ziaadlan ngbidza laa gza wnaa co brieë laa zho zie ro baan Jesús.

³ Nëz no zho, rnabdiidzlsa zho dien zha gdiob quie nroob ne nioog ro baa, cho siguiel coba. ⁴ Ni zeene bdziñ zho, gon zho laa quie co bdiooble.

⁵ Laa zho bzëëb len baa, zeene gon zho nëz derech laa tib mgui nguieg zob ga, nacw me tib lar nool, dib nquitsbiese rna lar co. Bdzieb zho gon zho me; ⁶ dzigo rëbchaa me lo zho:

—Gdziebde to. ¿Jesús lëë, men Nazaret ne pquiaa zho lo cruz, men co ziaadguib to? Guiendle me nu, ¡laa me brieëbanle! Golwi ganle nu nac zaatne pxob zho me. ⁷ Goltsie, golguiab lo Pedr ni lo grëraa xpëëdsuel me tsie zho Galilé, ga tsiedzieel zho me zigne rëble me lo zho glo.

⁸ Rias gza wnaa co laa zho brieë ga, masaque rzhidz zho rdzieb zho. Lo dzeb co ni par gnee zho gacd.

⁹ [Dze ne rzobni zhmäl ga, sil co brieëban Jesús, ni Marí Magdal nac zha ne glopaa gon me; lëë Marí co ga beenguiaac me zeene benxoon me gadz mendox ne nosacsi Marí. ¹⁰ Dzigo güey Marí güeynie Marí diidz lo grë zha ne bzënie me ga. Lëëtaaque laa zho ndxie mban rac zho, roon zho no zho xquielnë me. ¹¹ Niicle bin zho rëb Marí laa me brieëbanle, gon lo Marí me; per bliladz zhow.

¹² Bded ga, brieëquia me lo schop xpëëdsuel me lëëtaaque no zho nëz zie zho dan. ¹³ Dzigo güey zho güeynie zho diidz lo grëraa zha ne nacgza zho; per niicle xtiidz grop zha co bliladz zho.

¹⁴ Laa stibtaa vult, lëëtaaque ndziib zho lo mezh no zho wagw gza tsiptib zho, tibaque zeene laa me brieëquia; dzigo goc-tox me lo zho sac gon me ib bliladz zho xtiidz me; ni gon me scataa nad zdoo zho, sac niicle güey zha ne gon me güeynie zho diidz ne nli brieëban me, ni bliladz zhow.

¹⁵ Ni rëb me lo zho:

—Goltsie dipse lo guidzliu, goltsieseed miech Xtiidz Ndzon Dios. ¹⁶ Grëse zha ne dib zdoo gliladza ni chobnis zho, scaania Dios zho; sangue zha ne gliladzda, laa zho bnitlole ga. ¹⁷⁻¹⁸ Grë zha ne sca dib zdoo gliladz naa: znee zho stib diidz ne rneed

zho. Niicle xen zho grë meel ntseeb, con-
cuaangaa miech zho, ib peet gacd zho. Ni
zeene cxobnia zho guic grë men rzacnë,
zunguiac zho zho; grë mendox ne noguitnie
miech, zeene gzeet zho lë naa zuncxooñ zho
ma.

¹⁹ Blozhse sca bnee me lo zho, laa me zey
gbaa bzob me cue Dios nëz derech.

²⁰ Dzigo grëse xpëëdscuel me laa zho
briee, briets bliaal zho zieseet zho miech
Xtiidz Dios. Ni me nac men ne noyacniñ
zho run zho grë milagr nroob, zeena glu ne
nli Xtiidz me nac miñe noseet zho miech.]

XTIIDZ NDZON DIOS MINE PQUIAA LUC

¡Diuzh Tiofl!

¹ Nanle luu ganle, nole bla zha ne bioxco pquiaa zho grë ncuaane goc zeene biaad Jesús men ne pxeel Dios ga. ² Ncuaane nlipaa goca, grë ncuaane pquiaa zho ga, laaw pquiaa zho zigne rzodiidzse miecha len dze rii, zigne rzodiidzsegaa zha ne bzëniepaa mew, zha ne pso me noneew lo miech.

³ Yeque naa pquiaa naa wen wen bnabdiidz naa, bleeni naa diidz grëse dien zha psilo grë ncuaan co; ni niina laa naa rquiaw zigne gocsew laaw rxel naa lo luu. Sac rien naa ib nonguiela gacnan luuw; ⁴ zeena lozh gacnan luu zha nac diidzli rii, wseed ne blu zho lo luu i.

⁵ Len dze ne nac Herod rey rnabey me dib xtan zha Judé, len dze co no tib pxoz lë Zacarí, me nac tib zha ne nacgrë “Zha Abí”. Niicle tsiel mew, zha xti pxoz Aarón ziaad wnaa co, lë me Lisabet.

⁶ Zigtaa Zacaríw, zigtaa Lisabeta, noxco me mine rnabey Dios, mban mew zigne naca, ni tib xley Dios rguiitsd me. ⁷ Men gol-le nac me grop me, per ni tib mëed quianied me, sac niaad Lisabet gapd me mëed.

⁸ Laa tib dzew bgaa grë zha ne nacgrë Zacarí gun zho dziin len yadoo. ⁹ Nac xcostumbr grë zha ne nac pxoz, rio zho tib rif dien chopaa ygaa tsielaadz goxyaal len yadoo, dzigo bgaa Zacarí. ¹⁰ Goxyaal co no laadz me len yadoo, laa grë miech ne ndxie nëz ley nonabgaa lo Dios, ¹¹ tibaque zeene briequia tib xanjl Dios bzo cue pcoog nëz derech, zaatne nozëeg me yaal ga. ¹² Zeene gon me anjl co bdzieb me, rdzieldraa me zha gun me lo dzeb co. ¹³ Dzigo rëb anjl co lo me:

—¡Gdziebd luu! Diidzse zialnie naa lo luu, gacnan luu ganle mine bnab luu lo Dios ga, pquiaadiag mew; gane niina laa tsiel luu gap tib mëedbgui. Zeene gal win, Juan cueelë to win. ¹⁴ Tib guiebley nroob gac win lo to, niicle lo grëragaa miecha,

¹⁵ sac tib men nziuu gac win lo Dios. Zeene gac win zha broob, ni tib ro nziu guied win, per ni vin yquiaarod win; ansraa gal win, laa Espíritu Sant nacniele win. ¹⁶ Win gac men ne co guic nzian grë zha Israel, gbiire gbig zho lo Dios, men ne rnabey zho. ¹⁷ Zigne goc Lí, men ne biaad pteed xtiidz me padzeela, sca gac win tedner win lo me, nroob poder ne gap win. Win gnee lo grë miech rii, gbiire gleyne zho me zigne goc xmenjol zho zha ne bleynie me; csaan zho grë xquielntseeb zho, gban zho zigne racladz me; zeena niowse gac zho ycaania zho me.

¹⁸ Pquiab Zacarí rëb Zacarí lo anjl co:

—¡Ncuaane gacd i gon rnee luu! Zigtaa naaw, zigtaa tsiel naaw, menjol-le nac no.

¹⁹ Rëbchaa anjl co:

—Bien ganle anjl Gabriel nu quianee lo luu, anjl ne tibaque zo lo Dios. Me pxeel naa zialnie naa diidz rii. ²⁰ Per ne squi riladzd luuw, na laa luu guiaan ngop, haxta gal dze ne gac mine rne naa lo luu nu, dze co glan xtiidz luu stib.

²¹ Grë miech ne ndxie quianab lo Dios ga, quiambëz zho Zacarí, rnabdiidzlsa zho pe goc me, sac ran zho rried me zaatne ziezëeg me yaal ga. ²² Zeene brie me, gon zho gacdraa gnee me, dzigo bien zho no pe blu Dios lo me ga. Tel pe racladz me gnee me, niapse señ rlu me.

²³ Bzase dze ne been me dziin len yadoo, dzigo laa me zey lidz me. ²⁴ Goca bla ngbidz, laa mëed co pquialo zdoo tsiel me.

Dipse len gaay mëe bio zhuz co ro yu, ib bried me, rley me rnee me:

²⁵ —¡Zha wentaa Dios, bneedz me diidz bdzin dze yquianie naa mëed rii, zeena gzhidzniedraa miech naa!

Güeynie tib anjl diidz laa Jesús gac mëed

²⁶ Goc xoop mëe zoney Lisabet mëed, pxeel Dios anjl co stib güey me Nazaret, guiedz ne ndxie xtan zha Galilé. ²⁷ Ga no tib ndzoop nguieg lë Marí, len dze co no xtiidz ndzoop co ctsieelnia ndzoop tib zha xti rey David, lë José. ²⁸ Bdzin anjl co zaatne no ndzoop, pquiaabdiuzh me ndzoop, rëb me:

—¡Dichos luu gon, sac tib zha nziuu nac luu lo Dios! Me quianap luu.

²⁹ Zeene gon Marí anjl co, ni gon Marí zha rnee me, bzee zdoo Marí, riend Marí dien pe nac scataa rzë xtiidz me. ³⁰ Dzigo rëbchaa me lo Marí:

—¡Gdziebd luu! Laa Dios gon bzooblo luu ygaa luu tib guielnzaac nroob. ³¹ Zdoo luu yquiaalo tib mëëdbgui, zeene laa win gal, JESUS cueelë luu win. ³² Tib men nroob gac win, zien miech ganle Xpëed Dios ro ne no gbaa nac win; ni so me win gnabey win zig bnabey xmengol win David. ³³ Win gnabey lo grëse zha Israel, ni gdzind dze ne lozh xquielrnabey win.

³⁴ Pquiab Marí rëb Marí lo anjl co:

—¿Mëed ye? ¿Per zha grieelo gap naa mëed, ni tib naa zo nu?

³⁵ Rëbchaa anjl co:

—Niapse por poder ne rap Dios gac min co. Zeene laa Espíritu Sant guiaad gacnie luu, hor co laa poder co gacnie luu, laa mëed co yquiaalo zdoo luu; gacxe waa Xpëed Dios gunbey miech win, mine rnabey Dios min co gun win. ³⁶ Ye belyeen luu Lisabet, niina lo guielgol-le laa tib mëed pquialo zdoo me; zëeb diidz ib grieelod gap me mëed, per na racle xoop mëe zoney me mëed, ³⁷ sac par Dios tsod ncuaane grieelod gac.

³⁸ Dzigo rëb Marí:

—Tel scaw, mine rnee luu i, maase gaca. Laa naa zo nu par gun naa mine gnabeytaa Dios naa.

Blozhse ga, laa anjl co zey.

Güeygan Marí Lisabet

³⁹⁻⁴⁰ Goc bla dzew, brieë Marí ga zie me ziegan me Lisabet tib guiedz win ne ndxie gui glaa ne nac xtan zha Judé. ⁴¹ Bdziñ me, wbig me pquiaabdiuzh me Lisabet. Bdiuzh co bnee me, zeene biasoli xpëed Lisabet zdoo Lisabet; dzigo hor co bdeed Espíritu Sant guielbiini lo Lisabet, ⁴² nguiedz bnee Lisabet rëb me lo Marí:

—¡Dichos luu Marí bгаа luu guielnzaac qui! Sac gon, lo grëraa no nac no men wnaa, luu bzooblo Dios. Mëed ne zoney luu i, zha nziuu nac win lo me. ⁴³ ¡ib guiaanladz naa dze rii, znu biaad luu nac luu xniaa men ne rnabey naa, biaadgan luu naa! ⁴⁴ Haxta mëed ne zoney naa nu, rley win biasoli win zdoo naa, zeene pquiaabdiuzh

luu naa. ⁴⁵ ¡Dichos luu, bin luu mine në Dios, ni bliladz luu zun mew!

⁴⁶ Dzigo hor co bnee Marí rëb me:

¡Men nroob nac Dios! ¡Gdib zdoo naa roolnie naa me!

⁴⁷⁻⁴⁸ Rleynie naa me nac me men ne psilaa naa,

sac gon niicle peet nond naa, tib ngundziin winse nac naa lo me,

per laa me bzooblo naa.

Grë miech, zigtaa len dze riiw, zigtaa len dze ne ziaadragaaw,

ziab zho naa nac tib wnaa ne mazdraa dichos.

⁴⁹ Ne nligaa zha nactaa guielnzaac rii bneedz me lo naa.

Men ro, men nroob nac me, ¡guiendraa cho zig me!

⁵⁰ Grëse miecha, zha ne rioxco rquiaadiag mine rnabey me,

tibaque racnie me zho, ib rsaand me zho.

⁵¹ ¡Golwi ganle zha nactaa grë ncuaane run me!

Grë ncuaane no guic zha niats gun zho, bnitlo mew,

⁵² ptiche me grë zha ne zob rnabey.

Laa grë zha ndooladz, zha ne rzac miech peet nond,

beennon me zho.

⁵³ Grë zha mban ne guiend pe yquini, nroob guielnzaac ne bdeed me lo zho,

laa grë zha ne rapchen, scase bzonëz me zho.

⁵⁴ ¡Pe zhidaa ziyacnie me grë zha ne nac xtii Israel, men gol ne goc zig tib ngundziin lo me ga! ¡Tibaque rlu me rleynie me zho!

⁵⁵ Ib biaanladz me xtiidz me mine bnee me lo pxozgol ne Abraham,

zeene rëb me gdzind dze ne csaan me Abraham, ni grëraa zha ne grieequia lo

xtii Abraham.

⁵⁶ Maase tson mëë biaan Marí ga blëz me lo Lisabet, dzigora wbi me ga bdziñ me lidz me stib.

Gol xpëed Lisabet

⁵⁷ Bdziñ dzew, laa xpëed Lisabet bza mëë, laa me gop win. ⁵⁸ Grë zha ne no gax lidz me, grë zha ne nac menlidz me, zeene bin zho scataa pquia zdoo Dios me bdeed Dios mëed co lo me, rley zho güeygan zho me.

⁵⁹ Dze ne goc mēēdbgui yeen co xon ngbidz, blalaa zha ne güeynal zhits pxoz win, zhits xniaa win güeynie zho win bio win bey ne rio xpēēdbgui zha Israel, parne glu lo Dios ngab win. Tibaque nan zho Zacarí nrieelē win, zigne lēque pxoz win, haxta scale nonee zho lo win, ⁶⁰ per hor co rēb Lisabet, led scad gac lē win, Juan grieelē win.

⁶¹ Dzigo pquiab zho rēb zho:

—¿Pe nacne sca grieelē win? Ni tib menlidz to lēd Juan.

⁶² Bnabdiidzaque zho lo pxoz win, blu zho señ lo me dien zha racladz me gac lē win. ⁶³ Dzigo bnab me bdeed zho tib lē lo zaatne yquiaa me; bzee zdoo zho zeene blozh pquiaa me gon zho rnee lo co: “Juan grieelē win.” ⁶⁴ Loxaque blozh dze sca pquiaa me, zeene laa me wbiire bnee stib, psilo me rdeed me xquizh lo Dios. ⁶⁵ Grē zha ne zo ga, zha ne runbey me, zeene gon zhow, per nli rzee zdoo zho.

(Nēzrii nēzrec bzhoon diidz laa mēēd co gol, grēse guiedz ne ndxie gui glaa co gocnan miecha. ⁶⁶ Zha ne rona, rza zdoo zho rnee zho: “¿Bay cho gac mēdyeen co?” Sac nligaa rlu nacnie Dios win.)

⁶⁷ Horco bdeed Espíritu Sant guielbiini lo Zacarí, psilo me bnee me rēb me:

⁶⁸ ¡Xquizh xquielnzaac men nroob ne rnabey, men ne nac xDios ne nac ne zha Israel!

Sac gon laa me ziaad, ziaadgan me ne, ziadbee me ne lo xquielnē ne.

⁶⁹ Nasi laa me pxeel men nroob ne ziaadsi-laa ne,

lēē men co ga no grieequia lo zha xtii David, men ne been xtsiin me ga.

⁷⁰ Padzeelale bzeet me cxeel me men co, grē zha ne biaad pteed xtiidz me, bzeet zhow.

⁷¹ Rēb zho, ib sxeel me men ne guiaadsilaa ne ladznia zha ne nosacsi ne, zha ne rlēē lo ne.

⁷² Sac ib gdziind dze csaan me grē zha xtii pxozgol ne, rquianēpaa zdoo me zho. Ib guiaanladz me mine rēb me lo Abraham,

⁷³ zeene rēb me laa me cxeel men ne csilaa ne,

⁷⁴ zeena dziodzebdrāa ne lo zha ne rlēē lo ne, lo zha ne rsacsi ne;

sinque ine tibli gac ne dziuun ne mine rnabey me.

⁷⁵ Gzataa dze ne gneedz me guielmban lo ne,

ine mbe zdoo ne, dziuun ne mine rleynie me.

⁷⁶ Luu gon xin, bzooblo Dios ro ne zob gbaa, cteed xtiidz me lo miech, luu tedner tsienee luu lo zho, laa men co no guiaad.

⁷⁷ Luu gnee lo grē zha Israel, guien zho ganle zha gun Dios zho perdon, parne ycaania me zho.

⁷⁸ Ne nligaa rleynie me ne, rquia zdoo me ne,

gane laa me cxeel Xpēēd me, men co gac zig tib biini,

⁷⁹ Biini co gziini lo grē zha ne mban lo guielcow,

zeena biini co glu nēz lo ne, guio ne nēz ne peet zhgab, peet dzeb guien.

⁸⁰ Zigse zie dzew, scase scase zieroob mēdyeen co, ni scaquegaa dib zdoo win rleynie win Dios. Zeene laa win broobpaa, dzigo güey win bio win tib dan zit, haxta bdziñ dze ne laa win psilo pseed miech laa win blulo lo zho.

2

Gol Jesús

(Mt. 1:18-25)

¹ Lēētaaque len dze co, laa August, rey nroob ne zob Roma, bnabey top lē grēse miech ne no dib dan ne rnabey me, par gacnan me dien palal zho. ² Lēē primer vuelt ga ptop zho lē miech, lēē iz co zob men ne lē Cirein zobnabey me guiedz Siria.

³ Bnabey August grēse miech zha ne no stib ladz ben, laa zho no tsie zaatne nacpaa ladz zho tsiedeed zho lē zho, parne ga ygab zho. ⁴ Min co nagon nacne briece José guiedz Nazaret (xtan Galilé) grop me Marí zie me Belén (xtan Judé). Laa me zie ga, sac ga goc ladz xmengol me rey David. ⁵ Gard ctsieelniapaa me Marí, per nole xtiidz me grop me. Len dze co ziaadyobpaa gal xpēēd Marí.

⁶⁻⁷ Bdziñ me Belén, bgaadraa me zaatne nrieelo mbēz me len yu, lega nac ti len lidz ma bdeed zho blēz me. Lēētaaque bdziñ me ga, laa mēēd co gol. Racse Marí pchel me

win lar, bdiix me win tib len yag ne row ma guizh; lëe mëedglo ga lo me.

⁸ Guieel co, blalaa zha ne nac baxtor, laa zho ndxie quianap zho xpëcwxiiil zho dan, ⁹ tibaque zeene brieequia tib xanj Dios lo zho, dipse zaatne ndxie zho ga biab tib biini nroob. Zeene gon zho anjl co, gon zho biini nroob co, per nli bdzieb zho. ¹⁰ Dzigo bnee anjl co, rëb me lo zho:

—¡Gdziebde to! ¡Golgon diidz cub ne ganle zialnie naa lo to nu! ¡Tib guielbley nroob gac diidz rii lo grëse miech! ¹¹ Men ne gon quiambëz to ga guiaad csilaa to, laa me blansole lo guidzliu. Me nac Men ne zëble diidz ga cxeel Dios, me nac men ndzon ne rnabey. Belén, zaatne goc ladz rey David, ga gol me naguieel. ¹² Goltsie, zaatne tsiedziel to tib mëedbgui yeen, nrielse win lar zhoob win len yag ne row ma guizh, lëe me ga.

¹³ Tibaque zeene gon zho laa stib dzoon anjl brieequia gocgrë anjl ne quianee lo zho ga, psilo grë anjl co roolnie zho Dios, rnee zho:

¹⁴ ¡Haxta zaatne glaaraa gbaa, nozhoobnen ganle pa lotaa men nroob nac Dios!
¡Nasi, grëse miech zrieelo guiaanwen zho lo me; zdo me rala laa me nobedz zho!

¹⁵ Zeene laa grë anjl co zey gbaa stib, psilo grë baxtor co rnee zho:

—¡Niinaga golgotsaa guio Belén! ¡Gotsaa guiowi ne dien, zeena dzian ne mine biaadnie anjl co diidz lo ne nu!

¹⁶ Lëelëd bio zho nëz laa zho zie. Bdzin zho zaatne blëz José ga grop Marí, nligaa laa mëdyeen co nix ga, nixse win tib len yag ne row ma guizh. ¹⁷ Dzigo bzodiidz zho grëse zha rëb anjl co lo zho, zeene güeynie me diidz laa win gol.

¹⁸⁻¹⁹ Grë zha ne bina, per nli rzee zdo zho; laa Marí nosew zdo me, tibaque rso-ladz mew.

²⁰ Blozh ga, laa zho bio nëz ziequianap zho xma zho stib. Ine roolnie zho Dios, rdeed zho xquizh lo me sca pxeel me xanj me güeynie diidz lo zho, rley zho sac brieelo gon zho mëdyeen co.

²¹ Dze ne goc xon ngbidz gol win, dze co bio win bey ne rio xpëedbgui zha Israel, par glu xnëz Dios ngab zho; dze coquew bleelë

zho win JESUS, zigne rëb xanj Dios zeene güeynie me diidz ne laa win gac mëed lo Marí.

Güeynie zho Jesús yadoo

²²⁻²⁴ Nac ley ne psan Moisés lo zha Israel, wnaa ne sca rap mëedbgui, zeene rac zho tap zhmal, none tsienie zho chop ma cogon zho len yadoo; yase tsienie zho tib nëz coc, tib nëzga palom. Ni rnabeya: “Grëse mëedbgui ne rac mëedglo, ib none gdeed zho win gac win tib zha ne gon xtsiin Dios.” Nacne zeene bza dze co, dzigo brie Marí zie me Jerusalén grop me José, zienie me mëdyeen co yadoo csañ me win ladznia Dios; lëe nëzle ga zienieque me gon ne no gdeed me ga.

²⁵ Lëetaaque dze ne bdzinnie zho win len yadoo, laa tib men lë Simeón no ga. Men Jerusalén nac men co, rleynie me Dios, rioxco me mban me zigne rnabey Dios, ni nacie Espiritu Sant me. Quiambëz me gan me Men ne nole diidz ga cxeel Dios csilaa zha Israel, ²⁶ sac rëble Espiritu Sant lo me ible laa me no gan men co. ²⁷ Laa dze co, Espiritu Santaque psiaab guic me zie me yadoo. Nacne lëetaaque no me len yadoo, laa zho bdzinnie mëdyeen co ga, ziesañ zho win ladznia Dios zigne rnabey ley. ²⁸ Dzigo me wbig bdeedz win, rdeed me xquizh lo Dios, rëb me:

²⁹ Xquizh xquielnzaac luu Dios, mine në luu lo zhingundziin win luu nu, laaw goc.
¡Nasi zacle nagon guiaad-xi luu naa, haxta gley naa gbi naa lo guidzliu rii!

³⁰⁻³¹ ¡Men ne nacle diidz cxeel luu guiaadsi-laa miech lo xtoł zho, grop lo naa laa naa ran me niina!

³² ¡Grëse miech ne ndxie lo guidzliu, me nac biini ne gziini lo zho!

¡Me csañnziuu zha Israel, ne nac zho zha ne ngab lo luu!

³³ Zeene gon Marí grop José scataa rzë grë diidz ne rnee Simeón rzeet Simeón mëdyeen co, bzee zdo me. ³⁴ Dzigo bnab Simeón lo Dios gacnien Dios me gza me mëdyeen co. Blozh ga, rëbcha Simeón lo xniaa win:

—Tib guielbley nroob ne gac mëed rii lo zha Israel, por win ndal zho grieel lo guielcow ne no zho, laa zho gbig lo Dios.

Ni scagaa zrieequia zha ne glëenie win, per lëëque zha csacsi zho ga. Mban gac zdoos luu, nroob guielnë ne tso luu gan luu zha sac miech win. ³⁵ Ga glu ganle zha nac zdoos tib tib miech.

³⁶⁻³⁷ Ye tib zhuz gol lë An zo ga hor co. Tibaque no me yadoo, dze guieel roolnie me Dios, rcuan me ni rzodiidznie me Dios. Tib zhuz gola, len dze co rac tapgal tap iz biaan me viud. Nguieg me ptsieelnia me, per loxaque gadz iz wbannie me tsiel me. Lëë pxoz me ga brieelë Fanuel, lëë zhey co ga nac zha xtii Aser. Tib men ne rteed xtiidz Dios lo miech nac me, ³⁸ dzigo wbigaque me, psilo me rdeed me xquizh lo Dios; ni bzodiidz me lo grë zha ne ndxie ga, rëb me lëë mëdyeen co ga nac men ne quiambëz zho ga guiaadsilaa zho.

³⁹ Blozhse been José mine rnabey xley Dios grop me Marí, dzigo laa me wbi ga. Bdedraa ga, beynie me mëed co Nazaret, zaatne nac ladz me. ⁴⁰ Ga broob win, zigse zierooob win scase scase rac macis win, scase riabiiniraa win. Tibaque nacie Dios win.

Biaan Jesús len yadoo

⁴¹⁻⁴² Zeene bloozh Jesús tsiipchop iz, dzigo güey José grop me Marí güeynie me win lni Pascw, lni nroob ne run zho Jerusalén. Gzobse iz rie me grop me, per iz cotaa laa me güeynie win, sac nac zhiwseed zha Israel, mëedbgui ne rap lalga iz, zrieelole tsie zho lo lni co.

⁴³ Zeene laa lni co bded, laa me bio nëz grop me laa me wbi ga. Ib biend me biaan win Jerusalén, ⁴⁴ tibaque güeynie guic me lad grëraa miech ne wbire lni, lad co zienal win. Laa me no nëz, zeene bdzetaa dzew, laa me psilo rguib win, bnabdiidz me lo grë zha lidz me, lo grë zha ne runbey me, ⁴⁵ per ni tib zho choot rdeete win diidz. Nacne wbireque me nëz Jerusalén stib, zieguib me win.

⁴⁶ Dze ne racle tson ngbidz blozh lniw, dzigoraa güeydziel me win len yadoo, laa win zob lo grë zha ne nac maistr ley, no-quaadiag win grë zhiwseed zho ni nzian grë ncuane rnabdiidz win lo zho. ⁴⁷ Rzee zdoos zho ran zho scataa nixbiini win, nicle zeene rnee wina, zeene rtsiregaa win lo xtiidz zho. ⁴⁸ Zeene gon me laa win

zob lad grë men co, bzee zdoos me; dzigo rëbchaa xniaa win lo win:

—Xin, ðpe nacne squi been luu? Ptseeb luu no gon, quia no grop no pxoz luu noguib no luu.

⁴⁹ Pquiab win rëb win:

—Nguibde to naa. ðPe rande to ib none gun naa xtsiin Pxoz naa?

⁵⁰ Ib biend me pe nacne sca rëb win.

⁵¹ Dzigo laa win zienal zhits me, laa me zeynie win Nazaret; nose grë min co zdoos xniaa win.

Tib mëed nguzobdiidz nac win, ron win xtiidz me. ⁵² Zigse zie dzew, laa win riabiiniraa, laa win noroobraa; rleynie Dios win, niiclegaa miecha rleynie zho win.

3

Psilo Juan Bautist noseed me miech (Mt. 3:1-12; Mr. 1:1-8; Jn. 1:19-28)

¹⁻² Bdziñ dzew, laa Juan psilo pseed miech. Lëë len iz co rac tsiin iz zob men ne lë Tiber nac me rey, rnabey me grë guiedz ne ngab lo zha Roma. Len dze co zob Pilat rnabey me grë guiedz ne ndxie nëz Judé, laa Herod zob rnabey grë guiedz ne ndxie nëz Galilé. Len dze coque zob bets Herod, men ne lë Lip rnabey me grë guiedz ne ndxie nëz Ituré ni nëz Traconit; laa Lisian rnabey grë guiedz ne ndxie nëz Abilin. Zha ne nac zhipxoz nroob zha Israel len dze co, nac Anás ni Caifás. Len dze copaa nagon güeynee Dios lo Juan (xpëed Zacarí) dan ngan ne no Juan ga.

³ Nacne hor co psilo Juan güeyted me grë guiedz ne ndxie ro guiubee Jordán, rnee me lo grë miech co, csaan zho xquielntseeb zho gbig zho lo Dios ni chobnis zho, zeena csilaa Dios zho lo grë xtol zho. ⁴ Ga brieequia mine bnee Isá, men ne biaad pteed xtiidz Dios, zeene znu pquiaa me:

Bii zon miech ganle zeene laa tib tsi men zëeb tib dan ngan, rnee me:

“Golzhixcuaa nëz ne ted men ne rnabey, golsaan grë guielntseeb ne run to.

⁵ Zaatne nac len blë, golcodzëew, grë gui glaa, grë gui las, golsiaablow.

Nëz ne niecw, nëz ne quiaya quiaguiet nac, golzhixcuaaw.

⁶ Grëse miech, laa zho gan men ne pxeel Dios ga ziaadsilaa zho.”

⁷ Zeene ran Juan laa miech rdziñ lo me cchoobnis me zho, rnee me lo zho:

—¡Miech ngoopdol, masaque nac to zig nac meel! Nan to na lëe, loxaque chobnis to laa to laale lo grë guieñdëdox ne ziaadyob guiaad. ⁸ Led scada gon, none ndzinli gban to zeena glu nlipaa psaan to xquieñtseeb to. Ni gacniatsde to guiab to, loxaque por nace to zha xtii Abraham, laa Dios csilaale to; sac gneli naa lo to ganle, telne gacladz Dios, haxta grë quie zac gnabey me tsaalow miech ne gac zha xtii Abraham. ⁹ Nanle to ganle, grë yag nex ne rquiad nex lo, zeene ran zho sca naca, rchug zhow, rzëeg zhow; scadaa nagon sac grë zha ne gband zigne racladz Dios, ib tedlaad zho lo gui; sac rriequia laa me nzhenle xquibyag me, cchug me grë yag ne sca nac.

¹⁰ Dzigo rhabdiidz zho lo Juan, pe no gun zho parne ygaad zho grë guieñdë co. ¹¹ Dzigo rquiab me rnee me lo zho:

—Telne quianie to chop lar ne racw to, none gdeed to tiba lo zha ne guieñd xab; telne quianiegaa to ncuane gow to, none gdeed to palala yquiin zha ne quianieda.

¹² Wbigaque bla recaudador ne zie chobnis, rhabdiidz zho dieñ pe gun zho.

¹³ Pquiab Juan, rëb Juan lo zho:

—Cuandraa to samiech to, mine riegualse zho quizh zho, miñ co golnab lo zho.

¹⁴ Ye zla menquiib wbig, rhabdiidz zho rëb zho:

—¿Telzhe no waa, pe nac miñe dziuun no?

Rquiab Juan rnee Juan lo zho:

—Ndzinli golgac, ib ctsebde to samiech to par dieñ pe gla to lo zho; zha ne peet xtold, ib yquiaaquide to zho ncuane beend zho. None sac zdoo to dimi ne quiaayazh to.

¹⁵ Nzian grë miech co quiambëznë zho gacnan zho dieñ pe lëele Men ne bzooblo Dios ga cxeel me nac Juan. ¹⁶ Dzigo rëb Juan lo zho:

—Tib wrobnisse nu rnedz naa lo to, sangue men ne no guiaad ga Espíritu Sant gdeed me lo zha ne gliladz me; ni scagaa zha ne gliladz me, sonëz me zho zaatne nitlo zho. Ne nligaa men non nac me, tel naa peet nond naa, per ni par tib ngundziin ne glit lab me ni me, raguiald naa gac naa.

¹⁷ Laa me guiaad zig tib zha ne rbeeguizh zhobxtil, sac zha co, rlozhse rbeeguizh zho zhob rgotsow zhow, laa paj rlaal zho lo gui, ga reca. Per gui ne gzëeg grë paj ne guiadbee me ga, gdziñd dze guiuuw.

¹⁸ Sca rnee me lo zho, par guieñ zho zha nac Xtiidz Dios. ¹⁹ Tib vuel haxta lo rey Herod goctox me, sac lëeque Herodí, wnaa ne nac tsieel bets Herod nonie Herod; grë guieñtseeb ne quiayun Herod, blisqui mew. ²⁰ Per laa ne nion Herod diidz, lel been me stib guieñtseeb, bnabey me bgaa Juan bio Juan ladzguiib.

Brobnis Jesús

(Mt. 3:13-17; Mr. 1:9-11)

²¹ Len dze ne nochoobnis Juan miech ga, tib dzew laa Jesús bdziñ lo Juan ga, ye me bhab cchoobnis Juan me. Blozhse brobnis me, laa me quiazodiidznie Dios, tibaque zeene bzhial zhan gbaa, ²² laa men ne nac Espíritu Sant biet, rlu me zig rlu tib palom, laa me bdziñ guic Jesús, hor co blu zëeb tib tsi men co nëz gbaa, rnee me:

—Xin, rleynie naa luu gon, nziuu luu lo naa.

Xmengol Jesús

(Mt. 1:1-17)

²³ Galptsii iz rap Jesús, laa me psilo xtsiin me pseed me miech. Zha ne runbey me, rzoob zho xpëed José nac me,

²⁴ José co goc xpëed Elí,

Elí goc xpëed Matat,

Matat goc xpëed Leví,

Leví goc xpëed Melqui,

Melqui goc xpëed Jan,

Jan goc xpëed José,

²⁵ José goc xpëed Matatí,

Matatí goc xpëed Amós,

Amós goc xpëed Nahúm,

Nahúm goc xpëed Esli,

Esli goc xpëed Nagai,

²⁶ Nagai goc xpëed Maat,

Maat goc xpëed Matatí,

Matatí goc xpëed Semei,

Semei goc xpëed José,

José goc xpëed Judá,

²⁷ Judá goc xpëed Joan,

Joan goc xpëed Resa,

Resa goc xpëed Zorobabel

Zorobabel goc xpëed Salatiel,

Salatiel goc xpëed Neri,
²⁸ Neri goc xpëed Melqui,
 Melqui goc xpëed Adi,
 Adi goc xpëed Cosam,
 Cosam goc xpëed Lmodam,
 Lmodam goc xpëed Er,
²⁹ Er goc xpëed Josué,
 Josué goc xpëed Liezer,
 Liezer goc xpëed Jorim,
 Jorim goc xpëed Matat,
³⁰ Matat goc xpëed Leví,
 Leví goc xpëed Simeón,
 Simeón goc xpëed Judá,
 Judá goc xpëed José,
 José goc xpëed Jonán,
 Jonán goc xpëed Liaquim,
³¹ Liaquim goc xpëed Melé,
 Melé goc xpëed Mainán,
 Mainán goc xpëed Matata,
 Matata goc xpëed Natán,
³² Natán goc xpëed David,
 David goc xpëed Isaí,
 Isaí goc xpëed Obed,
 Obed goc xpëed Booz,
 Booz goc xpëed Salmon,
 Salmóngoc xpëed Naasón,
³³ Naasón goc xpëed Minadab,
 Minadab goc xpëed Aram,
 Aram goc xpëed Srom,
 Srom goc xpëed Far,
 Far goc xpëed Judá
³⁴ Judá goc xpëed Jacob,
 Jacob goc xpëed Isaac,
 Isaac goc xpëed Abraham,
 Abraham goc xpëed Taré,
 Taré goc xpëed Nacor,
³⁵ Nacor goc xpëed Serug,
 Serug goc xpëed Ragau,
 Ragau goc xpëed Peleg,
 Peleg goc xpëed Heber,
 Heber goc xpëed Sala,
³⁶ Sala goc xpëed Cainán,
 Cainán goc xpëed Rfaxad,
 Rfaxad goc xpëed Sem,
 Sem goc xpëed Noé,
 Noé goc xpëed Lamec,
³⁷ Lamec goc xpëed Matusalén,
 Matusalén goc xpëed Enoc,
 Enoc goc xpëed Jared
 Jared goc xpëed Mahalaleel,

Mahalaleel goc xpëed Cainán,
³⁸ Cainán goc xpëed Enós,
 Enós goc xpëed Set,
 Set goc xpëed Adán.
 Adán goc zig tib xpëed Dios.

4

Gocladz mendox niungüet ma Jesús (Mt. 4:1-17; Mr. 1:12-15)

¹ Zeene blozh brobnis Jesús guiubee Jordán ga, nacie Espíritu Sant me, dzigo güeynie me Jesús tib dan ngan, zaatne choot miech guiend. ² Ga bio Jesús, ni tib lë peet dowd me; gzase dze pquiana mendox niungüet ma me niun me mine racladz ma. Zeene goc choo dze no me ga, gon ma lëbdraa me rcaabedz me, ³ dzigo rëbchaa ma lo me:

—Telne nli Xpëed Dios nac luu, bnabey tsaalo grë quie rii ncuaane gow luu.

⁴ Dzigo pquiab me rëb me lo ma:

—Znu zhobnee lo Xtiidz Dios: “Niapse por xtiidz Dios mban miech, yquiamband zho loxaque guielwagwse.”

⁵ Blozh ga güeynie ma me glaa tib guic gui, ga znuse blu ma grëse guiedz ne ndxie dib lo guidzliu lo me, ⁶ rëb ma:

—Bui ganle, grëse guiedz ne gon ran luu i, chen naaw, zrieelo gded naaw lo zha ne racladztaa naa. Grësew, dib guielndaan ne no low, znedz naaw lo luu ⁷ telne squiits-gzhib luu lo naa, gunnon luu naa.

⁸ —¡Biche lo naa nu mendox! —rëb me lo ma—. Znu gon zhobnee lo Xtiidz Dios: “Diosse nac men ne rnabey, mese none gunnon luu, lo me riegual yquitsgzhib luu; ni mine rnabey me min co none gun luu.”

⁹ Blozh ga güeynieque ma me lad guiedz Jerusalén, ga blep ma me zaatne mazdraa glaa guic yadoo nroob ne zob lad guiedz co, rëb ma lo me:

—Telne nli Xpëed Dios nac luu, bringaa nu, ¹⁰ benque led znu rnee lo Xtiidz Dios: “Znabey Dios grë xanj l me yquiaanap luu, ¹¹ zguedz zho luu, zeena ni tib quie ycaand ni luu.”

¹² Dzigo rëb me lo ma:

—Psoladz ganle noque stib zaatne znu rnee lo Xtiidz Dios: “Bien, Dios nac men ne

rnabey luu, nodne quitnie luu me gnab luu lo me gun me ncuaane nod gun me.”

¹³ Gonse ma rdziöld zha gungüet ma Jesús, dzigo biche ma lo me palal dze.

¹⁴ Blozhse ga, dzigo laa Jesús wbi ga bdziñ me nöz Galilé, scaque nacie Espíritu Sant me. Znuse beenbey miech me por grétaa ncuaan ro ne run me, grése guiedz ne ndxie nöz co, rzeet zho me. ¹⁵ Zaatne rdzintaa me, rie me xyadoo zho, rseed me zho Xtiidz Dios, rleynie zho me, rley zho ron zho grë mine rnee me.

Güey Jesús Nazaret

(Mt. 13:53-58; Mr. 6:1-6)

¹⁶ Tib dzew, laa me bdziñ Nazaret, zaatne broob me. Gol dze ne rdziöldz zha Israel lo dziin, güey me xyadoo zho zig runaque me grëraa zaatne ziye me. Zeene gol horne rlab zho Xtiidz Dios, dzigo bded me, ¹⁷ bdeed zho mine pquiaa Isá glab me. Pخال me low, lëetse zaatne znu rnee blab me:

¹⁸ ZhiEspíritu Dios nacie naa, ible Dios bzooblo naa, gnee naa Diidz Ndzon ne nac xtiidz me lo grése zha ne rquiinnëw.

Laa me pxeel naa gne naa lo grë zha ne ngadoo lo ncuaane nosacsi zho, zeena guien zho zha grieë zho lo grë ncuaan co.

Laa me pxeel naa gziini naa lo grë zha ne no lo guielcow, grë zha ne rzac guien draa zha grieë zho lo zhizhgab zho, laa me pxeel naa, naa cueë zho lo zhgab co.

¹⁹ Laa naa zialnie diidz lo miech, gacnan zho pa lotaa noxco Dios gunlay me grése zha ne gbig lo me.

²⁰ Blozhse blab me lo co, ptibëd mew bdeed mew lo zha ne quianapa, dzigo laa me bzob. Grése zha ne no len yadoo ga, dze rwi zho lo me, ²¹ dzigo bnee me lo zho, rëb me:

—Grë diidz ne blozh blab naa lo to nu, len dze rii gon laaw noyac cumplir.

²² Grése zho rleynie zho me, rlozhd gzee zdoo zho ron zho grétaa diidz ndzon ne rnee me. Rnabdiidzlsa zho rnee zho:

—¿Bay zha squitaa pseed men qui? ¡Led lëë xingan José i!

²³ Dzigo rëb me lo zho:

—No tib diidz ne rnee: “Zha ne racnie stib miech, none guien zho glo menladz zho gacnie zho.” Rienpaa naa gon, min co racladz to gnë to lo naa; quiambëz to gan to grë milagr ne ziyon to beñ naa guiedz Capernaum.

²⁴ 'Gneli naa lo to ganle: Zha ne ri-aad rteed xtiidz Dios, ible znu randzed menladz zho zho; gane rrieelod pe gun zho. ²⁵⁻²⁶ Golsoladz ganle zeene biaad Lí, bio tib tiemp ne biabd guie tson iz grol, tib gbindox ne gon miech Israel nu. Ndal wnaa viud ne nac menladz me mban bded zho, guien pe nquiin zho, per brieelod niun me xyudar zho; lel xyudar tib wnaa Sarept pxeel Dios me güeygun me, guiedz ne ndxie gax Sidón. ²⁷ Scaque zeene biaad Liséw, ndal zha Israel rlan guiedzdox ne nac lepr, per ni tib zho beenguiacd me; lel tib zha Siria lë Naamán, men co beenguiac me.

²⁸ Zeene gon zho sca rnee me, blëë zho. ²⁹ Gusobe zho, blee zho me lad guiedz, güeynie zho me tib ro yee ne quia glaa guic gui ne ndxie guiedz co. Laa zho nole par ctiix zho me ga, ³⁰ zeene znuse bded me lad zho, ziega me.

Biac tib mgui ne nosacsi mendox

(Mr. 1:21-28)

³¹ Ga wbi Jesús, bdziñ me guiedz Capernaum stib, guiedz ne ndxie nöz Galilé. Gzobse dze ne rdziöldz grë miech co lo dziin, rie me xyadoo zho rieseëd me zho.

³² Rzee zdoo zho ron zho grë zhiwseed me, grése mine rnee me, rlu zha rnabey nac me.

³³ Tib vuelt, lad grë zha ne noseëd me ga no tib mgui ne nosacsi mendox; roptsie mendox co rnee ma lo me:

³⁴ —¡Psaan no! ¿Pe gun luu no Jesús Nazaren? ¿Ziaad luu lëë par gnitlo luu no? ¡Runbey naa luu, luu nac men ndzon ne pxeel Dios!

³⁵ Dzigo goctox me lo ma, rëb me:

—¡Psioog ro luu! ¡Na zeena psaan men qui!

Horco, squi ndxie grë miech co bron ma mgui co liu, mincose been ma, laa ma brieë laa ma zie. ³⁶ Rlozhd gzee zdoo grë miech co, rnabdiidzlsa zho rnee zho:

—¿Zha nac xtiidz men qui, zha nacne haxta mendox rdzieb ma me, rzhooñ ma zeene laa me ractox lo ma?

³⁷ Grëse guiedz ne ndxie gax ga, zigse ziede rzhooñ diidz scataa milagr ne run me.

Biac xniadzoop Pedr

(Mt. 8:14-17; Mr. 1:29-39)

³⁸ Brieë Jesús len yadoo, zie me nöz lidz Simón. Bdzin me lëëtaque laa xniadzoop Simón nix rlan xlëë, nzho rac me; dzigo wbig zha ne been vis laa zhuz co rzacnë, bnaab zho lo me gunguiac me me. ³⁹ Nacne bded me zaatne nix zhuz co, goctox me lo xlëë co. Horcogazha laaw blëz, guche zhuz co ga, beenlo me ncuaañe dow zho.

⁴⁰ Laa ngbidz rzëëblew, zeene bdzin grë miech co lo Jesús, bdzinne zho grë zhimguidz zho. Zhaase zhaase guielguidz ne rzac tib tib mguidz co, per grëse zho zigne rxobnia me guic zho laa zho riac.

⁴¹ Nzian zho beñcxooñ me mendox ne nosacsi zho, zeene laa ma rrieë, nguiedz roptsie ma rnee ma lo me:

—¿Rdziuñbey no luu, Xpëed Dios nac luu!

Dzigo ractox me lo ma, rsaand me gnee ma cho nac me, sac wen wen nañ ma me nac Men ne nacle diidz ga cxeel Dios.

⁴² Biini liu co, silgaw brieë Jesús lad guiedz co güey me tib zaatne choot miech guieñd. Zeene bnit me lo grë miech co, brieë zho güeyguib zho me haxta bdziel me lo zho; rnab zho lo me Capernaumse ga cuëz me, paat tsiedraa me. ⁴³ Dzigo rëbchaa me lo zho:

—Grieeloda, ib none ga naa grëraa guiedz, gaseed naa miech gacnañ zho zha racladz Dios gban zho; sac ible min co pxeel me naa zial naa.

⁴⁴ Nligaaw, grëse guiedz ne ndxie nöz Galilé ga güeyted me, güey me yadoo ne zob tib tib guiedz co, güeynee me Xtiidz Dios lo grë miech co.

5

Nroobdox mel bgaa

(Mt. 4:18-22; Mr. 1:16-20)

¹ Tib vuelt miech guizhiu ne pcaalsa lo Jesús ro Nisdoo Genesaret, haxta rtaagw zho me; grëse zho racladz yquiaadiag zho Xtiidz Dios. ² Gax ga zo chop barcw, blalaa

ngooz mel biet lena, laa zho no lo nis ga noguieb zho guieñ ne rnaaz zho mel.

³ Nacne güey me bieñ me tib len barcw co, bnabey me Simón psëë Simóna bzëëba lo nis palal; sac lëë xbarcw Simón ga. Dzigo leen co bzob me pseed me grë miech co.

⁴ Zeene blozh bnee me lo zho, rëbchaa me lo Simón:

—Nana ganle zeeynie barcw rii guionie new zaatne guietlaa nis, zeena gron to guieñ ne rgaa mel i gnaaz to palal ma.

⁵ Pquiab Simón rëb Simón:

—Dib guieel-le bdzio no lo nis rii, per ni tib mel bnaazd no; per lega ne luu rneew, na dien laa no grona stib.

⁶ Bron zho guieñ co lo nis, zeene laa zho cueew, ya zig zrieza, biodzëse lena no mel.

⁷ Horco blunia zho lo grëraa zha ne nacgrë zho no stib len barcw co, parne tsie zho gun zho xyudar zho. Bdzin zha co gocgza zho, gropse len barcw co pcodzëë zho grë mel co; ya zig zdedquiew lo nis.

⁸ Zeene gon Simón scataa mel taf ne bgaa, pquiitgzhib me lo Jesús, rëb me:

—Bzhiguiel mazd psaan naa, tib miech ngoopdol nac naa, rdzieeld so luu lo naa nu.

⁹ Zigtaa Simóna, zigtaa zha ne ziegza mew, rzee zdoo zho ni rdzieb zho scataa nac milagr ne gon zho ga. ¹⁰ Scasaque rac Jacob ni Juan (xingan tib men lë Zebedé), zha ne nacgza Simón.

—Gdzieebd luu —rëb Jesús lo Simón—. Zigne squi gon rioxco luu riaad luu gooz mel niina, desde nadze laa luu tsoxco gun luu stib gooz; laa naa cxel luu tsietop luu grë miech ne sëëb xnëz Dios.

¹¹ Zigne bdzinne zho barcw co ro nis, bzo zhow ga, laa zho zienal zhits me.

Biac tib zha ne rlan guiedz lepr

(Mt. 8:1-4; Mr. 1:40-45)

¹² Laa Jesús no tib guiedz co, tib dzew, bdzin tib mgui ne rlan guiedzdox ne lë lepr lo me, pquiitgzhib mgui haxta bdzin lo mgui liu, rëb mgui lo me:

—Tebaa siguieel luu gunguiac luu naa.

¹³ Dzigo pxobnia me guic mgui, rëb me:

—Zunguiac naa luu. ¡Niinagazh laa luu guiaanmbe!

Horcogazha laa mgui biaanmbe lo guiedz co. ¹⁴Dzigo pso Jesús diidz lo mgui, choot lo gzodiidzd mgui zha biac mgui; ni rëb me lo mgui:

—Bzë, güey lo pxoz, güeyson gon ne rnabey xley Moisés gdeed luu; zeena gan zho ganle laa luu biacle.

¹⁵Niicle sca nëd me gacnan miecha, per znuse znuse rliaal diidz grëtaa milagr ne run me; miech guizhiu ne rdzin lo me, zha ne zie yquiaadiag zhiwseed me, zha ne zieegaa gunguiac me zho tel pe guielguidz ne rzac zho. ¹⁶Zhiga, zhiga rbiche me lo miech, rie me zaatne choot guiend riezodiidznie me Pxoz me.

*Biac tib zha ne gutoo xcuerp
(Mt. 9:1-8; Mr. 2:1-12)*

¹⁷Stib dzew, miech guizhiu ne ndxie lo Jesús noquiaadiag zho zhiwseed me. Nzian grë zha farisé, grë maistr ley, zha ne brieedib nëz Galilé, dib nëz Judé, zha ne brieegaa Jerusalén, ye zho laa zho no lad co noquiaadiag zho grë mine rnee me.

¹⁸Laa grë miech co ndxie ga, zeene bdzin bla zha bgui, ney zho stib men bgui, zhoobse me lo yag, ib gacd së me sac dipse me gutoo. Gocladz zho nzëebnie zho me len yu ne no Jesús ga, ndzinne zho me lo me. ¹⁹Per ib gocd nded zho lad grë miech co. Nacne biepaque zho guic yu, pxal zho tiblë guic co, ga pteed zho men rzacne co dib yag ne zhoob me ga, bdzin me lo Jesús.

²⁰Zeene gon Jesús ne nli dib zdoo zho rnalo zho me, me gunguiac men rzacne co, rëbcha me lo men co:

—Peet tsienied guic luu, niinagazh laa naa gun perdon grëse xtol luu.

²¹Zeene bin grë zha farisé co, grë maistr ley co sca rëb me, rneehaa zho gza zho: “¿Cho dzigo rzac mgui qui nac me? ¿Falt i gon noyun me lo Dios! ¿Tibaque men ne run perdon xtol miech, ni lëe men co nac Dios!”

²²Bien ga Jesús sca quianee zho, dzigo rëbcha me:

—¿Pe nacne rzac to laa naa quiayun falt? ²³⁻²⁴Nli cholze zac guiab laa zho gun perdon xtol miech, per grielod gunguiac zho zho. Golwi ganle laa naa gunguiac mgui rii, zeena gacnan to naa ne nac naa Mgui ne

pxeel Dios, ible rap naa poder par gun naa miech perdon.

Dzigo bnee me lo men rzacne co, rëb me: —¿Niinagazh guche i, bi yag ne bzhooob luu i, zeen bzë!

²⁵Zigne sca bnee me, laa mgui co bzoli, squi ndxie grë miech co laa me blis yag co, ine roolnie me Dios laa me zey. ²⁶Psilo zho grëse zho, roolnie zho Dios; lala rzee zdoo zho, lala rdzieb zho, rnee zho:

—¿Nadzesi, laa ne bdzian ncuaane gard dzian ne!

*Bredz Jesús Leví
(Mt. 9:9-13; Mr. 2:13-17)*

²⁷Blozh ga, laa Jesús brieed ga. Ro nëz zieded me gon me tib men lë Leví, zobse men co lo mezh ne rietizh zho dimi ne razh lo zha Roma, sac me rtop dimi co. Dzigo bredz Jesús me tsienal me zhits Jesús. ²⁸Biaanaque xmezh me ga, guso me ga, laa me zienal.

²⁹Bded ga, güeynie me Jesús tib wagw lidz me. Grë zha ne run dziin co, ni grëragaa zha ne bdzin ga, tipse brenie Jesús zho grë xpëedscuel me.

³⁰Blalaa zha farisé, ni zla maistr ley, rlëe zho gon zho sca zobnie Jesús grë zha co, bded ga rëbcha zho lo xpëedscuel me:

—¿Lëda i gon run to! ¿Pe nacne sca tipse rownie to grë zha ngoopdol co, grë zha beed ne nac recaudador ga?

³¹Dzigo rëbcha Jesús lo zho:

—Nanle to ganle, zha ne run rmed, zaatne no zha rzacne ga rquiin zho, ¿niacxe squiin zho zaatne no zha ne ndip ndaan?

³²Scaque naa nagon, zialguibd naa zha wen, sinque laa naa zialguib grë zha ngoopdol, zeena gbig zho lo Dios.

*¿Pe nacne rcuand xpëedscuel Jesús?
(Mt. 9:14-17; Mr. 2:18-22)*

³³Bdzinaque bla zha ne bnabdiidz, rëb zho lo Jesús:

—¿Pe nac waa ib rcuand xpëedscuel luu, tibaque quiayow zho, tibaque quiaye zho? Zha xpëedscuel Juan, zha xpëedscuel farisé, rdzian no tibaque nocuan zho, tibaque nonab zho lo Dios.

³⁴Pquiab Jesús rëb me lo zho:

—Zaatne nadien noyac tib guieltsieel, ¿niacxe znabey to ycuan grë zha ne ndxie lo

lni, ni ran to laa mgui ne notsieelna zo lo zho? ³⁵ Per zdziñ dze zeene laa mgui co gbiche, ni zeene laa dze co gdziñ, dzigosi nagon rieguial ycuau zho.

³⁶ Blozhse sca bnee me, rëbaque me lo zho:

—Zha ne rquiaabdie lar, tsod zha ne ct-siez xab cub cuee zho tib lë lar ne yquiaabdie zho tib xab gox zho. Sac tiba, znitlo zho xab cub zho ga, ni stiba rdzieeld yquia tib lë lar cub lad lar gox. ³⁷ Scaque zha ne rgotsow vin, tsod zha ne cotsow vin cub tib len guid ne padzeelale noquiin, sac stiesz vin cuba; lozh ga zigtaa vina, zigtaa guid cow, laaw nitlo ga. ³⁸ Gacxe waa, tel vin cuba none len tib guid cubaque tsotsowa.

³⁹ 'Nac cuent rii zig rzac miech vin, zha ne bienle rie vin ne padzeelale notsow, rdziladz zho guie zho vin cub; sac biaanle guic zho rnee miech: “Vin ne padzeela notsow, miñ co nizhrra rdiow.”

6

Dze ne rdziiladz zha Israel lo dziin (Mt. 12:1-8; Mr. 2:23-38)

¹ Tib vuilt, lëetse dze ne rdziiladz zho lo dziina, bded Jesús zaatne zëeb zhobxtil grë xpëedscuel me; psilo zho pchoo zho mzion zhobxtil co, zigse runmbe zho zhob co, scase row zhow. ² Gon blalaa zha farisé sca no zho, dzigo rëbchaa zho:

—jLëda i gon noyun to! Golguien ganle dze nda nac dze rii.

³ Pquiab Jesús rëb me lo zho:

—jPe gard glab to zaatne ziaad ganle zha been rey David, tib dze zeene pcaabedz me grë me zha ne ziegza me, ni zienied zho pe gow zho? ⁴ Rneew, bzëeb me len yadoo güeynab me grë guietxtil ne nac gon, downie me grë zha ne ziegza me ga; ni loxaque zha ne nacse pxoz, zha cose row guietxtil co.

⁵ Ni rëb me lo zho:

—Gacnañ to ganle naa ne nac naa Mgui ne pxeel Dios, naa rnabey dze rii, nanpaa naa pe nonguiel gac.

Biac tib mgui ne mband tib nia (Mt. 12:9-14; Mr. 3:1-6)

⁶ Gol stib dze ne rdziiladz zho lo dziin, güey Jesús len yadoo win ne zob lad guiedz co, psilo me noseed me miech. Lad grë

miech ne no len yadoo ga, no tib mgui, mband nia derech me. ⁷ Blalaa zha farisé, blalaa maistr ley no lad co, quialeets zho Jesús dien pe zunguiac me mgui co, dze co; sac quiambëz zho tel laa me gunguiac mgui, dzigo miñ co yquiaaqui zho tsiezo zho me lo zhiwxtis zho.

⁸ Bien Jesús sca no guic zho, dzigo bredz me mgui co, bnabey me bzo mgui groltaa lo grë zha ne ndxie ga; ⁹ blozh ga rëbchaa me lo zho:

—jPe nadien rzac to nonguiel gun ne dze rii? jPe nonguiela gun ne ncuaane yquiin, te nonguiela gun ne guielntseeb ye? Zig nac samiech ne zha ne noxtseeb xquielmban, jpe maase csaan ne guet zho?

¹⁰ Dze rwi me lo zho tib tib zho, dzigo rëbchaa me lo mgui co:

—jBzigaa nia luu!

Zigne bzigaa mgui co nia mgui, laaw biac.

¹¹ Zeene gon zho sca beenguiac me nia mgui, per nli rlë zho, psilo zho quianedi-idz zho dien zha gun zho me.

Bzo Jesús zha ne tsienee xtiidz me (Mt. 4:23-25; 10:1-4; Mr. 3:13-19)

¹² Tib vuilt, güey Jesús tib guic gui, dipse guieel blëz me ga bzodiidznie me Dios.

¹³ Biini liu co, bredz me grëse zha ne nac xpëedscuel me, dzigo lad co ble me tsiipchop zho, zha ne tsiepaa tsienee xtiidz me lo miech. ¹⁴⁻¹⁶ Znu lë gza tsiipchop zha co:

Simón (zha ne bleelë me Pedr),

Ndrés (bets Pedr),

Juan,

Jacob,

Lip,

Bartol,

Matew,

Mazh,

Jacob (xingan Alfé),

Simón (zha ne no lad grë zha ne racladz cuee wxtis Roma Israel),

Judas (bets Jacob),

ni Judas Iscariot (zha ne güeyto me).

¹⁷ Cho gui co biet me grë xpëedscuel me, bdziñ zho tib ro lets. Loxaque bdziñ zho ga, laa stib dzoon xpëedscuel me bdziñaque lo me ga; zhiits co nal stib dzoon miech, no zho racladz yquiaadiag zhiwseed me, no-gaa zho zie ga par gunguiac me zho. Miech

guizhiuw, zha ne ziaad nêz Judé, zha ne ziaad nêz Tiro, zha ne ziaad nêz Sidón, zha ne brieegaa Jerusalén.

¹⁸ Nzian grê zha co nosacsi mendox, grêse zho beenguiac me zho. ¹⁹ Rbig be grê miech co racladz zho xen zho lad xab me, sac ran zho, zha ne rzhen lad xab me, tel pe guielguidztaa rzac zho, runguiac me zho por grêtaa poder ne rap me.

*Cho nac zha ne wen zie
(Mt. 5:1-12, 38-48; 7:1-5, 12)*

²⁰ Dzigo dze bui Jesús lo grêse zha ne nac xpêedscuel me, rëb me lo zho:

—iWen zie zha ne rien none gbig zho lo Dios, sac ib zdziñ zho zaatne rnabey me!

²¹ iWen zie zho! Sac niicle telne noyan zho gbin, per me gdeed ncuaane yquiin zho; niicle tel no hor mban rac zho roon zho; per zdziñ dze ne gdeed me tib guielbley nroob lo zho.

²² Zig nac to, zeene csilo miech glëenie zho to, gunxoon zho to, yquiaago zho to, gneenë zho to, sac zho haxta ni lë to gondraa zho, loxaque ne nac to zha ne no xnêz Mgui ne pxeel Dios nu, iwen zie to ga! ²³ iNley golco zdoo to dze co, nguieel golgac, sac gon tib guielnzaac nroob ne gneedz Dios lo to! Golsoladz ganle, scaque been pxozgol zho grê zha ne pxeel me padzeela biadnee xtiidz me.

²⁴ Sangue grê zha ne rzac grêse ncuaane rquiin zho quianie zho, ib rquiind zho gbig zho lo Dios, iprobsaxe zho, sac lo guidzliu riise gac ncuaan co guielbley lo zho!

²⁵ iProbsaxe zho, sac niicle ne grëw quianie zho niina, per zdziñ dze gan zho ganle zha nac gbin; rlozhd gzhidz zho, rlozhd gley zho niina, per zdziñ dze laa zho gan ganle zha nac guielnë!

²⁶ Padzeela, biaad bla zha ne pquidie rëb zho Dios pxeel zho, bio pxozgol to bleynie zho zho, iprobsaxe to telne yguib to sca gleyne miech to!

²⁷ Golquiaadiaga ganle: Zha ne rlëe lo to, golleyne zho, tel pe nac xliaadz zho golgacnie zho. ²⁸ Zeene rdzibdee zho to, golnab lo Dios gunlay me zho; zeene rsacsigaa zho to, golnab lo Dios yquia zdoo me zho. ²⁹ Tel gneedz zho tib puñet lo to,

gzoobd nia to, golsaan zho maase yquiaa zho stiba.

'Zha ne gla xabnal to, golsaan maase ye biaagw güey zho. ³⁰ Zha ne gnabtaa pe cos lo to, goldeeda; tel scasegaa xen zhow, ib gnabde tow lo zho. ³¹ None zaacse gac to lo miech, zeena scagaa zha, zaacse gac zho lo to.

³² Sac gon, tel loxaque zha ne ndzieeldidz to, zha cose rleyne to, jled ncuaan nroobd ga run to! Haxta grê zha ntseeb run min co. ³³⁻³⁴ Tel loxaque zha ne runsegaa favor lo to, lo zha cosegue run to favor; zeene rungaa to tib pextad, lo zha ne rgobeyse to zguizh lo to, lo zha cose runxtad to, jni lalnu peet nond ncuaane run to ga! Sac gon haxta grê zha ntseeb run min co.

³⁵ Golguien sca, none gleyne to zha ne rlëe lo to, none gacnie to zho lo xliaadz zho. Zha ne guiaad tib pextad lo to, goldeed ncuaane rnab zho, ib guiabde to nend lega scase gun to favor co lo zho. Zha ne gun grê min rii, nroob guielnzaac ne gdeed Dios lo zho, ni ga glu zho ganle nli xpêed me nac zho; sac gon tel me wen me lo grêse miech, niicle zha ne run falt lo mew, niicle zha ne riendgaa gdeed xquizh lo me, rsaand me zho. ³⁶ Ndzinli sca golgac, zigne sca wen Pxoz to lo grêse miech, scaque none wen gac to lo zho.

³⁷ Ib gunde to në gac zdoo to, zeene ran to ncuaane nonguield ne run stib miech, sac to tozhal gunquizh zhow; zeena scagaa Dios gunscad me to. Golguien none gun to samiech to perdon, zeena scagaa Dios zun me to perdon; ³⁸ sac grêse ncuaane run miech, mincoque rcaania zho. Grêse ncuaane gun to, scaania tow, ni haxta ndzi-ibbraa mine ycaania to. Sac ncuaane gun to lo samiech to, mincoque gun Dios to.

³⁹ Blozh sca bnee me, dzigo rëbchaa me:

—Golwi ganle, zig nac zha ne rold lo, jniacxe zrieelo glu zho nêz lo stib zha ne rold lo? Zha ne sca gun, tel griel ni tib zho zaatne nac tib ro blë, ib tedsod grop xcuaa zho tsietsobe ga.

⁴⁰ Grê zha ne nac mëedscuel, tsod zha ne racraa lo zha ne noseed zho; haxta csiaalraa zho zhiwseed zho, ni telne tsoxco zhow, zdziñ zho medid co.

⁴¹ 'Ĵlĕda ga gon tso to lozhd gzee zdoo to dien cho pe run, ni nenda mazdraa mine run to! ⁴² ĴPe ro to glisqui to mine run stib zho, ni tel mazdraa nac mine run to? ĴGolguien sca glude to ncuane nade to! ĴGlo goltsoxco ndzinli gac to, dzigo lozh ga zac tsienee to zha gacndzinli stib zho!

Nex rlu zha nac tib tib yag
(Mt. 7:17-20, 24-27; 12:34-35)

⁴³ 'Tib tib yag rdeedsew xnexa. Grielod yquia nex ncuuan tib lo yag ne rdeed nex wen; grielodгаа yquia nex wen tib lo yag me rquia nex ncuuan. ⁴⁴ Tel zha nac nex ne rquia lo yag, gase rlu zha nac yag. Tsod yag guiets ne yquia guigw lo; ni tsodгаа lbĕ zarz ne gdeed uv. ⁴⁵ Scadaa nagon nac miech, zha ne wena, ncuuan wen run zho, diidz wen rnee zho, sac desde zdoo zho no guielwen co; laa zha ne ntseeb, niapse ncuane ntseeb run zho, niapse diidz dox rnee zho, sac desde zdoo zho no guielntseeb co. Gacxe waa, tel zha rzĕ xtiidz tib miech, gase rlu zha nac zdoo zho.

⁴⁶ 'Grielod lega gnee to, naa rnabey to, sac zha ne rneew ib none gun zho mine rnabey naa. Nzian zha ne rnee, naa rnabey zho, ni rund zho mine rne naa.

⁴⁷ 'Zha ne rquiaadiag mine rne naa, ni rioxco zho rban zhow zigne naca, ⁴⁸ rriequia nac zho ga zig tib zha ndzielguic ne quiet blee xcimient lidz, psilo zhow haxta zaatne bgaa lo quiet. Niicle riab guiedox, peet racd lidz zho, nis naal ne raclo rded zaatne zoba ga, per rbixcheda. ⁴⁹ Laa zha ne rquiaadiag xtidz naa, ni rioxcd zho gban zhow, ziaad gac zho zig tib zha nxen ne gĕeyzoob lidz laglaase lo liu. Znuse bnitlo lidz zho, sac zeene biab guiedox, lo nis naal ne goclo bded zaatne zoba, znuse bixchew, ni stib lĕw biaand.

7

Biac tib zha ne rquia dziin tib lo menguiib
(Mt. 8:5-13)

¹ Zeene blozh bnee Jesús lo grĕ miech co, dzigo laa me wbi ga, bdzin me Capernaum. ² Lĕĕtaaque len dze co rzacnĕ tib zha ne run dziin lo tib men ne rnabey lo xmenguiib zha Roma, no guiedz co; nzhoo rac zho zootle laa zho guetle. Rleyniedox men co zho,

³ zigne bin me laa Jesús bdzin, lĕĕlĕd pxeel me bla zha ne nac zha non lo menguietz Israel, gĕey zho gĕeynee zho lo Jesús siguiel Jesús tsiegunguiac Jesús zhingundziin me. ⁴ Bdzin zho bnaab zho lo Jesús siguiel me tsie me.

—Bzhiguiel been xyudar me —rĕb zho—. Tib zha wen nac me, ⁵ rleynie me menladz ne, haxta bzaa me tib xyadoo no lad guiedz nu.

⁶ Dzigo zienal Jesús zhits zho. Zhile gdzin zho lidz men rnabey co, zeene bdzieelo zho bla zha ne ndzieeldiidz me, zienie tib xtiidz me lo Jesús. Rzĕ xtiidz me, rĕb me:

—Bzhiguiel mazd guiaate luu. Naraa rien naa choot nacd naa, par csodziin naa lo luu guiaad luu haxta ro lidz naa. ⁷ Nligaa rien naa tib zha winse nac naa par gbig naa lo luu, gane niicle biald naa nialdziej naa luu. Nanpaa naa, zaatne ziaad luu i, con tib lan xtiidz luu zac gnabey luu guiac zhingundziin naa. ⁸ Sca rnee naa, sac tel naa no zha ne rnabey lo naa, zeene rnabey zho naa none gon naa mine rnee zho; scaque zhaguiib ne rnabey naa, zeene rne naa tib lo zho: “Gĕey nu”, rie zho; zeene rnegaa naa: “Dĕ nu”, riaad zho; zha ne nacгаа zhingundziin naaw, mine rnabeytaa naa zho, run zhow.

⁹ Zeene bin Jesús sca rzĕ xtiidz men co, bzee zdoo me, ptsire lo me, rĕb me lo grĕ zha ne zienal zhits me:

—Golwi ganle pa lotaa rnalo men qui Dios. Lo grĕ zha Israel gon, ni tib zho gard gan naa squitaa dib zdoo gnalo Dios.

¹⁰ Grĕ zha ne gĕey mandad ga, zeene bdzin zho gon zho laa ngundziin co biacle.

Rrieaban xpĕĕd tib wnaa viud

¹¹ Bded ga, gĕey Jesús tib guiedz lĕ Naín grĕ xpĕĕdscuel me, miech guizhiu ne zienal zhits zho.

¹² Zeene bdzin zho gax ro guiedz co, lĕĕtaque bdzieelo zho tib dzoon miech ziequeets xpĕĕd tib wnaa viud; lĕĕse mĕĕd ga lo wnaa co. ¹³ Gon Jesús zha rac me, pquia zdoo Jesús me, wbig Jesús rĕb Jesús lo me:

—ĴGoondraa luu!

¹⁴ Dzigo bzhen Jesús yag ne zhoob ngutoo co. Zeene gon gza zha ne nxobyan

yag cow, hor co bzodze zho; dzigo bnee me lo mēed co rēb me:

—Xin, i guche i!

¹⁵ Horcogazha brieaban niib co, bzobli niib, laa niib psilo bnee.

Rley xniaa niib, pcaania me niib.

¹⁶ Zeene gon grē miech co sca brieaban mēed co, lala rdzieb zho, lala rdeed zho xquizh lo Dios, rnee zho:

—i Tib men nroob ne gon ziadteed xtiidz Dios i, ziaad lo ne! iLaa ne bdzian niina ganle, laa Dios ziaadgan ne, ziadbee me ne lo xquieinē ne!

¹⁷ Gdipse nēz Judé, ni grēraa guiedz ne ndxie dib gax ga, gocnan miech milagr nroob ne been Jesús ga.

Zha ne pxeel Juan Bautist

(Mt. 11:2-19)

¹⁸ Bin Juan Bautist grētaa milagr ne run Jesús ga, sac rie xpēedscuel Juan riezodiidz zhow lo Juan. Dzigo pxeel Juan chop zho, ¹⁹ zienabdiidz lo Jesús, dien pe me nac Men ne nole diidz ga cxeel Dios, te dzigoraa gdziñ men co ye.

²⁰ Bdziñ zho lo Jesús, wbig zho lo me, rēb zho:

—Laa Juan pxeel no ziaadnabdiidz no lo luu, dien pe lēēle Men ne nacle diidz ga cxeel Dios i nac luu, te naraa guiaad me ye.

²¹ Lēētaaque ndal miech ndxie lo me ga, quiayunguiac me grē men rzacnē. Nzian zho, tel pe guielguiidztaa rzac zho, no zho nosacsi mendox, no zho rold lo, grēse zho runguiac me zho. ²² Dzigo rēbchaa me lo zha ne pxeel Juan ga:

—Grēse mine bin to rne naa, grēga ncuane gon to quiayun naa, goltsie golzodiidza lo Juan. Rañ to ganle, grē zha ne rold lo, zha ne nē ni, zha ne rlan guiedz lepr, zha ne rcuaat, grēse zho laa zho riac, haxta grē mengut, rrieaban. Grēsew golzodiidza lo me, golguiab lo me ganle blactaa zha ne rquiin gbig lo Dios, laa zho noquiaadiag xtiidz Dios; ²³ ni golguiab lo me: dichos zha ne tiblque riladz cho nac naa.

²⁴ Zeene laa xpēedscuel Juan zey, dzigo psilo me bzeet me Juan lo grē miech guizhiu ne ndxie ga, rēb me lo zho:

—Zeene dien güey to dan ngan ne bio Juan ga, z zha güeynie guic to nian to me? iPe

rēb to rlu me zig tib goobgui ne nēzrii nēzrec rey me, ²⁵ te rēb to ye masaque grē lar niazh ne racw zha non nacw me? Per nanle to ganle, zha ne scataa racwxab, len grē yu ne rzob zha rnabey, ga rio zho. ²⁶ Nligaa cho güeynie guic to nac me, z te rēb to ye tib men ne noteed xtiidz Diosa?

'Gacnan to ganle, tib men ne noteed xtiidz Dios gon nac me, ni me nac tib zha ne mazdraa nroob lo grē zha ne ziyun dziin co. ²⁷ Me ga raquiet lo Xtiidz Dios, zaatne znu rnee: "Sxel naa tib zha ne tednerga lo luu, zha co gzhixcuaa nēz ne ted luu." ²⁸ Ne nligaa lo grēse mgui ne zieded lo guidzliu, gard grieequia tib zha ne mazdraa non lo Juan Bautist; per zha ne gon winraa zaatne rnabey Dios, nonraa zha co lo me.

²⁹ Len dze ne nochoobnis Juan miech ga, ndal zha ne bin zhiwseed me, haxta grē zha ne rtop dimi ne razh lo zha Roma, bien zho nonguiela gun zho mine rnabey Dios, güey zho pchoobnis Juan zho. ³⁰ Sangue grē maistr ley ni grē zha farisé, pe liaadz zho nion zho mine rnabey Dios, ib güeyd zho nchoobnis Juan zho.

³¹ Blozhse sca bnee me, rēbchaa me:

—Nac grē miech rii, ib rien zho pepaa racladz zho. iCho ganle run zigne run zho?

³² Lēē zho run mine run grē mēedlas ne rio wguic dib ro nēz. Niicle rool xcompañer win di nguieel, rieded win; niicle roolga zho di ngan, roond win. ³³ Sac gon, ziaad Juan, ran zho rowd me grē ncuane nac xquielwagw zho, niicle vina ried mew; dzigo rnee zho mendox nacie me. ³⁴ Blozh ga, ziaad Mgui ne pxeel Dios, ran zho row me, rie me, laa zho rneeque lega rowcho me, lega riecho me vin; ib rien me cho rtsieelsa me, haxta grē zha yozh ne rtop dimi ne razh lo zha Roma, haxta grē zha ngoopdol rzēnie me. ³⁵ Sca rnee zho, sangue zha ne rgaa guielbiini ne rdeed Dios, rien zho cho nac zha ne ziaadgun xtsiin me.

Güey Jesús lidz tib zha farisé

³⁶ Tib dze bredz tib zha farisé Jesús güey me tib wagw lidz zho. Bdziñ me, bded me bzob me lo mezh.

³⁷ Lad guiedz co no tib wnaa ro nēz, bin me laa Jesús bdziñ lidz zha farisé co, dzigo bi me tib bot nceit nex, tiblo nceit niazha,

briee me zie me nēz lidz zha co. ³⁸ Bdzin me ga, wbig me zaatne zob Jesús, psilo me roon me. Zigse roon me, lēēque nis ne riet lo me ga, bdiib me ni Jesús, ni pcuiidz mew con guits guic me. Dzigo ptsieelro mew, blozhse ga blee me nceit co bdēēb mew.

³⁹ Zeene gon zha farisé co sca been wnaa co, bza zdoo zho rēb zho: “Telne niaca mine nli men ne ziadteed xtiidz Dios nac men qui, nien me ganle tib wnaa ngoopdol i, ndeete me diidz squitaa nguēēbnia zho zhits ni me.”

⁴⁰⁻⁴¹ Dzigo bnee Jesús lo zha farisé co yquiaadiag zho chop lan xtiidz me, rēb me:

—Pquiaadiaga ganle Simón: Chop mgui name, quia zho guielqui lo men ne bleidiin dimi lo zho. Tib zho zēēb gaay mil pes plat, stib zho zēēb gaay gayoow. ⁴² Gonse men co ni tib zho rdzielz zha quizh zho dimi co, dzigo mazd pquia zdoo me zho, beenquizhd me zho xquielqui zho. Bnē nasca dien, lo grop zha co, ¿cho mazdraa sac zdoo mine been men co?

⁴³ Dzigo pquiab Simón, rēb Simón:

—Par naa, zha ne nroobraa xquielqui ga, zha co sacraa zdoo mine been me.

—Scaw gon —rēb Jesús—. ⁴⁴ ¡Miñcopaa nagon squi rac wnaa prob qui! Gon ganle zeene bzēēb naa lidz luu, bneedzd luu nis niar ni naa; mazd me gon bdiib me ni naa, maase niicle con nis ne biin me bdiib mew, ni haxta pcuiidz mew con guits guic me. ⁴⁵ Zeene blanso naa per ni tib bzhid bneedzd luu nquiaabdiuzh luu naa, laa me gon wlal ne blanso me nu tibaque quiat-sieelro me ni naa. ⁴⁶ Nac costumbr none nchoob luu nceit guic naa, per beend luuw; mazd mele gon bjaad biadtēēb me nceit nex rii zhits ni naa. ⁴⁷ Laa me noyun min rii, sacne nlipaa rzac zdoo me ben naa me perdon grētaa doldox ne nzēēb me. Zigne rneeque ne ga, tel zha ne zhis xtoła, zhi rzac zdoo zho zeene laa zho rac perdon.

⁴⁸ Dzigo bnee Jesús lo wnaa co, rēb Jesús peet tsienied guic me, laa Jesús beenle perdon grēse xtol me. ⁴⁹ Zha ne zobgza Jesús lo mezh ga, zeene gon zho sca rēb Jesús psilo zho rnabdiidzlsa zho, rnee zho:

—¿Cho dzigo rzac mgui qui nac me? ¿Zha nacne guiab me laa me been perdon xtol wnaa qui?

⁵⁰ Horco biire Jesús bnee me lo wnaa co, rēb me:

—Laa naa psilaa luu lo xtol luu, sac dib zdoo luu bnalo luu naa. Bzē naa, peet tsieniedraa guic luu.

8

Güeyseed Jesús miech dipse Galilé

¹ Bded ga, briee Jesús grē xpēēdscuel me güey me grēraa guiedz ne ndxie nēz Galilé ga, zigtaa guiedz nrooba, zigtaa guiedz wina, güey me güeynee me lo miech zha racladz Dios gban zho.

²⁻³ Ye blalaa men wnaa güeynal zhits zho, tel pe ncuane quianie grē men wnaa co, rdeed zhow run zho xyudar me; sac rzac zdoo zho beenguiac me zho. No zho beenguiac me lo guielguidz, nogaa zho benxoon me mendox ne nosacsi zho. Ga güeynal tib wnaa lē Marí Magdal (lēē wnaa co benxoon Jesús gadz mendox ne nosacsi me), ga güeynal stib men lē Zhuan (lēē tsieel Chuz ga, men ne quianap grē lo xtsiin rey Herod) ni stib men lē Susan.

Nac Xtiidz Dios zig zhobxtil

(Mt. 13:1-23; Mr. 4:1-20)

⁴ Tib dzew, miech guizhiu ne pcaalsa lo Jesús; nzian guiedz ne briee zho bdzin zho lo me. Laa me noseed zho, zeene bzodiidz me tib cuent rii lo zho, rēb me:

⁵ —Tib mgui name, briee zho güey zho gon zhobxtil. Zeene laa zho quialaal zhob co liu, now bliaal gax ro nēz, now bliaal lad quie, nogaaw bliaal len yag guiets. Mine bliaal ro nēz ga, zha ne bded bzēni zhow, blozh ga güeyaque grē mguin dow maw. ⁶ Mine bliaal zaatne nac lad quie, blana per znuse bidza sac guiend gop ga. ⁷ Mine bliaal len yag guiets co, zigne blana blanaque stib dzoon yag guiets, znuse bnitlo yag guietsa. ⁸ Sangue mine bliaal zaatne nac niapse lo liu, blana, brooba, ndzon goca, tib tib zhob ne biab liu ga now goc haxta tib gayoo zhob.

Blozhse bzodiidz me cuent co, nguiedz bnee me lo zho rēb me:

—¡Zha ne racladz guien mine rne naa, yquiaadiag zhow!

⁹ Dzigo wbig grē zha ne nac xpēēdscuel me, bnabdiidz zho lo me dien zha nac cuent co. ¹⁰ Rēbchaa me lo zho:

—Tel to, Dioszhal rlu lo to ganle zha rnabey me, niicle ncuane mazdraa ngeetsa; sangue grëraa zha ne squi gard gbig lo me, niapse con cuent rzodiidz naaw lo zho, parne guien zhow; per niicle scaw, ib rzoobdiagd zhow, ib rioguicd zho zha naca.

¹¹ 'Znu gon nac cuent co: Zhobxtil co nac Xtiidz Dios. ¹² Ro nëz ne sca bliaal zhob co, ga rlu ganle zha rzac zha ne rquiaadiag Xtiidz Dios, per znusaque rdziñ menox rquiil ma zho gliladzd zhow, zeena laad zho lo dol. ¹³ Lad quie ne bliaal spalala ga, ga rlu zha rzac zha ne rley rquiaadiag Xtiidz Dios, rley zho rcaania zhow, per rcaaniad zhow dib zdoo zho. Nli rliladz zhow palal dze, per zeene ran zho zha run miech zho, zha rnee miech lo zho, rsaanga zhow. ¹⁴ Nogaa zho nac zig len yag guiets co. Rquiaadiag zho Xtiidz Dios, per laa ne tsoniew guic zho, lel rsilo zho grë zhgab ne dien zha gapchen cho, dien zha gdeedguxt xcuerp zho lo guidzliu rii, min co rionie guic zho; pa së zho gban zigne rnabey Dios. ¹⁵ Laa lo liu naal co, ga rlu ganle zha rzac zha ne nguudz zdoo. Zeene rquiaadiag zho Xtiidz Dios, dib zdoo zho rcaania zhow, dib zdoo zho rliladz zhow. Grëse ncuane run zho, ndzinli rrieequiaw; sac tiblique rac zho.

Xcuent biini

(Mt. 12:46-50; Mr. 3:31-35; 4:21-25)

¹⁶ Blozh ga, bnee me lo grë miech ne ndxie ga, rëb me lo zho:

—Tsod zha ne yquiaagui tib biini, lozh ga ctoos zho pe cos low, gzolanga zhow tib zhan lon. Sac biini ne rquia, glaa rzoba par gziiniw len yu, zeena guiab biini lo grëse zha ne sëeb len yu. ¹⁷ Scaque nagon, grë ncuane rac ngeets, grë ncuane rnee miech zhlian, none xoobneña.

¹⁸ 'Wen wen golquiaadiag mine rne naa, ni goltsoxcow. Sac zha ne tsoxcow, zdeedraa Dios guielbiini lo zho; sangue zha ne tsoxcoda, haxta tel palalse guielbiini ne rzac zho quianie zho, stiche mew.

¹⁹ Dze co, scaque noseed me miech, zeene bdziñ xniaa me ni zha bets me ziegan zho me. Per brieelod ndziñ zho haxta lo me, sac miech guizhiu ne ndxie lo me ga.

²⁰ Dzigo rëb tib zho lo me:

—Laa xniaa luu gon, ni zha bets luu bdziñ ley ziaadguib zho luu.

²¹ Pquiab me rëb me:

—¿Xnia naa ye, bets naa ye? Grëse zha ne gon rquiaadiag Xtiidz Dios ni rioxco zho mban zhow, lëe zha co nac xniaa naa, zha co nac bets naa, zha co nac bzian naa.

Pcuëez Jesús tib medox

(Mt. 8:23-27; Mr. 4:35-41)

²² Tib bdze dze, bzëebnie Jesús xpëedscuel me tib len barcw, rëb me lo zho, tedquia zho stib nëz ro nis co.

²³ Laa zho zie lo nis co zeene laa me gootguies. Tibaque zeene psilo brieet tib medox, masaque riasoli lo nis co, zootle laa barcw ne no zho ga yguiitsle len nis.

²⁴ Zeene gon zho scataa ntseeb rac lo nis co, lëelëd güey zho güeycuaan zho me.

—¡Maestro! —rëb zho—. ¡Blee mcaallo luu ganle, laa ne nonitlo lo nis rii niina!

Dzigo guche me bnee me lo me co, ni bnee me lo nis co. Zigne bnee me, dzese biac me, dzese bre nis co. ²⁵ Dzigo rëbchaa me lo zho:

—¿Pe nacne rdzieb to? ¿Niacxe rliladzde to Dios dib zdoo to?

Ne nligaa rdzieb zho, ni lala rzee zdoo zho, rnabdiidzlsa zho rnee zho:

—¿Bay cho nac me? ¿Zha nacne haxta me, haxta nis ron xtiidz me?

Men Gadar ne nosacsi menox

(Mt. 8:28-34; Mr. 5:1-20)

²⁶ Bdziñ zho stib nëz ro nis co, ga nac xtan zha Gadar. Zo zho ga, nëz dan squi riaan xtan zha Galilé. ²⁷ Laa Jesús bietdze len barcw, zeene laa tib mgui ne no nëz co bdziñ lo me. Mban rlu mgui co nosacsi menox me, niicle xab me nacw-draa me; ib rbëzd me lidz me, niapse grë len xpaangutoo rio me. ²⁸ Zeene gon me Jesús, masaque roptsie me bdziñ me pquiitgzhil me lo Jesús, zëeb tsi me rnee me:

—¡Psaan naa Jesús! Nanpaa naa gon Xpëed Dios nroob ne zob gbaa nac luu. ¡Bzhiguiel csacsid luu naa!

²⁹ Per menox co sca rnee, sac hor co laa Jesús bnabeyle ma csaan ma me. Ziele dze sca nosacsi ma me, ntseeb rac me, niicle rzoob zho caden ni me, rzoob zho caden nia me, parne paat tsied me, znuse rchug mew; dzigo rienie menox co me

rquianzë me grë dan ngan, zaatne choot miech guieṅd.

³⁰ Dzigo bñabdiidz Jesús lo ma dieṅ cho lë ma. Pquiab ma rëb ma:

—Legion lë no.

Sca rëb ma sac nzian nac ma no ma zdoṅ mguì co. ³¹ Ni bñab ma lo Jesús gzonëzd me ma lo ncowdoo ne noraa ma ne nacgrë ma. ³² Gaxaque ga ndxie tib dzoon nguts notop lag, bñab ma gdeed me diidzbey lose grë nguts co gdziṅ ma. Dzigo bdeed me diidz.

³³ Horco laa grë meṅdox co psaan mguì co, güeysëeb ma zdoṅ grë nguts co. Psilo grë nguts co rquiaa ma corr; güeypix ma tib ro yeedox ne quia ro nis co, bliaaṅ ma haxta lo nis; grëse ma gut.

³⁴ Grë zha ne quianap nguts co, bzhoon zho, rias zho güeyzodiidz zhow lad guiedz, ni grëraa yu ne zob gax ga. ³⁵ Nacne brieë grë miech co ziewi zho. Zeëne bdziṅ zho, per nli bdzieb zho goṅ zha laa meṅ co zob gax lo Jesús, laa me nacwxable, rlu niinile nac guic me. ³⁶ Psilo grë zha ne goṅ zha biac me rzodiidz zhow lo grë zha ne bdziṅ ga. ³⁷ Mazdraa bdzieb grë miech co bin zhow, dzigo mazd bñab zho lo Jesús siguiel me gbi me xtan zho.

³⁸ Zeëne laa Jesús zie sëeb me leṅ barcw par gbi me ga, dzigo wbig mguì co rnab me lo Jesús siguiel Jesús tsienal me zhits Jesús; per bzhiguielṅ Jesús nienal me, rëb Jesús lo me:

³⁹ —¡Biaan! Güey, güeyzodiidz lo grë meṅlidz luu ganle zha nactaa milagr ne been Dios beṅguiac me luu.

Dzigo wbire meṅ co. Güey me lad guiedz, grëse lo miech güeyzodiidz me zha nactaa guielnzaac ne been Jesús ga, beṅguiac Jesús me.

*Brieëban tib xpëdwnaa tib meṅ lë Jair
(Mt. 9:18-26; Mr. 5:21-43)*

⁴⁰ Zeëne laa Jesús biire bdziṅ stib nëz ro nis co, miech guizhiu ne quiambëz me ga, rley zho goṅ zho laa me bdziṅ. ⁴¹ Loxaque bdziṅ me, laa tib meṅ ne rnabey yadoo lë Jair wbigle pquitsgzhìb lo me. Rnab Jair siguiel me tsienal me lidz Jair tsiegunṅguiac me tib xpëdwnaa win Jair.

⁴² Nzhoo rac mëed co, tib mëed tsiipchop iza, ni lëese mëed ga lo me.

Dzigo laa Jesús zie nëz lidz meṅ co. Miech guizhiu ne zienal zhits me, haxta rtaagw zho me. ⁴³ Lad grë miech co zienal tib wnaa rzacnë, gocle tsiipchop iz rlan me tib guielṅguidz, rzac me zigne rzac grë meṅ wnaa gzob mëe; tibaque rlan mew ib rbëzda. Grële ncuaane rap me bloozh me lo grë meṅ ne ruṅ rmed, per ni tib zho runṅuiacd me. ⁴⁴ Laa me no lad co, tibaque wbig gax me nëz zhits Jesús, bzheṅ me ni lar ne mbix Jesús; hor cogazha laa me biac. ⁴⁵ Bien Jesús sca bzheṅ wnaa co lad xab me, dzigo rëbchaa me:

—¿Cho ga bzheṅ lad xab naa?

Grëse zho rnee led zhada. Dzigo rëbchaa Pedr lo me:

—Maestro, wi ganle zha ndaagwtaa ziaad luu lad grë miech rii, haxta rcheep zho luu, ¿zha naṅ luu choot xend lad xab luu?

⁴⁶ —Per no cho bzheṅ lad xab naa —rnee me—, sac bienpaa naa beṅguiac naa zho.

⁴⁷ Zeëne goṅ wnaa co bien Jesús sca bzheṅ me lad xab me, rdzieb me laa me wbig pquitsgzhìb me lo Jesús. Squi ndxie grë miech co, bzodiidz me zha nacne sca been me, ni zha zigne bzheṅ me lad xab Jesús laa me biac. ⁴⁸ Dzigo rëbchaa Jesús lo me:

—Xin, laa luu biac sacne dib zdoṅ luu bnalo luu naa. Bzë na, peet tsieniedraa guic luu.

⁴⁹ Laa Jesús bii quianeeque lo wnaa co, zeëne laa tib zha ne nac mandad ziaad nëz lidz Jair bdziṅ, rëb zho lo Jair:

—Csodziindraa luu lo meṅ qui, laa xpëed luu gutle.

⁵⁰ Zeëne goṅ Jesús sca rëb zha co, rëbchaa me lo Jair:

—Peet tsienied guic luu. Dib zdoṅ luu bnalo Dios, zeëna peet gacd xpëed luu.

⁵¹ Bdziṅ zho lidz Jair, psandraa Jesús naṅ grë miech co zhits me ndziṅ zho zaatne nix mëed co. Loxaque Pedr, Jacob, ni Juan, pxoz win ni xniaa win bzëebnie me leṅ yu ne nix win. ⁵² Grë miech ne ndxie ga, roon zho no zho xquielnë win; dzigo rëbchaa Jesús lo zho:

—Goonde to; sac goṅ nixguiesse mëedwin rii, gute win.

⁵³ Psilo zho lel rzhidznie zho me, sac naṅpaa zho gutle win. ⁵⁴ Dzigo wbig me,

bzhen me nia win, nguiedz bnee me lo win, rëb me:

—¡Guche i na, ndzooop yeen!

⁵⁵ Zigne sca bnee me, laa mëed co brieeban, laa win guche ga; dzigo bnabey me bguiaan zho win.

⁵⁶ Zigtaa pxoz wina, zigtaa xniaa wina, per nli rley me. Dzigo pso Jesús diidz lo me, choot lo gzodiidz me zha brieeban win.

9

Pxeel Jesús xpëedscuel me güeyseed zho miech

(Mt. 10:5-15; 14:1-12; Mr. 6:7-29)

¹⁻² Tib dze bredz Jesús gza tsiipchop xpëedscuel me, pxeel me zho tsienee zho lo miech gacnan zho zha racladz Dios gban zho; bdeed me poder lo zho gunxoon zho grë menox ne nosacsi miech, ni gunguiac zho grë men rzacnë.

³ —Goltsie —rëb me lo zho—. Per ib güeyde to ncuaane yquiin to nëz. Zig nac dimi, zig nac ncuaane gow to, pe bziuud, pe baxtongaa, güeyde tow; xab tow, mine nacwse to mincose goltsienie. ⁴ Guiedz ne gdzin to, zha ne gneedz zaatne cuëz to, lidz zha co golcuëz, haxta gdzin dze ne gbi to guiedz co. ⁵ Per telne gdzin to tib guiedz, nëd miech yquiaadiag zho mine zienee to, dzigo gollit grë yudie co ni to, golrieegazh ga, zeena guien zho ganle dol ga been zho lo Dios, nëd zho ycaania zho xtiidz me.

⁶ Dzigo laa zho briebe, laa zho zie. Grëse guiedz ne ndxie dib gax ga, güey zho güeynee zho Xtiidz Dios lo miech, ni beenguiac zho grë men rzacnë.

⁷ Bin rey Herod rzeet zho Jesús, sac tel pa lotaaw zëeb diidz grëta milagr ne run me. Grë miech co, no zho rzac Juan Bautist ga brieeban, lëe me ga nac Jesús; ⁸ nogaa zho rnee bod Líw, men ne biadteed xtiidz Dios padzeela, me ziaad stib; zzhisgaa zho rnee no cho stib men biadteed xtiidz Dios padzeelaw, sinque brieeban me gane ziaad me stib.

⁹ Zeene ron Herod rnee grë miech co lëe Juan ga, rio me zhgab, rnee me:

—¿Bay cho nac men co? Per gacda Juan; naazhal name bnabey pchug zho yan Juan.

Racladz Herod tebaa zha gan me Jesús.

Bguiaan Jesús gaay mil miech

(Mt. 14:13-21; Mr. 6:30-44; Jn. 6:1-14)

¹⁰ Goc bla dzew, laa grë zha ne pxeel Jesús ga wbire bdzin lo me. Blozhse bzodiidz zho lo me grëse tel zha güey zho, dzigo güeynie me zho tib lugar riaan gax guiedz Betsaid.

¹¹ Zeene bin grë miech co laa me briebe, dzigo brieenal zho me, bdzin zho lo me ga. Zeene gon me zho, rley me pcaania me zho, bnee me lo zho zha racladz Dios gban zho, ni beenguiac me grë zha ne rzacnë. ¹² Laa dze rdzelew, wbig gza tsiipchop xpëedscuel me rëb zho lo me, mazd gnee me lo grë miech co gbi zho ga; zeena guiob tsie zho grë guiedz las, grë yu ne riaan gax ga, yguib zho dien pa cuëz zho, yguib zho dien pe gow zho; sac choot miech nod ga.

¹³ Dzigo rëbcha me lo zho:

—To goldeed ncuaane gow zho.

Pquiab zho rëb zho:

—Gaayaque quietxtil ni chop mel ziaadnie no nu, ipe rnase ncuaan co lo grëta miech qui! Niicle niaca mine gziuu ncuaane gow zho, pe zhidaa dimi yquiin, ¿pa guioxi now?

¹⁴⁻¹⁵ Nligaa miech tafa, zig gaay mil rgaa loxaque zha bguise. Dzigo bnabey me zho güey zho, güeynee zho lo grë miech co sob zho, cue zho grol gayooga, grol gayooga zho tib lugar. ¹⁶ Laa grë miech co bzob, dzigo bzhen Jesús gza gaay quietxtil co ni grop mel co, blis lo me nëz gbaa, bdeed me xquizh lo Dios. Blozhse ga, beengrol me gza quietxtil co, mel co ne, dzigo zigse rdeed mew lo xpëedscuel me, scase scase rguiz zhow lo grë miech co. ¹⁷ Grëse zho dow haxta zaatne bieltaa zdoo zho; ni zeene blozh dow zho, biodzë tsiipchop chicuid bio grë mine biaan.

Bnee Pedr cho nac Jesús

(Mt. 16:13-19; Mr. 8:27-30)

¹⁸ Tib dze biche Jesús lo miech palal, güey me tib zaatne güeyzodiidznie me Dios; loxaque xpëedscuelse me güeynal zhits me. Ga bnabdiidz me lo zho rëb me:

—¿Cho dien ron to rnee miech nac naa?

¹⁹ Pquiab zho rëb zho:

—No zho rnee Juan Bautista, nogaa zho rnee Líw (men ne biadteed Xtiidz Dios padzeela); nogaa grol zho rnee no cho stib

men ne biadteed Xtiidz Dios padzeelaw, sinque brieaban me gane ziaad me stib.

²⁰ —¿To waa? —rëb me lo zho—. ¿Cho rzac to nac naa?

Horco pquiab Pedr, rëb Pedr lo me:

—¡Luu nac Men ne zëëble diidz ga cxeel Dios!

²¹ Dzigo pso me diidz lo zho choot lo gneed zhow.

Bzeet Jesús zha guñ miech me

(Mt. 16:21-28; Mr. 8:31-9:1)

²² Tib vuelt bzeet Jesús lo grë xpëëdsuel me zha csacsi miech me. Rëb me, nroob grë ncuane cteed zho me; grë zha non lo menguedz, grë pxoz rnabey, grë zha ne rseed miech ley, ible stsidil zho me, ni haxta zut zho me; per zeene gac tson ngbidz gut me laa me grieaban.

²³ Ni rëb me lo grë miech ne ndxie lo me ga:

—Zha ne racladz sëëb xnëz naa, none cueeladz zho zho, none lëb zho gzataa dze guiaadnal zho mine rnabey naa, nicle tel min co yquiaaqui csacsi miech zho. Nodne yquia zdoo zho xquielmban zho, ²⁴ sac zha ne yquia zdoo xquielmban, lel znu nitlo zho; sangue zha ne sca cueeladz xquielmban porne no zho xnëz naa, ib zgaa zho tib guielmban ne gdzind dze lozh. ²⁵ Zha ne zienie guic loxaque gapchen, ¿pa dien yquiina lo zho, tel por lëew rsacsi zho zho, tel lëew yquiaaqui guey zho gabil? ²⁶ Naa ne nac naa Mgui ne pxeel Dios, zha ne ctoladz guiab zho laa zho no xnëz naa, ctoladznegaa zho xtudz naa; scaque naa stoladznie naa zho gal dze ne laa naa guial stib. Dze ne guialnie naa grë xanj! Pxo naa, guiallu naa guielndzon ne rap me.

²⁷ Blozhse sca bnee me, rëbchaa me lo grë miech co:

—Ni gni naa lo to ganle, nzian grë zha ne ndxie nu niina, ib tedsod bii zan zho zeene laa Dios glu zha rnabey me.

Bdzëëlo Jesús

(Mt. 17:1-8; Mr. 9:2-8)

²⁸ Goca maase xon ngbidz, güey Jesús tib guic gui gza me Pedr, Jacob ni Juan; laa me zie ga ziezodiidznie me Dios.

²⁹ Laa me nozodiidznie Dios, zeene laa me bdzëëlo. Masaque biinidoo ne rriee lo me, xab mew, nquitsbie rnaw, haxta

rquiabniw. ³⁰⁻³¹ Tibaque briequia Lí grop Moisés bdzin lo me ga, psilo zho nozodiidznie zho me grë guielnë ne cteed miech me Jerusalén, zeene laa me gbi lo guidzliu. Masaque biinidoo ne riab, ncuane gzee zdoo new.

³² Laa zha ne zienal zhits me, rcow zho mcaal zob zho ga; per zeene biab biini nroob co, hor co bzhial lo zho gon zho zha rlu me gza me Lí ni Moisés. ³³ Laa grop men co ziebiche lo Jesús, zeene rëb Pedr lo me:

—Maestro, iwena gon tebaa gbiaaz ne nu! Na maase gzaa no tson yu yag xiid win, tiba cuëz luu, tiba cuëz Moisés, stiba cuëz Lí.

Per niicle Pedr rien daque dien pe nacne sca rnee Pedr.

³⁴ Laa Pedr bii quianeeque, zeene bre tib xcow zaatne zo zho ga; per nli bdzieb zho gon zho laa zho biaan len xcow co. ³⁵ Dzigo bin zho zëëb tib tsi men co lo xcow co, rnee me:

—Lëë Xpëëd naa i gon, rleynie naa me. Golgon mine rnee me.

³⁶ Zeene blozh bin zho tsi men co, gon zho loxaque Jesússe zo ga.

Grëse mine gon zho ga, ib choot lo bneed zhow len dze co.

Biac tib mëëd ne nosacsi mendox

(Mt. 17:14-21; Mr. 9:14-29)

³⁷ Biini liu co, laa Jesús wbi guic gui co gza me zha ne güeynie me ga. Miech guizhiu ne güeydzieelo me. ³⁸ Lad grë miech co brie tib mgui, wbig me lo Jesús rëb me:

—Maestro, bzhiguiel bui ganle zha rac xpëëd naa. Tibaque mëëdbgui rii nac mëëd lo naa, ³⁹ ni na laa mendox nosacsi win. Zeene rdzin ma rcoptsiedan ma win, rron ma win liu, ga nix win runcxidz ma win, ni masaque rdzib mtsiin ro win; nen rsaan ma win. ⁴⁰ Blansonie naa win nu, bnaab naa lo xpëëdsuel luu guncxoon zho mendox co, per brieelod zho.

⁴¹ Dzigo rëbchaa Jesús:

—¡Pe nac squitaa miech ntseeb nac to, ib nëde to gnalo to Dios! ¿Pa lal dze ne so naa gne naa lo to? ¡Ncuane cxcwdraa naa lo to squitaa nac to! Dënie xpëëd luu nu —rëb me lo men co.

⁴² Zeene laa mëëd co ziegax lo Jesús, hor co bron mendox co win liu, nix win ga masaque rzhidz win. Dzigo goctox Jesús

lo ma, beñcxoon me ma. Horcogazh biac mēed co, laa me bdeed win lo pxoz win. ⁴³ Grē miech ne ndxie ga, per nli rzee zdoo zho goñ zho scataa nroob poder ne rap Dios.

Grēse miech ne ran grētaa milagr ne ruñ Jesús, rzee zdoo zho.

*Bzeet Jesús stib laa miech csacsi me
(Mt. 17:22-23; Mr. 9:30-32)*

⁴⁴ Biire Jesús bzeet me lo xpēedscuel me zha guñ miech me, rēb me:

—Wen wen golquiaadiag miñe gni naa lo to nu ganle. Naa goñ ne nac naa Mgui ne pxeel Dios, ible ziolo zho naa ladznia miech.

⁴⁵ Per ib riend zho zha nacne sca rnee me, sac gard gdeed Dios diidzbey hor co guien zho zha naca; niicle par gnabdiidz-gaa zho, rdzieb zho gnabdiidz zhow lo me.

¿Cho nonraa?

(Mt. 18:1-5; Mr. 9:33-40)

⁴⁶ Horco psilo zho noneelsa zho dien cho tib zho gac zha non.

⁴⁷ Bien Jesús sca no zho, dzigo bnee me lo zho, bredz me tib mēedbgui win, ⁴⁸ rēb me:

—Grē zha ne no xnēz naa, zha ne guñcas tib mēedwin zig mēed rii, gleyne zho win, rrieequia naa ga rleyne zho. Ni zha ne gleyne naa, rrieequia men ne pxeelle naa ga rleyne zho. Telne racladz to gacnan to dien cho nac zha non, gacnan to ganle, zha ne tsoxco gac zig tib ngundziin lo samiech, zha co nac zha non.

⁴⁹ Blozh ga, rēbchaa Juan lo me:

—Maestro, bdzion no tib zha co goñ bzeet zho lē luu zeene beñcxoon zho mendox, nacne nli blisqui now lo zho, sac led yed zho nacgrē ne.

⁵⁰ Dzigo pquiab me, rēb me:

—¡Guñscade to! Sac goñ zha ne racnie ne, grieelod lēeque zha glēenie ne.

*Ndox Jesús lo Juan grop Jacob
(Mt. 8:19-22)*

⁵¹ Leñ dze ne ziaadyob gbi Jesús lo guidzliu rii, leñ dze co bio me nēz laa me zie nēz Jerusalén. Tiblique bio guic me, ib pquiad zdoo me, laa me zie. ⁵² Zeene bdzin me xtan Samar, pxeel me bla zho bdedner zie zho tib guiedz win ne ndxie nēz co, par dien pa lo gdeed miech co cuēz me.

⁵³ Bdzin zho guiedz co, choot bzhiguiel ndeed zaatne mbēz me; sac bien zho nēz Jerusalén tsie me. Nac zha Samar, rlēenie zho zha Israel.

⁵⁴ Zeene bin Jacoba grop Jacob Juan, blēe guic zho, rēbchaa zho lo me:

—Maestro, ¡mazd tibaque gotsaa gnab ne gliaal gui lad grē miech rii, zeena nitlogazh zho!

⁵⁵ Biecwaque me, goctox me lo zho rēb me:

—Riende to lēe zhapaa nac men ne nacie to. ⁵⁶ Golguien ganle, naa ne nac naa Mgui ne pxeel Dios, ziald naa par gnitlo naa miech, sinque laa naa zial csilaa naa zho lo dol.

Ga brie zho güey zho stib guiedz.

⁵⁷ Nēz zie zho, zeene wbig tib mgui co rēb me lo Jesús, laa me racladz tsienal me zhits Jesús, tel pa lotaa nac zaatne tsie Jesús.

⁵⁸ Dzigo pquiab Jesús rēb Jesús lo me:

—Gocnaña ganle, naa ne nac naa Mgui ne pxeel Dios, peet rapd naa nu, mazd zig nac grē mēz, grē mguin, rap ma zhibliee ma, rap ma zhiptsieez ma; per naa per ni zaatne gaguies naa quianied naa.

⁵⁹ Laa zha ne bredz me tsienal zhits me, pquiab zho rēb zho:

—Sēnal naa zhits luu, per bzhiguiel bneedz diidzbey cuēz naa, gangazh naa tsoliu pxoz naa.

⁶⁰ Rēbchaa me lo zho:

—Nzian grē zha gut no, psaan tsow tsie samengut zho tsiequeets zho. Sangue luu zhits naa dēnal, zeena tsie luu tsienee luu lo miech, gacnan zho zha racladz Dios gban zho.

⁶¹ Pquiab stib zho rēb lo me:

—Maase sēnal naa zhits luu, per bneedz diidz ganiegazh naa diidz lo grē menlidz naa.

⁶² Dzigo rēbchaa me:

—Zha ne xen nia rad ni csilo zho gwi zho nēz zhits zho, niacxe zrieelo ygan zho ngon. Scaque zha ne sēeb xnēz Dios, grieelod sēeb zho telne mazdraa rleyne zho grē ncuanañ lo guidzliu rii.

10

*Güey tsongaltsii zha ne güeynee Xtiidz Dios
(Mt. 11:20-24)*

¹ Tib dze, ble Jesús stsongaltsii zha ne rquiaadiagle zhiwseed me, bnabey me tedner zho lo me tsie zho grë guiedz ne no ted me, pxeel me zho chopga chopga zho.

²—Golnab lo Dios —rëb me—, cxeelraa me zha ne gun xtsiin me. Sac ne nligaa ndaldoo miech ne quiambëz yquiaadiag Xtiidz me, zha ne gneelew lo zho rgaad. ³ Goltsie sca, per nsin nsin golso. Golguien ganle rrieequia nac to zig cho mëcwxiil yeen, ni laa naa rxel to zaatne no grë coyot dox. ⁴ Peet güeyde to, güeyde to dimi, güeyde to ncuane gow to, lab tow, mine quiase ni to mincose goltsienie.

Miech ne yquiaabdiuzh to nëz, sode to dieen zharaa yquiaabdiuzh to zho. ⁵ Zeene yguib to zaatne cuëz to, yu ne gdzintaa to, golnab gunlay Dios grë zha ne no yu co. ⁶ Telne squiaadiag zho mine rnee to, zunlay me zho; telne nëdgaa zho yquiaadiag zhow, dzigo toque gunlay me. ⁷ Zha ne gneedz zaatne cuëz to, lidzse zha co golcuëz, tsiede to stib yu stib yu; guielwagw ne gneedz zho lo to, ctoladzde to golgowa; sac gon zha ne run dziin, ib none ycaa zho mine non xtsiin zho.

⁸ 'Guiedz ne yquiaadiag miech mine zienee to, zaacse golgac lo zho, tel pe guielwagw ne gneedz zho, golquiina; ⁹ golgunguiac grë men rzacne ne no ga. Golguiab lo zho, laa dze ne nolu Dios zha sëeb miech xnëz me, laa dze co bdzinle. ¹⁰ Sañgue guiedz ne siguield miech yquiaadiag zho mine zienee to, golriee grë ro xnëz zho, ¹¹ ganlo zho glit to grë yudie co ni to, zeena guien zho ganle nëz ne nitlo zho ga zie zho. Golguiab lo zho, zha bguiba, sac binpaa zho zha grieelo sëeb zho xnëz Dios ni nëd zho gon zho diidz. ¹² Gacnan zho ganle, gal dze ne gun Dios xquielwxtis me, lëetaa gac guielnë ne tsieguial zha Sodom, mazdraa nac guielnë ne tsieguial zho.

¹³ 'Scadaa nac zha Corazín ni zha Bet-said. ¡Probsaxe zho, sac gon gonpaa zho grë milagr ne run Dios, per ib psaand zho xquielntseeb zho! Tel niaca mine ngaa grë men Tiro, grë men Sidón, nian grë milagr ne gon zho, ib ndedsod mban niac grë zha co nio zho guielnë, zëeb nsaan zho xquielntseeb zho mbig zho lo Dios.

¹⁴ Gacnan zho ganle, gal dze ne gun Dios

guielwxtis, lëetaa caxtigw ne yгаа zha Tiro ni zha Sidón, mazdraa mine yгаа zho. ¹⁵ Scaque zha Capernaum, masaque rzac zho niina zha nziuuraa lo Dios, per gacnan zho ganle haxta guiet len gabil ga guey zho.

¹⁶ Blozhse sca bnee me, rëbchaa me lo zho:

—Grëse zha ne yquiaadiag mine gnee to, rrieequia naa ga rcaania zho. Zha ne nëdgaa ycaania to, rrieequia naa ga nëd zho ycaania zho; ni zha ne nëd ycaania naa, rrieequia men ne pxeel naa ga nëd zho ycaania zho.

Wbire tsongaltsii zha ne pxeel Jesús ga (Mt. 11:25-27; 13:16-17)

¹⁷ Zeene laa gza tsongaltsii zha co wbire, rley zho bdzin zho lo Jesús. Rëb zho haxta grë mendox bdzieb ma zho, zeene bzeet zho lë me.

¹⁸ Dzigo pquiab me rëb me lo zho:

—Haxta ma ne rnabey lo ma, gonpaa naa gon bringaa ma, biab ma zig riabse tib belye. ¹⁹ Laa naa bneedz poder qui lo to, parne gdeete to diidz gun ma mine racladz ma; grë meeldox, grë meegu ntseeb, niicle gzoobni to ma, peet gacde to. ²⁰ Nli laa to runcxoon mendox niina, per gleyde to por min co, sinque mazd golley porne laa lë to zhooble lo Dios, laa to ngable lo me.

²¹ Horco biaad tib guielbley nroob zdoos Jesús, bnee me lo Dios, rëb me:

—Papá, luu nac men ne rnabey gbaa, luu nac men ne rnabey guidzliu, rnedz naa xquizh lo luu, sac grë mine noyun luu nu niina, bdeete luu diidz niacnan grë zha raca, sinque laaw blu luu lo grë zha ne nac zig grë mëedlas. Sca quiayun luu, sac ib scale racladz luu gaca.

²² Blozh ga rëb me lo grë miech ne ndxie lo me ga:

—Grëse ncuane ran to quiayun naa, Dios men ne nac Pxoz naa, me bneedz poder rii lo naa; sac ib laa me bzo naa, naa guna. Xpëed me nac naa, wen wen runbey me naa, scagaa naa wen wen runbey naa me. Choot runbeyd me zigne runbey naa me, per zha ne gded naa diidz gunbey me, zunbey zho me.

²³ Dzigo rëbchaa me lo xpëedscuel me:

—Dichos to bgaa to noyan to grē min rii.
²⁴ Sac gon blactaa zha ne biadteed xtiidz Dios padzeela, haxta grē zha ne bnabey len dze co, bzoobladz zho nian zho grē ncuane noyan to, bzoobladz zho nquiaadiag zho grē ncuane noquiaadiag to.

Xcuent tib zha Samar

²⁵ Tib dze wbig tib zha ne nac maistr ley lo Jesús, bnabdiidz zho lo me, rēb zho:

—Maestro, bnē lo naa dien, ¿pe nac mine gun naa parne grieelo ygaa naa guielmban ndzon ne gdziind dze lozh?

²⁶ Pquiab Jesús rēb me:

—¿Zha dien zhobnee lo ley? ¿Pe rnabeya?

²⁷ Rēbchaa maistr ley co:

—Znu rneew: “Dib zdoo luu, dib nace luu, dib guielbiini ne no guic luu, dipse xfuers luu, bleynie Dios; ni bleynie samiech luu, zigne rleyne luu luu.”

²⁸ —¡Min qui nagon bioxco gun luu —rēb Jesús—, zeena ygaa luu guielmban ndzon ne gdziind dze lozh ga!

²⁹ Per par glud ne noxcod me gun me mine rnabey ley, dzigo pquiaalo me rēb me lo Jesús:

—¿Chopaa dzigo nac samiech naa, zha ne no gleyne naa?

³⁰ Dzigo bzodiidz Jesús tib cuent lo me, rēb Jesús:

—Tib men wladz name brieē me Jerusalén zie me guiedz Jericó. Nēz zie me brieēquia ngbaan, bdiñ ngbaan me, mer niut ngbaan me; grēse ncuane ney me, haxta xab me blan ngbaan. ³¹ Laa me nix ga, zeene laa tib pxoz bded. Zigne gon pxoz me, biēcwgā pxoz bded pxoz tib lad. ³² Wdzeepaaw, zeene laa tib zha ne runaque dziin len yadoo ziaad ga; scaque zigne gon zho me, tib tib bded zho. ³³ Sca nix me ga, zeene laa tib zha Samar bdiñ. Zeene gon zho me, wbig gax zho lo me; pquia zdoo zho me gon zho zha rna me.

³⁴ Gagazh been zho me rmed, blee zho vin bdiib zho lo grē rid ne ney me, bdēēb zho nceita, pxidoo zhow. Blozhse ga, blis zho me bzoob zho me lad xcuaay zho laa zho zienie me, haxta bdiñnie zho me tib yu ne rbēz miech ne zo nēz; ga blēznie zho me, pquianap zho me.

³⁵ ‘Biini liu, zeene laa zho brieē ga, blee zho palal dimi, lal ne non chop xtse zha ne rie dziin, bdeed zhow lo bizhuan yu co, parne yquiaanap me men co, rēb zho: “Peet tsienied guic luu, telne nroobraa gun luu gaxt, na zeene gbire naa dzigo quizh naaw.”

³⁶ Blozhse bzodiidz me cuent co, rēbchaa me lo maistr ley co:

—Lo gza tson zha ne nadien bded zaatne nix men co, ¿cho tib zho bien samiech zho ga nac me?

³⁷ Pquiab maistr ley co rēb me:

—Zha ne bion bded gaw, sac zha co pquia zdoo me.

Dzigo rēbchaa Jesús lo me:

—Sca nagon none gun luu.

Blēz Jesús lidz Mart ni Marí

³⁸ Laa Jesús no nēz gza xpēēdscuel me. Bdiñ me tib guiedz win, ga no tib wnaa lē Mart, dzigo men co bdeed zaatne blēz zho.

³⁹⁻⁴⁰ Bdiñ zho lidz Mart, lēlēd bzēēb Mart ro tie. Zhixco ro tie no Mart, laa tib bel Mart lē Marí zob noquiaadiag grē zhiwseed Jesús. Gon Mart rgaadraa nia Mart, dzigo wbig Mart rēb Mart lo Jesús:

—Bzhiguieñ bnee lo bel naa guiaad me gun me xyudar naa. Bui ganle tipse naa psan me ro tie.

⁴¹ Pquiab Jesús rēb Jesús lo me:

—Aque luuw nli Mart, squitaa noxco luu dien zha gac xtsiin ro tie luu. ⁴² No tib ncuane mazdraa none tsoxco luu, ni lē min co nu gon noyun Marí; gane grielod ycaa naa mine quiayun me.

11

Zha none gzodiidznie ne Dios

(Mt. 6:9-15; 7:7-11)

¹ Tib vult, loxaque blozh bzodiidznie Jesús Dios, wbig tib xpēēdscuel me rēb lo me:

—Maestro, bzhiguieñ blu lo no dien zha gzodiidznie no Dios, zigne been Juan Bautist pseed me xpēēdscuel me zha gzodiidznie zho Dios.

² Dzigo rēbchaa Jesús:

—Zeene gzodiidznie to Dios, golguiab: Dios, luu nac Pxož no, zob luu gbaa; luuse nac men ne mazdraa ndzon. Luu nac men ne gnabey no,

mine gnabeytaa luu, zigne raca gbaa, scaque none gaca lo guidzliu nu.

³ Been guiel_{in}zaac bneedz ncuaane dioow no nadze.

⁴ Bzhiguiel_{in} been no perdon grese dol_{in} ne ziodziuu_n no lo luu, zigne rdziuu_n no samiech no perdon gre falt ne ru_n zho lo no.

Gdeete luu diidz yquuil mendox no, been guiel_{in}zaac bla no lo ma.

⁵ 'Sca nagon_n gnee to —reb Jesus—. Ncuaane gnab to lo me zneedz mew. Samiechse to name, gzoob ne wxina, lega nacle glanso tib zha ne ndzieeldiidz to ni guien_d pe gdeed to gow zho. Dzigo tsie to lidz stib zha ne ndzieeldiidz to guiab to lo zho: “Bzhiguiel_{in} beenxtad tsonaque xcuu_n luu lo naa. ⁶ Lega nacle blanso tib zha ne runbey naa, na guien_d pe gded naa yquiin zho.” ⁷ Segur znë zho: “Gunneete luu naa nu, dziitsle nioog ro lidz naa, nataa nixguies gre xpëed naa; grieelod gache naa gnedz naa ncuaane racladz luu.” ⁸ Per telne sonaad to ga, ganse zho tibaque quianee to, gnid naa zho tsieched zho gneedz zho ncuaane racladz to. Per gneedzd zhow porne ndzieeldiidz to zho, sinque laa zho gneedza porne gon_n zho tibaque quianab tow. ⁹ Scaque nagon_n none gun_n to, zeene pe gnab to lo Dios. Ncuaane rquiin to, golnaba lo me, scagaa me zneedz mew. Golguib tel_n pe racladz to, me nac men_n ne gacnie to gdziel tow. Golcuedzle me, scagaa me scaania me to. ¹⁰ Sac grese zha ne rbig lo me rnab zho ncuaane rquiin zho, rdeed mew. Zha ne rguib ncuaane racladz zho, racnie me zho rdziel zhow. Zha ne rbedzle me, rcaania me zho.

¹¹ 'Golguien_n ganle, zig nac to, zeene rnab xpëed to tib mel_n gow win, zniacxe ziazh to co to tib meel_n nia win? ¹² Zeene rnabгаа win tib dzit, zniacxe zgo to tib meegu nia win? ¹³ Led rioxco to lëe niapse ncuaane wen rdeed to lo xpëed to, niicle ne miech ntseeb nac to. Telne sca rioxco to xpëed to, pelel_n Pxo_nz to dzigo, men_n ne zob gbaa, tsoxcod me to. Ib tedsod grese zha ne gnab lo me gdeed me ncuaane rquiin zho, zdeed mew; haxta zha ne gnab cxeel_n me Espiritu Sant gacnie zho, zu_n me mine gnab zho.

Rëb zho mendox nacnie Jesús

(Mt. 12:22-30, 43-45; Mr. 3:20-27)

¹⁴ Tib vuel_nt ben_ncxoo_n Jesús mendox ne nosacsi tib mgui co. Ib gacd gnee mgui, sac psan_n ngop ma mgui. Dzigo zigne ben_ncxoo_n Jesús ma, laa mgui psilo bnee. Gre miech ne ndxie ga, bzee zdoo zho gon_n zhow. ¹⁵ Nogaa zho rnee, Beelzebú ma ne rnabey lo mendox, ma co nacnie me gane rrieelo run_ncxoo_n me mendox. ¹⁶ Brieequia spalal zho, rnab zho lo me gun_n me pe stib milagr, parne gliladz zho nli Dios pxeel_n me.

¹⁷ Bien Jesús zha rza guic zha ne noneenë me ga, dzigo rëbchaa me lo zho:

—iNcuaane gacd gon_n rnee to! Tel_n tib guiedz nadien_n, csilo miech, lëëque zha tilnie menladz zho, zniacxe nitlod guiedz co? Tib diigaa miecha, tel_n lëëque zha tilnie menlidz zho, led znuse lëe nitlo dii co. ¹⁸ Scaque mendox nagon_n, telne lëëque lëe ma gun_ncxoo_n samendox ma, ipe nale na bnitlo ma! Laa naa rne mi_n rii lo to, porne rnee to ma ne rnabey lo mendox nacnie naa, gane rrieelo run_ncxoo_n naa ma. ¹⁹ Nana telne sca rzac to, zha ne nacgrë to dzigo, cho nacnie zho ne ye zho run_ncxoo_n ma? Gase naganle rlu dol_ndox i quia_nyu_n to squi rnee to. ²⁰ Sangue tel_n naa, Dios nacnie naa run_ncxoo_n naa mendox, ni ga rlu ganle laa Dios pxeelle men_n ne gnabey lo to.

²¹ 'iMasaque nac mendox zig tib zha ne no xfuers! Tib zha ne no xfuers, tel_n tibaque ney zho xquiib zho, zcho dien_n lega sëeb lidz zho gla ncuaane quianie zho? ²² Per zeene rrieequia stib zha ne mazdraa no xfuers, zha cole rtiche zha co, run_ncxoo_n zho zho, riaanne zho gre ncuaane gopchen zho. ²³ Golgacnan_n sca ganle, zha ne rlëe lo naa, ga rlu nacnied zho naa; ni zha ne racnied naa lo xtsin_n naa, paat yquind zho.

²⁴ 'Mendox ne rsacsi miech, zeene laa ma rsaan zho, rie ma riequianzë ma dan zaatne choot miech guien_d, rguib ma dien_n pa cuëz ma; ranse ma rdziöld zaatne cuëz ma, rnee ma: “Mazd gbire naa guia naa lidz naa stib.” ²⁵ Dzigo rbire ma, zeene rdzin_n ma lo zha ne psacsi ma ga, masaque rzac ma zho zig rzac miech tib yu ne griin_n bliob, tib yu ne ine nzhixcuaa len. ²⁶ Dzigo rie ma riexi ma zgadz samendox ma, ma ne mazdraa ntseeb, rdzin_n ma gza ma rzëeb

ma zdoo zha co, rsilo ma rsacsi ma zho. ¡Horcole mazdraa mban ruñ ma zho!

²⁷ Sca quianee Jesús, zeene nguiedz bnee tib wnaa ne no lad grë miech ne ndxie lo me ga, rëb wnaa co:

—¡Dichos wnaa ne gop luu, wnaa ne bgadz luu!

²⁸ Pquiab Jesús rëb me:

—¡Mazdraa dichos zha ne gon, yquiaadiag Xtiidz Dios ni tsoxco zho gban zhow zigne naca!

Zha ne rliadzd cho nac Jesús

(Mt. 5:15; 6:22-23; 12:38-42; Mr. 8-12)

²⁹ Miech guizhiu ne quiadziñraa lo me ga, dzigo bnee me rëb me:

—Nadzpaan ntseeb zdoo to nac to miech ne mban leñ dze rii. Tibaque quia to racladz to gan to pe stib milagr, parne gliladz to Dios pxeel naa, ¿zha rnaraa milagr ne racladz to gan to? Gacnan to ganle, stibaque milagr gon gan to, tib mine csoladz to zha goc Jonás. ³⁰ Haxta dzigoraa nagon guien to nli Dios pxeel naa. Sac tel Jonás, zeene gocnan zha Nínive zha bzhaac me, dzigo bliladz zho nli Dios pxeel me. ³¹ Ni gacnan to ganle, zeene gal dze ne laa Dios gun xquielwxtis me, zieso wnaa ne goc rein nëz Sabá, steedquie me to. Sac gon pa lo ga briee me, biaad me biadquiaadiag me grë xtiidz Salomón; ni to, lo to nu zo men ne mazdraa non lo Salomón, ni néd to gon to xtiidz me. ³² Scaque grë zha Nínive, steedquie zho to; sac gon zeene güeynee Jonás lo zha Nínive, znuse bin zho diidz psaan zho xquielntseeb zho wbig zho lo Dios; ni to, lo to nu zo men ne mazdraa non lo Jonás, ni ib ruñcasde to me.

³³ 'Tsod zha ne yquiaagui tib biini, lozh ga ctoos zho pe cos low, gzolangaazhow zaatne ngeets. Sac biini ne rquia, glaa rzoba par gziiniw leñ yu, zeena guiab biini lo grëse zha ne sëeb leñ yu.

³⁴ Rrieequia nac bziaalo miech zig nac tib biini. Telne niapse lo grë ncuane ndzinli rwi zho, dzigo gdipse xcuerp zho no lo guielbiini. Laa telne loxaque lo grë ncuane nonguieldgaa rwi zho, dzigo gdipse xcuerp zho no lo guielcow ga. ³⁵ Golguien sca pa lo rwi to, napaa laa ne tso to lo biini, lel lo guielcow no to. ³⁶ Sac gon, tel dipse xcuerp

to no lo guielbiini, ni tib lëw nod lo ncow, zlupaa to; sac masaque nac to ga zig tib zha ne zo gax tib lo biini nroob.

Güey Jesús lidz tib zha farisé

(Mt. 23:1-36; Mr. 12:38-40; Lc. 20:45-47)

³⁷ Zeene blozhse bnee Jesús lo grë miech co, dzigo bredz tib zha farisé me güeynie zho me tib wagw lidz zho.

Bdzin me lidz zho, bded me bzob me lo mezh, ³⁸ psilo me dow me, per bdiibd me nia me zigne nacpaa xcostumbr grë zha Israel. Zeene gon zha farisé cow, rlozhd gzee zdoo zho; ³⁹ dzigo rëbchaa me:

—Grë to ne nac to zha farisé, laglaase rlu to miech wen nac to, per zdoo to ntseeb to, sac niapse guielntseeb, niapse guielgbaan ruñ to; masaque nac to gon zig tas, zig plat ne nëz zhitsse mbe rna, laa nëz lena rnadraa di beed. ⁴⁰ ¡Nadzpaan ncow nac guic to! ¿Pe riende to racladz Dios ne laglaase glu miech wen nac to, sinque racladz me desde zdoo to gac to miech wen? Sac dib nace to psan me to. ⁴¹ Laa ne squi no to noban to, mazd goldeed ncuane nachenpaa to lo grë zha ne guien pe yquini, zeena gac to miech ne nlipaa wen.

⁴² ¡Probsaxe to! Rzac to demas nguzobdidz to lo Dios, rio to haxta grë guizh bitxtil, grë guizh rud, ni grëragaa guizh ne ran to, rdeed to xdiezm to yadoo; per rioxcodetogban to zigne rnabey Dios, ib rioxcodetogleynie to samiech to. Ible none tsoxco to min rii, ni bii scaquegaa tsoxco to gdeed to xdiezm to. ⁴³ ¡Probsaxe to! Rdziladz to gannon to lo miech, zeene rie to yadoo, zaatne glupaa non to, ga rzob to; scaque ndooladz racladz to gnee miech bdiuzh lo to, zeene rdzieel zho to dib ro nëz. ⁴⁴ ¡Probsaxe to, lëëtaa rdzieel to grë to maistr ley! Masaque nac to zig nac grë baa ne rludraa pa nac. Tel baa cow, zeene rded zho zaatne niaaw, ib riend zho lad grë ncuana noyodz ga, noded zho.

⁴⁵ Horco pquiab tib maistr ley, rëb zho lo me:

—Maestro, ¿ye no dzigo lëë rzoob luu squi nac?

⁴⁶ Pquiab Jesús rëb me:

—Ye to gon. ¡Probsaxe to! Rio to rzadraa ley ne rnabey to gun miech, ni per ni to rioxcodetosiquier csilo to gun tow.

⁴⁷ ¡Probsaxe to! Paat rquiinda gon squi rio to, rlozhd dieen paraa rzhixcuaa to ro xpaa grë zha ne biadteed xtiidz Dios padzeela. ⁴⁸ ¡Igal ntseeb to grë pxozgol to! Sac gon, zha beet grë zha co, laa to no rzhixcuaa to ro baa. ⁴⁹ Nanle Dios squitaa ntseeb zdoos to, mine run to ga bnee me, zeene rëb me: “Sxel naa grë zha ne tsieteed xtidz naa lo zho, sxel naa zha ne tsieneew lo zho, per nanle naa gandzed zho zho, haxta zut zho groļ zho.” ⁵⁰ Gacnan to sca ganle, grë to miech ne mban len dze rii, grë to gunquizh Dios xchen grë zha ne pxeel me biadteed xtiidz me wlal ne ndxie guidzliu, ⁵¹ desde Abel haxta Zacarí men ne beet pxozgol to len yadoo zaatne nac gax lo pcoog. ¡Ne nligaa grëse dol co gon, to quizha! ⁵² ¡Probsaxe to maistr ley squi nac to, ib rneede to didzli lo miech! Nac diidz to cseed miech guien zho zha nac Xtiidz Dios, per nëde to gliladz tow, ni niicle nëedgaa to gliladz zha ne racladz ycaaniaw.

⁵³⁻⁵⁴ Blozhse ga, laa me brie ga. Grë zha farisé, grë maistr ley, per nli rlëe zho bin zho sca rëb me. Psilo zho nzian grë ncuaane rnabdiidz zho lo me, rguib zho dien zha gunglëe zho me, par dien pe cxind me pe tib diidz, zeena min co yquiaaqui zho tsiezoob zho xdemand me.

12

Grë ncuaane rac ngueets zhliian (Mt. 10:19-20, 28-33; 12:32)

¹ Miech guizhiu ne pcaalsa lo Jesús, haxta rcheeplsa zho. Dzigo bnee me lo xpëedscuel me, rëb me:

—Golguien gon, gunde to mine run zha farisé, tel zha rquiaalose zho miech wen nac zho. ² Sac grëse ncuaane sca ngueets rac, grëse ncuaane rlud miech, zdziñ dze ne xoobnena.

³ Zig nac grë ncuaane zhlianse rnee to lo ncow niina, zdziñ dze ne gon miecha zobna ngbidz; grë ncuaane rnee to len yuse, zdziñ dze ne dib lad guiedz gacnan miecha.

⁴ Golgona ganle bets: Ib gdziebde to zha ne gacladz gut to. Nli zrieelo gut zho xcuerp to, per peet grielodraa zho gun zho. ⁵ Golguien, Dios nac men ne mazdraa nroob, mine rnabey me min co none

gon to. Sac tel me, zrieelo me gnitlo me miech dib xcuerp zho, ni lozh ga zrieelo me gzonëz me zho nëz len gabil.

⁶ Nligaa gdziebde to miech, csaand Dios lega pe gac to. Golwi ganle, zig nac grë mguin, niicle ne rzac miech peet nond ma, haxta chop ma rto zho por tib gaay centav; per tel Dios, ib rsaanladzd me ma. ⁷ Pelel to dzigo csaan me, haxta guits guic tow, grësew ngaba lo me. Gdziebde to sca, golguien ganle nonraa to lo tib dzoos mguin.

⁸ Ni gni naa lo to ganle, zha ne glu lo miech nacie zho naa, scaque naa ne nac naa Mgui ne pxeel Dios, zeen gal dze co zlu naa lo grë xanjl Dios, nacie naa zho. ⁹ Sañgue zha ne ctoladznie naa lo miech, scaque naa ziep naa lo grë anjl co runbeyd naa zho. ¹⁰ No zha ne rneenë naa, per zun Dios zho perdon dol co; sañgue zha ntseeb ne gneenë Espíritu Sant, ib gundraa me zho perdon.

¹¹ Zeene tsiezo miech rii to lo grë zha ne rnabey xyadoo zho, tsiezogaa zho to lo grë zha ne nac wxtis, tsoode to zhgab dien pe gnee to; ¹² sac zeene sca tsiegala, Espíritu Sant csiaab guic to pe nac mine gnee to lo zho.

Zha ne loxaque rapchen

¹³ Horco wbig tib zha ne no lad grë miech co, rëb zho lo Jesús:

—Maestro, bzhiguiel bnee lo bets naa glë zho ncuaane psan pxoz no, gneedz zho mine raguial naa yca naa.

¹⁴ —Aque luuw nli —rëb Jesús—, ¿cho në lo luu laa naa noyun guielwxtis co? Ziald naa gon par quiiz naa ncuaane rap miech.

¹⁵ Dzigo bnee me lo grë miech co, rëb me:

—¡Golguien gon, gzoobladzde to demas gapchen to! Sac niicle ndziibraa gapchen miech, grielod por grë ncuaan co ndzon gac lo xquielmban zho. ¹⁶ Znu gon bzhaac tib men ne nroob gopchen. Nat liu quianie me, zeene rlaap me grë ncuaane ran me, nroob ncuaane rlis me low. ¹⁷ Bdziñ tib dze rgaadraa pa tsotsow grë ncuaan co, dzigo bzob me dien zha gun me. ¹⁸ Tibaque zeene rëb me: “Mine naca laa naa gun nroob grë yu qui, zeena zigtaa grë guielnzaac quiw, grëragaa ncuaane rap naa, ga tsotsowa

grësew. ¹⁹ ¡Pe zhidaa iz ne lëb grë ncuaan co! Peet tsieniedraa guic naa, ine guxt sob naa, gow naa, guie naa ncuaane gacladztaa naa.” ²⁰ Min co rza guic me, tibaque zeene rëb Dios lo me: “Nadzpaa nxen luu. Guieel riigazh gon laa luu guet. ¡Zhaale zha ne guiaannie grëtaa ncuaane beenlo luu i!”

²¹ Zeene blozh bzodiidz Jesús cuent co, rëbchaa me:

—Sca nagon rzac grë zha ne loxaque dien zha gapchen zho zienie guic zho. Ncuaan cose rionie guic zho, ib rioxcod zho gun zho ncuaane non nëz lo Dios.

*Rsaand Dios zha ne no xnëz me
(Mt. 6:19-21, 25-34)*

²² Blozh ga, rëbchaa me lo xpëëdscuel me:

—Gacxe waa, gni naa lo to ganle: Tsode to zhgab dien zha gban to lo guidzliu rii, pa griee pe gow to par gban to, pa gdzielgaa ncuaane gdze xcuerp to. ²³ Mazd golconie guic to dien zha gac xquielmban to, dien pa tsiebannie to xcuerp to.

²⁴ 'Golwi lo grë nga ganle, led yed ma ran, led yed ma rlaap, led yed ma rgotsow pe guielgon, per row ma; sac Dios rdeed ncuaane row ma. ¡Tel to gon, mazdraa non to lo grë mguin co! ²⁵ Ni lalnu paat rquiinda tant tso to zhgab. Telne guiab to tso to zhgab dien zha gacnool xtse to spalal yeense, ¿niacxe zrieelo to gunnool tow? ²⁶ Nanle to ganle led ncuaane grieelod ga. ¿Pe nac dzigo tant tso to zhgab ncuaane mazdraa nroob? ²⁷ Zig nac lar, ¿pe nacne tant tso to zhgab dien pe gacwxab to? Pe rwide to lo grë guiee dzil ne ganle zëëb dan, zha rrooba, niow rluw, ni led yeda rio zhgab dien zha gacwxaba; ni gni naa lo to ganle, per ni rey Salomón con grë xab niazh me, blud me scataa niow. ²⁸ Gase na ganle golwi, niicxe grë guiee dan co na, zna dze zob nguiaw, gzhe widz laaw bidzle, laaw tsele, ni scataa niow rgacwxab Diosa; ¿pe lel to dzigo ygacwxabd me, niicle ne squi gard guien to dib zdoo to gnalo to me?

²⁹ 'Tsodraa to zhgab sca, guiab to: “¿Pa griee pe dioow ne, pa griee pe dio ne?”

³⁰ Grë miech ne runbeyd Dios, tibaque zhgab co rio zho. Sangue to, golsoladz ganle PxoZ to men ne zob gbaa, nanle me pe nac grë xliaadz to. ³¹ Me nac men ne gneedz

ncuaane yquiin to, per ib none glo tsoxco to gban to zigne rnabey me.

³² 'Nli zhis to, pale tib dzoon win mëcwxiiil yeen, per gdziebde to. Sac niicle zhis to, per rley PxoZ to men ne zob gbaa, laa me rneedz grëse ncuaane rap me lo to.

³³ Gacxe waa, laa ne tsonie guic to dien zha gacnroob ncuaane rap to, mine quianie to goltow, dzigo goldeed dimi co yquiin zha ne rappaa liaadz; zeena sca nroobraa guielnzaac ne ygaa to gbaa. Guielnzaac cosi, led yeda nitlo, led yeda grë, led yeda tsoxtseeb lo ngbaan, tsoxtseebgaa lo mxil.

³⁴ 'Sca golgun, sac gon guielnzaac ne gunlo to, zaatne gunlo tow, ga gdziin to.

¡Nsin golso!

(Mt. 5:25-26; 10:34-36; 16:1-4; 24:45-51; Mr. 8:11-13)

³⁵ 'Nsin sca golso —rëb me lo zho—.

³⁶ Golgac zig tib ngundziin ne rquiambëz gbire men ne rnabey zho zeene pa rie me tib lo guieltsieel. Nsin rzo zho, zigne rdziin me, rxal zho ro yu rzëëb me.

³⁷ 'Dichos zha ne nsin zo zeene laa men ne rnabey zho glanso. Ib tedsod, steed me zho nëz len yu, soob me zho lo mezh, csilo me mezhal gdziib ncuaane gow zho.

³⁸ Nligaa dichos zha ne sca nsin so, horne glansotaa me; niicle tel wxina, ziadyiinigaa liuw. ³⁹ Golgan ganle, tel niaca mine gacnan miech laa ngbaan tsieban lidz zho guieel, per nannd zho dien pa horpaaw, ¿niacxe zaaguies zho? Led sobna zho lëë, nsin nsin so zho parne csaand zho sëëb ngbaan lidz zho. ⁴⁰ Scaque to nagon, none sca nsin so to, sac gon lega naclew zeene gan to laa Mgui ne pxeel Dios ziaadle.

⁴¹ Zeene blozh sca bnee me, rëbchaa Pedr lo me:

—Maestro, mine blozh bnee luu i, ¿pe par nose naca, te ye par grëraa miecha ye?

⁴² Pquiab me rëb me:

—Laaw rne naa, par grëse zha ne zienie guic zaacse gun zho mine rnee men ne rnabey zho. Nligaa nsin none so zho, sac laa zho guiaannie zha ne nacgrë zho, zig riaannie tib ngundziin sangundziin zho parne gdeed zho ncuaane gow zho.

⁴³ 'Dichos zho, telne ine niowse noyun zho dziin co zeene laa men ne rnabey zho

glanso. ⁴⁴ Zeene gan mew, ib tedsod so me zho, zha gnabey grëse ncuaane quianie me. ⁴⁵ Per tel tsienie wguic guic zho guiab zho gbireniobd me, csilo zho lel csacsi zho grë zha ne biaannie zho, tso zho loxaque gowcho zho, loxaque gzudz zho, ⁴⁶ tibaque zeene gan zho laa me zole lo zho; ib tedsod hor cogazh ctiche me dziin co lo zho, gzonëz me zho guey zho zaatne no grëraa zha ne rond diidz. Nroob caxtigw ne cteed me zho.

⁴⁷ Sac gon zha ne sca nanle pe nac mine racladz men ne rnabey zho, ni tsoxcd zho gun zhow; ible nroob nac caxtigw ne ted zho. ⁴⁸ Mazd lëetaa caxtigw ted zha ne peet nand, niicle gund zho mine rnabey me. Grëse zha ne nanle pe nac mine no gun zho, ib none gun zhow; nac cuent rii zig tib zha ne rcaania pe cos, tel palal mine pcaania zho, none haxta nroobraaw ctsire zho.

⁴⁹ Niina ne laa naa zial, rrieequia zialzobgui naa lo guidzliu. iNi zoot naa gon, tebaa ranle naa laaw quiayazbel! iTebaa psiaalle naa lo dziin ne zialgun naa! ⁵⁰ Per na naraa none teed naa tib guielne nroob, ni mbanse gon rac zdoo naa quiambëz naa gdzin dze co. ⁵¹ iMasaque nan to na lëe, laa naa zial loxaque par cuin wense miech? Lëda gon, ye zial naa zialgunctil naa zho. ⁵² Sac desde len dze rii, yu ne no gaay miech, laa zho ctsolsa. Tel sëeb chop zho xnëz naa, laa ston zha ne guiaan ga, ctsidil zho; tel sëebga tson zho, scaque grop zha ne guiaan ga, gandzed zho zho. ⁵³ Mëed ne gan laa pxoz zho, laa xniaagaa zho bzëeb xnëz naa, gandzed zho pxoz zho, gandzed zho xniaa zho; scaquegaa zha ne quianie mëeda, zeene gan zho laa xingan zho, laa xindzoooga zho bzëeb xnëz naa, gandzed zho zho. Zha ne nac nguzhizha, zlëenie xniaa tsiel zho zho; tel xniaagaa tsiel zhow, zlëenie zho me.

⁵⁴ Blozhse sca bnee me, rëbchaa me lo grë miech ne ndxie ga:

—iPe nlipaa rnee to riende to pe nac grë ncuaane noyac len dze rii! Zha zeene ran to rquia xcow nëz ne rzëeb ngbidz, znuse rien to laa guie guiab. ⁵⁵ Zeene rangaa to ziaad me nëz ne rzë ngbidz len mëe nal, nanle to laa nëeg gac. ⁵⁶ iGuie[wquiaalo i lo to gon! Zha zëeb dzigo runbey to grë señ ne rlu

zhan gbaa, rlugaa lo guidzliu, laa grë mine quiayan to len dze rii riende to.

⁵⁷ iNone guien to tozhal cobey dien pe nac mine nonguiel gun to! ⁵⁸ Gzoob ne bdilnie to tib samiech to, laa to nole nëz zie to lo wxtis grop to. None guien to, laga no to nëz mazd golguiaan mpas, lëdle tsiezo zho to lo wxtis; sac tel laa to gdzin lo wxtis, ib znabey wxtis zha ne co to ladzguiib. ⁵⁹ Ni nanle to ganle, grieede to ga, haxtaque lozh quizh to tel palal gac mult ne gnab zho lo to.

13

Grëse miech, ngoopdol nac zho

¹ Len dze co, bdzin bla zho lo Jesús bzodidz zho lo me zha bnabey Pilat gut bla zha Galilé, lëetse zeene no zho len yadoo noyut zho ma ne nogogon zho lo Dios. ² Dzigo rëbchaa Jesús lo zho:

—Segur na lëe, rëb to mazdraa ngoopdol grë zha co lo grëraa zha ne no nëz Galilé, gane sca bdzieelo zho. ³ iLëda gon! Zigtaa ngoopdol zha co, scaque to ngoopdol nac to; telne csaande to xquielntseeb to gbig to lo Dios, ye to znitlo to. ⁴ Scaque tsiimtson zha ne bgaadz yuglaa ne bixche Siloé, masaque rëb to nagon mazdraa ngoopdol zho lo grëraa zha Jerusalén, gane sca gut zho. ⁵ Per gacnan to ganle, iLëda! iZig rne naa ga, ye to miech ngoopdol nac to, ni telne csaande to xquielntseeb to gbig to lo Dios, ye to zdin dze ne nitlo to!

⁶ Dzigo bzodidz me tib cuent lo zho, rëb me:

—Tib men name, zob tib zhan yag guigw lo xcuaa me zaatne quianie me lbë uv. Cad rdzin mëe ne rquia guigw, rie me rieguib me nex low, per ib peet rquiad. Zeene goctaa tson iz, gon me sca rdeetew nex, ⁷ dzigo bnabey me zha ne quianap liu co cchuggazh zhow, rëb me: “iPchuggazh yag yozh qui, zhlëse zoba i! Nale rac tson iz ziyal naa rguib naa nex low, ni peet nex rneedzda.” ⁸ Dzigo pquiab zha ne quia dziin lo me ga, rëb zho: “Psaan dien guiaana stibtaa iz rii, na laa naa glë zhana, na laa naa gdzin beeba. ⁹ Telne yquidaque nex low iz ne ziaad, maase cchug new dzigo.”

*Biac tib zhuz ne nosacsi mendox
(Mt. 13:31-33; Mr. 4:30-32)*

¹⁰ Tib dze ne rdziiladz zha Israel lo dziina, bdziñ Jesús leñ yadoo, psilo me noseed me miech.

¹¹ Lad grë zha ne noseed me ga, lad co no tib men wnaa nlengw nac zhits, gocle tsiimtson iz sca nosacsi mendox me, ib gacd gacnli me. ¹² Zeene gon Jesús me, dzigo bredz me me, pxobnia me guic me, rëb me lo me:

—iNiinagazh gon, laa luu guiac!

¹³ iHorcogazh laa zhits me ga gocnli, rley me, psilo me rdeed me xquizh lo Dios!

¹⁴ Laa zha ne rnabey yadoo, zeene gon zho sca beenguiac Jesús me dze co, blëe zho, rëb zho lo zha ne ndxie ga:

—Zha ne racladz guiac pe lo guielguidz, pe gacd guiaad zho leñ dze ne rac dziin, ðled tsod zho guiaad zho guiac zho dze nda rii!

¹⁵ Dzigo pquiab Jesús rëb me:

—iNazdpaa ntseeb to! Rquiaalo to ib peet dziin runde to dze rii. ¿Pezhe ga waa run to zeene rsilaa to xcon to, rsilaa to xpurr to dze rii rieguie to ma nis? ¹⁶ Zha nac dzigo rzac to, nonguiel da nu beñ naa beenguiac naa wnaa rii, dze rii. Golwi ganle zha xtií Abraham nac me, leñ tsiimtson iz goc sca nosacsi mendox me.

¹⁷ Zha ne rlëe ga, zeene bin zho sca rëb me, ptoladz zho; laa grëraa zha ne ndxie ga, rley zho ran zho grëta milagr ne run me.

¹⁸ Blozh ga, bnee me rëb me:

—¿Zha ganle racnroob lo xtsiin Dios lo guidzliu rii? ¹⁹ Racnrooba gon zig rroob tib midz moxtaz ne ran zho dan rii. Tel midz moxtaza niicle tib midz winsew, zaatne racniw, rrooba, raca tib yag nroob; haxta rie grë mguin riezhixcuaa ma zhiptsieez ma low.

²⁰ 'Ziaadaque gon gaca, zig ncobi. ²¹ Sac tel ncobiw, niipaquew rcots men wnaa tson lmud rin, ni dib nacse ncob co rzibe.

*Zha ne ycaania Dios
(Mt. 7:13-14, 21-23)*

²² Laa Jesús no nëz zie me nëz Jerusalén. Guiedz ne rdedtaa me rseed me miech; zigtaa guiedz nrooba, zigtaa guiedz wina.

²³ Tib vult bnaabiidz tib zho lo me, dien pe zhis nac miech ne ycaania Dios. Dzigo pquiab me rëb me:

²⁴ —Nligaa zhis zho, sac masaque naca zig tib puert niase. Goltsoxco sca niinasraa golsëeb xnëz me ycaania me to, sac zdziñ dze ne nzian zho gacladz sëeb, per grieelodraaw. ²⁵ Deque laa men ne rnabey csioog ro yu, telne biaan to nëz ley, niicle cuedzraa to me gnab to siguiel me cxal me ro yu sëeb to, per cxaldræa mew. “Runbeyd naa to”, gnë me, “nañd naa dien cho zha to.”

²⁶ Niicle guiab to runbey me to, biaadpaa me ladz to pseed me miech, haxta downie to me. ²⁷ “Laa naa nile”, gnë me, “runbeyd naa to. iGunneetraa to naa, ib rdziguiend naa grë miech yozh, miech ngoopdol ne nac to!”

²⁸ 'Mban gac to zeene gan to laa Abraham, laa Isaac, laa Jacob ni grëraa zha ne biadteed xtiidz Dios, laa me pcaania zho, laa to biaanse nëz ley. Nligaa mbandox gac to, zoon to, haxta zow lay to lo guielnë co. ²⁹ Ni mazdraaw gon, zeene gan to pa lo guidzliu brieë grë miech ne bdziñ ga, ine zobnie me zho lo xmezhe me noyownie me zho. ³⁰ Grë zha ne rzac to niina peet nond, lëetse zha co yгаа guielnzaac co; laa grë zha ne rzac non zho niina, peet ygad zho.

*Bzeet Jesús zha nac zha Jerusalén
(Mt. 23:37-39)*

³¹ Dze coquew, bdziñ bla zha farisé rëb zho lo Jesús grieeniob me ga, sac laa Herod racladz gut me. ³² Dzigo rëbchaa me lo zho:

—Goltsie golguiab lo mëz win co cxecw me spalal, nadzese ni gzhe gunguiac naa miech nu, zigtaa zha ne rzacnëw, zigtagaa zha ne nosacsi mendoxa; gal widz guieñdle naa nu. ³³ iNligaa nadzesew ni gzhe, widz laa naa gdziñle Jerusalén zaatne za naa! Sac ible Jerusalén, ga rut zho grëse zha ne riadteed xtiidz Dios lo miech.

³⁴ 'iAque tow men Jerusalén! ¿Pe nacle squitaa nac to, rut to zha ne ziadteed xtiidz Dios lo to, rgoquie to grë zha ne rxeel me lo to? Blactaa gocladz naa niacnie naa to, nquianaap naa to zig run nguid rgueedz ma xpëed ma, per bzhiguielde to. ³⁵ Gacnan to ganle, nadzetaa gon laa lidz to guiaan ngan, sac gandraa to naa, haxta gal dze ne guiab to: “iZha ndzontaa men qui pxeel Dios lo ne!”

14

Biac tib meñ ne rree gui

¹⁻² Tib dze ne rdziiladz zha Israel lo dziina, güey Jesús lidz tib zha farisé ne nac zha non, sac bredz zho me tib wagw lidz zho. Bdzinaque tib meñ bgui, rzacné me, gdipse me no gui. Grëraa zha farisé ne ndxie ga, quialeets zho Jesús quiambëz zho dien pe zunguiac me mgui co. ³ Dzigo rëbchaa Jesús lo zho, ni lo grë maistr ley ne ndxie ga:

—Golnë dien, ¿pe nonguiela gunguiac naa miech dze rii, te nonguielda ye?

⁴ Ni tib zho pquiabd. Horco pxobnia me guic mgui co, beenguiac me mgui. Blozhse bzonëz me mgui, ⁵ rëbchaa me lo zho:

—¿Pe nli na peet dziin runde to dze rii? Tel zha tsietsobe tib xpëed to, tib xmagaa to tib len guiuu dze rii, ¿niacxe tsiebeegazhde to xpëed to, tsiebeegazhdga to xma to ga?

⁶ Loxaque lo zho rac, ib bdzielz zho pe nquiab zho.

⁷ Grëraa miech ne nodziñ ga, no zho rguib zho dien zha ygaa zho zaatne nzhixcuaaraa sob zho. Gon Jesús zha rac zho, dzigo bnee me lo zho, rëb me:

⁸ —Golguien gon, zeene znu cuedz miech to, zig nac tsie to tib wagw zaatne noyac tib guieltsieel, ib gunde tsiesob to zaatne nzhixcuaaraa. Sac gon, nenda glanso tib zha ne nonraa lo to, ⁹ lozh ga, laa zha ne bredz to lo lni guiaadliso to ga, gnë zho: “Guso i dien sob meñ rii.” Led tib guielto ga par to, racse to laa to tsieso ga, tsiesob to zaatne rialle ro beel. ¹⁰ Mazd ganle, zeene sca pa lo tsie to tib lo lni, ndooladz golgac, tib lad golsob. Zha ne bredzle to lo lni, zeene gan zho laa to zob ga, ziaad zho ziaad-xi zho to tsiesobnie zho to zaatne nzhixcuaa. Zha ne zoble lo mezh ga, zeene gan zhow, ziaanzuu to lo zho. ¹¹ Golsoladz ganle: grë zha ne lëëque zha runnon zho, lel riaanwin zho; laa zha ne riaanwin, runnon miech zho.

¹² Blozh ga, rëbchaa me lo meñ ne nac lidz ga:

—Scaque luu gon, zeene cuedz luu miech guiaad zho tib wagw lidz luu, tsod luu loxaque zha ne ndzieeldiidz luu, loxaque zha bets luu, zha lidzse luu, lo grëga zha ne no gax lidz luu zha ne rapchense, zha cose cuedz luu; sac gon ib tedsod zbedaque

zho luu lo zhilni zho, stsire zho mine been luu ga. ¹³ Mazd bredz grëse miech, zig nac zha ne guiend pe yquiin, zig nac zha ne guiend tib nia, zha ne guiend tib ni, zha ne roldgaa lo; ¹⁴ zeena gal dze ne grieegan grë zha ne bioxco wban zigne racladz Dios, ine gley luu ygaa luu guielnzaac ne tsieguial luu gneedz me lo luu.

¹⁵ Lad zha ne zobgrë me lo mezh ga, pquiab tib zho rëb:

—¿Dichos grë zha ne sca ygaa tsiesob lo mezh, tsietownie zho Dios zaatne rnabey me!

¹⁶ Pquiab Jesús rëb me:

—Tib meñ name, nzian zha ne bredz me tsie tib wagw lidz me. ¹⁷ Zeene gol dze ne laa guielwagw co gac, pxeel me tib zhingundziin me ziexi grë zha co. ¹⁸ Per pasë zho nie, zhaase zhaase ncuane pquiaqui zho. Tib zho rëb: “Grieelod së naa, sac laa naa pca tib lë liu, ni lëetse nadze no gaso naa low; bzhiguiel gudz lo me gun me naa dispensar.” ¹⁹ Stib zho rëb: “Niina wriin pca naa gaay nëz ngon, laa naa no ganie ma dien zha run ma dziin, gudz lo me yquiambëzd me naa.” ²⁰ Laa stib zho rëb: “Grieelod së naa, sac niina wriin ptsieelnia naa, bzhiguiel gudz lo me gacd guial naa.”

²¹ Bdziñ ngundziin co bzodiidz zho lo me zha rzë xtiidz grë zha co. Zeene bin mew, wbinladz guic me, bnabey me zho güey zho dib lad guiedz güeyxi zho grë zha ne guiend pe yquiin, grë zha ne guiend nia, zha ne guiend ni, zha ne rold lo, grëse zho bdziinnie zho ga. ²² Blozh ga, rëbchaa zho lo me: “Laa naa wbirele xmandad luu gon, per scase noraa zaatne cue miech.” ²³ Dzigo pxeel me zho stib, rëb me: “Güey dib ro guiedz, zha ne gdzieeltaa luu, dënie zho nëz rii, bloo guic zho guiaad zho; ib none tsodzëse miech lidz naa. ²⁴ Sac grë zha ne bredz naa glo ga, ni lalnu racladzdraa naa ygaa zho guielwagw rii.”

Zha ne racladz sëeb xnëz Jesús (Mt. 10:37-38)

²⁵ Laa Jesús no nëz zie me nëz Jerusalén, miech guizhiu ne nal zhits me. Tibaque ptsire lo me bui me lo grë miech co, rëb me lo zho:

²⁶ —Lo grë to ne ziaadnal to zhits naa, gacnan to ganle zha ne racladz ygab xnëz naa, ib none gleynie zho miñe rnabey naa. Sac zha ne mazdraa rleynie pxoz, mazdraa rleynie xnäa, mazdragaa rleynie zho tsiel zho, xpëed zho, bets zho, bziangaa zho, xquielmban zhow, rquia zdoos zhow, peet xtsiind grë zha co par sëeb zho xnëz naa. ²⁷ Sac ni tib zha ne sca yquia zdoos cueeladz zho zho guiaadnal zho zhits naa, grieelod ygab zho lo naa. ²⁸ Antes ne yquiabladz to sëeb to xnëz naa, none wen wen sob to dien pe zlëb to ted to miñe rieguial to. Zig nacse tib zha ne gzaa tib yu glaa ne gac chop tson xcuaa, led rzobgash zho rbee zho cuent dien pe zгаа xtimi zho tsaalow. ²⁹ Sac gon nenda loxaque cueeze zhow, ni lozh ga grieelod gzaalo zhow. Miech ne gana laa zho gzhidznie zho, ³⁰ guiab zho: “Golwi lo zha qui ganle, loxaque bleeze zho lidz zho, na blëbd zho nzaalo zhow.” ³¹ Scaque rey ne no tilnie stib rey, led none sobgash zho gan zho dien pe zlëeb tsii mil xmenguiib zho tsietilnie gal mil xmenguiib stib rey co. ³² Telne rgobey me lëbd me, laga bii zit ziaad stib rey co, rxeel me bla zha ne tsie tsienee dien zha gataa cuëz lo xtil zho.

³³ 'Scaque to nagon none glo gwi to pe nac grë ncuaane no csaan to, parne grieelo ygab to xnëz naa. ³⁴ Sac gon zed ne nzhid, ¿pa dien yquiina? ³⁵ Per ni par gaca beeb peet xtsiinda; miñe ractaaw, laaw rziaab. Zha ne no liaadz guien zho pe rnee naa, yquiaadiag zhow.

15

Zha rzac Dios zha ne zozit lo me (Mt. 18:10-14)

¹ Zeene rseed Jesús miech, nzian grë zha ne rtop dimi ne razh lo zha Roma, ni grë zha ne rzoob miech nac zha yozh, ye zho rbig zho rquiaadiag zho zhiwseed me.

² Nacne grë zha farisé ni grë maistr ley, rneenë zho me, rnee zho lëda ga run me sca rtsieelsa me grë zha co, rownie me zho.

³ Dzigo bnee me lo zho, rëb me:

⁴ —Togase nadien, gzoob ne quianie to tib gayoo mëcwxiiil, ni lega naclew rziaab tib ma, ¿zha dien run to? Led rsan to ma

ne ndxie lo to ga lëe, laa to rie rieguib to ma ne bziaab ga, haxta rdziel to ma. ⁵ Zeene rdziel ma lo to, lo guielbley co haxta rxobyan to ma rdzinne to ma ro yu. ⁶ Lëelëd rzodiidz tow lo zha ne ndzieeldiidz to, lo zha ne no gax lidz to, sac rley to laa xpëcwxiiil to brieequia. ⁷ Gni naa lo to ganle, scadaa nagon rzac Dios, tib guielbley nrooba lo me, zeene ran me laa tib zha ngoopdol rsaan xquielntseeb, laa zho rbig lo me. Ne nligaa tib guielbley rac zha co lo me, lëdle zha ne rzac miech wenle nac zho lo me.

⁸ 'Zig rzacгаа tib men wnaa, gzoob ne nzhen me tsii gayoo pes, ni lega naclew rsëeb me tib gayoow, ¿zha dien run me? Led hor cogash lëe rquiaa me biini, rsilo me dzega dzega rloob me len lidz me haxta rdziel me dimi co. ⁹ Zeene rdziel mew, rley me rzodiidz mew lo grë zha ne ndzieeldiidz me, lo grë zha ne no gax lidz me. ¹⁰ Zig rne naa ga, scadaa nagon rzac grë xanj Dios, tib guielbley nrooba lo zho zeene ran zho laa tib zha ngoopdol rsaan xquielntseeb, laa zho rbig lo Dios.

¹¹ Dzigo psilo Jesús bzodiidz me tib cuent lo zho, rëb me:

—Tib men name quianie me chop mëëdbgui. ¹² Tib dze, rëb zha ne nac zha niab lo me: “Papá, tel pe nac ncuaane no gneedz luu lo no, bzhiguiel niinaga beengrola, zeena gneedz luu miñe raguijal naa.” Dzigo beengrol me ncuaane rap me, bdeed mew lo zho.

¹³ 'Zhisaque goca, pto zha niab co grëse ncuaane bial zho, brie zho laa zho zie. Bdzin zho stib dan, ga been zho grë guielyozh ne gocladztaa zho, grëse xtimi zho pxin zho ga. ¹⁴ Tibaque zeene laa xtimi zho blozh, mbanse rac zho guienraa pe gow zho, ni lëëtaque len dze co laa tib gbin psiloque nëz co. ¹⁵ Dzigo race zho güeyguib zho dziin lad guiedz co, ga brieequia tib men co bree zho, pxeel me zho yquiaanap zho nguts. ¹⁶ Lo gbin ne noded zho ga, rzac zho tebaa cho gdeed maase grë duuzhye dan ne row grë nguts co gow zho, per ni min co choot rdeete lo zho.

¹⁷ 'Sca no zho ga, tibaque zeene biao zho biini psoladz zho nzian zha ne quia dziin lo pxoz zho, grë ncuaane raclo row grë zha

co, haxta riaana, ni laa zho sca noded ga; rëbchaa zho: ¹⁸ “Mazd mine naca laa naa guia gdziin naa lo pxoz naa stib, guiep naa lo me gon me naa perdon grëtaa falt ne beñ naa lo me, falt ne beñgaa naa lo Dios. ¹⁹ Maase sacdraa me naa zig xpëed me, siguiel me ycaania me naa gac naa zig tib zha ne quiase dziin lo me.” ²⁰ Horco bio zho nëz laa zho zey nëz lidz pxoz zho. Zitraa ziaad zho laa me gonle zho, pquia zdoo me zho gon me zha rac zho; rias me güeydzieelo me zho bnaaz me nia zho, bdeedz me zho.

²¹ “Papá”, rëb zho lo me, “rien naa nroob falt ne beñ naa lo Dios, beñgaa naa lo luu. Rieguialdraa sac luu naa zig tib xpëed luu.”

²² ‘Ni blëzd me nlozh nee zho, lëelëd bredz me zha ne quia xtsiin me, rëb me: “iNa goltënie tib nëz lar wen nu gacw xpëed naa! iGoltënie tib nil wen tso nia me, tib nëz guielguid cub yquia ni me!” ²³ Bnabey me zho güeyxi zho tib ngon ne mazdraa ndaan, beet zho, rëb me: “iB none gac tib lni, none dioow ne, none dio ne! ²⁴ iSac gon gon naa cuent, brieaban xpëed rii naa! iBnitle me ga, na laa me bdziel!” iLaa lni psilo!

²⁵ ‘Lni co noyac, zeene laa stib xpëed me zha ne nac zha gol ga, wbiere lo dziin dan. Bdzin zho gax ro yu, rlu rquia di, haxta wiee rlu noyac; ²⁶ dzigo bredz zho tib zha ne quia dziin lo pxoz zho ga, bnabdiidz zho dien pe lni ne noyac. ²⁷ Dzigo rëbchaa zha co: “Bets luu blanso, gane squitaa bnabey pxoz luu noyac lni; rley me gon me mban zho laa zho blanso. Bnabey me gut tib ngon ne mazdraa ndaan.” ²⁸ Blëe zha gol co bin zhow, lo guielblëe co bzëëbd zho ro yu. Nacne brieepxoz zho, bnee me lo zho sëëb zho ro yu. ²⁹ Dzigo rëbchaa zho lo me: “iLëdraaw i gon papá noyun luu! Bui ganle blactaa iz ne quiayun naa dziin lo luu, wlaltaa gard quits naa tib xtiidz luu. Ni zha rna tib dze, siquier tib chiv yeen ygad luu lo naa, gownie naa grë zha ne ndzieeldiidz naa. ³⁰ Cho dzigo nac zha qui, blozhse güeyloozh zho xtimi luu lo grëtaa guielyozh ne beñ zho, na no luu beet luu ngon ne mazdraa ndaan, noyun luu zhilni zho.” ³¹ Dzigo rëbchaa me lo zho: “Nliw xin, ni lalnu gard csaan luu naa, gacxe waa grëtaa ncuaane quianie naa, luu

guiaanniew. ³² Per niina ne laa bets luu blanso, ib nonguiela znu dziuun ne tib lni gleynie ne me; sac gon bnit me, ni na laa me bdziel. iDziuun ne cuent brieaban me nu!”

16

Ligier miech par lo guielntseeb

¹ Tib vuelt bzodiidz Jesús tib cuent lo xpëedscuel me, rëb me:

—Tib men name nroob rapchen me, quianie me tib zha ne zo lo grëtaa ncuaane rap me; tib dzew, lega nacle bded diag me zhlian noxin zha co xtimi me. ² Dzigo bredz me zho, rëb me lo zho: “Lëda i gon squi run luu, lega noxin luu xtimi naa. Niinaga racladz naa guiaadnie luu cuent nu dien zha quiayun luu dziin; sac grielo-draa so luu lo grë ncuaane rap naa.”

³ ‘Wbiere zho ga, rëb zho: “Zha na ganle gon naa, telne guiab ne ga naa dziin dan, lëbdraa naa gon naa dziin co; tel guiaabgaa ne na ga naa gatop naa gon, rtoladz naa gnab naa gon lo miech.” ⁴ Tibaque zeene biab guic zho rëb zho: “iLaa naa bienle zha gon naa, zeena tso zha ne gon xyudar naa zeene laa naa grie lo xtsiin men rii!”

⁵ ‘Dzigo psilo zho bredz zho zha ne quia guielqui lo men ne quia zho xtsiin ga. Bdzin tib zha co bnabdiidz zho lo zho dien palal nzeëb zho lo me. ⁶ Rëb zha co: “Tib gayoo tamb nceit nac mine nzeëb naa lo me.” Dzigo rëbchaa zho: “Nliw, lalga quia lo tib val ne psan luu nu. Ledaa val co nu, zac ctsieez luuw; bzhixcuaa stiba, pquiaa lo co, grol tamba zëëb luu.” ⁷ Bdzinaque stib zha co, bnabdiidz zho lo zho dien palal nac xquielqui zho lo men co. Zha co rëb zëëb zho tib gayoo sac zhobxtil. Dzigo rëbchaa zho: “Nliw, lalga raquiet lo val ne psan luu; per na zac ctsieez luu min rii, bzhixcuaa stiba, pquiaa lo co tapgalaque saca zëëb luu.”

⁸ ‘Zeene bien men co zha noyun zho, bzee zdoo me gon me scataa ndzielguic zho. Ncuaane ntoladza, per grëse miech ne ziana ncuaan lo guidzliu rii, ndzielguic zho par gon zho grë guielntseeb. Par min co ndziibraa ndzielguic zho lo zha ne no xnëz Dios. ⁹ Sangue to goobladzde to gon to min co, ncuaane rap to lo guidzliu rii, golquiina

per par gun to xyudar samiech to. Zeene laa ncuiaan co grë, nenda zacnie zho to, per mine mazdraa non Diossi ible zacnie me to, zneedz me tib lugar ndzon cuëz to, led yedraa ga pe nitlo.

¹⁰ 'Zha ne ndzinli rundziin tel palal yeense ncuaaane riaanne zho, scaque ndzinli gundziin zhow zeene guiaanne zho nrooba. Laa zha ne ndzinlid, mine gun zho zeene guiaanne zho ncuiaan zhis, mincoque gun zho zeene guiaanne zho ncuaaane nroob. ¹¹ Nana zha ne sca gacd ne ndzinlise gundziin zho ncuaaane no lo guidzliu rii, ¿zha dzigo grieelo gundziin zho ncuiaan ndzon ne gdeed Dios lo zho zaatne no me? ¹² Stiba, tel sca ndzinlide to lo chen ben, ¿pe naczhe ncuaaane gun to tib ncuaaane chenpaa to? ¹³ Golgona ganle, grieelod gon gleyne to dimi ni gleyneque Dios. Ib none telne Dios rleyne to, me none gleyne to, togo dimigaaw, dimi golleyne.

¹⁴ Grë zha ne nac farisé zeene gon zho sca rnee me, lel rzhidznie zho me, sac tel zhaw rleynedox zho dimi. ¹⁵ Dzigo rëbchaa me lo zho:

—Masaque rzac to nalëë nli miech wen nac to nëz lo Dios, sañgue me gon, wen wen nan me zha nac zdoo to. Nli miech ne ran to, zha wen rzoob zho to; sañgue Dios ni lalnu rzacd zdoo me mine run to.

¹⁶ 'Len dze ne gard guiaad Juan Bautist, niapse xley Moisés ni grë mine bnee zha ne biadteed xtiidz Dios, min co nac mine güeynal to. Per zeene psilo Juan pseed me miech, desde hor co laa miech quiaayan stib mod ne grieelo ygaa zho zaatne rnabey Dios; gane na nzian zha ne noxco ygaa lugar co. ¹⁷ Per guiabde to togo non-draa ley, sac grëse mine zhobnee lo ley, jib laaw none gac! ¿Zig nac guidzliu, zig nac gbaa zrieelo nitlow, sañgue ley nitloda, tibaque naca! ¹⁸ Gacxe waa, grë zha bgui ne rsëbtsieel niina ni rtsieelnia zho stib wnaa, zha ne rtsieelniagaa tib wnaa ne psëëbtsieel, dol ga quiaayun zho; zigtaa dola padzeela, scaque niina dola.

Xcuent tib zha prob lë Lazh

¹⁹ 'Tib ricw name —rëb Jesús—, niapse grë lar niazh racw me, gzobse dze run me lni lidz me. ²⁰ Zaatne noque me ga, guiedz co no tib zha prob lë Lazh, lala

prob me ni rlanaque me guiedz, gdipse lad me noyacne guiedz co. Riese me riesob me ro lidz zha ricw co, ²¹ rquiambëz me dien pe grieelod gow me maase ncuaaane rrieengaale lo xmezhe men co; ga zob me haxta rdzin grë mëcw rzëëludz ma lo guiedz ne rlan me ga.

²² 'Bdzin dzew laa Lazh gut, dzigo biet xanj Dios beynie zho me lo Abraham, zaatne rdzin grë zha wen. Goc palal dzew, laa men ricw co gutaque, blozhse pquianap zho me, laa zho güeyqueets me; ²³ zeene biala me biini laa me nole gabil. Lëbdraa me no me lo guielnë co, lega naclew blis lo me, zit squi gon me Abraham, laa Lazh zobnie Abraham ga. ²⁴ Horco bnab me lo Abraham siguiel Abraham cxeel me Lazh, maase guic mzhugniase Lazh yquiaa Lazh nis tsiegadz Lazh lo ludz me; sac lëbdraa me lo guidox ne no me ga. ²⁵ Dzigo rëbchaa Abraham lo me: “Xin, psoladz ganle zeene wban luu lo guidzliu, ncuaaane gocladztaa luu pquianie luuw; laa Lazh mbanse bded me. Nagaa na, me nac men ne nogaa noyan guielbley, laa luu bgaa squi no luu lo guielnë qui. ²⁶ Stiba, zha ne no nëz rii gacd guiaad zho i, niicle zha ne nogaa iw, gacd guiaad zho nëz rii; sac no tib yeedox ne rtse.” ²⁷ “Bzhiguiel sca”, rëb men ricw co, “pxeel Lazh tsie me lidz pxoz naa, ²⁸ tsienie me diidz lo zgaay bets naa zha ne biaan, guiab me lo zho ib gund zho mine ben naa, zeena guiaate zho nu ygaa zho lo guielnedox rii.” ²⁹ Pquiabchaa Abraham, rëb Abraham: “Tel mincow, tsow glab zho lo grë ley ne psan Moisés, lo grë mine bnee grë zha ne güeyteed xtiidz Dios, benque lo co zhobnee zha no gban zho.” ³⁰ “Nliw”, rëb me, “per tel squi tib men ne gutle tsie tsienee lo zho, rien naa znuse csaan zho xquielntseeb zho gbig zho lo Dios.” ³¹ Dzigo rëbchaa Abraham: “Telne rond zho mine rnabey grë ley ne psan Moisés, grë mine bnee zha ne güeyteed xtiidz Dios, scaque gond zho diidz niicle tsie tib zha ne brieabanle tsienee lo zho.”

17

Zha ne gunctal xtol stib zho
(Mt. 18:6-7, 21-22; Mr. 9:42)

¹ Tib vult rëb Jesús lo xpëëdsuel me:

—Nac lo guidzliu rii, ib gunfalte ncuaaṅe rgogui miech gunctal zho xtoḷ zho, ḷper probsaxe zha ne rquuil samiech runctal zho xtoḷ zho! ² Mazd zhi guieḷnēw lo zho ygadoo tib quie molin zhobxtil yaṅ zho tsieron zho zho nisdoo, lēdle guieḷnēdox ne gaṅ zho; sac goṅ doḷ nroob ga gun zho yquuil zho zha ndooladz ne no xnēz naa. ³ ḷGolguieṅ sca ndzinli golgac! Tib bets tow, zeṅe pe tib falt gun zho lo to, golnee lo zho gundraa zhow; telne gnab zho perdon, golgun zho perdon. ⁴ Niicle telne nzian vueltsca gun zho falt lo luu tib dze, beṅ zho perdon zeṅe laa zho rbig rnab zho perdon lo luu.

⁵ Stib dzew, rēb zha ne rzēnie me lo me:

—Bneedz guieḷbiini lo no dib zdooraa no gnalo no Dios.

⁶ Pquiab me rēb me:

—Telniaca miṅe gzoob ne rnalole to Dios siquier lal tib midz moxtaz, niicle ncuaaṅe mazdraa ngaṅ gnab to lo me, zuṅ mew.

⁷ ḷPe ran to gaṅle, zha nac zha ne run xtsiin beṅ? Zeṅe rbire zho dan, yase güey zho gon, güeyгаа zho güeyquianap zho ma, pe liaadz meṅ ne quia zho xtsiin ga, guiab me lo zho: “Na bded, bzob, zeṅa gowxtsee luu.” ⁸ Miṅe run me, gloque rnabey me zho gunlo zho ncuaaṅe gowxtsee me, gdziib zhow lo me; rlozhraa row me, dzigoraa rowxtsee zho. ⁹ Niicle scataa ron zho miṅe rnabey me, ni rlozh ga, per ni xquizh rdeete me lo zho. ¹⁰ Scaque to nagon, zeṅe lozh gun to grē dziin ne pso Dios to gun to, peet yquiambēzde to, golguieṅ tib ngundziinse nac to, miṅe rieguiaḷ to ga, miṅ co beṅ to.

Biac tsii zha ne rlan guiedz lepr

¹¹ Laa Jesús no nēz zie me nēz Jerusalén. Laa me zieded tib guiedz win ne riaan zaatne ndzieel xtan Samar xtan zha Galilé, ¹² zeṅe briequia tsii zha ne rlan guiedz lepr. Zit zo zho, ¹³ nguiedz rbedz zho me, rnab zho lo me yquia zdoo me zho. ¹⁴ Zeṅe goṅ me zho, rēbchaa me lo zho:

—ḷGoltsie, goltsielulo lo pxoz, zeṅa gaṅ zho gaṅle laa to biacle!

Dzigo laa zho zie. Nēz no zho laa zho biaanmbe lo guiedz co. ¹⁵⁻¹⁶ Lo gza zho, hor co rias tib zho wbire, nguiedz rnee zho:

—ḷZha ndzontaa Dios! ḷGolwi gaṅle laa me beṅguiaacle naa!

Zigne bdziṅ zho lo Jesús, pquitsgzhib zho lo me, haxta bdziṅ lo zho lo liu, rdeed zho xquizh lo me. Tib zha Samara, zha zit nac zho. ¹⁷ Dzigo rēbchaa Jesús:

—ḷYoraazhe grē zha co waa? Conque tsii zho name beṅguiaacle naa. ¹⁸ ḷTibaque zha zit rii dzigo lēe rzac zdoo miṅe beṅ Dios lo zho?

¹⁹ Dzigo bliso me zha co ga, rēb me lo zho:

—Porne dib zdoo luu goṅ bnalo luu Dios, gane biac luu. Bzē, peet tsieniedraa guic luu.

Zeṅe gbiire guiaad Mgui ne pxeel Dios (Mt. 24:23-28, 36-41)

²⁰ Tib dze bnabdiidz zha farisé lo Jesús, rēb zho:

—ḷPoc dzigo csilo gnabey Dios lo ne?

Dzigo pquiab me rēb me lo zho:

—Gacnaṅ to gaṅle, nacd miṅ co ncuaaṅe ganlopaa miech. ²¹ Grieelod guiab zho laaw psilo nec, laaw psiloleгаа nēz rii; sac goṅ telniina laa me quianabeyle nu.

²² Bded ga, rēbchaa me lo xpēēdscuel me:

—Zdziṅ dze, gacladz to tebaa zha znu so naa lo to maase tibaque dze, per gacdraaw.

²³ Leṅ dze co, zio zha ne gnē lo to: “Goltē gaṅle laa Mgui ne pxeel Dios bdziṅ nu”; gnēгаа zho pa stib lugar none tsie to par gaṅ to naa; tsienalde to, gliladzde to xtiidz zho. ²⁴ Sac zeṅe gbiire guiaḷ naa, grēse miech gaṅa. Zig nac tel guiab tib belye nroob ne glu zhan gbaa desde nēz ne rlan ngbidz haxta nēz ne rzēēb ngbidz, ḷniacxe gaṅd grēse miecha? ²⁵ Per ansraa ne gac miṅ co, ible nroob guieḷnē ne cteed miech rii naa, ni lalnu gaṅdzed zho naa. ²⁶⁻²⁷ Leṅ dze ne guiaḷ naa ga, grē miech ne ndxie lo guidzliu gaḷ hor co, zhaa grē ncuaaṅe tsonie guic zho. Rsoladz to gaṅle zha rac miech leṅ dze ne biaad Noé, leḷ lo grē zhilni zho no zho, zha ne notsieelnia, zha ne nobediṅ xpēēd, tibaque zeṅe biao zho biini laa guiedox co psilole. Laa Noé nole leṅ barcw, laa zho biaan grēse zho bnitlo lo nis co. Scadaa nagon no miech leṅ dze ne guiaḷ naa. ²⁸ Zig racгаа miech Sodom leṅ dze ne brie Lot ga. Scaque, loxaque ncuaaṅ lo guidzliu rii noxco zho, zha ne no lo zhilni, zha ne no zhiwto, zha ne nozigaa,

zha ne quia gon, zha ne quiazhixcuaagaa lidz. ²⁹ Lega naclew, zeene laa Lot brie, hor co laa tib guidox biet gbaa, notsa zufr bliaala lad guiedz co, grëse miech co bnitlo lo guidox co. ³⁰ Scapaa nagon rac miech ne ndxie lo guidzliu len dze ne laa naa guial.

³¹ 'Zha ne lëetaque hor co no glaa guic yu, ib guiabd zho sëeb zho len yu tsiebee zho ncuane no len lidz zho, zha ne quiagaa lo dziin dana, ib guiabd zho gbi zho guey zho ro yu. ³² ¡Golsoladz ganle zha bzhaac wnaa ne goc tsieel Lot! ³³ Grëse miech, zha ne sca rquianë zdo grë ncuane rap zho, ible znitlo zho xquielmban zho; sangue zha ne rquiad zdo grë ncuane co, haxta xquielmban zho rbeeladz zhow, nitlod zho. ³⁴ Gal hor co, zaatne tipse nixguies chop zho, tib zho sënal zhits naa, laa stib zho guiaan. ³⁵⁻³⁶ Zaatne tipse quiayot chop wnaa, zaatne tipsegaa quia chop mgui lo dziin dana, tib zho sënal zhits naa, laa stib zho guiaan.

³⁷ Dzigo rëbchaa xpëedscuel me lo me:

—¿Pa lo dzigo gdziñ grë zha co?

Pquiab me rëb me:

—Horco bii zlu ganle paw. Zig nac grë pech, zaatne nix magut ga rdziñ ma.

18

Zha ne rnab lo Dios

¹⁻² Stib dzew, bzodiidz Jesús tib cuent lo xpëedscuel me, par guien zho ib guiaan zdo zho zeene racniobd mine quianab zho lo Dios, rëb me:

—Tib guiedz name, no tib men co nac me wxtis, ni palal rquiad zdo me samiech me, per ni Dios rdziebd me. ³ Guiedz coque no tib zhuz viud, gzobse dze rie zhuz co rienab zhuz gun me guielwxtis, cuedz me tib zha co rlëe lo zhuz. ⁴⁻⁵ Glo ib rquiaadiagd me mine rnab zhuz co, per zeene goc palal dze gon me tibaque quia men co quianab me gac guielwxtis, dzigotaa rëb me: “Ncuane lëbdraa guic naa lo men rii, tibaque squi quia me. Nli rdziebd naa Dios, niicle nodgaa naa liaadz pe rzac miech, per parne guidgunneetraa me naa, mine naca mazd laa naa gun guielwxtis ne rnab me.”

⁶ Blozhse bzodiidz Jesús cuent co, rëbchaa me lo zho:

—Telne sca bdziñ dze ne pquiaadiag zha ntseeb co mine bnab wnaa viud co, ⁷ ¿pe lel Dios dzigo yquiaadiagd xtiidz zha ne ngab lo me, tel tibaque gnab zho mine racladz zho? ⁸ ¡Nligaa, ib tedsod zun me mine rnab zho! Per segur zhis zho quiambëz gac xquielwxtis me, zeene laa naa guial stib.

⁹ Laa grë zha ne riats, zha ne rzac masaque zha wen nac zho nëz lo Dios, haxta rbix zdo zho ran zho grëraa miech, bnee Jesús lo zho, rëb me:

¹⁰ —Chop zha name, bdziñ zho len yadoo ziezodiidznie zho Dios. Tib zho nac zha farisé, stib zho nac zha ne rtop dimi ne razh lo rey Roma. ¹¹ Zha ne nac farisé ga, psilo zho rnee zho: “Dios, rnedz naa xquizh lo luu, sac nacd naa zigne nac grë miech ngoopdol, zig nacse zha ne zo i. Wlaltaa rund naa guielgbaan, rund naa guielntseeb, niicle rquiangoobd naa stib wnaa. ¹² Haxta chop vuilt rcuan naa tib len zhmal, grëse ncuane run naa gan, run naaw tsii lal, rnedz naa tib lal mine rieguial luu.” ¹³ Laa zha ne rtop dimi ne razh Roma ga, gaxaque ga zo zho, per nquiitsrunse zho liu. Mban rac zho, quiase nia zho zdo zho, rnee zho lo Dios: “¡Dios, rnab naa lo luu pquia zdo naa znutaa miech ngoopdol nac naa!”

¹⁴ 'Gneli naa lo to ganle —rëb Jesús—, mazdraa gon wen biaan recaudador co lo Dios, lëdle zha farisé co. Sac zha ne lëeque zha runnon zho, racnond zho lo Dios, laa zha ne riaanwin, runnon me zho.

Beenlay Jesús mëedlas

(Mt. 19:13-15; Mr. 10:13-16)

¹⁵ Tib dze, nzian men ne bdziñ lo Jesús, bdzinnie zho xpëedlas zho lo me, parne cxobnia me guic win gunlay me win. Grë zha ne nac xpëedscuel me, lel psilo zho ndox zho lo grë zha ne bdzinnie grë mëedlas co. ¹⁶ Zeene gon me sca quiayun zho, dzigo bredz me zho, rëb me lo zho:

—¡Ctsirede to grë mëedlas yeen qui! ¡Golsaan guiaad win lo naa! Sac gon grë mëedlas yeen qui, ni zha ne nac zig nac win, zha co nac zha ne sëeb ygab lo Dios. ¹⁷ Nligaa zha ne gacndooladz, zha ne gililadz dib zdo, zigne run grë mëedlas, grielod gdziñ zho zaatne rnabey Dios.

Ncuaane run dimi
(Mt. 19:16-30; Mr. 10:17-31)

¹⁸ Tib vüelt, wbig tib meñ ne nac zha non lo menüedz Israel, rëb me lo Jesús:

—Nan naa luu nac tib meñ ne noseed miech, ni tib meñ wen nac luu, ¿bnë lo naa dien, pe nac mine gun naa parne grieelo ygaa naa guielmban ndzon ne gdziñd dze lozh?

¹⁹ Pquiab Jesús rëb me:

—Rnee luu lëe tib miech wen nac naa. ¡Nligaaw, Diosse gon nac meñ wen! ²⁰ Telne nli racladz luu ygaa luu guielmban co, none tsoxco luu gban luu zigne nac Xley Dios. Nanle luu ganle zha naca, rneew: Tsonied luu zha ne led tsieeld luu, gute luu samiech luu, cuand luu samiech luu, yquiadiidzguizhd luu samiech luu. Gon pxoz luu, gon xniaa luu, cued luu xquielto me.

²¹ Dzigo rëbcha meñ co:

—Maestro, grëse mine bzeet luu i, ni tiba gard quits naa wlal ne nac naa zha nguieg.

²² Horco rëb Jesús lo me:

—Stibaque mine rquiin gun luu. Güey, güeyto grëse ncuaane quianie luu, dzigo bdiiz dimi co lo grë zha mban ne guiend pe yquiin; sca nroobraa guielnzaac ne ygaa luu gbaa. Lozh ga, dë, dënal zhits naa.

²³ Zeene bin meñ co sca rëb Jesús, mbanse rac me laa me zey; sac nroob ncuaane quianie me. ²⁴ Dzigo rëbcha Jesús lo xpëedscuel me:

—¡Zha nganta lëe, rzac zha ne squi rapchen sëeb zho xnëz Dios gnabey me zho! ²⁵ Mazd ngandse rded tib camell guieer guzh.

²⁶ Grë zha ne ndxie ga, zeene bin zho sca rëb me, rneecha zho:

—Telne scataa ngan sëeb miech xnëz Dios, ¿chomezhe dzigo waa nac zha ne zrieelo sëeb xnëz me?

²⁷ Dzigo rëbcha Jesús:

—Nligaa par miech, zootle tsod zha ne grieelo sëeb xnëz me; sangue me nan me no zho. Sac tel me, tsod ncuaane grieelod gun me.

²⁸ Horco pquiab Pedr, rëb Pedr lo me:

—Tel no, grë ncuaane rdziaapse no psan now, laa no ziaadnal zhits luu.

²⁹ Pquiab me rëb me:

—Golgacnana ganle, grëse zha ne psan lidz, psan zho tsieel zho, psan zho xpëed zho, psan zho pxoz zho, psan zho xniaa zho, psan zho bets zho, bziangaa zho, porne bzëeb zho xnëz Dios, ³⁰ na lo guielmban riique, mazdraa nroob mine gan zho, ni lozh ga ib tedsod zgaa zho guielmban ndzon ne gdziñdraa dze lozh.

Bzeet Jesús stib zha csacsi miech me
(Mt. 20:17-19; Mr. 10:32-34)

³¹ Ne sca no Jesús nëz zie me nëz Jerusalén, tibaque bredz me gza tsiipchop zha ne rzëniepaa me ga, bzeet me lo zho zha gun miech me, rëb me:

—Grëse mine bzeetle zha ne biadteed xtiidz Dios padzeela teed naa, niina ne laa ne gdziñ Jerusalén, laaw gac cumplir. ³² Ga gnaaz zho naa, tsielo zho naa ladznia grë zha ne nacdraa zha Israel, xidznie zho naa, squiaago zho naa, stsuc zho lo naa, ³³ zguin zho naa, ni haxta zut zho naa. Per zeene gac tson ngbidza, zriebaan naa.

³⁴ Per ib biend zho dien zha nacne sca rnee me.

Biac tib zha ne rold lo
(Mt. 20:29-34; Mr. 10:46-52)

³⁵ Laa Jesús bzëeb ro guiedz Jericó, miech guizhiu ne nal zhits me. Ro nëz co zob tib meñ ne rold lo, rnab me gon. ³⁶ Zeene bien me rlu nzian miech noded ga, dzigo bnabdiidz me dien pe nacne scataa ziaad grë miech co ga. ³⁷ Dzigo rëb zho lo me, Jesús, meñ Nazaret ziaad ga, zhits me ziaadnal grë miech co. ³⁸ Horco psilo me nguiedz rbedz me, rnee me:

—¡Jesús, meñ xtii rey David, pquia zdoo naa!

³⁹ Grë zha ne ner, psilo zho ndox zho lo me parne guioog ro me, per lel hor cole nguiedzraa rbedz me Jesús, rnab me yquia zdoo Jesús me. ⁴⁰ Nacne zeene bdziñ Jesús gax zaatne zob me, blëz Jesús, bnabey Jesús güeyxi zho me. Bdziñ me lo Jesús, rëbcha Jesús lo me:

⁴¹ —¿Pe nadien gun luu naa?

Pquiab me rëb me:

—¡Racladz naa guiac lo naa!

⁴² Dzigo rëbcha Jesús:

—¡Niinagazh gon laa luu gan stib! Laa luu biac, sacne dib zdoo luu bnalo luu naa.

⁴³ Horcogazh laa men co psilo bui, ine rley me roolnie me Dios, laa me zienal zhits Jesús. Haxta grë miech ne zienal ga, zeene gon zhow, ye zho roolnie zho Dios.

19

Güey Jesús lidz tib men lë Zaquew

¹⁻² Guiedz Jericó, ga no tib men ne rnabey lo grë zha ne rtop dimi ne razh lo rey Roma, lë me Zaquew. Zeene laa Jesús zieded lad guiedz co, ³ brieeme me, ziewi me, sac racladz me gunbey me Jesús. Bdziñ me, pasëse me gan me Jesús, sac lala miech guizhiu ne nal zhits Jesús, ni lala ndopse me. ⁴ Mine been me, rias me bdedner me güeytsep me tib lo yag guigw zob ro nëz co, par gdeeda diidza gan me Jesús, zeene laa Jesús ted ga. ⁵ Zeene laa Jesús bded ga, blis lo Jesús gon Jesús laa me zob ga, dzigo bredz Jesús me, rëb Jesús lo me:

—Zaquew, na zeena biet i. Sac racladz naa, lidz luu cuëz naa nadze.

⁶ Rley Zaquew gon Zaquew sca rëb Jesús, lëälëd biet me lo yag co, laa me zienie Jesús nëz lidz me.

⁷ Zeene gon grë miech cow, rlëë zho, rnee zho:

—jPe lëëtaa lidz zha ngoopdol qui ziebëz me!

⁸ Laa Zaquew, ine rley zobnie Jesús. Tibaque bzoli Zaquew, rëb Zaquew:

—Gacnan luu gon, lo grë ncuaane rap naa, laa naa gded grola ygaaz lo grë zha ne guiend pe yquiin, ni tel nogaa zha ne ndziibraa mine beenquish naa zho, naa maase ctsiree naa tap lal mine blan naa zho ga.

⁹ Horco pquiab Jesús, rëb me lo zha ne ndxie ga:

—I nagon rlu laa men qui wbigle lo Dios, parne ycaania Dios me. Nli zha xtii Abraham nac me, per bzonziaab me ¹⁰ ni naa ne nac naa Mgui ne pxeel Dios, ible laa naa zial zialsilaa naa grë zha ne zonziaab.

Zha ne biaanmie dimi

¹¹ Grë miech ne zienal zhits Jesús ga, rzac zho zigne laa me gdziñ Jerusalén, laa me sob gac me zhirey zho; nacne bzodiidz me tib cuent rii, rëb me lo zho:

¹² —Tib xpëed zha non name, no me tib guiedz win, nacle diidza laa me no tsie zaatne zob men nroob ne rnabey, parne

gzo zho me gac me rey guiedz ne no me ga. ¹³ Zeene laa dze co bdziñ, dzigo bredz me tsii zha ne quia xtsiin me, nroob dimi ne psan me lo zho tib tib zho, parne gundziin zhow, mientras gbire me.

¹⁴ 'Nzianlaa zha ladz me, rlëë zho ran zho me, dzigo pxeel zho bla zha ne güey lo men ne rnabey ne zie me ga, güey nab zho gdeete men co dziin co lo me. ¹⁵ Per niicle sca güey grë zha co, peet brieelod niun zho. Blozhse bzo rey co me, laa me bdziñ ladz me. Zeene bdziñ me, bredz me gza zha ne biaanmie xtimi me ga, par dien palal ziyaca. ¹⁶ Bdziñ tib zho, rëb zho: “Laa xtimi luu nu gon, tsii lal mine psan luu ga naca niina.” ¹⁷ Rley me rëb me lo zho: “jZha squi nagon racladz naa! jWen brieequia xtsiin luu! Niicle zhis ncuaane psan naa lo luu, per bien luu niowse bendziin luuw. Na nagon, laa naa gzo luu, gnabey luu tsii guiedz.” ¹⁸ Bdziñ stib zho, rëb zho: “Laa xtimi luu nu gon, gaay lal mine psan luu lo naa ga naca niina.” ¹⁹ Scaque rley me. Bzo me zho gnabey zho gaay guiedz. ²⁰⁻²¹ Zeene bdziintaa tib zho, rëb zho: “Nli bendziind naa xtimi luu, sac nanle naa zha nac luu, niicle paraa niundziin naaw, grëse mine niuna gan lo luu niaana; gane mazd pquia naaw tib lë lo lar, blootsow naaw, ledaaw nu.” ²² Blëë guic me, rëb me lo zho: “jBiche nu, paat rquiind naa miech yozh ne squi nac! Conque nanle luu zha nac naa, ²³ jPex nac dzigo waa bioxcod luu maase mbediin luu dimi qui, ndziniaaw palal ncaania naaw niina?” ²⁴ Dzigo rëbcha me lo grë zha ne ndxie ga: “Niinagazh golcob dimi qui nia zha qui, goldeeda lo zha ne ziaadnie tsii lala i.” ²⁵ Pquiab zho rëb zho: “Per pe nacne zha coque ycaaniaaw, ni nrooblew beenlo zho.” ²⁶ “Ib sca no gaca”, rëb me, “sac zha ne rien zha gundziin zho ncuaane rcaania zho, nroobraa ncuaane ycaania zho. Laa zha ne squi nac, haxta mine pcaaniale zho, zdiooba lo zho. ²⁷ Sangue zha ne sca ptsidil niac naa rey, goltsiexi zho, niinaga racladz naa ganlo naa gut to zho.”

Bdziñ Jesús Jerusalén

(Mt. 21:1-17; Mr. 11:1-11, 15-19; Jn. 2:13-22; 12:12-19)

²⁸ Blozhse bzodiidz Jesús cuent co lo zho, laa zho bio nēz stib, nerse me lo zho. ²⁹ Zeene bdziñ zho gax Gui Oliv, zaatne ndxie guiedz Betfagé ni guiedz Betain, pxeel me chop xpēēdscuel me, ³⁰ rēb me lo zho:

—Goltsie guiedz win ne ndxie danse lo ne i. Ga gdziñ to zaatne quiadoo tib burr yeen ne choot gard sob lad, dzigo golxadz ma, gołtēnie ma nu. ³¹ Tel cho gnabdiidz lo to pe nacne noxadz to ma, golguiab lo zho: men ne rnabey ne, men co rquiin ma.

³² Laa zho zie. Bdziñ zho, zaatne quiadoo burr co, ³³ nligaa, lēētaque noxadz zho ma, zeene laa bizhuan ma bdziñ.

—¿Pe gun to xpurr naa? —rēb me lo zho—. ¿Pe nacne noxadz to ma?

³⁴ Dzigo rēbchaa zho:

—Men ne rnabey ne, men co rquiin ma.

³⁵ Bdziñnie zho ma lo Jesús, pxob zho lar ne rbix zho lad ma, bzob me ma. ³⁶ Zigse zie me, no grē miech guizhiu co rta zho xab zho ro nēz rded burr ne zob me ga. ³⁷ Grēse miech co, rleynie zho me. Laa zho xiuxto dze cho gui Oliv, zeene psilo zho nguiedz zēēb tsi zho, rley zho roolnie zho Dios, por grētaa milagr ne ziyan zho run Jesús; ³⁸ rnee zho:

—¡Nasi laa Dios pxeel zhirey ne! ¡Zha ndzontaa Dios! ¡Haxta gbaa noyac guielbley dze rii!

³⁹ Blalaa zha farisé ne zienal ga, zeene gon zho zha roolnie grē miech co me, wbig zho lo me, rnab zho gnee me lo zho guioog ro zho. ⁴⁰ Dzigo rēbchaa me:

—¡Zac guioog ro zho, per hor co dzigo laa grē quie rii csilo goolniew naa!

⁴¹ Zeene bdziñ me zaatne nieenpaa Jerusalén, psilo biab guielnē me, biin me gon me guiedz co, ⁴² rēb me:

—¡Prob to men Jerusalén! ¡Tebaa ye to nien niunbey to men ne needz guielbley rii lo to! Per na ib biende tow, masaque rzac to zig zha ne nioog lo. ⁴³ Na nagon laa dze co bdedle. Grē zha ne rlēē lo to, ible ziaad zho ziadsioog corral zho to, ni tib nēz tedlaade to lo zho, ⁴⁴ haxta guiab to ladznia zho, grē xpēēd to. Znitlo zho ladz to, nēzrii nēzrec glaal zho grē quie ne niaa grē lidz to i; sac squi been to ib pcaaniade to Dios, zeene biaadpaa me nsilaa me to lo xtol to.

⁴⁵ Bdziñ me Jerusalén, güey me yadoo, psilo me blee me grēse zha ne noyun lgui ga, rēb me lo zho:

⁴⁶ —Znu zhobnee lo Xtiidz Dios: “Zaatne nac lidz naa, ga none guiaad miech gzodiidznie zho naa.” Laa to gon, quiayun to lugar rii zig tib zhibliee ngbaan.

⁴⁷ Bded ga, gzobse dze rie me rieseed me miech len yadoo ga. Nacne psilo grē pxoz ne rnabey, grē maistr ley, ni grē zha ne nac zha non lo menquiedz, quiaguib zho dien zha gdeeda diidz gut zho me. ⁴⁸ Per rdziel zho dien zha gun zho, sac tibaque ndxie miech lo me, grēse zho rquiaadiag zho zhiwseed me.

20

Bnabdiidz zho cho nac Jesús (Mt. 21:23-27; Mr. 11:27-33)

¹ Len dze ne sca noseed me miech len yadoo, nonee me lo zho zha nac Xtiidz Dios, tib vult bdziñ bla zha ne nac pxoz ne rnabey, grē zho bla maistr ley ni zla men ne nac men non lo menquiedz, ² rnabdiidz zho lo me dien cho nac me, cho rnabey me, zha nacne sca quiayun me. ³ Dzigo rēbchaa me lo zho:

—Ye naa laa naa gun tib wnabdiidz lo to. ⁴ Golnē dien cho pxeel Juan zeene biadchoobnis Juan miech, ¿pe Dios pxeel Juan, te miechsew ye?

⁵ Psilo zho rnabdiidzlsa zho dien zha ctsire zho lo xtiidz me, rnee zho:

—Telne dzieets ne Dios pxeel Juan, dzigo laa me gnē: “¿Pex nac dzigo waa bliladzde to mine bnee Juan?” ⁶ Tel na dzieetsгаа ne, miechse pxeel Juan, grieequiadaque ne; zgoquie menquiedz ne, sac grēse zho rliladz Dios pxeel Juan.

⁷ Dzigo mazd lēē gdib mine been zho, rēb zho nañd zho dien cho pxeel Juan. ⁸ Nacne rēbchaa Jesús lo zho:

—Niicle naagaa nagon, grieelod gni naa lo to cho rnabey naa quiayun naa grē min rii.

Xcuent zha ne pquianap liu (Mt. 21:33-46; 22:15-22; Mr. 12:1-17)

⁹ Blozhse ga, biire psilo me noseed me grē miech co. Bzodiidz me tib cuent rii lo zho, rēb me:

—Tib men name, nroob lbë uv beenbni me lo liun me. Blozh ga blediin me liu co lo bla zha ne ran liu, dzigo laa me brieeg ga, zey me stib dan.

¹⁰ 'Zeene gol mëe ne laa nex co gol, pxeel me tib zha ne quia xtsiin me zie lo zha ne quianap liun me ga, parne gdeed zha co nex ne rieguial me ycaa me. Per lele bnaaz zho zha ne pxeel me ga, bdiin zho zho, blozh ga scase bzonëz zho zho. ¹¹ Wbiire pxeel me stib zho, scaque peet bdeete zho lo zho, lele ndox zho lo zho, bdiin zho zho. ¹² Pxeelaque me stib zho, goc zho tson, scasaque been zho, haxta psiwee zho zho. ¹³ Quianie me tib mëed, rleynie me mëed co. Zeene gon me sca been zha co, rëbchaa me: "Mine naca laa naa cxel xpëed naa, zeene gan zho xpëed naaw, peet gund zho me, nend zon zho xtiidz me."

¹⁴ 'Pex guien zho cho nac xpëed me, zeene gon zho men co, rëb zho: "jLëe zha qui nagon guiaan nie liu rii! jGolgotsoo dzuut ne zho, zeena guiaana lo ne!" ¹⁵ Bnaaz zho xpëed me, güeynie zho me zaatne nac tib lad lo liu co, ga güeygut zho me.

'Zha sca dien rzac to gun bizhuan liu co gza zha ntseeb co? ¹⁶ Ib tedsod lëe, zeene gbire me, znitlogazh me zho. Lozhse ga, cuediinga me liun me lo zla zha ne gundziina.

Zeene bin zho sca rëb me, rneechaa zho: —jIb lic Dios qui, dzuunscad no!

¹⁷ Dze bui me lo zho, dzigo rëbchaa me:

—Per led znu lëe, zhobnee lo Xtiidz Dios: "Quie ne psëeb zha ne nozaa yu, ni nan zho lëepaa quie co nac mine rnazdziits yu."

¹⁸ 'Ni quie co gon, zha ne tsietsobe low, zac zho zig tib ncuaane rac tson tap lë; laa tel lëegaaw tsoe lad zho, zac zho zig tib ncuaane die die rac.

¹⁹ Grë zha ne nac pxoz ne rnabey, ni grë maistr ley, hor co bien zho mine nac zho ga, bzeet me lo cuent co. jGocladz zho gagazh naaz zho me! Per bdzieb zho, niacntseeb grë miech ne ndxie ga. ²⁰ Dzigo mine been zho, pxeel zho bla zha ne zie ziegunguet me par cxin me tib diidz, dzigo min co yquiaaqui zho tsiezo zho me lo zhiwxtis zha Roma. Rquiaalo zha co, no zho liaadz dien zha gzoobdiag zho xtiidz Dios, ²¹ bdzin zho lo me, bnabdiidz zho rëb zho:

—Maestro, ndion no niapse diidzli zienal luu, ni scagaa zeene rseed luu miech, rguibd luu guiannziiuu luu lo zho, sinque niapse mine nac diidzli, mine rlu zha sëeb zho xnëz Dios, min co rnee luu lo zho. ²² Gane niina, racladz no gnë luu dien pe nonguiela ga rdeed no dimi ne razh lo rey Roma, te nonguielda ye.

²³ Bienga me racladz zho gunguet zho me, dzigo rëbchaa me lo zho:

²⁴ —jGolneedz tib xpes to nu ganle!

Dzigo bdeed zho tib pes lo me. Blozh ga, rëbchaa me lo zho:

—jCho nu? jCho lë nu quia lo pes rii?

Pquiab zho rëb zho:

—Lëe rey Roma i, lëe lë me i quia lo qui.

²⁵ Dzigo rëb me lo zho:

—Mine rieguial sca ycaa rey Roma, goldeeda lo rey Roma; scaquegaa mine rieguial ycaa Dios, lo Dios goldeeda.

²⁶ Bzee zdoo zho gon zho sca ptsire me lo xtiidz zho. Mazd dzese bre zho, sac bdziid zho zha niunguet zho me; gocladz zho squi ndxie miech nxin me pe tib diidz, per brieelod niunguet zho me.

jPe nli zrieban miech?

(Mt. 22:23-33; Mr. 12:18-27)

²⁷ Blozh ga, güeyaque zla zha saducé lo Jesús. Nac zha saducé riladzd zho zdzin dze grieaban miech; bdzin zho, rëb zho lo me:

²⁸ —Maestro, znu psan Moisés diidz: telne glo mgui guet lo wnaa ne nac tsiel mgui, ni gopd wnaa mëed, dzigo none betsaque zho ctsieelnia wnaa co stib, zeena gap wnaa mëed ne guiaan xlugar xpëed zha ne gut ga.

²⁹ 'Bio tib dii zha co znu bzhaac, gadz bets nac zho. Ptsieelnia zha ne nac zha gol, zeene laa zho gut, biaand xpëed zho.

³⁰ Dzigo ptsieelnia wnaa co stib bets ngutoo co. Blozh ga, gutaque zha co, pa së zho nsan mëed. ³¹ Ptsieelniaque me stib zho, goc zho tson, niicle zha co psandaque mëed. Sca sca haxta bza gza gadzse zho ptsieelnia me, ³² tibaque zeene yeque me laa me gut.

³³ Mine racladz no gacdion no, jchopaa dzigo gac tsiel wnaa co, zeene laa zho grieaban, ne sca gza gadzse zho ptsieelnia me?

³⁴ Pquiab Jesús rëb me:

—Tiba, gacnan to ganle, lo guielmban rise rtsieelnia miech. ³⁵ Zeene grieedan zho, zig nac zha ne yгаа guielnzaac gdziñ zho zatne no Dios, led yedraa ga ctsieelnia zho. ³⁶ Sac laa zho mbanle ga, gdzindraa dze guet zho. Masaque laa zho gac zig nac grë xanjl me, mëed gac zho lo me. ³⁷ Laa stiba, gacnan to ganle ible zriedan grë menġut. Golwi ganle, zeene bzeet Moisés zha rëb Dios lo me zeene gon me tib yag zarz ne noyazbel ga; ga rlu rriedan menġut. Rëb Dios lo me: “Naa nac Dios ne rliadz Abraham, naa nac Dios ne rliadz Isaac, naa nac Dios ne rliadz Jacob.” Zeene sca rëb me, ga rlu ganle mban zha co. ³⁸ Sac tel me, nacd me xDios menġut, sinque xDios zha mban nac me. ¡Par me, grëse zha ne ngab lo me, zha mban nac zho!

³⁹ Blalaa maistr ley zo ga, gon zho sca rëb me lo zha co, dzigo rëbcha zho lo me:

—Maestro, nli squi naca zigne rnee luu i.

⁴⁰ Dzigotaa ni stib zho beendraa pe nabdiidz zho lo me.

¿Cho xpëed nac Crist?

(Mt. 22:41-46; 23:1-36; Mr. 12:35-40; Lc. 11:37-54)

⁴¹ Horco bnabdiidz Jesús lo zho, rëb me:

—¿Zha nac dien ne rnee zho tib xpëedaque rey David gac Men ne nacle diidz cxeel Dios ga? ⁴² Led Davitaque name znu bnee tib lo salm ne pquiaa me:

⁴³ Bnee Dios lo men ne rnabey naa, rëb Dios lo me:

“Cue naa nëz derech, nu bzob, nieeda lozh gnaz naa grëse zha ne rlëe lo luu, csañ naa zho ladznia luu.”

⁴⁴ Gase ganle rlu, led scada; telne nli zha xtii David gac men co, ¿zha nac dzigo ne lëeque David rnee ne me rnabey David?

⁴⁵ Squi ndxie grë miech co noquiaadiag zho, zeene bnee me lo xpëedscuel me, rëb me:

⁴⁶ —Golguien gon, ib tsienalde to mine run maistr ley. Sac grë zha ne nac maistr ley, rdziladz zho racw zho lar nool, haxta zhits ni zho rbiba, rdziladz zho ndooladz rquiaabdiuzh miech zho zaatne rdzieel zho zho ro nëz. Zig nac len yadoow, zha nac zha ne rzob lo xcan zaatne rzob grë zha non; zeene riegaa zho tib lo lni lidz miech, lëepaaze zha nac zha ne rzob gol mezh

zeene laa wagw rac. ⁴⁷ Ni rlozh ga, rio zho rla zho tel pe ncuane rapse grë wnaa viud; ni parne peet guiabd miech lo zho, xtse rzo zho rzadraa pe lay ne rool zho. Sca run zho, ¡per ib tedsod nroob caxtigw ne yгаа zho!

21

Gon ne bdeed tib wnaa viud
(Mt. 24:1-2; Mr. 12:41-44; 13:1-2)

¹ Laa Jesús no len yadoo ga noseed me miech. Ga no me, gon me zha rdziñ grë zha ricw, nroob dimi rsn zho len alcanci ne zob ga. ² Tibaque zeene bdziñ tib wnaa viud, tib men proba, ye me laa me psan chop gaay win len alcanci co. ³ Zeene gon Jesús, rëbcha me:

—Gneli naa lo to ganle, mazdraa gon non gon ne bdeed wnaa viud qui, lëdle grë gon ne psan grë zha qui. ⁴ Sac tel zha, dimi ne rianle lo zho i rgogon zho; sangue wnaa prob qui gon, centav yeen ne quianiese me, mine rnalopaa me gziuu pe yquii me, per laa me bloogona.

⁵ Laa Jesús zieriee ga, zeene psilo bla zha ne nac xpëedscuel me, rlozhd gwi zho zha niaa yadoo co, rzee zdoo zho ran zho grë quie ne niaaw, grë ncuane ngalguiee lena. Zeene gon mew, rëbcha me lo zho:

⁶ —Niicle squitaa gon ran to niaaw niina, per dzin dze ne nitlow, dib nacsew. Ni stib quie qui guiaandraa zigne squi zhobxcuaaw i.

¡Nsin golso!

(Mt. 24:3-28; Mr. 13:3-23)

⁷ Bded ga, bnabdiidz zho lo me, rëb zho:

—Maestro, ¿poc dzigo gac mine bzeet luu ga? ¿Zha glu zeene laaw ziaadyob gac?

⁸ Dzigo rëbcha me lo zho:

—Nsin golso, zeena choot yquidiede to. Sac nzian zha ne griequia, guiab zho laa dze co bdziñle, guiab zho zha nac Men ne zëeble diidz ga cxeel Dios. ¡lb gliladzde tow!
⁹ Zeene gon to pa lo ndxiedil tib guiedz, pa lo noyacгаа grë dildox, ib gdziebde to. Ib none gac grë ncuane co, per lega loxaque mine csilosew ga.

¹⁰ Grë guiedz nroob, laaw tilnie saguiedz nrooba; grë zha ne rnabey grë guiedz nroob, laa zho tilnie sazha rnabey zho.

11 Nèzrii nèzrec csilo gni grè zhodox, nzian zaatne gan miech gbin, zaatne glaangaa zho grè guielguidzdox. Nzian grè ncuaane glu zhan gbaa, nzian grè ncuaan co, ncuaane ctseb miecha. 12 Per an-sraa gac grè ncuaan co, stsidil miech to, squianał zho to; znaaz zho to, tsiezo zho to lo wxtis ne rnabey yadoo, zha co co to ladzguiib, ni haxta ziezo zho to lo wxtis ne rnabey guiedz, loxaque porne nac to zha ne no xnèz naa. 13 Ga nagon gdeeda diidz gnee to lo grè zha co, gacnan zho ganle cho nac naa. 14 Ib gunde to tso to zhgab dien pe guiab to lo zho, zeene laa to ctsire lo mine rquiaqui zho to; 15 sac naa gnedz guielbiini lo to, zeene laa to gnee guien to pe guiab to. Zha ne gona, squiaadiag zhow, per ni gdziel zho pe ctsire zho lo to.

16 'Haxta pxoz to, xniaa to, bets to, grè menlidz to, grè zha ne ndzieeldiidz to, stsidil zho to, lèèque zha tsielo to ladznia zha ne csacsi to. Lo grè to, zio zha ne haxta zet ladznia grè zha co. 17 Grèse miech glèè gan to porne nac to zha ne no xnèz naa. 18 Nli stiche zho xquielmban to lo guidzliu rii, per, jni tib guits guic to, grieelod zho gnitlo zho! 19 Tiblique sca golgac, sozite to lo naa, zeena ygaa to guielmban ndzon ne gneedz Dios.

20 'Zeene gan to igose guiedz Jerusalén ndxienap menquiib, nanle to len dze co laaw nitlo. 21 Grè zha ne no guiedz ne ngab Judé, none xoon zho tsie zho nèz yagui, ga tsietsolan zho. Zha ne no Jerusalén nu, none grieeniob zho. Grègaa zha ne quia dziin dana, ib guiabd zho gbire zho lad guiedz. 22 Tib guielnèdox ne csiaab Dios gan grè miech rii len dze co, ga gac grè mine raquiet lo Xtuidz me ted zho. 23 jProb grè men wnaa ne lèètse len dze co zoney xpèèd, men ne quianiegaa mèèd ne bii radz! jMbandox ted miech, guielnèdox ne csiaab Dios gan zho guiedz rii! 24 Zutxuu miech zho, zha ne tedlaagaa lo guielgut zeyzhoo miech zho, zhaase zhaase dan ne gueynie zho zho. Horco laa grè zha zit co, sèèb gunchen Jerusalén; haxta gdziin dze ne gnabey Dios griee zho.

Ziaad Jesús stib

(Mt. 24:29-35, 42-44; Mr. 13:24-37)

25 'Nzian grè ncuaane glu lo ngbidz, glu lo mèè, glu lo mel. Mbanse gac miech, zdzieddox zho zeene gon zho bidox ne tso tsasoli nisdoo. 26 Nzian zha ne haxta scow zho lo dzeb, zeene laa zho gan grètaa ncuaane noyac lo guidzliu len dze co. Grè ncuaane no zhan gbaa, nèzrii nèzrec gaca. 27 Horco bii zan zho ganle zeene laa naa zialzèèb tib lo xcow con grè guielndzon, con grè poder ne rap naa. 28 Zeene gan to laa grè ncuaan co rsilo noyac, nley golco zdo to; jsac hor co laa Dios ycaania to!

29 'Golzoob cuidad ganle zha nac yag guigw, beelzegaa pe stib yag. 30 Led ran to ganle, zeene laa grè zhicwa racnieen, laa zhiblaga rsilo rdzib, gase runbey to laa mèè nèèg ziaadgaxle. 31 Scaque nagon zeene gan to laa grè mine rne naa lo to nu rsilo noyac, dzigo nanle to laa dze ne csilo gnabey Dios ziaadgaxle. 32 Gnelli naa lo to ganle, nzian grè miech ne mban niina, bii zan zho zeene laa grè ncuaan co gac; sac ible ncuaane gaca. 33 Zdziin dze ne nitlo gbaa, nitlo guidzliu, sangue mine rne naa lo to nu nitloda; ible laaw none gac. 34-35 jNsin sca golso, zaacse golgac! jAdel gal dze ne laa naa guial, lel lo grè ncuaane ndzinlid, lel lo guielgonziu, lel lo grè zhgab ne rac lo guidzliu rii no to, zigne gun grèraa miech! Sac gon, lega naclew glanso naa. 36 Nligaa nsin golso. Tibaque golnab lo Dios, gacnien me to peet gacde to lo grè guielnè co, ine peet xtolde to zeene laa to gacredz lo naa.

37-38 Gzase len dze co pseed me miech. Silgaw, miech guizhiu ne rdziin len yadoo, parne yquiaadiag zho zhiwseed me. Guidze sca rseed me zho, laa pcow liu riebèz me cho Gui Oliv.

22

Bnediidz zho dien zha gnaaz zho Jesús

(Mt. 26:1-5, 14-16; Mr. 14:1-2, 10-11; Jn. 11:45-53)

1 Ziaadyoble lni Pascwa, zhilni nroob men Israel, lni ne row zho quietxtil ne rquiad ncobi lad. 2 Grè zha ne nac pxoz rnabey ni grè maistr ley, len dze co laa zho no quiaguib zho dien zha gut zho Jesús. Noguib zho tib mod ne

glisquid mengüedza; sac rdzieb zho gacntseeb mengüedz.

³ Tib dzew, laa men̄dox bzëeb zdoo Judas Iscariot, tib zha ne rzëniepaa me ga, ⁴ rias Judas güey Judas lo grë pxoz rnabey co, lo grë men̄ ne zo lo zha ne rquianap yadoo, rëb Judas zha csan̄ Judas Jesús ladznia zho. ⁵ Zeene bin zhow per nli rley zho, nacne biaan̄ zho diidz quizh zho Judas. ⁶ Dzigo desde hor co psilo Judas noguib Judas dien̄ zha gdeeda diidz guiend̄ miech csan̄ Judas me ladznia zho.

Dowxtseenie Jesús xpëedscuel me

(Mt. 26:17-29, 31-35; Mr. 14:12-25, 27-31; Jn. 13:21-30, 36-38; 1Co. 11:23-26)

⁷ Mer dze ne rsilo lni Pascwa, len̄ dze ne sca row zho quietxtil ne rquiad ncobi lad, ni rut zho carner yeen̄ ne rowxtsee zho. ⁸ Dze co bnabey Jesús Pedr grop Juan tsiegun̄lo zho xtsee ne gownie me zho wdze co. ⁹ Dzigo bnabdiidz zho lo me, rëb zho:

—¿Pa lo racladz luu guio no guiodziun̄lo now?

¹⁰ Rëbchaa me lo zho:

—Gol̄tsie Jerusalén. Zeene sëeb to lad güedz, ga gan̄ to tib mgui nzobyan̄ tib re nis, gol̄tsienal̄ zhits me. Yu ne gan̄ to sëeb me, ¹¹ gol̄guiab lo bizhuan̄ yu co: “Znu në Maestro, ¿pa len̄ yu me gneedz luu gac zatne gowxtseenie me xpëedscuel me wdze rii?” ¹² Ga glu me tib len̄ yu nroob ne riaan̄ glaa, nzhixcuaale len̄a, dzigo ga gol̄gun̄lo zhixtsee ne.

¹³ Dzigo laa zho zie. Güey zho zaatne pxeel̄ me zho ga, ga been̄lo zho xtsee co.

¹⁴ Wdze co, zeene gol̄ hor xtsee laa Jesús bded lo mezh gza me gza tsiipchop xpëedscuel me. Xtsee co no zho, ¹⁵ zeene rëb me lo zho:

—¿Blactaa gon̄ pquiambëz naa gdziñ dze rii, znu gowxtseenie naa to nawdze rii, ansraa csacsi miech naa, gut zho naa! ¹⁶ Lëe lultm vüelt nu gon̄ teed naa lni Pascw rii, haxta gdziñ dze ne laa Dios csilo gnabey, dze ne glupaa gan̄le zha nac xtsee rii.

¹⁷ Dzigo bzhen̄ me tib cop nroob no vin, bdeed me xquizh lo Dios, blozh ga bdeed me cop co lo zho, rëb me:

—Gol̄quiin̄ vin rii gza to. ¹⁸ Gneli naa lo to gan̄le, lëe lultm vüelt nu guie naa vin rii, haxta gdziñ dze ne laa Dios csilo gnabey.

¹⁹ Ni bzhen̄ me quietxtil, bdeed me xquizh lo Dios, blozh ga been̄gol̄ mew bdiiz mew lo zho, rëb me:

—Gol̄quiina, rrieequia gon̄ lëe xcuerp naa i, sac gon̄ znu gun̄ zho xcuerp naa parne csilaa naa to grë to. Zeene gdeedtaaw diidz, gol̄gun̄ min̄ rii parne glu to gan̄le tibaque rsoladz to naa.

²⁰ Blozhse dowxtseenie me zho, scaque bzhen̄ me stib cop no vin, blozhse bdeed me xquizh, rëb me lo zho:

—Lëe stib trat cub nu gon̄ riaan̄ Dios grë me miech, rrieequia xchen naa nu nac vin rii, ren ne gzhiee xcuent to, ren ne tso firm trat co par glu nona. ²¹ Ni gacnan̄ to gan̄le, lo mezhaque nu gon̄ zob zha ne tsielo naa ladznia zha ne gut naa. ²² Naa ne nac naa Mgui ne pxeel̄ Dios, nli, ible none guet naa, parne gac mine pxeel̄ Dios naa zial̄gun̄ naa, i per probsaxe zha ne tsielo naa ladznia zha co!

²³ Horco psilo gza zha ne zobnie me ga, rnabdiidzlsa zho dien̄ cho nac zha ne rzeet me ga; ²⁴ haxta psilo zho nodīdiidz zho dien̄ cho gac zha ne gacnon lo zho. ²⁵ Dzigo bnee me lo zho, rëb me:

—Nli grë zha ne rnabey güedz ne ndxie lo guidzliu, masaque rnabey zho miech zig nac zeene bzhii zho zho, per zha gun̄raa miech, lëe gdib rxecw zho, haxta rnee zho nroob quiayun̄ zha co xyudar güedz. ²⁶ Sangue to gon̄, zha ne gnabey lo to, none guiend̄ zho gac zho zig tib ngundziin lo to; zha ne racladzгаа gacnon, none guiend̄ zho guiaan̄win zho. ²⁷ Lo guidzliu rii, zha ne rnabey, rzobse zho, zha ne nac ngundziin, zha co rdziib ncuaane row zho. ¿Sangue lo ne, led scad naca! ¿Gol̄wi gan̄le, tib ngundziin nac naa lo to!

²⁸ Tose goc zha ne tibaque gocnie naa lo grëtaa mine bdeed naa len̄ dze rii. ²⁹ Gane niina, laa naa gneedz tib guiend̄naac nroob lo to ygaa to gdziñ to zaatne bneedz Pxoza naa gnabey naa; ³⁰ zeena ine znu tipse zioob ne lo xmez naa ga, dioow ne, dio ne. Haxta so naa to, to gac zha ne cobey, pe nac mine been̄ gza tsiipchop dii ne nac men̄ladz to nu.

³¹ Horcoque bnee me lo Pedr rëb me:

—Bina gan̄le Pedr, racladz Satanás gon̄ ycuuib ma to, zigne run̄ zho zhobxtil. ³² Per

laa naa bnable lo Dios, gacniē me luu, csaand me sozitpaa luu lo naa. Gacxe waa, zeēne guieñ luu lēda ga beēñ luu, luu gnee lo grēraa zha qui, parne tibaque dib zdoō zho gnalo zho naa.

³³ Pquiab Pedr rēb Pedr:

—Niicxe peraa waa gac, csaand naa luu. Telne co zho luu ladzguiib, ye naa tso ga, telne gutgaa zho luu, zaatne guet luu, ga guet naa!

³⁴ —Bina ganle Pedr —rēb Jesús—. ¡Guiēel riigazh gon, gardle ycuēdz gall, tsonle vuelt rēb luu runbeyd luu naa!

³⁵ Dzigo bnee me lo zho gza zho, rēb me:

—Led rsoladz to ganle zeēne pxel naa to güeyseed to miech, scase güey to, peet dimi bide to, per ni ncuaane gow to, per ni lab to bide to. ¿Pe beēñfalt ncuaane nquiin to hor co?

Pquiab zho rēb zho:

—Beēñfaltetew.

³⁶ Dzigo rēbchaa me:

—Horco nagon peet bide to, sangue niina zha ne quianie dimi, zha ne quianiegaa ncuaane gow zho, none güey zhow. Niina nagon none laa to yquiin spad. Zha ne quianieda, none maase tib xab zho cto zho, si zho tiba. ³⁷ Sac nataa nagon, laa miech cteed naa miñe zhobnee lo Xtiidz Dios, zatne rnee: “Bnabey zho gut me, zigne rut zho grē zha ntseeb.” Grēse miñe zhobnee teed naa, ib laaw none gac niina.

³⁸ Pquiab zho rēb zho lo me:

—¡Bui ganle laa chop spad nule!

Dzigo rēbchaa me:

—¡Mazd peet gnedraa naa lo to!

Bzodiidznie Jesús Pxož me Getsemaní

(Mt. 26:36-46; Mr. 14:32-42)

³⁹ Blozhse ga, laa me brieē zie me nēz Gui Oliv, zaatne rietaque me; zianałaque gza xpēēdscuel me zhits me. ⁴⁰ Bdziñ zho ga, rēbchaa me lo zho:

—Golnab lo Dios gacniē me to, zeēna yquiild mēdox to.

⁴¹ Bzē me spalal, bdziñ me zig zaatne riab tib quie ne rchel ne nia ne, dzigo ga pquiitgzhib me, psilo me bnab me lo Dios, ⁴² rēb me:

—Papá, laa naa rnab lo luu, telne zala zdoō luu, psilaa naa lo grē guieñē rii. Per telne griēeloda, miñe gnētaa luu sca gaca.

⁴³ Horco biet tib anjl gbaa bdziñ pchoobladz zdoō me. ⁴⁴ Mban rac me laa me nozodiidznie Pxož me, per hor cole mazdraa rnab me lo Pxož me; lo guieñē ro co haxta rzonis me, masaque zēbdzuñ grē nis co lo me zootle ren.

⁴⁵ Zeēne laa me guso ga, bdziñ me zaatne biaan xpēēdscuel me, gon me gzase zho laa zho nixguies. Ye zho mban rac zho, lo guieñē co bguudz zho mcaal. ⁴⁶ Dzigo pcuaan me zho, rēb me lo zho:

—¿Nixguies to ye? Lēda i gon, įgol sobna! Golnab lo Dios, gacniē me to, zeēna yquiild mēdox to.

Bnaaz zho Jesús

(Mt. 26:47-58, 67-75; Mr. 14:43-50, 53-54, 65-72; Jn. 18:2-18, 25-27)

⁴⁷ Laa Jesús quianeeque, zeēne laa Judas bdziñ bdziñnie Judas tib dzoon miech. Zigne bdziñ Judas, wbig Judas lo me, dow Judas bzhid cuas me.

⁴⁸ —¡Judas! —rēb me—. ¿Con tib bzhid dzigo lēē glu luu naa lo grē zha qui?

⁴⁹ Zeēne bien xpēēdscuel me, me zianaaz grē miech co, rēbchaa zho lo me:

—Maestro, ¿zha dziuñ ne? ¿Pe zdeed spad no zho?

⁵⁰ Znuse biet tib zho pchel zho tib nia spad, pchug zho diag tib xmoz meñ ne nac pxoz nroob. ⁵¹ Dzigo bnee Jesús lo zho rēb me:

—Golsaan zho, ndzinli golgac.

Horco wbig me bzhen me diag zha co, beēnguiac mew, lēētse miñ derecha.

⁵² Lad grē miech co no ndal grē pxoz ne rnabey, grē zha ne zo lo zha ne rquianap yadoo, ni spalal meñ ne nac zha non lo mēnguiēdz; dzigo bnee Jesús lo zho, rēb me:

—¿Pe nacte squitaa ziaad to, nzhen to yag, nzhen to spad ziadnaaz to naa? ¿Ni-acxe naa cho ngbaan? ⁵³ Blactaa dze name gon to no naa leñ yadoo, ni bnaazde to naa ga. Per nole guic to nagon nawdze rii gnaaz to naa; grē miñe racladz to grē to mēdox, niina laaw gac.

⁵⁴ Horco wbig be zho bnaaz zho me, laa zho zienie me nēz lidz meñ nac pxoz nroob.

⁵⁵ Bdziñ zho lidz meñ co, bre zho xley me, bzēēg zho gui, laa zho no nodzēē zho. Ye Pedr maase zit zit nal Pedr; laa Pedr bdziñ ga; laa Pedr wbig bzob lo zho ga. ⁵⁶ Zeēne

gon̄ tib wnaa ne quia xtsiin̄ meñ co laa Pedr zob ga, dze rwi me, tibaque rëb me:

—iYe mgui qui gon̄ rzënie meñ ne blansonie to i!

⁵⁷—¿Naa ye? —rëb Pedr—, i per ni runbeyd naa meñ qui!

⁵⁸ Wdzeepaaw, laa tib zha ne zo ga, gonaque Pedr, rëb zho lo Pedr:

—¿Segur lëe ye luu nacie meñ ne bgaa i?

Scasaque bneelid Pedr. ⁵⁹ Wdzeelaaque goca, zeen̄ laa stib zho brieequia, rëb zho:

—Lëe tib zha ne nacie meñ qui nu gon̄. iRlu zha galilé nac zho!

⁶⁰ Pquiab Pedr, rëb Pedr:

—iRiend̄ naa gon̄, pe nacie squi rnee luu!

Gardle lozh grieedidz co ro Pedr, zeene laa tib gall pcuedz. ⁶¹ Gall co nocuedz, zeene ptsire lo Jesús, dze bui me lo Pedr; dzigora psoladz Pedr zeene rëb me lo Pedr: “iGuieel riigazh gon̄, gardle ycuedz gall, tson̄le vuelt rëb luu runbeyd luu naa!”

⁶² Mbanse rac Pedr. Brieed Pedr ga, psilo Pedr biin Pedr guielnë co.

⁶³ Grë zha ne zopaa quianap Jesús, nzian grë ncuaane run̄ zho me, psilo zho noyunguzee zho me. ⁶⁴ Pxidoo zho lo me, ni rguin̄ zho me, rlozh ga, rnee zho:

—Luu ne nac luu meñ ne ziadteed xtiidz Dios, ¿bnë sca dien̄ cho ga bdiñ luu?

⁶⁵ Nzian grë ncuaane rgoredz zho lo me.

Güeynie zho Jesús lo zhiwxtis zho

(Mt. 26:59-66; Mr. 14:55-64; Jn. 18:19-24)

⁶⁶ Zeene biini liu, pcaalsa grë meñ ne nac zha non lo men̄guiedz, grë zho pxoz rnabey, ni grë zha ne nac maistr ley, güey zho güeynie zho Jesús lo zhiwxtis zho. Bdzin̄ me ga, bñabdiidz zho lo me rëb zho:

⁶⁷ —Bnë lo no dien̄, ¿pe lëe Meñ ne nacle diidz cxeel Dios lo guidzliu ga i nac luu?

Pquiab me rëb me:

—Niicle tel̄ne gni naa lo to nli lëe meñ co nu nac naa, gliladzde tow, ⁶⁸ tel̄ pe gnabdiidz gaa naa lo to, ctsirede to low; sac gliladzde to mine nac diidzli. ⁶⁹ Naa ne nac naa Mgui ne pxeel Dios, zhile laa dze gdzin̄ zeene laa naa sob cue Dios nëz derech, meñ nroob ne rrieelo run̄ grëse ncuaane racladz me.

⁷⁰ Horco grëse zho pquiab, rëb zho lo me:

—¿Xpëed Dios dzigo lëe nac luu?

Dzigo rëbchaa me:

—Tozhal name rnee, nli Xpëed me nac naa.

⁷¹ Horco rëb zho:

—iPe mazdraa textigw ne racladz ne! iLaa ne bdzionle gan̄le mezhhal rnee Xpëed Dios nac me!

23

Güeynie zho Jesús lo Pilat

(Mt. 27:1-2; 11-14; Mr. 15:1-5; Jn. 18:28-38)

¹ Horcogazh pcaanie zho Jesús nëz, bdzin̄nie zho me lo Pilat, meñ ne nac gobernador ne nzoob zha Roma ga. ² Ga psilo zho nzian grë ncuaane rquiaqui zho me, rëb zho:

—Laa no bnaaz meñ rii gon̄ ziaadnie no me lo luu, sac bgaa me noquuil me men̄ladz no gacntseeb zho. Rnee me lo zho nonguiel̄da gdeed zho dimi ne razh lo zhirey ne, meñ ne zob Roma; haxta rnee me mele nac rey ne gun̄bey zho, sac Dios pxeel̄ me ziaad me.

³ Dzigo bñabdiidz Pilat lo me, rëb Pilat:

—¿Pe nli na luu nac Rey ne rnabey lo zha Israel?

Pquiab me rëb me:

—Nliw, rey nac naa zigne rnee luu i.

⁴ Dzigo rëbchaa Pilat lo grë zha ne ne nac pxoz rnabey co, ni grë miech ne ziegrë zho ga:

—iNi tib dol̄ rapd meñ rii!

⁵ —¿Zha gapd me dol̄? —rëb zho—. Ni zaatne zieetaa me noquuil me miech gacntseeb zho lo zhirey ne. iDible nëz Judé nu güeyted me; desde nëz Galilé brieed me ziaad me haxta nu!

⁶ Gon̄ Pilat sca rëb zho, dzigo bñabdiidz me dien̄ pe zha Galilé nac Jesús. ⁷ Zeene gocnañ me zha nëz co nac Jesús, dzigo pxeel̄ me Jesús lo Herod, sac Herod rnabey nëz Galilé; lëëtaque len̄ dze co laa Herod no Jerusalén ga.

⁸ Rley Herod zeene gon̄ Herod me, sac ziyon Herod grëtaa mine run̄ me; quiambëz Herod gdzin̄ dze gan̄lo Herod me, gan̄lo Herod gun̄ me pe tib milagr. ⁹ Psilo Herod nzian grë ncuaane rnabdiidz Herod lo me, per ni tib lo wñabdiidz co ib pt-sired me. ¹⁰ Zeene gon̄ Herod rquiaabd me, ni gon̄ Herod noque grë pxoz rnabey

co, grë maistr ley co, ib rioogd ro zho rzadraa pe yquiaaqui zho me, rnab zho cteed Herod me caxtigw, ¹¹ nacne leḷ psilo Herod grë xmenḡuiib Herod rzhidznie zho me, runḡuzee zho me. Bgacw zho me tib lar ne racw rey, sca nacw me lar co biire pxeel Herod me lo Pilat. ¹² Glo ib rdzieeld xtiidz Herod grop Pilat, laa dze co laa zho psilo bneewen stib.

Bnab zho guet Jesús

(Mt. 27:15-26; Mr. 15:6-15; Jn. 18:39-19:16)

¹³ Dzigo bnabey Pilat pcaalsa grëse pxoz rnabey, grë zha ne nac zhiwxtis zha Israel, ni grëraa menḡuiedz, ¹⁴ rëb Pilat lo zho:

—Laa zho biad-zoob xdemand men rii lo naa nu, nac diidz noquiil me miech gacntseeb zho lo zhirey ne. Nacne pquieple naa me, ni blalagaa to goḡa; par naa peet dolḷ rapd me. ¹⁵ Niiclegaa Herod, ye Herod goḡ ni tib dolḷ rapd me; gane pxeelaque Herod me lo naa. Quiayunḡ me ncuaane guiab ne rieguialḷ guet me. ¹⁶ Miḡe gaca, laa naa gnabey ted me tib caxtigw, lozh ga dzigo laa naa csilaa me.

¹⁷ Nac costumbr, gzobse lni Pascw rsilaa zho tib zha ne no xcuent lo wxtis. ¹⁸ Per zeene bin grë miech co laa Pilat csilaa Jesús, grëse zho nguiedz roptsie zho, rnee zho:

—¡Csilaa luu menḡ qui, bnabey guetgazh me! ¡Barrabás psilaa!

¹⁹ Barrabás lë tib menḡ co no ladzguiib lenḡ dze co, sac bgaa me zo me lo tib dii zha ne noyactseeb lo rey lenḡ guiedz Jerusalén ga, ni zëëbaque me tib ngutoo. ²⁰ Bguiib Pilat dienḡ zha nrieelo nsilaa me Jesús, ²¹ per psilo grë miech co nguiedz roptsie zho, rnee zho:

—¡None guetgazh menḡ qui! ¡Lo cruz bnabey yquia me!

²² —Per, ¿pe nacne gnabey naa yquia me lo cruz? —rëb Pilat stib—. ¿Pe nac falt ne rap me? Laa naa pquieple me, ni tib dolḷ rapd me, parne gnabey naa guet me. Laa naa nile lo to, laa naa gnabey ted me tib caxtigw, lozh ga laa naa csilaa me.

²³ Psiloque grë miech co stib, nguiedzraa roptsie zho, rnab zho yquia Jesús lo cruz; haxta goc miḡe racladz zho. ²⁴ Racse Pilat, laa Pilat bdeed diidz. ²⁵ Blozhse bnabey Pilat psilaa zho Barrabás, zha ntseeb ne

no ladzguiib ga, dzigo laa Pilat psan Jesús ladznia zho.

Güeyquiaa zho Jesús lo cruz

(Mt. 27:32-44; Mr. 15:21-32; Jn. 19:17-27)

²⁶ Horco laa zho brieenie Jesús laa zho zienie me zaatne yquia me lo cruz. Nëz zienie zho me, bdzieel zho tib menḡ Ciren lë Simón wbire lo dziin dan, pcuëez zho menḡ co, bnabey zho me bi me zhicruz Jesús; nalḡe me zhits Jesús, laa zho zienie Jesús. ²⁷ Miech guizhiu ne zie ga, ndal grë menḡ wnaa psilo zho roon zho no zho xquielḡnë me, ²⁸ dzigo dze bui me lo zho, rëb me:

—Xin, nac to menḡ Jerusalén rii, goonde to xquielḡnë naa. Mazd golḡoon por grëtaa guielḡnë ne no ganḡ to, por grëtaa guielḡnë ne no ganḡ xpëed to; ²⁹ sac zeene galḷ dze co grë menḡ wnaa ne quianie mëed, ziab zho: “Mazd wenaque zie zha ne quianied mëed, zha ne nanḡ zha radz mëed, zha ne ni-aadgaa gap mëed.” ³⁰ Horco grë miech, laa zho gnab tebaa zha pixche grë gui guiaanḡ zho zhana. ³¹ ¡Golwi ganḡle, telḡne znutaa miḡe nodeed naa nac naa zig tib yag nguia, peleḷ to dzigo ne nac to zig tib yag bidz!

³² Ye schop zha ne nac ngbaan, zienie zho ga yquiaagza zho me lo cruz. ³³ Zeene bdzin zho zaatne nac “Gui Beer-guic Ngutoo”, ga pquiaa zho me lo cruz gza me ngbaan co. Tibga zhicruz zho bzo tib nëz cue zhicruz me. ³⁴ Lo cruz co quia me, zeene nguiedz bnee me rëb me:

—¡Papá! Ncuaane quiayunḡ grë miech rii nu, bzhiguielḡ guḡquizhd luu zhow; sac rienḡ zho pe runḡ zho.

Gza menḡuiib ne bdzinḡ ga yquiaanap me, hor co tib tib zho bzhense zho tib lë xab me, laa stiba bio zho rif. ³⁵ Ndal miech ne ndxie quiawi. Haxta grë zha ne nac wxtis zo ga, no zho rzhidznie zho me, rnee zho:

—Stib miech scataa beenḡuiac me, stib miech scataa bla me. ¿Pe rac me na ne riete me i? ¡Guiet me i zho, telḡne nli me nac Menḡ ne zëëble diidz cxeelḡ Dios, telḡne nli Dios bzooblo me ziaad me!

³⁶ Wbig menḡuiib co rdeed zho nziu bla guie me, rzhidznie zho me, rnee zho:

³⁷ —¡Zhirey zha Israel name nac luu! Psi-laa luu lo guielḡnë qui nazho.

³⁸ Glaa guic zhiczuz me quia choplan diidz ne pquiaa zho, rneew: “LĒĒ ZHIREY ZHA ISRAEL NU.”

³⁹ Grop ngbaan ne quianie me lo cruz ga, psilo tib zho ye zho rzhidznie me, rnee zho lo me:

—¡Led rēb luu lēē, luu nac Men ne zēēble diidz ga cxeel Dios! ¡Blu nazho nli men co nac luu, psilaa ne lo guielnē rii!

⁴⁰ Horco pquiab stib zha co, rēb zho lo zho:

—¡Psioog ro luu! ¿Pe niicle niina ne laa luu guetle ib rdzieebd luu Dios? ⁴¹ Bien ganle, ¡tel ne ible min rii riogua! ne grop ne, nu nodizh ne grē guielntseeb ne bdzi-uun ne; sangue men qui, peet dol rapd me!

⁴² Dzigo rēb zho lo me:

—¡Bzhiguiel zeene guiaad luu gnabey luu, ib csand luu naa tib lad!

⁴³ Pquiab me rēb me lo zho:

—Peet tsienied guic luu, nadzegazh laa luu sē guioo ne zaatne nac lo xquielbley Pxoz naa.

Gut Jesús

(Mt. 27:45-56; Mr. 15:33-41; Jn. 19:28-30)

⁴⁴⁻⁴⁶ Gol grol dzew, tibaque zeene goc tib ncow dipse lo guidzliu. Ni palal rlud xbiini ngbidz, haxta las tres biala biini stib. Horco pquiaa Jesús tib redz nroob, rēb me:

—Papá, laa naa rsan zhiespíritu naa ladznia luu, luu pcaaniaw.

Diidz co brieer ro me, znuse blozh me. Laa me quialozh, zeene laa lar nroob ne quia len yadoo Jerusalén ga briez nzoli, groltaa goca.

⁴⁷ Zha ne rnabey lo zhaguiib ne pquiaa me lo cruz ga, zeene gon zho zha blozh me, bien zho Dios been min co, rēb zho:

—¡Ne nlipagaa tib men peet xtold goc men qui!

⁴⁸ Scaque grē miech ne goclo ga, zeene gon zho zha blozh me, biabguielnē zho, mbanse rac zho laa zho wbi ga. ⁴⁹ Laa grē zha ne runbey me, zha ne gocnie me, zig nac grē men wnaa ne gocgrē zha ne brieenal zhits me zeene brieer me nēz Galilé, grē zho laa zho ndxiese tib lad rwi zho.

Bgueets Jesús

(Mt. 27:57-61; Mr. 15:42-47; Jn. 19:38-42)

⁵⁰ Lad grē zha ne nac zhiwxtis men Israel ga, no tib men guiedz Arimaté lē me José; lēē guiedz co ndxie xtan Judé. Tib miech wen nac me, noxco me mine rnabey Dios, ⁵¹ ye me quiambēz gdziñ dze ne csilo gnabey Dios. Zeene bnabey zha ne nacgrē me dziin ga zha gac Jesús, ni lalnu biod me conform mine bnabey zho. ⁵² Nacne hor co güey me lo Pilat, bnab me diidzbey tsielit me xcuerp Jesús lo cruz. ⁵³ Dzigo güey me, blozhse blit me cuerp co lo cruz, pchel me me tib lo lar nroob, güey me güeyqueets me me tib len baa cub ndieen tib cho quie gax ga.

⁵⁴ Lēē bdze dze co no zho xco ne laa dze ne gdziiladz zho lo dziin sēēb. ⁵⁵ Grē men wnaa ne sca nacgza grē zha ne brieenal zhits me zeene brieer me nēz Galilé ga, ye zho güeynal bgueets me, gon zho pa lo bio me. ⁵⁶ Blozhse bgueets me, laa zho zey. Bdziñ zho bzhixcuaa zho, tiblo zēnex ne tsietēēb zho lad xcuerp me; dzigo laa zho bdziiladz zigne rnabey ley no gun zho.

24

BRIEBAN JESUS

(Mt. 28:1-10; Mr. 16:1-8; Jn. 20:1-10)

¹ Laa zeene gol dze ne rzobni zhmal, silgaw laa gza men wnaa co brieer, bi zho grē zēnex ne bzhixcuaa zho ga, laa zho zie ro baan Jesús.

² Bdziñ zho, gon zho laa quie ne bioog ro baan me ga bdiooble; ³ bzēēb zho len baa gon zho, niicle xcuerp me guiendle ga.

⁴ Laa zho zo ga, riend zho dien pe nacne sca nialse ro baa co, pe nacne niicle xcuerp me guiend leen co. Tibaque zeene gon zho laa chop men bgui zole lo zho ga, masaque riaazbel lad xab grop men co. ⁵ Horco per nli bdzieb zho, lo dzeb co mine been zho laa zho pquiitgzhiz haxta bdziñ lo zho lo liu. Dzigo rēb grop men bgui co lo zho:

—¿Pe nacne ziaadguib to men mban za-atne rio mengut? ⁶ ¡Laa me brieerbanle! ¡Guiendle me nu! Golsoladz ganle zha nē me lo to len dze ne no me nēz Galilé, ⁷ nē me: “Mgui ne pxeel Dios, ible none guiab me ladznia grē miech ngoopdol, squiaa zho me lo cruz, per zeene gac tson ngbidza, laa me grieerban.”

⁸ Dzigoraa psoladz zho, nligaa sca bnee me, ⁹ hor co lëëlëd güeynie zho diidz lo gza tsiiptib zha ne nac xpëëdscuel me, ni lo grëraa zha ne nacgza zho ga. ¹⁰ Nzianlaa nac men wnaa co, lad co no Marí Magdal, no Zhuan, ni Marí ne nac xniaa Jacob.

¹¹ Niicle bzodiidz zhow lo xpëëdscuel me, per con rnee zho led ncuaan gacd ga, ni lalnu bliladzd zhow. ¹² Tibaque zeene brieed Pedr, rias Pedr laa Pedr zie nêz ro baa. Bdzin Pedr bdiixlo Pedr len baa co, gon Pedr nligaa, jloxaque lar ne briel me zhoob leen co! Blozh ga, laa Pedr zeyaque, rzee zdoo Pedr gon Pedr nli guienle xcuerp me ga.

*Gon zho Jesús nêz Maús
(Mr. 16:12-13)*

¹³ Dze co brieed chop xpëëdscuel me zie zho tib guiedz win lë Maús. Gax Jerusalén riaan guiedz win co, maase chop hor rzê zho rdzin zho ga. ¹⁴ Nêz no zho nozodiidz zho grê mine pteed miech Jesús ga, ¹⁵ tibaque zeene bien zho laa zho bgaa tib lo men co, gocgza me zho laa zho no nêz, per, jib biend zho lë Jesús ga! ¹⁶ Ranlo zho laa me ziegza zho ga, per ni lalnu beenbeyd zho ne mew, sac zig nac zeen pe tib ncuaane ptse lo zho. ¹⁷ Dzigo rëb me:

—¿Pe squitaa nozodiidz to? ¿Pe nac squi rac to, zig nac zeene pe guienê no to?

Dzigo bzodze zho. Mban rac zho, haxta lo zho rlu nroob guienê no zho. ¹⁸ Pquiab tib zha ne lë Cleof, rëb zho:

—¿Niacxe bind luu ganle zha nactaa ncuaane goc Jerusalén len dze rii? Grêse zha ne name güey Jerusalén, gocnaa.

¹⁹ —Nligaa —rëb me—, ¿pe dien goc ga?

Rëbchaa zho:

—Len dze rii psacsi zho men Nazaret ne lë Jesús. Tib men ne biadteed xtiidz Dios lo miech nac me, nzian grê milagr nroob ne been me; miech guizhiu ne bley pquiaa-diag zhiwseed me. Rlu tib men nziuu nac me lo Dios. ²⁰ Per lel brieed grê pxoz rnabey, grê zho zha ne nac wxtis, bnaaz zho me, bnab zho gut me, pquiaa zho me lo cruz.

²¹ Tibaque rdzieets no, me niac tib men ne nsilaa zha ladz ne ladznia zha Roma. Pasêse min co niac, nadzele rac tson ngbidz beet zho me. ²² Per riend no dien zha nac cuent co, sac nasil güey bla men wnaa ne

nacgrê no ro baan me, ²³ zeene wbiere zho bzodiidz zho lo no nê zho guienle xcuerp me len baa, loxaque chop anjl brieequia lo zho ga, rëb anjl co mban me. ²⁴ Blozh ga, güeyaque bla zha bgui ne nacgrê no, gon zho nligaa guienle xcuerp me ga.

²⁵ Dzigo rëbchaa me lo zho:

—¿Nadzpaa ncow nac guic to, nadzpaa ndip nac zdoo to! ¿Riladzde to grê mine dzigo lë bzeet zho padzeela ted Men ne nole diidz ga cxeel Dios? ²⁶ Bzeetle zha co name ible no csacsi miech me, antes ne gbire me lo guienlonzon ne no me.

²⁷ Dzigo psilo me bnee me lo zho pa lo zhobnee grê mine bded me ga, psilo me desde grê mine pquiaa Moisés, haxta grê mine pquiaa grëraa zha ne biadteed xtiidz Dios. ²⁸ Sca no zho nêz laa zho bdzin Maús, Bdzin zho ga, rac me zig nac zeene tib ted me, ²⁹ dzigo quia zho rnab zho lo me cuêz me ga, sac laa dze bdzele, zhile laa liu ycow. Nacne blêz me.

³⁰ Laa zho zob lo mezh gowxtsee zho, bzhen me quietxtil bdeed me xquizh lo Dios, blozh beengrol mew bdeed mew lo zho. ³¹ Dzigoraa zig nac zeene bzhal lo zho, laa zho beenbey me. Per par nianraa zho me, znuse bnit me lo zho, gondraa zho me. ³² Horco per nli rley zho rnee zho:

—Con razon zeene sca ziaadgza ne me nêz nonee me lo ne zha raquiet lo Xtiidz Dios, masaque tib guienbley nroob ne biadnie xcodiidz me zdoo ne.

Sca rnee zho, sac bien zho bdzin tib guienbley nroob zdoo zho, zeene sca nonee me lo zho. ³³ Lëëlëdaque brieed zho ga, bio zho nêz wbiere zho Jerusalén stib. Bdzin zho lo gza tsiiptib zha ne bzëniëpaa me ga, ni grëraa zha ne nacgrê zho, ³⁴ rëbchaa zha co lo zho:

—¿Tebaa gan to ganle nli brieëban xmaistr ne! ¿Laa Pedr gonle me!

³⁵ Psiloque zho grop zho bzodiidz zho zha gon zho me no zho nêz, per haxta horne no zho xtsee, zeene laa me beengrol quietxtil dzigoraa beenbey zho me.

*Brieequia Jesús lo grê xpëëdscuel me
(Mt. 28:16-20; Mr. 16:14-20; Jn. 20:19-23)*

³⁶ Lëëtaaque sca nozodiidz zho, tibaque zeen gon zho laa Jesús zole lo zho ga,

pquiaabdiuzh me zho, rëb me lo zho, peet tsieniedraa guic zho. ³⁷ Leḷ rdzieb zho, haxta rzhidz zho lo dzeb co, sac rëb zho bod ndziin ga ran zho. ³⁸ Dzigo bnee me lo zho rëb me:

—¿Pe nacne rdzieb to? ¿Pe nacne rililadzde to naa nu? ³⁹ Goḷwi len nia naa, goḷwi zhits ni naa ganle. Goḷxeen naa, zeena gliladz to ganle nli naaw; sac tel ndziina, mese naca, gacd xen tow.

⁴⁰ Sca quianee me, blu me nia me, blu me ni me lo zho, zaatne biaaz me clav. ⁴¹ Per nli rley zho, rzee zdoo zho, per rililadzdaque zho dien pe nlipaa lëë me ga. Goḅ me sca rac zho, nacne bnab me ncuaaḅ gow me lo zho. ⁴² Dzigo bdeed zho tib lë mel bguiee lo me, ⁴³ bnaaz me mel co, squi ndxie zho goḅ zho dow me ma. ⁴⁴ Dzigo rëb me lo zho:

—¿Pe ib rsoladzde to nile naa laa grë min rii no gac? Led ni naa lo to, grëse mine bzeet Moisés, grëse mine bzeet grë zha ne biadteed xtiidz Dios, mine raquietgaa lo Salm teed naa, ible laaw none gac.

⁴⁵ Psilo me clar nonee me lo zho, parne guienpaa zho zha zhobnee lo grë guits co, ⁴⁶ rëb me:

—Ible lo co zhobnee sca teed naa ne nac naa Mgui ne pxeel Dios, rneew ib no gut miech naa, per zeene gac tson ngbidza, laa naa grieeban. ⁴⁷ Rneew, Jerusalén nu, nu csilo gacnaḅ miech ible none csaan zho xquielntseeb zho, gnalo zho naa, parne gun Dios zho perdon. ⁴⁸ Ni to goḅ ganle grëse min co, goca. ⁴⁹ Na len dze ne ziaadaque nu, laa naa cxel Espíritu Sant gacnieḅ to, sac ib scale nac xtiidz Pxoḅ naa. Per guiabde to niinaga grieet to tsienee to lo miech, Jerusalénse nu goḷcuëz, haxta nieeda ygaa to poder ne gneedz Espíritu Sant lo to.

⁵⁰ Zeene goḷ dze ne laa me guey gbaa, dzigo güey me güeynie me zho nëz Betain. Bdziḅ zho ga, blis me nia me, psilo me noyunlay me zho. ⁵¹ Laa me quiayunlay zho, tibaque zeene laa me bias lo guidzliu, iḅonlo zho laa me bzoquia gbaa!

⁵² Horco pquiitsgzhib zho liu, beḅnon zho me, rnee zho grë diidz ndzon lo me; blozh ga ine rley zho laa zho wbi ga, bdziḅ zho Jerusalén stib. ⁵³ Psilo zho gzataa dze

rie zho yadoo roolnie zho Dios, rdeed zho xquizh lo me.

XTIIDZ NDZON DIOS MINE PQUIAA JUAN

1-2 Jesús, men ne nac Diidz Ndzon, nole me zeene bīaa grētaa ncuaane no; lo Dios no me ni Diosaque nac me. Notaque me, tībaque nac me: me ni Dios. ³ Me bzaa grētaa ncuaane no, tsod ncuaane lega scase nīaan; sac me bzaaw grēsew. ⁴ Ladznia me no guielmban ne gdzind dze lozh, nac guielmban co zig tib biini ne rziini lo miech. ⁵ Me nac biini ne quīaziini zaatne nac lo guielcow, ni rrieełod guielcow ctsew lo biini co.

⁶⁻⁷ Bio tib mguī brieelē Juan, Dios pxeel Juan biadnee Juan lo miech cho nac Jesús, zeena grēse zho gliladz Jesús. ⁸ Led Juand nac biini, sinque loxaque bīaad Juan bīaadlu Juan Jesús, men ne nac biini co. ⁹ Bdzin dzew laa Jesús bīaad, ni niina me nac men ne noziini lo grēse miech, sac mepaa nac biini co.

¹⁰ Jesús nac biini, me nac Diidz Ndzon co. Me bzaa guidzliu, per zeene bīaad me lo guidzliu ib biend miech cho nac me. ¹¹ Per ni menladz me, niicle ne lopaa zho bdzin me ib gondzed zho me; tib chop zha ne blēzlo me. ¹² Ni grē zha ne sca bleynie me, grē zha ne dib zdoo gliladz cho nac me, grēse zha co laa me bzo zho gac zho xpēed Dios. ¹³ ¡Grēse zho, rrieequia gol zho stib! Per guiabd ne togo gol zho zigne ral grē miech guidzliu rii, sinque laa zho gol zigne racladz Dios; gane niina xpēed me nac zho.

¹⁴ Zeene bdzin dze ne laa men ne nac Diidz Ndzon ga gōc miech bīaad me lo guidzliu, grop lo no bdzion no me, ni bzīanie no me. Blu me pa lotaa nquialadz me miech, ni niapse diidzli bnee me. Bdzion no xquielndzon me ne nac me tibpaa mēed lo Dios, men ne nac Pxoze ne.

¹⁵ Zeene bzeet Juan Bautist me lo miech, tib vuelthaxta blu Juan me lo zho, rēb Juan: “Lēē men rii ga gon rzet naa lo to zeene rne naa: Iraa zīaad tib men ne mazdraa non lo naa, sac notaque me; nole me zeene blanso naa lo guidzliu.”

¹⁶ Nquialadzdox Jesús ne, grēse ne gzataa dze laa ne nogaa grētaa guielnzaac ne rsīaab me. ¹⁷ Zeene psan Moisés ley, loxaque bnabeya ne; sangue niina ne laa Jesús bīaad, laa me bīaadnie mine nacpaa diidzli ni bīaadlu me ganle pa lotaa nquialadz Dios miech.

¹⁸ Wlaltaa ib choot gard gan Dios; sangue niina ne laa Xpēed me Jesús bīaad, men co bīaadlu ganle zha nac Dios; sac zaatne no Dios gaque no me.

*Rnee Juan Bautist cho nac Jesús
(Mt. 3:11-12; Mr. 1:7-8; Lc. 3:15-17)*

¹⁹ Tib dze pxeel grē zha ne nac zha non Jerusalén, bla zha ne nac pxoz ni zla zha ne rquianap yadoo, zīenabdiidz zho lo Juan dien cho nac Juan.

Bdzin zho bnabdiidz zho lo Juan.

²⁰ Dzigo bneeli Juan lo zho, rēb Juan:

—Golgacnan ganle, led naad nac Men ne quiambēz to ga cxeel Dios.

²¹ —¿Chox nac luu waa? —rēb zho—. ¿Te luu ye nac Lí, men ne biadteed xtiidz Dios padzeela?

Pquiab Juan rēb Juan:

—Lēda, led Lí naa.

Biire zho bnabdiidz zho, rēb zho:

—¿Te luu ye nac men ne bzeet Dios padzeela cxeel me guiadteed xtiidz me?

Pquiab Juan rēb Juan:

—Zhaa men co, led naad nac men co.

²² —¿Cho dzigo nac luu? —rēb zho—. Bnē dien cho nac luu; sac gon ib none gdzinnie no tib xtiidz luu lo zha ne pxeel no.

²³ Dzigo pquiab Juan, rēb Juan lo zho:

—Naa nac mguī ne bzeet Isá, men ne biadteed xtiidz Dios padzeela, zeene znu bnee me: “Zon to zēēb tsi tib mguī dan rnee me lo miech: ¡Golgun nguudz zdoo to, sac gon ile zīaad men ne rnabey ne!”

²⁴ Horco laa zha ne pxeel zha farisé pquiab, rēb zho lo Juan:

²⁵ —Telne led luud nac Men ne zēēble diidz ga cxeel Dios, niicle led luud nac Lí, niicle nacdgaa luu cho stib zha ne pxeel Dios zīadteed xtiidz me, ¿zha nac dzigo ne nochoobnis luu miech?

²⁶ Pquiab Juan rēb Juan:

—Tel naa niab nis rchoobnis naa miech, per no tib men ne gard gunbey to. ²⁷ Tib men non nac me, per ni par gac naa tib

ngundziin win ne glit lab me ni me raguiald naa; ni merle csilo guñ me dziin ne pxeel Dios me guñ me.

²⁸ Betain lë tib guiedz ne riaan gax ro guiubee Jordán, nëz ne rlan ngbidz; ga no Juan nochoobnis me miech zeene scataa pquiep zho me.

¿Cho nac Jesús?

²⁹ Biet stib dzew, laa Jesús bdziñ zaatne no Juan ga. Zeene guñ Juan me, rëbchaa Juan lo grë miech ne ndxie ga:

—¡Golwi ganle, lëe meñ qui guñ csilaa miech lo grëtaa xtol zho! ¡Me gac zig tib carner yeen ne guet tsogon lo Dios par guiaanmbe miech lo dol! ³⁰ Lëe meñ rii ga nagon rzet naa lo to zeene rne naa: “Iraa ziaad tib meñ ne mazdraa non lo naa, sac notaque me; nole me zeene blanso naa lo guidzliu.” ³¹ Leñ dze co niicle naa runbeyd naa me; per laa naa nochoobnis miech sac ible laa naa zial par glu naa me lo grë zha Israel.

³² Dzigo bzodiidz Juan lo zho, zha gonlo Juan biet Espíritu Sant gbaa, rlu me zigne rlu tib palom blëz me guic Jesús.

³³ —Ne nligaa runbeyd naa me —rëb Juan—. Per zeene pxeel Dios naa zialchobnis naa miech, hor co në me lo naa: “Zeene gan luu quiet Espíritu Sant gbaa cuëz me guic tib mgui ne nochoobnis luu, dzigo gocnañ lëe meñ co nac meñ ne rxeel Espíritu Sant zdoo miech.” ³⁴ Gonlo naa blëz Espíritu Sant guic me; gane nanween naa ne nli Xpëed Dios nac me.

Zha ne glopaa goc xpëedscuel Jesús

³⁵ Biini liu co, laa Juan zoque ga zonie me chop xpëedscuel me. ³⁶ Ga zo me, guñ me laa Jesús zieded ga; dzigo rëbchaa me lo zho:

—¡Golwi ganle! ¡Lëe meñ qui guñ nac Xcarner yeen Dios!

³⁷ Zigne bin zhow, laa zho zienal zhits Jesús. ³⁸ Zeene ptsire lo me, guñ me laa zho nalle zhits me; dzigo rëbchaa me lo zho:

—¿Pe nac ziaadnal to zhits naa?

—Maestro —rëb zho—, laa no racladz gacndion no dien pa rbëz luu.

³⁹ Dzigo rëbchaa me lo zho:

—Na ganle guio ne, zeena gan to paw.

Nacne güeynal zho zhits me, gon zho pa lo no me; dzigo blëz zho lo me ga. Ga blozh ptse zho dze, sac ziedzele dze zie zho.

⁴⁰ Ndrës lë tib zha ne güeynal zhits me ga; lëe Ndrës co nac bets Simón Pedr. ⁴¹ Dzigo zigne brieë Ndrës ga güey Ndrës güeyguib Ndrës Simón. Bdziñ Ndrës rëb Ndrës lo Simón:

—¡Nasi guñ laa no bdzion Men ne nacle diidz ga cxeel Dios!

⁴² Dzigo güeynie Ndrës Simón zaatne no Jesús ga. Zeene guñ Jesús Simón, rëbchaa me lo Simón:

—Bina ganle, nli Simón nac lë luu ni xingan Jonás nac luu, sangue niina laa luu grieelë Cef.

(Cef rnee zha Israel quie, laa xtiidz zha Gres rnee zhow Pedr.)

⁴³ Biet stib dze co, laa Jesús no nëz tsie me nëz Galilé. Laa me zieriee dze ga, zeene bdzieel me tib mgui lë Lip; dzigo rëbchaa me lo Lip:

—Dënal zhits naa.

⁴⁴ Zha Betsaid nac Lip, ni zha coque nac Ndrës grop Simón.

⁴⁵ Dzigo güey Lip güeyguib Lip Natanael; rëb Lip lo Natanael:

—¡Laa no bdzion Men ne nacle diidz ga cxeel Dios! Men ne rzeet Moisés lo libr ley ne psañ me, meñ ne scataa bzeet grë zha ne biadteed xtiidz Dios padzeela. ¡Laa no bdzion me, tib meñ Nazareta, lëe me ga nac Jesús, xingan José!

⁴⁶ Pquiab Natanael, rëb Natanael:

—¿Nazaret ye? ¡Gard grieequia tib zha non Nazaret!

—Gotsaa guio ne ganle —rëb Lip—, zeena ganzhal luu me.

Dzigo laa zho zie. ⁴⁷ Squi ziaad Natanael, zeene guñ Jesús Natanael rëbchaa me:

—¡Golwi ganle, lëe zha qui guñ nac merpaa zha Israel, sac mesi ib rquidied me!

⁴⁸ —¿Zha nacne runbey luu naa? —rëb Natanael.

Pquiab me rëb me:

—Glolle naa beenbey luu, dzigoraa bredz Lip luu. Zeene zob luu tib zhan yag guigw, hor co guñ naa luu.

⁴⁹ Rzee zdoo Natanael, rëb me lo Jesús:

—¡Nlique nagon luu nac Xpëed Dios! ¡Luu nac zhirey zha Israel!

⁵⁰ Dzigo rëbchaa Jesús lo Natanael:

—¿Pe ne binse luu ni naa gon naa zeene zob luu tib zhan yag guigw, pe mincose laa luu bliladz cho nac naa? ¡Naraa ganle gan luu ncuaane mazdraa nroob!

⁵¹ Ni rëb me lo grë zha ne ndxie ga:

—Gneli naa lo to: zanaque to ganle zeene laa zhan gbaa gzhal, zlpuaa grë xanj! Dios, zha ne ziad-zëeb zha ne ziequia, quiayun zho dziin lo naa, nac naa Mgui ne pxeel me.

2

Güey Jesús tib lo guieltsieel

¹ Goc tson ngbidza, bio tib guieltsieel guiedz Caná, xtan zha Galilé ga. Dzigo bredz zho xniaa Jesús lo lni co, ² ni bredz zho me; nacte bional no zhits me grëse no ne nac no xpëedscuel me.

³ Laa lni noyac, tibaque zeene laa vin blozh. Dzigo güey xniaa Jesús rëb me lo Jesús:

—Laa xvin men rii blozh. ¡Guiendraa pe quiiz zho!

⁴ Pquiab Jesús rëb me:

—¿Pe nacte rnee luuw lo naa? Gon ganle naraa gdziñ dze ne gacnan miech cho nac naa.

⁵ Niicle sca rëb Jesús lo me, güey me lo zha ne quiaguiz vin ga rëb me lo zho:

—Mine gnabeytaa me to, golguna.

⁶ Lidz men co ga ndxie xoop guies ne niaa quie; zaatne rio nis ne rquiin zha Israel riar nia zho, zigne nac grë xcostumbr zho. Tib tib guies co, rio maase xoopga re nis lena. ⁷ Dzigo bnabey Jesús zha ne rguiz vin ga pcodzëe zho nis len gza guies co.

⁸ Blozhse guiel guiel pcodzëe zhow, rëbchaa me lo zho:

—Golcuae niip nis qui, goltsieniew lo men ne zo lo lni.

Zeene laa zho blee niip nis co tsienie zho, laaw nacle vin. ⁹ Ni lalnu ib güeynied guic men co pa brie vin co (loxaque zha ne nacte ngundziin ga, zha ne blee nis ga, zha cose gon pa brieew), zeene pquiaaro mew, bredz me mgui ne notsieelna ga, rëb me:

¹⁰ —¡Zha nan luu naraa cuee luu vin rii! Grëtaa zaatne znu rac lni, glo rgaaz vin ni-azh, zeene nrooblew noye zho, dzigo rgaaz vin ligase. Laa luu gon lel naraa bnabey luu brie vin niazh.

¹¹ Milagr ne been Jesús guiedz Caná ga, ga glopaa blu me lo miech ganle nli tib men nroob nac me. Grëse no ne nac no xpëedscuel me, zeene bdziñ now, hor co bliladz no nli me nac Men ne zëeble diidz ga cxeel Dios.

¹² Zeene blozh guieltsieel co, laa no wbire guiedz Capernaum stib grë no me, xniaa me, ni zha bets me ne. Bdziñ no Capernaum, ga bliaaz no blalaa ngbidz.

Blee Jesús grë zha ne noyun lgui len yadoo

(Mt. 21:12-13; Mr. 11:15-18; Lc. 19:45-46)

¹³ Len dze ne ziaadyob lni Pascw, lni nroob ne run zha Israel rsoladz zho zha psilaa Dios zho Egipt, len dze co brie Jesús zie me nöz Jerusalén.

¹⁴ Bdziñ me Jerusalén, güey me len yadoo nroob ne zob lad guiedz co. Zeene bzëeb me, gon me nzian miech ne ndxie ro yadoo co, zha ne no wto ngon, zha ne no wto mëcwxiiil, zha ne no wto palom ne, haxta zha ne rtsëe dimi ndxie ga. ¹⁵ Dzigo bzhixcuaa me tib lë doo zig riaa dooguid ne rcaa ma, bzhen me doo co beñcxoon me zho ga grë xma zho; blozh ga, ptiixche me xmez zha ne notsëe dimi ga, nözrii nözrec blaal me xtimi zho.

¹⁶ —¡Niinagazh golcuae grë ncuaan qui nu! —rëb me lo zha ne rto palom—. ¡Golguien ganle lidz Pxoz naa nu! ¡Nacda yu lgui parne tso to wto nu!

¹⁷ Dzigo psoladz no zha ziaad lo Xtiidz Dios, zaatne rnee: “Rbinladz guic naa, sac ne nligaa racladz naa yquiaanap naa lidz luu.”

¹⁸ Blalaa zha non lo menguedz Israel, zeene gon zho sca beñcxoon me grë miech co, wbiz zho lo me rëb zho:

—¿Cho nac luu ne squitaa noyun luu grë ncuaan qui? ¡Been tib milagr, dzigo zliladz no men rnabey nac luu!

¹⁹ —Telne racladz to milagr —rëb me—; goltsil yadoo rii, ni gni naa lo to ganle ngbidz tsona laa naa bzaalolew stib.

²⁰ Pquiab zho rëb zho:

—¡Ncuaane gliladzdraa no rnee luu! ¡Len choopxopraa iz name biala yadoo rii! ¿Zhazhe gun luu, tsonaque ngbidz gzaa luuw stib?

²¹ Per zeene sca bnee Jesús lo zho, xcuerp me ga nac yadoo ne bzeet me. ²² Gane zeene brieaban me, hor co psoladz no zeene znu bnee me, dzigo bien no ne me ga bzeet me ni bien no ne me ga raquiet lo Xtuidz Dios zaatne scaque rnee.

²³ Len dze lni Pascw co, nzian miech zeene gon zho grëtaa milagr ne run me, bliladz zho ne nli me nac Men ne zëëble diidz ga cxeel Dios. ²⁴ Per ib pxend me lo zho, sacne nanwen me zha nac zho tib tib zho. ²⁵ Pquiind me chopaa niab lo me zha nac zho; sac nanwen me zha nac tib tib miech ni nan me pe rza zdoo zho.

3

Jesús ni Nicodem

¹ Ziecowle liuw, bdziñ tib zha farisé lë Nicodem zaatne rbëz Jesús; tib zha non nac me lo menguedz Israel. Bdziñ me rëb me lo Jesús:

² —Maestro, ndion no ible Dios pxeel luu ziadseed luu no. Grë milagr nroob ne run luu, ga rlu ne Dios nacie luu.

³ —Gneli naa lo luu ganle Nicodem —rëb Jesús—, grëse miech, telne gald zho stib grielod gdziñ zho zaatne rnabey Dios.

⁴ Pquiab Nicodem, rëb Nicodem:

—¿Gal zho stib ye? ¿Zha grieele gal miech stib? Tib zha ne nacle mengol, ¿niacxe zriele seëb zho zdoo xniaa zho gbiire gal zho?

⁵ Rëbchaa Jesús:

—Ible none gal miech, none gal zho zigne racladz Dios. Sac telne chobnisd zho ni ygaad zho Espíritu Sant, grielod seëb zho zaatne rnabey Dios. ⁶ Grëse miech zeene ral zho glo, miechse nac zho; sangue zeene ral zho stib, Espíritu Santle nac men ne rnabey zho. ⁷ Gacxe waa, gzeed zdoo luu znu rne naa: “Grëse miech, ib none gal zho stib.” ⁸ Nac cuent rii zig nac me ne rtop xcow, zeene rrie me, nëzrii nëz rec zie me, ron luu razh zhoob me; per ran luu dien pa nëz zie me dien pa nëz ziaadгаа me. Scaque nagon nac zha ne ral stib, grielod guien miech zha rnabey Espíritu Sant lo xquielmban zho.

⁹ —Riend naa zha rnee luu —rëb Nicodem—. ¿Riend naa dien zha grieele gac grë mine rnee luu i!

¹⁰ Rëbchaa Jesús:

—¿Riend luu ye zha rne naa? ¡Men rseed miech name nac luu lo menguedz Israel!

¹¹ Mine rne naa nu ncuaane rien naaw, ncuaane gon naaw, ni riende to zha naca.

¹² Telne riend luu zha nac grë mine rne naa nu zeene rzet naa ncuaane rac lo guidzliu, ¿zha dzigo guien luu mine gne naa telne gzet naa grë ncuaane rac gbaa?

¹³ 'Wlaltaa gard tso tib zha ne soquia gbaa, per no tib men ne biet gbaa, men cosi soquia me gbaa, sac ga nac zaatne no me; ni lëe men co nu nac naa. ¹⁴ Ni zigne pquiangaa Moisés tib meel brons tib guic yag zeene nonie me zha Israel dan zit co; scaque none yquiangaa naa tib lo yag, ¹⁵ zeena grëse miech, zha ne gbig dib zdoo zho gnalo zho naa, zgaa zho tib guielmban ne gdziñ dze lozh. ¹⁶ Sac gon rleyniedox Dios grëse miech ne ndxie lo guidzliu; gane niicle tib naa nac mëed lo me per laa me pxeel naa lo guidzliu; zeena grëse zha ne gnalo naa, zgaa zho tib guielmban ne gdziñ dze lozh; led yed zho nitlo. ¹⁷ Laa Dios pxeel naa lo guidzliu par csilaa naa miech lo dol, ziald naa par gdziñdol naa miech. ¹⁸ Sac grëse zha ne dib zdoo gnalo naa ne naa csilaa zho lo dol, nitlod zho. Sangue zha ne gnalod naa, laa zho bnitole ga, sac gon Xpëed Dios nac naa ni bliladz zho naa. ¹⁹ Laa zho bnitole, sac gon biaadpaa biini lo guidzliu ni laa ne nleynie zho biini, lel guielcow bleynie zho, sac guielntseeb nac mine zienal zho. ²⁰ Grëse zha ne run guielntseeb, rlëe zho ran zho biini. Ib rbigd zho lo biini, sac racladz zho xoobnen grë guielntseeb ne quiayun zho. ²¹ Sangue zha ne run mine rnabey Dios, haxta rley zho rbig zho lo biini, zeena glu ganle zienal zho mine rnabey me.

Rzeet Juan Bautist Jesús stib

²² Ga brie Jesús güeynie me no nëz xtan zha Judé. Xtselaa bliaaz no ga grë no me, rchoobnis me grë miech co.

²³⁻²⁴ Len dze co gard guiab Juan Bautist ladzguiib; dzigo ye me nochoobnis miech zaatne lë Enón gax Salim; sac ga no naal nis. Nzian miech ne rdziñ lo me ga, rchoobnis me zho.

²⁵ Tib dzew, wbig tib zha Israel lo zla xpëedscuel Juan, psilo zho nodildiidz zho dien cho zhiwrobnis nonraa; pe zhiwrobnis Jesúsa, te zhiwrobnis Juana ye. ²⁶ Blozhse bdildiidz zho, wbig xpëedscuel Juan lo Juan, rëb zho:

—Maestro, men ne gon bzodiidznie luu ro guiubee Jordán ga, men ne scataa bzeet luu lo miech, iye me laa me quiachoobnis miech niina, ni ndal miech niapse lo me zie zho, ziaatraade zho nëz rii!

²⁷ Pquiab Juan rëb Juan:

—Ib Dios rdeed diidz zha gun miech tib tib xtsiin me, gacd ne lega zhal zho gun zho pe cos. ²⁸ Mine pso Dios naa, laaw ben naa: laa naa biallu ganle cho nac Men ne zëëble diidz ga cxeel Dios. Ni bneeli naa lo to ganle led naad nac men co; laa naa zial loxaque par gzet naa me lo miech zeena gunbey zho me. ²⁹ Ible lo me none gdziñ miech. Nac me niina zig tib mgui ne notsieelna: Mgui ne notsieelna, iled zha lëë rzobnie ndzooop ne notsieelna zho! Ni grë zha ne ndzieeldiidz zho, rley zho ran zho laa xamigw zho notsieelna, rley zho ron zho pe rnee xamigw zho. Scadaa nagon rzaac naa niina: rley naa ron naa grë ncuaane run me. ³⁰ Zigse zie dze, laa me gacnonraa; scagaa naa, zigse zie dze laa naa guiaanwinraa.

³¹ Nëz gbaa ziaad me, min co ne mazdraa non me lo grë miech. Tel naa tib miech guidzliuse nac naa, ni ncuaane riense tib miech lo guidzliu min co rne naa; ³² sangue me, niapse grë mine bin me, grë mine gon me min co rnee me lo miech; ini choot rliladzda! ³³ Zha ne rliladzse xtiidz me, rien zho ganle niapse diidzli rnee Dios. ³⁴ Xtiidz Dios rnee me lo miech; sac Espíritu Sant rdeed guielbiini lo me, ni Dios nac men ne pxeel me. ³⁵ Rleyniedox Dios me, nac me Xpëed Dios; gane grëta ncuaane no gbaa, no lo guidzliu, ladznia me psan Diosa. ³⁶ Grëse zha ne gnalo me, laa zho bgaale tib guielmban ne ib gdziñd dze lozh; sangue zha ne gond xtiidz me, gdziñd zho gbaa, zaatne ygaa zho guielmban co. iGrëse zha co, ible zgaa zho guielnëdox ne csiaab Dios!

4

Tib wnaa Samar

¹ Zeene bien Jesús laa zha farisé gonganle ndalraa miech zienal zhiwseed me, ni ndalraa miech ne quiachoobnis me lo Juan ² (niicle ne led medpaa rchoobnis, sinque zha ne nac xpëedscuel me zha co rchoobnis), ³ nacne brie me xtan zha Judé ga, wbiere me nëz xtan men Galilé stib.

⁴ Par gdziñ me Galilé, none ted me xtan men Samar. ⁵ Xtan men Samar zieded me, zig groł dzew, laa me zie gax guiedz ne lë Sicar, ⁶ dzigo güeyted me zaatne quia guiuu ne rnee zho “Zhibzie Jacob”; lo liu ne psan Jacob lo xpëed me José padzeela. Rdzag me ziaad-zë me lo nëëg co, bdziñ me bzob me ro guiuu co; ⁷⁻⁸ ga blëz me, laa no zio lad guiedz Sicar zioxi no ncuaane dioownie no me.

Ro guiuu co zob me bdziñ tib wnaa Samar zixi nis ga; dzigo rëbchaa me lo wnaa co:

—Bzhiguiel bzoladz niip zhis luu guie naa.

⁹ Bzee zdoo wnaa co gon me bnab Jesús nis lo me, sac rlëëdox zha Judé ran zho zha Samar, per ni rneed zho lo zho.

—iNcuaane gliladz naa! —rëb me—. iTi zha Judé gnab nis lo ti zha Samar!

Dzigo rëbchaa Jesús:

¹⁰ —Tel niaca mine guien luu ganle cho rnab nis lo luu, ni guien luu zha nactaa ncuaane rzoladz Dios lo miech, haxta znab luu nis lo naa. Ni naasi gon, znedz naa nis ne rdeed guielmban.

¹¹ Pquiab wnaa co, rëb me:

—Per ni nzhend luu name pe cuee luu nis, i pa dzigo tsiebee luu nis ne rdeed guielmban ga? iGon ganle, guietdox bzie rii!

¹² Stiba, i niacxe mazdraa dzigo nac luu que pxozgol ne Jacob, men ne psan bzie rii? Nu name go me nis grë xma me; niicle grë xpëed mew, nuque go zho nis.

¹³ —Grëse zha ne rie nis rii —rëb Jesús—, rbiere rnab zhis zho; ¹⁴ sangue nis ne rded naa, zha ne guiew gdziñdraa dze gnab zhis zho. Sac nis ne gded naa, masaque gdziba zdoo zho zig rdzib nis tib ro zhlian, ni nis co gdeed tib guielmban ne gdziñ dze lozh lo zho.

¹⁵ Dzigo rëbchaa wnaa co lo Jesús:

—Bzhiguiel bneedz nis co guie naa, zeena gnabdraa zhis naa, zeena guialxidraa naa nis nu.

¹⁶ —Güeygazh —rëb Jesús—, güeyxi tsieel luu, dzigo goltë grop to.

¹⁷ —Guiend tsieel naa —rëb wnaa co—. Gard ctsieelnaa naa.

—Nli rnee luu —rëb Jesús—; ¹⁸ sac gaay mgui ne zibannie luu, ni tib zho ptsieelniad luu, niicle mgui ne nonie luu niinaw, ptsieelniadaque luu zho. ;Nli mine rnee luu i!

¹⁹ Zeene bin wnaa co sca rëb Jesús, rëbchaa me:

—Zootne tib zha ne ziadnee xtiidz Dios lo miech nac luu. ²⁰ Tel scaw, bzhiguiel bnë dien, ;zha nacne rnee grë men Israel ne len yadoo nroob ne zobpaa Jerusalén, gapaa none tsiegan miech Dios? Sac no ne nac no men Samar, rnee no ne ib guic gui ne zob nu, ga none tsiegan miech Dios; sac grë xmen gol no ga güeygan zho Dios.

²¹⁻²⁴ Pquiab Jesús rëb me:

—Bina ganle, dzin dze zeene yquiindraa ne goon guic gui riipaa, o Jerusalénpagaa tsie to tsiegan to Dios men ne nac Pxoz ne. ;Ni laa dze co ziaadgaxle! Gacdraaw ne dien pa lo tsie ne tsiegan ne Dios, sinque zha ne nlipaa racladz gleynie me, none dib zdo zho gleynie zho me; zigne gdeedse Espíritu Sant guielbiini lo zho.

'Choot grielod gan Dios; gacxe waa zha ne gleynie me, none gleynie zho me zigne rdeed Espíritu Sant guielbiini lo zho; ni none dib zdo zho gleynie zho me. Ni zha ne sca gleynie me, zha co rguib me. Tel to laa to rieganse Dios ni runbeyde to me; sangue no rdziuunbey no men ne riogan no, sac gon lo xtii men Israel ziaad men ne guiaadsilaa miech lo dol.

²⁵ —Nenda —rëb wnaa co—, per nan naa ib ziaad Men ne zëëble diidz ga cxeel Dios, men ne lë Crist; ni zeene laa me guiaad, me gnë diidzli lo no.

²⁶ Pquiab Jesús, rëb me:

—;Naa gon nac men co! Lëe me nu nonee lo luu.

²⁷ Lëëtaaque hor co grëse no ne nac no xpëëdscuel me laa no bdzin. Bzee zdo no bdzion no laa me nozodiidznie wnaa co, per ni tib no bnabdiidz lo me dien

pe quianabdiidz me, dien pegaa quiazodiidznie me wnaa co.

²⁸ Laa wnaa co, zoque xche me ga, rias me laa me zie nëz lad guiedz. Bdzin me, rëb me lo grë miech co:

²⁹ —;Goltë ganle gunbey to ti men co! ;Bzeet me grëse zha nac lo xquielmban naa! ;Bay pe lëdle Men ne nole diidz cxeel Dios ga?

³⁰ Horco brie grë miech co lad guiedz, ziaad zho zaatne gon wnaa co Jesús.

³¹ Laa no, quia no rdeed no ncuaane gow me, per nëd me.

³² —Gowd naa —rnee me—. No stib xquielwagw naa mine runbeyde to.

³³ Dzigo rnabdiidzlsa no, rnee no:

—Bod no cho biaadnie pe dow me, lal ne bio ne lad guiedz.

³⁴ Nëchaa me lo no:

—Lëe xquielwagw naa nac ne gun naa mine rnabey Dios naa, ni csiaal naa dziin ne pxeel me naa zialgun naa. ³⁵ To lëe rnee to: “Len stapraa mëe csilo gac wlaap.” ;Per golwi lo grëtaa miech qui ganle, nac zho niina zig grë guielgon ne golle gliiap! ³⁶ Gacxe waa, ib none tsie to tsielaap to, tsietop to zho, zeena yгаа zho tib guielmban ne gdzind dze lozh. Ni zigne razh zha ne rie wlaap, scaque zguizh Dios to tsietop to zho. ;Ti guielbley nrooba, zigtaa par zha ne rana, zigtagaa par zha ne rlaapa! ³⁷ Ible nli diidz ne znu rnee: “Zhaa zha ne rie gon, stible zha ne rie wlaap.” ³⁸ Zig nac niina, laa naa rxel to tsielaap to zaatne ni tib xtii to psëëbde to; zhaa zha ne güey gon, na tole tsie wlaap.

³⁹ Laga laa me sca quianee lo no, laa grë menladz wnaa co no nëz ziaad zho nëz lo no ga. Nzian grë miech co, zeene bin zho rëb wnaa co bzeet Jesús grë ncuaane ziyun me, bliladz zho Jesús. ⁴⁰ Laa zeene blanso zho ga, bnab zho lo me cuëz me ladz zho zhis. Dzigo nacne blëz me lo zho chop ngbidz. ⁴¹ Nzianraa grë miech co bliladz me, zeene bin zho grë zhiwseed me.

⁴² —Nasi nagon laa no rliladz me —rnee zho lo wnaa co—, sac nozhal bdzion me, ni bdzion no grë mine rnee me. Nliw, ible me nac men ne ziaadsilaa grëse miech lo xtol zho.

Biac xpëëd tib zha ne quia dziin lo rey

⁴³ Zeene goc chop ngbidz co, laa no brieeg ga gza no me, laa no bdzio nëz stib zio no nëz Galilé. ⁴⁴ Niicle ne bzeetle me: grëse zha ne ziadteed xtiidz Dios, ib ranzed miech zho zaatne nac ladz zho; per ⁴⁵ zeene bzëëb me grë guiedz ne ngab Galilé, wen pcaania grë miech co me. Nzian zho güey lni Pascw co Jerusalén, gon zho grëtaa milagr ne been me ga.

⁴⁶ Nëz no no bdziñ no Caná, zaatne sca bzaalo me nis vin. Ga bdzieelo me tib zha Capernaum, tib zha ne rquia dziin lo rey; lëëtaque len dze co rzacnë xpëed me.

⁴⁷ Bin me laa Jesús brieeg xtan men Judé, laa me no gdziñ Galilé. Dzigo biaad me biaddzieelo me Jesús ga, bnab me lo Jesús tsienal Jesús zhits me Capernaum, tsiegunguiac Jesús xpëed me; sac nzhoo rac win. ⁴⁸ Dzigo rëbchaa Jesús lo me:

—¿Pe haxta gan to dzigo gun naa milagr, dzigora gliladz to naa?

⁴⁹ —Been tib guieñzaac gotsaa guioniob ne —rëb men co—, nend znuse lozh xpëed naa.

⁵⁰ Rëbchaa Jesús:

—Bzë, tsod luu guieñ. ¡Laa xpëed luu biacle!

Dib zdoo men co bliladz me xtiidz Jesús, laa me bio nëz laa me zey. ⁵¹ Zhilew gdziñ me lidz me, zeene bdzieelo me bla zha ne quia xtsiñ me, rëb zho laa xpëed me biacle. ⁵² Dzigo bnabdiidz me lo zho, maase pa hor biac win. Rëbchaa zho:

—Nieeg, zig rwe ngbidza, tibaque znuse brieeg zhixlëë win.

⁵³ Dzigo psoladz me zig hor cotaque rëb Jesús lo me, laa xpëed me biacle. Dzigo dib zdoo me bliladz me Jesús, tsieel me, xpëed me, menlidz me ne, grëse zho dib zdoo zho bliladz zho Jesús.

⁵⁴ Ga goc brop milagr ne been Jesús lo zha Galilé. Min co been me zeene wbiere me nëz Judé.

5

Biac tib men ne gacd grial

¹ Goc palal dzew, laa stib lni nroob rac Jerusalén, dzigo nacne güey Jesús Jerusalén stib.

² Ro guiedz Jerusalén, gax zaatne quia puert ne rded mëcwxiiil, ga niaa tib pil nis

rneeg zho Betesd. Igo ro pil co niaa tib nsaap, rap nsaap co gaay arcw.

³ Lo nsaap co, ga ndxie nzian men rzacnë, no zho rold lo, no zho në ni, no zho ib gacd grial [grëse zho laa zho ndxie ga quiambëz zho gni lo nis ne no len pil co, ⁴ sac nac diidz poc poc riet tib xanj Dios riesini lo nis co, dzigo zha ne znuse sëëb lo nis co, tel pe guieñguidztaa rzac zho, riac zho].

⁵ Ga nix tib mgui, gocle galptsipxon iz rzacnë me. ⁶ Laa zeene gon Jesús me, ni bin Jesús scataale nroob dze rzacnë me, rëbchaa Jesús lo me:

—¿Pe racladz luu guiaac luu?

⁷ —Racladz naa —rëb me—, per guieñ cho csëëb naa len pil qui zeene laa lo nis rni. Zeene racladz naa sëëb naa, zhaale stib zha ne glo rzëëb.

⁸ Dzigo rëbchaa Jesús lo me:

—¡Nasca zeena guche i! ¡Bzoli, bi yag ne bzhoob luu i, zeena bzë!

⁹ Zigne sca rëb Jesús, laa men co biac. Horcogazh blis me yag co, nzëni me laa me brieeg ga.

Ni ne dze co nac tib dze nda lo zha Israel, ¹⁰ zeene gon zho ney me yag ne bzhoob me, rëbchaa zho lo me:

—¿Pe riend luu nda nadze! ¡Lëda i gon squi yquianlan luu ncuuan qui dze rii!

¹¹ Pquiab me rëb me:

—Men ne beenguiac naa, mezhal në lo naa, güey naaw.

¹² —¿Cho men sca në lo luu? —rëb zho.

¹³ Niicle me riendaque dien chow, sac ndaldox miech ne ndxie ga; hor co laa Jesús bzëëble lad grë miech co. ¹⁴ Haxta len yadooraa bdzieel Jesús me, dzigo rëbchaa Jesús lo me:

—Nana gon ne squi laa luu biacle, bien gunctaldraa luu xtol luu. Sac telne gond luu diidz, nend dzigole glaan luu tib guieñguidz ne mazdraa ntseeb.

¹⁵ Zeene laa me brieeg ga, güey me lo zha ne rnabey lo zha Israel ga, rëb me lo zho Jesús nac men ne beenguiac me. ¹⁶ Nacne psilo zho quianal zho dien zha gnaaz zho Jesús pe nacne runguiac me miech dze nda.

¹⁷ Blisqui zhow lo me, dzigo rëbchaa me:

—Tel Pxoz naa gzataa dze quiaayun me dziin; ni mincoque nac mine quiaayun naa.

¹⁸ Zeene gon zho sca rëb me, mazdraa blëe zho lo me rzac zho tebaa zha gutgazh zho me. Rlëe zho, sac zienald me dien pa dze nda; mazdraa zeene rëb me Dios nac Pxoze me, sac ga rlu me ne lalga nac me con Dios.

Men nroob nac Xpëed Dios

¹⁹ Ni rëb me:

—Gneli naa lo to ganle: peet grieelod gun Xpëed Dios lega guicse me, sinque ncuaane ran me run Pxoze me, min co run me. ²⁰ Nquialadzdox Dios me, grëtaa dziin ne run Dios rlu Diosa lo me; gane zun me milagr nroob ne mazdraa gzee zdoo to; ncuaane palalse i gon to niina ne biac men qui. ²¹ Sac telne gacladz me cueeban me tib mengut, zbeeban me zho, zigne rbeebanaque Pxoze me mengut. ²² Ni bzo Dios me, me gun guielwxtis, ²³ zeena grëse miech guien ganle zigne nonaque Pxoze me, scaque men non nac me, ni sca none gunnon zho me. Sac tel zha ne gunnon me, yele Pxoze me ga (men ne pxeel me) runnon zho.

Ni rëb me:

²⁴ —Gneli naa lo to ganle: Zha ne gliladz xtidz naa, ni gliladz zho men ne pxeel naa, laa zho bgaale tib guielmban ne gdzind dze lozh. Led yedraa zho ygaa guielndox ne ygaa grëraa miech ntseeb; sac laa zho briele ladzna guielgut ga, bdzin zho lo guielmban co. ²⁵ Zdzin dze zeene ye grë mengut, zon zho xtiidz Xpëed Dios; ni grëse zha ne gzoobdiaga, zban zho. ¡Ni lëe dze co bdzin niina! ²⁶ Sac gon, zigne rdeed Dios guielmban lo miech, scaque zrieelo gded naa guielmban lo miech. ²⁷ Ni bzo me naa, naa gun guielwxtis, gded naa mine tsieguial tib tib miech.

²⁸ ¡Gzeed zdoo to! Sac ne nligaa, zdzin dze, grëse mengut ne no len baa, laa zho grieeban ²⁹ zeene gon zho tsi naa. Grëse zha ne ndzinli wban, hor co laa zho ygaa tib guielmban ndzon; sangue zha ne been guielntseeb, hor co laa zho guey lo guielndox ne rieguial zho.

³⁰ 'Per grieelod gun naa guielwxtis naase, ib none gacnan Pxoze naaw. Grëse guielwxtis ne gun naa, laaw gun naa zigne gnabey Pxoze naa, laaw gun naa zigne nonguiela, sac gon gund naa mine

guiaabtaa guic naa, sinque laa naa gun mine racladz Pxoze naa.

³¹ 'Telne niaca mine naase rne cho nac naa, zrieequia zha ne guiab nlida. ³² Per na, no stib men ne rzeet naa lo miech; ni nan naa diidzli rnee me. ³³ Haxta Juan Bautist, zeene pxeel to bla zha ne güeynabdiidz lo me, grëse mine rëb me lo zho ga, diidzliw. ³⁴ Laa naa rzet min rii lo to, zeena gliladz to cho nac naa, zeena sca laa to lo xtol to; sac rquiindpaa dien cho miech guidzliu rii gnee cho nac naa. ³⁵ Zeene biaad Juan, goc me zig tib biini bziini me lo to palal dze zeena gunbey to naa; ni bley to pquiaadiag to mine bnee me. ³⁶ Nli bnee me cho nac naa; per grë milagr ne run naa min co quiaxobnenraa ganle cho nac naa. Pxoze naa rneedz diidz run naaw; ni ga rlu ganle ne me pxeel naa. ³⁷ Haxta ye me mezhal quialu ganle cho nac naa, parga nli gard gan to me, niicle gard gon to tsi me. ³⁸ Ronde to pe rnee me, sac riladzde to naa; sac gon me pxeel naa zialne naa xtiidz me.

³⁹ 'Nli rioxco to rseed to grë guits ne ziaad Xtiidz me, sac rien to ga ziaad dien zha ygaa to guielmban ne gdzind dze lozh. Ni niicle ne lo co zhobnee ganle cho nac naa, ⁴⁰ per nëde to gbig to lo naa, zeena ygaa to guielmban co. ⁴¹ Nëde to gunbey to naa, nëde to guien to cho nac naa, per peet nacd min co; ⁴² runbey naa to, ni lalnu rleyniede to Dios. ⁴³ Sac gon, me pxeel naa zial naa lo to, ni rlëe to ran to naa; mazd zha ne lega ziaadse, zha cosi lëeléd rcaania to zho. ⁴⁴ ¡Min co gon, ib riladzde to cho nac naa! Sac laa guic to zienie loxaque dien zha gunnon samiech to to, ib rguibde to zha gacnon to lo Dios. ⁴⁵ Ni guiabde to togo naapaa gazo to lo Pxoze naa, glisqui naa grë ncuaane run to. Moisés gon nac men ne glisquiw; sac ley ne psan me, mine rnalo to csilaa to lo xtol to, lëew glu ganle pe nac grëtaa ncuaane quiayun to. ⁴⁶ Sac gon, telne niaca mine nlipaa riladz to grë mine pquiaa Moisés, ziladz to dzigo cho nac naa; golgan ganle, lo grë guits ne pquiaa me, ga rzeet me naa. ⁴⁷ Rlu riladzde to grë mine pquiaa Moisés ga, gane riladzde to mine rne naa lo to.

6

*Row gaay mil miech**(Mt. 14:13-21; Mr. 6:30-44; Lc. 9:10-17)*

¹ Bded ga, tib dzew brieē Jesús bdedquia me nēz dan ro Nisdoo Galilé (lëëque nisdoo co ga rnee zho Nisdoo Tiberias).

² Miech guizhiu ne brieenaḷ zhits me, sac ziyaḅ zho grētaa milagr ne ruḅ me, ruḅguiac me grē meḅ rzacnë. ³⁻⁴ Nzian zho nac zha ne zie lni Pascw, lni nroob ne rac Jerusalén gzobse iz.

Grëse no ne nac no xpëēdsuel me, laa no naḷ zhits me. Zeēne bdieedquia no ro nis co, dzigo bdzieep no tib cho gui win zob gax ga. Loxaque laa no bzioob ga grē no me, ⁵ zeēne bdzion no miech guizhiu ne ziaadquia cho gui co, laa zho glansole lo no ga. Dzigo rëbchaa me lo Lip:

—Lip, ¿pa guioziu ne ncuaane gow grētaa miech qui?

⁶ Per lega scase rëb me lo Lip, par dieḅ pe guiab Lip; sac naḅle me pe nac ncuaane guḅ me.

⁷ —¡Ne nligaa pe zhidaa zho! —rëb Lip—. Niicle telne niaca miḅe gziuu nzian gayoo quietxtil, ni ygaad ncuaan co ygaa zho tiblë wingaw tib tib zho.

⁸ Dzigo pquiab Ndrés, bets Pedr, stib zha ne nacgza no; rëb Ndrés:

⁹ —Nu zo tib mëēdbgui win ney gaay guietxtil cebad ni schop meḷ win. ¿Per pa ygaa ncuaan co lo grētaa miech qui?

¹⁰ —Golnee lo zho dieḅ —në me lo no—. Golguiab lo zho sob zho.

Ndzon zëēb guizh nguia ga, dzigo laa grē miech guizhiu co bzob lo guizh nguia co (zig gaay mil rgaa loxaque zha bguise).

¹¹ Dzigo bnaaz me gza quietxtil co, bdeed me xquizh lo Dios. Blozhse ga, zigse rneedz mew lo no scase scase rguiz now lo grē miech co; scaque been me grop meḷ co. ¡Grëse miech co, dow zho zaatne bieltaa zho! ¹² Blozhse dow zho, nēchaa me lo no:

—¡Goltsietop grëse miḅe biaan i, zeēna nitloda!

¹³ Psilo no ptop no grē quietxtil ne biaan ga, zeēne blozh bdopa, ¡lo gaay guietxtil cebad co, biodzë tsiipchop chicuid biow!

¹⁴ Zeēne gon grē miech co milagr ro ne been Jesús ga, rneechaa zho:

—¡Ne nlipagaa, lëē meḅ qui ga quiambi-aaz ne! ¡Me nac Meḅ ne zëēble diidz ga cxeel Dios lo guidzliu guiadteed xtiidz me!

¹⁵ Biēga Jesús racladz zho, zhoo tsienie zho me gac me zhirey zho, nacte bzoquia me guic gui win co, tipse me.

*Rzë Jesús lo nis**(Mt. 14:22-27; Mr. 6:45-52)*

¹⁶ Rguetsle liuw, bzhiuxto no dan bdziḅ no ro nisdoo co; ga bliaaz no me.

¹⁷ Bdzionse no choot rlansod ni laa liu rcowraa, dzigo mazd laa no bziaab leḅ canó, laa no zio nēz Capernaum.

¹⁸ Laa no zionie canó co lo nis, tibaque zeēne psilo rrieē me, ntseeb riasoli lo nis co. ¹⁹ Maase gaay kilómetro o xoopgaaw goc zio no, tibaque zeēne bdzion no laa me ziaad-zë lo nis co, gaxle lo no ga. Zeēne bdzion no sca ziaad-zë me lo nis, bdzieeb no. ²⁰ Dzigo bnee me, nē me lo no:

—¡Gdziebde to! ¡Naa ziaḷ nu!

²¹ Dzigoraa rley no bdzion no laa me bzëēb leḅ barcw; tibaque zeēne bien no laa no brieequiale zaatne no gdziḅ no ga.

²² Biini liu co, grē miech ne biaan stib nēz ro nis co, laa zho bdziḅ zaatne nac ro nis ga, quiambëz zho gaḅ zho me. Sac gon zho tibaque barcw zo ga, ni zeēne wbii no ga, loxaque nose wbii. ²³ Gax zaatne bguiaan me zho ga, ga bdziḅ bla barcw ne ziaad nēz Tiberias; ²⁴ dzigo gonse zho niicle me niicle no ne nac no xpëēdsuel me, choot guieḅd ga, nacte bzëēbaque zho leḅ barcw ne bdziḅ ga ziaad zho nēz Capernaum.

Jesús nac meḅ ne rdeed guieḷmban

²⁵ Zeēne blanso zho Capernaum, laa Jesús zole lo no ga; dzigo rëbchaa zho lo me:

—Maestro, ¿pa horzhe waa blanso luu nu?

²⁶ Dzigo rëbchaa me:

—¿Naa lëē ziaadguib to? Per ziaate to porne rien to cho nac naa, sinque laa to ziaad porne gon to bnedz naa ncuaane pquiin to. ²⁷ ¡Golguien, tsienied guic to loxaque ncuaane gowse to, sac znuse rnitlo grē ncuaan co! Sinque, goltsoxco golguḅ miḅe racladz Dios, zeēna ygaa to tib guieḷmban ne ib gdziḅd dze lozh. Ni naa ne nac naa Mgui ne pxeel me, naa

gneedz guielmban co lo to; sac ible min co pxeel me naa.

²⁸ Dzigo bnabdiidz zho lo me, rëb zho:

—¿Zha dzigo dziuun no mine racladz Dios? ¿Pe nac ncuane dziuun no?

²⁹ Pquiab me rëb me:

—Mine racladz Dios gun to: gliladz to cho nac men ne pxeel me.

³⁰ —Telne scaw —rëb zho—, none dzianlo no gun luu nzian milagr, zeena gliladz no luu. ¡Nligaa peet milagr nroob gard dzian no gun luu! ³¹ Tel grë pxozgol ne, zeene wban zho grë dan bidz co padzeela, gzobse dze biet tiblo guietxtil zhan gbaa, dow zho; rnee lo Xtiidz Dios: “Moisés rdeed guietxtil co lo zho.”

³² Pquiab me rëb me:

—Golgacnan ganle led Moisésd bdeed guietxtil co, sinque Pxoz naaw. Ni niina gon laa me quianeedz merpaa guietxtil gbaa lo to. ³³ Sac gon, me pxeel men ne biet gbaa ziaddeed guielmban lo grë miech rii; men co nac guietxtil gbaa co.

³⁴ —Been tib guielnzaac sca —rëb zho—, ¡gzataa dze bneedz guietxtil co dioow no!

³⁵ Pquiab me rëb me:

—Naa gon nac guietxtil ne rdeed guielmban ga. Grëse zha ne gbig lo naa sëeb zho xnëz naa, gdzindraa dze ne ycaabedz zho; grëse zha ne gliladz cho nac naa, gdzindraa dze ne gnab zhis zho. ³⁶ Laa to gon, zigne bnelegaa naa lo to ga, jniicle ran to naa, per rililadzde to cho nac naa! ³⁷ Grëse zha ne rxeel Pxoz naa, rlanso lo naa; ni tib zho ctsireed naa. ³⁸ Sac gon, laa naa bieet gbaa zialgun naa mine racladz Pxoz naa (men ne pxeel naa); bieete naa par gun naa mine gacladztaa naa. ³⁹ Ni mine racladz me, grëse zha ne bneedz me lo naa, ni tib zho nitlod, sinque cueeban naa zho gal dze ne laa guidzliu nitlo. ⁴⁰ Sac racladz me: grëse zha ne gbig lo naa ni gliladz zho naa dib zdoo zho, grëse zho ygaa tib guielmban ne ib gdzind dze lozh, ni cueeban naa zho gal dze ne nitlo guidzliu.

⁴¹ Dzigo psilo grë zha Israel rneenë zho me, loxaque ne rëb me, me nac guietxtil ne biet gbaa; ⁴² rnee zho:

—Men rii ga name rnee zho Jesús, me nac xingan José. Rdziuunbey ne xniaa me,

rdziuunbey ne pxoz me. ¿Zha nac dzigo ne rnee me gbaa biet me?

⁴³ Dzigo rëbchaa me lo zho:

—Lëewga na, golsioog ro to. Nodne squitaa gzee zdoo to min co. ⁴⁴ Laa Pxoz naa pxeel naa zial naa lo guidzliu, per ni tib miech gon grielod gbig lo naa telne niaca mine cuedzd me zho; ni zig rnele naa ga, zha ne gbig, naa cueeban zho gal dze ne laa guidzliu nitlo. ⁴⁵ Znu rnee lo Xtiidz Dios, zaatne pquiaa grë zha ne biadteed xtiidz me padzeela, rneew: “Laa Dios cseed grëse miech.” Ni lëe min co rac niina; gacxe nagon waa, grëse zha ne rquiaadiag mine rnee Pxoz naa ni rseed zhow, grëse zha co lo naa rlanso zho. ⁴⁶ Zha ne rlanso lo naa, guiabde to togo gonlo zho me; ni tib choot gard gan me, naase nac men ne ziyan me, sac zaatne no me ga brie naa zial naa lo to. ⁴⁷ Golliladz mine gni naa lo to nu sca: ¡Grëse zha ne dib zdoo zho gliladz zho cho nac naa, zgaa zho tib guielmban ne gdzindraa dze lozh! ⁴⁸ Ne nligaa naa nac guietxtil ne rdeed guielmban ga. ⁴⁹ Grë pxozgol to, zeene sca bio zho grë dan bidz co, nli dow zho guietxtil ne biet gbaa ga, per bdeetew guielmban lo zho, sac grëse zho gut. ⁵⁰ Sangue guietxtil ne rne naa lo to, gbaa bieta ni grëse zha ne yquiina zgaa zho tib guielmban ne gdzind dze lozh. ⁵¹ Xcuerp naa nac guietxtil ne biet gbaa, mine rdeed guielmban ga; grëse zha ne gow guietxtil co, zgaa zho tib guielmban ne gdzind dze lozh. Lëew gded naa zeena grielo ygaa grëse miech lo guidzliu rii stib guielmban.

⁵² Psilo grë zha Israel co stib, quianeelsa zho, rnee zho:

—¿Zha nacne squi rnee men qui? ¡Zootne rnee me none dioow ne xcuerp me!

⁵³ —Gneli naa lo to ganle —rëb me—, telne gowde to xcuerp Mgui ne pxeel Dios, ni guiede to xchen me, ygaade to stib guielmban co. ⁵⁴ Sangue zha ne gow xcuerp naa, ni guie zho xchen naa, ib zgaa zho guielmban ndzon ne gdzind dze lozh ga, ni naa cueeban zho gal dze ne laa guidzliu nitlo; ⁵⁵ sac xcuerp naa nac mine mazdraa rquiin gow miech, ni xchen naa nac mine mazdraa rquiin guie zho. ⁵⁶ Grëse zha ne row xcuerp naa, ni rie zho xchen naa,

mbannie zho naa, niiclegaa naaw mban-
nie naa zho. ⁵⁷ Men mban nac Pxoꝝ naa,
men ne pxeel naa, me nac men rneedz
guielmban lo naa; ni scaquegaa zha ne gow
xcuerp naa, naa gded guielmban lo zho.
⁵⁸ Naa nac guietxtil ne nlipaa biet gbaa.
Grëse zha ne gow guietxtil rii, zгаа zho
guielmban; led yed zho guet zig gut grë
pxozgol to, zha ne sca dow guietxtil co.

⁵⁹ Lëë grë miñ rii bnee Jesús zeene pseed
me miech len yadoo win ne zob Capernaum.

Diidz ne rdeed guielmban

⁶⁰ Nzian grë zha ne rzënie Jesús, zeene
bin zho grë miñe bnee me ga, rneechaa
zho:

—Zha ngandoxtaa nac grë diidz ne rnee
me i. ¿Cho gnë dien pe bnee me!

⁶¹ Bien Jesús sca nonee zho, dzigo rëbchaa
me lo zho:

—¿Pe rlëë guic to bin to miñe rne naa
ga? ⁶² ¿Pe guiabzhe to dzigo zeene gañ to
laa Mgui ne pxeel Dios soquia gbaa, gbiire
guey me zaatne no me glo? ⁶³ Espíritu Sant
rneedz guielmban lo to, telne guiend espíritu
peet nond xcuerp to, sac bëëlse naca. Ni
grë diidz ne bne naa lo to, lëëw nac Espíritu,
ni lëëw gneedz tib guielmban ne gdziñd dze
lozh lo to; ⁶⁴ sinque to, bii no zla to riladzd
cho nac naa.

Sca rëb me sac desde psilo bzënie zho me,
rienle me cho nac zha ne ib riladzd me, ni
cho nac zha ne tsieto me.

⁶⁵ —Runbey naa to —rëb me—, gane ni
naa lo to ni tib miech grieelod gbig lo naa
sëëb zho xnëz naa, telne niaca miñe cuedzd
Pxoꝝ naa zho.

⁶⁶ Nzian zha ne rzënie me, hor co laa zho
bzozit lo me, bzëniedraa zho me. ⁶⁷ Dzigo
bnee me lo no gza tsiipchop no ne nac no
xpëëdscuel me, në me:

—To waa, ¿pe led yede to racladz gbiche
lo naa?

⁶⁸ Pquiab Simón Pedr, rëb Simón:

—¿Per cho lora nadien guio no? Luuse
nac men ne rseed miech diidz ndzon ne
rdeed guielmban ne gdziñd dze lozh. ⁶⁹ Laa
no bliladzle cho nac luu, laa no gocndionle
ne luu nac Men Ndzon ne pxeel Dios.

⁷⁰ —Nliw —rëb me—, ni naa bzooblo
to gza tsiipchop to, per na gon laa tib to
bzëëble xnëz menox.

⁷¹ Zeene sca rëb me, lëële Judas ga bzeet
me (zhin Simón Iscariot); sac ye Judas
nacgza no lo tsiipchop no ne bzooblo me
ga, ni Judas nac zha ne güeyto me.

7

Riladzd menlidz Jesús cho nac me

¹ Bded ga, loxaque grë guiedz ne ndxie
xtan zha Galilé, gase rieted Jesús. Sac grë
zha Israel ne no xtan zha Judé, zha ne
rlëë lo me, racladz zho gut zho me. ² Laa
zeene bdziñ dze ne run zha Israel lni ne
rzhixcuuaa zho grë yu guizh, ni rbëz zho
lena; ³ rëbchaa zha bets me lo me:

—¿Pe nacne ib rried luu nu? Brie zho,
güey dib xtan zha Judé, zeena ye grë zha
ne racnie luu ga gañ grëtaa ncuaane run
luu. ⁴ Sac gon, zha ne racladz gunbeyraa
miech zho, grë ncuaane rac zho, rund zhow
ngueets zhliaan zigne run luu. Rac luu
name run luu grë milagr nroob, beena za-
atne gañ nzian miecha.

⁵⁻⁶ Sca rnee zho lo me, sac niicle zha
riladzd cho nac me; dzigo rëbchaa me:

—Griee lod ga naa niina, sac gard gdziñ
dze co; zhaa nac to, zac tsie to zeene
gacladztaa to. ⁷ Tel to, rlëënie miech to;
sangue naa rlëënie zho naa, sac rne naa
lo zho pe nac grë guielntseeb ne run zho.
⁸ Gołtsie, tedse lni rii dzigo ga naa; sac gard
gdziñ dze ne glu cho nac naa.

⁹ Dzigo laa me biaan ga. ¹⁰ Per loxaque
brie zho zie zho, yeque me brie zie me;
lëëraasi gueetsse bdziñ me.

¹¹ Grë zha Israel ne rlëë lo me, quiaguib
zho me lo lni co.

—¿Bay yo men co? —rnee zho—. ¿Pe
nacne ib choot gard dzian me?

¹² Grë zha ne ndxie lo lni, loxaque me
rzeet zho. No zho rnee: “Tib miech
wen nac me”; nogaa zho rnee: “Pe miech
wen na zho gac me, loxaque noquidie me
miech.” ¹³ Per zhlianse rzodiidz zho rzeet
zho me, sac rdzieb zho grë zha Israel ne
rlëë lo me.

¹⁴ Goc chop tson ngbidz ne noyac lni,
tibaque zeene laa me bzëëb len yadoo
nroob ne zob lad guiedz ga, psilo me pseed
me grë zha Israel ne no len yadoo ga.
¹⁵ Zeene gon zho zha rseed me, rzee zdo
zho rnee zho:

—¿Zha nac squitaa rac men qui, ni laa me psee te me grë zhiwseed yadoo?

16 Pquiab me rëb me:

—Led naad nobeebey grë mine quiaseed naa miech, sinque laa naa quiaseed zho mine rnabey men ne pxeel naa. 17 Telne yquiablaz to gun to mine rnabey me, ga guien to dien pe nli xtiidz Dios rseed naa miech, te mine riab guic naaw ye. 18 Sac grë zha ne rnee grë mine riab guicse zho, laa zho runa zeena gacnziuu zho lo miech; sangue zha ne rioxco glu ne non men ne pxeel zho, zha cosi niapse diidzli rnee zho, rund zho ne yquidie zho miech. 19 Laa Moisés psan ley lo to, per, ini tib to gon zienald mine rnabeya! ¿Pe nac dzigo racladz to gut to naa?

20 Pquiab be grë miech co, rëb zho:

—¡Mendzable i gon noguitnie guic luu! ¿Chozhe racladz gut luu?

21 Rëbchaa me:

—Tib vult, loxaque gon to beenguiaac naa tib men rzacne dze ne rdziiladz to lo dziin, na grëga to squitaa rac lo naa. 22 Ni to gon, no hor par gun to mine rnabey ley run to dziin dze co; zig nac zeene rio tib mëed bey (niicle ne rirole pxozgol to bey co, zeene laa ley biaan). 23 ¡Gase na ganle golwi! Rquia to rgo to tib mëed bey haxta dze ne rdziiladz to lo dziin, loxaque par quiitsde to xley Moisés. ¿Pe nac dzigo ne rlëe to lo naa loxaque ne beenguiaac naa tib miech dze co? 24 Golguien ganle, nonguield ne lega gdziibdol to tib miech. Goltsoxco golttsienal mine nac diidzli.

¿Cho nac Jesús?

25 Blalaa men Jerusalén ndxie ga, dzigo psilo zho rnabdiidzlsa zho rnee zho:

—¿Pe led men riid ga zho scataa quiaguib zho gut zho? 26 Pa zotaa me gon quianee me lo grë miech qui, ni choot peet rund me. ¿Pe gon bliladzle zhiwxtis ne naye ne me nac Men ne zëëble diidz ga guiaad lo guidzliu? 27 Per gacda men qui. Tel men quiw, rdziuunbey ne me, ndion ne cho zha nac me; sangue Men ne zëëble diidz guiaad ga, zeene gal dze ne laa me guiaad, choot gacnand dien cho zha me.

28 Bin Jesús sca nonee zho. Squi ndxie grë zha ne noquiaadiag zhiwseed me len yadoo ga, nguiedz bnee me rëbchaa me:

—Ah, conque runbey to naa dzigo, jnan to pa nëz zial naa! Per led zhaald naa gon zial naa, no tib men ne pxeel naa per runbeyde to me; men co nac men ne rnee niapse diidzli. 29 Sangue naa runbey naa me, sac lo me brie naa, me pxeel naa zial naa lo to.

30 Dzigo gocladz zho naaz zho me ga, per ni tib zho wbigd nzhen zho me; sac gard gal dze co.

31 Grë zha ne ndxie ga, ndal zho bliladz me.

—Telne led med nac Crist —rnee zho—, niacxe zun me grëtaa milagr nroob ne run me. ¡Tsodraa zha ne gon grëtaa milagr ne run me!

32 Bin zha farisé nozeet grë miech co Jesús, dzigo bnediidaque zho grë zho pxoz ne rnabey, pxeel zho bla zhaguiib zie zienaaaz me. 33 Bdziñ grë zhaguiib co, rëbchaa me lo zho:

—¡Golxecw zniip! Zhile dze ne cuëz naa lo to; ib laa naa none gbiire guia naa lo men ne pxeel naa. 34 Zguib to naa, per gdzieldraa to naa, ni grielod gdziñ to zaatne guia naa.

35 Grë zha ne ndxie ga, zeene bin zho sca rëb me, rzee zdoo zho.

—¿Pa nac zhe zaatne tsie me? —rnee zho—. ¿Zha nacne ib gdziel ne me? Nend grë zha ladz ne tsieeed me, grë zha ne no stib ladz ben. 36 ¿Zha nacne rnee me, zguib ne me per gdziel me lo ne, niicle grielodgaa guio ne zaatne guey me?

Nis ne rdeed guielmban

37 Zeene gol dze ne laa lni co lozh (dze co nac dze ne mazdraa nroob), miech guizhiu ne ndxie; dzigo nguiedz bnee Jesús lo grë miech co, rëb me:

—Grëse zha ne racladz guiaanwen zdoo, rzac zho zig nac zeene rnab zhis zho, guiaad zho lo naa, naa gded nis ne guie zho. 38 Sac grëse zha ne dib zdoo gliladz cho nac naa, rnee lo Xtiidz Dios, masaque rrieequia tib nis ndzon ne gdzib zdoo zho, pale tib guiubee nroob; nis co gdeed tib guielmban cub lo zho.

39 Sca bzeet Jesús Espíritu Sant. Ga bzeet me, grëse zha ne gliladz cho nac me zacnie

Espíritu Sant zho. Gard guiaad Espíritu Sant len dze co, sac gard gbire Jesús lo guielndzon ne no me gbaa hor co.

⁴⁰ Blalaa zha ne ndxie ga, zeene bin zho sca bnee me, rneechaa zho:

—Ne nlipagaa, lëe men qui ga no guiaad antes ne glanso Men ne nacle diidz cxeel Dios ga.

⁴¹ Rrieequia zla zha ne rnee:

—¡Lëda! ¡Lëegazh me i! Men qui nac Men ne zëëble diidz ga cxeel Dios guiaad lo guidzliu.

Rquiab zla zha ne rnee:

—Men Galilé nac men qui. ¿Niacxe lo xtii grë zha co grieequia Men ne cxeel Dios ga? ⁴² Pe led rnee lo Xtiidz Dios lo xtii rey David, ga grieequia me ni Belén ga gal me, zaatne gocaque ladz rey David.

⁴³ Zhaase zhaase rnee zho; lel psilo zho nodildiidz zho dien cho nac me. ⁴⁴ Brieequia bla zho gocladz naaz me, per ni tib zho wbigd nzhen zho me.

⁴⁵ Grë zhaguiib ne zienaaz me ga, scase zho laa zho bdziñ. Zeene gon grë pxoz rnabey co, grë zha farisé co choot bdziñnied zho, rëbchaa zho:

—¿Pe nac dzigo ne ziaadniede to me?

⁴⁶ Pquiab zho rëb zho:

—¡Wlaltaa gard dzian no tib men ne scataa ndzon rnee!

⁴⁷ Rëbchaa zha farisé:

—¡Pe nlipaa rnee to! ¿Yelaque to dzigo beengüet me? ⁴⁸ ¿Pe rwide to, niicle zhi-wxtis new, niicle now, ni tib choot rliladzd ne me nac Men ne zëëble diidz cxeel Dios ga? ⁴⁹ Grë zha nxen ne rliladz ne nli Dios pxeel me, ¡miech ndziibdeele nac zho, sac gon riend zho zha rnee lo ley!

⁵⁰ Ga zob Nicodem, men ne güeyzodiidznie Jesús ga glo, ye me nacgza grë zha rnabey co, dzigo guso me bnee me lo zho, rëb me:

⁵¹ —Golguien ganle nonguielda ne lega pe gnee ne. Sac gon, zig nac xley ne, rnabeya none gacndiongazh ne zha nac xtiidz tib miech, dien pe nac mine quiayun zho, dzig-oraa gac guielwxtis.

⁵² Pquiab zho rëb zho:

—¿Zootne ye luu lëe nacgza grë zha Galilé ne rleyne me? ¡Grë zha ne cxeel Dios, ni tib zho grieequiad Galilé! ¡Luuzhal bguiba lo

grë guits ne ziaad Xtiidz Dios ganle, zeena gliladz luu!

⁵³ Blozh ga, grëse zho laa zho wbi, tib tib zho zeyse zho lidz zho.

8

Tib wnaa ro nëz

¹ Ga brieë Jesús güey me zaatne rnee zho Gui Oliv.

² Zeene biini liu co, silgaw laa me bdziñ len yadoo co stib. Nzian miech ne goclo lo me ga, nacle bzob me psilo me pseed me zho. ³ Laa me noseed grë miech co, zeene bdziñ bla maistr ley, ni zla zha farisé, bdziñnie zho tib wnaa ne nole tseele ni bgaanie me stib mgui; dzigo bzo zho wnaa co glowtaa lo grë miech ne ndxie ga.

⁴ —Maestro —rëb zho lo Jesús—, laa wnaa rii bga nonie me stib mgui. ⁵ ¿Pe gnë luu dien zha gac me? Sac zig nac ley ne psan Moisés, rnabeya gdeedquie no grë wnaa ne squi nac, haxta guet zho.

⁶ Sca rëb zho, sac laa zho quiaguib dien zha cxiñ me tib diidz, zeena sca grieele tsiezo zho me lo wxtis. Per zeene bin me sca rëb zho pquiitsrunga me liu, psilo me con mzhugnia me noquiaa me lo liu.

⁷ Ran zho rquiabd me, wbiire zho bnabdiidz zho lo me stib; haxta blis lo me, rëb me lo zho:

—Peet nacda, goldeedquie me. ¡Lëëraasi, zha ne rien ni tib dol rapd, zha co csilo gdeedquie me!

⁸ Blozh ga biire pquiitsrun me, psilo me stib noquiaa me lo liu. ⁹ Zeene bin zho sca rëb me, mazd mine been zho laa zho brieë ga, sac bien zho miech ngoopdol nac zho. Zha ne nacpaa zha gol lo zho bner, blozh ga zo zo brieë zho grë zho; loxaque wnaa cose biaan ga.

¹⁰ Dzigo bzoli me, rëb me lo wnaa co:

—¿Yo grë zha ne scataa biaad-zo luu nu? ¿Ni tib zho lëe beenquizhd luu xtol luu?

¹¹ —Ni tib zho —rëb wnaa co.

—Niicle naa —rëb Jesús—, gunquizhd naa luu xtol luu. Bzë, per bien gbiiredraa luu gun luu grë ncuane gunctal xtol luu.

Jesús nac zig tib biini

¹² Bded ga, tib dze nonee Jesús lo grë zha ne noquiaadiag zhiwseed me, rëb me lo zho:

—Nac naa zig nac tib biini ne rziini lo miech. Grëse zha ne gbig lo naa, led yed zho soriel ni lo ncow, sac naa gziini lo zho zeena yгаа zho tib guielmban ndzon.

¹³ Zeene bin zha farisé sca rëb me, psilo zho nguiedz roptsie zho rnee zho:

—¿Cho gliladz xtiidz luu! ¿Lëëque luu rnee cho nac luu!

¹⁴ Pquiab me rëb me:

—Niicle ne naaque rne dien cho nac naa, per diidzli nac mine rne naa. Rien naa pa nëz zial naa, pa nëzгаа za naa; sangue to gon peet riende to, ¹⁵ gacxe waa, rcaadzdoł to naa ncuaane ni nacd naa; ncuaane rcaadzdoł to naa, niapse guic to riaba. Tel naa, zig nac niina noyund naa guielwxtis ¹⁶ per zeene gdziñ dze co, tib tib miech mine been zho min co glu dien pe nac mine tsieguial zho; sac Pxoż naa men ne nacie naa, me gnë zha gun naa guielwxtis. ¹⁷ ¿Pe nacie rliladzde to mine rne naa? Led rnee lo xley to zeene tipse rzë xtiidz chop miech, ga rlu ne diidzli rnee zho. ¹⁸ Zig nac niina, naa nac tib zha ne rne cho nac naa, laa stib zho nac Pxoż naa men ne pxeel naa; sac gon ye me rnee ganle cho nac naa.

¹⁹ Pquiab zho rëb zho:

—¿Yo Pxoż luu na? ¿Pa no me?

—Runbeyde to me —rëb Jesús—, sac niicle naa runbeyde to naa. Telne niaca mine runbey to naa, runbeyle to me na.

²⁰ Gax zaatne riesañ miech gon len yadoo nroob ne zob lad guiedz Jerusalén, ga zob Jesús zeene sca rëb me; per choot bnaazd me, sac gard gal dze co.

Grieełod gdziñ to zaatne guia naa

²¹ Bded ga, biire Jesús rëb me:

—Laa naa guia nagon. Squiaguib to naa, per lëëque lo xtol to i nitlo to, sac zaatne guia naa grieełod gdziñ to ga.

²² Grë zha Israel ne ndxie lo me ga, rneechaa zho:

—¿Pe goon lëëque me naye gut me? Zha nacie squi rnee me goon grieełod gdziñ ne zaatne guey me.

²³ —Tel to —rëb me—, zha nëz lo guidzliu nac to; laa naa gon zha nëz gbaa nac naa. Men guidzliu rii nac to, sangue naa nacd naa zha guidzliu rii. ²⁴ Gane ni naa lo to lëëque lo xtol to i nitlo to. Ne nligaa, telne

gliladzde to ne naa nac men ne nac naa, ible lëëque lo xtol to nitlo to.

²⁵ —¿Cho dzigo nac luu? —rëb zho.

Rëbchaa me:

—Blactaale rne naaw lo to. Haxta zeene psilo naa xtsin naa, laa naa rne lo to ganle cho nac naa. ²⁶ Ndal grë ncuaane zac glisqui naa lo to nu niina, ni ndal ncuaane racladz naa gne naa lo to, per laa naa noyund mine rnabeyse men ne pxeel naa; ni men co nac men ne rnee diidzli.

²⁷ Per ib riend zho ne Dios ga rzeet me lo zho. ²⁸ Dzigo bnee me lo zho stib, rëb me:

—Nieeda gal dze ne yquiaa to naa tib lo yag, dze co gunbey to ganle ne naa nac Mgui ne pxeel Dios ga, dze co guien to ganle led guicd naa riab grë mine quiayun naa; sinque mine pseed me naa, min co rne naa lo to. ²⁹ Dios pxeel naa ni tibaque nacie me naa, ib rsaand me naa, sac tibaque noxco naa run naa mine rdziladz me.

Zha ne nac xpëed Dios

³⁰ Grë zha Israel ne ndxie ga, zeene bin zho sca rëb me, bliladz zho ne me nac men ne no cxeel Dios ga. ³¹ Dzigo bnee me lo zho, rëb me:

—Telne racladz to gac to xpëedscuel naa, zha ne nlipaa ygab xnëz naa, none guiaadnal to grëse zhiwseed naa. ³² Sac sca gunbey to mine nacpaa diidzli, ni lëew glu lo to zha laa to ne squi nac to zig tib ngundziin.

³³ Pquiab zho rëb zho:

—¿Ngundziin ye! ¿Tel no, zha xtiipaa Abraham nac no, wлтаа gard gac no ngundziin lo miech! ¿Pe lo dzigo laa no, ne rnee luu laa xtiidz luu csilaa no?

³⁴ Dzigo rëbchaa me:

—Golquiaadiaga ganle: zha ne tibaque noyunctal xtol, rrieequiacxe waa tib ngundziin nac zho lo dol ga, sac lëew rnabey zho. ³⁵ Ni zha ne nac ngundziin lëë, zig run miech nëz rii, grieełod xoon zho lo men ne rree zho; sangue zha ne nac mëed, choot lo ngadood zho. ³⁶ Gacxe waa, tel csilaa Xpëed Dios to, dzigosi choot lo ngadoodraa to. ³⁷ Nli lo xtii Abraham ziaad to; per laa to quia gon quiaguib to dien zha gut to naa, sac racladzde to yquiaadiag to zhiwseed naa. ³⁸ Laa naa rne grë mine blu Pxoż naa lo naa, zeene no naa lo me; sangue

to gon, laa to zienal mine rnabey men ne nac pxoz to.

³⁹ Pquiab zho rëb zho:

—iNi Abraham gon nac pxoz no!

—iNlid ga nagon! —rëb me lo zho—. Telne niaca mine nli zhinpaa Abraham nac to, zun to grë mine been me. ⁴⁰ Per na gon lel racladz to gut to naa, loxaque ne rseed naa to mine nac diidzli, mine blu Dios lo naa. iTel Abraham led squid been Abraham! ⁴¹ Ni lalnu zienalde to mine been Abraham, sinque laa to noyun mine run zha ne nlipaa nac pxoz to.

Pquiab zho rëb zho:

—iLed-xe mëed ro nëzd no waa! Tibaque men ne nac pxoz no, ni lëe men co nac Dios.

⁴² Dzigo rëbchaa me lo zho:

—Telne niaca mine nli zhin Dios nac to, nleynie to naa, sac gon lo me brie naa zial naa lo to nu. Led zhaald naa zial naa, me nac men ne pxeel naa. ⁴³ Ib riogucde to zha nac grë mine rne naa, ib riende tow, sacne ib nëde to yquiaadiag tow. ⁴⁴ Gulgacnañ sca ganle, lëe pxoz to ga gon nac mendox, lo ma ngab to, gacxe waa rdziladz to run to grë ncuaane run ma. Tel mendox, haxta zeene biaan guidzliu tibaque nonitlo ma miech, ni ib rneed ma mine nac diidzli, sac ib nand ma zha nac diidzli. Ible lëe xtsiin ma ga nac guielwquidie, gacxe waa ma nac pxoz zha ne rquidie. ⁴⁵ iMin co nagon, niicle diidzli nac grë mine rne naa lo to, per ib rliladzde tow! ⁴⁶ Ni tib to choot grieelod gnë laa naa noquidie, sac niapse diidzli rne naa. iPe nac dzigo rliladzde to mine rne naa? ⁴⁷ Grëse zha ne nlipaa ngab xnëz Dios, rley zho rquiaadiag zho xtiidz Dios; per to gon led xnëzd me ngab to, gacxe waa nëde to yquiaadiag tow.

⁴⁸ Horco pquiab zho rëb zho lo me:

—iPsioog ro luu men Samar ngoopdol! iNlique mine rnee no ga nagon, ne mendox noguitnie luu!

⁴⁹ —Choot mendzab noguitnied naa —rëb Jesús—, sinque laa naa noxco xoobnen ganle pa lotaa men nroob nac Pxoz naa; laa to gon lel rsanwin to naa. ⁵⁰ Noguibd naa dien zha guiaannon naa, per Dios gon racladz me ne sca gaca; ni mesi nan me pe run me. ⁵¹ Gnëli naa lo to ganle: iGrëse zha ne gzoob xtidz naa, gdziind dze ne guet zho!

⁵² Pquiab zho rëb zho:

—iPer nlique nagon mendox noguitnie luu! Zig nac Abraham name gut me, grë zha ne biadteed xtiidz Dios ne, grëse zho gut zho. iZha nac dzigo rnee luu, zha ne gzoob xtiidz luu, gdziind dze guet zho? ⁵³ iPe mazdraa dzigo nac luu lo pxozgol ne Abraham, lo grëga zha ne biadteed xtiidz Dios ga? iCho rzac luu nac luu?

⁵⁴ Rëbchaa me:

—Telne lëeque naa noyunnon naa, nlid mine rne naa dzigo. Per na gon, Pxoz naa, men ne nac Dios ne rnee to rliladz to, me rlu ganle ne nli men non nac naa. ⁵⁵ Tel naa runbey naa me, ni run naa mine rnabey me; sangue to gon, nlid runbey to me. Tel gni naa runbeyd naa me, yele naa ga dzigo noquidie zigne rquidie to. ⁵⁶ Pxozgol to Abraham, bley me zeene gocnan me laa naa znu guial lo guidzliu rii. Ni zeene bdeed Dios diidz gon me naa, mazdraa bley me.

⁵⁷ Zeene bin zho sca rëb me, rëbchaa zho:

—iGon luu Abraham ye? iNi chooptsii iz name rapd luu! iZha dzigo gon luu Abraham!

⁵⁸ —Gnëli naa lo to ganle —rëb me—, notaque naa; nole naa zeene gol Abraham.

⁵⁹ Horco ptop zho quie laa zho gdeedquie me, per znuse bded me lad zho brie me leñ yadoo, gonndraa zho me.

9

Biac tib mgui ne rold lo

¹ Zieded Jesús tib lugar co, gon me tib mgui ne rcow lo, scale nac lo men co zeene gol me. ² Dzigo bnabdiidz xpëedscuel Jesús rëb zho:

—Maestro, ibay zha nacne squi golnie men qui guieinë qui? iPe no pe xtol mew, te xtol xmen gol mew ye?

³ —Lëda —rëb Jesús—, led por xtol zhow; sinque squi gol me, zeena zeene laa me guiac, ga gan miech ganle zha nactaa grë ncuaane run Dios. ⁴ Zhile laa liu ycow. None dzioxco ne dziuun ne xtsiin men ne pxeel naa laga nasraa bii zob ngbidz, sac deque ycow liu choot grieelodraa gun dziin. ⁵ Laga bii no naa lo guidzliu rii, naa nac zig tib biini ne rziini lo grë miech rii.

⁶ Blozhse sca bnee me, ptsuc me lo liu, bzhixcuua me niip beṇ, dzigo bdëëb mew zhits guidlo mgui ne rcow lo ga; ⁷ blozh ga, rëbchaa me:

—Güey na, güeytiib lo luu ro pil Siloé.

(Siloé nac zig nacne rnee ne Pxeel zho zho.)

Dzigo güey mgui co güeytiib me lo me, zeene laa me wbire laa me ranle.

⁸ Grë zha ne no gax zaatne no me, ni grë zha ne runbey me; zeene gon zho me, rneechaa zho:

—¿Mgui rii ga lëë rzob gdib i rnab gon?

⁹ No zho rnee mew, nogaa zho rnee led meda.

—Squidaa rlu me —rnee zho—, per led med i.

Nacne pquiab me mezhal rëb lo zho:

—Naaw, naa nac mgui co.

¹⁰ Dzigo bnabdiidz zho zha biac lo me. Rëbchaa me:

¹¹ —Meṇ ne rnee zho lë Jesús, meṇ co bzhixcuua niip beṇ dzigo bdëëb mew zhits guidlo naa, blozh ga pxeel me naa biatiib naa lo naa ro pil Siloé; zeene laa naa wbire laa lo naa biacle.

¹² —¿Yo meṇ co niina na? —rëb zho.

—Dieenda —rëb me—, nand naa dien yo me.

¹³ Dzigo güey zho güeynie zho me lo grë zha ne nac zha farisé; ¹⁴ sac lëetse dze ne rdziiladz zho lo dziin, lëetse dze co sca beenguiac Jesús lo me.

¹⁵ Grë zha farisé co, biire zho bnabdiidz zho lo me dien zha biac me; dzigo bzodiidz me lo zho zha bdëëb Jesús niip beṇ lo me, blozh ga güeytiib me lo me, zeene laa me wbire laaw biacle.

¹⁶ Blalaa zha farisé ne ndxie ga, psilo zho rnee zho:

—Nlid ne Dios pxeel meṇ co, gacxe waa niicle runbeydraa me pa dze nac dze nda.

Pquiab zla zho rnee:

—Tel cholze miech ngoopdol nac me, ¿niacxe zrieelo gun me grë milagr qui?

Zhaase zhaase rnee zho.

¹⁷ Dzigo wbiire zho bnabdiidz zho lo me, rëb zho:

—Luu waa, ¿cho rzac luu nac meṇ ne beenguiac lo luu ga?

Pquiab me rëb me:

—Ible Dios pxeel me. Tib meṇ ne ziadteed xtiidz Dios lo miech nac me.

¹⁸ Per ib rliladz grë zha wxtis co ne biac lo me, sac rliladz zho ne rold lo me glo; dzigo bnabey zho gocredz pxoz me, gocredz xniaa me. ¹⁹ Bdzin grop mengol co, rëbchaa zho:

—¿Pe nli xpëed to nac meṇ rii? ¿Pe nli na rold lo me zeene gol me? Tel nli rold lo me, ¿zha biac lo me ne laa me ran niina?

²⁰ —Nli xpëed no nac me —rëb grop mengol co—. Ni nli rold lo me zeene gol me; ²¹ per ndiond no dien zha biaca ne laa me ran niina, niicle ndiondgaa no dien pe no cho beenguiaca. Benque zha gol-le nac me, mazd lo me golnabdiidz, mezhal gnë dien zha biac lo me.

²²⁻²³ Sca rëb grop mengol co, sac rdzieb zho gree zho xyadoo zho. Biaanle grë zha rnabey co diidz: zha ne guiab Jesús nac Meṇ ne zëëble diidz ga cxeel Dios lo guidzliu; csaandraa zho sëëb zho yadoo.

²⁴ Wbiire zho bredz zho meṇ ne biac lo ga, rëb zho:

—Bieṇ ganle Dios zobwi, bnë diidzli lo no; sac tel no ndion no cholze miech ngoopdol nac meṇ co.

²⁵ —Dieenda —rëb me—. Nand naa dien pe miech ngoopdol nac me, te meṇ wena ye. Per me gon beenguiac lo naa, sac rold lo naa glo.

²⁶ Dzigo biire zho bnabdiidz zho stib dien zha beenguiac Jesús lo me. ²⁷ Pquiab me rëb me:

—Ledaaw nile naa lo to, per ib rliladzde tow. ¿Zha nac dzigo ne racladz to gonaque tow stib? ¿Te racladz to ye, ye to sëëb xnëz me?

²⁸ Dzigo psilo zho ndox zho lo me, rëb zho:

—Luuzhe tel xnëz me no luu, sangue tel no zhiwseed Moisés, miṇ co zional no.

²⁹ Sac tel Moisés, ndion no nli Dios pxeel Moisés, per mgui co ni ndiond no dien pa brie me.

³⁰ Pquiab me rëb me:

—iNcuane gzeegaa zdoo ne i runbeydaque to cho nac me, ni ron to me beenguiac lo naa! ³¹ Ndion ne ganle rquiaadiagd Dios xtiidz cholze miech ngoopdol, sinque laa me rquiaadiag xtiidz zha ne rien ne nli meṇ nroob nac me, ni run zho mine rnabey me. ³² Stiba, waltaa gard dzion ne cho zha beenguiac lo tib miech ne znu gol rold lo.

³³ Te_lne niaca mi_ne nacnied Dios me_n co, nrieelod me niu_nguiac me lo naa.

³⁴ —¡P_sioog ro luu! —rëb zho lo me—. ¡Ib racladzd no guiaad tib ngoopdo_l nu guidseed no!

Horco wbig zho, blee zho me ga.

Zha ne ro_ld lo

³⁵ Bin Jesús sca blee zho me ga, dzigo zeene bdzieel Jesús me, rëbcha_a Jesús lo me:

—¿P_e r_liladz luu me_n ne nac Xpëëd Dios?

³⁶ Pquiab me rëb me:

—Bzhiguiel_l bnë lo naa die_n cho nac me_n co, zeena gliladz naa me.

³⁷ —Go_nle luu me —rëb Jesús—. Naa go_n nac me_n co, lëe me nu nozodiidznie luu niina.

³⁸ Dzigo pquiitsgzhib me lo Jesús, ni rëb me:

—Dib zdoo naa r_liladz naa ne nli Xpëëd Dios nac luu.

³⁹ Blozh ga rëbcha_a Jesús:

—Laa naa zia_l lo guidzliu rii, zeena glu die_n cho rap do_l, die_n chogaa rap_d do_l; sac zha ne rzac miech peet riend, laa zho tsa_a biini; laa zha ne rzoob zho niini, laa xquiel_rien zho ycow, guiaa_n zho zig tib zha ne ro_ld lo.

⁴⁰ Blalaa zha farisé zo ga, zeene bin zho sca rëb me, rëbcha_a zho lo me:

—¿Rzë diidz qui na lëe ye lo no ro_ld?

⁴¹ Dzigo pquiab me rëb me lo zho:

—Te_l niaca mi_ne nlipaa zha ne ro_ld lo nac to, grieelod gni naa rap to do_l. Per na, ne masaque rzac to ro_lraa lo to, gane grëse ncuaane quiayun to xto_l to noyaca, to zëeba.

10

Mëcwxii_l ni zha ne rquianap ma

¹ Ni rëb Jesús:

—Go_lquiaadiaga ga_nle: grëse zha rded stib nëz zeene rzëëb zho le_n lidz mëcwxii_l, laa ne ted zho nëz ro puert, gase rlu ngbaan ga nac zho; ² sac te_l me_n ne noyan maw, nëz ro puert nëz co rzëëb me. ³ Zha ne rquianap ro lidz ma, ga rxal zho rded me; niicle magaaw, zeene ron ma tsi me, grëse ma rdzi_n lo me; dzigo rbedz me ma, rneelë me ma tib tib ma, laa me rbee ma ga. ⁴ Rlozhse rbee me grë ma ne nac xma me, laa me rner lo ma; grëse ma laa ma rna_l zhits me

sacne runbey ma tsi me. ⁵ Riena_ld ma zhits stib miech, zeene ran ma zho znuse rzhoon ma; sac runbey_d ma tsi zho.

⁶ Grë zha ne ndxie lo me ga, ib biend zho zha nac godiidz co; ⁷ dzigo wbiire me bnee me lo zho, rëb me:

—Go_lquiaadiaga ga_nle: Naa go_n nac zig ro Puert, zaatne rded mëcwxii_l ga. ⁸ Grëse zha ne biaad glo rnee zho zha nac Me_n ne nacle diidz cxeel Dios ga, grëse zha co ngbaan ga nac zho, loxaque psacsi zho par grieelo cuan zho; ni grëse mëcwxii_l ne nacpaa xpëcwxii_l naa, güeyna_ld ma zhits zho.

⁹ Sa_ngue naa, laa naa nile lo to ga_nle: Naa nac zig ro Puert, zaatne rded mëcwxii_l ga. Grëse zha ne gbig lo naa, zlaa zho, peet lo tsoxtseebdraa zho; pale grë mëcwxii_l ne zozëëb zoriee ro lidz, ni rdziel ma guizh nguia, guizh ndzon row ma. ¹⁰ Zha ne nac ngbaan, zeene riaad zho loxaque rban zho ni rut zho; sa_ngue naa, laa naa zia_l zeena ygaa to tib guiel_mban ne mazdraa ndzon, tib guiel_mban ne gdzi_nd dze lozh.

¹¹ 'Naa nac Baxtor ne nquialadzpaa xpëcwxii_l. Sac zha ne nquialadzpaa xpëcwxii_l, rquiad zdoo zho xquiel_mban zho, rsilaa zho ma lo guiel_xtseeb ne notaa ma.

¹² Per te_l noyac-wree zha ne noyan ma, rquiad zdoo zho ma, zigne ran zho palo ziaad tib coyot ntseeb, ndxieque mëcwxii_l ga laa zho rzhoon; sac led chend zho ma, led zhad nac xbaxtor ma. Zeene rdzi_n coyot, nëzrii nëzrec rtsieets coyot ma, nogaa ma rgaa lo coyot. ¹³ Rzhoon zho, sac dimise nonie guic zho, peet liaadz nod zho ma. ¹⁴⁻¹⁵ Naa nac Baxtor ne nquialadz xpëcwxii_l. Zigne runbey Pxoz naa naa ni runbey naa me, sca runbey naa grëse xpëcwxii_l naa, niicle magaaw runbey ma naa. Grëse ma, rleynie naa ma, laa naa rbeeladz xquiel_mban naa totsaque cuee naa ma lo guiel_xtseeb ne no ma.

¹⁶ 'No spalal xpëcwxii_l naa, ma ne ngabd le_n corral rii; grëse ma co, ible zon ma tsi naa sac laa naa no gaxi ma, zeena tipse gac ma grë ma yquianaap naa ma.

¹⁷ 'Me_n ne nac Pxoz naa, rleynie me naa sac laa naa rbeeladz xquiel_mban naa; per ible zriibaan naa. ¹⁸ Naazhal rbeeladz xquiel_mban naa, choot grieelod lega ctiche xquiel_mban naa. Rap naa poder gded naa

xquielmban naa, ni rap naa poder gbire gban naa stib. Dios bneedz diidzbey co lo naa.

¹⁹ Grë zha Israel ne ndxie ga, zeene bin zho sca rnee me, laa zho goc chop dii stib.

²⁰ No zho rnee:

—Yase mendox noguitnie guic men qui, o rzhinlegaa guic me. ¿Pe nacne rquiaadiag to xtiidz me?

²¹ Rquiab stib zho rnee:

—Niini rzë xtiidz men qui, led squid rac zha ne noguitnie mendox. Stiba, ¿niacxe zrieelo mendox gunguiac ma tib lo zha ne rold lo?

Rnee Jesús Xpëed Dios nac me

²² Len mëe ne rac nala, len dze co noyac tib lni Jerusalén, lni ne run zho rsoladz zho dze ne glopaa psilo quiaquiin yadoo. Ye Jesús bdziñ Jerusalén len dze co. ²³ Laa me zieded tib len nsaap ne quia cho yadoo co, nsaap ne rnee zho zhiNsaap rey Salomón; ²⁴ zeene wbig bla zha ne rnabey Israel, bnabdiidz zho lo me rëb zho:

—¿Poc dzigo gdziñ dze ne gnë luu diidzli lo no? Telne nli luu nac Men ne zëëble diidz ga cxeel Dios guiaad lo guidzliu, niinagazh bnëw lo no.

²⁵ Pquiab Jesús rëb me:

—Blactaale zine naaw lo to, per rliladzde tow. Stiba, pe zhidaa milagr ne ziañ to run naa, gase rlu ganle cho nac naa; sac Dios men ne nac Pxoza naa, men co racniën naa run naaw. ²⁶ Ib rliladzde tow, sacne led yede to ngab lo naa. ²⁷ Tel zha ne ngab lo naaw, runbey zho naa; niicle naagaaw runbey naa zho, ni zhits naa rzënal zho. ²⁸ Grëse zho, rded naa tib guielmban ne gdziñ dze lozh lo zho, ni gdziñ dze nitlo zho. Choot grielod ctiche zho lo naa, ²⁹ sac men nroob nac Pxoza naa men ne pxeel zho lo naa; choot grielod cuee zho ladznia me.

³⁰ Ni tibaque nac no grop no me.

³¹ Zeene bin grë zha rnabey co sca rëb me, psilo zho ptop zho quie nan zho ngoquie zho me. ³² Dzigo rëbcha me lo zho:

—Lo grëtaa milagr ne quiayacniën Pxoza naa naa quiayun naa lo to. Golinë dien, ¿pa min rlisqui to ne laa to racladz gneedzquie to naa?

³³ Pquiab zho rëb zho:

—¿Coquiedaxe no luu waa por grë milagr ne run luu, sinque laa no coquie luu por grë diidz ne rnee luu i, quiaquie luu Dios! ¿Tib miech bense name nac luu, ni rnee luu laa luu nac Dios!

³⁴ Dzigo rëbcha me lo zho:

—¿Lo xlibr ley to name zhobnee zha rzac Dios zha ne pcaania xtiidz me, rëb me dios nac zho! ³⁵ Ni ndion ne ganle, grëse mine rnee lo Xtiidz Dios, diidzliw; gacxe waa tel sca rëb me lo zha ne pcaania xtiidz me ga, ³⁶ ¿niacxe rguitnie naa me ga, zeene rne naa Xpëed me nac naa, ni mezhal bzooblo naa pxeel me naa lo guidzliu rii? ³⁷ Telne rund naa milagr ne rlu Dios pxeel naa, ib gliladzde to naa. ³⁸ Per telne ran to rlu ne me nacie naa, maase gliladzde to naa totsaque golliladz ne me nacie naa; tsow guien to ganle ne tibaque nac no grop no me, zigtaa nacie me naa, scaque nacie naa me.

³⁹ Horco gocladz zho stib naaz zho me, per znuse brie me nia zho. ⁴⁰ Dzigo brie me ga güey me ro guiubee Jordán, zaatne bio Juan pchoobnis Juan miech; ga blëz me palal dze. ⁴¹ Nzian miech ne güey lo me ga, rnee zho:

—Nli beend Juan ni tib milagr nroob, per grëse mine bnee me zeene bzeet me men rii, zigne bneese me laaw norieequia niina.

⁴² Nzian grë miech ne güeyquiaadiag zhiwseed me ga, dib zdoo zho bliladz zho ne me nac Men ne zëëble diidz ga cxeel Dios.

11

Gut Lazh

¹ Len dze co blanguidz tib mguie ne no guiedz Betain, lë Lazh; no chop bzian Lazh tib zho lë Mart stib zho lë Marí. ² (Lëe Marí rii pchoob tiblo nceit nex ni Jesús, ni pcuidz mew con guitsguic me.) ³ Dzigo pxeel grop wnaa co diidz lo Jesús, gacnan me laa Lazh rzacne, sac nan zho rleyndox me Lazh.

⁴ Zeene blanso diidz, nëchaa me:

—Peet tsienied guic to, niicle tel blanguidz me per nacda par guet me, sinque par glu ganle pa lotaa men nroob nac Dios. Ga glu ganle pa lotaa men nroob nac Xpëed me.

⁵ Zigtaa Maríw, zigtaa Marta, zigtagaa Lazha, nquialadz Jesús zho gza zho, ⁶ per

ib biobladzd me; leḷ blēz me schop ngbidz zaatne no me ga. ⁷ Dzigoraa nē me lo no:

—Laa ne guio nēz xtan meḷ Judé stib.

⁸ Dzigo rdzieets no:

—Maestro, ¿racladz luu tsie luu nēz co stib ye? Pense name goc bla ngbidz ga gocladz zho ngoquie zho luu ga.

⁹ Nēchaa me:

—Tsiipchopraa hor name rziini ngbidz, ni laga niini rna zac tibliladz zia ne, noxtseebd ne lega pa griel ni ne; ¹⁰ loxaque pcow liu, noxtseeb pa griel ni ne; sac ncow rna.

¹¹ Blozh ga nē me:

—Laa xamigw ne Lazh nixguiesle, per na laa ne guio zeena gabee naa zhimcaalo me.

¹²⁻¹³ Tibaque ndion no nli nixguies Lazh, dzigo rdzieets no lo me:

—Telne raaguiesle me, zac-wen me sca.

Ib biend no ne gutle Lazh, gane sca rnee me. ¹⁴ Dzigoraa clar bnee me lo no, nē me:

—Laa Lazh gutle. ¹⁵ Ni rley naa gon ne guiend naa ga dze co, zeena sca grieelo lozh gliladz to ganle cho nac naa. Golgotsaa guio ne nēz lo me ga niina sca.

¹⁶ Laa Mazh, zha ne rnee zho “Mēēdgrop”, zeene bin Mazh sca nē me, rneechaa Mazh lo no:

—Guiend rson, golgotsaa cchoob zdoo ne guional ne zhits me dien. Tel gut zho me, maase gut zho ne.

Jesús rbeeban ni me rdeed guielmban

¹⁷⁻¹⁹ Gax Jerusalén riaan Betain. Zha ne rree Jerusalén, maase groḷ hor ruḷ zho nēz rdziḷ zho Betain. Nzian grē zha Jerusalén rdziḷ riequiaabdiuzh zho Marí grop Mart, riechoobladz zho zdoo me lo xquielnē me ga.

Dze ne rac tap ngbidz bioliu Lazh, dzigo-
raa laa Jesús bdziḷ.

²⁰ Gon Mart pa lo ziaad Jesús, dzigo brie me biaad-xinēz me Jesús; laa Marí biaan ro yu.

²¹ —Jesús —rēb Mart—, telne niaca mine nu no luu segur niete bzian naa; ²² sac naḷ naa, grētaa ncuane rnaḷ luu lo Dios, ruḷ me mine rnaḷ luu.

²³ —Peet tsienied guic luu —rēb Jesús—, ible zrieeban bzian luu.

²⁴ Pquiab Mart, rēb Mart:

—Nliw, naḷpaa naa ible zrieeban me gal dze ne laa guidzliu rii nitlo, zeene grēse mengut, laa zho grieeban.

²⁵ Dzigo rēb Jesús:

—Naa nac meḷ ne rbeeban grē mengut, ni naa nac meḷ ne rdeed guielmban lo grē miech. Grēse zha ne dib zdoo gliladz naa, niicle guet zho zig ret grēraa miech rii, zdziḷ dze ne gban zho stib. ²⁶ Sac grēse zha ne dib zdoo rliladz naa, laa zho bgaale tib guielmban ndzon ga, guiaand zho ladznia guielgut. ¿Led rliladz luu lēē Mart, ne sca gaca?

²⁷ —Rliladz naaw —rēb Mart—. Rliladz naa ne luu nac meḷ ne bzooblo Dios ga, luu nac Xpēēd Dios, Meḷ ne zēēble diidz ga cxeel me guiaad lo guidzliu.

²⁸ Blozhse ga, wbiere Mart zie Mart zietsedz Mart Marí. Bdziḷ Mart zhlianse bredz Mart Marí (sac nzian zha ne ndxie ga ziequiaabdiuzh Marí) rēb Mart:

—Niinapaale blanso Maestro, na laa me rbeedz luu.

²⁹ Zigne bin Marí sca rēb Mart, brie nguzhoon Marí laa Marí zie nēz co. ³⁰ (Bdziḷ Marí, laa Jesús bii zo zaatne güeydzieel Mart me ga; gase blēz me, bzēēbd me lad guiedz.) ³¹ Grē meḷ Israel, zha ne ndxie lidz Marí ga ziechoobladz zdoo me, zeene gon zho sca lēēlēd brie me, nalaque zho zhits me; sac naḷ zho bod ro xpaabzian me ziegoon me.

³² Zigne bdziḷ me zaatne zo Jesús ga, pquiitsgzhib me lo Jesús.

—Jesús, luu ne nac luu meḷ ne rnabey —rēb me—, telne niaca mine nu no luu zeene blanguidz bzian naa, niete me.

³³ Psilo Marí roon Marí. Zeene gon Jesús, niicle Maríw, niicle grē zha Israel ne bdziḷ ga, mban rac zho, grēse zho roon, dzigo ye me biab guielnē me. ³⁴ Bnabdiidz me rēb me:

—¿Pa lo pqueets to me?

—Dē ganle —rēb zho—, zeena gan luu pa lo bgueets me.

³⁵ Horco psilo Jesús biin me. ³⁶ Grē zha Israel co, zeene gon zho roon me, rneechaa zho:

—¿Golwi ganle, blactaa nquialadz me Lazh!

³⁷ Laa zla zho rnee:

—Led me name been_guiac lo m_gui ne ro_ld lo ga, ¿pe nrieelod zha niu_n me, zeena niete Lazh?

Brieaban Lazh

³⁸ Zeene laa Jesús bdzi_n ro baan Lazh, biire biab gui_el_nē me.

Zig nac tib bliee niaa baa co; rna tib quie nroob ntse zaatne rsēēb zho ngutoo;

³⁹ dzigo bnabey Jesús cob zho quie co.

Pquiab Mart, bzian ngutoo co rēb me:

—¡Mazd gdiobda! ¡Nadze rac tap ngbidz gut me, mbanle na rlaa me!

⁴⁰ Dzigo rēb_{ch}aa Jesús:

—Led laa naa nile lo luu, tel_ne dib zdo_o luu rililadz luu naa, bii zan luu gan_le zha nactaa grē ncuaa_ne ndzon ne ru_n Dios.

⁴¹ Zeene blozh bdo_b zho quie co, dzigo blis Jesús lo me nēz gbaa, ni rēb me:

—Dios, luu ne nac luu P_xoz naa, xquizh xquie_ln_zaac luu sac r_quiaadiag luu mi_ne rne naa. ⁴² Nan naa tibaque r_quiaadiag luu mi_ne rnee naa, per laa naa rzeta niina, zeena grēse miech ne ndxie nu gliladz zho gan_le ne nli luu pxeel naa.

⁴³ Dzigo nguiedz bredz me, rēb me:

—¡Lazh, brie_e i!

⁴⁴ Zigne sca bnee me, laa ngutoo co brie_e ga, scase nrie_l lar dib nia me, dib ni me ne, ni nioog stib lē lar lo me. Dzigo rēb Jesús:

—¡Golxadz grē lar ne nrie_l me i, zeena guey me!

Rguib zho dien zha yгаа Jesús

(Mt. 26:1-5; Mr. 14:1-2; Lc. 22:1-2)

⁴⁵ Grē men Israel ne güey_nal zhits Marí ga, zeene gon zho sca bleeban Jesús Lazh, nzian zho bliladz ne nli Dios pxeel me.

⁴⁶ Nogaa zho le_l güey zho güeyzodiidz zho lo grē zha farisé zha bleeban me Lazh.

⁴⁷ Horco lēléd pcaalsa grē pxoz ne rnabey, ni grē zha farisé, rēb zho:

—¿Pe gnē to dien zha gaca? ¿Zha dziuun ne m_gui ne rnee zho Jesús ga, sac gon pe zhidaa milagr ne quiayu_n me? ⁴⁸ Tel_ne squise csaan ne me, mbe grēse miech sēēb xnēz me; lozh ga, zeene gacnan men rnabey ne zob Romaw, laa me cxeel grē xmen_guiib me guiaadnitlo zho xyadoo ne, guiaadnitlo zho ladz ne.

⁴⁹ Dzigo pquiab Caifás, men ne nac pxoz nroob len iz co, rēb me lo zho:

—¡Ni lal nu lēē peet riende to! ⁵⁰ ¿Pe riende to mazd wena yгаа tib zha guet zho, zha quizh par gdib guiedz, lēdle grēse zha ladz ne nitlo?

⁵¹ Zeene sca rēb Caifás men ne nac pxoz nroob ga, ga bzeet me ible no guet Jesús par csilaa me grēse miech lo dol; per led guicd me biaba, sinque Dios psiaaba guic me. Ga goquiet ne laa Jesús guet, par csilaa me grēse zha Israel, ⁵² ni grēragaa zha ne no dipse lo guidzliu, zeena tipse gac grēse zha ne nac xpēēd Dios.

⁵³ Dzigo grēse zha ne nac wxtis ga, laa zho biaan diidz ne ible no yгаа Jesús gut zho me. ⁵⁴ Nacne briedraa Jesús ne nen_lo nian zho me; dzigo mazd laa me brieenie no xtan zha Judé, güeynie me no zaatne wzhi no miech, bdzi_n no tib guiedz win lē Efraín, ga bliaaz no grē no me.

⁵⁵ Len ngbidz co, ziaadyob lni Pascw. Nzian grē miech ne no grē guiedzlas ne ndxie dib ga, laa zho rsilo quiariee zie zho nēz Jerusalén; sac ansraa csilo Pascw nzian zho rie yadoo ru_n zho grēse mi_ne rnabey ley par guiaan_mbe zho lo xtol zho. ⁵⁶ Grēse zha ne rdzi_n, len yadoo no zho rnabdiidzlsa zho dien pe zdzi_n Jesús lo lni; sac grēse zho racladz gan me.

⁵⁷ Laa grē pxoz ne rnabey, ni grē zha farisé, laa zho bnabeyle, zha ne gan_taa Jesús, tsienie zho diidz parne tsie zha ne tsienaaz me.

12

Pchoob tib wnaa nceit nex guic Jesús

(Mt. 26:6-13; Mr. 14:3-9)

¹ Sxoop ngbidz gdzi_n dze lni Pascwa, güey Jesús guiedz Betain, zaatne no Lazh, men ne bleeban me ga. ² Sac grēse menlidz Lazh, been_lo zho tib xtsee, gownie zho me.

Mezh no zho, laga laa Lazh zobnie me, laa Mart nodziib ncuaa_ne gowxtsee zho lo mezh, ³ tibaque zeene bzēēb Marí bzēēbnie Marí tib lo nceit nex ne rrie_e guiee ne lē nard, tib lo nceit niazha, rgaaw maase gro_l boté. Zigne bdzi_n Marí bdēēb Marí nceit co ni Jesús, blozh ga con guitsguic Marí pcuiidz Marí ni me. Dipse len yu zēb_xlaa nceit co.

⁴ Laa Judas Iscariot, tib zha ne nacgza no (zha ne bded ga pto me) zeene gon Judas

sca bdëeb Marí nceit co ni Jesús, rneechaa Judas:

⁵ —Mazd tebaa zha ndo nceit qui. Nguizhpaa zhow maase tson gayoo pes plat, dzigo needz zho dimi co ngaaza lo grë zha mban ne guiend pe yquiin.

⁶ Sca rnee Judas, per nlid ne rquia zdo Judas zha ne guiend pe yquiin, sinque laa Judas rguib dien zha cuan Judas dimi co, sac Judas ngotsow bziuud ne no dimi; zigse raclo dimi len bziuud co, zhliaanse rbee Judas dimi co.

⁷ Dzigo rëbchaa Jesús:

—Psaan me. Ib laa me bdëeb nceit qui ni naa, zeena nzhixcuaale xcuerp naa gal dze ne laa naa ygueets. ⁸ Telne racladz to gun to xyudar zha ne guiend pe yquiin, tibaque ranlsa to grë to zho, zac tsow ygad to lo zho; sangue naa dzin dze gandraa to naa.

⁹ Ndal grë zha Israel, zeene bin zho laa Jesús no guiedz Betain, bio zho nëz güey zho lo me ga, ni güeyso zho lo Lazh, men ne bleeban me ga.

¹⁰ Zeene gon grë pxoz rnabey cow, nacne bnediidzaque zho ye Lazh none gut zho; ¹¹ sac por Lazh, nzian grë zha non, laa zho rbig nëz lo Jesús, laa zho rliladz ne nli me nac Men ne zëeble diidz ga cxeel Dios.

Bzëeb Jesús Jerusalén

(Mt. 21:1-11; Mr. 11:1-11; Lc. 19:28-40)

¹² Biini liu co, dipse lad guiedz Jerusalén zhoob diidz laa Jesús gdzin ga dze co. Grë miech guizhiu ne bdzin ga zie lni Pascw, ¹³ psilo zho brie zho ziaad-xinëz zho me; tib tib zho nzheñse zho tib lë zin. Lo guielbley co, zeene gon zho me, psilo zho nguiedz roptsie zho, rnee zho:

—¡Zha men nroobtaa nac Dios! ¡Zha ndzontaa men rii pxeel Dios ziaad lo ne! ¡Lëe men rii gnabey Israel!

¹⁴ Laa Jesús, zobse me lad tib burr yeen, zigne raquiet lo Xtiidz Dios zaatne rnee:

¹⁵ Grëse to men Israel, gdiebde to.

¡Golwi ganle, laa men ne rnabey ladz to ziaad i, zobse me lad tib burr yeen!

¹⁶ Grëse no ne nac no xpëedscuel me, ni tib no biend hor co ne grëse ncuaane noyac ga, raquietlew lo Xtiidz Dios; sinque haxta zeyle me gbaa, dzigora soladz no nzian

grë ncuaane raquiet lo Xtiidz Dios ga, gonlo no goca; ni bien no Jesús raquiet ga.

¹⁷ Lad grë miech guizhiu co no nzian zha ne gon zha bleeban me Lazh, dzigo nguiedz rzodiidz zhow lo grë miech co.

¹⁸ Ni nzian grë miech co, laa zho blanso ga ziaad-xinëz zho me, sac bin zho zha been me milagr nroob co. ¹⁹ Grë zha farisé, zeene gon zho grë miech guizhiu co, rneechaa zho:

—¡Pe zhidaa grë miech qui racnie men qui! ¡Peraa nadien dziuun ne!

Rguib bla zha Gres Jesús

²⁰ Lad grë miech ne bdzin Jerusalén ga, ziegan Dios len ngbidz Pascw co, lad co no blalaa zha zit ne nacd zha Israel, ²¹ dzigo bnee zho lo Lip (zha Betsaid nac Lip) rëb zho:

—Bzhiguel bnë dien pa lo no Jesús, laa no racladz dzian no me.

²² Dzigo güey Lip rëb Lipa lo Ndrés, blozh ga güey zho grop zho güeynie zho diidz lo Jesús.

²³ Dzigo rëbchaa me lo zho:

—Naa ne nac naa Mgui ne pxeel Dios, niinataa nagon laa dze bdzin zeene laa naa gbire guia gbaa stib. ²⁴ Golquiaadiaga ganle: Tib zhobxtil, telne tsoda liu tibaque zhob naca; per zeene laa zhob co rio liu, nzian raca. Scaque naa nagon, none guet naa, none tsoliu naa, zeena gacnzian zha ne ygab xnëz naa. ²⁵ Sac zha ne rquia zdo xquielmban, znitlonie zhow; sangue zha ne cueeladz xquielmban, zha cosi zgaa zho tib guielmban ndzon ne ib gdzind dze lozh. ²⁶ Zha ne racladz sëeb xnëz naa, none gun zho mine rnabey naa; ni zaatne gdzin naa yeque zho no gdzin ga. Ni grëse zha ne sëeb xnëz naa ni gon zho xtiaz naa, zunnon Pxo naa zho. ²⁷ Mban rac zdo naa niina. Per lëda ga gun naa, telne guiep naa lo Pxo naa csilaa me naa lo grëta guielnë ne no teed naa. ¡Sac par mincopaa zial naa lo guidzliu rii!

²⁸ 'Dios, luu ne nac luu Pxo naa —rëb me—. Blu lo grë miech rii ganle ne men nroob nac luu.

Dzigo bin zho zëeb tib tsi men co gbaa, rëb me:

—Laaw blule naa, ni niina laa naa gbire gluw stib.

²⁹ Nzian grë miech ne ndxie ga, zeene bin zho tsi men co, bzhaac zho nguziw; zha ne bien led nguzida, rnee zho:

—Xanj! Dios ga gon bnee lo me.

³⁰ Dzigo rëbchaa me lo zho:

—Laa to bin ganle laa Pxoza naa bnee, ni por to gon bnee me, zeena gon to tsi me ni gliladz to ne me pxeel naa. ³¹ Laa dze nagon bdzin zeene laa Dios gunquish naa xtol grëse miech guidzliu rii; lëe dze bdzin zeene laa mendox piche gnabeydraa ma lo guidzliu rii zigne rnabey ma niina. ³² Sac zeene laa naa quia glaa lo cruz, ga cuedz naa grëse miech zeena sëeb zho xnëz naa.

³³ Ga bzeet me zha gut miech me. ³⁴ Grë miech ne ndxie ga, zeene bin zho sca rëb me, rëbchaa zho:

—¿Guet luu ye? Lo Xtiidz Dios name rnee, ib guete Men ne cxeel Dios ga. ¿Zha nac dzigo ne rnee luu laa luu guet? ¿Chopaa dzigo nac luu?

³⁵ Dzigo pquiab me rëb me lo zho:

—Naa nac zig tib biini ne noziini lo miech; ni ngabse dze ne cuëz naa lo to. Laga noziini naa lo to, gošëni zaatne riab biini zeena ygaade to guielcow; sac zha ne rzë lo ncow riend zho palo zie zho. ³⁶ Niina ne rdeeda diidz golliladz cho nac naa, zeena gac to zha ne nliipaa no lo biini.

Blozhse sca rëb me laa me biche ga, bludraa me lo zho. ³⁷ Niicle gonlo zho nzian milagr ne been me, per ib rliladz zho ne nli Dios pxeel me. ³⁸ Ni ib scalegaa no gaca, sac ga briequia mine bzeet Isá (tib men ne biadteed xtiidz Dios) zeene znu rëb me:

Dios, bui ganle ni tib choot nëd gliladz xtiidz luu,

niicle ran zho grëtaa milagr ne run luu.

³⁹ Ni nligaa ib brieelod nliladz zho me; sac zeene pquiaa Isá, znu rëb me:

⁴⁰ Ncow psan Dios lo zho, ni beenndip me zdoo zho;

zeena gand zho me, niicle guiegdz zho zha gbig zho lo me csilaa me zho lo xtol zho.

⁴¹ Zeene znu bnee Isá, ible Jesús ga bzeet me; sac gon me grëtaa guielndzon ne rap Jesús. ⁴² Ndal zho sca ib bliladz me, per noquegaa zha ne bliladz me; zig nac grë zha ne rnabey lo zha Israel, ndal zho

bliladz ne nli Dios pxeel me, per ib pxobnend zhow; sac rdzieb zho cuee zha farisé zho yadoo. ⁴³ Ni stiba rdziladzraa zho guiaannon zho lo miech, laa ne guiaannon zho lo Dios!

⁴⁴ Len dze co, tib vuelt nguiedz bnee Jesús, rëb me:

—iGrëse zha ne rliladz naa, yele Pxoza naa ga rliladz zho! ⁴⁵ Ni zeene rwi zho lo naa, yele men ne pxeel naa ga ran zho! ⁴⁶ Naa nac zig tib biini ne rziini lo miech, ni grëse zha ne dib zdoo gliladz cho nac naa, zriee zho lo guielcow ne no zho. ⁴⁷ Grëse zha ne gon Xtidz naa, ni gband zho zigne rnabeya, led naad gunquish zho dol co; sac ziald naa par gdziibdol naa miech, sinque laa naa zial par csilaa naa zho lo dol. ⁴⁸ Xtidz naa gac ley ne gunquish zhow; zigtaa zhaw zigtagaa grë zha ne nëd gunbey naa, grë zha ne nëd yquiaadiag xtidz naa. ⁴⁹ Sac grëse ncuaane pseed naa miech, led guicd naa biaba, sinque Pxoza naa men ne pxeel naa, men co rnabey naa pe nac mine cseed naa zho. ⁵⁰ Ni nanpaa naa, grëse diidz ne rnabey Pxoza naa naa rne naa, lëew rlu zha yгаа miech tib guielmban ndzon ne gdzind dze lozh; gacxe waa, grëse mine rnabey me gne naa, zigne racladz me scase rne naaw lo to.

13

Rguiib Jesús ni xpëëdsuel me

¹ Guieel ne rsilo lni Pascw; wdze co pcaalsanie Jesús no grëse no ne nac no xpëëdsuel me, laa no nodiowxtsee. Rienle me ne gataa laa dze co bdzin, zeene laa me gbi lo guidzliu rii gbire me lo Pxoza me stib. Grëse zha ne ngab lo me, rleynie me zho; ne nligaa rleynie me zho haxta bdeed me xquielmban me psilaa me zho. ²⁻⁴ Rien me grëtaa ncuaane no, ladznia me psan Pxoza mew; lo Pxoza me brie me ziaad me lo guidzliu, ni lo Pxoza me gdzin me niina ne laa me gbi lo guidzliu.

Laa no zioob no no mezh, tibaque zeene guso me blee me lar ne mbix me, bdziinlen me tib lë lar nool. Par hor co, laa mendox pquiil-le Judas, zhin Simón Iscariot, parne tsieto Judas me. ⁵ Dzigo blaas me nis tib len bandej laa me psilo noguiib me ni grë zha ne nacgza no, zigse rlozh rguiib me ni tib zho scase scase rcuudz mew con lar ne

ndxie len me ga. ⁶ Zeene laa me zie quiib me ni Simón Pedr, rëbchaa Simón lo me:

—¡Lëda i gon! ¿Pe nacre lel luu quiib ni naa?

⁷ Pquiab me rëb me:

—Griee lod guien luu niina, pe nacre quiib naa ni luu; haxta tedraa nu dzigo ganle guien luuw.

⁸ —¡Nend scaw! —rëb Pedr—. ¡Per naasi gon gnedzd naa diidz quiib luu ni naa!

Dzigo rëbchaa me:

—Griee lod sca ygab luu xnëz naa, telne siguield luu quiib naa ni luu.

⁹ Horco pquiab Simón, rëb Simón:

—Bzhiguiel sca, niinagazh bdiib ni naa, per led loxaque nidse naa, sinque dib nia naa, dib guic naa bdiib.

¹⁰ Dzigo rëbchaa me:

—Zha ne gozle, nise zho riar; sac mbele zho. Scaque to nagon, mbele to grë to. Grë to rne naa, niicle ne led gzadpaa to mbe.

¹¹ Sca rëb me, sac rienle me cho tsieto me.

¹² Blozhse bdiib me ni no, wbiire wbix me xab co me, bzob me lo mezh; dzigo në me lo no:

—¿Pe bien to na pe nacre znu bdiib naa ni to? ¹³ Golwi ganle: To lëë, Maestro rnee to lo naa, ni rnee to naa nac men rnabey; ni nonguiela gon, sac ne nligaa scaw.

¹⁴ Golgan sca, niicle ne maistr naa, niicle ne naa nac men ne rnabey, per laa naa bdeed zig tib ngundziin win bdiib naa ni to. Nana sca, scaque golgac lo samiech to. ¹⁵ Laa naa blule lo to zha gun to, nana sca goltsienal min co. ¹⁶ Gneli naa lo to ganle, lo grë zha ne nac ngundziin, tsod zha ne nonraa lo zha ne rnabey zho; scaque grë zha ne rie mandad, tsod zha ne nonraa lo zha ne rxeel zho. ¹⁷ Laa to nanlew nasca. Gacxe waa, telne tsienal to wseed rii, zaacse gac lo xquielmban to.

¹⁸ 'Golquiaadiag ganle, grëse mine none naa nu, led par grëde tow. Naa bzooblo to, nanween naa zha nac to tib tib to, ni nanween naa zha rnee lo Xtiidz Dios, rneew: “Lëëque tib zha ne rownie naa, grieequia tsielo naa ladznia zha ne gut naa.” ¹⁹ Laaw rnegazh naa lo to niina, zeena zeene gaca, gliladz to ganle ne nli naa nac men ne rne naa nac naa. ²⁰ Ni golgona ganle, grëse zha ne ycaania Espiritu Sant,

men ne cxel naa, naale ga nocaania zho; ni zha ne rcaania naa, ye le men ne pxeel naa ga rcaania zho.

Rëb Jesús ne Judas nac zha ne tsieto me
(Mt. 26:20-25; Mr. 14:17-21; Lc. 22:21-23)

²¹ Horco psilo rlupaa mban goc zdoo Jesús, dzigo bneeli me lo no në me:

—Gneli naa lo to ganle, lëëque tib to gon tsielo naa ladznia zha ne gut naa.

²² Zeene bdzion no sca rnee me, psilo no rwilolsa no, rien no dien cho nac zha ne rzeet me ga.

²³ Cuepaa me, ga zoob naa (rleynie me naa niicle ne raguiald naaw); ²⁴ dzigo blunia Pedr lo naa, gnabdiidz naa lo me dien cho nac zha ne rzeet me ga. ²⁵ Nacre wbig gax naa, bnabdiidz naa lo me.

²⁶ Dzigo nëchaa me:

—Laa naa cobie tib lë quietxtil, ni lo zha ne gan luu gded naa quietxtil co, lëë zho ga.

Dzigo bzhen me tib lë quietxtil, blozhse bloobie me quietxtil co, laa me bdeeda lo Judas. ²⁷ Zigne bnaaz Judas quietxtil co, laa mendox bzëëb zdoo Judas. Dzigo rëbchaa Jesús lo Judas:

—Mine no guic luu gun luu, na zeen nawdzegazh beena.

²⁸⁻³⁰ Zigne blozh dow Judas quietxtil co, lëëlëd brieë Judas ley; pcowle liuw.

Lo grë no ne zioobnie no me lo mezh ga, ni tib no biend pe nacre sca rëb me lo Judas. No zho nan bod no pe ncuaane rquiin lo lni co, rxeel me Judas tsiesi Judas, o nogaa pa tsiesan Judas palal dimi lo grë zha ne guien pe yquiin; sac Judas nac zha ne ngotsow bziuud win ne no dimi.

³¹ Gonse Jesús laa Judas brieë ley, dzigo nëchaa me lo no:

—Niina nagon bdziñ dze zeene glu ganle zha nroobtaa guielndzon ne rap Mgui ne pxeel Dios, ni ga glu ganle pa lotaa nac guielndzon ne rap Dios. ³² Ni scaque Dios, zlu me ganle pa lotaa nac guielndzon ne rap Mgui ne pxeel me ga. ³³ Xin yeena, ¡zhile cuëz naa lo to nu! Squiguib to naa, per zigne rep naa lo grë zha Israel co, laaw rneque naa lo to niina: Griee lod sēnal to zaatne ga naa. ³⁴ Gane laa naa rsan tib diidz cub rii, ni laa naa rnabey to gun tow: Tib tib to, golleynie zha ne nacgrë to,

golgantsi zho. Zigne rleynie naa to, sca golleynie zho. ³⁵ Zeene gan miech, ne nligaa dib zdoo to rleynie to samiech to, dzigo zien zho xpëedscuel naa nac to.

Ible ziab Pedr runbeyd Pedr Jesús

(Mt. 26:31-35; Mr. 14:27-31; Lc. 22:31-34)

³⁶ Dzigo bnabdiidz Pedr lo Jesús, rëb Pedr:

—Maestro, ¿pa dzigo nac zaatne tsie luu? Dzigo rëbchaa me:

—Zaatne ga naa, grieelod sēnal luu ni-inagazh; per ib laa luu no guiaadnal.

³⁷ Pquiab Pedr, rëb Pedr:

—¿Per pe nacne grieelod sēnal naa zhits luu niina? ¿Sēnal naa zhits luu gon, niicxe maase gut zho naa waa!

³⁸ Dzigo rëbchaa me:

—¿Goon csaand luu naa ye Pedr, niicle gut zho luu? Nlid ga gon. Gneli naa lo luu ganle, zeene laa gall ycuedz tsonle vuilt rëb luu runbeyd luu naa.

14

Niapse por Jesús gdziñ miech lo Dios

¹ Tsoode to zhgab, tsoode to guieñe. Tiblique golgun guic to, zigne dib zdoo to riladz to Dios, scaque dib zdoo to golliladz cho nac naa. ² Golgona ganle: Zaatne nac lidz Pxoza naa, ndaldoo zaatne cuëz miech no ga, tel niaca mine guiend zaatne cuëz to, nile naaw lo to na. Gacxe waa, niina laa naa ga, gazhixcuaa naa zaatne cuëz to ga. ³ Ni zeene lozh gzhixcuaa naa zaatne cuëz to, hor co laa naa gbire guial stib, dzigosi laa to sēnal zhits naa; zeena tibaque zaatne gbiaaz ne. ⁴ Laa to nanle nasca pa lo ga naa, ni nanlegaa to nëz ne.

⁵ Pquiab Mazh rëb Mazh lo me:

—Maestro, peleñ nëz na gacndion no, ni per ni zaatne tsie luu ndiond no.

⁶ Dzigo rëbchaa Jesús:

—Naa nac nëz co, naa rseed miech mine nac diidzli, ni naa rded tib guieñmban ndzon ne ib gdzind dze lozh. Lo grëse miech, zha ne gliladz cho nac naa, zha co gdziñ lo Pxoza naa; guiendraa stib mod ne gdziñ zho lo me. ⁷ Telne runbey to naa, dzigo runbeyaue to Pxoza naa. Ni runbeylegaa to me, sac tibaue ran to me.

⁸ Dzigo rëbchaa Lip lo me:

—Bzhiguiel mazd blu Pxoza luu lo no. Totsaque dzian no me, lëlew ga dzigo.

⁹ Pquiab Jesús, rëb me:

—Blactaale dze ga name Lip no naa lo to, ni gardaque ye gunbey luu naa. ¿Grëse zha ne ran naa, lëewue Pxoza naa ga ran zho! ¿Zha nac dzigo ne racladz luu glu naa me lo to? ¹⁰ ¿Niacxe riladz luu dzigo ne tibaue nac no grop no Pxoza naa? Grëse mine rseed naa to, led guicd naa riaba; grëse ncuaane run naa, me rnabeya, me runa sac tibaue nac no grop no me. ¹¹ Golliladz sca ne tibaue nac no grop no Pxoza naa. Telne goon riladzdgaa tow zigne rnee naa lo to nu, siquier lo grë dziin ne nodziun no, ga golgan ganle ne nli tibaue nac no grop no me.

¹² Ne nligaa, gneli naa lo to ganle: Grëse zha ne riladz cho nac naa, ye zho zun zho grë milagr ne run naa, ni haxta nroobraa ncuaane gun zho; sac tel naa, laa naa no guia zaatne no Pxoza naa. ¹³ Ncuaane gnabtaa to lo Pxoza naa, totsaue glu to ne nli riladz to naa, zun naaw; zeena ga gan miech ganle me nac men ne mazdraa nroob, me nac men ne mazdraa non. ¹⁴ Ne nligaa, telne rnalo to naa, ncuaane gnabtaa to zun naaw.

Sxeel Jesús Espiritu Sant

¹⁵ Telne nli rleynie to naa, golgun grë mine rnabey naa to sca. ¹⁶ Scagaa naa, laa naa gnab lo Pxoza naa cxeel me tib men ne tibaue gacniñ to, tibaue cchoobladz zdoo to; ib gdzind dze ne csaan me to. ¿Lëew men co ga nac Espiritu Sant, men ne rlu pa min nac diidzli; ni ible sxeel Pxoza naa me! ¹⁷ Zha ne ngabd xnëz naa, grieelod ycaania zho me, sac ran zho me niicle runbeyd zho me; sanue to, runbey to me sac me quianap to niina, ni zbëzga me zdoo to.

¹⁸ Ib csaanladz naa to, zbire naa guial naa lo to stib. ¹⁹ Nli zhilew, zeene gandraa grë miech naa, sanue to gon bii zan to naa; sac zriebaan naa, ni scauegaa to zgaa to tib guieñmban ndzon ne gdzind dze lozh. ²⁰ Gal dze co, zeene gan to laa naa grieban, ga gliladz to ganle ne nli tibaue nac no grop no Pxoza naa, zigne tibaue nacnie naa to ni nacniegaa to naa. ²¹ Zha ne runbey zha nac grë mine rnabey naa, ni rban zhow zigne naca, ga rlu ne nli rleynie

zho naa; ni zigne rleyne zho naa, scaque Pxoꝝ naa zleyne me zho; niicle naagaaw zleyne naa zho, ni zlu naa lo zho ganle cho nac naa.

²² Dzigo pquiab Judas (zhaa Judas Iscariot), rëb Judas lo me:

—¿Pe nac waa lose no glu luu cho nac luu? ¿Telzhe grëraa miech waa?

²³ Pquiab me rëb me:

—Zha ne run mine rnabey naa, lo zha co glu naa cho nac naa; sac rlu zho ne nli rleyne zho naa. Ni haxta ziaad no grop no Pxoꝝ naa gbannie no zho; sac zigne rleyne zho naa, scaque zleyne me zho. ²⁴ Saꝅue zha ne rund mine rnabey naa, ¿zha dien glu naa lo zho cho nac naa? Sac rlu rleyne zho naa. Gol̄soladz ganle: grëse diidz ne ron to rne naa, led guicd naa riaba, xtiidz Pxoꝝ naaw. ²⁵ Laa naa rne grë min̄ rii, laga bii zo naa lo to nu, ²⁶ per zeene laa Pxoꝝ naa cxeel Espíritu Sant men̄ ne guiaad cchoobladz zdoo to (men̄ co guiaad xcuent naa), men̄ co lozh cseed to, ni gun̄soladz me to grëse mine bne naa lo to.

²⁷ 'Laa naa guia, per laa naa rsan̄ tib guiel̄bley zdoo to, zeena zigne tibliladz rac zdoo naa, scaque tibliladz gac zdoo to. Sac guiel̄bley ne rnedz naa lo to nu, nacda zig nac guiel̄bley ne run̄bey grëraa miech guidzliu rii. Tsoꝛde to zhgab sca, niicle gdziebde to. ²⁸ Laa to binle ganle, laa naa no guia lo Pxoꝝ naa per zbire naa guidā naa lo to stib. Tel̄ne nli rleyne to naa ine nley gol̄gac, niina ne ron to laa naa guia lo me, sac gon̄ men̄ nroobraa nac me lo naa. ²⁹ Laa naa rne grë min̄ rii lo to niina, zeena zeene gaca, ga lozh guien̄ to ganle cho nac naa.

³⁰ 'Led nroobdraa sodiidznie naa to, sac ile ziaad men̄dox, men̄ ne rnabey lo guidzliu rii. Peet grielod gun̄ men̄dox naa, ³¹ per ible none gon naa xtiidz Pxoꝝ naa men̄ ne pxeel naa, zeena gan̄ miech ganle ne nli rleyne naa me. ¡Gol̄tsieso nasca, zeena zio ne!

15

Jesús nac zig tib lbë uv

¹ 'Naa nac zig tib zhan lbë uv, laa to nac zhicwa, laa Pxoꝝ naa nac zig tib zha ne quianapa. ² Grëse zhicw lbë co mine rquiad nex lo, rchug mew; laa grë mine rquia nex

lo, ine rsan̄mbe me low, rbelaan me low zeena yquiaraa nex low.

³ 'Zig nac to gon̄, laa Dios psan̄mbele to sacne zienal̄ to grë xtidz naa mine pseed naa to. ⁴ Gbichede to lo naa sca, sinque tibaque gol̄gacnie naa zigne nacnie naa to. Gol̄gan̄ ganle, zig nac tib zhicw lbë uv, peet nex grielod yquia low tel̄ne tibnëzle nixa; scaquegaa to nagon̄, grielod gun̄ to grë ncuane rdziladz naa, tel̄ne nacniede to naa. ⁵ Gol̄soladz ganle: Naa nac zig nac lbë co, laa to nac zhicwa. Zha ne tibaque gacnie naa, grëse ncuane gun̄ zho zdziladz Diosa; ⁶ sac tel̄ piche zho lo naa, laa zho nacle zig tib zhicw lbë co mine nixle tib nëz, laaw nixle ga, ga gbidza; lozh ga laaw tsec. ⁷ Tel̄ne tibaque gacnie to naa, ni tibaque tsoxco to grë mine pseed naa to, dzigosi ncuane gacladztaa to gol̄naba, ni scagaa scaania tow.

⁸ 'Gol̄lu sca ne nli xpëedscuel naa nac to, gol̄sannon Pxoꝝ naa, niapse ncuane rdziladz me min̄ co gol̄gun̄.

⁹ 'Ne nligaa rleyne diox naa to. Gol̄wi ganle, zigne rleyne Pxoꝝ naa naa, scaque rleyne naa to. Gol̄guien̄ sca tibaque gol̄gun̄ mine rnabey naa. ¹⁰ Sac gon̄, zha ne gun̄ mine rnabey naa, gzataa dze zleyne naa zho; sac sca rleyne Pxoꝝ naa naa ne run̄ naa mine rnabey me. ¹¹ Laa naa rzet min̄ rii lo to, zeena guiaad tib guiel̄bley zdoo to. Ne nligaa, zeena guiaad tib guiel̄bley nroob zdoo to; ni naa gnedz guiel̄bley co lo to.

¹² 'Laa naa rnabey to, laa naa rnab lo to: ¡Gol̄leyne samiech to, zigne rleyne naa to! Tel̄ naa, gol̄guien̄ ganle pa lotaa rleyne naa to, ¹³ sac led lega gdeedse tib zha xquiel̄mban zho par csilaa zho samiech zho, sinque ga rlu zho ganle pa lotaa rleyne zho zho.

¹⁴ 'Ni to gon̄, tel̄ne gon to grë mine rne naa lo to, dzigosi nli rleyne to naa. ¹⁵ Led yedraa niina nac to zig tib ngun̄dziin, sac zha ne nac ngun̄dziin nand zho pe run̄ men̄ ne rnabey zho. Ne nligaa rleyne naa to, sac grëse mine rnabey Pxoꝝ naa, grëse zigne rnee me, laaw bzodiidzle naa lo to. ¹⁶ Gol̄guien̄ ganle, led tod gon̄ bzooblo naa, sinque, ¡naa bzooblo to! Ni laa naa bzooblo to zeena gun̄ to niapse ncuane rdziladz

Dios; dzigosi ncuaane gnabtaa to lo Pxo_z naa, ne nac to zha ne no xnëz naa, zneedz mew. ¹⁷ Laa naa rso diidz lo to: Golleynie samiech to. ¹⁸ Niicle rlëë zho ran zho to, golsoladz ganle, desde naa squi rlëë zho ran zho. ¹⁹ Rlëë zho ran zho to, sac laa naa bleele to lad zho, zienaldraa to ncuaane rleynie zho; laa telne nagon bii nac to zigne nac zho, dzigosi zëëb gleynie zho to. ²⁰ Golsoladz ganle, zeene znu ni naa lo to: ¡Tsod ngundziin ne ndziibsraa non lo zha ne rnabey zho! Tel naa, pqui anal miech naa, ¿pe lel to dzigo gandze zho? Nana, zigne brieequiagaa palal zha ne bliladz xtiz naa, scaque zrieequia zha ne yquiaadiag mine gnee to.

²¹ Ible squi anal miech to ne nac to zha ne ngab xnëz naa, sac runbeyd zho Dios men ne pxeel naa. ²² Tel niaca mine niald naa, niicle ned naa lo zho, zac guiab ne peet xtold zho, sac rienz zho pe run zho. Per na gon, guienz pe yquiaaqui zho; sac bial naa bne naa lo zho. ²³ Zha ne rlëë ran zho naa, yele Pxo_z naa ga rlëënie zho. ²⁴ Ne nligaa telne niaca mine niand zho grëtaa milagr nroob ne run naa, zac guiep naa peet xtold zho; per na gon, blactaa milagr ne gon zho ben naa, ni laa zho bii rlëë ran zho no grop no Pxo_z naa. ²⁵ I nagon norieequia mine raquiet lo Xtiidz Dios, zaatne znu rnee: “Peet guielntseeb quiayund naa lo zho, per rlëënie zho naa.”

²⁶ 'Laa naa nile lo to ganle, ible sxel naa Espiritu Sant gacnie to, niapse diidzli rnee me. Lo Pxo_z naa grie me guidaad me, me cchoobladz zdoo to, ni me gneedz guielbiini lo to lozh guien to cho nac naa. ²⁷ Ni scagaa to, ye to laa to none sodiidz lo grëraa miech gacnan zho cho nac naa; sac gon tibaque bzënie to naa desde ne psilo naa xtsin naa.

16

¹ 'Laa naa rne grë min rii lo to zeena peet tsienied guic to, tibaque dib zdoo to gnalo to naa. ² Sac gon zunxoon zho to, zbee zho to yadoo; ni dzin dze haxta zut zho to, sac masaque sac zho lëë mine racladz Dios ga noyun zho. ³ Laa zho gon grë min co, sac niicle Pxo_z naaw, niiclegaa naaw, runbeyd zho no.

⁴ 'Laa naa rzodiidz grë min rii niina, zeena zeene gal dze ne laaw noyac, csoladz to ganle grësew bzodiidzle naaw lo to. Bzodiidz naaw lo to glo, sacne hor co laa naa bii zo lo to. ⁵ Laa niina nagon laa naa gbiche lo to, laa naa gbire guia lo men ne pxeel naa, per ran naa ni tib to zienied guic gnabdiidz dien pa nac zaatne ga naa, dien pe nacgaa ne laa naa ga. ⁶ Lëë gdib mine run to, riab guielnë to ron to grë mine rne naa nu.

⁷ 'Gneli naa lo to ganle: Mazd wen gon tsie to zeene laa naa guia lo men ne pxeel naa, sac telne cuëz naa nu, grielod guidaad men ne guidachoobladz zdoo to ga. Sangu telne guia naa, dzigo naazhal cxel me. ⁸ Ni zeene laa me guidaad, me gunquien miech ganle grëse zho zha ngoopdol nac zho, me gunquien zho zha laa zho lo dol co guiaanwen zho lo Dios, ni guien zho ne nli dzin tib dze zeene laa Dios gun xquielwxtis me. ⁹ ¿Pe nacne nac zho miech ngoopdol? Miech ngoopdol nac zho, sacne riladzd zho cho nac naa. ¹⁰ ¿Zha grielo laa zho lo dol co guiaanwen zho lo Dios? Zrielow, mincocxe waa nacne bial naa, ni na laa naa guia zaatne zob Pxo_z naa, gandraa to naa. ¹¹ ¿Zha rlu ne nli zun Dios guielwxtis? Nli zun mew, sac gon laa me bnabeyle zha nac grë guielnëdox ne ygaa mendox, men ne quianabey lo guidzliu rii.

¹² 'Nzianraa ncuaane racladz naa sodiidz naa lo to! Per rien naa grielod tsoguc to zha naca niina. ¹³ Zeene guidaad Espiritu Sant, me gneedz guielbiini lo to guien to grëraa ncuaane no gacnan to, ni grëgaa ncuaane naraa gac. Niapse diidzli gnee me, sac led guicd me guiab grë mine gnee me, sinque mine nac xtiidz Pxo_z naa, min co gnee me. ¹⁴ Ga glu me lo miech ganle ne nli men nroob, men non nac naa. ¹⁵ Rne naa ga glu me, sac grëtaa ncuaane rnabey Pxo_z naa, yeque naa rnabeya. ¹⁶ Zhilew zeene laa naa gbiche lo to gandraa to naa; per gacdaquew xtse zeene laa to gbiirelaque gan naa stib.

¹⁷⁻¹⁸ Zeene bdzion no sca rnee me, blalaa no psilo no rnabdiidzlsa no rnee no:

—¿Bay zha nacne squi rnee me? ¿Zha nacne rnee me, zhilew dzianndraa ne me, per gacdaquew xtse laa ne dzianlaque lo me

stib? Ni rneeque me laa me guey lo Pxoꝛ me.

¹⁹ Bien me racladz no gnabdiidz no lo me, dzigo nē me lo no:

—¿Racladz to lēē gacnaꝛ to zha nacne znu rne naa? ²⁰ Goꝛquiaadiaga sca gaꝛle: Zeēne gdziꝛ dze co, laga noyoon to no to guielnē ne laa naa biche lo to, laa grēraa miech haxta zley zho ne laa naa wbiche lo zho. Nli nroob guielnē ne tso to, per zeēne laa to gaꝛ naa stib, guielbley nroob ne tso to. ²¹ Nac cuent rii zig rzac tib meꝛ wnaa ne ral xpēēd. Glo yoob ro, yoobdox ne rquia me, per deque laa mēēd co ralse, ni rsoladzdraa me yoob co; sac mazdraa nroob nac guielbley ne rio me raꝛ me laa xpēēd me blanso lo guidzliu. ²² Scadaa nagon rzac to, nli mban rac to niina, per zeēne laa to gaꝛ naa stib, dzigosi tib guielbley nroob ne tso to, ni choot grieelod ctiche guielbley co lo to.

²³ 'Zeēne gal dze co, yquiindraa to pe gnabdiidz to lo naa. Ncuaane gnabtaa to, lo Pxoꝛ naa gnab tow, ni zneedz mew, sac xnēz naa ngab to. ²⁴ Haxta lo nadze peet gard gnab to, niicle ne xnēz naa ngab to; laa niina laa naa rne lo to ncuaane rquiin to gonaaba lo me, ni ible zneedz mew goꝛ. Nroob guielbley ne tso to hor co. ²⁵ Nzian grē ncuaane zine naa lo to, rned naaw clar; per laa dze bdziꝛ zeēne grēse ncuaane gne naa, clar gne naaw lo to, zig nac zeēne gzet naa Pxoꝛ naa. ²⁶ Ni zig nile naa ga, hor cosi ncuaane gnabtaa to lo me, zneedz mew, sac xnēz naa ngab to. Yquiindpaa gne naa lo me gneedz me ncuaane gnab to lo me, ²⁷ sac ye me rleyne me to. Rleyne me to, sac goꝛ rleyne to naa ni riladz to ne nli lo me brie naa bial naa lo guidzliu. ²⁸ Ni nligaa, lo me brie naa bial naa lo guidzliu; ni niina ne laa naa gbi, loque me gdziin naa.

²⁹ Dzigo rdzieets no lo me:

—¡Nasi nagon rien no zha rnee luu! Sac clar rnee luu, rneedraa luu zigne rnee luu glo. ³⁰ Nasi rien no grēse ncuaane nan luu, sac zig nac niina pquiindpaa nabdiidz no lo luu. Gacxe waa, nasi nagon riladz no ne nli lo Dios brie luu.

³¹ Pquiab me, nē me:

—¡Wen ga telne riladz to niina cho nac naa! ³² Per lēē hor co nagon bdziꝛ; ni niina, grēse to laa to csaan naa, tib tib to zhaase zhaase nēz ne xeꝛ to. Per guiaand naa loxaque naase, sac tibaque nacnie Pxoꝛ naa naa. ³³ Grēse ncuaane bne naa lo to nu, laaw bne naa zeēna peet tsienied guic to, benque nanle to gaꝛle tibaque nacnie naa to. Parga nli, laga no to lo guidzliu rii, nzian grē guielnē ne ted to, per gdziebde to; sac goꝛ naa rnabey, lадznia naa no grētaa ncuaane no lo guidzliu.

17

Rnab Jesús gacnieꝛ Dios xpēēdscuel me

¹ Blozhse sca nē me lo no, blis lo me bui me nēz gbaa.

—Dios, luu ne nac luu Pxoꝛ naa —rēb me—, niina nagon laa dze co bdziꝛ. Blu gaꝛle meꝛ nroob nac naa ne nac naa Xpēēd luu, zeēna ga glu naa lo miech gaꝛle pa lotaa meꝛ nroob nac luu. ² Zigne psan luu grēse miech lадznia naa, ni gdeed naa tib guielmban ndzon ne gdziꝛ dze lozh lo grēse zha ne bneedz luu ngab xnēz naa; scaque niina blu gaꝛle meꝛ nroob nac naa. ³ Lēē guielmban co ygaa grēse zha ne gunbey luu, ne nli luuse nac Dios nguia mban, ni guien zho cho nac naa, ne pxeel luu naa bial naa lo guidzliu rii. ⁴ Grēse ncuaane bnabey luu naa, laaw noyun naa; ni ga rlu naa lo grē miech rii gaꝛle pa lotaa meꝛ nroob nac luu. ⁵ Scagaa luu ne nac luu Pxoꝛ naa, niina ne laa naa glanso lo luu, blu gaꝛle meꝛ nroob nac naa; sac desde mazd glo zeēne gard tsa grētaa ncuaane no, tibaque nac lo guielndzon ne bdzio ne haxta dze ne blanso naa lo guidzliu rii.

⁶ 'Grēse zha ne ble luu lad grē miech rii bneedz luu lo naa, laa naa pseed zho gunbey zho luu; ni scagaa zha, bliladz zho xtiidz luu. Chen luu zho per laa luu bneedz zho lo naa. ⁷ Zig nac niina, grēse ncuaane bneedz luu lo naa, nanle zho ne luu bneedza, ⁸ sac pseed naa zho grēse wseed ne bneedz luu lo naa, ni bliladz zhow. Wen wen gocnaꝛ zho ne lo luu i brie naa zial naa lo guidzliu rii, ni riladz zho ne luu pxeel naa. ⁹ Laa naa rnab lo luu gacnieꝛ luu zho. Rnabd naa par grēse miech guidzliu rii, sinque laa naa rnab

por grë zha ne bneedz luu lo naa; sac gon chen luu zho, ¹⁰ ni zha glu ganle pa lotaa men nroob nac naa. Grëse zho chen luu zho; sac grëse ncuane nacchen naa, chen luuw; ni grësegaa ncuane nacchen luu, chen naaw. ¹¹ Rien naa, led nroobdraa cuëz naa lo guidzliu rii, laa naa gbile guial naa lo luu i; per zha, laa zho guianaque nu. Gane niina, luu ne nac luu PxoZ naa, luu ne nac luu tib men ne guien d xtol, laa naa rnab lo luu: pquianap zho ne nac zho zha ne bneedz luu lo naa, zeena ni tib zho nitlod, sinque tibaque gac zho gza zho zigne tibaque nacne grop ne. ¹² Len dze ne blëz naa lo zho nu, zigne racladz luu sca pquianaap naa zho. Ni scagaa ni tib zho bnitlod; zha ne bnitlo ga, nole ne sca nitlo zho, zeena sca griequia mine raquiet lo Xtiidz luu.

¹³ 'Zhilew laa naa glanso zaatne no luu i; per len dze ne blëz naa lo zho nu, nzian grë ncuane bne naa lo zho, zeena ye zho tso guiebley nroob ne no naa. ¹⁴ Pseed naa zho mine nac xtiidz luu; per na rlëë grëraa miech ran zho zho, sacne zienaldraa zho grë ncuane ndzinlid ne rac lo guidzliu rii. Nac zho zigne nac naa, rleynie naa grë ncuane co. ¹⁵ Per rnabd naa cuee luu zho lo guidzliu rii, sinque laa naa rnab csaand luu gun zho ncuane racladz mendox. ¹⁶ Sac niicle zhaw, niicle naaw, choot zionald grë ncuane ndzinlid ne rac lo guidzliu rii. ¹⁷ Bzhiguiel sca bdeed guiebiini lo zho guien zho zha nac Xtiidz luu, sac Xtiidz luu nac diidzli; zeena dib zdoos zho tsoxco zho gban zho zigne rnabey luu. ¹⁸ Sac gon, niina laa naa rxel zho lo grëraa miech guidzliu rii, zigne ne pxeelaque luu naa. ¹⁹ Ni niina, dib zdoos naa laa naa gun mine rnabey luu, zeena ye zho guien zho none dib zdoos zho gun zho mine rnabey luu.

Rnab Jesús por grë zha ne yabraa xnëz me

²⁰ 'Laa naa rnab gacnien luu zho, ni gacnien luu zha ne naraa gliladz naa, zeene laa zho tsieseed zho; ²¹ zeena tibaque gac zho, zigne tibaque nac ne grop ne. Ni scaquegaa gacnie zho ne, zeena gliladz grëraa miech ganle ne nli luu pxeel naa. ²² Laa naa psannon zho zigne psannonaque

luu naa, ni tipse gac zho zigne tibaque nac ne grop ne. ²³ Zigne nacnie luu naa, scaque nacnie naa zho. Bzhiguiel gocnien zho, tibaque gac zho grëse zho, zeena gan grëraa miech ganle ne nli luu pxeel naa, ni guien zho ganle zigne rleynie luu naa, scaque tibaque rleynie luu grëse zha ne ngab lo naa. ²⁴ Papá, grëse zha ne bneedz luu lo naa nu, racladz naa ye zho guiaad zaatne glanso naa i, zeena gan zho lo grëtaa guieindzon ne no naa. Lo guieindzon ne bneedz luu lo naa, sac rleynietaque luu naa haxta zeene gard tsaaguidzliu.

²⁵ 'Papá, luuse nac men ne rapd ni tib dol, niicle ne runbeyd grë miech rii luu, sangue naa runbey naa luu; ni scaquegaa grë zha ne bneedz luu lo naa nu, nanle zho ne luu pxeel naa. ²⁶ Laa naa pseedle zho gocnan zho cho nac luu ni bü seedragaa naa zho, guien zho ganle pa lotaa rleynie luu naa; zeena scaque guien zho gleynie zho samiech zho, ni gacnie zho naa.

18

Bnaaz zho Jesús

(Mt. 26:47-58; Mr. 14:43-50, 53-54; Lc. 22:47-54)

¹ Zeene blozh bnab Jesús lo Dios, laa me brieenie no ga bdieedquia no nëz dan ro psë ne rnee zho Psë Cedron. Ga no tib zaatne zëeb niapse yag nex, dzigo ga bliaaz no gza no me.

² Judas zha ne pto me ga, wen wen runbey Judas lugar co, sac nzian vuelt ziyenie me no ga. ³ Dzigo zeene laa Judas blanso ga, laa Judas blansoniele tib dzoos menguib, ni zla zha ne rquianap yadoo; no guierbel nia zho blanso zho ga, zha ne nzhen yag, zha ne nzhen gaa spad. (Lëë grë zha co pxeel grë pxoz rnabey, ni grë zha farisé.) ⁴ Loxaque blanso zho, laa Jesús brieequiale, rëb me lo zho:

—¿Cho rguib to?

Sca rëb me sac rienle me pe nacne zie zho ga, nanle me pe nac grëtaa ncuane ted me.

⁵ Pquiab zho, rëb zho:

—Men Nazaret ne lë Jesús, men co ziaadguib no.

Dzigo rëb me:

—Naa nac men co, tel me ziaadguib to.

⁶ Zeene bin zho rëb me: “Naa nac men co”, wbiire rzhitsaque zho, grëse zho biab liu. Ye Judas no lad co. ⁷ Wbiire Jesús bñabdiidz me lo zho, rëb me:

—¿Cho zho rguib to?

Pquiab zho rëb zho:

—Men Nazaret ne lë Jesús, men co rguib no.

⁸ —Laa naa nile lo to —rëb me—. Naa nac men co. Telne naa ziaadguib to, golsaan sca guey grë zha ne zo lo naa nu.

⁹ Ga briequia xtiidz me zeene rëb me: “Lo grë zha ne bneedz luu lo naa, ni tib zho bñitlod.”

¹⁰ Laa Simón ney tib spad, hor co bdobaque Simón spad co psilaa me tib niaw, bliengaa me diag derech tib mgui lë Malcw. (Lëe mgui co quia xtsiin men ne nac pxoz nroob.) ¹¹ Zeene gon Jesús, rëbcha me:

—¡Blootsow spad qui Pedr! ¡Bien ganle Pxoz naa rnabey znu teed naa! ¿Niacxe gond naa mine rnabey me naa dzigo?

¹² Horco laa grë menguiib co, grë zho zha ne rnabey lo zho, ni grë zha ne rquianap yadoo ga, laa zho wbigbe bnaaz zho me. Blozhse bzobdoo zho me, laa zho zienie me.

¹³ Sca nzobdoo me, laa zho bdzinnie me lidz men ne lë Anás, pxozdzoop Caifás. Caifás nac pxoz nroob len iz co, ¹⁴ ni me ga rëb lo grë men non lo zha Israel, ne mazd wena tibaque zha ne ygaa guet, quizh zho par dib guiedz.

Rëb Pedr runbeyd Pedr Jesús

(Mt. 26:69-70; Mr. 14:66-68; Lc. 22:55-57)

¹⁵ Zhiits co, ga nal no grop no Pedr. Ni ne runbey naa Caifás men ne nac pxoz nroob ga, zeene bdzin no ro lidz Anás, loxaque naa brieelo bzëeb nëz ley. ¹⁶ Laa Pedr, zaatne nactaa ro yu par gdzin zaatne nac ley, gataa biaan Pedr. Nacne brieque naa bnee naa lo wnaa ne zonap ro yu, dzigoraa bdeed wnaa co diidz bzëeb Pedr. ¹⁷ Dzigo rëbcha me lo Pedr:

—¿Bod ye luu dzigo lëe nac xpëedscuel men ne bdzinnie zho i?

—Coo, led yed naa —rëb Pedr.

¹⁸ Grë zha ne quia xtsiin men co ni grë menguiib ne ndxie ga, laa zho bzëegle gui. Grëse zho, laa zho ndxiedzëe lo gui ga, sac

rac nal. Ye Pedr bdzin lo zho ga nodzëe Pedr.

Rquiep Anás Jesús

(Mt. 26:59-66; Mr. 14:55-64; Lc. 22:66-71)

¹⁹ Laa nëz len yu, laa Anás psilo noquiep Jesús dien yo grë xpëedscuel me, ni dien pe nac grë wseed ne nolu me lo miech.

²⁰ Dzigo pquiab Jesús, rëb me:

—Grëse miech, nanwen zho ganle pe nac zhiwseed naa. Sac zeene pseed naa zho, bend naa ne ngeets zhlian nseed naa zho; sinque zaatne rcaalsa nzian miech, ga bne naa lo zho. No hor pseed naa zho len grë yadoo win, nogaa hor pseed naa zho len yadoo nroob ne zob lad guiedz nu.

²¹ Nana bod riegualda ne lo naa rnabdiidz luu. Mazd lo grë zha co ganle bñabdiidz, zha bin grëtaa ncuaane bne naa.

²² Loxaque blozh sca pquiab Jesús, zeene bias tib menguiib ne rquianap yadoo zo gax ga, bdap me lo Jesús.

—¡Bien ganle! —rëb me—. ¡Led squid gon none yquiab luu lo men ne nac pxoz nroob!

²³ Dzigo rëbcha Jesús:

—Telne rzac luu ben naa falt, bnë dien pe nac diidz ne pxin naa. ¿Te wal rdziladz luu ye, rguin luu zha ne rnee diidzli?

²⁴ Blozh ga scaque nzobdoo Jesús pxeel Anás me lo Caifás, men ne nac pxoz nroob.

Rnee Pedr stib runbeyd Pedr Jesús

(Mt. 26:71-75; Mr. 14:69-72; Lc. 22:58-62)

²⁵ Horco laa Pedr bii zodzëeque lo gui nëz ley. Dzigo wbiire zho bñabdiidz zho lo Pedr, rëb zho:

—¿Bod xpëedscuel men ne blansonie zho i lëe nac luu?

Laane neeli Pedr, lel pquiab Pedr rëb Pedr:

—¡Lëda! ¡Zha gaczhe naa xpëedscuel men qui!

²⁶ Ye tib zhalidz Malcw, zha ne pchug Pedr diag ga, laa zho zodzëe lo gui ga, sac ye zho quia xtsiin pxoz nroob co; dzigo rëbcha zho:

—Ni gon naa name, ye luu no lad zha ne zonie me len yag oliv ga.

²⁷ Wbiire Pedr rëb Pedr runbeyd Pedr me, ni lëetaque hor co laa tib gall pcuedz.

Güeynie zho Jesús lo Pilat

(Mt. 27:1-2, 11-14; Mr. 15:1-5; Lc. 23:1-5)

²⁸ Ziadyiinile liuw, zeene laa zho brieenie Jesús lidz Caifás, zienie zho me zaatne nac xyulow Pilat, men ne nac gobernador. Zeene bdziñ zho, ni tib zho bzëëbd len yulow, sac racladz zho quiits zho miñe rnabey xley lay zho; parne grieelo yquiiin zho guielwagw ne row zho lni Pascw co.

²⁹ Nacne brieie Pilat bnabdiidz Pilat lo zho, rëb Pilat:

—¿Pe nacne ziaadnie to men qui nu? ¿Pe rquiaqui to me?

³⁰ Pquiab zho, rëb zho:

—¿Por grëtaa guielntseeb ne noyun me, gane ziaadnie no me! ¿Telne niac me men ndzinli, niacxe lega guiaad-zo no me lo luu!

³¹ Dzigo rëbchaa Pilat:

—Golsënie me, tose golgunquizh me miñe been me; zigne nac xley to.

—Racladz no guetgazh me —rëb zho—. Ni nanle luu ganle, no ne nac no men Israel, grieelod ne nose gnabey guet tib miech.

³² Ga brieequia miñe bnee Jesús, zeene bzeet me ible zut miech me. ³³ Dzigo bzëëb Pilat len yulow, bnabey me gocredz Jesús. Dzigo bnabdiidz me lo Jesús, rëb me:

—¿Pe nli luu nac zhirey men Israel?

³⁴ —Ne squi rnee luu —rëb Jesús—. ¿Pe guic luu biaba, te no cho nëw lo luu ye?

³⁵ Pquiab Pilat, rëb Pilat:

—Nanle luu ganle led zha Israeld naa. ¿Pe nac sca ne ziaadnie zho luu nu? ¿Pe been luu? Sac gon zha ladzaque luu grë zho zha ne rnabey lo zhipxoz zho, zha biaadsan luu nu.

³⁶ Dzigo rëbchaa Jesús:

—Nli rey nac naa, per led lo guidzliu riida, telne niaca miñe lo guidzliu riw, dzigosi grëse zha ne nacnie naa niacntseeb zho, nsaand zho naaz zha Israel naa. Per na, zhaa zaatne nac naa rey.

³⁷ Pquiab Pilat, rëb Pilat:

—¿Rey luu dzigo lëe?

—Scaw gon —rëb Jesús—, nli rey naa; zigne rnee luu i. Ible miñ co nacne bial naa gol naa lo guidzliu rii, ni bial naa bialseed naa miech gunbey zho miñe nac diidzli. Ni zha ne zienal miñe nac diidzli, zha co ngab lo naa.

³⁸ —¿Diidzli ye? —rëb Pilat.

Bnabey Pilat tsiegut zho Jesús

(Mt. 27:15-31; Mr. 15:6-20; Lc. 23:13-25)

Zigne blozh sca rëb Pilat, brieie Pilat ga güeynee Pilat lo grë zha ne bdziñnie me ga, rëb Pilat lo zho:

—Ni tib dol gon rapd men rii. ³⁹ Per gzobse lni Pascw rii, rnab to rlaa cholze tib zha ne no ladzguiib. ¿Pe gnë to sca, mazd csilaa naa men ne nac zhirey to nu?

⁴⁰ Pquiabbe zho, rëb zho:

—¿Csilaad luu me! ¿Mazd psilaa Barrabás! Ni laa Barrabás tib ngbaan nac Barrabás.

19

¹ Zeene gon Pilat sca rac zho, dzigo bnabey Pilat bla menguiib, bdeed dooguid zho Jesús. ² Bzieecw zho bla lë yag guiets bzoob zho guic me, ni bgacw zho me tib lë lar nizhnie nlaan. ³ Dzigo psilo zho runnguzee zho me, nguiedz roptsie zho rnee zho:

—¿Bley na ganle, laa luu nacle zhirey zha Israel!

Ni rgap zho lo me.

⁴ Wbiire Pilat brieequia Pilat zaatne ndxie grë miech co, rëb Pilat lo zho:

—Golwi ganle laa naa cuee me, glu naa me lo to, per gacnan to ganle rieguald guet me; laa naa pquieple me rlu ni tib guielntseeb beend me.

⁵ Zeene laa Jesús brieequia, nzobguicse me coron yag guiets co, ni nacw me lar nizhnie co.

—Golwi na ganle —rëb Pilat—, lëe me nu.

⁶ Grë pxoz ne rnabey, ni grë menguiib ne rquianap yadoo, zeene gon zho me, psilo zho nguiedz roptsie zho rnee zho:

—¿None guet me! ¿Bnabey yquia me lo cruz!

Dzigo rëbchaa Pilat:

—¿Goltsienie me sca! ¿To golquiaa me lo cruz! Sangue naa, grieelod yquia naa me lo cruz; sac laa naa gonle peet guielntseeb beend me.

⁷ Pquiab zho rëb zho:

—¿Rdziaap no xley no! Ni ley co rnabey ib none guet me, sac rquidie me rnee me laa me nac Xpëed Dios.

⁸ Zeene bin Pilat sca rëb zho, mazdraa bdzieb me. ⁹ Dzigo bzëëbnie me Jesús len yulow stib, bnabdiidz me lo Jesús, rëb me:

—¿Bnë dien cho menpaa nac luu? ¿Pa nac ladz luu?

Per ib pquiabd Jesús lo xtiidz Pilat.
 10 Dzigo rëb Pilat:

—¿Pe nacne rquiabd luu? ¿Gon ganle naa rnabey, zrieelo csilaa naa luu, o gnabeyгаа naa yquiaa luu lo cruz?

11 Pquiab Jesús, rëb me:

—Nli luu nac zha rnabey niina, per telne niaca mine needzd Dios guielrnabey qui lo luu, grieelod ne luu gnabey zha gac naa. Mincocxe waa, zhi nac xtol luu, mazdraa nac xtol zha ne biaadlo naa nia luu.

12 Dzigo gocladz Pilat nsilaa me Jesús, per bzhiguield grë zha ne güeyсан me ga.

—Telne laa luu csilaa mgui qui gon —rëb zho—, rriequia dzigo ye luu rlëenie César. Sac gon, grëse zha ne racladz gac rey, lo César ga racndaan zho.

13 Zeene bin Pilat sca rëb grë miech co, bnabey Pilat briece Jesús nëz ley stib. Dzigo güeysob Pilat lo xcan ne zo ley co, zaatne rzob me run me guielwxtis. (Dipse ley co, niapse quie lag now; gane rnee zha Israela Gabata.) 14 Lëe dze vispr lni Pascw co ga nagon, zig grolle dzew noyac grë min co. Dzigo rëb Pilat lo zho:

—Laa zhirey to nu gon. ¡Golsënie me!

15 Psilo zho stib, nguiedz roptsie zho, rnee zho:

—¡Beetgazh men qui! ¡Bnabey yquia me lo cruz!

Rëbchaa Pilat:

—Zhirey to nac me, ¿ni racladz to ye gnabey naa yquia me lo cruz?

Pquiabbe grë pxoz ne rnabey rëb zho:

—¡Tibaque men ne nac zhirey no, ni lëe men co nac César!

16 Dzigotaa mazd laa Pilat bloo Jesús nia zha ne tsiequiaa me lo cruz.

Pquia Jesús lo cruz

(Mt. 27:32-44; Mr. 15:21-32; Lc. 23:26-43)

17 Zeene laa Jesús briece ga, rna tib cruz nroob ney me; laa zho zienie me. Bdziñnie zho me ro guiedz, zaatne rnee zho “Gui Beerguic Ngutoo”; 18 ga pquiaa zho me lo cruz. Ni pquiaa zho schop zha ntseeb, tibga zhiczuz zho bzo cue zhiczuz me.

19-20 Bnabey Pilat pquia bla lan diidz guic zhiczuz me, rneew: “LËË JESUS MEN NAZARET NU, MEN NE NAC ZHIREY ZHA ISRAEL.” Pquiaw xtiidz zha Israel, xtiidz zha Roma ni xtiidz zha Gres. Nzian zha

Israel gon sca quia guic zhiczuz me, sac gaxpaa ro guiedz nac zaatne pquiaa zho me lo cruz ga. 21 Nacne güey grë pxoz rnabey, güeylisqui zhow lo Pilat, rëb zho:

—¿Pe nacne pquiaa luu guic zhiczuz mgui co, ne me nac zhirey zha Israel? Pe gacd nquiaa luu: “Rnee me, me nac zhirey zha Israel.”

22 Pquiab Pilat rëb Pilat:

—Mine pquia naa, laaw pquiale ga. Ni sca none guiaana.

23 Laa grë menguiib ne pquiaa Jesús lo cruz ga, zeene blozh pquiaa zho me lo cruz, bzhen zho xab me been zhow tap lë, tib lëgaw biaan nie zho tib tib zho. Laa lar ne rbix me, tiblagaque naca, ndiibda; 24 dzigo rëbchaa zho:

—Minritaa nagon dziuungrold ne. Mine naca gotsaadzio new rif, dzigo zha ne grieequia zha co guiaanniew.

Ga briequia mine raquiet lo Xtiidz Dios, zaatne rnee: “Xab naa, mine racw naa nzian lë been zhow bgaaza lo zho; laa mine rbiix naa, bio zhow rif.” Ni scadaa been gza menguiib co.

25 Gax zaatne zo zhiczuz Jesús ga, zo blalaa men wnaa. Ga zo xniaa Jesús, zo tib bel xniaa me, zo Marí tsieel Cleof, ni Marí Magdal. 26 Gaxaque ga zo naa. Zeene gon Jesús xniaa me, ni gon me naa, rëbchaa me lo xniaa me:

—Been cuent nagon lëe xpëed luu i zo i.

27 Laa lo naa në me:

—Been cuent lëe xniaa luu i gon. Bzhiguiel luu gan me.

Dzigo desde dze co, pcaania naa xniaa me bianie naa me lidz naa, pteedlo naa me.

Gut Jesús

(Mt. 27:45-56; Mr. 15:33-41; Lc. 23:44-49)

28 Rienle Jesús ne gataa laa me psiaal dziin ne pxeel pxoz me me gun me, ni par grieequia grëse zigne rzeet lo Xtiidz Dios ted me, hor co bredz me rëb me:

—Rnab zhis naa.

29 Gax lo grë menguiib ne quianap me ga, ga zo tib cant win no nziu bla. Zeene bin zho sca rëb me, rias tib zho bgadz zho tib lë zhiil lo nziu co, bzoob zhow guic tib goobgui nool güeyquiaa zhow ro me.

30 Zeene bdziñ nziu co ro me, pquiin me niipa, dzigo rëbchaa me:

—Lëew nagon, nataa laaw bza.

Zeene blozh sca bnee me, znuse pquian-run guic me; laa me blozh.

³¹ Guini liu co nac tib dze ne mazdraa nda lo zha Israel. Nacne güey grè zha ne rnabey lo mengüedz güeynee zho lo Pilat, gnabey Pilat tsietiits zho gzhibni Jesús ni zha ne pquiagza me lo cruz ga, zeena guietgash zho lo cruz dze co; sac racladzd zho scaque quia zho lo cruz zeene laa dze nda co gdziñ.

³² Dzigo pxeel Pilat bla mengüiib. Zeene bdziñ zho, glose güeytiits zho ni tib zha ne quiagza Jesús lo cruz ga; blozh ga, güeytiitsaque zho ni stib zho. ³³ Zeene bdziñ zho zaatne zo zhicruz Jesús, gon zho laa me gutle; nacne bdiitsd zho ni me.

³⁴ Horco wbig tib mengüiib co, bliz zho xlanz zho ro xcuxti me. Zeene bdob zho lanz co, nis ne, ren ne brie ga.

³⁵ Naazhal gon znu been zho me. Laaw rne naa lo to zigne gocsew. Golliladza, sac ne nligaa diidzliw. ³⁶ Ga briequia mine raquiet lo Xtiidz Dios, zaatne rnee: “Ni tib dzit ne no me quiitsd zho.” ³⁷ Ni stib lugar, zaatne rnee: “Bii zanaque zho ganle cho nac men ne bliz lanz zho ga.”

Bgueets Jesús

(Mt. 27:57-61; Mr. 15:42-47; Lc. 23:50-56)

³⁸ Laa José, tib men Arimaté, zeene bin me laa Jesús gutle, dzigo güey me lo Pilat güeynab me diidzbey par grieelo tselit me xcuerp Jesús lo cruz. Ye me xpëedscuel Jesús nac me, per pxobnend me ne ye me nacgza Jesús; sacne rdzieb me grè men Israel ne rlëe lo Jesús. Dzigo bdeed Pilat diidzbey.

³⁹ Nicodem, men ne güeyzodiidznie Jesús ga tib pcow liu, ye me güeynal zhits José; güeynie me zig galptsiiptap kil tiblo zënex ne raa yaal ne lë mirr ni yaal ne lë áloe. ⁴⁰ Zeene blozh biet Jesús lo cruz, psilo zho bdëeb zho zënex co xcuerp me; blozh ga, pchel zho me tib lar nquits; sac sca rqueets grè men Israel zhingutoo zho.

⁴¹ Gax zaatne pquia Jesús lo cruz ga, niaa tib corral no niapse yag nex. Len corral co, ga ndieen tib baa tib cho quie, ni tib ngutoo gard ygueets len baa co; ⁴² dzigo nacne gase güeyqueets zho me, sac zhile runfalt

sëeb dze nda co, ni baa cose nac mine riaan gax ga.

20

BRIEEBAN JESUS

(Mt. 28:1-10; Mr. 16:1-8; Lc. 24:1-12)

¹ Goł dze ne rzobni zhmala, silgaw, scase bii ncow rnaw, brie Marí Magdal zie me ro baan Jesús. Zeene bdziñ me, gon me laa quie ne nioog ro baa co bdiooble, laaw zole tib nëz.

² Horco lëelëd wbire nguzhoon me, biaad me zaatne no no grop no Pedr, biaadnie me diidz lo no, në me laa zho güeybee Jesús len baa, dieen palo güeysan zho me.

³ Dzigo lëelëd, brie no grop no Pedr, zioso no ro baa. ⁴⁻⁵ Zeene bdziñ naa ro baa, blëz naa niip, dzigo bdiixlo naa len baa gon naa laa lar ne briel me zhoob ga; per bzëebd naa. Laa naa blozhdze bdiixlo len baa, zeene laa Pedr blanso. ⁶ Zigne blanso Pedr bzëeb Pedr len baa, gon Pedr nligaa laa lar co zhoob ga, ⁷ niicle lar ne briel guic mew, laaw zhoobaque ga; ndibëdsew, zhooba tib lad.

⁸ Nacne bzëebaque naa. Zeene gon naa zha zhoob lar co, dzigora bliladz naa ne nli brieaban me. ⁹ ¡Sac hor co, bii gard tsoguc naa zha rnee lo Xtiidz Dios; sac ga raquiet ne ible zrieaban me!

Gon Marí Magdal Jesús

(Mr. 16:9-11)

¹⁰ Ye Marí biire blanso ro baa ga stib. Zeene wbii no ga grop no Pedr, laa Marí bii zo ro baa ga.

¹¹ Ga name zo Marí roon me. Sca roon me, tibaque zeene bui me nëz len baa co, ¹² gon me laa chop anjl zob leen co. Dib nquitsbiese rna xab grop anjl co, tib me zob nëz ne bzhoob guic Jesús, stib me zob nëz ne bio ni me; ¹³ dzigo rëbchaa me lo Marí:

—¡Pe nacne roon luu?

—Roon naa —rëb Marí—, sac laa zho biadbee xcuerp Jesús nu, na dieen pa güeysan zho me.

¹⁴ Loxaque blozh sca bnee me, zeene ptsire lo me gon me laa tib men co zo gax zhits me. ¡Per ib beenbeyd me ne Jesús!

¹⁵ —¡Pe nacne roon luu? —rëb Jesús—. ¿Cho guib luu?

Lel güeynie guic Marí rëb me bod meñ ne rquianap gaw, dzigo rëbchaa me:

—Bzhiguiel, telne luu biadbee me nu, bnë dien pa lo güeyсан luu me; zeena ga naa gaxi naa me.

¹⁶ Horco bneelë Jesús Marí, bredz me me. Zeene bin Marí lë me, lëelëd biecw me; dzigoraa beenbey me Jesús.

—¡Maestro! —rëb me—. ¡Mod luu i!

Laa me zie gbig me lo Jesús. ¹⁷ Dzigo rëbchaa Jesús:

—¡Xeend luu naa! Sac gard guia naa lo Pxoꝝ naa gbaa. Mine naca, güey güeynie diidz lo grë zha ne bzënal zhits naa; gudz lo zho: Laa naa nole nëz guia naa lo meñ ne nac Pxoꝝ ne, meñ ne nac Dios ne rdzi-uunbey ne.

¹⁸ Horco lëelëd wbi Marí ga, ziaadnie me diidz lo no. Blanso me bzodiidz me zha gon me Jesús, ni në me lo no zigne rëbse Jesús lo me ga.

Brieequia Jesús lo xpëëdscuel me
(Mt. 28:16-20; Mr. 16:14-18; Lc. 24:36-49)

¹⁹ Pcow liu dze dmingw co, grëse no ne nac no xpëëdscuel me laa no pcaalsa; lox-aque Mazh runfalt. Dziits nquiaa no yag yu, sac rdzieeb no grë zha Israel ne rlëënie me. Laa no ndxie ga, tibaque zeene brieequia me bzo me glowtaa lo no; pquiaabdiuzh me no. ²⁰ Blozhse pquiaabdiuzh me no, dzigo blu me len nia me lo no, zaatne biaaz clav zeene pquia me lo cruz, ni blu me ro xcuxti me. ¡Grëse no per nli rley no zeene bdzion no ne nli mew! ²¹ Blozh ga, në me lo no:

—¡Laa naa rnedz tib guielbley zdoo to, zeena peet tsienied guic to! Zigne pxeel Pxoꝝ naa naa bial naa, scagaa niina laa naa rxel to.

²² Dzigo blub me lo no grëse no.

—Golcaania Espíritu Sant —në me—. ²³ Ni zeene gon gon to tib miech perdon, scaque Dios zun me zho perdon; laa telne siguiel d zho gon to zho perdon, laa zho biaanle lo xtol zho ga.

Gon Mazh Jesús

²⁴⁻²⁵ Zeene bdzion no Mazh (Mazh ne rnee zho “Mëëdgrop” ga), bzodiidz now lo Mazh, per bliladz Mazha, rnee Mazh:

—Rliladz naa mine rnee to i gon. Zliladz naaw, per haxta ganlo naa me, haxta gan naa len nia me zaatne biaaz clav, ni cteed-xug naa ga; ni csëëbnia naa ro xcuxti me zaatne biaaz lanz ga.

²⁶ Goc xon ngbidza, laa no pcaalsaque len yu co stib; hor cosi yele Mazh ndxiegrë no ga. Scaque dziits nsioog no ro yu, per tibaque zeene bdzion no laa Jesús bzëëb len yu ga stib, bzo me glowtaa lo no, pquiaabdiuzh me no. Blozhse pquiaabdiuzh me no, ²⁷ rëbchaa me lo Mazh:

—Wbig na Mazh, bui len nia naa, psëëb mzhugnia luu nu. Dien nia luu nu, psëëbnia ro xcuxti naa. Gacchopdraa guic luu, sinque bliladz ganle ne nli mban naa.

²⁸ Dzigoraa bliladz Mazh ne nli mban me.

—Nasi rliladz naa mban luu —rëb Mazh—. Luu nac meñ ne rnabey naa, luu nac xDios naa.

²⁹ Pquiab Jesús rëb me:

—Laa luu rliladz niina, lëëcxe laa luu gonle naa waa. ¡Dichos zha ne gliladz ne nli mban naa, niicle ran d zho naa!

¿Pe nacne pquia grë diidz rii?

³⁰ Lo lal ne bzënie Jesús no, ndaldoo milagr ne bdzion no been me, led grëda raquiet lo guits rii. ³¹ Mine pquias naa nu, laaw pquia naa zeena zeene glab tow, guien to ganle ni gliladz to: Jesús nac meñ ne biaadsilaa ne lo xtol ne, Dios bzooblo me biaad me, ni Xpëëd Dios nac me; sac zha ne dib zdoo gliladz cho nac me, zgaa zho tib guielmban ndzon ne gdziñd dze lozh.

21

Gon zho Jesús Galilé

¹ Bded ga, wbiire brieequia Jesús lo no stib, zaatne nac ro nisdoo nroob ne rnee zho Tiberias.

² Tib bdze dzew, tipse ndxie no gza no Simón Pedr, Mazh, Natanael (meñ ne nac meñ Caná ga), bets naa Jacob ni schop zha ne nacgza no. ³ Tibaque zeene në Pedr, laa Pedr tsie gooz mel. Dzigo rdzieets no:

—Yeque no sca zia guio ne.

Dzigo bziaab no tib len barcw win gza no, laa no zio.

Dipse guieel bdzionie no barcw co lo nis, per ni tib mel bgaad. ⁴ Laa liu ziaadle lozh

guini, zeene bdzion no laa tib men co zo ro nis, per ni tib no bdziunbeyd me. ⁵ Dzigo bnee men co lo no, nē me:

—Yo to dien xin, ¿pe bгаа ma?

Pquiab no rdzieets no lo me:

—Choot ma bгаад.

⁶ Dzigo nēchaa me:

—Golron guix ne rgaa ma i nēz derech ganle, znaaz to ma.

Dzigo bron no guix co nēz derech. Zeene laa no cueew lo nis, ib lēbd no glis now; ndaldoo mel ne biodzē lena.

⁷ —¡Pedr! —rep naa—. ¡Bina ganle, xmaistr ne i gon!

Zeene bin Pedra, lēléd wbix Pedr xab Pedr, biab Pedr lo nis; psilo Pedr bzhoobnis Pedr brieequia Pedr ro nis. ⁸ Laa no biaan len barcw ga; nole bdzinniew zatne nac ro nis. Maase tapgaltsii metr sca bdioobniu no guix co lo nis.

⁹ Zeene briece no len barcw, bdzion no laa gui noyecle, laa tib mel zhooble lo gui co, ye quietxtil ne. ¹⁰ Dzigo nē Jesús lo no:

—Goltēnie bla mel ne blozh bnaaz to i nu dien.

¹¹ Dzigo güey Pedr biepe me len barcw, güeyxadz me guix ne no mel ga; dzigo bdoobniu mew bdzinnie mew haxta zaatne nacpaa ro nis. Mel tafa, niapse ma mbeew, zeene bgab ma rgaa ma tib gayoo chooptsiiptson lo grē ma; niicle scataa nzian ma, per blēb guix co, briezda.

¹² Blozh ga, bredz me no, nē me:

—¡Goltē na, zeena gowxeren to!

Ni tib no bnabdiidzd lo me dien pe nli mew; sac, ¡rienpaa no ne nli mew!

¹³ Dzigo wbig me bdiiz me quietxtil co lo no, bzhen me mel ne, bneedz me ma lo no.

¹⁴ Ga bion vult brieequia me lo no wlal ne brieaban me.

Bzodiidznie Jesús Pedr

¹⁵ Blozhse bdioowxeren no, bredz Jesús Pedr, psilo zho bzē zho grop zho; dzigo rēb me lo Pedr:

—Simón (xingan Jonás), ¿pe nli dzigo rleynieraa luu naa que grē zha qui?

—Nquialadz naa luu —rēb Pedr—, ni nanlegaa luuw ganle.

—Pteedlo grē xpēcwxiil win naa sca —rēb me.

¹⁶ Wbiire me, rēb me lo Pedr:

—Simón (xingan Jonás), ¿pe nlipaa dzigo rleynie luu naa?

—Nquialadz naa luu —rēb Pedr.

Dzigo rēb me:

—Pquianap xpēcwxiil naa sca.

¹⁷ Wbiireque me stib rēb me lo Pedr:

—Simón (xingan Jonás), ¿pe nlipaa nquialadz luu naa?

Zeene bin Pedr sca rēb me, mban goc zdoo Pedr; sac gale rac tson vult zinabdiidz me lo Pedr, dzigo rēb Pedr:

—Luu nac men ne rnabey, luu nana grēsew, nan luu ganle nquialadz naa luu.

Dzigo rēb me:

—Telne nli nquialadz luu naa, yquiaanap luu xpēcwxiil naa sca.

¹⁸ Zeene gon bii nguieg luu, led rsoladz luu ganle luuzhal racw xab luu, rrieelo rie luu zaatne racladztaa luu; per zeene gon laa luu gac menqolraa, loxaque nia luu glis luu zhaale zha ne ygacwxab luu, ni zienie zho luu zaatne ni racladzd luu.

¹⁹ Zeene znu rēb me lo Pedr, ga bzeet me zha nac guielgut ne ygaa Pedr, ni ga glu Pedr ganle pa lotaa men nroob nac Dios. Blozhse ga, rēbchaa me:

—¡Dēnal zhits naa!

²⁰ Dzigo nalaque naa zhits me grop me Pedr. Zeene ptsire lo Pedr, gon Pedr laa mēēdscuel ne scataa rleynie me ga, laa zho nal ga, zha ne zobpaa cue me ga lo xtsee co, zha ne wbigpaa bnabdiidz lo me dien cho nac zha ne tsielo me lадznia zha ne gut me; dzigo rēbchaa Pedr lo me:

²¹ —Telzhe zha rii waa, ¿pe nac mine ted zho?

²² Rēbchaa me:

—¿Pe nadien gun luu ne racladz luu gacnan luuw? Telne gacladz naa, zrieelo gnabey naa gban mgui haxta len dze ne guial naa stib. Led xcuenta luu ga. ¡Na zeen dēnal zhits naa!

²³ Zeene gocnan grēraa zha ne rliladz Jesús sca bnee me, grēse zho tibaque güeynie guic zho gdzindraa dze guet naa. Per led scada, sinque znu naca, rēb me: ¡Pe gun Pedr! Telne gacladz me, zrieelo gnabey me gban naa haxta gal dze ne guiaad me stib.

²⁴ Grëse mine pquia naa nu gon, grop lo naa gon naaw, grëse zha ne nacgrë no nanpaa zho ganle ne diidzli rne naa.

²⁵ Ndaldooraa grë ncuaane nroob ne been Jesús, tel niaca mine yquiaw grësew, ni ygaad dib lo guidzliu tsotsow grë guits ne yquiaw ga.

MIÑE BEEN ZHA NE PXEEL JESÚS BNEE XTIIDZ ME

¡Diuzh Tiofl!

¹ ¿Yose luu dien bets? Naa gon nac Luc, laa naa rxel stib guits rii lo luu. Miñe pxel naa lo luu glo ga, lo co pquia naa grëse miñe been Jesús, grëse wseed ne blu me lo miech zeene psilo me xtsiin me ² haxta gol dze ne psan me diidz pe nac ncuane gun grë zha ne bzooblo me tsie tsienee Xtiidz me. Espíritu Sant bdeed guielbiini lo zho bien zho zha racladz me; lëe dze co ga zey me gbaa.

³ Nli psacsi miech me, beet zho me, per brieaban me. Ni par glu ganle ne nli brieaban me, dipse len choo ngbidz brieequia me lo grë zha ne sca bzooblo me tsienee Xtiidz me. Gzataa zeene rrieequia me lo zho, rnee me lo zho zha rnabey Dios.

⁴ Tib vuelt ndxie zho grë zho me, dzigo pso me diidz lo zho ible grieed zho lad guiedz Jerusalén, haxta quiet Espíritu Sant gdeed guielbiini lo zho zigne nacle xtiidz Pxoze me; ni biire rëb me lo zho:

⁵ —Gol soladz ganle laa naa nile lo to: nli laa Juan pchoobnis, per niab nisa; sangue to zгаа to guielbiini ne gneedz Espíritu Sant, rrieequia Espíritu co chobnis to; ni zhile gdziñ dze ne laa miñ co gac.

⁶ Len ngbidz ne sca nolulo me lo zho, tib vuelt bnabdiidz zho lo me, rëb zho:

—Ndion no men rnabey nac luu. ¿Pe niina na so luu gnabey luu, zeena cuee luu zha Israel ladznia zha Roma?

⁷ Dzigo pquiab me rëb me lo zho:

—Dios, men ne nac Pxoze naa, ncuane gun me rieguialde to gacnan tow, mese nan dien pa dzew, dien pa horgaaw; sac mese nac men ne grieelo gūna. ⁸ Sinque to, zeene laa Espíritu Sant gneedz guielbiini lo to, hor co laa to yгаа poder ne rap me, laa to csilo gnee lo grë zha Jerusalén cho nac naa; tsie to dib xtan zha Judé, dib xtan zha Samar; ni lo grëragaa miech, tsienee tow.

⁹ Blozhse sca bnee me lo zho, zowique zho lo me, dzega, dzega laa me bzoquia

gbaa. Glaale ziequia me zeene znuse bdop tib xcow, laa me biongueetsse len xcow co, gondraa zho me. ¹⁰ Laa zho bii quiawique zhan gbaa zaatne gon zho biongueets me ga, tibaque zeene bdziñ chop mgui zaatne zo zho ga, dib nquitsbiese rna xab grop mgui co; ¹¹ rëb me lo zho:

—¿Pe nacne squitaa quiawi to zhan gbaa? Zigne gon to i nagon zey me gbaa niina, squique quiet me gbaa gal dze ne laa me guiaad stib.

¹² Blozh ga dzigo laa zho wbi guic gui co (lëe Gui Oliv ga). Zhisaque bzë zho laa zho bdziñle Jerusalén, lalse ne rzë zho dze ne rdziiladz zho lo dziin. ¹³ Bdziñ zho zaatne rbëz zho, biep zho len yu ne riaan glaa; sac len yu glaa co ga no zho. Ga rbëz Pedr, rbëz Ndrés, Jacob, Juan, Lip, Mazh, Bartol, Matew, ni Jacob ne nac xingan Alfé; Simón Zelot, ni Judas menlidz Jacob. ¹⁴ Grëse zho tibaque rcaalsa zho rzodiidznie zho Dios grë zho zha bets Jesús, xniaa me Marí, ni grëraa men wnaa ne nacgrë zho.

Bzo zha ne gun dziin ne psaan Judas

¹⁵ Tib dze pcaalsa maase tib gayoo gal zho, dzigo guso Pedr bnee me lo zho, rëb me:

¹⁶ —Grëse to bets, grëse to bzian, golgacnan ganle, miñe been Judas zeene sca güeyto me Jesús, nole ne sca gaca. Lo Xtiidz Dios zhobneew, lëe miñ co pquiaa rey David zeene psiaab Espíritu Santa guic me. ¹⁷ Ye Judas gocgza no, ye me nac diidz niun dziin ne nodziun no niina.

¹⁸ 'Ni nligaa laa ne niun me dziin co, lel been me guielntseeb pto me Jesús, ni blozh ga lëeque lo liu ne bziuu dimi ne bdiizh zho me ga, ga güeytsobe me bzob guic me lo liu, wbilgazh me, nëzrii nëzrec bliaal len me. ¹⁹ Miñ co nacne zeene laa grë zha Jerusalén gocnana, dzigo bleelë zho liu co "Liu Ren".

²⁰ 'Zigne rneque naa ga —rëb Pedr—, ible lo Xtiidz Dios sca zhobnee; ni lëe miñ co ga raquiet zaatne znu rnee:

Ible ziaandets lidz zho, ni stib choot gbandraa zaatne bio zho.

Ni rneequew:

Zhaale zha ne guiaanne dziin ne no niun zho.

²¹⁻²² 'Miñ co nagon, ible nonguiela so tib zha ne guiaan xlugar Judas, gacgza zho no

guioxobnen no ne nli brieaban Jesús. Nana sca, lo grè zha ne nacgrè no psilo bzianie no me zeene pchoobnis Juan me, haxta gol dze ne laa me zey gbaa, lad co golgotsaa cue ne tib zha ne so gacgza no.

²³ Dzigo ble zho tib men ne lè José Barsabás (lèëque me ga rnee zho Just), ni stib men ne lè Matí.

²⁴ Blozh ga, bnaab zho lo Dios, rëb zho:

—Dios, ndion no luu nac men ne rnabey no; ndion no luuse nac men ne runbey zdoo tib tib miech, gane niina laa no rnab lo luu, luu blu dien cho tib zha rii racladz luu so ²⁵ gun dziin ne psaan Judas; sac laa Judas zeyle zaatne rieguia Judas.

²⁶ Blozhse bnaab zho lo Dios, laa grop zha co bio rif. Nacne brieequia men ne lè Matí ga, dzigo dze cota laa me gocgza stsiiptib zha poxtl co.

2

Biaad Espíritu Sant

¹ Zeene goc gadz zhmal gut Jesús, lèëtaque dze co run grè zha Israel lni ne rnee zho Pentecostés. Dze co grëse zha ne no xnëz Jesús, laa zho pcaalsa. ² Laa zho ndxie grè zho, tibaque zeene bio tib bi nroob zhan gbaa, zig nac zeene rrie tib medox, haxta len yu ne ndxie zho ga pquiab; ³ ni brieequia nzian biini, rluw zig nac ludz miech, tibga tibga biini co blëz guic zho grëse zho. ⁴ Horco grëse zho pcaania guielbiini ne bdeed Espíritu Sant, psilo zho rnee zho grè xtiidz stib miech mine rsiaabtaa me guic zho.

⁵ Len dze co nziandoo grè zha Israel ne no stib ladz ben bdzin Jerusalén, grè zha ne bii zienal xley Dios. ⁶ Laa zeene bio bi co, ye zho no lad grè miech guizhiu ne bdopbe zaatne zob yu co; tib tib zho zeene bin zho laa grè zha ne pcaania guielbiini co nonee xtiidz zho, per nli rzee zdoo zho. ⁷⁻⁸ Rlozhd gwi zho rnee zho:

—¡Pe nli diidz rii! ¿Zha rrieelo rnee grè zha qui xtiidz ne, ni led zha Galilé nac zho? ¡Tib tib ne ndxie ne nu, zhaase zhaase diidz ne rnee ne! ⁹⁻¹⁰ Nu ndxie grè men Part, men Media, men Elam, men Mesopotam, men Judé, men Capadós, men Pont, men Asia, men Frij, men Panfil, men Egipt,

haxta grè men ne ziaad nëz África, delant guiedz Ciren; grè men Cret, men Arab, grè zha Israel ne ziaad nëz Roma, grè men Roma, zha ne zienal zhiwseed zha Israel.

¹¹ 'Pe zhidaa ne —rnee zho—, ni diidz ne rneepaa ne tib tib ne laa ne nodzion rnee zha qui grëtaa milagr nroob ne run Dios.

¹² Grëse zho per nli rzee zdoo zho, rdziel-draa zho zha gun zho, rnabdiidzlsa zho rnee zho:

—¿Bay pe i? ¡Ncuaane gard dzian ne!

¹³ Laa nogaa zho rzhidznie, rnee zho:

—Rzudz grè zha qui, gane squi rzë xtiidz zho.

Bdeed Pedr tib lban

¹⁴ Dzigo bzoli Pedr gza me stsiiptib zha ne nac poxtl ga, psilo me nguiedz bnee me lo grè miech ne ndxie ga, rëb me lo zho:

—Grëse to, zigtaa zha Jerusaléna, zigtagaa zha ne blanso Jerusalén nuw, golgona ganle. ¹⁵ No bla to quianee rëb to rzuudz no, per led rzuuzd no. Griinpaale name blan ngbidz, niicle niaca zha ne riepaa nziu, niacxe goon nale laa zho gzudz. ¹⁶ Led rzuuzd no, sinque niina nagon noyac grè mine bzeet Joel padzeela (tib men ne biadteed xtiidz Dios), zeene znu rëb me:

¹⁷ Znu rnee Dios:

Zeene wzhile runfalt gal dze co, laa naa cxel zhiEspíritu naa zdoo grëse miech; grè xingan zhow, grè xindzooop zhow, laa zho cteed xtidz naa, grè zha nguieg, nzian grè ncuaane glulo lo zho, grè mengol, nzian grè ncuaane glu mcaal lo me.

¹⁸ Len dze co,

grëse zha ne nguzobdiidz lo naa, niicle mguiw, niicle wnaaw laa naa cxel zhiEspíritu naa zdoo zho, dzigo grëse zho cteed xtidz naa.

¹⁹ Nzian grè ncuaane gzee zdoo to glu naa zhan gbaa, scaque lo guidzliu, zan to ren, zan to bel, zan to grè goxdoo.

²⁰ Zeene zhile gdzin dze ne guiaad men ne rnabey ne,

laa lo ngbidz ycow, laa mëë gna nizhnie zig rna ren.

Dze ne guiaad me ga,

dze co gac tib dze ne mazdraa nroob, tib dze ne mazdraa ndzon.

21 Grëse zha ne dib zdoo gnab lo Dios yquia zdoo me zho, grëse zha co scaania me zho.

22 'iGrëse to, golquiaadiaga sca ganle! Led nanwen to ganle Dios pxeel Jesús, men Nazaret ne biaad lo guidzliu rii, Dios bnabey been me grë milagr nroob, been me grë ncuaane bzee zdoo to; ga blu ganle ne nli Dios nacie me. 23 Laa zeene laa Dios bdeed diidz biab me ladznia to (sac ible xtiidzle Dios naca, nanle me zha nac ne sca ted Jesús), laa to bnaaz me, bzobdoo to me, bnabey to gut me. Led to gon bloo me ladznia grë zha ntseeb ne sca psacsi me pquiaa zho me lo cruz. 24 Per bleeban Dios me, psilaa Dios me ladznia guielgut; sac lëbd guielgut ne lëew gnabey lo me.

25 'Zeene bzeet David Jesús, znu rëb me: Men ne rnabey naa, ran naa tibaque quianap me naa; tibaque zo me cue naa nëz derech, ÷pe nac nadien ne lega pe gac naa?

26 Gacxe waa, nley no zdoo naa, niicle ludz naaw, rleya roolnie naa me. Ni gane tibliladz rac naa;

27 sac nan naa niicle guet naa, ib csaand me guiaan naa len baa, ib gdeete me diidz xin xpëel naa. Naa nac tib ngundziin lo me, ni rleynie me naa.

28 Me blu lo naa zha grieelo yгаа naa guielmban, ni tib guielbley nroob ne yгаа naa zeene laa naa gdziin lo me.

29 'Bets, bzian, to ne nac to menladz naa, golgona ganle: led mine bdete pxozgol ne David bnee me nu; sac gon, zeene gut me güey zho güeyqueets zho me, ni haxta lo nadze laa xpaа me bii niaа. 30 Sinque mine bded Jesús ga bzeet me, sac gon tib zha ne biadteed xtiidz Dios goc me. Gocnanle me ne lo xtii me grieequia Men ne nacle diidz ga cxeel Dios, ni men co sob gnabey zigne bnabey me; sac scale rëb Dios lo me, ni haxta bzeet Dios lë Dios parne glu ne yquidied me. 31 Dzigo zig nac zeene ranle me grëtaa mine ted Jesús, nacie bzeet me ne ib zrieeban Jesús, rëb me guiaan xcuerp Jesús zaatne rbëz grëtaa mengut, niicle xindgaaw.

32 Jesús ga gon bzeet me, sac zig nac Jesús grop lo no bdion no bleeban Dios me, 33 ni niina gbaа zob me cue Dios nëz derech, sac me nac men rnabey. Ni zigne nacle xtiidz Dios men ne nac Pxoz me, laa me pxeel Espiritu Sant lo no; ni niina grëse ncuaane noyan tow, grëse ncuaane noyongaa tow, xtsiin Espiritu Santow. 34 Laa naa rbire rne lo to stib ganle, led mine bdete David ga bzeet David; sac gon, zeene gut David güeysobd David gbaа. Davitaque goc zha ne znu rëb:

Rëb Dios lo men ndzon ne rnabey naa:

“Cue naa nëz derech, nu bzob,

35 nieeda lozh gnaz naa grëse zha ne rlëe lo luu, csañ naa zho ladznia luu.”

36 'Grëse to men wladz, golgona sca ganle: Jesús gon, men ne pquiaa to lo cruz ga, lëe men co nac men ne rnabey. Dios bzo me, ni Dios pxeel me biaad me lo guidzliu.

37 Zeene bin grë miech ne ndxie ga sca bnee Pedr, biab guielnë zho, psilo zho rnabdiidz zho lo Pedr ni lo grëraа zha ne nacgza Pedr ga, rëb zho:

—Bets, nana, ÷pe nac ncuaane dziuun no?

38 Dzigo rëb Pedr lo zho:

—Tib tib to, golsaan xquielntseeb to, golbig lo Dios, ni none chobnis to zeena guiaanmbe to lo xtol to; scagaa ible sxeel Dios Espiritu Sant gacnie to. 39 Sac psanle Jesús diidz ne ible sxeel me Espiritu Sant gacnie grëse zha ne cuedz me sëeb xnëz me; zigtaa tow, zigtaa xpëed tow, zigtagaa grëraа menzita.

40 Nzianraа grë ncuaane bzodiidz Pedr lo zho, ni pso me diidz lo zho csaan zho grëtaa guielntseeb ne run miech lo guidzliu rii. 41 Lo grë zha ne bzoobdiag grë mine pseed me zho dze co, rgaa zho maase tson mil; blozh ga, grëse zho brobnis, laa zho gocgrë grë zha ne rliladzle Jesús ga.

Niowse mban zho

42 Grëse zha ne rliladz Jesús ga, dib zdoo zho ziana zho grë mine rseed grë zha poxtl co zho, tibaque rcaalsa zho rzodiidznie zho Dios, ni row zho guietxtil zigne psanse Jesús diidz gun zho. 43 Grëraа zha ne zo stib lad, rdzieb zho; laa grë zha poxtl co, nzian grë milagr nroob ne run zho.

44-45 Tipse rnee zho, rdeedlsa zho ncuaañe rquiin zha ne nacgrë zho; zha ne quianie liu, tel pe grëragaa ncuaañe quianie zho, haxta rto zhow, dzigo rguiz zho dimi co lo grë zha ne guieñd pe yquiin.

46 Gzataa dze rcaalsa zho len yadoo; rlozh ga, rcaalsaque zho lidz grë zha ne nacgrë zho row zho guietxtil zigne psañ Jesús diidz ga; ine nley, ine ndooladz rbe zho grë zho rquiin zho guielwagw ne runlo zho, 47 ni rley zho roolnie zho Dios. Grëse miecha, rley zho ran zho sca niowse mban zho; ni zigse zie dzew, scase scase laa Dios rbedzraa grë zha ne rzëeb xnëz Jesús, laa zho racnzianraa.

3

Biac tib men ne në ni

1 Tib dze zig rbixwe ngbidza, brieed Pedr grop Juan zie zho yadoo nroob ne zob Jerusalén, sac lëe hor co nac horne rie zho yadoo riezodiidznie zho Dios.

2 Gax ro yadoo co quia tib puert rnee zho Puert Ndzon, ga rzob tib zhey gol ib gacd së, sac nële ni me zeene gol me. Gzobse dze, rie zha ne riezooob me ga rnab me gon lo grë zha ne rzëeb yadoo. 3 Laa dze co, zeene gon me laa Pedr grop Juan zieded ga ne laa zho sëeb yadoo, zëeb nia me rnab me gon lo zho. 4 Dze rwi zho lo me, tibaque rëb Pedr:

—Lo no bui.

5 Dzigo blis lo me bui me lo zho, nan me bod no pe dimi ne gdeed zho lo me.

6 Wbiire bnee Pedr lo me, rëb Pedr:

—Quianied naa dimi ygad naa lo luu. Ncuaañe grieelese gnedz naa, laaw gnedz naa niina, niapse por Jesús (men Nazaret), laa naa rnab lo luu, niinagazh guso i zeen bzëni!

7 Dzigo bzhen Pedr nia derech me bliso Pedr me, hor cogazh laa grop ni me ga bdaan, 8 laa me psilo bzë. Rley me laa me bzëeb len yadoo gza me zho, lo guielbley co haxta rias me, ni roolnie me Dios.

9 Grë miech ne no len yadoo, zeene gon zho laa me rzële, ni scataa rley me roolnie me Dios, 10 bzee zdoo zho; sac runbey zho me, nanopaa zho rzëd me glo, tibaque ran zho me rzob me zaatne quia Puert Ndzon ga rnab me gon.

11 Zeene laa Pedr grop Juan brieed len yadoo nroob co, yeque me nal zhits zho ib rsaand me zho, laa zho bdziñ stib nëz cho yadoo co zaatne quia tib nsaap nroob ne rnee zho zhiNsaap Salomón. Nalaque grë miech co, rlozhd gwi zho, rlozhd gzee zdoo zho. 12 Dzigo rëbchaa Pedr lo zho:

—¿Pe rac to? ¿Pe nacne squitaa rzee zdoo to, squitaa rwi to lo no, zig nac zeene no bdziuunguiac men rii, zig nac zeene por nguzobdiidz no lo Dios gane brieelo psëe no me? 13 Golgacnan ganle led scada; sinque Dios men ne bliladz Abraham, men ne bliladz Isaac, men ne bliladz Jacob, men ne bliladz grëraa xmengol ne, men co blu lo to niina ne nli men nroob nac Xpëed me Jesús. Lëe Jesús co ga gon bnaaz to, bloo to me lадznia zhiwxtis ne, ni zeene gocladz Pilat nsilaa Pilat me, pe liaadz to ndeed to diidz. 14 Bdeete to diidz nlaa men ne nac men ndzon, men ne peet xtold; lel bnab to blaa tib zha ntseeb ne nzëeb ngutoo. 15 Laa me, pquia to haxta beet to me, ni me nac men ne rdeed guielmban. Per bleeban Dios me, ni mban me niina; sac grop lo no bdzion no me.

16 Ni niina men ne ran to biac nu, niapse por Jesús biac me; led runbeyle to me nanle to ganle rzëd me glo. Ne dib zdoo no riladz no Jesús, gane brieelo bnab no beenguiac Jesús me.

17 Grëse to bets, ne nac to menladz naa, rgobey naa niicle to ni niiclegaa grë zha ne nac zhiwxtis ne, lega laa to bnabeyse bgaa Jesús beet to me, niicle to biendaque dien pe nacne sca been to. 18 Laa Dios bneedz diidz been to grë guielntseeb co, sac sca goc grëse mine bzeet grë zha ne biadteed xtiidz Dios padzeela, zeene bzeet zho zha nac grë guielnë ne ted Jesús, Men ne nacle diidz cxeel Dios guiaad lo guidzliu.

19 Dol nroob ga gon been to, gacxe nana gon waa golsaan xquielntseeb to, golbig lo Dios; zeena csanmbe me to lo xtold to. Me gneedz guielbley lo to stib, 20 ni zbiire cxeel me Jesús lo to stib, guidaad silaa me to. 21 Gbaa no me niina, ni ga cuëz me nieeda gal dze ne laa Dios blozh bnabey goc grëse ncuaañe none gac, zigne bzeetse grë zha ne pxeel me padzeela, biadteed xtiidz me. 22 Zig nac Moisés bzeet me laa Jesús guiaad,

rëb me lo grë pxoz gol ne: “Dios men ne rnabey ne, ible znabey me ne lo xtii to griequia tib men ne gac zig nac naa lo to niina. Zeene laa me guiaad, golgon xtiidz me; ²³ sac zha ne gond xtiidz me, ib tedsod znitlo zho.” ²⁴ Scaque Samuel, ni grëraa zha ne biadteed xtiidz me, grëse zho bzeetle zho grë ncuaane noyac len dze rii.

²⁵ Grëse to, xmenjol to nac grë zha co, ye to ga rëb Dios gunlay me zeene znu biaan me diidz grop me Abraham, rëb me: “Niapse por tib men ne griequia lo xtii luu, laa naa gunlay grëse miech ne ndxie gdibdoose lo guidzliu.” ²⁶ Ni niina ne laa Dios bleeban Jesús, gloque lo to px-eel me me, gunlay me to, zeena csaan to xquielntseeb to.

4

Güeyzo zho zho lo wxtis

¹ Laa Pedr grop Juan bii noneeque lo grë miech co, zeene laa bla zha ne nac pxoz bdziñ ga, bdziñnie zho tib zha non ne quianap yadoo co ni zla zha ne nacgrë zha saducé. ²⁻³ Zigne bdziñ zho bnaaz zho Pedr grop Juan, güeysëeb zho zho ladzguiib; ni ne bdzele dzew, ga biaan zho dipse guieel co. Rlëe grë zha co, sacne laa Pedr grop Juan quianee lo grë miech co zha bleeban Dios Jesús; ni rnee zho grëse menjut, scaque grieaban zho.

⁴ Niicle ne scataa rlëe grë zha rnabey co, per nzian zha ne ndxie ga bliladz Jesús; zig gaay mil rgaa loxaque zha bgui.

⁵ Zeene biini liu co, grëse zha non, grëse zha ne rnabey lo menquiedz, laa zho pcaalsa. ⁶ Ga bdziñ Anás men ne nac pxoz nroob ne rnabey, ga bdziñ Caifás, bdziñ Juan, bdziñ Lejandr ni grë zha ne nac menlidz pxoz ne rnabey ga. ⁷ Dzigo bnabey zho gocredz Pedr grop Juan, bzo zho zho glowtaa, bnabdiidz zho lo zho, rëb zho:

—Golnë nadien, ¿cho rnabey to, cho px-eel to ne squi no to?

⁸ Horco laa Espíritu Sant bdeed guielbiini lo Pedr, pquiab Pedr rëb Pedr lo zho:

—Grëse to ne nac to zha ne rnabey lo menquiedz, grëse to ne nac to zha gol ne non xtiidz. ⁹ Telne mine rlisqui to nac ne dien zha bdziun no men rii ne laa ni me

biac, ¹⁰ golsiguiel golquiaadiaga ganle, zeena gacnan tow ni gacnan grëragaa menquiedza. Jesús gon, men Nazaret ne bnabey to gut lo cruz ga, men ne bleeban Dios ga, men co beenguiac men rii; ni laa to rangaa me laa me zo lo ne nu. ¹¹ Lëe Jesús ga raquiet lo Xtiidz Dios zaatne znu rnee: “Quie ne psëeb zha ne nozaa yu, ni nand zho lëepaa quie co nac mine rnazdziits yu.” Ni scapaa nagon bzhaac to me. ¹² Loxaque me zrielo csilaa ne lo xtol ne, sac bzodraa Dios cho stib zha ne niaad lo guidzliu niaadsilaa miech.

¹³ Zeene gon grë zha wxtis co, scataa peet dzeb nod lo Pedr grop Juan, bzee zdoo zho; sac runbey zho Pedr, runbey zho Juan, nacd zho cho zha ne güey wseed nroob. Ga gon zho, pa lotaa guielbiini ne bgaa Pedr grop Juan ne bzënie zho Jesús.

¹⁴ Peet brieelod nlisqui grë zha co, sac nligaa laa men ne biac ga zo lo zho ga. ¹⁵ Dzigo mazd bnabey zho brie Pedr ley grop me Juan; laa zho biaan bzodiidz zho dien zha gun zho zho, ¹⁶ sac rien zho tib milagr nroob ga sca biac ni men co; niicle ne racladz zho yqueets zhow, per grële menquiedz bina. ¹⁷ Nacne biaan zho diidz, ctseb zho zho gbiiredraa zho cseed zho miech zhiwseed Jesús; zeena lozhd gacnan grëraa miech zha biac men co.

¹⁸ Dzigo bredz zho Pedr stib, grop me Juan, goctox zho lo zho.

—Laa no rso diidz lo to gon —rëb zho—, gbiiredraa to cseed to miech zhiwseed men ne rnee to Jesús ga.

¹⁹ Pquiab Pedr grop Juan, rëb zho:

—Zha dien rzac to, ¿pe nonguiela ga laa ne dziuun no mine rnabey Dios, lel mine rnee to i dziuun no? ²⁰ Griee lod gon dziuun no mine rnee to i, sac grëse ncuaane bdzion no, grëse ncuaane bdzionga no ib none gnee now, zeena gacnan grëse miecha.

²¹ Dzigo wbiire grë zha rnabey co, ntseeb rac zho lo zho pso zho diidz csetraade zho miech; blozhse ga laa zho psilaa zho. Bdeetew diidz nsacsi zho zho, sac ndal miech ne rleynie Dios, rdeed zho xquizh lo me ne been me milagr ²² beenguiac me men co, ni choole iz rac sca gacd së me.

Bnab zho lo Dios

²³ Zeene laa Pedr grop Juan bdziñ lo grë zha ne nacgrë zho, bzodiidz zho grëse tel zha rëb grë zha rnabey co, zha rëb pxoz non co. ²⁴ Grë zha ne nacgrë zho ga, zeene bin zhow grëse zho psilo zho bnab zho lo Dios, rëb zho:

—Dios, luu nac men ro ne rnabey grëtaa ncuaañe no, luu bzaa gbaa, luu bzaa guidzliu, luu bzaa nisdoo, luu bzaa grëraa ncuaañe no. ²⁵ Padzeela zeene bdeed Espíritu Sant guiełbiini lo pxozgol no David, men ne been xtsiñ luu hor co; znu bnee me:

¿Pe nacne squitaa rac grë miech ne nacd zha Israel rlëenie zho Dios?

Racladz zho gun zho ncuaañe ni grieelod lo zho.

²⁶ Grëse zha non ne rnabey grë guiedz, tipse rac zho laa zho racntseeb lo Dios rlëenie zho me, ni rlëenie zho men ne bzooblo me pxeel me lo guidzliu.

²⁷ 'Ni nligaa na scase goca. Guiedz Jerusalén nu, nu biaad rey Herod, biaad Pons Pilat, pcaalsa zho grë zho menladz no ni grë menzit, tipse bnediudz zho psacsi zho Jesús, men ndzon ne bzooblo luu pxeel luu biaadgun xtsiñ luu lo guidzliu nu. ²⁸ Grëse zigne psanle luu diidz, scase been zho. ²⁹ Ni scaque niina, bui ganle zha racladz zho ctseb zho no parne peet gneedraa no; luu nac men ne gocniñ no ne nac no zha ne rdziuun xtsiñ luu, zeena gdzieebd no cseed no miech xtiidz luu. ³⁰ Laa no rnab lo luu, beenguiac grë men rzacné, been grë milagr nroob, blu grë ncuaañe gzee zdoo miech; zeena gan zho ganle men nroob, men ndzon nac Xpëed luu Jesús.

³¹ Zeene blozh bzodiidznie zho Dios, masaque bzhidz zaatne ndxie zho ga; hor co grëse zho laa zho bgaaraa guiełbiini ne bdeed Espíritu Sant lo zho; peet rdziebdraa zho laa zho zieseed miech Xtiidz Dios.

³² Len dze co, grëse zha ne riladzle Jesús ga, tibaque nac zho, tibaque rnee zho, tibaque nac miñe zienie guic zho. Nod zha ne guiab lose zho yquiin ncuaañe rap zho; sinque grëse ncuaañe quianie zho chen grë zho naca. ³³ Grë zha poxtl co, zeene rseed zho miech zha brieeban Jesús, nzian zha ne riladz me; rlupaa ne Dios nacie zho.

³⁴⁻³⁵ Ne nligaa tipse nac zho grë zho, nod zha ne guiab ne guiend pe yquiin, sac grëse zha ne quianie liu, zha ne quianie nzian yu, rto zhow dzigo rdeed zho dimi co rguiiz grë zha poxtla lo zha ne rquiina. ³⁶ Sca been tib men ne nacgrë zho lë José. (Zha xtii Leví nac me, gol me tib lo guidzliu win ne no lo nisdoo lë Chipr; zha poxtl-le bleelë me Bernabé. Bernabé, nac zig nac ne rnee ne: Zha ne rchoobladz zdoo miech.) ³⁷ Pto me tib lë liun me, dzigo bdeed me dimi co lo zha poxtl, bdiiz zhow.

5

Znu bzhaac Ananí grop Safir

¹⁻² Tib mgui lë Ananí, laa tsieel me lë Safir; ye me pto tib lë liun me. Gonlo tsieel me, tel palal dimi ne bdo liu co, bzheñga me zhisa. Zeene laa me ziesañ miñe biaan ga, lo poxtl, rëb me lëe grë dimi ne bdo liun me ga. ³ Dzigo rëbchaa Pedr lo me:

—Ananí, ¿pe nacne bdeed luu diidz bzëeb mendox zdoo luu? Mendox i gon no-quuil luu nan luu yquidiee luu Espíritu Sant, rnee luu lëe grë dimi ne bdo liun luu nu. ⁴ Bien ganle chen luu liu co. Dimi ne bdiizh zhow, chen luuw, niac niun luuw zigne ni-acladztaa luu, ¿pe nac dzigo ne racladz luu yquidiee luu? Gon ganle led nod noquidiee luu, Dios i gocladz luu nquidiee luu.

⁵ Loxaque sca bin Ananí bnee Pedr, znuse biab Ananí liu, gagazh gut Ananí. Grëse miech ne bina, bdzieb zho. ⁶ Dzigo güey bla zha nguieg pchel zho ngutoo co lar, blis zho me ga laa zho ziequeets me.

⁷ Wdzeelaaque goca zeene laa tsieel me bdziñ, ni lalnu güeynied guic me ne laa tsieel me gutle. ⁸ Bnabdiidzaque Pedr lo me, rëb Pedr:

—Bnë dien, ¿pe nli lëe grë dimi ne bdo liun to nu?

Pquiab wnaa co, rëb me:

—Nliw, lalgui pto now.

⁹ —¿Pa brieer pensar qui lo to grop tsieel to? —rëb Pedr—. Ne squi tipse bnee to nan to yquidie to Espíritu Sant; dol nroob i gon been to lo Dios. Laa zha ne güeyqueets tsieel luu blansole ro yu nu, ni niina gon laa zho güeyaque luu.

¹⁰ Diidz co blozh brieer ro Pedr, znuse biab wnaa co liu, guchedraa me ga. Zeene laa gza zha nguieg co bzëeb len yu, laa me nixle ga; gon zho gutle me, dzigo blis zho me güey zho güeyqueets zho me cue xpaa tsiel me. ¹¹ Grëse zha ne gon sca goc men co grop me, zha ne bingaaw, zigtaa zha ne riladz Jesús zigtagaa grëraa miecha, per nli bdzieb zho.

¹² Grë zha poxtl co, tibaque rcaalsa zho tib lo nsaap ne quia cho yadoo ga rnee zho zhiNsaap Salomón; nzian grë milagr ne rdeed Dios diidz run zho. ¹³ Grëse miech ne rcaalsa ga, rleynie zho grë zha poxtl co, nzian zho riladz mine rseed zho, per rbigd zho gacgrë zho zho.

¹⁴ Zigse zie dze, scase racndalraa miech ne rzëeb xnëz Jesús, mguisaque wnaasaque laa zho riladz me dib zdo zho. ¹⁵ Zhoob diidz scataa milagr ne run grë zha poxtl co. Dzigo psilo miech rbee zho grë men rzacnë, rguix zho me ro nëz, no me zhoobse lo xlon me, no me zhoob lo yag ne ney zho me; rquiambëz zho maase zhimlëse Pedr guiab lad grë men co zeene laa Pedr ted. ¹⁶ Haxta grë guiedz win ne ndxie gax Jerusalén ga, rriee grë miech rdziñnie zho grë men rzacnë, no grë men co noguitnie mendox; grëse zho runguiac zha poxtl co zho.

Bio grë zha poxtl ladzguiib

¹⁷ Zeene gon men ne nac pxoz nroob ne rnabey, ni grë zha saducé, scataa racnie miech grë zha poxtl co, per nli blëe zho, ¹⁸ bnabey zho bgaa zho psëeb zho zho ladzguiib stib. ¹⁹ Pcow liu co, guieela bdziñ tib xanjl Dios pxal me ro ladzguiib, blee me zho ga; dzigo rëb me lo zho:

²⁰ —Goltsie len yadoo, grëse miech ne ndxie ga golnee lo zho, zeena gacnan zho zha ygaa zho guielmban ndzon ne nodeed Dios niina.

²¹ Biinigazh liu, silgaw laa zho bdziñ len yadoo; psilo zho laa zho noseed grëse miech ne ndxie ga.

Laga laa zho noseed miech len yadoo, laa men ne nac pxoz nroob ga, grë me zha ne nacnie me, bnabey zho ycaalsa zha ne nac wxtis ni grë zha non lo menguedz.

Zeene laa grë zha co pcaalsa, dzigo px-eel zho zha ne ziebee grë zha poxtl co ladzguiib. ²² Bdziñ zho ro ladzguiib, ni tib choot guiend len co; rzhitsaque wbire zho güeynie zho diidz, ²³ rëb zho:

—¡Choot guiend len ladzguiib! Dziits niooga bdziñ no, ga zo zha ne quianap; per zeene bzhiäl ro ladzguiib bziaab no, bdziñ no choot guiend len co.

²⁴ Grë pxoz ne rnabey, ni men ne zo lo menguiib ne rquianap yadoo, zeene bin zhow, rdzieldraa zho zha gon zho. ²⁵ Lëëtaaque sca no zho, zeene bdziñ tib zho rëb:

—Zha ne gon bloo to ladzguiib ga, laa zho nolaque len yadoo noseed zho miech.

²⁶ Lëëlëd brieer men ne zo lo grë menguiib ne rquianap yadoo, brieer me bla xaguiib me, güey zho niapse wen diidz güeyxi zho zha poxtl co len yadoo; sac rdzieb zho ngoquie grë miech co zho.

²⁷ Zeene bdziñnie zho zho lo grë zha wxtis co, dzigo rëb men ne nac pxoz nroob ga lo zho:

²⁸ —¿Pe nacne ronde to diidz? Led pso no diidz lo to cseetraade to miech zhiwseed mgui ne nac Jesús ga. Ni na gon dible lad guiedz nu nozhoobnen zhiwseed to i, haxta rcaadzol to no ne no bdziuut me.

²⁹ Dzigo pquiab Pedr rëb Pedr:

—Rdzion no mine rnabey samiech no, per glo none dziuun no mine rnabey Dios no. ³⁰ Men co bliladz grë pxozgol ne, ni men co gon bleeban Jesús, men ne sca psacsi to beet to lo cruz. ³¹ Ni meque zeynie Jesús gbaa, bzoob me Jesús cue me nëz derech; sac Jesús nac men ne rnabey, men ne rsilaa miech lo dol. Ni Jesús gon, gdeed guielbiini lo grëse men Israel gbiire gbig zho lo Dios stib; zeena gunquizhd me zho xtol zho.

³² Mine rnee no lo to nu diidzliw, nozhal bdziña, ni led loxaque nodsegaa; sinque ye Espíritu Sant men ne rxeel Dios racnien grë zha ne ron xtiidz me, ye men co quia-nee ganle ne nliw.

³³ Zeene bin zho sca rëb Pedr, blëeye zho, rzac zho tebaa gagazh gut zho gza zha poxtl co.

³⁴ Lad zha wxtis co no tib zha farisé lë Gamaliel, ye me rseed miech Xley Dios, tib

zha non nac me lo mengüedz; dzigo guso me bnabey me brieë grë zha poxtl co nëz ley, ³⁵ bnee me lo grëraa zha ne ndxie ga, rëb me:

—Grëse to mengüedz, laa naa rso diidz lo to, golcobey gon dien pe gun to zha qui. Golguien ganle, nongüelda ne lega mine gacladztaa to gun to zho. ³⁶ Golsoladz ganle, padzeela squi bio tib men ne brieelë Teudas, rëb me laa me niac tib zha ne nabey, ndal zha ne wbig lo me, goclo zho zig tap gayoo. Ni pasë me nabey, zeene laa me gut nëzrii nëzrec bliaal grë zha ne gocnie me ga. ³⁷ Laa len iz ne nodop lë miech, scaque brieequia tib men Galilé brieelë Judas. Ndal zha ne gocnie me, per zeene laa me gut scasaque nëzrii, nëzrec bliaal grë zha ne gocnie me; brieelodaque pe niun me. ³⁸ Gane nagon rne naa lo to, mazd peet gunde to zha qui, golsaan zho squise golsilaa zho. Tsow glu telne guicse miech biab wseed ne ziaadnie zho i, dzin dze ne nitlow. ³⁹ Laa telne nligaa Dios rsiaab guic zho squi rseed zho miech, niacxe zlëb to gnitlo to wseed ne ziaadnie zho. ¡Telne guiab to gnitlo tow, nande to nend Dios ga tilnie to!

⁴⁰ Grëse zha wxtis co bzoobdiag zho xtiidz Gamaliel, bien zho ne scataa nongüel gaca. Dzigo biire bredz zho grë zha poxtl co, bdiñ zho zho, ni biire pso zho diidz lo zho gbiiredraa zho cseed zho miech zhiwseed Jesús. Blozhse ga, dzigo laa zho psilaa zho.

⁴¹ Zeene laa zho wbi ga, rley zho por grëtaa mine pteed grë zha non co zho loxaque ne rliladz zho Jesús. ⁴² Ib psaand zho zhiwseed Jesús, gzobse dze rie zho yadoo ni rieque zho stib yu stib yu, rnee zho lo miech ne nli lëe Men ne zëëble diidz cxeel Dios lo guidzliu ga nac Jesús.

6

Bzo gadz zha ne gun xyudar poxtl

¹ Ni ne len dze co quiayac nzianraa miech ne rzëëb xnëz Jesús, dzigo psilo grë zha Gres rlisqui zho, rnee zho rdioond grë wnaa viud ne nac zha ladz zho zaacse; zeene rgaaz ncuane row zho, rgaad zho lal mine rgaa grë wnaa viud ne nac zha Israel.

² Dzigo nacne bredz gza tsiipchop poxtl co grëse zha ne nole xnëz Jesús ga, bnee zho lo zho rëb zho:

—Gacnan to ganle, grielodraa ne noque so dzian no dien zha ygaaz ncuane yquiin to, sac gon nongüelda csaan no mine nac xtsiin no, ib none guioeedraa no miech Xtiidz Dios. ³ Min co nagon, mazd golzo gadz zha bgui ne gun dziin co, lëeraasi golguien cho gzo to; golguib zha ne ndzinli, zha ne nixbiini, zha ne nacie Espiritu Sant; ⁴ zeena sca guiob lo no gzodiidznie no Dios, gnab no lo me, ni cseed no grëraa miech Xtiidz me.

⁵ Grëse zho rëb, wen sca gaca. Horcogazh psilo zho ble zho zha ne so gun dziin co. Bzo zho tib men lë Lip, tib men lë Prócoro, tib men lë Nicanor, tib men lë Timon, tib men lë Parmen, tib men lë Xteb, rlupaa dib zdoo me rliladz me Dios ni nacie Espiritu Sant me; ni tib men Antioqui lë Nic, mazd glo Nic goc tib zha ne bleyniedox grë zhiwseed zha Israel. ⁶ Dzigo güeynie zho gza zha co lo zha ne nac poxtl. Blozhse bnab poxtl lo Dios gacnie me zho, dzigo pxobnia poxtl guic zho, bnab zho lo Dios gdeed me güelbiini lo zho.

⁷ Zigse zie dze, laa Xtiidz Dios quia-gaazraa dib Jerusalén. Nzian grë zha ne rzëëb xnëz Jesús, haxta grë men ne nac pxoz, nzian zho laa zho bliladz me dib zdoo zho.

Bnaaz zho Xteb

⁸ Goc palal dzew, nzian grë milagr nroob ne run Xteb, sac tibaque sca dib zdoo me rliladz me Jesús, ni nacie Espiritu Sant me.

⁹ Laa tib dze, brieequia bla zha ne rie tib xyadoo win zha Israel, lë “Esclavos Libertados” gocladz zho ndildiidznie zho Xteb. Brieque zla zha Israel ne ziaad nëz Ciren, nëz Alejandrí, nëz Cilis, ni nëz Asia, ye zho gocgza zha co rlëe zho lo Xteb. ¹⁰ Gonse zho rlëbd xtiidz zho lo Xteb, sac niapse Espiritu Sant rdeed güelbiini lo me, rien me pe rnee me lo zho; ¹¹ dzigo bdiizh zho bla zha ne ptsieets diidz, pquidie zho rëb zho bin zho laa Xteb noneenë Moisés ni rneenë me Dios.

¹² Zeene bin mengüedza, blëe zho; nacne bnabeyaque zha ne rnabey lo mengüedz bgaa Xteb güeyzo zho me lo wxtis. ¹³ Ni

güeynie zho bla zha ne lega bnexuu, rëb zho:

—Nliw, rtsidil mgui qui xyadoo ne, rtsidil me xley ne. ¹⁴ Bdzionpaa no gon quia-nee me laa Jesús men Nazaret ne quiazeet zho dib i ctsil yadoo rii, ni ctsëe me ley ne psan Moisés lo xmen gol ne.

¹⁵ Horco zeene laa grë zha wxtis co ni grëraa zha ne ndxie ga bui lo Xteb, gon zho tib biini nroob ne riab lo me, masaque rlu me zig rlu tib xanjil Dios.

7

¹ Dzigo bnabdiidz men ne nac pxoz nroob ga lo Xteb, rëb me:

—¿Bnë dien pe nli quiayun luu grë ncuaane rnee zho i?

² —Grëse to ne nac to menladz naa —rëb Xteb—, laa naa rzaac to zig bets naa, zig pxozgaa naa. Golsiguiel golquiaadiag chop tson lan diidz ne gne naa lo to nu ganle: Padzeela, zeene bii no pxozgol ne Abraham dan ne lë Mesopotam, briequia Dios ndzon ne no gbaa lo me, rëb Dios ³ griee me ga, csan me grë menlidz me, tsie me nëz ne glutaa Dios lo me.

⁴ 'Nacne brie me xtan zha Caldé ga, bey me nëz Harán, ga wban me zhis. Laa zeene laa pxoz me gut, dzigo laa Dios bi-aadnie me nëz rii, zaatne mban ne nu nina. ⁵ Niicle ne laa me blanso lo liu rii, ni tib lë win zaatne so ni me bdeete Dios lo me; per rëb Dios ib grë zha xpëed me guiaanniew. ¡Ni laa me quianied mëed len dze co! ⁶ Rëbgazh Dios lo me, ib zieban grë zha xpëed me ga ladz ben dipse len tap gayoo iz, ga csaci miech zho gunçuñ zho zho dziin. ⁷ “Per ib tedsod sacsi naa zha ne csaci zho ga”, rëb Dios, “ni ga griee zho glanso zho nu, nu goolnie zho naa.”

⁸ 'Ni parne glu ib zac mine bnee Dios lo Abraham ga, dzigo psan me diidz grëse mëedbgui ne grieequia lo xtii Abraham none tso tib bey lad zho. Min co nagon, zeene laa xpëed me Isaac goc xon ngbidz, laa me bloo Isaac bey co. Scaque been Isaac xpëed me Jacob, ni scaque been Jacob gza tsiipchop zha ne goc xpëed Jacob; lëe gza tsiipchop zha co nagon goc pxozgol ne.

⁹ 'Ziese pxozgol ne ga, blëenie zho bets zho zha ne lë José, pto zho José lo men

ne zie wto nëz Egipt. Ni ne nacnie Dios José, ¹⁰ psilaa me José lo grëtaa guielnë ne bded José, ni gocien me José beenbey rey Egipt José. Ib psaand me José, bdeed me guielbiini lo José. Zeene gon rey co scataa men nixbiini nac José, dzigo bnabey me bzo José goc me tib men non ne bnabey dipse Egipt; haxta grë ncuaan non ne no lidz rey, me bnabeya. ¹¹ Lëëtaaque len iz ne nac me dziin, biaad tib gbin; dipse xtan zha Egipt, dipse xtan zha Canaán mban bded miech. Grë zha ne goc pxozgol ne ga, guindraa pe gow zho. ¹² Laa zeene bin Jacob laa zhobxtil bii no Egipt, dzigo pxeel me zho güeyxi zho zhob ga.

¹³ 'Zeene goc chop vuelz ziexi zho zhob Egipt, dzigoraac gocnan zho bets zho ga rnabey Egipt; niiclegaa rey cow, hor coraa beenbey me bets José. ¹⁴ Dzigo bnabey José güeyxi zho pxoz me Canaán, güeyxi zho tsieel zho, güeyxi zho xpëed zho. Lo grë zho rgaa zho tsongal tsiin, laa zho bdziñ Egipt.

¹⁵⁻¹⁶ 'Sca nacne laa Jacob bey Egipt. Ga gut me, dzigo güeyqueets zho me Siquem, tib len baa ne bzhii Abraham lo Hamor; scaque grë xpëed me zha ne goc pxozgol ne ga, ga gut zho. ¹⁷ Grë zha ne briequia lo xtii zha gol co, zha ne na guiab ne nac menladz ne, ndal iz ne bio zho Egipt ga, ni ndaldoo goc zho. Laa zeene ziaadyob cuee Dios zho ga zigne rëble me lo Abraham glo, ¹⁸ laa men ne nac rey Egipt len dze co, psilo ptsidil zho; sac rsoladzdraa me grëtaa dziin ne been José lo menladz me. ¹⁹ Psacsi me zho, been me zho zigne gocladztaa me, haxta bnabey me grëse mëedbgui ne ral gandraa zho win parne guet win.

²⁰ 'Len dze copaa nagon gol Moisés, tib mëed niow nac win. Tson mëe bloolan xnial win win, ²¹ laa zeene brieelodraa ngolan me win, dzigo güeysan me win tib ro guiubee Egipt, ga bdziel tib xindzoo rey win. Wnaa co gon win, biaan win lo me zig tib xpëed me; ²² haxta bioxco me grëse wseed ne rac zha Egipt, pseed win. Zeene laa win broob, tib men nixbiini goc win, niicle ne gnee wina, niicle ncuaane gunjaa wina.

²³ 'Choo iz rap Moisés, zeene biab guic me güeyted me lo menladz me. ²⁴ Dzigo gon me

laa tib zha Egipt quiaguin tib zha Israel; nacne bzëëbaque me bla me zho, beet me zha Egipt co.

²⁵ 'Sca been Moisés, nan me nien grë zha Israel ne Dios bzo me gacnie me zho, csilaa Dios zho ladznia zha Egipt; per biend zho ne scaw. ²⁶ Biini liu co, gon me laa chop zha Israel nodil, zie me nla me lo xtil zho, bnee me lo zho nonguield ga til zho, guien zho ganle menladzaque zho. ²⁷ Dzigo biasaque tib zha ne noquiaaw ga pcheep zho me, ntseeb rac zho rëb zho lo me: "¿Cho bzo luu guiaadnabey luu no, guiaadlisquigaa luu dien pe nodziuuu no?" ²⁸ ¿Te racladz luu ye gutaque luu no zigne beet luu zha Egipt co nieeg?"

²⁹ 'Zeene bin Moisés sca rëb zha co, hor co bzhoon me bey me nëz xtan zha Madián. Nëz co ptsieelnia me, ga gop tsieel me chop mëëdbgui.

³⁰ 'Choo iz goc no me nëz xtan zha Madián, tib dze no me cho gui Sinaí, tibaque zeene gon me laa tib anjl zo groltaa tib lo yag zarz, masaque rso bel lo yag co. ³¹ Bzee zdoo me, lëëtaque laa me zie gbiggax me, zeene bin me tsi Dios rëb Dios lo me: ³² "Naa nac Dios ne bliladz pxozgol luu Abraham, pxozgol luu Isaac, pxozgol luu Jacob."

'Zeene bin Moisés tsi Dios, per nli bdzieb me; lo dzeb co per ni blisdraa me lo me nwi me. ³³ Dzigo bnee Dios stib, rëb me lo me: "Blit lab luu, sac gax lo naa i zo luu. ³⁴ Laa dze nagon bdzin ne laa naa csilaa grë zha Israel ladznia zha Egipt; sac ran naa zha nactaa grë guielnë ne noded zho ga, ron naa blactaa roon zho nosacsi zha co zho. Ni luu bzooblo naa tsiebee zho ga."

³⁵ 'Dzigo laa Dios pxeel Moisés ziesilaa me zha Israel; niicle ne glo rëb zho lo me: "¿Cho bzo luu guiaadnabey luu no, guiaadlisquigaa luu dien pe nodziuuu no?" Per me bzo Dios bnabey lo zho, blee me zho Egipt.

³⁶ 'Nzian grë milagr, nzian grë ncuaane nroob ne gzee zdoo ne been Moisés blee me zho ga; zigtaa len guiedz Egiptow, zigtaa lo Nisdoo Nizhniew, zigtagaa grë dan bidz ne bio zho dipse len choo iz ne bzënie me zho ga.

³⁷ 'Moisés ga bzeet lo pxozgol ne, ne laa Dios gnabey lo xtiique zho grieequia tib men ne cxeel me guiadteed xtiidz me, zigne pxeel me Moisés.

³⁸ 'Zeene nonie Moisés zho grë dan bidz co, Anjl ne bnee lo me guic gui Sinaí, me pteed xtiidz Anjl co lo zho; me pcaania ley ne biaan lo ne ga, diidz ne rap guielmban. ³⁹ Per ib bind zho xtiidz me, lel gocladz zho mbiire ney zho Egipt stib, ⁴⁰ bnabey zho Aarón rëb zho: "Bzaa tib mdio tedner lo no gacnie no laa no guioo Egipt stib; sac loxaque biadbee Moisés no ga, na choot nand dien yo Moisés."

⁴¹ 'Dzigo bzaa zho tib ngon yeen goc zhimdio zho, haxta beet zho grë ma ne bloogon zho lo mdio co; bleyne zho ncuaane bzaania zho. ⁴² Nacne wbinladz Dios, psaan me zho; psilo zho bleyne zho grë ncuaane ran zho zhan gbaa. Been zho zigne bzeetse zha ne biadteed xtiidz me padzeela, zeene rëb zho:

Golsoladz ganle,

laa ne nleyne to naa dipse len choo iz ne bio to grë dan bidz co,

laa ne niut ma ne ngogon to lo naa,

⁴³ lel grë mdio ne bzaa to, mdio co bleyne to, lo mdio co pquitsgzhib to.

Mdio ne rnee to Moloc,

zaatne zieetaa to tibaque ney to lidza, zhmel mdio ne rnee to Renfán, pa csaan to ma.

Mincocxe waa, laa naa cuee to ladz to,

gzonëz naa to guey to grë dan ne riaan zitraa lo guiedz Babiloin.

⁴⁴ 'Len dze ne sca bio pxozgol ne grë dan bidz co, tib yu larse goc xyadoo zho, ga biotsow quie ne quia xley Dios. Dioszhal blu lo Moisés zha tsaa yu co. ⁴⁵ Goc bla iza, zeene blozh bnitlo Dios grë guiedz ne brin nu glo, laa Josué blansonieque yu co. Haxta len dze ne goc David rey, bii lëew nac xyadoo zho.

⁴⁶ 'David goc tib rey ne gocnziuu lo Dios, bleyne Dios me, dzigo gocladz me nzaa me tib yadoo nroob zaatne mbëzlo zho Dios.

⁴⁷ Per brieelod nzaa mew, Salomónraa goc rey ne bzaaw. ⁴⁸ Nli laa yadoo co biala, per tel Dios, men nroob nac me, led yed me cuëz len grë yu ne rzaa miech. ⁴⁹ Zigne

zhobneeque lo Xtiidz me, zeene znu rëb me:

Gbaa nac zaatne zoob naa,

laa lo guidzliu nac zaatne rzo ni naa.

¿Zha nadien nac yu ne nan to gzaa to cuëz naa?

¿Pa nadien guiab to gzaa to zaatne gdziladz naa?

⁵⁰ ¿Niacxe led naad bzaa gbaa?, ¿niacxe led naad bzaa guidzliu?

⁵¹ 'Golgona sca ganle —rëb Xteb—, zigne beenaque grë pxozgol to ga padzeela, scadaaque gon quiayun to niina. Miech nad, miech ntseeb zdoo nac to; ib ronde to mine rnee Espíritu Sant. ⁵² Tel pxozgol to, nêlthe gondze zho grë zha ne pxeel Dios biadnee xtiidz me; haxta beet zho grë zha ne bzeet ne laa Dios cxeel tib men peet xtold ne bzooblo me guiaad lo guidzliu. Ni niina ne laa Dios pxeel men co, scasaque been to, ptsidil to me, bnabey to bgaa me beet to me. ⁵³ Tibaque squi quia to quiaguiits to Xley Dios; xanjlpaa me baaadsana lo to, ni runde to mine rnabeya.

Beet zho Xteb

⁵⁴ Zeene bin zho sca rëb Xteb, blëeye zho haxta rowye ro zho rwi zho lo me.

⁵⁵ Laa me, ne nacie Espíritu Sant me, zeene blis lo me bui me nëz gbaa, gon me lo guielndzon ne no Dios, gonpaa me laa Jesús zo cue Dios nëz derech. ⁵⁶ Dzigo bnee me, rëb me:

—Ranpaa naa niina gon nzhialse gbaa, laa men ne pxeel Dios biaad lo guidzliu ga, laa me zo cue Dios.

⁵⁷ Mine been zho ptse zho diag zho, ni nguiedz roptsie zho parne gondraa zho pe rnee me; laa zho wbigbe bnaaz zho me, güeynie zho me tib lad ro guiedz. ⁵⁸ Zha ne goc textigw ga, blee zho lar ne mbix zho, bdziin zhow tib lo mgui nguieg lë Saul, mgui co pquianapa; laa zho psilo bdeedquie me.

⁵⁹ Sca nodeedquie zho me, laa me rnab lo Dios rnee me:

—Jesús, luu ne nac luu men ne rnabey, luu pcaania zhiespíritu naa.

⁶⁰ Dzigo pquiitsgzhil me, ni pquiaa me stib redz nroob bnab me lo Dios, rëb me:

—Dios, luu ne nac luu men ne rnabey, dol ne quiayun miech rii, laa naa rnab lo luu gunquizhd luu zhow.

Loxaque blozh sca bnee me, laa me gut. Ye mgui ne lë Saul ga, bdeed diidz sca beet zho me.

8

¹⁻² Dzigo pcaalsase bla zha bgui ne noxco rleynie Dios, güey zho güeyqueets zho Xteb; mban rac zho, bio zho xquielnë me.

Len dze co, psilo zha ne sca rlëenie zha ne rliladz Jesús, ptsidil zho grëse zha ne rliladz me; dipse len guiedz Jerusalén pquianal zho zho. Grëse zho bzhoon, zha ne zie grëraa guiedz ne ndxie nëz Judé ga, zha ne zieegaa nëz Samar; loxaque zha ne nace poxtl biaan Jerusalén. ³ Ntseeb rac Saul, rzac me tebaa zha gnitlogazh me grëse zha ne rliladz Jesús. Stib yu stib yu zie me, riebezho me zho lidz zho, mgui wnaasaque rey me riesëeb me zho ladzguiib.

Bdziñ Xtiidz Jesús nëz Samar

⁴ Laa grë zha ne bzhoon Jerusalén ga, zaatne zieetaa zho rnee zho Xtiidz Jesús lo miech. ⁵ Zig nac Lip, zeene bdziñ me tib guiedz nëz Samar, psilo me bnee me Xtiidz Jesús lo grë miech co. ⁶ Ndal zho rquiaa-diag mine rnee me, rzee zdoo zho ran zho grëtaa milagr ne run me. ⁷ Ndal grë zha ne noguitnie mendox, riac zho, rquiaadan grë mendox co redz zeene laa ma rzhoon; grë zha ne gutoo, grë zha ne nde ni, runguiac me zho. ⁸ Grëse miech ne no guiedz co, rley zho.

⁹⁻¹¹ Ga no tib men ne rool diidz dox, lë Simón. Ye me rzee zdoo miech grë ncuane run me. Nzianle iz sca noquidie me zho, grëse menguiedz runbey me, haxta niats rac me rnee me guiendraa cho zig me. Grëse zho, haxta grë zha non rbig lo me, rzac zho lëe poder ne rap Dios ga nacie me.

¹² Laa zeene bnee Lip lo grë miech co gocnan zho diidz ndzon ne nac Xtiidz Dios, bin zho zha racladz Dios gban zho, bin zho cho nac Jesús; grëse zha ne bliladza, mgui wnaasaque, laa zho brobnis. ¹³ Dzigo yeque men ne lë Simón ga bliladz Jesús, ye me laa me brobnis; zaatne zieetaa Lip nal

me zhits Lip, rzee zdoo me ran me grëtaa milagr nroob ne run Dios.

¹⁴ Grë zha poxtl ne no Jerusalén, zeene gocnan zho scataa ndal zha Samar nocania zhiwseed Jesús, dzigo pxeel zho Pedr grop Juan zie nëz co. ¹⁵ Laa zho zie gnab zho lo Dios ygaa grë zha ne bliladzle Jesús ga guielbiini cheñ Espíritu Sant; ¹⁶ sac zeene bliladz zho Jesús, loxaque brobnisse zho, gard ygaa zho guielbiini co. ¹⁷ Bdzin zho pxobnia zho guic grë men co, bnab zho lo Dios; dzigo grëse men co laa me bgaa guielbiini ne rdeed Espíritu Sant.

¹⁸ Zeene gon men ne lë Simón ga, ne loxaque rxobniase zha poxtl co guic grë miech co laa zho rgaa guielbiini ne rdeed Espíritu Sant, dzigo laa me rdeed dimi, ¹⁹ rëb me:

—Golneedz poder qui lo naa; zeena ye naa zha ne cxobniataa naa guic ygaa zho guielbiini ne rdeed Espíritu Sant.

²⁰ Pquiab Pedr rëb Pedr lo me:

—¡Bien ganle pe rnee luu! ¿Pa bin luu ye xpodder Dios zac si miech? ¡Tebaa ninagazh nitlo luu grë xtimi luu i! ²¹ Ni lalnu rieguald luu gun luu dziin rii, ni gdzindгаа dze gun luuw; sac mbed zdoo luu, zienied guic luu gun luu mine rnabey Dios. ²² Blee zhgab yozh qui guic luu, bnab lo Dios zeena togo squia zdoo me luu, gunquizhd me luu dol ne squi bza zdoo luu i; ²³ sac rlu niapse guielntseeb nonie guic luu, ni lëëque luu gon nosacsi luu ne squitaa noyunctal luu xtol luu.

²⁴ Pquiabse me rëb me:

—Golgun guielnzaac, golnab lo Dios yquia zdoo me naa, zeena ygaad naa grë guielnedox ne rnee to i.

²⁵ Blozhse bzodiidznie Juan grë miech co grop me Pedr, blozhse pseed zho zho Xtiidz Dios, laa zho wbire zey zho Jerusalén stib. Guiedz ne rdedtaa zho dib xtan zha Samar ga, rnee zho Xtiidz Dios lo grë miech co.

Bzodiidznie Lip tib men Etiopí

²⁶ Laa Lip no Samar ga, tib dze brieequia tib xanjl Dios lo Lip, rëb me tsie Lip nëz ne rrie Jerusalén zie nëz Gaza.

²⁷ Dzigo güey Lip nëz co. Tib dan ngana, lëëtaque laa tib men ne nac dziin lo rein ne lë Candás zie ga, dziin nroob nac me lo rein co, sac me ngotsow grëtaa dimi ne no

Etiopí. ²⁸ Zobse me tib len carret nroob zie me ga; znu wbirele me Jerusalén güeygan me Dios. Laa me zob leen co quialab me lo Xtiidz Dios mine pquiaa Isá, men ne biadteed xtiidz Dios padzeela.

²⁹ Dzigo bnabey Espíritu Sant Lip tsie Lip ygaa carret co lo Lip. ³⁰ Zeene bgaa carret co lo Lip, bin Lip pa lo nolab men co; nacre rëbchaa Lip lo me:

—¿Pe rien luu cho raquiet zaatne nolab luu i?

³¹ —Riend naaw —rëb me—, rquiin tib zha ne gnë lo naa dien zha naca.

Dzigo bredz me Lip biep Lip len carret co, güeysob Lip cue me.

³² Znu rnee zaatne nolab me ga:

Zigne racse mëcwxiil yeen zeene rnaaz zho ma rut zho ma, scadaa ndooladz goc me, peet beend me zeene laa zho zienie me. Ni zigne roptsied ma zeene rtsiib zho ma, scaque ni tib diidz ptsired me lo zho.

³³ Niicle ne gon zho scataa ndooladz me, per psacsi zho me.

¡Pa lotaa bdzin guielntseeb ne been grë menladz me!

Sac gon, ptiche zho xquielmban me lo guidzliu.

³⁴ Dzigo rëbchaa men co lo Lip:

—Bzhiguiel bnë lo naa dien, cho nu znu rzeet Isá lo rii. ¿Pe me bded min rii, te stib zhow ye?

³⁵ Dzigo rëb Lip lo me Jesús raquiet ga, ni bnee Lip grëraa mine nac zhiwseed Jesús.

³⁶ Laa zho no nëz, tibaque zeene bdzin zho tib lugar co no nis; rëbchaa me lo Lip:

—¡Bui ganle laa nis no nu! Mazd bzhiguiel pchoobnigazh naa.

³⁷ [—Zaca —rëb Lip—, totsaque dib zdoo luu rliladz luu Jesús.

—Rliladz naa me —rëb men co—, rliladz naa ne nli Xpëed Dios nac me.]

³⁸ Dzigo bnabey me blëz carret co ga. Biet me leen co grop me Lip bzëeb zho lo nis co, ga pchoobnis Lip me. ³⁹ Blozhse ga, laa Espíritu Sant blis Lip gondraa me Lip; per rley me laa me bio nëz stib, laa me zie.

⁴⁰ Zeene laa Lip brieequia, laa Lip nole guiedz ne lë Azot. Ga psilo me zigse zie me, guiedz ne rdedtaa me rnee me Xtiidz

Dios lo grë miech co. Sca bio me nöz, haxta bdziñ me guiedz Cesarea.

9

Goñ Saul Jesús

¹ Laa mgui ne lë Saul ga, per nli ntseeb rac me, tibaque ne laa guic me zienie gut me grëse zha ne rliladz Jesús. Güey me lo meñ ne nac pxoz nroob, ² bdeed pxoz co ti xtiidz me guey lo grë zha ne zo lo xyadoo zho nöz Damasc, parne gacnie zho Saul gnaaz zho grëse zha ne rliladz Jesús; zha ne ygaataa niicle mguiw niicle wnaaw, gzobdoo zho zho tsiesañ zho ladzguiib Jerusalén.

³ Laa Saul bio nöz, laa Saul zie. Zhile gdziñ me guiedz Damasc, tibaque zeene briequia ti biinidoo zhan gbaa biab zaatne zie me ga. Groltaa lo biinidoo co biaan me, biabgazh me liu. ⁴ Liu nix me, bin me zëeb ti tsi meñ co rnee lo me:

—Saul, Saul, ¿pe nacne quianañ luu naa?

⁵ —Been guieñzaac —rëb me—, bnë dien cho luu.

Dzigo pquiab meñ co, rëb me:

—Naa nac Jesús meñ ne squi quiatsidil luu. [Lëëque luu goñ nosacsi luu i, rzac luu zigne rzac ngon ne rcaañni, ni lëëque lo guiib lots ne rtseb zho ma riecaañni ma.

⁶ Rdzieb Saul, rzhidz me lo dzeb co rëb me:

—Bzhiguiel bnë dien, ¿pe racladz luu guñ naa niina?]

Rëbchaa Jesús lo me:

—Guche i, güey Damasc, ga gnë zho ganle pe nac miñe no guñ luu.

⁷ Zha ne ziegza Saul ga per nli bdzieb zho, haxta ni gacdraa gnee zho; loxaque tsi meñ co ron zho zëeb, per choot ran zho.

⁸ Laa Saul guche ga. Zeene laa me pxal lo me gwi me randraa me, jlaa lo me pcowle! Zha ne ziegzale me ga bzheñ nia me bdziñ me Damasc. ⁹ Tson dze sca brieelod nian me, gzase dze co dowd me, niicle peet god me.

¹⁰ Guiedz Damasc ga, ga no ti mgui ne rliladz Jesús lë Ananí; dzigo goñ me Jesús, bredz Jesús me. Pquiab me, ¹¹ dzigo rëbchaa Jesús lo me:

—Güey nöz ne lë Derech, zaatne nac lidz ti mgui lë Judas; ga bnabdiidz meñ Tars

ne lë Saul. Zeene quiazodiidznie me naa, ¹² blu naa lo me laa tib zha lë Ananí bdziñ rxobnia guic me, zeena gbiire gan me stib.

¹³ Pquiab Ananí rëb Ananí:

—¿Saul ye? Ziyon naa name zha nac grëtaa ncuaane noyüñ me Jerusalén, notsidil me grë zha ne rliladz luu. ¹⁴ Haxta pxoz nroob ne rnabey bdeed diidzbey gnaaz me grëse zha ne no nöz rii.

¹⁵ —Güey —rëb Jesús lo Ananí—, sac laa naa bzooblöle me, ib me tsie grë guiedz zit tsieseed me miech xtidz naa, me gneew lo grë zha rnabey, ni lo grëgaa zha Israel. ¹⁶ Na naa glu lo me ganle zha nac grë guieñne me gan me, zeene laa me quiayunle xtsin naa.

¹⁷ Dzigoraa güey Ananí zaatne no Saul ga. Bdziñ me, pxobnia me guic Saul, rëb me lo Saul:

—Saul, bina ganle bets, laa Jesús goñ, meñ ne rnabey, meñ ne briequia lo luu zeene ziaad luu nöz ga, laa me pxeel naa zial naa nu; zeena gnab naa lo me gunguiac me bziaalo luu, ni ycaania luu guieñbiini ne rneedz Espiritu Sant.

¹⁸ Zigne sca bnee Ananí, laa lo Saul biacgazh; lega zigne nac xmed mel nac grë ncuaan co brie lo me. Horcogazh laa me brobnis. ¹⁹ Blozh ga laa me dow stib, zhiga zhiga laa me wbire pcaa fuerz.

Goc bla dze no Saul lo grë zha ne rliladz Jesús Damasc ga, dzigo brie me ²⁰ güey me grë yadoo win ne no ga, rnee me lo grë miech co cho nac Jesús, rnee me lo zho ne nli Xpëed Dios nac Jesús.

²¹ Rzee zdoo grëse miech co ran zho sca rnee me, rneechaa zho:

—¿Led lëë meñ qui ga name scataa ntseeb rac Jerusalén, notsidil me grë zha ne rliladz Jesús? Conque nac diidz miñ co ziaad me nu, ziadnaaz me zho tsiesañ me zho lo grë pxoz ne rnabey.

²² Per zigse zie dze, mazdraa rac Saul tibaque ne rnee me lo grë miech co, lëë meñ ne zëëble diidz cxeel Dios lo guidzliu ga, nac Jesús. Grë zha Israel ne no ga, riendraa zho dien pe gliladz zho.

²³ Goc bla dze no me ga, laa grë zha Israel ne no ga blë lo me; bnediidz zho rëb zho laa zho gut me. ²⁴ Dze guieel riesobnap zho gzaase zaatne rap biedz nroob ne ndze

igo guiedz co nöz, riequiamböz zho ted me, gut zho me. Per gocnañ mew, ²⁵ nacne goļ ti pcow liu pcaalsa grē zha ne bliladz miñe bnee me, bloo zho me ti leñ chicuid nroob, bzoob zho doow dzigo blit zho me cho biedz nroob ne sca ndze igo guiedz co. Sca bdeeda diidz brie me ga.

Bdziñ Saul Jerusalén

²⁶ Zeene bdziñ Saul Jerusalén gocladz me ndziñ me lo grē zha ne rliladz Jesús ga, per leļ bdzieb zho zeene goñ zho me, sac rliladz zho ne nli yele me bzēeb xnöz Jesús. ²⁷ Dzigo güeynie Bernabé me lo grē zha ne nac poxtl, bzodiidz Bernabé lo zho zha goñ me Jesús zeene no me nöz zie me Damasc, zha rēb Jesús lo me; ni zha bdziebd me bnee me lo grē miech cho nac Jesús, leñ dze ne blöz me Damasc. ²⁸ Dzigoraa pcaania zho me. Laa zho gocgza me, zaatne zietaa zho zieseed zho miech, ib rdziebd me rnee me cho nac Jesús.

²⁹ Brieequia bla zha Israel ne rnee xtiidz zha Gres bdildiidznie zho me. Zhisaque goca, laa zho gocladz niut zho me. ³⁰ Zeene gocnañ grē zha ne rliladz Jesús gaw, dzigo güeyśañ zho me guiedz Cesarea; ga brie me laa me zie nöz Tars, zaatne nac ladz me.

³¹ Leñ dze co, grēse miech ne no xnöz Jesús, zigtaa zha ne no Judé, zha ne no Galilé, zha ne nogaa Samar, nguieel rac zho peet lo guiełxtseeb nodraa zho; zigse zie dze riogüicraa zho zha nac Xtiidz Dios. Grēse zho rioxco zho mban zho zigne rnabey me, tibaque nacie Espíritu Sant zho. Ni scagaa, zigse zie dze ndal grē miech ne rzēebraa rcaania Xtiidz Dios.

Rieted Pedr lo grē zha ne rliladz Jesús

³² Leñ ngbidz coque, zie ziaad Pedr rieted me lo grēse zha ne rliladz Jesús. Nacne güeyted me lo grē zha ne no Lida. ³³ Guiedz co, beenbey me ti mgui lē Ené, gocle xon iz nix mgui co, ib gacd sē me sac dipse me gutoo. ³⁴ Dzigo rēbchaa Pedr lo me:

—¡Ené, niinagazh goñ laa Jesús guñguiac luu! Na zeen guche i blis xta luu.

Zigne sca bnee Pedr laa meñ co biac, laa me guche ga. ³⁵ Grēse meñ Lida, grēse meñ Sarón zeene goñ zho sca biac meñ co, grēse zho bliladz Jesús.

³⁶ Gaxaque Lida riaan ti guiedz lē Jop. Jop ga no ti wnaa ne rliladz Jesús, lē Tabit (laa xtiidz zha Gres rnee zho me Dorc). Nquialadz me miech, grē zha ne guiend pe yquuin, ruñ me xyudar zho. ³⁷ Lega nacle blanguidz me, laa me gut.

Zha ne rliladz Jesús ga, laa zho noxco dien zha ygueets me. Bgaz zho me, blozhse ga güeyxob zho me sti leñ yu ne riaan nöz glaa. Xco co no zho, ³⁸ zeene bin zho laa Pedr no Lida. Pxeelaque zho chop zha bgui zienie diidz lo Pedr tsieniob Pedr Jop.

³⁹ Zigne bdziñnie zha co diidz, zienalgazh Pedr zhits zho. Bdziñ zho lidz meñ co, zolinöz güeynie zho Pedr zaatne zhoob me. Nzian grē wnaa viud ndxie ga, wbigbe zho lo Pedr, roon zho rlu zho grē lar ne bdib me. ⁴⁰ Dzigo bnabey Pedr brie zho ley grēse zho, laa me biaan ga, pquitsgzhb me bnab me lo Dios. Blozhse ga wbig me lo ngutoo co, bnee me lo me rēb me:

—Guche i, Tabit.

Zigne sca rēb Pedr laa lo ngutoo co bzhiäl, zeene goñ me laa Pedr zo ga, laa me bzobli. ⁴¹ Bzheñ Pedr nia me, bliso Pedr me, dzigo bredz Pedr grē zha ne rliladz Jesús ga, ni grē wnaa viud co; goñ zho laa me brieabanle.

⁴² Dipse lad guiedz co bzhoob diidz sca brieaban wnaa co; grē zha ne bina, ndal zho bliladz Jesús dib zdoo zho.

⁴³ Nzianlaa dze biaan Pedr ga, blöz me lidz Simón ti meñ ne rcuudz grē guid ma.

10

Güeyzodiidznie Pedr Cornel

¹ Guiedz Cesarea, ga no ti meñ lē Cornel, rnabey me lo ti partid menguiib lē partid Italian. ² Zigtaa mew, zigtaa grē menlidz mew, dib zdoo zho rliladz zho Dios, noxco zho mban zho zigne racladz Dios. Tibaque nonab zho lo Dios, ni nroob ncuaane rgad zho lo grē zha ne guiend pe yquuin.

³ Tib dze, bdzele dzew tibaque zeene gon me laa ti xanjł Dios bdziñ zaatne zo me, bredzlē anjł co me. ⁴ Dze rwi me lo anjł co, rdzieb me laa me pquiab. Dzigo rēbchaa anjł co lo me:

—Gocnañ ganle grēse miñe rnab luu lo Dios ron mew, ni ran me grētaa yudar ne squi quiaayun luu lo grē zha ne guiend pe

yquuin. ⁵ Gacxe waa, laa naa zialnie diidz lo luu: pxeel bla zha ne tsie guiedz Jop tsiexi zho ti men ne lë Simón Pedr. ⁶ Gax zaatne nac ro nisdoo, ga no ti men lëque Simón, rcuudz me grë guid ma; lidz men co ga rbëz me; ga tsieguib zho me.

⁷ Zeene laa anjl co zey, dzigo bredz me chop zha ne quia dziin lidz me, ni bredz me ti zhaguiib ne nacgrë zhaguiib ne zopaa gax lo me; dib zdoo zhaguiib co rliladz zho Dios. ⁸ Blozhse bzodiidz me lo gza zha co zha bzhaac me, dzigo laa me pxeel zho ziexi zho Pedr Jop.

⁹⁻¹⁰ Biini liu, zig rwe ngbidza gaxle Jop zie zho. Lëëtaaque hor co laa Pedr biep nëz glaa guic yu ne rbëz me ga. Rcaabedz me, dzigo laga noyacro ncuaane gow me laa me biep guic yu co ziezodiidznie me Dios. ¹¹ Dios nozodiidznie me, tibaque zeene gon me laa ti lar nroob ziad-zëëb zhan gbaa, nzhidoo gzatap nëza laaw bdzin lo me. ¹² Grë lose ma no lo lar co, ga no ma ne rzë gza tap ni, no grë ma ne rzë zigne rzë meel, ni no grë ma ne rsiibe. ¹³ Horco bin me ti tsi men co, rëb lo me:

—Pedr, ma ne racladztaa luu gow luu zac gut luu ma.

¹⁴ Pquiab me rëb me:

—iMin cogaa nagon grieelod! Wlaltaa gard gow naa grë ma beed qui.

¹⁵ Rëbchaa men co lo Pedr:

—Grë ncuaane beenlayle Dios, nodne gnee luuw ncuaan beed.

¹⁶ Blulo lar co tib, bluloquew stib, laa zeene biontaa gon mew dzigo laaw biire bzoquia nëz gbaa.

¹⁷ Lëëtaaque laa Pedr no zhgab dien pe nacne sca gon me lar co, laa zha ne pxeel Cornel ga bdzin ro yu ne rbëz me ga, ¹⁸ rnabdiidz zho me.

¹⁹ Zhgab co no Pedr, zeene rëb Espiritu Sant lo Pedr:

—Laa tson zha bgui gon ziaadguib luu. ²⁰ Biet, bnee lo zho. Ib peet tsienied guic luu güeynal zhits zho, sac naa bnabey ziaad-xi zho luu.

²¹ Dzigo laa Pedr biet ga, bdzin me lo zha ne pxeel Cornel ga, rëb me lo zho:

—Naa nac Simón Pedr. iPe nac mandad ne ziaad to?

²² Pquiab zho rëb zho:

—Laa no ziaad xmandad Cornel, ti men ne rnabey lo menguiib Cesarea. Laa me pxeel no ziaad-xi no luu, sac ti xanjl Dios rëb lo me cxeel me zha ne guiaad-xi luu tsie luu lidz me, tsienee luu lo me. Ti miech wen nac me, dib zdoo me rliladz me Dios, grëse zha Israel rleyne zho me.

²³ Dzigo bredz Pedr zho bded zho nëz len yu; ga biaan zho wdze co. Biiniraa liu zienie zho me, ye palal zha Jop, zha ne rliladz Jesús zianal zhits me.

²⁴ Dze ne rac chop ngbidz brieë zho Jop, laa zho bdzin Cesarea. Laa Cornel bredzle grë menlidz me, grë zha ne ndzieeldiiz me; ndal nac zha ne ndxienie me lidz me, quiambëz me Pedr. ²⁵ Zeene laa Pedr bdzin, brieë me güeydzieelo me Pedr, pquitsgzhib me lo Pedr nan me niun me Pedr zigne riegan me Dios. ²⁶ Dzigo bliso Pedr me, rëb Pedr lo me:

—iGuso i, nodne yquitsgzhib luu lo naa! Bien ganle samiechaque luu nac naa.

²⁷ Dzigo laa menguiib co guso ga. Nozodiidz zho laa zho bzëëb len yu. Zeene bdzin zho zaatne ndxie grë miech co, ²⁸ psilo Pedr bnee me lo zho, rëb me:

—Nanle to ganle zha Israel naa, ni ib lo xley no rnabey nodne ziaab no lidz grë zha zit, per ni ctsieelsad no zho; per laa niina laa Dios blu lo naa, grëse miech ne beenlayle me nod pe nacne gbix zdoo naa gan naa zho. ²⁹ Gacxe waa, zigne gocnan naa laa to rbedz naa, zialnalgazh naa zhits zha ne pxeel to. Nana sca, golinë dien pe nacne bredz to naa.

³⁰ Dzigo bzodiidz Cornel zha bzhaac me, rëb me:

—Nadze rac tap ngbidz ga, zig znaw gon, no naa lidz naa nu nocuan naa, ni nonab naa lo Dios. Tibaque zeene gon naa laa ti mgui zole lo naa, masaque riaazbel xab me, ³¹ në me: “Gocnan ganle grëse mine rnab luu lo Dios ron mew, ni ran me grëtaa yudar ne squi quiayun luu lo grë zha ne guiend pe yquuin. ³² Gacxe waa, laa naa zialnie diidz lo luu: pxeel bla zha ne tsie guiedz Jop tsiexi zho ti men ne lë Simón Pedr. Gax zaatne nac ro nisdoo, ga no ti men lëque Simón, rcuudz me grë guid ma; lidz men co ga rbëz me; ga tsieguib zho me.” ³³ Sca nagon në men co lo naa, nacne

bnabey naa biaad-xi zho luu; ni xquizhгаа luu ne laa luu ziaad. Dios zobwi ganle, grëse no laa no ndxie nu par yquiaadiag no mine bnabey me luu gnë luu lo no.

³⁴ Dzigo rëbchaa Pedr:

—¡Naraa rien naa, led yed Dios cue miech dien cho nac zha Israel, cho nacгаа zha zit! ³⁵ Sinqe grëse miech lo guidzliu, tel pa guiedztaa nac zho, rcaania me zho totsaque ron zho mine rnabey me, ni rioxco zho zaacse rban zho. ³⁶⁻³⁷ Rgobey naa ziyonle to Diidz Ndzon ne pxeel Dios lo menladz naa niina wriin. Lo Diidz Ndzon co rnee, ne zac guiaanwen miech lo Dios, totsaque gliladz zho cho nac Jesús, men ne zëëble diidz ga cxeel me (ni Jesús gon bzaa grëtaa ncuaane no). Zig nac dib Judé, desde ne psilo Juan pseed me miech Galilé, laa zho gocnana. ³⁸ Ni nanaxe to ganle, bdeed Dios poder lo Jesús, pxeel me Espíritu Sant gocnie Jesús. Zaatne bdedtaa Jesús, pquia zdoo me miech, grë zha ne nosacsi mendox psilaa me zho ladznia ma; sacne nli Dios nacie me. ³⁹ No ne nac no zha ne bzianie me, grop lo no bdzian no grëtaa milagr ne been me, zigtaa Jerusaléna zigtagaa dib Judéw. Jerusalénpaa ga beet zho me pquiaa zho me lo cruz, ⁴⁰ per zeene goc tson ngbidza laa Dios bleeban me, ni bneedz Dios diidz biire bdzian no me. ⁴¹ Led grëdraa miech gon me, loxaque nose bdzian me; sac ib Dios bzooblo no dzian no grë dziin ne been me. Haxta bdioownie no me, bdionie no me, ⁴² ni pxeel me no gnee no lo miech gacnan zho ganle laa Dios bzo me, me gun guielwxtis gal dze ne laa Dios cuedz grëse miech, zigtaa zha guta zigtagaa zha mbana. ⁴³ Me ga bzeet grë zha ne biadteed Xtiidz Dios lo miech padzeela, zeene rnee zho: “Grëse zha ne gliladz cho nac me, silaa Dios zho lo dol.”

⁴⁴ Laa Pedr bii quianeeque, zeene laa grë zha ne noquiaadiag ga bgaa guielbiini ne bdeed Espíritu Sant lo zho. ⁴⁵⁻⁴⁶ Grë zha Israel ne ziegza Pedr ga, zeene gon zho laa grë zha co psilo quianee stib diidz, ni rdeed zho xquizh lo Dios, bzee zdoo zho gon zho ye grë menzit rgaa guielbiini ne rdeed Espíritu Sant. ⁴⁷ Dzigo rëbchaa Pedr:

—¿Peraa nadien gbiaaz ne, ne cchoobnisgazhd ne zha rii? Laa ne bdzianle ganle

zigne rdeed Espíritu Sant guielbiini lo zha Israel, scaque bdeed me guielbiini lo zho.

⁴⁸ Dzigo bnabey Pedr brobnis zho, laa zho bzëëb xnëz Jesús.

Blozh ga bnee Cornel lo Pedr cuëz me ga ti bla dze.

11

Bzodiidz Pedr zha güey me lidz Cornel

¹ Grë zha poxtl ne no Jerusalén, ni grëraa zha ne riladzle Jesús zha ne no Judé, bin zho sca bliladz gza menzit co Xtiidz Dios.

² Dzigo zeene laa Pedr bdzin Jerusalén güey bla zho güeytildiidznie zho Pedr, ³ blisqui zho lo Pedr pe nacne güey Pedr lidz menzit, pe nacne güeytownie Pedr zho.

⁴ Dzigo psilo Pedr bzodiidz me lo zho zha nacne güey me lidz men co, rëb me:

⁵ —Guiedz Jop no naa, tib dze lëëtaque nozodiidznie naa Dios, tibaque zeene gon naa laa ti lar nroob ziad-zëëb zhan gbaa, nzhidoo gzatap squina laaw ziaad nëz lo naa. ⁶ Zeene bdixlo naa bui naa dien pe quia lo lar co, gon naa niapse ma no lo co, grë ma ntseeb, grë ma ne rzë gzatap ni, grë ma ne rzë zig rzë meel, ni grë ma ne rsiibe. ⁷ Lo grë ma co nowi naa, zeene bin naa ti tsi men co, në lo naa: “Pedr, ma ne racladztaa luu gow luu, zac gut luu ma.”

⁸ Dzigo pquiab naa rep naa: “Min cogaa nagon grieelod, wлтаа gard gow naa grë ma beed qui.” ⁹ Nëchaa me lo naa: “Grë ncuaane beenlayle Dios, nodne gnee luuw ncuaan beed.”

¹⁰ Tson vult sca gon naa lar co. Blulow tib, bluloquew stib, zeene biontaa gon naaw dzigo laaw biire zey gbaa.

¹¹ Loxaque blozh gon naa lar co, laa tson zha bgui blanso ro lidz men ne blëz naa ga, pxeel men Cesarea co zho ziaadguib zho naa. ¹² Ni laa Espíritu Sant bneeque lo naa, no ganał naa zhits zho, niicle ne zhazit nac zho; nacne bianał naa. Ye gza xoop zha ne zialnie naa nu bzë bio no.

¹³ Bdzin no lidz men co, psilo me bzodiidz me lo no zha bzhaac me, në me len yu no me, zeene gon me ti xanjł Dios, rëb anjł co lo me cxeel me bla zha ne tsie Jop tsixi zho naa ¹⁴ zeena gane naa lo me zha grieelo csilaa Dios me lo dol grë menlidz me.

¹⁵ Laa naa psilo quiane lo me grë menlidz me, zeene grëse zho laa zho pcaania Espíritu Sant, ni bgaa zho grë guielbiini ne rdeed me zigne bgaaque new. ¹⁶ Ga nagon psoladz naa xtiidz Jesús men ne rnabey ne, zeene znu në me lo ne: “Nli nisse pchoobnis Juan miech, sangue to zgaa to guielbiini ne rneedz Espíritu Sant.” ¹⁷ Sca nagon pcaania zho Espíritu Sant, laa zho bgaa guielbiini ne rdeed me zigne bgaaque new. ¿Cho nac naa nadien ne glisqui naa mine run Dios?

¹⁸ Zeene blozh bin zho grë mine bnee Pedr ga, peet rëbdraa zho. Psilo zho rleyne zho Dios, rdeed zho xquizh lo me; sac hor coraa bien zho ye grë menzit zrieelo gbiz zho lo Dios, gdeed me ti guielmban ndzon ne gdziñd dze lozh lo zho.

Bliladz zha Antioquí Xtiidz Dios

¹⁹ Zeene sca pquianal zho grë zha ne rliladz Jesús len dze ne beet zho Xteb ga, nëzrii nëzrec bliiaal zho. No zho bdziñ haxta Fenicia, no zho bdziñ Chipr, nogaa zho bdziñ nëz Antioquí. Zaatne bdziñntaa zho bnee zho cho nac Jesús, per loxaque lo grë menladz zho bnee zhow. ²⁰ Niicle ne scaw, lëëque grë zha Israel ne no Chipr, zha ne no Ciren, zeene laa zho bliladz Jesús güey zho guiedz Antioquí, bnee zho lo grë zha zit co cho nac Jesús. ²¹ Ni ne nacie Dios zho, ndal grë miech co bzëeb xnëz Jesús.

²² Grë zha ne no Jerusalén, zeene gocnan zhow pxeelaque zho Bernabé güey Antioquí. ²³ Zeene bdziñ Bernabé Antioquí, rley me gon me scataa quiayunlay Dios grë miech co; dzigo pso me diidz lo zho ib csaand zho zhiwseed Jesús.

²⁴ Ti men dib zdoo rliladz Dios nac Bernabé, nacie Espíritu Sant me, ti miech wen nac me; gane zeene laa me bdziñ ga nzianraa zha ne bliladz Jesús.

²⁵ Goc palal dzew, dzigo güey Bernabé guiedz Tars güeyxi me Saul, bdzinnie me Saul Antioquí. ²⁶ Dipse ti len iz blëz zho ga grop zho, blozh pseed zho grë zha ne bliladz Jesús. Ga glopaa psilo ne laa grë zha ne rliladz Jesús brieelë CRISTIAN.

²⁷ Len iz co blalaa zha ne noteed xtiidz Dios no Jerusalén. Dzigo brieë zho ga güey zho Antioquí. ²⁸ Lad co no tib men lë

Agab, psiaab Espíritu Sant guic me bnee me laa ti gbin dox gan miech nëz Israel. (Ni nligaa scase goca, lëë gbin co biaad len iz ne zobnabey men ne lë Claud.)

²⁹ Grë zha ne rliladz Jesús Antioquí, zeene bin zho sca rëb Agab, nacie bnediudz zho grë zho, tel palalaa ncuaane rgaa lo zho tib tib zho gdeed zhow gaclo ti gon cxeel zho lo zha Judé. ³⁰ Dzigo ptop zho gon co, zeene laaw goclo, pxeel zho Bernabé grop Saul güeyana lo grë zha rnabey ne zo lo zha ne rliladz Jesús nëz Judé.

12

Bio Pedr ladzguiib

¹ Len dze co psilo rey Herod notsidil me grë zha ne rliladz Jesús. ² Bnabey me bgaa Jacob bets Juan, beet zho Jacob lo spad.

³ Zeene gon Herod rley grë zha ne rnabey lo menquiedz Israel ran zho zha rsacsi me grë zha ne no xnëz Jesús ga, dzigo bnabeyaque me bgaa Pedr bio Pedr ladzguiib; lëëtaque len dze co noyac lni Pascw. ⁴ Laa Pedr no ladzguiib, bnabey me bzo xon nëz menquib quianap Pedr. Quiambëz me tedse lni co, laa me cuee Pedr gan grë menquiedz zha csacsi me Pedr.

⁵ Grë zha ne rliladz Jesús, zeene gocnan zho scataa ndxienap menquib Pedr no Pedr ladzguiib, psilo zho tibaque quianab zho lo Dios gacnen me Pedr.

⁶ Nacle diidz pa dze cuee Herod Pedr. Wdze ne guini liu co, laa Pedr nixguesse len ladzguiib; tib ga caden zob ti nia me, tibga menquib tib nëz cue me, ni zhaaque zo zla zha ne quianap ro ladzguiib. ⁷ Tibaque zeene biab ti biinidoo len ladzguiib, laa ti xanj Dios bdziñ ga. Bdziñ me, pcaannia me cue Pedr, pcuaan me Pedr, rëb me:

—iNa zeen guche i!

Zigne sca bnee anjl co, lega zhal caden ne zob nia Pedr ga bziala brieew nia Pedr; ⁸ dzigo rëbchaa anjl co lo Pedr:

—iPxidoo len luu, pquiaa lab luu ni luu!

Blozhse pxidoo Pedr len Pedr, ni pquia lab Pedr; rëbchaa anjl co:

—iWbix xab luu na, zeen dënal zhits naa!

⁹ Nalse Pedr zhits anjl co laa Pedr brieë ga. Riend Pedr ne nli nosilaa anjl co

Pedr, masaque rzac me nonixquieel mew. ¹⁰ Bded zho chop len yu zaatne ndxie men GUIIB ne quianap, laa zho bdziñ zaatne quia puert GUIIB ne rriee ro nēz. Zigne bdziñ zho, zhal puert co bzhiala; laa zho brieē. Bzēnie anjl co Pedr spalal, zeēne gol zho zaatne rdedlsa nēz co, dzigo laa anjl co psan Pedr ga.

¹¹ Dzigoraa bien Pedr led nonixquieel Pedr, nli Dios pxeel xanjl me güey silaa Pedr ladznia Herod, zeēna gleyd zha Israel nian zho grē GUIELNĒ ne nded Pedr.

¹² Dzigo laa Pedr zie nēz lidz Marí, xniaa Juan Marcw; lēētaque hor co nzian zho ndxie ga quianab zho lo Dios. ¹³ Zeēne bdziñ Pedr pcaañnia Pedr ro yu. Brieē ti ndzooop ne quia dziin ga lē Rode, zieso ndzooop dieñ chow.

¹⁴ Zeēne beenbey ndzooop co tsi Pedr, rley ndzooop. Lo GUIELBLEY co niicle pxaldaque ndzooop ro yu, rias ndzooop zienie ndzooop diidz lo grē zha ne ndxie ga; rēb ndzooop laa Pedr bdziñ ro yu ga. ¹⁵ Per bliladzd zhow.

—jDieen pe rool luu! —rēb zho—. jNcuaane gliladzd ne rnee luu!

—jCoo, nli lēē mew! —rnee ndzooop—, laa me zo ga.

—jLed meda, —rnee zho—, bod anjl ne quianap mew!

¹⁶ Sca no zho, laa Pedr bii nocaañnia ro yu. Zeēne güey zho pxal zho ro yu, bzee zdoo zho gon zho nli Pedra, laa Pedr zo ga.

¹⁷ Dzigo blunia Pedr lo zho gnee nguiedzd zho; laa zho bzēēbnie Pedr len yu. Ga psilo Pedr bzodiidz Pedr lo zho zha güeybee xanjl Dios Pedr len ladz GUIIB; ni pso Pedr diidz lo zho sodiidz zhow lo Jacob, ni lo grēraa zha ne nacgrē zho. Blozhse ga, laa Pedr brieē ga.

¹⁸ Zeēne biini liu, grē men GUIIB ne pquianap Pedr len ladz GUIIB ga, rdziel draa zho zha gun zho; sac ib biend zho dieñ yo Pedr. ¹⁹ Zeēne laa Herod pxeel zha ne ziebee Pedr ladz GUIIB, pa sēle Pedr. Dzigo güey zho güeynie zho diidz lo Herod; nacne bnabey Herod gocredz grē zha ne pquianap Pedr ga, pquiep Herod zho; blozhse ga, bnabey Herod gut zho gzase zho. Bded ga, laa Herod brieē Judé zey me Cesarea.

Dow mziog Herod

²⁰ Len dze co, pcaalsa men GUIEDZ Tir ni men GUIEDZ Sidón güeynee zho lo Herod; sacne rlēēnie Herod zho. Lēēque ti men ne nac dziin lo Herod lē Blast güeynie zho bnee lo Herod, bnab zho tilniedraa me zho, niicle zhagaaw laa zho gbig lo me; sac grēse ncuaane rquiin zho, grē GUIEDZ ne rnabey me ga rrieew.

²¹ Dzigo bzo Herod ti dze ne tsie zho tsiezodiidznie zho me. Zeēne gol dze co, got me lar niazh ne racw rey; bdziñ me bzob me lo zhixcan me, psilo me bnee me lo grē miech co. ²² Goc palo quianee me, psilo zho rleynie zho me, nguiedz roptsie zho rnee zho:

—jLed miechdraa i gon! jTi diosle i nac men qui quianee lo ne!

²³ Laa me bii quianeeque, zeēne biet tib xanjl Dios bdiñ me, psilo dow mziog me, gagazh gut me. Sca gut me, sac beenbeyd me ne Dios nac men ne non, men ne rnabey. ²⁴ Laa Xtiidz Dios, zigse zie dze laaw quiagaazraa lo miech; ndal zha cub ne nozēēb xnēz me.

²⁵ Jerusalén ga no Bernabé grop Saul len dze co; zeēne bialse xtsiin zho, laa zho brieēque ga laa zho zie nēz Antioquí zienie zho Juan Marcw.

13

¹ Lo grē zha ne rliladz Jesús Antioquí, nzian zha ne noteed Xtiidz Dios, nzian zha ne rseed miech Xtiidz Dios no lo zho. Lad grē zha co no Bernabé, no ti m GUII lē Simón ne rnee zho “Men Yaas”, no ti men Ciren lē Lus, gaque no Saul, ni ti men lē Manaén, bets pchoob Herod.

² Laa ti dze lēētaque ndxie zho noyoolnie zho Dios ni nocuan zho, zeēne laa Espiritu Sant bnee lo zho, rēb me:

—Golcueextso Bernabé i grop Saul, zeēna csilo zho lo dziin ne gded naa gun zho.

³ Blozhse pcuan zho, blozhse bzodiidznie zho Dios, dzigo pxobnia zho GUII Bernabé grop Saul, bnab zho lo Dios gacnieñ me zho; bnee zho lo zho, laa zho zie.

Güey Saul Chipr grop me Bernabé

⁴ Ga brieē Bernabé grop Saul zienie Espiritu Sant zho bdziñ zho GUIEDZ Seleucia, Seleucia bzēēb zho barcw laa zho zie

něz Chipr (ti guidzliu win ne no lo nisdo).
⁵ Ye Juan Marcw zienie zho guṇ xyudar zho.

Bdziṇ zho ro guidzliu win co zaatne ndxie guiedz Salamin, biet zho barcw güey zho grē leṇ xyadoo meṇ Israel ne no ga, güeyseed zho miech Xtiidz Dios. ⁶ Ga brieē zho güeyted zho dipse lo guidzliu co bdziṇ zho guiedz Pafos; guiedz ne bdedtaa zho bnee zho Xtiidz Dios lo miech. Pafos, ga beenbey zho ti meṇ Israel lē Barjesús (laa xtiidz zha Gres rnee zho me Elim). Rquidie me rnee me xtiidz Dios noteed me lo miech, per diidz dox rooḷ me.

⁷ Guiedz co ga no ti meṇ lē Sergio Paul, meṇ co zob rnabey guidzliu co; dzigo lo meṇ co ga no Barjesús. Ti meṇ nixbiini nac meṇ ne lē Sergio ga, no me liaadz gacnaṇ me zha nac Xtiidz Dios; dzigo bnabey me gocredz Bernabé grop Saul. ⁸ Zeēne bdziṇ zho psilo Barjesús quiaguib me dien pe yquiaaqui yquiaadiagd meṇ rnabey co Xtiidz Dios.

⁹ Dzigo buitipaque Pabl lo Barjesús (Pabl nac sti lē Saul), ni ne nacie Espíritu Sant Pabl ¹⁰ rēb Pabl lo me:

—¡Biche nu zhin meṇdox! Zhin meṇdox goṇ nac luu, squitaa noquidiee luu miech, notsidil luu diidzli. ¿Zha rna dze ne csaan luu mine nac luu i, squi notsidil luu Xtiidz Dios? ¹¹ Goṇ ganle, ¡laa Dios csaabzi luu, niinagazh laa lo luu ycow, ni spalal xbiini ngbidz gandraa luu!

Zigne sca rēb Pabl laa lo meṇ co pcow, nēzrii nēzrec zie me racladz me dien cho gnaaz nia me.

¹² Zeēne goṇ meṇ rnabey co sca pcow lo Barjesús, hor co bliladz me Xtiidz Dios, bzee zdoo me goṇ me scataa poder ne ziaadnie zhiwseed Dios.

Bdziṇ zho guiedz Antioquí

¹³ Bded ga, laa Pabl gza Bernabé ni Juan bzēēb barcw stib, laa zho zie nēz xtan zha Panfil. Bdziṇ zho guiedz Perg laa zho brieē leṇ barcw, ga ptso Juan lo zho, laa Juan zey nēz Jerusalén; ¹⁴ laa zho bio nēz zie zho nēz xtan zha Pisid, bdziṇ zho sti guiedz lē Antioquí.

Zeēne goḷ dze ne rdziiladz miech lo dziin, güey zho xyadoo zha Israel. ¹⁵ Blozhse bded zha ne blab lo guits ne pquiaa Moisés,

ni blab zho mine pquiaa grēraa zha ne biadteed xtiidz Dios padzeela, dzigo laa meṇ ne rnabey yadoo co bnee lo Pabl grop Bernabé, rēb me lo zho:

—Telne racladz to gnee to chop lan xtiidz to, zac gnee tow niina.

¹⁶ Dzigo guso Pabl, blunia me lo grē zha ne ndxie ga cuedze zho, rēb me lo zho:

—Grēse to ne ndxie to nu, zigtaa tow ne nac to meṇladz naa, zigtaa togaaw ne nac to zha stib guiedz zha ne noxco gban zigne rnabey Dios; goḷquiaadiag chop lan xtidz naa ganle gne naa lo to:

¹⁷ 'Dios ne rliladz no nac no meṇ Israel, ib me bzooblo grē pxozgol no laa zho bgab lo me. Me gocnieṇ zho zeēne bio zho ladz meṇ Egipt, ni me güeysilaa zho ga, blu me ganle ne nli meṇ nroob nac me. ¹⁸ Dipse leṇ choo iz ne bio zho grē dan bidz ne bded zho ga, pxcw me grētaa xquieḷntseeb zho.

¹⁹ Blozh ga, bnitlo me gadz guiedz nroob ne ndxie xtan zha Canaán, bdeed me liu co lo zho. ²⁰ Ni dipse leṇ tap gayoo groḷ iz, me bzooblo grē zha ne bzo bnabey lo zho; lēē lultm zha ne bzo me ga bnabey lo zho goc profet Samuel. ²¹ Blozh ga, laa zho bnab so ti rey gnabey lo zho, nacne bzo me Saúl, bzob Saúl choo iz goc me zhirey zho. Lēē pxoz Saúl ga brieelē Cis, meṇ ne ziaad lo xti pxozgol no Benjamín. ²² Zeēne laa Dios ptiche dziin co lo Saúl, dzigo bzo me David goc rey. Lēē David ga rzeet Dios zaatne znu rnee: “Rleynie naa xingan Isaí zha ne lē David, laa naa goṇle ib zuṇ David mine gnabey naa.” ²³ Ni lo xti David co nagoṇ brieequia Jesús, meṇ ne pxeel Dios lo guidzliu biaadsilaa miech lo doḷ, zigne psanle me diidz lo xmengol no padzeela.

²⁴ 'Leṇ dze ne merle xoobneṇ cho nac Jesús, leṇ dze co bnee Juan Bautist lo grē meṇ Israel: csaan zho xquieḷntseeb zho gnab zho perdon lo Dios, zeēna chobnis zho. ²⁵ Laa zeēne zhile gdziṇ dze ne gut zho Juan, dzigo bnee me lo miech rēb me: “Golgacnaṇ ganle, led naad nac meṇ ne quiambēz to ga cxeel Dios. Merle guṇbey to me, ti meṇ non nac me, per ni par gac naa ti ngundziin win ne glit lab me ni me raguald naa.”

²⁶ 'Golgacnaṇ sca ganle bets: zigtaa tow ne ziaad to lo xti Abraham, zigtagaa tow

ne nac to miech stib guiedz zha ne rliladzle Dios, ib laa Dios pxeel Jesús csilaa me ne lo xtol ne grëse ne. ²⁷ Grë zha Jerusalén ni grë zha ne rnabey lo zho, ib biend zho cho nac Jesús, niicle ne scataa gzobse dze ne rdziiladz zho lo dziin, rlab zho lo grë guits ne pquiaa zha ne biadteed xtiidz Dios padzeela; haxta bnab zho gut me zigne bneese grë zha co. ²⁸ Niicle ne gon zho peet xtol me, niicle ne brieequiad dol ne pquiaqui zho me, per bguib zho bdeeda diidz bnabey Pilat gut me.

²⁹ 'Blozhse psacsi zho me, pteed zho me grëse zigne bzeetle grë zha ne biadteed xtiidz Dios ga, dzigo güey zha ne blit me lo cruz, güeyqueets zho me. ³⁰ Per bleeban Dios me. ³¹ Grë zha ne güeynal zhits me zeene brie me Galilé bdiin me Jerusalén, nzian zho gon me; ni niina grëse zho laa zho quianee lo miech ganle cho nac me.

³² 'Scaquegaa no grop no Bernabé, laa no ziaadnie diidz lo to gacnan to ganle niina ne laa Dios bleeban Jesús, laa me been mine bnee me lo pxozgol ne padzeela. ³³ Lëë Jesús ga raquiet lo Salm brop, zaatne rnee: "Xpëed naa nac luu. Desde nadze laa zho gunbey ne Xpëed naa nac luu." ³⁴ Ni bzeetle Dios ne laa me cueeban Jesús, bzeetle Dios xin xcuerp me len baa; min co ga raquiet lo Xtiidz me, zaatne rnee: "Zunlay naa luu, zigne bnese naa lo David gun naa." ³⁵ Laa stib lo Salm ne pquiaa David rnee: "Gdeete luu diidz xin xcuerp naa len baa." ³⁶ Rlu led Davite raquiet ga, sac zeene bza dze ne goc me dziin lo menladz me laa me gut, ni zaatne pqueets zho me, ga bnitlo xcuerp me. ³⁷ Led meda, zhaa men ne raquiet ga; gacxe na rneew waa peet gacd xcuerp men co, zbeeban Dios me.

³⁸⁻³⁹ 'iGrëse to bets, gogacnan sca ganle! iJesús nac men ne rsilaa miech lo dol! Zha ne gliladzta me dib zdoo zho, tel pe nactaa grë xtol zho, sanmbe me zho. Mine wlalaa brieelod ngaa to, niicle ne zienal to xley Moisés; sac niicle gun tow grëse zigne naca, csanmbeda to lo dol.

⁴⁰ 'iGolguien sca gacnroladzde to! Zeena ygaade to mine bzeet zha ne biadteed xtiidz Dios padzeela, zeene znu bnee zho:

⁴¹ Grëse to ne rzhidznie to mine nac diidzli,

bii zan to ganle laa naa gun ti milagr nroob ne gzee zdoo to;

per znitlo to, sac gliladzde tow niicle guiaad zha ne gzodiidza lo to.

⁴² Blozh bnee Pabl; laa zeene laa Pabl griee ga grop Pabl Bernabé bnab grë miech co lo zho, siguiel zho quiet sti zhmal co bire tsie zho tsieseed zho zho. ⁴³ Zeene brie zho len yadoo co, nzian grë zha Israel, nzian grë zha stib guiedz zha ne rliladzle Dios zienal zhits zho. Nëz no zho bnee zho lo grë miech co tiblque tso guic zho tsienal zho zhiwseed Dios, guien zho ganle pa lotaa noxco me zho.

⁴⁴ Biet sti zhmal co, miech guizhiu ne goclo len yadoo co, zootle zig grëse miech guiedz co pcaalsa ga ziequiaadiag zho Xtiidz Dios. ⁴⁵ Zha ne rnabey lo grë zha Israel ne no ga, zeene gon zho scataa ndal miech ne goclo ga, blëë zho lo Pabl, ndox zho lo me, rëb zho led diidzli nac mine rseed me.

⁴⁶ Niicle Pabla, niicle Bernabéw bdiidz zho, dzigole bnee zho lo zho rëb zho:

—Nli to glo riegual yquiaadiag Xtiidz Dios ne nac to zha Israel. Per ne squi run to guielntseeb nëde to ycaania tow par ygaa to guielmban ndzon ne rneedz Dios; na laa no guioseed grë zhazit. ⁴⁷ Ni scalegaa rnabey Dios gaca, sac znu rnee me:

Laa naa bzole luu tsienee luu Xtiidz naa lo grë menzit,

luu gac zig ti biini ne gziini lo grë miech ne ndxie lo guidzliu;

zeena guien zho zha laa zho lo dol.

⁴⁸ Grë zha ne nac zhazit, zeene bin zho sca rëb Pabl, per nli rley zho, rdeed zho xquizh lo Dios scataa ndzon nac Xtiidz me. Grëse zha ne nole ygaa guielmban ndzon ne gdeed Dios ga, grëse zho dze cogazh laa zho bliladz Jesús. ⁴⁹ Dipse dan co, gocnan miech Xtiidz Dios.

⁵⁰ Grë zha Israel ne rlëë lo Pabl ga, psilo zho pquiiil zho grë men wnaa ne nac diidz noxco Xtiidz Dios, ni güey zho güeynee zho lo grë zha ne nac men non lad guiedz co; zeena ctsidil zho Pabl grop Bernabé, gunxoon zho zho dan co. ⁵¹ Zeene bin Pabla grop Bernabé, par glu ne nonguield sca been zha co zho, beenmbe zho grë yudie co ni zho laa zho brie ga, laa zho zie nëz Icon. ⁵² Grë zha ne bliladz Jesús ga, nguieel

rac zho, rdeed Espíritu Sant guielbiini lo zho.

14

Bdzin Pabl Icon grop me Bernabé

¹ Zeene bdzin Pabl Icon grop me Bernabé, güey zho tib xyadoo zha Israel zob lad guiedz co, bnee zho Xtiidz Dios lo grë zha ne pcaalsa ga. Zigtaa zha Israela, zigtagaa zha lad guiedz cow, nzian zho bliladza. ² Laa grë zha Israel ne bliladzda, psilo zho bloo zho diidz lo grëraa miech guiedz co glëenie zho Pabl grop Bernabé. ³ Niicle sca been grë zha co per wbid zho, bii blëz zho ga, peet dzeb nod lo zho rie zho rienee zho Xtiidz Dios lo miech; scagaa Dios, nzian grë milagr ne bdeed me diidz run zho par glu ne nli Xtiidz me nonee zho.

⁴ Dzigo grë miech ne no lad guiedz co goc zho chop dii, grol zho racnie grë zha Israel ne rlëë ga, zgrol zho racnie grop zha poxtl co. ⁵ Zha ne rlëë ga, zigtaa zha Israela zigtagaa zha guiedz cow, bnediiz zho grë zho wxtis laa zho tsie tsiedeedquie zho Pabl grop Bernabé. ⁶⁻⁷ Zeene bin Pabla grop Bernabé, mazd laa zho brieë ga, laa zho zie nëz xtan zha Licaon. (Güey zho Listr, güey zho Derb ni grëraa guiedz ne ndxie gax ga; güeynee zho lo grë miech co zha nac Xtiidz Dios.)

⁸ Guiedz Listr ga gon zho ti mgui në ni, waltaa lo xquielmban me ib gard së me; sac scale në ni me zeene gol me. ⁹ Zeene gon Pabl dze zob me rquiaadiag me mine nonee Pabl lo grë miech co, dzigo dzeque bui Pabl lo me, gon Pabl dib zdoo me rliladz me nli zrieelo gunguiac Dios me; ¹⁰ dzigo nguiedz bnee Pabl lo me, rëb Pabl: —jBeenli ni luu, zeena bzoli!

Zigne sca bnee Pabl, znuse guso nguzhoon me, bzoli me laa me psilo bzë. ¹¹ Zeene gon grë miech co sca biac me, psilo zho con xtiidz zho nguiedz rnee zho:

—jDiosle i gon, nasi zig rlu miech rlu me laa me biet gbaa ziaadgan me ne!

¹² jMasaque rzac zho lë xdios zho ga! Rnee zho Bernabé nac dios Júpiter, laa Pabl nac dios Mercur, sac Pabl nac zha ne ndzi-ibraa rnee. ¹³ Ro guiedz co ga zob xyadoo zhimdio zho Júpiter, dzigo brieë pxoz ne no yadoo co grë me miech lad guiedz, zienie

zho ngon, zienie zho guiee, nan zho gut zho ngon co cogon zho ma lo Pabl grop Bernabé. ¹⁴ Zeene bien Pabla grop Bernabé wbinladz guic zho. Ptsiez zho xab zho, bzëëb zho lad grë miech co, nguiedz rnee zho lo zho:

¹⁵ —jNdzinli golgac! jPe nacne squi rac to? jGolgan ganle miech guidzliuque nac no, tibaque nac ne grë ne! Laa no ziaad lo to ziadseed no to wseed cub ne nac Xtiidz Dios, zeena guien to csaan to grë ncuaane paat rquiind ne run to i, gbiire gbig to lo Dios men ne nlipaa mban. Me bzaa gbaa, me psan guidzliu, me psan nisdoo, grëse ncuaane no gbaaw, ncuaane no lo guidzliuw, ncuaane no lo nisdoow, me bzaaw grësew. ¹⁶ Niicle ne glo bdeed me diidz been miech grë ncuaane gocladztaa zho, ¹⁷ per psaanladz me zho. Gocnie me zho zigne racnieque me ne niina, rsiaab me nisguie rac xcuaa ne, rneedz me ncuaane rdioow ne gzataa dze, rneedz me guielbley lo ne.

¹⁸ Niicle sca rnee grop zha poxtl co, nen bin grë miech co diidz beete zho ngon co ngogon zho ma lo zho.

¹⁹ Len dze co, blalaa zha Israel ne ziaad nëz Antioquí ni nëz Icon bdzin Listr ga. Psilo zho bloo zho diidz lo grë miech co gocntseeb zho lo Pabl; güey grë miech co bdeedquie zho Pabl.

Masaque bzhaac zho gutle Pabl, bdoobniu zho me güeyron zho me tiblad ro guiedz. ²⁰ Grë zha guiedz co zha ne rliladzle Jesús, zeene bin zhow, güey zho zaatne nix me ga. Lëëtaaque ndxie zho lo me, zeene laa me guche; ga guche me laa zho zeynie me nëz len guiedz. Biini liu, pcaa me nëz grop me Bernabé laa zho zie nëz Derb.

²¹ Bdzin zho Derb, psilo zho bnee zho Xtiidz Dios lo grë miech co; ndal grë zha ne bliladza. Blozh ga, laa zho wbi ga biire güeyted zho nëz Listr, güeyted zho Icon, ni güeyted zho Antioquí, ²² güeynee zho lo grë zha ne rliladz Jesús ga, pchoobladz zho zdoo zho, pso zho diidz lo zho, niicle nroob guielnë ne noded zho per none tibaque gac guic zho tsienal zho Xtiidz Dios; sac ible sca nzian ncuaane ted zho laga gdzin dze ne gdzin zho zaatne rnabey Dios.

²³ Tib tib guiedz co, bzose zho grë zha ne so gnabey lo grë zha ne rliladz Jesús

ga; rlozhse rcuan zho grë zho zho ni rzodidznie zho Dios, dzigo laa zho rsañ zha co ladznia me yquianap me zho.

Bdizin Pabl grop Bernabé nëz Siria stib

²⁴ Nëz no Pabl grop Bernabé bded zho dib xtan zha Pisisid, bzëëb zho xtan zha Panfil, bdizin zho guiedz Perg. ²⁵ Blozhse bnee zho Xtiidz Dios lo grë miech co, dzigo laa zho brieë ga, bdizin zho guiedz Atalia. ²⁶ Atalia ga bzëëb zho barcw bdizin zho sti guiedz ne lë Antioquí, gataa laa zho psiaal viaj co. Guiedz coque ga brieë zho grop zho güey zho grë guiedz co güeynee zho Xtiidz Dios lo miech; zeene sca bnab grë zha ne rliladzle Jesús ga lo Dios gacnieñ me zho tsiegun zho xtsiin me.

²⁷ Zigne bdizin zho Antioquí ga, bnabey zho pcaalsa grëse zha ne rliladz Jesús, bzodiidz zho lo grë miech co grëse zha gocnieñ Dios zho güeygun zho xtsiin me, ni zha rquia zdoo Dios zha ne nacd zha Israel rbedz me zho ye zho rzëëb xnëz me.

²⁸ Xtselaa bio Pabl ga grop me Bernabé, blëz zho lo grë zha ne rliladz Jesús ga.

15

Pcaalsa zho Jerusalén

¹ Ga no Pabl grop Bernabé zeene bdizin bla zha ne ziaad nëz Judé, psilo zho noseed zho grë zha ne rliladzle Jesús ga, rnee zho lo zho ib none tso zho bey zigne rnabey xley Moisés, niicle ne rliladzle zho Jesús; zeena sca csilaa Dios zho lo xtol zho.

² Zeene gon Pabl sca noseed zha co miech, nacne bdildiidznieque Pabl zho grop Pabl Bernabé. Dzigo mazd bnediidz grë zha ne rliladz Jesús ga, bzo zho zla zha ne gacgza Pabl grop Bernabé tsie zho Jerusalén tsienabdiidz zho lo zha poxtl ni lo grë zha ne rnabey lo zha ne no ga, dieñ pe guiab zho.

³ Nacne brieë zho zie zho. Nëz no zho bded zho xtan zha Fenicia, xtan zha Samar; zaatne notaa zha ne rliladz Jesús, rzodiidz zho lo zho grëse zha nobedz Dios grë zha ne nacdraa zha Israel, rsaan zho grë zhiwseed xmenjol zho laa zho rliladz Jesús. Rley grë miech co ron zhow. Sca bio zho nëz, laa zho bdizin Jerusalén.

⁴ Zeene bdizin zho Jerusalén, pcaalsa grë zha poxtl, grë zha ne rliladz Jesús ga, ni grë zha ne rnabey lo zho. Dzigo ga bzodiidz Pabl grop Bernabé grëse zha gocnie Dios zho, zeene güeyted zho grë dan co güeynee zho Xtiidz me lo miech. ⁵ Min co quianee zho zeene guso bla zha ne glo goc farisé rëb zho, grë zha ne nacd zha Israel zeene laa zho rliladz Jesús ib none tso zho bey, ni none gun zho grëse mine rnabey Xley Moisés. ⁶ Dzigo nacne bnabey grë zha poxtl co ni grë zha rnabey co, ycaalsa zho stib dieñ zhapaa gaca, pe nonguiela tso grë zha zit bey co.

⁷ Zeene pcaalsa zho, goc pa lo quianee zho zeene guso Pedr rëb Pedr lo zho:

—Grëse to bets, golquiaadiag mine gne naa lo to nu ganle. Led rsoladz to, zeene griinpaa psilo quiagaaz Xtiidz Jesús lo miech, ible Dios bzooblo naa pxeel me naa gaseed naa grë zha ne nacdraa zha Israel gliladz zho me. ⁸ Ni megaa ne runbey me zdoo tib tib miech, laa me blu ganle, niicle ne zha zit nac zho laa me pcaania zho; pxeel me Espiritu Sant nacnie zho, zigne pxeelaque Espiritu Sant nacnie ne. ⁹ Gotsaa gwi ne ganle, led yed Dios rbe dieñ cho nac zha Israel cho nacgaa zha zit; zigtaa zhaw, zigtagaa new, laa me pcaania ne porne dib zdoo ne bliladz ne me. ¹⁰ ¿Zha nac dzigo ne racladz to gnabey to grë zha co gun zho grë mine nac xley ne? ¿Pe niacxe rienraa ne lo Dios dzigo? ¡Niicxe ne name, niicxe xmenjol ne brieelod niuna zigne naca! ¹¹ Golguien ganle, zigtaa zhaw zigtagaa new laa me csilaa ne lo dol grë ne, per nacda por ncuane rdziuun ne; sinque laa me csilaa ne porne nquialadz me ne.

¹² Zeene blozh sca bnee Pedr, dzese biac zho grë zho; dzigo laa Pabl grop Bernabé psilo bzodiidz grëta milagr ne blu Dios lo grë menzit zaatne güeynee zho Xtiidz me lo grë miech co. ¹³ Blozhse bnee grop zha co, laa Jacob gusoque rëb me:

—Grëse to bets, golquiaadiaggaa chop lan xtidz naa naganle gne naa lo to. ¹⁴ Laa Pedr bzodiidzle lo ne ganle zha psilo bredz Dios grë zha zit, bzooblo me zho ye zho gac zha ne sëëb xnëz me. ¹⁵ Ga nagon goca zigne

zhobneese lo Xtiidz me, mine pquiaa grë zha ne pxeel me padzeela, rneew:

¹⁶ Tedse nu ganle,

laa naa cuedz grëse miech ne ygab lo naa; grë zha xtii David zha ne bzozit, laa zho gbig stib.

¹⁷ Horco grëse zha zit, laa zho gon ganle cho nac naa,

zeena grieelo sëeb zho xnëz naa.

¹⁸ Znu nac xtiidz Dios, ni padzeelale bzeet me ne laa me gun min co.

¹⁹ Min co nagon grë zha zit ne riladzle Jesús, ib nonguielda ga gnabey ne zho gun zho mine nac xley ne. ²⁰ Sinque mazd yquia tib diidz cxeel ne lo zho gon zho, grë ma ne rut miech rgogon zho lo grë zhimdio zho, ib gowd zho bëel co; grë ma ne rxieed ren zeene ret ma, gowd zho ma; ni niicle grëragaa ma ne gut zho, ib gowd zho xchen ma. Grë zha bgui, nodne tsonie zho wnaa ne nacd tsieel zho; niicle wnaagaaw, nodne tsonie zho mgui ne nacd tsieel zho.

²¹ Niicle mazd padzeelaw, tibaque quiayon miech gun zho min co; sac desde hor co tib tib guiedz bzose Moisés tib zha ne gneew lo miech len xyadoo zho, dze ne rdziiladz zho lo dziin.

²² Blozhse ga, dzigo biaan zho diidz so chop zha ne tsie Antioquí tsienal zhits Pabl grop Bernabé, tsiesan zho ti diidz ne guey lo zha co. Nacne bzo zho Judas xingan Barsabás, ni bzo zho Silas; grop zha co, zha rien nac zho lo grëraa zha ne riladz Jesús ga. ²³ Pquia ti guits güey zho, rnee lo guits co:

“Zigne nose no Jerusalén nu, zigtaa zha ne nac poxtla, zha ne rnabeya ni grëraa zha ne riladz Jesús nuw, grë no laa no rquiaabdiuzh to grëse to bets ne nac to zha ne no guiedz Antioquí, ni grëraa guiedz ne ndxie nëz Siria i, ni nëz Cilis.

²⁴ Niina ne gocndion no laa bla zha ne nacgrë no nu bиаad lo to i, bиаadcots zho guic to dien peraa no gun to. Gacnan to ganle led nod pxeel zho, ²⁵⁻²⁷ gane niina bzodiidz no grë no bzo no Judas ni Silas ziaadnal zhits Pabl grop Bernabé, laa zho ziaad i ziaadgan zho to. Zha nziuu nac Pabl grop Bernabé lo no, sac gon rbeeladz zho xquielmban zho quiayun zho xtsiin Jesús.

²⁸ Lo godiidz ne bdziun no, laa no bdzianle nonguielda ne dien peraa gnabey no to gun to, ni niiclegaa Espiritu Sant scaque rnee me. Rquiind ne peraa gun to, lëëlew ga totsaque tsoxco to ²⁹ gowde to xpëel grë ma ne rgogon miech lo grë zhimdio zho; grë ma ne rxieed ren zeene ret ma, gowde to ma; ni niicle gowdga to xchen grë ma ne gut to. Grë zha bgui, nodne tsonie zho wnaa ne nacd tsieel zho; niiclegaa wnaaw, nodne tsonie zho mgui ne nacd tsieel zho. Min rii nagon nac mine no tsoxco to.

‘Guiaanne Dios to sca.’

³⁰ Gza tap zha co laa zho brie Jerusalén, laa zho zie nëz Antioquí. Zeene bdzin zho ga, bnabey zho pcaalsa grëse zha ne riladz Jesús, dzigo bdeed zho guits co lo zho. ³¹ Zeene gocnan grë zha co zha rnee low, rley zho sacne pchooblada zdo zho.

³² Blozhse ga, psilo Judas grop Silas pseed zho grë miech co Xtiidz Dios, zeena dib zdooraa zho gnalo zho Dios; sac bdeed me guielbiini lo Judas grop Silas rteed zho xtiidz me lo miech.

³³ Xtselaa blëz Silas ga grop Judas, laa zeene gol dze ne laa zho grie gbiire zho nëz Jerusalén stib, ine güeyzonëz grë zha co zho, rdeed zho xquizh lo zho. ³⁴ [Laa zho nole nëz, tibaque zeene rëb Silas laa Silas guiaanaque ga spalal dze.] ³⁵ Laa Pabl grop Bernabé ible laa zho biaan ga been zho xyudar grë zha ne noseedle miech ga.

Ptso Pabl grop Bernabé

³⁶ Goc palal dze no Pabl guiedz Antioquí ga grop me Bernabé, zeene rëb me lo Bernabé laa zho gbiire tsie grë guiedz ne güeynee zho Xtiidz Dios lo miech ga, par gacnan zho dien yo grë zha co. ³⁷ Dzigo gocladz Bernabé ye Juan Marcw nienie zho; ³⁸ per bzhiguield Pabl, sac zeene güeynie zho Juan glo, psanaque Juan zho guiedz Panfil, laa Juan biire zey Jerusalén, güeynal Juan nlozh nsiaal zho lo dziin co.

³⁹ Min co pquiaqui bneelsa Bernabé grop Pabl, nrooblaa güey lo xtiidz zho; nacne gataa laa zho ptso. Pcaa Bernabé nëz grop Bernabé Juan bzëeb zho barcw zie zho nëz lo guidzliu win ne no lo nisdoo lë Chipr; ⁴⁰ laa Pabl goc grop Silas. Blozhse bnab grë

zha co lo Dios gacnien me Pabl grop Silas, laa zho brie ga ⁴¹ güeyted zho grë guiedz ne ndxie nëz xtan zha Siria, grë guiedz ne ndxie nëz Cilis, güeynee zho lo grë miech ne rililadz Jesús nëz co, güeychoobladz zho zdoo zho.

16

Beenbey Pabl Timoté

¹ Len dze co güey Pabl grop Silas güeyted zho Derb ni güeyted zho Listr. Listr ga beenbey zho tib zha nguieg ne rililadzaque Jesús lë Timoté, ti men Israel ne rililadzle Jesús nac xniaa me, laa pxoz me nac men Gres.

² Grëse zha Listr, zha Icon, zha ne rililadz Jesús tibaque rzeet zho Timoté rnee zho ti miech ndzinli nac me, nacre bnee Pabl lo me tsienal me zhits Pabl. ³ Ni ne nod me bey ne rio zha Israel sac led zha Israeld nac pxoz me, dzigo bloo Pabl me bey co, zeena tsod pe glisqui grë zha Israel ne no nëz co.

⁴ Laa me zienal zhits Pabl. Guiedz ne rdedtaa zho rnee zho lo grë zha ne rililadz Jesús ga, tsoxco zho gun zho grë mine pso zha poxtl ga diidz, grë zho zha rnabey ne no Jerusalén. ⁵ Zeene ron grë zha cow, dib zdooraa zho rnalo zho Dios, zigse zie dze racnzianraa zha ne rililadz Jesús.

⁶ Blozh ga, tibbdeed zho xtan zha Frij ni xtan zha Galás, sac bdeete Espíritu Sant diidz nienee zho Xtiidz Dios lo miech grë guiedz ne ndxie nëz Asia ga. ⁷ Zeene bdziñ zho zaatne rsilo xtan zha Misia gocladz zho nie zho nëz xtan zha Bitin, scaque bdeete Espíritu Sant diidz nie zho nëz co. ⁸ Dzigo tibbdeed zho dib xtan Misia bdziñ zho ti guiedz ne ndxie ro nisdoo lë Troas.

⁹ Guieel co blulo ti mgui Macedon lo Pabl, rnab me gun Pabl guielnzaac tsie Pabl nëz co, tsiegun Pabl xyudar grë miech co.

¹⁰ Nacre hor cogazh bzhixcuaa no, sac bien no ible Dios racladz guio no nëz co guionee no Xtiidz me lo miech.

¹¹ Dzigo brie no ga bziaab no ti len barcw bdziñ no ti lo guidzliu win ne no lo nisdoo lë Samotras. Biini liu brie no ga bdziñ no Neápolis, ga bliaaz no wdze co. ¹² Biini sti liu co brie no Neápolis bziani no bdziñ no Filip. Lëe guiedz co riaan zaatne

rsilo xtan zha Macedon, niapse men Roma no ga; nzianlaa ngbidz bliaaz no ga.

¹³ Laa tib dze ne rdziiladz miech lo dziin, brie no bio no tib lad ro guiedz co, gax ti ro guiubee, zaatne bdzion no rcaalsa zha ne rienab lo Dios. Bdziñ no nzianlaa men wnaa ndxie ga, dzigo psilo no bnee no lo zho cho nac Jesús. ¹⁴ Lad co no ti wnaa Tiatir lë Lidia, rto me grë lar nizhnie nlaan mine nac lar niazh; ye me dib zdoo me rililadz me Dios. Laa me noquiaadiag mine nonee Pabl ga, zeene psiaab Dios guic me bliladz mew.

¹⁵ Dzigo hor cogazh brobnis me grë menlidz me; blozh ga, bredz me no guiobiaaz no lidz me, nëchaa me lo no:

—Telne rzac to nli dib zdoo naa rleynie naa Dios, goltë sca cuëz to lidz naa.

Rzoobguic me lo no, nacre biobiaaaze no lidz me.

Bio Pabl ladzguiib grop Silas

¹⁶ Tib dze, lëetaque zio no zaatne rio-zodiidznie no Dios, bdzieelo no ti ndzoo nguieg noguitnie mendox. Zëeb diidz grëse tel pe rnabdiidz miech lo ndzoo, rnee mendox cow; nroob dimi ne riab nia zha ne rnabey ndzoo. ¹⁷ Nal ndzoo zhits no, nguedz roptsie ndzoo rnee ndzoo:

—jXtsiin Dios ndzon ne zob gbaa gon noyun gza mgui rii! jLaa zho ziadseed to zeena gacnan to zha csilaa Dios to lo xtol to!

¹⁸ Nzian dze zaatne rdzieeltaa no ndzoo tibaque sca rnee ndzoo. Zeene bieedtaa guic Pabl, biireque me bnee me lo mendox ne noguitnie ndzoo ga, rëb me:

—Jesús nacie naa, ni laa naa rnabey luu gon niinagazh psaan ndzoo qui.

Zigne sca rëb Pabl laa mendox co bzhoon.

¹⁹ Gza zha ne rnabey ndzoo ga, zeene gon zho rundraa ndzoo guielnsin co gdziniaa ndzoo dimi, bnaaaze zho Pabl grop Silas güeyzo zho zho lo wxtis, rëb zho:

²⁰⁻²¹ —jGolwi ganle pe nac ncuaane noyun grop zha Israel rii lad guiedz nu! jNo-godil zho miech, laa zho quiaseed miech ncuaane nonguieldraa dziuun ne nac ne zha Roma!

²² Pcaalsa grëse miech co, grëse zho ntseeb rac zho lo Pabl grop Silas. Dzigo bnabey wxtis co brie xab zho grop zho bdeed bar zho zho, nroob bdiñ zho zho.

²³ Blozhse bdiñ zho zho laa zho psëëb zho ladzguiib, bnabey zho men ne quianap ladzguiib ga tibaque yquianap me zho, sac tel laa zho xoon me tsietizha. ²⁴ Zeene bin men co sca rëb zho, güeyaque me güeysëëb me zho stib lena mine riaan caanraa, ga psëëb me ni zho lad chop lë yag nroob.

²⁵ Wdze co, zig grol guieela laa Pabl grop Silas bii noyoolnie Dios, ni rnab zho lo me gacnen me zho. Grëse zha ne no ladzguiib ga, ron zho sca no Pabl grop Silas.

²⁶ Tibaque zeene bni ti zhodox, psiniw dib nase ladzguiib co, grëse ro ladzguiib co bzhial, guiib ne no nia grë zha ne no ga, wbila.

²⁷ Lëëlëd brieë mcaallo men ne quianap ga, zeene gon me grëse ro ladzguiib co zonial, masaque güeynie guic me bzhoonle grë zha ne no ga, bdoabaque me spad ne ney me laa me zie gut me me. ²⁸ Horco broptsie Pabl lo me, rëb Pabl:

—jGute luu luu! jGrë no ndxie no, choot bzhioond!

²⁹ Lëëlëd bnab me biini, bzëëb nguzhoon me len ladzguiib, masaque rzhidz me dzeb pquiitgzhidz me lo Pabl grop Silas. ³⁰ Blee me zho ga, rëb me lo zho:

—Golnë lo naa, ¿pe nac mine gun naa zeena csilaa Dios naa lo grëtaa xtol naa?

³¹ —Dib zdoo luu bliladz Jesús, men rnabey ne pxeel Dios lo guidzliu —rëb zho—, dzigo silaa me luu lo dol, silaa me menlidz luu ne.

³² Dzigo güeynie me zho lidz me, bnee zho Xtiidz Dios lo me grë menlidz me. ³³ Guieel co no me bdiib me zhits zho, zaatne brëë bar ne bloobar zho zho; blozhse ga, laa me brobnis grë menlidz me. ³⁴ Bnabey me goclo ti guielwagw downie me zho, rley me, niicle grëgaa menlidz mew rley zho ne laa zho bliladz Jesús.

³⁵ Biini liu, pxeel wxtis zha ne güeynie diidz lo me cuee me Pabl ladzguiib grop Pabl Silas. ³⁶ Dzigo güey me güeynee me lo Pabl rëb me:

—Laa wxtis pxeel diidz cuee naa to ladzguiib; zacle nasca gree to, peet tsieniedraa guic to.

³⁷ Dzigo rëbchaa Pabl lo zha ne bdzinnie diidz ga:

—jZha ndzielguictaa zhiwxtis to gon! Squi ndxie menquiedz bdiñ zho no, ni gardle gacnan zho dien pe nli no pe falt ne rdziaap no. Bnabey zho bio no ladzguiib, ni zha Roma nac no; nana racladz zho zhlianse gree no. jLëda ga gon! jGoltsie golguiab lo zho, lëezhal zho guiaad guiadbee zho no nu!

³⁸ Dzigo güey zha co güeynie zho diidz lo wxtis. Zeene bin wxtis zha Roma nac Pabl, bdzieb zho; ³⁹ lëëlëd güey zho ro ladzguiib güeynab zho dispensar lo Pabl grop Silas. Blee zho zho ladzguiib, ni bnab zho lo zho siguiel zho mazd gbi zho guiedz co.

⁴⁰ Ga brieë zho güey zho lidz wnaa ne lë Lidia ga, bnee zho lo grë zha ne pcaalsa ga, zha ne rliladz Jesús, pso zho diidz lo zho tiblique gac zho tsienal zho xtiidz me. Blozhse ga, dzigo laa zho brieë guiedz co.

17

Güey Pabl Tesalónica grop me Silas

¹ Brieë Pabl guiedz Filip grop me Silas, güey zho güeyted zho guiedz Anfípolis ni guiedz Apolonia, bdiñ zho guiedz Tesalónica. Lad guiedz co zob ti xyadoo zha Israel, ² dzigo güey Pabl güeynee me Xtiidz Dios lo grë zha ne rcaalsa ga, zigne runaque me grëraa guiedz ne zieded me.

Blëz zho ga tson zhmal, gzobse dze ne rdziiladz miech lo dziin güey Pabl güeyzodiidznie Pabl grë zha co, ³ bzeet me lo zho grë zaatne raquiet grëtaa ncuaane ted men ne cxeel Dios lo guidzliu ga, ni zha greeban me; ni blu me lo zho gacnan zho ganle lëë men co ga nac Jesús.

⁴⁻⁵ Ndal zha ne pquiaadiag xcodiidz Pabl, bien zho ne nli sca naca, laa zho bliladz Jesús, ndal zho nac zha nëz Gres, zha ne noxcole mine rnabey Dios, ye blalaa men wnaa ne nac men non lad guiedz co. Laa zha Israel ne rnabey yadoo co, zeene gon zho scataa ndal zha ne bliladz Jesús, blëë zho; güey zho güeytop zho grë zha yozh ne quianzë lad guiedz co, ti ruid ne been zho lad guiedz. Güey zho güeysëëb zho lidz Jasón nan zho niebee zho Pabl ga grop Silas, ngo zho zho lадznia grë miech co.

⁶ Zeene gon zho bgaad grop zha co lo zho, bnaaзаque zho Jasón ni zla zha ne rliladz

Jesús, bdoobniu zho zho bdzin̄nie zho zho lo wxtis, roptsie zho rnee zho:

—iGolgan̄ gan̄le laa zha ne sca quianzē nocots guic grē miech, laa zho blansole nu! ⁷ Ni Jasónpaa rdeed zaatne rbēz zho. Racladzdraa zho guñ zho miñe rnabey rey César, sac rnee zho no sti zhirey zho lē Jesús.

⁸ Grē zha wxtis co ni grē men̄guiedz ne pcaalsa ga, zeene bin zho sca rnee grē zha co, rien̄draa zho zha guñ zho. ⁹ Miñe been̄ zho been̄quish zho Jasón ti mult gza Jasón zla zha co, dzigo laa zho wbi ga.

¹⁰ Pcow liu co, wxiña laa grē zha ne rililadz Jesús ga bleese Pabl ga grop me Silas, pxeel̄ zho zho nēz Beré. Zigne bdzin̄ zho Beré, gloque ti xyadoo zha Israel güey zho.

¹¹⁻¹² Grē zha Israel ne no Beré ga, rley zho rquiaadiag zho miñe rnee Pabl grop Silas, gzobse dze rlab zho lo Xtiidz Dios rwi zho dien̄ pe nli miñe rnee zho ga. Ndal zha Israel co bliladz Jesús, ndal zha Gres ne, zigtaa mguiw zigtaa wnaaw; blalaa men̄ wnaa co zha non nac zho guiedz co. Tibliladz nac grē miech co, gocntseebd zho zigne gocntseeb zha Tesalónica.

¹³ Laa zeene gocnan̄ zha Israel ne no Tesalónica laa Pabl nolaque guiedz Beré, güeyaque zho güeyquuil zho grē miech co glēenie zho Pabl. ¹⁴⁻¹⁵ Dzigo lēelēd brieē bla zha ne rililadz Jesús ga, zienie zho Pabl nēz ro nis; laa Silas grop Timoté biaan̄ ga. Güey zha co güeyšan̄ zho Pabl guiedz Aten; laa zeene laa zho wbi, pxeel̄ Pabl diidz lo Silas grop Timoté tsieniob zho Aten.

Len̄ dze ne no Pabl Aten

¹⁶ Laga quiambēz Pabl gdzin̄ Silas grop Timoté güey me güeyted me lad guiedz co, wbin̄ladz guic me goñ me led zhid grē mdio ne riegān̄ grē miech co. ¹⁷ Nacne bioxco me bnee me Xtiidz Dios lo zho, güey me xyadoo grē zha Israel ne no ga, bzodiidznie me zho grē zho zha guiedz co zha ne rililadzle Dios. Gzobse dze rie me len̄ guiedz rienee me lo grē miech ne rdzin̄ ga. ¹⁸ Tib dze bdzieelo me bla zha rac ne zienal̄ zhiwseed ti men̄ lē Epicur, ni zla zha ne zienal̄ wseed ne rnee zho estoic; psilo me bzeet me Jesús lo zho, bnee me zha brieēban Jesús. Zeene bin zho

zha rnee me, no bla zho rzhidznie me, rnee zho:

—iDieen̄ pe riab guic men̄ qui rnee me, ziaadquidie me miech!

Zlagaa zho rnee, nend cho zhiwseed sti Dios ne rililadz miech stib dan zienie Pabl, gane sca rnee Pabl; ¹⁹ dzigo rēb zho lo Pabl:

—Bzhiguiel̄ mazd, sē luu guio ne lozh sodiidz luu lo no dien̄ zha nac wseed ne ziaadnie luu, ²⁰ sac wlaalaa gard dzion no grē ncuaane rnee luu i.

²¹ No zho liaadz gacnan̄ zho pe rnee Pabl, sac sca nac grē zha Aten, niiclegaa grē zha ne quiadzin̄ ga, rdziladz zho rded-dze zho rzodiidz zho dien̄ zha nac grē diidz cub ne griin̄ ron zho.

²² Bdzin̄ zho ti guic gui win ne rnee zho Areópago, bzo Pabl glowtaa zaatne rcaalsa zho ga, bnee me lo zho rēb me:

—Grēse to ne nac to men̄ Aten, ran̄ naa ne nligaa rioxco to rleyne to grē men̄ ne rzac to nac Dios; ²³ sac len̄ dze rii biateed naa zaatne zob grē xdios to, haxta no zaatne niaa ti lo pcoog quia chop lan diidz ne znu rnee: “MIN RII NIAA PAR DIOS NE RDZIUUNBEYD NE.” Golgacnan̄ sca gan̄le, Dios ne run̄beyde to ga, run̄bey naa me ni lēē zhiwseed me none naa lo miech len̄ dze rii.

²⁴ 'Dios co bzaa guidzliu, me bzaa grētaa ncuaane no lo guidzliu; gacd ne guiab miech zha gzaa ti zaatne cuēz me, sac men̄ nroob men̄ rnabey nac me, me rnabey gbaa, me rnabey guidzliu. ²⁵ Niicle rquiindgaa me dien̄ zha yquianap zho me, sac grēse ne ne nac ne miech, me rneedz guiel̄mban lo ne, me rneedz grētaa ncuaane rquiin̄ ne. ²⁶ Lo tib nēzaque miech ne bzaa me ga, bnabey me brieēquia grēse dii miech ne ndxie lo guidzliu niina, bdeedse me zaatne biaan̄ tib tib dii co ni dien̄ palal dze ne gban zho zaatne biaan̄ zho. ²⁷ Laa me psan̄ zho parne yguib zho me, tsoxco zho guien̄ zho gan̄le zha nac me haxta gdziel me lo zho. Ni led zite ga zo me lo ne grē ne, ²⁸ sac goñ, niapse por xpoder me laa xcuerp ne niaa zigne naca, laa ne mban, laa ne rriel̄. Lēew ga bnee bla men̄ladz to, zha rac ne znu rēb: “Xtii Dios nac ne.”

²⁹ 'Gase na gan̄le gotsaa gwi ne, conque xtii Dios name nac ne, pe nac dzigo gliladz ne lēē Dios ga nac grē cho mdio or,

cho mdio plat, cho mdio quie ne riab guic miech rzaa zho; ³⁰ ni ib sca rliladz miech. Laa Dios gop zho paciens hor co sac runbeyd zho me; sangue niina laa me quiabedz zho, laa me rnab lo zho csaan zho grë ncuane bliladz zho ga gbig zho lo me, mese gleyne zho; ³¹ sac laa me bzole tib dze ne gacredz grëse miech lo me ygaa zho mine tsieguial zho tib tib zho, tel zha wban zho. Ni laa me blule ganle cho nac men ne gun guielwxtis co, lëe men co ga gon bleeban me.

³² Zeene bin zho bzeet Pabl no ti men ne brieaban, nzian zho rzhidznie Pabl, zla zho rëb:

—Na dien pa sti dze lozh yquiaadiag no mine rnee luu i.

³³ Gataa pcutëez zho lo xcodiidz Pabl, laa Pabl wbi lo zho ga. ³⁴ Brieequia blalaa zha Aten bliladz Jesús, lëe tib zho ga nac mgui ne lë Nich (men ne nacgrë zha ne nac wxtis) ni ti wnaa lë Dámaris.

18

Güey Pabl guiedz Corint

¹ Brie Pabl Aten bdzin me guiedz Corint. ² Ga beenbey me ti men Pont lë Aquil, ti zha xtii zha Israel nac Aquil. Roma no me glo, wriin bdzin me Corint ga grop tsieel me; sac bnabey rey Claud brie grëse zha Israel ne no Roma. ³ Dzigo güey Pabl blëz Pabl lo zho ga, sac ye zho rzhixcuua grë lar nroob ne rquia ncal, tipse pquia zho dziin ga gza zho.

⁴ Gzobse dze ne rdziiladz miech lo dziin rie Pabl xyadoo grë zha Israel ne no ga, riezodiidznie me grë zha ne rcaalsa ga; zigtaa zha Israela, zigtagaa zha guiedz cow rnee me lo zho tso guic zho gliladz zho Jesús. ⁵ Zeene laa Silas grop Timoté bdzin Corint, dzigo laa Pabl psilo gzobse dze güey me güeynee me Xtiidz Dios lo grë zha Israel ne no ga, rnee me lo zho cho nac Jesús. ⁶ Laa zeene gontaa me rond zho diidz, lel ntseeb rac zho lo me haxta rneenë zho Jesús, dzigo bdzib me xab me lo zho, rëb me:

—iLaa naa bial bialne naa lo to per pquiaadiagde to mine rne naa; xtolle to nasca tel laa to nitlo! Gbiiredraa naa gne naa Xtiidz Dios lo to, na laa naa csilo ganew lo grë zha ne nacd zha Israel.

⁷ Dzigo laa Pabl psilo güey lidz ti men ne no gaxaque zaatne zob yadoo co lë me Just, dib zdo me rliladz me Dios. ⁸ Len dze co ndal zha Corint bliladz Jesús zeene bin zho mine rnee Pabl, haxta ti men ne rnabey xyadoo zha Israel lë Crisp, grë menlidz me bliladz Jesús, dzigo grëse zho laa zho brobnis.

⁹ Ti wdze blulo Dios lo Pabl, rëb me lo Pabl:

—iGdziebd luu! iIb ycuëezd luu lo dziin ne noyun luu i, bnee xtidz naa lo grë miech qui! Ndal grë miech rii no sëeb xnëz naa.

¹⁰ Peet tsienied guic luu, choot grielod lega pe gun luu sac naa quianaap luu.

¹¹ Nacne blëz Pabl ga stib iz groI, pseed me grë miech co Xtiidz Dios.

¹² Laa zeene bzob men ne lë Galiön zobnabey me xtan Acay, grë zha Israel ne no Corint ga bnediiz zho grë zho bnaaz zho Pabl güeyzo zho me lo Galiön ¹³ rëb zho:

—Laa no ziaadnie mgui rii lo luu, sac laa me quiaguiits xley no, quiago me guic miech tsiegan zho Dios sti mod mine ni nacdrea ley.

¹⁴ Laa Pabl zie gnee, zeene pquiab Galiön rëb me lo grë zha co:

—Telne niaca mine no pe ti falt, pe ti guielntseeb ne quiayun me, dzigosi naa raguial gun guielwxtis. ¹⁵ Per telne laa to ziaadnie me nu porne rdziladzde to mine quiaseed me miech, rdziladzde to tel cho rzeet me, sac led scad nac xley to, tsow golgan dien pe gun to. Nodaque xtil to guic naa.

¹⁶ Bleega Galiön zho nëz ley.

¹⁷ Dzigo bnaaz zha guiedz co ti men lë Sóstenes, men ne rnabey xyadoo zha Israel ga; gonlo Galiön bdiin zho me, per peet rëbd Galiön.

Biire bdzin Pabl guiedz Antioqui

¹⁸ Goc spalal dze no Pabl Corint ga, dzigo bnee me lo grë zha ne rliladz Jesús ga laa me gbi; ye Aquil ni Priscil wnaa ne nac tsieel Aquil nole guic tsienal zhits me.

Nacne zeene laa me brie, ye zho bzëebgza me barcw, laa zho zie nëz Cencre. Lëetaaque len dze co noxco Pabl gun me tel pe nac ncuane rëb me lo Dios gun me, dzigo zeene bdzin zho Cencre bnabey me liu liu ptsiib guic me.

¹⁹ Cencré bzëeb zho barcw stib, zie zho nêz Efés. Bdzin zho Efés, güey Pabl xyadoo grê zha Israel ne no ga güeynee me Xtiidz Dios lo zho. ²⁰ Dzigo bnab zho mbëz me lo zho ga ti blalaa dze, per brieelod mbëz me ²¹ sac laa guic me no gdzin niob me Jerusalén yгаа me lni ne ziaadyob len dze co, rëb me:

—Na telne zneedz Dios diidz, bii zialteedaque naa dien yo to.

Gataa biaan Aquil grop Priscil, laa me bzëeb barcw stib zie me nêz Cesarea. ²² Cesarea brie me barcw, laa me zie nêz Jerusalén. Bdzin me güeyquiaabdiuzh me grê zha ne rliladz Jesús ga; biireraa me ga bdzin me Antioquí.

²³ Goc palal dze no me Antioquí, laa me brieque ga güeyted me grê guiedz ne ndxie dib xtan zha Frij, dib xtan zha Galás, güeynee me lo grê zha ne rliladz Jesús ga dib zdoo zho gleynie zho Dios.

²⁴ Len dze co bdzin ti men xtii zha Israel guiedz Efés, ti men Alejandríw lë me Apol. Ti zha rac nac me, rien me zha gnee me Xtiidz Dios lo miech. ²⁵⁻²⁶ Güey me xyadoo zha Israel ne no ga, nguieel rac me, peet dzeb guien lo me psilo me nonee me lo zho grêse mine bnee Juan Bautist zeene bzeet Juan Jesús; sac loxaque min co bin me zeene gocnan me cho nac Jesús.

Lad co co no Aquil ni Priscil, zeene gon zho zha rnee me, dzigo blozhse ga, bredz zho me blozh bnee zho lo me zharaa nac zhiwseed Jesús.

²⁷ Grê zha ne rliladz Jesús ga, zeene gocnan zho laa guic me no tsie me nêz Gres, dzigo ye zho rëb wen tsie me, pquiaa zho ti cart pxeel zho lo zha ne no nêz co zacse ycaania zho me. Zeene bdzin me nêz co, pseed me grê zha co. Rley zho blozh gocnan zho cho nac Jesús; ²⁸ sac squi ndxie miech rsioog me ro grê zha Israel, rnee me lo zho lëele men ne quiambëz zho cxeel Dios ga nac Jesús, ni rlu me lo zho pa lo zhobneew lo Xtiidz Dios.

19

Biire güey Pabl Efés

¹ Len dze ne no Apol Corint, laa Pabl bdzin Efés. Blozhse güeyted Pabl grê guiedz ne ndxie nêz xtan zha Galás, laa me bdzin

ga. Ga bdzieel me blalaa zha ne rliladz Jesús, ² dzigo bnabdiidz me lo zho, rëb me:

—¿Pe bgaa to guielbiini ne rneedz Espíritu Sant, zeene bliladz to Jesús?

Pquiab zho rëb zho:

—¿Guiebiini ye? Gard gon dzion no rdeed Espíritu Sant guielbiini.

Dzigo rëbchaa Pabl:

³—¿Pezhe waa pseed to zeene brobnis to?

—Zhiwseedse Juan Bautist gocndion no —rëb zho.

⁴ Dzigo bnee Pabl lo zho zha nac wrobnis ne biaadnie Juan. Rëb me lo zho nacse wrobnis co par glu miech ne laa zho csaan guieintseeb, laa zho sëeb xnêz Dios; per grêse zha ne bgaa wrobnis co ib none gliladz zho Jesús, men ne bzeet Juan ga zeene rëb Juan ile ziaad me.

⁵ Min co bin zho nacne brobnis zho stib zigne psan Jesús diidz. ⁶ Zeene laa Pabl pxobnia guic zho bnab me gdeed Espíritu Sant guielbiini lo zho, hor co psilo zho nzian lo diidz ne rnee zho; ni bnee zho tel pe nac mine racladz Dios gacnan miech. ⁷ Lo gza zho rгаа zho tsiipchop, niapse zha bguiw.

⁸ Tson mëë blëz Pabl ga, tibaque rie me xyadoo grê zha Israel ne no ga, ible rdziebd me rnee me lo zho zha nac Xtiidz Dios, ni rguib me rgo me guic zho gliladz zho cho nac Jesús. ⁹ Per zeene gon me no palal zho ib rond diidz, lel psilo zho squi ndxie miech rneenë zho Jesús, nacne bleextsoque me grê zha ne rliladzle Jesús, güeynie me zho zaatne nac xyuscuel ti men lë Tiran; ga rcaalsa zho gzobse dze rieseed me zho.

¹⁰ Dipse len chop iz blëz me ga pseed me grê zha co; nacne grêse miech ne no dib nêz Asia ga, zigtaa zha Israela zigtagaa grëraa miech cow, bin zho zha nac Xtiidz Dios. ¹¹ Bdeed Dios diidz been me grê milagr nroob ne rzee zdoo miech; ¹² sac haxta lar ne rzëse nia me, lar ne rbixse me rzhoo lad men ne rzacnë laa zho riac, niicle grëгаа mendox ne noguitnie miecha, rzhoo ma.

¹³⁻¹⁴ Ga quianzë gadz xpëed ti zhipxoz zha Israel lë Escev, stib guiedz stib guiedz rie zho rieguncxoon zho mendox ne noguitnie miech. Ti vuelte, nan zho na ye zho cuedz lë Jesús gacnen me zho guncxoon

zho men_{dox}; bdzi_n zho zaatne gun_cxoon_n zho ma, rëb zho:

—¡Zig zobwi Jesús ne rzeet Pabl, laa no rnabey to gol_rieegazh i niina!

¹⁵ Pquiabaque ma rëb ma lo zho:

—Wen wen run_bey naa Jesús ni nangaa naa cho nac Pabl, sa_ngue to gon_n ni lalnu run_beyd naa to.

¹⁶ Znuse bias men_n ne noguitnie men_{dox} co, bnaaz me gza zha co bdi_n me zho. Ib blëbd zho lo me, masaque dib brëe rna zho, ni xab zho nacwdraa, laa zho bzhoon.

¹⁷ Grë miech ne no Efés, zigtaa zha Israela, zigtagaa grë zha guiedz cow, zeene bin zhow per nli bdzieb zho; grëse zho bië_n zho ne nli men_n non, men_n rnabey nac Jesús.

¹⁸ Haxta ye grë zha ne riladzle Jesús, hor co laa zho bleero pe nac grë ncuaa_n ndzinlid ne bliladz zho glo. ¹⁹ Nzian zha ne biil diidz dox güeyxi zho grë xquits zho, squi ndxie miech laa zho bzëega grësew. Zeene biobey palal gocon grëtaa guits co, biirew zig chooptsi mil pes plat. ²⁰ Ga blu poder ne nacie Xtiidz Dios, sac grë zha ne bina bdzëe lo xquiel_mban zho.

²¹ Bded ga, biab guic Pabl tsieted me nëz xtan zha Macedon, xtan zha Gres, gbiire me ga laa me tsie Jerusalén stib; haxta rnee me Jerusalén grie me tsie me Roma. ²² Nacne ptedner me Timoté grop Rast (zha ne noy_un xyudar me le_n dze co) zie zho nëz Macedon, laa me bii biaan_n nëz Asia ga.

Gocntseeb zha Efés

²³ Le_n dze co brieequia palal zha Efés ptsidi_l zho zha ne riladz Xtiidz Dios.

²⁴ Guiedz co no ti men_n ne run_dziin guiib plat lë Demetr, rzaa me grë yadoo ye_n zig niaada xyadoo xnaxnazh zho Dian; nroob dimi ne rial_n me grë me zha ne run_nie me dziin co; ²⁵ bnabey me pcaalsa grë zha ne quia dziin lo me, ni grëragaa zha ne run_aque dziin co, rëb me lo zho:

²⁶ —Rien_n naa ziyonle to, ziyangaa to gan_{le} laa mgui ne rnee zho Pabl quianzë lad guiedz nu, rnee me nlid Dios ga nac grë mdio ne rzaa miech. Pe zhidaale miech quialiladz zhiwseed me nu; ni led loxaque nudsegaa, dible Asia quialiladz miecha. ¿Pe gnë to zha dziu_n ne? ²⁷ Gol_guien_n gan_{le} noxtseeb guiabdraa xtsi_n ne, ni

nan_wen to gan_{le} lëe xtimi ne nu. Ni tebaa mi_ncosegaaw, mi_ne mazdraa noxtseeb nend grëse miech csaanladz xyadoo nazhnazh Dian, nend grëse miech ne rleynie me dib Asia, diibгаа lo guidzliuw con guiaan_nladz zho me.

²⁸ Zeene gon_n grë zha co sca rëb Demetr, rlëe zho, roptsie zho rgo zho xviv Dian.

²⁹ Wdzeepaaw grëse menguedz laa zho pcaalsa, güey zho bnaaz zho Gay ni Aristarco chop zha Macedon ne rzënie Pabl, bdo_nniu zho zho bdzi_nnie zho zho ro yulow.

³⁰ Nacne gocladz Pabl nie me nienee me lo grë miech co, per psaand grë zha ne riladz Jesús ga. ³¹ Haxta bla zha wxtis ne ndzieeldi_dz Pabl, pxeel_n zho diidz lo me tsied me.

³² Zhaase zhaase rnee grë miech co ndxie zho ro yulow ga, no zho haxta ni riend_n pe nacne zie zho ga. ³³ Blalaa zha Israel, zeene gon_n zho scataa rac grë miech co, bdo_b zho zhicw ti men_n lë Lejandr gocladz zho nee me chop lan xtiidz zho. Laa men_n co blis nia me parne cuedze zho gnee me; ³⁴ zeene gon_n zho zha Israel nac me, psilo zho stib grëse zho nguiedz roptsie zho, rgo zho xviv Dian rnee zho:

—¡Men_n ndzondoo nac Dian! ¡Men_n ndzon nac xnaxnazh ne!

Zig chop hor bre zho ga sca roptsie zho.

³⁵ Dzigo brie_e men_n ne zobnabey ga, blunia me lo zho cuedze zho; zeene laa zho bredze, psilo me bnee me lo zho rëb me:

—Gol_gona gan_{le}, grëse miech lo guidzliu nan_n zho guiedz rii zob nazhnazh Dian, nan_n wen zho gbaa biet me zob me nu;

³⁶ tsod zha ne guiab led scada. ¿Pe nac nadien_n ne squitaa rac to? Gol_guien_n gan_{le} nonguiel_da i squi lëelëd dieen_n pe rzhixcuaa to. ³⁷ Gol_gwi gan_{le}, laa to ziaad-zo grop zha rii nu, ¿pe nadien_n been_n zho? Nacd zho cho zha ne quiaguitnie yadoo, cho zha ne nozhidzniegaa xnaxnazh ne. ³⁸ Nana, tel_ne racladz Demetr pe glisqui me grë me zha ne rquianie me dziin, gacxe na no yulow waa. Niac niaad zho niaadnab zho guiel_wxtis, ni zogaa zha ne yquiaadiaga.

¡Ga glisqui zho pe run_n tib, pe run_gaa stib! ³⁹ Laa tel_ne noragaa pe racladz zho glisqui zho, dzigo niac niacredz grëse zha ne nac

wxtis, zha ngobey dien zha niaca. ⁴⁰ Sac gon ne squi been to nadze, noxtseeb glisqui zha Romaw lo ne; ni pe nadien dzieets ne telne laa zho glisquiw.

⁴¹ Blozhse sca bnee me laa me wbi lo zho ga, niicle zhagaaw laa zho zey.

20

Güey Pabl nêz Macedon ni nêz Gres

¹ Zeene laa ruid co blêz, dzigo bredz Pabl grêse zha ne rliladz Jesús, bnee me lo zho zaacse gac zho. Blozhse bnee me lo zho, laa me brieë ga zie me nêz xtan zha Macedon; ² güeynee me lo grê zha ne rliladz Jesús nêz co, pso me diidz lo zho zaacse gac zho. Nêz co brieë me bdziñ me nêz Gres. Ga blêz me tson mëë.

³ Laa zeene laa me gbi ga tsie me nêz Siria, laa me ziele sëëb me barcw zeene gocnañ me laa zha Israel ne no ga bnedidz pa tsietin zho me, nacne güeydaque me barcw, mazd bio me nêz güeyted me nêz Macedon.

⁴ Blalaa zha ne bzënañ biogza no me, bzë ti men Beré lë Sópater xingan ti men lë Pirr; bzë chop zha Tesalónica, Aristarco ni Segund; ti zha Derb lë Gay, Timoté, ni schop zha nêz Asia, Tíquico ni Trófimo. ⁵ Goñ no Filip laa zho bner, per biaan no diidz Troas cuëz zho no; ⁶ laa no bliaaz ga, ga bdieed no lni Pascw. Zeene bded lni co laa no bziaab barcw, laa no brieë ga. Goc gaay ngbidz no no lo nis laa no bdziñ lo zho Troas, dzigo bliaaz no Troas ga gadz ngbidz.

⁷ Zeene goñ dze dmingw, bio no yu ne rcaalsa zha ne rliladz Jesús ga. Ti yu tson xcuaaw, laa no pcaalsa par dziuun no xtsee ne psan Jesús diidz ga gun grê zha ne rliladz me. Laa no ndxie grê no, dzigo psilo Pabl pseed me no; nzian ncuaane nonee me lo zho sac guini liu co laa me grieë ga; goñ goñ guieela rsiaaldaque me. ⁸⁻⁹ Nzian nac biini ne noquia len yu co; zaatne nac ro ventan ga zob ti niib lë Tic. Wdzeelaaw rsiaaldaque Pabl, tibaque bzhen mcaal niib co, wbix niib ga biab niib nêz ley; ni glaaw, len yu ne riaan glaaraa ga ndxie no. Zeene güeylis zho niib laa niib gutle.

¹⁰ Biet Pabl, bdziñ me lo niib bdeedz me niib.

—jGdziebde to! —rëb me—. jZrieëban niib!

jNi nligaaw brieëban niib! ¹¹⁻¹² Grêse zho per nli rley zho. Blozh ga bdzieep no glaa stib bdziñ no len yu co, dzigora bdiiz Pabl guietxtil pquiin no. Blozhse bdziuun no xtsee co, laa Pabl psilo bnee lo zho stib, quianeeque Pabl laa liu biini.

Bdziñ Pabl Milet

¹³ Lban co psiaal Pabl, laa me wbi ga laa me zie nêz Ason nzëni me; laa no bziaab barcw bdiednieer no lo me. Bdziñ no Ason ga bliaaz no me zigne biaan no diidz.

¹⁴ Zeene blanso me lo no, laa no bziaab barcw gza no me bdziñ no guiedz Mitilen.

¹⁵ Biini liu brieë no Mitilen, bdieed no gax Quío, bietraa stib dze co bdziñ no Samos, ga bliaaz no; bzia no lo nis co zig sti dze dzigora bdziñ no Milet.

¹⁶ Biotieete no Efés, sac laa guic Pabl no gdziñniob me Jerusalén, zeena ygaa me lni Pentecostés. ¹⁷ Nacne zigne bdziñ no Milet pxeel me diidz Efés bredz me grê zha ne zo lo zha ne rliladz Jesús ga. ¹⁸ Zeene blanso zho, bnee me lo zho rëb me:

—Wen wen runbey to naa, nanle to ganle zha noxco naa noyun naa xtsiin Jesús men ne rnabey ne. Wlal ne psilo ziyal naa nêz Asia nu, ¹⁹ blactaa biin naa lo grê mine bdeed naa, blactaa lo guielxtseeb ne ziyo naa, tibaque quianañ grê zha Israel quin zho naa. ²⁰ Per gon to ganle, tibaque bioxco naa bialseed naa to mine nac diidzli, zigtaa pseed naa to zaatne rcaalsa tow, zigtagaa pseed naa to stib yu stib yu. ²¹ Grêse miecha, tibaque mine pseed naa zho, mine bne naa lo zha Israel mincoque bne naa lo miech stib guiedz; grêse zho bnee naa lo zho none csaan zho xquielntseeb zho dib zdo zho gnalo zho Jesús, zeena gbig zho lo Dios.

²² 'Scaque niina ne laa Espíritu Sant rnabey ga naa Jerusalén, nan naa dien peraa nac ncuaane gdzieelo naa ga; ²³ per nanpaa naa ible zgo zho naa ladzguiib, ible sacsi zho naa, sac guiedz ne gdziintaa naa min co rnee Espíritu Sant teed naa. ²⁴ Lo guielxtseeb co no naa per rquiad zdo naa xquielmban naa; mine nziuuraa lo naa laga gdeeda diidz ib laa naa no gne lo miech pa lotaa rleyne Dios zho, zeena ine gley naa csiaal naa dziin ne bzo Jesús naa nu

quiayun naa. ²⁵ Rien naa lo grë to ne nac to zha ne bialseed naa gocnan to zha nac xnëz Dios, gandraa to lo naa lo guidzliu rii. ²⁶⁻²⁷ Laa naa pseedle to grëse mine nac Xtiidz Dios, ib peet pqueetsd naa lo to; gacxe waa, tel cho tib to nitlo, led xtoldraa naa ga. ²⁸ Golguien sca, jgolquianap to, ni scagaa golquianap grë zha ne zo to lo! jGolwi ganle xnëz Dios no zho, haxta lo cruz gut Xpëed me bdiizh me xtol zho! Ni stiba, jib Espiritu Sant bzo to yquianap to zho zigne rquianap baxtor xpëcwxiil zho!

²⁹ jNsin golso! Sac rienle naa zeene laa naa gbiche lo to, ib zrieequia grë zha ne guiaad guiaadquidie to, zguib zho zha gnitlo zho to zigne run grë coyot mëcwxiil. ³⁰ Haxta lad to, zrieequia bla zha ntseeb ne ctsëe Xtiidz Dios, squiil zho to tsienal to zhiwseed zho. ³¹ Gacxe waa laa naa rne lo to, jnsin golso! Golsoladz ganle tsonraa iz, dze guieel pseed naa to, blactaa biin naa pso naa diidz lo to tib tib to zaacse gac to. ³² Dios nac men ne gacnien to, laa naa rsan to ladznia me grëse to; Xtiidz Ndzon me mine rnee ganle zha nquialadztaa me to, lëew lozh quix biini to dib zdoo to gnalo to me, zeena ygaa to zaatne gneedz me cuëz to grë to zha ne noraa xnëz me.

³³ Wlaltaa ib rzobladd naa dimi, ib rzobladd naa lar, guiep naa tebaa zha yquianie naa grë ncuaan co. ³⁴ Len dze ne blëz naa lo to, gon to ganle niapse nia naa bdziniaa naa ncuaane pquiin naa, ncuaane pquingaa grë zha ne bzënie naa. ³⁵ Ga blu naa lo to ganle, ib none dziuun ne dziin zeena grielo dziuun ne xyudar zha ne guien pe yquiin. Ib rianladz naa xtiidz Jesús men ne rnabey ne, zeene znu bnee me: “Mazdraa nroob guielbley ne rgaa zha ne rgad, lëdle zha ne rad.”

³⁶ Zeene blozh bnee Pabl lo zho, laa me pquitsgzhib ga grë me zho bzodiidznie zho Dios. ³⁷ Blozhse ga, tibga tibga zho wbig bnee zho lo me, bnaaz zho nia me, bdeedz zho me. ³⁸ Mban rac zho psilo zho roon zho, rsoladz zho rëb me gandraa zho lo me. Blozh ga, güey zho güeyzonëz zho me zaatne sëeb me barcw.

21

Biire güey Pabl Jerusalén

¹ Blozhse bzhieen no nia grë zha Efés co, laa no bziaab barcw, laa no zio bdzin no ti lo guidzliu win ne no lo nisdoo co lë Cos. Biini liu brie no ga bdzin no lo sti guidzliu win co lë Rodas. Rodas brie no bdzin no guiedz Pátara. ² Guiedz Pátara, ga bziaab no ti barcw ne zie nëz xtan zha Fenicia. ³ Zeene zieded barcw co ngali zaatne riaan guidzliu win ne lë Chipr, bui no nëz revés rlupaa guidzliu co. Laa no zio haxta bdzin no guiedz Tir, xtan zha Siria, ga blëz barcw co biet grë yo ne neya.

⁴ Zigne bdzin no ga bdzieet no barcw bziaab no lad guiedz co, biodziel no grë zha ne rliladz Jesús ga; bliaaazque no lo zho ga ti zhmal. Dzigo psiaab Espiritu Sant guic zho rnee zho lo Pabl, tebaa siguiel me mazd tsied me Jerusalén.

⁵ Zeene laa no brie ga, grëse zha ne rliladz Jesús grë tsieel zho grë xpëed zho biaad-zonëz zho no ro nis co; dzigo lo yuzh co ga pquitsgzhib no grë no, bziodiidznie no Dios. ⁶ Blozhse bzhieen no nia zho, laa zho wbi ga.

⁷ Brie no Tir bdzin no guiedz Tolemaid, ga bio no bioquiaabdiuzh no grë zha ne rliladz Jesús ga, bliaaz no lo zho tib dze. ⁸ Biini liu brie no ga bdzin no guiedz Cesarea, ga biobiaaz no lidz ti men ne noneeque Xtiidz Dios lo miech, lë Lip. Lë Lip co ga gocgza sxoop zha ne bzo been xyudar zha poxtl. ⁹ Quianie me tap ndzoope ne gard ctsieelna, gzase zho bdeed Dios guielbiini lo zho rnee zho tel pe nac mine racladz Dios gacnan miech.

¹⁰ Nzianle dze goc no no lidz Lip, zeene blanso ti men ne ziaad nëz Judé lë Agab, biadquiaabdiuzh me no. (Ye me rnee tel pe nac mine racladz Dios gacnan miech.) ¹¹ Zigne blanso me lo no ga, bzhen me lar ne rbe len Pabl, pxidoo mew nia me ni pxidoo mew ni me, në me:

—Znu gon rnee Espiritu Sant gzobdoo zha Israel bizhuan lar rii, co zho me ladznia zha Roma zeene laa me gdzin Jerusalén.

¹² Grë zha ne rliladz Jesús ga, zeene bin zho sca rëb men co, rnab zho lo Pabl tsied me Jerusalén, yeque no sca rnee lo me. Mban rac no rdzioon no. ¹³ Pquiabaque me në me lo no:

—¿Pe nac dzigo roon to? Tel naa laa naa bleeladzle naa maase gzobdoo zho naa Jerusalén, niicxe haxta gut zho naa waa porne rleynie naa Jesús. ¡Loxaque rsiaab guielnē to naa i gon squi rac to!

¹⁴ Bdzianse no nlid yquiaadiag me xtiidz no, dzigo mazd psaan no, rdzieets no:

—Golgotsaa csaan ne, Diostaa nan dien zha gaca.

¹⁵ Bdedse ga bzhixcuaa no laa no brieeg ga, laa no zio nēz Jerusalén; ¹⁶ blalaa zha ne rililadz Jesús Cesarea ga bzēnal zhits no, bzēnie zho ti men Chipr lē Mnasón. Izle rililadz me Jesús, lidz me biobiaaz no zeene bdziñ no Jerusalén.

¹⁷ Grē zha ne rililadz Jesús Jerusalén, rley zho zeene gon zho laa no bdziñ, blēzlo zho no.

¹⁸ Biini liu co güeynie Pabl no lidz Jacob bioquiaabdiuzh no me, lēetaque laa grē zha rnabey ne zo lo grē zha ne rililadz Jesús Jerusalén ga, ndxie ga. ¹⁹ Blozhse pquiaabdiuzh Pabl grē zha co, dzigo psilo me bzodiidz me lo zho grēse zha gocniēn Dios me güeyseed me grē miech stib guiedz. ²⁰ Zeene bin zhow per nli rley zho, rdeed zho xquizh lo Dios; dzigo rēbchaa zho lo me:

—Bets, ye zha Israel gon ndaldoo zho zililadz Jesús; per racladz zho tibaque tsienal zho mine rnabey Xley Moisés. ²¹ Grē zha ne no nu bin zho laa luu güeyseed grē men wladz ne no guiedz zit, nac diidz blu luu lo zho tsienal draa zho Xley Moisés, codraa zho xpēed zho bey, niicle tsienal draa zho grē zhiwseed xmengol ne. ²² ¿Zha ganle dziuun ne? Sac zeene gon zho laa luu blanso, ible ziaadguib zho luu. ²³ No tap bets ne nu ziaadyoble gun zho mine bnee zho lo Dios; mine gaca güey ²⁴ güeynie zho yadoo, golgun grē mine rnabey ley, bdiizh ctsiib guic to gza to; zeena ga gan grē zha rii ganle nlid grē mine rnee miech luu ga.

²⁵ 'Sangue grē miech stib guiedz zha ne rililadz Jesús, laa no pxeelle diidz lo zho zigne bzodiidz ne nu: grē ma ne rut miech rgogon zho lo zhimdio zho, gowd zho bēel co; grē ma ne rxieed ren zeene ret ma, gowd zho ma; ni niicle grēgaa ma ne gut zho, ib gowd zho xchen ma; grē zha bgui, nodne tsonie zho wnaa ne nacd tsieel zho;

niicle wnaagaaw, nodne tsonie zho mgui ne nacd tsieel zho.

Bnaaz zho Pabl

²⁶ Laa Pabl zienie gza zha co. Biini liu güey me gza me zho güeygun zho mine rnabey ley; blozh ga güey zho yadoo güeynie zho diidz pa dze gza mine quiayun zho ga, zeena gal dze co laa zho tsienie gon ne gdeed zho tib tib zho. ²⁷ Laa zeene merle gza gadz ngbidz ne quiayun me mine rnabey ley ga gza me zha co, lega naclew gon bla zha Israel ne ziaad nēz Asia laa me no len yadoo. Nacne wbig zho ²⁸ bzhen zho zhiw me, roptsie zho rnee zho:

—¡Grēse to menguedz! ¡Golgun xyudar no gnaaz ne men rii! Sac lēē me ga quianzē quiaseed me zha wladz glēēnie zho ladz zho, rnee me lo zho gundraa zho grē mine rnabey ley, gapdraa zho respet yadoo rii; haxta grē zha zit zizēēbnie me nu. ¡Noguitniele me lugar nda rii!

²⁹ Sca rnee zho, sac gon zho Pabl len guiedz Jerusalén ga ziegrop me ti zha Efés lē Trófimo, dzigo rzac zho güeynie me zha co len yadoo.

³⁰ Pe ga bin grē menguedz, grēse zho bdziñ wbigbe zho lo Pabl bdozni zho me blee zho me len yadoo, zigne blee zho me ga lēēléd psioog zho ro yadoo; psilo zho noguin zho me, nan zho gut zho me.

³¹ Zeene gocnan men ne rnabey lo menguiib ne ndxie ga laa ruid co noyac, ³² lēēléd brieenie me grē xmenguiib me ni grēraa zha ne rnabey lo zho. Zeene gon grē zha ne noguin Pabl ga, laa grē menguiib co bdziñ, dzigora blēz bdiñ zho me.

³³ Dzigo wbig men rnabey co, bnabey me grē zhaguiib co bzoob zho Pabl chop caden. Bnabdiidz me lo grē miech co dien cho nac Pabl, pe quiayun me ne scataa rlēēnie zho me. ³⁴ Psilo zho nguiedz roptsie zho, zhaase zhaase ncuaane rcaadzdoj zho me. Gonse men rnabey co rlud dien pepaa rliquis zho, nacne bnabey me grē menguiib co ziesan zho Pabl yu ne rbēzpa zho.

³⁵ Laa grē menguiib co csilo soquianie Pabl lo scaler ne rdziñ ro yu co, gataa mazd bzoobyan zho me, sac ntseeb rac grē miech co; ³⁶ nalbe zho, roptsie zho rnee zho:

—¡Golnitlogazh men qui! ¡Niinagazh golgut me!

³⁷ Laa grë menguiib co csëëble me len yu co, zeene bnee me lo men rnabey co, rëb me:

—¿Pe zrieelo gne naa ti xtidz naa lo luu?

Dzigo rëb men rnabey co:

—¿Mod rac luu rnee luu xtiidz zha Gres?

³⁸ ¿Led luud ga dzigo nac ti zha Egipt ne psilo racntseeb lo gobiern len dze rii? Nac diidz, tap mil zha ntseeb nacie zho, laa zho ziese nëz dan.

³⁹ —Led naada —rëb Pabl— men Israel nac naa. Guiedz Tars gol naa, lëë guiedz co nac mine nroobraa lo grë guiedz ne ngab Cilis. Na laa naa rnab lo luu, been guielnzaac bneedz diidz gne naa chop lan xtidz naa lo grë miech qui.

⁴⁰ —Zaca —rëb men co.

Lo scaler co zo Pabl blunia me lo grë miech co cuedze zho. Zeene laa zho biacdze, dzigo psilo me bnee me xtiitsë me grë me zho, rëb me:

22

¹ —Grëse to men wladz, laa naa rzaac to zig ti bets naa zig pxozgaa naa, golquiaadiag mine gne naa nu ganle zeena gacnan to quiayund naa mine rquiaqui to naa.

² Zeene gon zho xtiidz zho rnee me, grëse zho dzese bre zho; dzigo rëb me:

³ —Men Israel nac naa, guiedz Tars xtan Cilis ga gol naa, per Jerusalén nu broob naa, nu bio naa wseed, maistr Gamaliel goc men ne pseed naa. Pseed me naa grëse zigne nac xley xmen gol ne, grëse zigne nac zhiwseed zho; pseed me naa tibaque noxco naa runnon naa lë Dios zigne noxcoque tow. ⁴ Mine been to nu nadze, ye naa blactaa squi ben naa ptsidil naa grë zha ne rililadz Jesús, pquianañ naa yгаа zho guet zho; mgui wnaasaque razobdoo naa zho lidz zho rasan naa zho ladzguiib. ⁵ Men ne nac pxoz nroob ni grë mengol ne goc wxtis guiedz rii len iz co, zha co nanpaa ganle nli sca ben naa; sac zha bneedz ti xtiidz zho bi naa ndziñnie naa lo zha ne rnabey xyadoo grë men wladz ne no Damasc, zeena niacnie zho naa nianaz naa grëraa zha ne no ga rililadz Jesús, nialnie naa zho Jerusalén nu nded zho caxtigw.

⁶ Min copaa nagon brie naa nu za naa nëz co. Zhile gdziñ naa Damasc, zig rwe ngbidza tibaque zeene ziaad ti biinidoo nëz zhan gbaa biab lo naa. ⁷ Biabgazh naa liu, ga nix naa bin naa ti tsi men co rnee me lo naa: “Saul, Saul, ¿pe nacne quianañ luu naa?” ⁸ “¿Been guielnzaac bnë dien cho luu!”, rep naa. Dzigo në men co lo naa: “Naa nac Jesús men Nazaret ne squi quiat-sidil luu.”

⁹ Grë zha ne zanie naa ga, bdzieb zho gon zho biini co, per biend zho pe rnee men co lo naa. ¹⁰ Dzigo rep naa lo me: “Bzhiguiel bnë dien, ¿pe racladz luu gun naa niina?” Nëchaa me: “Guche i, güey Damasc ga gnë zho ganle pe nac mine no gun luu.”

¹¹ Dzigo bzhen zha ne zanie naa ga nia naa, bdziñnie zho naa Damasc; sac lo biinidoo co pcow lo naa. ¹² Ga no ti mgui lë Ananí, zëëb diidz rioxco me grë mine rnabey ley, grëse men wladz ne no ga nanpaa zho ti men wen nac me; ¹³ dzigo biaad me zaatne blëz naa ga, në me lo naa: “Saul, niinagazh gon bets laa luu gbiire gwi stib.” Zigne sca bnee me laa lo naa biac, gongazh naa me. ¹⁴ Dzigo nëchaa me lo naa: “Dios men ne bliladz grë pxozgol ne, ib men co bzooblo luu gacnan luu pe nac mine racladz me gac, me bzooblo luu gunbey luu men ne nacle diidz ga cxeel me lo guidzliu, ni gon luu tsi men co. ¹⁵ Ib laa me bzo luu tsienee luu lo miech mine bzhaac luu ga, mine bin luu ga. ¹⁶ Guso i sca, zeena chobnigazh luu. Dib zdoo luu bredz Jesús, bnab lo me csanmbe me luu lo xtol luu.”

¹⁷ Zeene laa naa blanso Jerusalén nu, tib dze lëëtaque no naa yadoo nozodiidznie naa Dios, ¹⁸ tibaque blulo me lo naa në me: “Na zeena biobladz brieer Jerusalén nu, sac ib gliladz grë miech rii mine gnee luu zeene gnee luu xtidz naa lo zho.” ¹⁹ “Per runbey zho naa waa”, rep naa lo me, “nanpaa zho scataa ra naa grë yadoo raxizhoo naa grë miech ne rililadz luu, rnabey naa rguin zho zho ni rio zho ladzguiib, ²⁰ niicle zeene beet zho Xteb men ne bnee xtiidz luu ga, ye naa bded diidz beet zho me, haxta pquianaap naa xab grë zha ne bdeedquie me.” ²¹ Dzigo në me lo naa: “Na zeena pcaaniob nëz brieer nu, sac gon laa

naa cxel_l luu stib dan tsienee luu xtidz naa lo grē menz_{it}.”

²² Zeene bin zho sca rēb me bdeetraa zho diidz nee me, psilo zho nguiedz roptsie rnee zho:

—¡Ib rieguialdraa gban men qui!
¡Golnitlogazh me!

²³ Nguiedz zēeb tsi zho, ib rioogd ro zho, masaque rdzib zho xab zho ni rchoon zho yudie laglaa.

²⁴ Dzigo psēeb men rnabey co Pabl len_l yu co, ni bnabey me grē menguiib co quin_l zho Pabl, zeena cueero Pabl dien_l pe nac ncuane been_l Pabl, zha nac ne scataa rac grē miech co lo Pabl. ²⁵ Laa zho blozhle pxidoo me, laa zho csilo quin_l me, zeene rēb me lo sti zha ne rnabey lo grē zhaguiib co:

—¿Pe nonguiela dzigo ne lega quin_l to ti zha Roma, ni gardle gac guielwxtis dien_l pe nlipaa no xfalt zho?

²⁶ Zeene bin zha co sca rēb Pabl, lēelēd güeynie zho diidz lo men_l ne rnabey zho ga, rēb zho:

—¿Zha gon_l gun_l luu? Sac zha Roma me nac mgui co.

²⁷ Dzigo güey men_l rnabey co rēb me lo Pabl:

—Bneeli lo naa, ¿dien_l pe nli na men_l Roma nac luu?

—Nliw —rēb Pabl—, zha Roma nac naa.

²⁸ Rzedz yan_l men_l rnabey co rēb me:

—¡Naasi zha Roma nac naa, ni nroob dimi bdizh naa bgab naa lo zha Roma!

Dzigo rēbchaa Pabl:

—Sanguē naa, desde gol naa bgab naa lo zha Roma.

²⁹ Grē zhaguiib ne bzo nguīn Pabl ga parne cueero me, lēelēd whiche zho lo me, niicle men_l rnabey cow bdzieb me zeene gon_l me nli zha Roma nac Pabl, sac nrooble nac falt ne niun_l me ga lega nabey me nguīn zho ti zha Roma.

Bnee Pabl lo wxtis Israel

³⁰ Zeene biini liu, bnabey men_l rnabey co pcaalsa grē zhipxoz non zha Israel ni grē men_l ne nac zhiwxtis zho, sac racladz me gacnan_l me dien_l pepaa nac ncuane rquiaqui rlēenie grē miech co Pabl. Dzigo pxadz me Pabl, blee me Pabl bzo me Pabl lo zho.

23

¹ Dze bui Pabl lo grē zha wxtis co, dzigo psilo Pabl bnee me rēb me lo zho:

—Laa naa rneli lo to nu ganle, mbe zdoonaa, Dios zobwi ganle zana_ld naa ncuane rdziguiend me.

² Zeene gon_l Ananí (men_l ne nac pxoz nroob) sca rēb Pabl, bnabey me zha ne zo gax lo Pabl, rēb me:

—¡Golcap ro zha qui!

³ Dzigo rēbchaa Pabl lo me:

—¡Tebaa squique cap Dios ro luu! ¡Nac luu gon_l zig ti lidz nguts loxaque nēz zhitssew stib rna! ¿Pa rquiin ne laa luu zob i? Led luu zo par cobey luu tel_l no pa ti ley ne zaguits naa, na lel_l luule noguiitsa bnabey luu bdi_n zho naa.

⁴⁻⁵ Pquiabbe zha ne ndxie ga rēb zho:

—¡Bie_n ganle lo pxoz nroob i, lo men_l ne quiyun_l xtsiin_l Dios i noquiabro luu!

—Golgun_l dispensar —rēb Pabl—. Nand naa lēē pxoz nroob i, tel_l niaca mine nan naaw ne scad naa; sac zhobnee lo Xtiidz Dios: “Gneenēd luu zha ne rnabey ladz luu.”

⁶ Zeene bien_l Pabl grol_l zha wxtis co ziena_ll zhiwseed zha saducé, zgrol_l zho ziena_ll zhiwseed zha farisé, dzigo psilo me nguiedz bnee me rēb me lo zho:

—¡Grēse to bets, golgona ganle, zha farisé nac naa, niiclegaa pxoz naaw farisé goc me! ¡Ni porne rliladzpaa naa gon_l zrieeban zha ne ret, mi_n co gane znu zo naa lo to nu!

⁷ Zeene sca rēb Pabl, psilo zho bdildiidz zho. Goc zho chop dii, ⁸ rriee zha saducé rnee nlid grieeban zha ne ret, nlid no anjl, nlid no espíritu; laa zha fariséga na rnee zrieeban miech, no anjl ni no espíritu. ⁹ Nguiedz zēeb tsi zho noneelsa zho, dzigo gusoque bla maistr ley ne nac grē zha farisé, rēb zho:

—Laa ne bdzianle ganle, ¡ni ti falt rapd mgui qui! ¿Pe nadien_l dziuun_l ne? Nend ti espíritu ga, ti xanjlgaa Dios ga sca bnee lo me.

¹⁰ Zeene gon_l men_l ne rnabey lo menguiib ga, laa lo xtil_l zho noyac nroobraa, bdzieb me rēb me nend znuse gzhiizh zho Pabl; bnabeyaque me gocredz menguiib güeyxi zho Pabl biire güeysan_l zho me len_l yu ne rbēz zho ga.

11 Goḷ guieel co, blulo Dios lo Pabl rëb me:
—Gdzieebd luu, zigne bnee luu xtidz naa lo miech Jerusalén nu, scaque none tsienee luuw lo grë zha ne no Roma.

Gocladz zho niut zho Pabl

12-13 Zeene biini liu, ndziibsräa choo zha Israel bnediudz rëb zho gowd zho, ni tib ro peet guied zho haxta gut zho Pabl; telne gund zho miñe rnee zho maase csiäabzi Dios zho. 14 Dzigo güey zho lo pxoz ne rnabey, lo grë zha ne nac zha non lo menḡuiedz, bzodiudz zho miñe no guic zho ga, ni rëb zho:

15 —Nana gon, goḷnab lo men ne rnabey lo menḡuieb cxeel me Pabl lo to gzhe, goḷquiaalo noraa pe lozh yquiep to Pabl; laa no nsinle ziobmbiaaz. Zeene laa zho tednie Pabl, ga dziuut no Pabl.

16 Dieen zha bin ti xingan bzian Pabla, nacne lëelëd güey win yu ne rbëz menḡuieb ga güeynie win diudz lo Pabl. 17 Dzigo bredz Pabl ti zha ne rnabey lo menḡuieb co, rëb Pabl lo zho:

—Bzhiguiel güeynie mëed rii lo men ne rnabey to, sac laa win no tsienie ti diudz lo me.

18 Bzhen men rnabey co nia mëed co, güeynie me win lo men nroob ne rnabey zho, rëb me:

—Laa naa zialnie mëed rii nu me, dien pe nac diudz ne ziaadnie win lo luu; Pabl ne no ladzguieb ga bnab lo naa guialnie naa win.

19 Dzigo bzhen men rnabey co nia win, güeynie me win stib nëz, bnabdiudz me lo win dien pe nac diudz ne zienie win lo me.

20 Dzigo rëbchaa win:

—Laa zha Israel gon bnediudz gnab zho cxeel luu pxey naa Pabl lo zhiwxtis zho gzhe, yquiaalo zho gnë zho noraa pe yquiep zho me. 21 Bzhiguiel gliladzd luu xtiudz zho, sac ndziibsräa choo zha ne nacgrë zho rëb zho laa zho tsiesoblan nëz gutgazh zho me zeene laa me ted. Biaan zho diudz grë zho, gowd zho, ni tib ro peet guied zho haxta gut zho me; haxta rëb zho tel laa zho gund min co maase gdzibdee Dios zho. Ible zuñ zhow, loxaque quiambëzse zho dien pe guiab luu.

22 Blozhse ga dzigo bzonëz me win, ni pso me diudz lo win choot lo gneed win ne laa win güeynie diudz lo me.

Güey Pabl lo gobernador Wech

23 Lëelëd bredz men rnabey co chop zha ne zo lo menḡuieb, rëb me:

—Laa zhaguiib gon none griee naguieel tsie zho Cesarea, na zeen goḷzo zha ne tsie; none tsie chop gayoo zha ne sëni, tsonḡal tsii zha ne sob guay, schop gayoo zha ne güey lanz. Naguieelgazh, zig rlozh xtsee none griee zho nu; 24 sac laa zho none tsiesan Pabl Cesarea. Ni goḷcoxab ti guay ne sob Pabl, sac none ndip ndaan me gdziñnie to me lo gobernador Wech Cesarea.

25-26 Dzigo pquiaa me ti guits ne güey zho gdziñnie zho lo gobernador, rneew:

“iDiuzh Gobernador Wech!

’Naa nac Claud Lisias, laa naa rxel guits rii lo luu gzodiudz naa ganle zha nacne bnabey naa ziaadsan zho men qui zaatne zob luu i.

27 ’Zha Israel bnaaz me gocladz zho niut zho me, laa zeene gocnan naa zha Roma nac me nacne pxeelaque naa zhaguiib güeyla me lo zho. 28 Gocladz naa niacnan naa dien zha nacne rlëenie zho me, dzigo bianie naa me lo zhiwxtis zho.

29 Ga gon naa led ncuaane rnad rlëenie zho me; tel zha nac xley zho ncuaan co rlisqui zho; nacda ncuaane guiab ne rieguial guet me, tsogyugaa me ladzguieb. 30 Zeene gocnan naa laa palal zho bnediudz gut zho me, nacne bnabeyaque naa ziaadsan grë menḡuieb qui me lo luu i. Niiclegaa zha ne rlëenie mew, laa naa rep lo zho guiaad zho lo luu i, zeena i gnë zho dien zha nacne rlëenie zho me.

’Lëed bii gdzieel ne sca dien.”

31 Zeene laa liu pcow, zig rlozh xtseew laa grë menḡuieb co pcaanie Pabl nëz; dib guieel bio zho nëz bdziñnie zho me guiedz Antípatris. 32 Biini liu, loxaque zha ne zob guay ga pcaa nëz zienie zho me Cesarea, laa grëraa menḡuieb co wbire bdzin Jerusalén stib.

33 Zeene bdzin zho Cesarea, bdeed zho guits ne zienie zho ga lo men ne nac gobernador, dzigo laa zho psan Pabl ga.

34 Blozhse blab me lo guits co, dzigo bnabdiudz me lo Pabl dien pa guiedz gol Pabl. Dzigo rëbchaa Pabl lo me, zha Cilis nac Pabl.

³⁵ —Nasca —rëb me—, zeene laa zha ne rlëenie luu glanso nu, dzigo yquiaadiag naa dien zhapaa nac xtil to.

Dzigo bnabey me, pquianap mennguiib Pabl zaatne nac len xyulow Herod.

24

Gocredz Pabl lo gobernador Wech

¹ Zeene goc gaay ngbidza, laa Ananí men ne rnabey lo pxoz bdzin ga, gza me blalaa zha ne nac zha non lo mennguedz Israel, zienie zho ti licenciad lë Tértulo; grë zho laa zho zie zienie zho diidz lo gobernador pe nacne rdilnie zho Pabl.

² Dzigo bnabey gobernador gocredz Pabl. Zeene laa Pabl bdzin, psilo licenciad co bzeet me grë ncuaane rquiaqui zho Pabl, rëb me:

—Xquizhdoo luu gon gobernador, ne squitaa ndzielguic luu rien luu zha gnabey luu, gane zaacse mban menladz no niina, blactaa ncuaane yquiin lo no noyun luu.

³ Rzac zdoo now, tel pa lotaa zo no rsoladz no luu nac luu men ne rnabey no.

⁴ Nli nonguielda dziunneed no luu, per been ti guielnzaac pquiaadiag ganle pe nac ncuaane rlisqui no quiayun mgi ne zo lo ne nu.

⁵ 'Masaque nac me lo no zig nac ti guielguidz dox ne rded, grëse guiedz quianzë me noyungüet me menladz no gacndaan zho lo men ne rnabey no. Lëe me ga zo lo grë zha ne rnee zho nazaren.

⁶ Zeene bgaa me, lëetaque laa me no len yadoo ro ne zob Jerusalén quiayunnguzee me xyadoo no. Nacne gocladz no gagazh nguizh me falt co zigne rnabey xley no;

⁷ per biaad Lisias grë xmennguiib me ntseeb rac zho biaadla zho me lo no. ⁸ Na nagon zac luuzhal yquiep me, zeena gan luu ganle nli quiayun me grë mine rnee no nu.

⁹ Grë zha Israel ne zienal ga, pquiabbe zho rëb zho nli quiayun me grë min co.

¹⁰ Dzigo blunia men ne nac gobernador ga lo Pabl gnee Pabl; nacne psilo Pabl bnee me rëb me:

—Nanle naa ziele iz zob luu nu rquiaadiag luu grë ncuaane rac xtan no nu, gane rley naa zial naa lo luu par yquiaadiaggaa luu ganle zha nac xtidz naa.

¹¹ 'Na rac tsiipchop ngbidz ga bdzin naa Jerusalén, biagan naa Dios len yadoo nroob ne zob ga (niicle tel niaca mine grieedidz ganle). ¹² Laa naa bia Jerusalén biagan naa Dios, choot biatilnied naa ga; niicle len grëragaa yadoo wina, ro nëzgaaw, waltaa noquiild naa miech cho lo gacntseeb zho. ¹³ Grëse mine rquiaqui grë zha qui naa grieelod glu zho nliw, sac led ncuaane godca.

¹⁴ 'Mine nac diidzli, niina wriin psan Dios ti Wseed Cub dien zha guiaanwen miech lo me, zha qui rzac led zhiwseete Diosa, sangue naa dib zdoo naa zanal naaw, dib zdoo naa quiayun naa dziin lo Dios men ne bliladz pxozgol no; ni scaquegaa, noxco naa grëse mine nac ley. Rliladz naa grëse mine bnee grë zha ne biadteed xtiidz me.

¹⁵ Rliladz naa dzin dze ne cueeban Dios grëse miech, zigtaa zha wena zigtagaa zha ntseeba, ni haxta zha ye zho rliladz min co.

¹⁶ Ni min copaa nagon gane tibaque noxco naa guiaanmbe zdoo naa, guntaldraa naa xtol naa zigtaa lo Diosa zigtagaa lo samiech naaw.

¹⁷ 'Nod naa Jerusalén tibaque, blale iz goc no naa ladz menzit; dze ne bdzin naa Jerusalén ga, laa naa bia porne zasan ti gon lo menladz naa ni zanie naa ti gon ne gded naa lo Dios. ¹⁸ Min co nagon nacne no naa len yadoo zeene gon grë zha qui naa.

Blozhle ben naa grë mine rnabey xley no rdziun no zeene sca riosan no gon, zeene laa bla zha Israel ne no nëz Asia blanso lo naa ga; per choot miech taf ndxienied naa ga, niicle choot noquiildgaa naa. ¹⁹ Zha co nagon riegual niaad nu, nlisqui zho tel pe ncuaane rzac zho nonguield noyun naa ga.

²⁰ Zha ne ndxieggaa nu niina, zac gnë zho telne brieequia falt ne rquiaqui zho naa zeene gocredz naa lo wxtis Jerusalén. ²¹ Te goon falt ga naye ben naa, lëe gdib nguiedz bne naa lo zho rep naa: “Laa naa racredz lo to, zig nac zeene falt ga rap naa loxaque ne rliladz naa dzin dze ne grieeban miech.”

Scase nagon naca.

²² Nanle gobernador co led ncuaane gund zha ne rliladz Jesús ga rquiaqui zho Pabl, dzigo bnee me lo zho cuëz zho nieeda gdzin Lisias, dzigo dien zhapaa guiaan xtil zho. ²³ Bnabey me zha ne zo lo mennguiib

yquianap zho Pabl, ni pso me diidz zaacse gac zho lo Pabl, gdeed zho diidz ted grë zha ne ndzieeldiidz Pabl tsiegan zho Pabl.

²⁴ Goc blalaa ngbidza, bnabey gobernador co gocredz Pabl lo me grop tsieel me Drusil, ti wnaa Israel. Laa me bredz Pabl, sac racladz me yquiaadiag me dien zha nac zhiwseed Jesús. ²⁵ Zeene bzeettaa Pabl, zha nac guielwxtis, zha none tsoxco miech gund zho mine riaabtaa guic zho, ni zha gdziñ dze ne gun Dios guielwxtis, dzigotaa laa me bdzieb, rëbchaa me lo Pabl:

—¡Lëëlewga na nadien! Na zeene guioba, dzigo naazhal cuedz luu guiaad luu ziodidz ne stib.

²⁶ Zhiga zhiga rbedz me Pabl, sac quiambëz me dien pe gdziibd Pabl dimi csilaa me Pabl.

²⁷ Zeene goc chop iz sca no Pabl ladzguiib ga, laa Wech brieë guielgovernador, bzëëb ti men lë Pons Fest. Niicle brieë Wech per psilaad me Pabl, sac racladz me dien zha guianzuiuura me lo grë zha Israel.

25

Güeyzo zho Pabl lo gobernador Fest

¹ Zeene goc tson ngbidz bdziñ Fest Cesarea pcaania me guielgovernador, laa me brieë güey me Jerusalén.

² Grë zha pxoz non ni grë zha ne rnabey lo menquiedz Israel, zeene bin zho laa Fest bdziñ Jerusalén lëëled güey zho lo me güeyxob zho xdemand Pabl; ni ³ bnab zho lo me cxeel me Pabl Jerusalén. Laa zho rnab min co sac laa zho bnediidzle, nëz tsiesoblan zho, yquiambëz zho ted Pabl gut zho Pabl. ⁴⁻⁵ Per bdeete Fest diidz, rëb me laa Pabl nole ladzguiib ga, tel zha ne zrieelo tsie, ga glisqui zho tel pe nac falt ne rquiaqui zho Pabl; benque zlase dze laa me gbiire guey nëz co dzigo zac tsienal zho zhits me.

⁶ Ndziibsräa ti zhmäl blëz me Jerusalén ga, dzigo laa me biire zey Cesarea. Zna dze bdziñ me biinigazh liu co güey me yulow, bnabey me gocredz Pabl. ⁷ Laa grë zha Israel ndxiele ga, wbig zho lo Pabl ndal grë falt nroob ne rcaadzdoñ zho me, per loxaque diidzsew, guienñ zha glu zho ne nlipaa goca. ⁸ Dzigo pquiab Pabl rëb Pabl:

—Grëtaa mine rquiaqui zho naa i, ni tiba nlid. Wlaltaa gard quits naa xley no, gard quitnie naa xyadoo no, niicle gardgaa gacntseeb naa lo zhiwxtis zha Roma.

⁹ —¿Pe racladzdga luu tsie luu Jerusalén? —rëb Fest—. Ga gbiire yquiaadiag naa xtil to i zeena glu dien chopaa rap dol.

Sca rëb me, sac racladz me dien zha guianzuiu me lo grë zha Israel. ¹⁰ Dzigo rëbchaa Pabl:

—¡Gad naa! ¡Nod pe nac ga naa ga, to rieguiäl gun guielwxtis rii! Benque nan wen luu ganle peet falt nzëëbd naa lo zha Israel. ¹¹ Tel niaca mine nli ziyun naa pe guielntseeb ne raguiäl naa guet naa, maase guet naa. Per na nanopaa naa ni ti ncuaane rquiaqui zho naa i nlid, ¿pe nac dzigo cho co naa ladznia zho gut zho naa? Laa naa racladz, mazd goñneedz diidz tibaque ga naa lo zhiwxtis nroob ne, men ne zob Roma.

¹² Dzigo bzodiidz Fest grë me men rac ne nacie me dziin; blozhse ga rëbchaa me lo Pabl:

—Guienñ rson sca. ¡Tel lo César racladz luu tsie luu, na maase tsie luu!

Gocredz Pabl lo Agrip

¹³ Zeene goc bla zhmäl, laa rey Agrip grop wnaa ne lë Berenis bdziñ Cesarea ga güeyquiaabdiuzh me Fest. ¹⁴ Nzianlaa ngbidz blëz me ga, dzigo bzodiidz Fest lo me laa Pabl sca no ladzguiib ga, rëb Fest:

—Len dze ne bii nac Wech dziin biab ti mgui ladzguiib nu, ¹⁵ laa len dze ne bia naa Jerusalén biaad grë zhipxoz non zha Israel, grë zha non ne rnabey lo zho, biaad-xob zho xdemand me lo naa ga, rnab zho lo naa gnabey naa guet me. ¹⁶ Dzigo rep naa lo zho led scad run zha Roma guielwxtis, ib none gacredz me gnee me chop lan xtiidz me lo grë zha ne rzoob xdemand me, ga glu telne nli mine rquiaqui zho me togo nlidgaaw; ¹⁷ nacne biaad zho nu. Zna dze blanso zho, biinigazh liu co bnabey naa gocredz me. ¹⁸ Tibaque ni naa bod no pe ti falt nroob ne rquiaqui zho me, per zeene biaad zho yulow gon naa ¹⁹ lëë gdib tel zha nac grë ncuaane rliladz zho min co rllisqui zho, ni rllisqui zho pe nacne zienal

me zhiwseed ti mgui lë Jesús, gutle men co ni laa me rnee mban me.

²⁰ Zeene gon naa grë ncuaan co rquiaqui zho me nli riend naa zha gun naa, dzigo rep naa lo me, telne racladzgaa me zac tsie me Jerusalén ga dien zha guiaan lo xtil zho.

²¹ Per bnéd me, lel bnaab me tsie me lo César; gane niina laa me bii no i, nieeda gne naa lo César dien pa hor grieelo cxel naa me nöz co.

²² Dzigo rëb rey Agrip:

—Racladz naa gon tebaa zha yquiaadiag naa dien zha nac xtiidz mgui co.

—Na zho ganle —rëb Fest—, gzhegazzh gnabey naa gacredz me.

²³ Biini liu, ti lni nroob ne rac laa Agrip ni Berenis bdziñ len yu ne rac guielwxtis ga, grë zha non ne rnabey lo menguiib, grë zha non lo menguiidz, nal zho zhits me. Dzigo bnabey Fest gocredz Pabl, zeene laa Pabl bdziñ ²⁴ laa Fest psilo bnee, rëb me:

—Niina ne laa luu ziaad nu rey Agrip, scagaa to ne nac to men ne ndxiegrë ne nu nadze, golwi ganle lëe men rii nagon rlëenedox zha Israel, racladz zho guet me; zigtaa Jerusaléna zigtagaa nuw ziyaadnab zho lo naa gnabey naa guet me. ²⁵ Sañgue naa gonle naa rapd me falt, par guiab ne rieguial guet me; per laa me bnaab tsie me lo César, na laa naa no cxel me nöz co.

²⁶ Nli riend naa dien pe nac diidz ne cxel naa lo César, ne squi lega ncuaane nliid rquiaqui zho me. Min co nagon bnabey naa gocredz me lo to nu, ni laga laa luu ziaadgaa nu rey Agrip, bzhiguiel pquiaadiag ganle zha rzë xtiidz me; zeena togo zdzziel naa pe nac diidz ne cxel naa gal dze ne laa me tsie nöz co. ²⁷ Sac nonguield ga gun naa telne sobdoo me cxel naa me, ni tel cxeld naa diidz dien pe nac xfalt me!

26

Bnee Pabl lo Agrip

¹ Dzigo rëb rey Agrip lo Pabl, mezhal gnee dien zha naca. Nacne blis nia Pabl psilo Pabl bnee Pabl rëb Pabl:

² —Rley naa gon rey Agrip ne laa naa zial lo luu nadze, zeena gzodiidz naa lo luu gacnañ luu ganle nliid grë ncuaane rquiaqui grë menladz naa naa. ³ Rley naa sac nañ naa nañpaa luu zha nac grë xcostumbr no,

grë ncuaane rliladz no. jRnab naa lo luu sca, guieete luu yquiaadiag luu grë mine gne naa!

⁴ Grëse zha Israel nañ wen zho ganle zha mban naa, sac mëedlas naa bdziñ naa Jerusalén, ga broob naa. ⁵ Nañpaa zho zha farisé goc naa, ni zha farisé nac zha ne rioxcoraa run grëse mine rliladz zha Israel. ⁶ Per mazd gon, laa zho rlëe lo naa porne dib zdoo naa rliladz naa laa Dios beenle mine psan me diidz lo grë pxozgol no. ⁷ Grëse zha Israel, zigne ziaad zho lo gza tsiipchop dii ne psan xmengol no, grëse zho dze guieel bii quiambëz zho gac min co. jMasaque rzac zho dol ga quiayun naa rliladz naa laaw gocle! ⁸ Haxta to, zeene rzet naa zrieeban miech, rzhidz to ron tow, ¿pe rzac to naa grieelod Dios gun me min co?

⁹ Glo nli ptsidil naa grë zha ne rliladz Jesús men Nazaret, masaque rzaac naa lëew ga quiayun naa. ¹⁰ Pe zhidaa zha ne blo naa ladzguiib Jerusalén, haxta grë pxoz non bneedz diidz ben naa grë min co; ni zeene rnabey zho ret grë zha co, ye naa rded diidz ret zho. ¹¹ Nzian grë yadoo win bia naa, biasacsi naa zho haxta gneenë zho Jesús. Blëenedox naa zho, haxta grë guiedz zit bia naa biaguiib naa zho.

¹² Min copaa nagon brie naa za naa guiedz Damasc, masaque grë pxoz rnabey bneedz ti xtiidz zho bi naa laa naa za. ¹³ Tel gan luu ganle rey Agrip zha bzhaac naa: Zig rwe ngbidza, tibaque zeene ziaad ti biinidoo nöz zhan gbaa biab lo naa, ni lo grë zha ne zanie naa ga, nroobraa nac biini co lo xbiini ngbidz. ¹⁴ Grëse no biab liu, dzigo bin naa ti tsi men co rnee me xtiidz no, bredz me naa në me: “Saul, Saul, ¿pe nacne quianañ luu naa? Lëeque luu gon nosacsi luu i, rzac luu zigne rzac ngon ne rcaanni, ni lëeque lo guiib lots ne rtseb zho ma riecaanni ma.” ¹⁵ Dzigo rep naa: “Been guielnzaac bnë dien cho luu.” Nëchaa men co: “Naa nac Jesús, men ne squi quiatsidil luu. ¹⁶ jNa zeena guche i, bzoli! Laa naa bredz luu zeena gun luu xtsin naa, tsiezodidz luu lo miech mine blozh bzhaac luu nu, ni grëragaa mine naraa gan luu. ¹⁷ Peet tsienied guic luu, naa yquianaap luu, nicle zhaladz luuw niiclegaa zha zita peet

grieelod guṅ zho luu. Sac laa naa cxel luu grē guiedz zit ¹⁸ tsienee luu lo miech gacnaṅ zho miṅe nacpaa diidzli, zeena griece zho lo ncow gbig zho nēz lo biini, griece zho ladznia menḁox ygab zho lo Dios. Dib zdoo zho gliladz zho naa zeena guṅ Dios zho perdon, ni yгаа zho zaatne gdziṅ grēse zha ne mbe zdoo.”

¹⁹ ‘Min co nagon rey Agrip nacne bioxco naa beṅ naa miṅe nē meṅ co lo naa ga. ²⁰ Glose Damasc psilo naa bne naa lo miech, ga brie naa bdziṅ naa Jerusalén, bia naa dib Judé ni grē guiedz zit, bne naa lo miech csaan zho grē xquielntseeb zho gbig zho lo Dios.

²¹ ‘Min co nagon nacne rlēenie zha Israel naa, biadnaaz zho naa leṅ yadoo ro ne zob Jerusalén, gocladz zho niutgazh zho naa. ²² Gocniēn Dios naa, gane laa naa bii zo nu quiane naa Xtiidz me zigtaa lo grē zha wina zigtagaa lo grē zha nona. Noseete naa miech stib wseed, sinque laa naa rne miṅe bzeetaque Moisés ni grēragaa zha ne biadteed xtiidz Dios padzeela. ²³ Tel zha, bzeetele zho ib sacsi miech meṅ ne cxeel Dios ga, ni me gac meṅ ne glopaa grieeban, me gac zig ti biini ne gziini lo grēse miech, zigtaa zha Israela zigtagaa grē menzita.

²⁴ Tibaque nguiedz bnee Fest rēb me lo Pabl:

—iBod rzhinle guic luu gon Pabl! iNe tibaque nagon rio luu wseed gane squi riots xtiidz luu!

²⁵ —Coo, gobernador Fest —rēb Pabl—, led rzhind guic naa. Niapse miṅe nac diidzli min co none naa, ²⁶ laa rey Agrip zob i, me naṅ ganle nli grē miṅe rne naa nu. Tibliladz naa none naaw lo me, sac naṅpaa naa naṅ me nli miṅe rnee naa, nacda ncuaane goc ngueets zhliaan. ²⁷ iLed nli lēe rey Agrip rliladz luu miṅe bzeet grē zha ne biadteed xtiidz Dios padzeela? Nanpaa naa rliladz luuw.

²⁸ Pquiab rey Agrip, rēb me lo Pabl:

—iZlalaque nu gon laa luu cole guic naa ye naa sēeb xnēz Jesús!

²⁹ Dzigo rēbchaa Pabl:

—iNend zhilew o nroobragaaw, per rnab naa lo Dios led loxaque luudse sēeb xnēz me, sinque ye grēraa zha ne noquiaadiag miṅe none naa nu niina; zeena yгаа to

miṅe bgaa naa nu, per led znud sob caden rii nia to!

³⁰ Gataa laa Agrip guso, gusoque Fest, gusoque Berenis ni grēraa zha ne zobnie zho, laa zho brie ga. ³¹ Grēse zho rnee peet xtold Pabl, rapd me falt ne guiab ne rieguial guet me, rieguialgaa tso me ladzguiib.

³² —Niacpaa nsilaa ne me —rnee Agrip lo Fest—, telne nabd me tsiepaa me lo César.

27

Pxeel zho Pabl nēz Roma

¹ Bdziṅ dzew, laa Fest bnabey tsie Pabl nēz Roma, dzigo laa zho psan Pabl ladznia ti meṅ ne rnabey lo menḁuiib lē Jul, gza Pabl zlalaa zha ne no ladzguiib ga. Lēe Jul co rnabey lo tib dii menḁuiib ne rnee zho “Augusto César”.

² Ye no zional zhits Pabl grop no Aristarco, laa no bziaab ti xbarcw zha Adramit zie grē guiedz ne ndxie ro nis nēz Asia, laa no pcaa nēz laa no zio.

³ Biini liu co laa no bdziṅ guiedz Sidón. Zeene bdziṅ no ga, wen goc Jul lo Pabl bdeed me diidz güey Pabl güeyquiaabdiuzh Pabl grē zha ne runbey Pabl ga, grēse zho rleynie zho me blēzlo zho me.

⁴ Ga brie no bdieed no tib ro guidzliu win ne lē Chipr, psaac guidzliu co palal, sac psilo rrie me rtsire me barcw ne zio no ga. ⁵ Laa no zio, bdieed no gax ro guidzliu ne nac xtan zha Cilis ni xtan zha Panfil, bdziṅ no ti guiedz ne ndxie xtan Licia lē Mira; ⁶ ga bdzieet no barcw ne zio no ga. Lēetaaque noguib Jul sti barcw ne guio no, laa ti xbarcw zha Alejandrí no griece ga tsie nēz Italia, dzigo bziaab no barcw co laa no zio stib.

⁷ Tsow ga zie barcw co, nzian dze goca, nen dzigoraab dziṅ no gax guiedz Gnid; ib rbēzdaque me, nacne bguib zho dien pa nēz zhi rcaan me, dzigo güeynie zho barcw co nēz Cret. Tib ro guidzliu win co zio no bdieed no Salmon; ⁸ nen bdziṅ no zaatne rnee zho Buenos Puertos, gaxle ga riaan ti guiedz lē Lasé. ⁹ Nrooble dze goc no no lo nis, leṅ dze co laa mēe naṅ psilole ni zēeb diidz gacd sē barcw leṅ mēe co, nacne bnee Pabl lo grē zha ne zienie no ga, ¹⁰ rēb me lo zho:

—Golḡona ganle, telne laa ne griee nu len dze rii, rgobey naa ib znitlonie ne barcw rii lo nis.

¹¹ Laa ne niacnie Jul Pabl niac mine rēb Pabl ga, leḷ mazdraa bliladz me xtiidz zha ne rsēē barcw ni men ne nac bizhuana. ¹² Stiba, zaatne nac Buenos Puertos ga rapda zaatne zaacse cuēz miech len mēē naḷ, nacne nzian zho rēb mazd gdziḡ guiedz Fenice, ga zac gbiaaz no gdipse len mēē naḷ. Ro guidzliu win co riaan Fenice, nligaa zhi rcaan me ga.

¹³ Zeene laa ti me win ne znu ziaadquia psilo brieē lo nis co, zootle na nli grieedraa me. Nacne lēēlēd bnabey zho bziaab no barcw, blisglaa zho lar nroob ne rcaan me rzēw, laa no zio, gax gax ro guidzliu co zienie zhow. ¹⁴ Zhisaque goca zeene laa ti me dox ne rnee zho Nordest psilo brieē, laa me co psilo rtsire barcw. ¹⁵ Niicle racladz zho tsienie zhow nēz ne no guio no ga, per rsaand me; goḡse zho led ncuaane gacda, mazd psaan zho zienie mew nēz ne racladztaa me.

¹⁶ Scale zienie me barcw ne no no ga, biotieed no gax ro guidzliu win ne lē Claudia, ga nē nē brieelo blis zho grē canó win ne naḷ zhits barcw ga bzēēba nēz len barcw; ¹⁷ dzigo blibdoo zho barcw co zeena gbīlda, ni blit zho lar nroob ne rcaan me rzēw, sac rdzieb zho rēb zho telne scaquia lar co nend tsieniezhoo mew nēz ro nis, pa tsiesobnagwa lo yuzh.

¹⁸ Zeene biini sti liu co mazdraa rrieē me, ni guīexoo ne ziaadnie me, nacne blee zho grē yo ne no len barcw blaal zhow lo nis. ¹⁹ Goc bionḡ ngbidz scataa zo guie dox co, bnabeyaque zho blee no grēse ncuaane runxtsiin zho len barcw blaal now lo nis.

²⁰ Goc bla ngbidza rbēzdaque guie dox co, rludraa lo mel per ni lo ngbidz rludraa, dzigotaa rdzieets no nlidraa griequiaa no. ²¹ Niicle wagw choot rsoladzdraa, dzigo bnee Pabl lo grē zha ne zioḡrē no ga, rēb me:

—Tebaa nion to xtidz naa nagonḡ nzhiguel to nrieed ne Cret, zeena ndzieelod ne grē ncuaane nodzian ne nu, niicle nlaaldgaa ne grē yo co lo nis. ²² Per laa ne znule bzhiaac zha dziuunraa ne. ¡Gdziebde to! ¡Peet gacd ne! Niicle nitlo barcw rii,

per choot peet gacd. ²³ Led nanle to ganle, xnēz Dios no naa ni xtsiin me noyūn naa, nieewdze pxeel me ti xanjḷ me ²⁴ nē lo naa: “Gdziebd luu goḡ Pabl, peet gacd luu, sac ib none laa luu gdziḡ lo rey ne zob Roma. Niicle grē zha ne ziadgrēē luu len barcw i peet gacd zho, sac bin me mine rnab luu.” ²⁵ Gane rne naa lo to peet tsienied guic to, nanle naa csaand Dios ne, ible zac mine nē anjḷ co lo naa. ²⁶ Ib tedsod, no pa ti lo guidzliu win ne no lo nis rii tsiezo me rii ne.

²⁷ Zeene goc tsiida ngbidz sca nēzrii nēzrec zienie me no, laa no no lo Nisdoo Adriático. Wdze co, zig groḷ guieela, bien grē zha ne rsēē barcw ga gaxle ti ro guidzliu ga nonie barcw no; ²⁸ dzigo ptiix zho dieḡ palal quiet nis ga, goḡ zho loxaque gaḷ yas guieta. Bzē zho spalal biire ptiix zhow stib, gale guieta loxaque tsiiptib yas. ²⁹ Gataa laa zho bdzieb rēb zho nend pa tsiecaan barcw lo quie, dzigo psilēē zho lo doo ne zob gza tap guiib cruz nroob ne quia nēz zhits barcw, bronḡ zho gza guiib co lo nis, zeena tsowga sē barcw; rzac zho tebaa laa liu biinile.

³⁰ Grē zha ne ruḡ dziin len barcw, go-cladz zho nzhoonḡ zho, psilo zho noxadz zho grē canó win ne ney barcw, rquiaalo zho zig nac zeene guiib cruz nroob ne ney barcw nēz quiaw quialit zho csēēb zho len nis. ³¹ Zeene goḡ Pabla, rēbchaa me lo Jul ni lo grē xmenḡguiib Jul:

—¡Laa grē zha rii goḡ racladz xoonḷ! Csaande to, sac telne laa zho xoonḷ nlidraa griequia to lo nis rii.

³² Dzigo pchug grē menḡguiib co doo ne zob grē canó win co, bronḡ zhow lo nis.

³³⁻³⁴ Silgaw, bii ncow rnaw laa Pabl bnee lo zho gow zho, rēb Pabl:

—¡None gow to! Goḷwi ganle nale gac tsiinḡ ngbidz ga ni ti lē peet gard gow to, ni squique raguiesde to zaacse. Peet tsienied guic to, ni tib to peet gacd.

³⁵ Blozhse sca bnee Pabl lo zho, bzhen Pabl ti quietxtil, squi ndxie zho grē zho bdeed me xquizh lo Dios, dzigo beengroḷ me quietxtil co laa me psilo wagw. ³⁶ Dzigoraa peet güeyniedraa guic zho, ye zho laa zho psilo dow. ³⁷ Lo grē no zig zio no len barcw co rgaa no chop gayoo tsonḡgaltsiimtib.

³⁸ Blozhse bdioww no, dzigo laa zho bleegre zhoxtil ne zie len barcw ga blaal zhow lo nis, zeena gnitne barcw spalal. ³⁹ Zeene laa liu blozh biini, gon gre zha ne rsee barcw ga laa ti le ro guidzliu rlu gax ga, per riend zho dien paw. Natlaa nac ro guidzliu co, rlu zac gdzin barcwa, nacne reb zho dien pe grielod gdzinne zho barcw ga. ⁴⁰ Dzigopchug zho doo ne zob guuib cruz nroob ne no len nis ga, biance guuib co ga. Psilee zho doo ne naaz yag nlag ne rchug nis rze barcw, ni blisglaa zho lar nroob ne rcaan me rze; zeena csee mew gdzina gax ro guidzliu co.

⁴¹ Per ziese zho, leetse lo yuzh ne zobli len nis co gueytsiba, loxaque guesyebguica ga laa nez zhitsa psilo nobilaque, sac grese nis ne rias riecaan choo co. ⁴² Dzigotaa laa gre menguib co gocladz niut gre zha ne zie ga gey ladzguuib, reb zho nend znuse xobnis zho xoon zho. ⁴³ Per bdeete men ne rnabey lo zho diidz, sac racladz me gut zho Pabl. Mazd bnabey me zha ne rac rzhobnis, zac ner zho xobnis zho griequia zho ro nis co; ⁴⁴ laa gre zha ne gacd xobnis, zac maase gre yag biats ne nobil barcw xobnisnie zho. Sca bdeeda diidz briequia no ro nis grese no.

28

Blöz zho Malt

¹ Zeene bdzin no ga, dzigora gocndion no lee guidzliu win ne le Malt ga. ² Gre miech ne no ga pquadox zdoo zho no, bzeg zho gui bredz zho no bdzee no, sac lala rac nal ni scataque bgaa no guie.

³ Ye Pabl guey gueytop chop le yag ne cuib lo gui. Leeetaaque laa me nodziiba lo gui, tibaque bias ti meel ne zizhoon lo zhindzee gui co, pquiaalay ma nia me, quiataque ma ga. ⁴ Gre miech ne no ga, zeene gon zhow rneechaa zho:

—Ise nagon rlu, nzeb men qui ngutoo! Niicle blaa me lo nisdoo, per no guielwxtis ne quianab guet me.

⁵ Znuse bdzib Pabl nia me bron me meel co lo gui. ⁶ Grese zho rwi quiambez zho dien pa hor sigui me, te tibaque tsope me liu ye guet me. Wdzeelaaw peet racd me. Laa zeene gon zho peet racd me, dzigo psilo zho rnee zho no cho ti dios nac me.

⁷ Gaxaque ga quia tib le liun men ne rnabey lo guidzliu win co le Publ, dzigo bneedz me zaatne bliaaz no ga tson ngbidz ni bneedz me ncuane bdioww no.

⁸ Leeetaaque len dze co laa pxoz me nix rlan xlee ni yoobchen. Dzigogüeynee Pabl lo me, bnab Pabl lo Dios guiac me; blozhse bnab Pabl lo Dios, pxobnia Pabl guic me, laa me biac. ⁹ Zeene bin gre miech cow, zha ne rzacnetaa riaadnie zho zho lo Pabl, runguiac Pabl zho. ¹⁰ Dzigorleyne zho no, nroob gre ncuane bgad zho lo no. Zeene gol dze ne laa no wbii ga, scasaque nroob ncuane quuin no nez bneedz zho.

¹¹ Tson mee bliaaz no lo guidzliu co, dzigo laa no brie ga bziaab no ti len xbarcw zha Alejandri, ti barcw ne blez ga dipse len mee nal co. Guic barcw co quia chop mdio, mdio ne rnee zho Castor ni mdio ne rnee zho Polux. ¹² Bdzin no guiedz Siracus, ga bliaaz no tson ngbidz. ¹³ Siracus brie no, gax gax ro guidzliu zio no bdzin no guiedz Regio; biini liu ine zhoob ti me ne ziaadquia lo nis co, dzigo laa no brie Regio laa no zio. Biiniraa sti liu bdzin no guiedz Puteoli, ¹⁴ ga bdzin no lo blalaa zha ne riladz Jesus. Bnab zho lo no gbiaaz no, nacne bliazaque no lo zho ga ti zmal. Garaa brie no bdzin no Roma.

¹⁵ Gre zha ne riladzle Jesus Roma, zeene bin zho laa no gdzin ga, brie zho biaad-xinez zho no. Zhis zho biaddieel no zaatne le Foro de Apio, szhis zho biaad zaatne le Tres Tabernas. Zeene gon Pabl scataa biaad-xinez zho no, rley me rdeed me xquizh lo Dios.

Bdzin Pabl Roma

¹⁶ Zeene bdzin no lad guiedz Roma, bdeed zho diidz Pablzhal bguib ti yu ne blez me grop me menguib ne quianap me, blood zho me ladzguuib.

¹⁷ Goc tson ngbidz bdzin no ga, dzigo bredz Pabl gre zha ne nac zha non lo zha Israel ne no ga. Blozhse pcaalsa zho, rebchaa me lo zho:

—Laa naa bredz to nu gon bets, gacnan to ganle laa gre zha ladz ne bnaaz naa Jerusalen, gueyzo zho naa lo zhiwxtis zha Roma rnab zho guet naa, per gneli naa lo

to ganle, peet bend naa lo zho, ni ti zhi-wseed xmenḡol ne bditsd naa. ¹⁸ Niicle wx-tisgaaw, blozhse pquiep zho naa gon zho raapd naa falt, nacd naa zha ne rieḡual guet; dzigo gocladz zho nsilaa zho naa.

¹⁹ Per zeene gon naa nēd menladz ne csilaa zho naa, nacne bnabaque naa ziaadnie zho naa lo César nu. Miḡ co nagon nacne zial naa nu, ziald naa cto naa menladz ne o cteedquiegaa naa zho. ²⁰ Wen ne laa naa beenbey to nagon, ni beenbeygaa to naa; gacnan to sca ganle laa caden rii zob nia naa, per nacda por pe falt ne rap naa, sinque laaw zob nia naa porne rliladz naa laa Dios pxeelle men ne quiambēz menladz ne ga.

²¹ Dzigo pquiab zho rēb zho lo Pabl:

—jWaltaa, ni ti guits ib gard cxeel menladz ne lo no zaatne gzeet zho luu! Niiclegaa grē zha wladz ne zilanso nuw, rneed zho laa luu noyuḡ pe guieḡntseeb.

²² Per na laga laa luu ziaad nu, siguiel luu sodiidz luu lo no dieḡ zhapaa nac wseed ne rliladz luu i, sac blactaa zidzion no, zaatne notaa zha ne rliladza rlēenie miech zho.

²³ Dzigo pso zho ti dze ne tsie zho.

Zeene goḡ dze co, nzian zho pcaalsa zaatne rbēz Pabl ga. Dzigo psilo Pabl bzodiidz me lo zho zhapaa racladz Dios gban miech, ni rnee me lo zho gliladz zho lēēle men ne nac diidz cxeel Dios ga nac Jesús; blu me lo zho grēse zaatne zhobneew, zigtaa lo grē miḡe pquiaa Moisésa, zigtagaa lo grē miḡe pquiaa grēraa zha ne biadteed xtiidz Diosa. Dipse dze sca bzodiidznie me zho grē miḡ co.

²⁴ Brieequia bla zha ne bliladz grē miḡe bnee me ga, ni scaquegaa brieequia zha ne bliladzda. ²⁵ Grē zha ne riod zdoo miḡe rnee me ga, laa zho psilo noriee, nacne rēb me:

—Ib lēēpaa miḡe nac to i ga nagon bzeet Espiritu Sant, zeene psiaab me guic profet Isá znu rēb Isá ²⁶ lo grē xmenḡol to:

Niicle peraa gon to, niicle peraa gan to,
per peet guiende to;

²⁷ sac gocntseeb zdoo to.

Zob diag to, ni peet ronde to;

zob lo to, ni peet ranḡe to.

Ncow nac guic to,

gane peet ronde to, peet ranḡe to;

niicle rioxcodgaa to gbig to lo naa zeena csilaa naa to lo xtol to.

²⁸ Golgacnan sca ganle, miḡ co gane laa Xtiidz Dios quiagaaz lo grē miech stib guiedz, ni zhasi gon noliladz zhow.

²⁹ [Zeene gon zho sca rēb Pabl mazdraa blēē zho, nodiidiidzlsa zho laa zho zey.]

³⁰ Dipse len chop iz blēz Pabl ga, ga bree me ti len yu ne bio me. Ga rdziḡ grē miech ne zienee lo me, ³¹ zha ne zietaa, rnee me lo zho zhapaa racladz Dios gban miech, ni rnee me lo zho gliladz zho cho nac Jesús. Dipse len dze co, ib biod zha ne ntsidil pe nacne sca noseed me miech.

GUILTS NE PXEEL PABL LO ZHA ROMA

¡Diuzh to grëse to!

¹ Naa nac Pabl, naa nac tib ngundziin win quiayun naa xtsiin Jesús. Dios bredz naa pxeel me naa none naa Xtiidz Ndzon me lo miech.

² Padzeelale bnee Dios ne laa me cxeel Diidz Ndzon rii lo ne, lëew ga bzeet grë zha ne biaad padzeela biadteed xtiidz me lo miech, lëew ga raquiet lo guits ne zhobnee Xtiidz me. ³ Lëew ga rnee ganle cho nac Jesús (men ne brieequia lo xtii rey David ne laa me goc miech lo guidzliu; ⁴ sangue Espíritu Sant, pxobnen me ganle Xpëed Dios nac me; min co gane brieegan me).

⁵ Zeene biaad Jesús, ga pxobnen me ganle tibaque noxco Dios ne; ni niina Diosaque bzooblo naa rxeel me naa none naa Xtiidz me lo grëse miech, zeena gliladz zho me, gon zho diidz gban zho zigne rnabey me. ⁶ Zig nac to, glo lo guielcow ga ngab to; sangue niina laa me bredz to laa to ngab xnëz Jesús.

⁷ Laa naa rxel guits rii lo to, grëse to ne no to guiedz Roma i. Golgacnan ganle rleyne Dios to, gane laa me bredz to ygab to lo me, gban to zigne no gban zha ne ngab lo me. Me ne nac me Pxoz ne, ni Jesús men ne rnabey, tibaque noxco me to, me nac men ne gacnen to zeena peet zhgab ctsebde to.

⁸⁻⁹ Nanle to nasca ganle xtsiin Dios quiayun naa, dib zdo naa quiaseed naa miech Diidz Ndzon ne nac zhiwseed Xpëed me.

Nu ne laa naa rsilo rne lo to, gloque rded naa xquish lo Dios ni lo Jesús por mine quiayun to grëse to, sac gon tel pa lotaa zëeb diidz ne nlipaa dib zdo to rliladz to me. Me zobwi, me nan ganle zeene rnabtaa naa lo me, ib rianladz naa to, tibaque rnab naa lo me gacnen me to; ¹⁰ ni tibaque rnab naa telne zneedz me diidz gdzin tib dze ne grieelo guial naa i guialgan naa to. ¹¹ Ne nlipaa rquiabladz naa ganlo naa to, guialzhaal naa gnedz naa rson lo

to guien to zha ycaaniaraa to guielbiini ne rneedz Espíritu Sant; zeena tistique gac guic to dziitsraa so to. ¹² Ni scagaa tipse gac ne ziodiudz ne zha nac Xtiidz Ndzon Dios, mine rliladz ne; zeena tipse gac ne sodziits ne low.

¹³ Bets, bzian, tel gan to ganle blactaa vuelt ziyacladz naa guial naa i guialgan naa to, per haxta lo nadze gon rrieelodaque guial naa. Ib laa guic naa no guial naa lo to i, zeena gacndalraa miech ne sëeb gliladz Xtiidz Dios, zigne ziyacndal zho grëraa zaatne ziyateed naa. ¹⁴ Sac ible naa raguial cseed miech Xtiidz Dios, grëse zho niicle zha nona, niicle zha mbana; niicle zha raca, ni niicle grëgaa zha ne peet rienda. ¹⁵ Mincocxe waa, tibaque laa naa racladz ye nëz qui guial naa guialne naa Xtiidz Ndzon Dios lo to, ne nac to zha ne no guiedz Roma i.

Poder ne rap Xtiidz Ndzon Dios

¹⁶ Tel naa, ib rtoladz naa gne naa Diidz Ndzon rii lo miech, sac ncuaan ro ne run Dios zeene rquiaadiag miecha. ¡Grëse miech ne gliladza, ib zlaa zho lo xtol zho! Laa guielnzaac co no niina par grëse miech. Glose lo zha Israel bdzina, laa niina laaw quiadzini lo grëraa miech, zeena grëse zho gbig sëeb xnëz Dios. ¹⁷ Sac gon, lëe Diidz Ndzon rii rlu zha rbiire rcaania Dios miech, rsanmbe me zho lo dol rbiire rianwen zho lo me: totsaque nli dib zdo zho gliladz zho mine nac Xtiidz me. Sca zhobnee lo Xtiidz me, zaatne rnee: “Zha ne biaanwenle lo Dios, ib zrieelo gbannie zho me, sacne dib zdo zho rliladz zho mine nac Xtiidz me.”

Xtol miech

¹⁸ Ndionle ne ganle no guielnë ro ne csiaab Dios ygaa grëse miech ntseeb, miech ne nëd gac-wen, ni desde gbaa cxeel me guielnë ne ygaa zho; sac por xquielntseeb zho rsaand zho gacnan grëraa miech mine nac diidzli.

¹⁹ Grë zha ntseeb, nanle zho zha nac Dios, sac mezhallu lo miech zha grieelo gunbey zho me. ²⁰ Niicle ne grieelod ganlo ne Dios, per de lo grëtaa ncuaane bzaa me, grëtaa ncuaane run me, gase rlu ganle cho nac me. ¡Gase rlu ne nli me nac Dios, ni gdzind dze ne lozh xpoder me!

Gacxe waa grë zha ntseeb, ib tedlaad zho lo guielnë ne csiaab me ga; ²¹ sac gon niicle nanpaa zho me nac Dios, ni ib rond zho xtiidz me. Nëd zho gunbey zho me zigne rieguiala, niicle xquizh nand zho gdeed zho lo me. Laa ne rzac zho na rien zho pe run zho, lel pcow xquielrien zho; rzac zho na lëew ga, gun zho ncuaane guiaabtaa guic zho. ²² Niicle ne rzac zho zharien zharac nac zho, per zha nac miech ne quialoozhraa lo xquieln xen; ²³ sac gon laa ne gunbey zho guielndzon ne rap men ne nacpaa Dios nguiamban, lel rsilo zho rzaa zho grë mdio ne niaa zigne rlu samiech guidzliu zho, grë mdio ne niaa zigne rlu grë ma ne rsiibe, grë ma ne rzë tap ni, grë ma ne rzëlen lo liu; lel grë ncuaan co ziegan zho laa ne gleynie zho men ne nacpaa Dios.

²⁴ Mincoxe nagon waa, rsaanladz Dios zho laa zho zienal grë ncuaane ndzinlid ne rzoobladztaa zho. Grë ncuaane nto-ladzdox ne run zho, lëëque zha runnguzee zho rguinie zho xcuerp zho. ²⁵ Sac laa ne gleynie zho diidzli mine rnabey Dios, lel mine rnee zha ne rquidie rleynie zho; lel grë ncuaane bzaale Dios, ncuaane psanle me, ncuaan co ziegan zho, lo grë ncuaan co ziequitsgzhib zho; laa ne yquitsgzhib zho, gleynie zho men ne nac Dios mban, men ndzon ne psan grëtaa ncuaane no. ¡Diosse rieguial gunnon miech, men co rieguial tibaque goolnie zho! Sca rieguiala.

²⁶ Ne sca nagon nac zho, gane psaan Dios zho laa zho run grë guielyozh, ncuaane ngubeeguieito ne rieguialdraa gun miech. Grë wnaa laa ne gdeed zho diidz gnee tsieel zho lo zho, lel lëëque sawnaa zho rquiangob zho, laa zho zienal grëraa guielyozh; ²⁷ grëgaa mgui, laa ne gnee zho lo wnaa ne nac tsieel zho zigne biaan no gaca, lel lëëque sabgui zho rzoobladz zho. Ncuaane mbixladz run zho, rquiangob zho lëëque sabgui zho; ni ne sca run zho grë ncuaan co, lëë mine rdziniaa zho nac grë guielguidz yozh ne riaan lad zho; ndzinlidraa rac zho.

²⁸ Scataale nac zho, ni bii rzoliaadz zho gbig zho lo Dios, gane niicle megaa rlozh rsaanladz me zho, laa zho biaan lo grë zhgab yozh ne no guic zho, no zdoo zho, min co ne scataa nac zho. ²⁹ Nroobdoo nac xtol zho, sac:

rsacsixuu zho samiech zho, rzoobladz zho ncuaane quianied zho, ractseeb zho lo samiech zho, në rac zdoo zho ran zho stib noded samiech zho, rut zho samiech zho, rtsidil zho samiech zho, rquidie zho samiech zho, rquidiidzguizh zho samiech zho, miech yozh nac zho, ³⁰ rneenë zho samiech zho, rquiabro zho lo samiech zho, racniats zho lo samiech zho, rlu zho ncuaane rapd zho, ncuaane nacd zho;

rlëënie zho Dios, rio zho rbeebey zho grë guielntseeb, rond zho xtiidz pxoz zho, rond zho xtiidz xniaa zho, ³¹ racladzd zho gon zho diidz, rund zho mine rnee zho, rleynied zho samiech zho, rund zho samiech zho perdon, rquiad zdoo zho samiech zho.

³² Niicle ne nanpaa zho zha rnabey Dios none gban miech, niicle ne nanpaa zho grëse zha ne run guielntseeb, ib tedsod znitlo zho; ni laa zho bii quiaayuna, ni haxta rley zho ran zho cho grëraa zha ne run grë mine run zho.

2

Xquielwxtis Dios

¹ Ib tedsod no to gnë: “¡Zha ntseebtaa miech ne sca run!” ¡Per gni naa lo to ganle, zigtaa zhaw, zigtaa tow, lalga ntseeb to grë to! Sac ye to gon run grë guielntseeb co, gacxe waa, zha ne rzac rieguial zha co ygaa zho guielnë ne csiaab Dios, ye zho rieguial min co. ² Ndion ne ganle Diossi zeene laa me gun guielwxtis, grëse zha ne sca zienal guielntseeb, ib tedsod zunquizh me zhow.

³ Zha ne sca rlozhd gzee zdoo pe quiaayun stib zho, haxta rlisqui zho mine quiaayun zha co, ni yeque zho quiaayuna; masaque nan zho nagon zdedlaa zho zeene laa Dios guiaadgun xquielwxtis me, masaque nan zho zha cose nitlo, laa zho tedlaa. ⁴ None guien zho ganle pa lotaa nquialadz Dios zho, pa lotaa noyap me zho paciens noxecw me grëtaa ncuaane run zho; sac laa

me quiambëz csaan zho xquielntseeb zho, yguudz zdoo zho gban zho zigne rnabey me. ⁵ Telne tibaque squi ndip gac zdoo zho, gond zho mine rnabey me; gacnan zho ganle, quiayunloraa zho grë guielndëdox ne ygaa zho gal dze ne laa me gun guielwxtis. Ni xquielwxtissi me, zigne riegual gaca sca gun mew.

⁶ Gal dze co, laa me gdeed mine riegual ygaa tib tib miech tel zha wban zho. ⁷ Grëse zha ne güeynal beennon zho lë me, pxobnen zho xquielndzon me, güeynal d zho grë ncuane rnitlo, lo zha co gdeed me tib guielmban ne gdziñd dze lozh. ⁸ Sangue grë zha ne güeynal loxaque grë zhixco zho, güeynal zho grë guielntseeb, laa ne nienal zho mine nac diidzli; zha co ygaa grëse zhian ne csiaab me.

⁹ Ga nagon, grëse zha ne run guielntseeb, zigtaa zha Israela, zigtagaa zha stib guiedza, ible zgaa zho tib guielndëdox; ¹⁰ sangue grë zha ne rban zaacse, zigtaa zha Israela, zigtagaa zha stib guiedza, ible zgaa zho lo xquielndzon me, zunnon me zho. Ni led yedraa ga pe zhgab ctseb zho.

¹¹⁻¹⁵ Grëse zha ne guntal xtol, tel chotaa nac zho zunquizh Dios zhow; sac tel me, led yed me cue. Zig nac grë zha ne beenbeyd xley me, zunquizh me zho grë xtol zho; sac niicle ne gocnandpaa zho zha naca, per len zdoo zho, guic zho, nanpaa zho pa min nac guielntseeb, pa mingaa nac guielwen. Rreequiacxe waa runbeyle zho xley Dios ga. Scaquegaa zha Israela, ne nac zho zha ne runbeypaa xley Dios, zunquizhaque me zho grë xtol zho; sac niicle ne runbeypaa zho xley me, per tel lozh ga mband zhow. Nanpaa zho pa min wen, ni tel lozh ga rond zho diidz gun zhow; sac gon, led-xe por ne gacnandse ne ley waa laa Dios ycaaniale ne, sinque none gban new.

¹⁶ Zdziñ tib dze, zeene laa Dios cxeel Jesús, gunquizh me miech grëse dol ne been zho tib tib zho, niicle mine mazdraa rzac zho ngeets zhlian been zho; sac sca rnabey Dios gaca, ni min co noseed naa miech.

Zha Israel ni xley Moisés

¹⁷ To ne nac to zha Israel, rzac to zienalpaa to xley Moisés, niats rac to, rzac to tose non lo Dios. ¹⁸ Nanwen to zha

racladz Dios gban to, nanpaa to pa min wen sac pseed to xley me. ¹⁹ Min co masaque rzac to to cseed zha ne no lo ncow, grë zha ngoopdol. ²⁰ Masaque rzac to to rienraa zha cseed to grë zha ne peet gacd, to rienraa zha quixbiini to grë zha ne peet riend; sac rzac to ne nan to ley, tose nac zha ne ndziibraa nixbiini, tose nan mine nacpaa diidzli.

²¹ Nana, tel scataa rien to zha cseed to stib miech, ¿pe nac dzigo rwide to mine run to?

Conque to name rnee lo miech cuand zho, ni rlozh ga toque quiaban. ²² Rseed to miech rnee to, tib zha ne nole tsieel, nodne yquiangob zho stib zha ne led tsieeld zho; ni rlozh ga toque noyun min co. Rnee to, rdziguiende to grë mdio, ni rio to rieban to yadoo ne zob grë mdio co.

²³ Rlozhd gacniats to rzac to quiayunnon to lë Dios ne nan to ley, ni nande to gon, lel quiaguitnie to lë me ga, sac mbande to zigne nac ley. ²⁴ Mine noyunpaa to i ga gon raquiet lo Xtiidz Dios, zaatne rnee: “Por xtol to, grë zha zit laa zho rneenë Dios.”

²⁵ Tel to, rzac to porne nace to zha Israel non to lo Dios, per ne squi mbande to zigne nac xley me, nacaque to zigne nac grë zha zit ne runbeyda. ²⁶ Nana, zha zit ne rioxco rban zigne nac xley me, ¿niacxe riegual d dzigo guiannziuu zho lo Dios? Saannziuu me zho gon. ²⁷ Golgacnan sca ganle, glöle zha zit co gon guiannziuu lo Dios, ledle to ne nanpaa to zha racladz Dios gban to, nanpaa to mine psan Dios diidz ygaa to, ni rbande to zigne rnabey me.

²⁸ Golgacnan sca ganle, led porne nacdse to zhin zha Israel, porne bio to xbey zho, laa to nziuu lo Dios. ²⁹ Led scada gon, sinque zha ne nli dib zdoo rioxco mine rnabey Dios, zha co nziuu lo me. Sac tel Dios, rwidaxe me waa dien cho pe bey ne no, sinque laa me rcaania zha ne nlipaa dib zdoo, dib guic, rban zigne racladz me. Grëse zha ne znu nac, nziuu zho lo Dios, niicle telne rzac to peet nond zho.

3

¹ Nana, ¿pa lugar nadien ne riaannon zha Israel lo grëraa zha stib guiedz? ¿Pa rquiin ne scataa rio zho bey? Zootle lëe

lalaquew tel niaca mine niacd zho zha Israel. ² Per led scada, no pe nacne non zho. Sac gon, ible lo zho psan Dios xtiidz me mazd padzeela.

³ Nli ndal zho rond xtiidz me, per led mincod ctsëë me xtiidz me, mine bneele me lo zho. ⁴ Niicxe tel zharaa quiayunctal miech xtol zho, sangue Dios ctsëëd me xtiidz me. Zigne zhobneeque lo Xtiidz me, zaatne rnee: “Mine rnee Dios, diidzli naca; niicle zha ne gacladz, guiend pe ncuane glisqui zho lo me.”

⁵ Sca nac Dios, gacxe waa rnee me grëse zha ne runctal xtol, rieguial yгаа zho guielnë ne cxeel me. Ga nagon, rlu ne mine nac diidzli, min co run me. Nana, ¿pe ziaab ne nonguield mine run me ga? ⁶ Mine nonguiel ga gon run me, sac tel gdziguien me grë zha ne runctal xtol, ¿zha naczhe guielwxtis ne dzigo gun me?

⁷ Nana, nogaa zho gnë, ¿per pe nacne glisqui Dios dol ne rdziuun ne, ni tel por lëew rlu ne diidzli nac mine run me? ⁸ Per telne sca naca, rrieequia dzigo ib none gunctal ne xtol ne parne yquiaraa zdoo me ne. Ni nzian zha ne nobee xquielto naa, rnee zho ib min co noseed naa miech. Ni zha ne sca rnee, ib tedlaad zho lo guielnëdox ne rieguial zho.

Grëse miech, ngoopdol nac zho

⁹ Nana, ¿pe zdzieets ne dzigo ne nac ne zha Israel, nziuuraa ne lo grëraa miech stib guiedz? ¿Led scada gon! Niina blozh bzeet naa lo to, grëse ne ngoopdol nac ne, zigtaa zha Israela, zigtagaa zha stib guiedza. ¹⁰ Zigne zhobneeque lo Xtiidz Dios, zaatne rnee:

¿Guiend miech ne zienalpaa mine racladz Dios!

¿Ni tib zho guiend!

¹¹ Guiend zha ne niini guic;

guiend zha ne tsoxco yguib xnëz Dios.

¹² Grëse zho laa zho zie nëz ne nitlo zho; niapse guielntseeb zienal zho.

¿Guiend zha ne zienal mine racladz Dios!

¿Ni tib zho guiend!

¹³ Ro zhow,

masaque been cuent naca zig nac len grë baa ne noyodz ngutoo;

niapse diidz ne rquidie zho zhoob lo ludz zho.

Grë diidz ne rnee zho,

masaque naca zig nac xvenen grë meel dox;

¹⁴ niapse grë diidz dox, niapse grë diidznë rrieche ro zho.

¹⁵ Ni zhow,

masaque zombëzlew dien pa tsiegut zho samiech zho;

¹⁶ loxaque guielnë, loxaque guielzi rсан zho zaatne rded zho.

¹⁷ Ib nan d zho ne zaacse gbannie zho samiech zho;

¹⁸ per ni Dios rdziebdraa zho.

¹⁹ Gacxe waa nroob nac guielnëdox ne yгаа grë zha ne runbey ley ni mband zho zigne naca, lel run zho grëtaa guielntseeb zig nac grë mine goquiet nu. Ni niicle grëraa miech ne runbeyd ley, scaque ngoopdol nac zho, ni ro zho guiend pe guiab zho lo Dios. ²⁰ Golgan sca ganle, grielod guiaanmbe ne lo Dios, niicle paraa yquia ne gun ne mine rnee ley; sinque par guiend ne ganle ne ngoopdol nac ne, gane biaan ley.

Silaa Dios miech zeene gnalo zho me

²¹ Sangue niina, tib ladle biaan ley, laa Dios bneedz stib mod ne guiaanwen ne lo me. Ni lo grëque guits ne ziaad ley, lo grë guits ne pquiaa zha ne biadteed Xtiidz Dios padzeela, ga raquieta. ²² Grëse miech tel chotaa nac zho, tel petaa been zho, ib ziaanwen zho lo Dios totsaque dib zdoo zho gnalo zho Jesús, dib zdoo zho gliladz zho me. Zha ne gliladztaa me, sac led yed Dios rbe.

²³ Zigne rne naa ga, grëse ne miech ngoopdol nac ne lo Dios, ni palal rdzieeld gdziñ ne lo xquielndzon me. ²⁴ Per niina laa me blu ganle pa lotaa noxco me ne, gola zdoo me pxeel me Jesús bdiizh grëse xtol ne, laa ne biaanwen lo me. ²⁵ Laa me been min co parne glu run me guielwxtis, sac niicle bdizhd ne xtol ne, per pxeel me tib men ne bzhee xchen bdiizha xcuent ne, lëe men co nac Jesús; gane niina grëse zha ne gnalo men co, zun me zho perdon grëtaa dol ne pxecw me been zho. ²⁶ Ni tib dol rapd me, ni scaque grë zha ne dib zdoo gnalo Jesús, sanmbe me zho lo xtol zho.

²⁷ Sca nagon psilaa Dios ne lo dol. ¿Cho nadien gacniats ga? Ni tib choot gacd gacniats, sac led por mine bdziuund

new, sinque por grëtaa minë bded Jesús. ²⁸ Gocndion ne sca ganle: Niapse por dib zdoo miech gliladz zho Jesús, laa Dios ycaania zho; nacda por tso zho gun zho minë rnabey ley.

²⁹ Nana, ¿pe zha Israelse sca ycaania me? ¡Lëda gon! Grëse miech, sca ycaania me zho. ³⁰ Sac gon tibeyse ran Dios ne grëse ne; zigtaa zha Israela, zigtagaa zha stib guiedza, sanmbe me ne lo grë xtol ne, totsaque dib zdoo ne gnalo ne Jesús.

³¹ Nana, ne znu rcaania Dios ne, no zho sac rquiindraa ley. ¿Zha yquiind-zhew? Niinale ne znu dib zdoo ne rliladz ne Jesús, rienraa ne pa rquiina.

4

Dib zdoo Abraham bnalo me Dios

¹ Zig nac pxozgoldoo ne Abraham, ¿pe been me ne laa Dios pcaania me? ² ¿Pe por guielwen ne been mew? ¡Lëda! Telne scaw, nrieelo niacniats me (niicle ne nëz lo Dios ni palal rieguald niacniats me). ³ Sac gon rnee lo Xtiidz Dios, ne dib zdoo me bliladz me Dios gane pcaania Dios me zig tib zha ne peet xtold.

⁴ Zig nac tib zha ne run dziin, dimi ne razh zho ible riegual zhow, rate zhow ga. ⁵ Sangue Dios zdoo me ral rcaania me miech, zha ne dib zdoo rnalo me, nacda por pe guielwen ne gun zho par guiab ne laa zho rieguala. ⁶ Ye rey David bzeet guielbley ro ne rgaa zha ne sca rcaania Dios, ⁷ rëb David:

¡Wen zie zha ne run Dios perdon!
Niicle nroob guielntseeb ne been zho;
tel pe nactaa xtol zho, glisquidraa mew.

⁸ ¡Wen zie zho sac gunquizhdraa me zho grë xtol zho!

⁹ Nana, ¿pe loxaque grë zha ne nose bey zrieelo ygaa guielbley co, te ye grë zha ne nod ye? Nacda por bey, laa ne blozh bzeet ganle niapse ne dib zdoo Abraham bnalo me Dios, min co ne pcaania Dios me zig tib zha ne peet xtold; ¹⁰ sac gon gard pe bey ne tso me zeene pcaania Dios me. ¹¹ Pcaaniale Dios me dzigora bio me bey. Lega laa me biose bey co, zeena glu ne laa Dios pcaaniale me porne dib zdoo me bnalo me Dios. Mincoxe waa, Abraham nac dad lo grëse zha ne nod bey, ni dib zdoo zho rnalo

zho Dios; ni scagaa Dios, rcaania me zho zig tib zha ne peet xtold. ¹² Ni meque nac dad lo grë zha ne no bey ni dib zdoo zho rnalo zho Dios, zigne bnalo me Dios zeene gard tso me bey co.

Zha goc minë bnee Dios lo Abraham

¹³ Psanle Dios diidz lo Abraham ne me guiaannie guidzliu, grë me zha ne grieequiaraa lo xtii me; guiabd ne togo porne been me minë nac xley zha Israela, sinque ne dib zdoo me bnalo me Diosa. ¹⁴ Nana, tel niaca zha ne gunse minë nac ley, zha cose ygaa min co, rrieequia dzigo zhlëse ga bnalo Abraham Dios, niicle diidz ne psan Dios lo me ga, nondaquew. ¹⁵ Sac nac ley gon, zha ne gunda zigne naca, laa Dios csiaabzi zho; laa zaatne guindgaa ley, gacd guiab zho cho noguiitsa.

¹⁶ Ne scacxe waa nac ley, gane niina lëese minë no gun ne nac dib zdoo ne gnalo ne Dios par ygaa ne minë psanle me diidz ga. Grëse ne ygaa min co, per nacdraaw dien cho zienal ley, cho zienaldgaaw, sac minë nonraa, dib zdoo ne gnalo ne Dios zigne bnalo Abraham me. Mincoxe waa, rrieequia Abraham nac pxoz ne grëse ne, ¹⁷ zigne rëb Dios lo Abraham: “Laa naa bzo luu, luu gac dad lo nzian dii miech.” ¡Lëe Dios co nagon bliladz Abraham, me rbeeban grë mengut, ni niicle haxta grë ncuaane guind, saa mew!

¹⁸ Ndaldox rëb Dios gac lo xtii Abraham, ni bliladz Abraham minë rëb Dios ga. Niicle ne zootle led ncuaane gacda, per me dib zdoo me bliladz me ne zaca, ni scagaa bdiin dze ne laaw goc. ¹⁹ Tibaque bnalo me Dios, niicle ne lala ziele xtse me (zig tib gayoole iz me), ni lala tsieel me Sar, nacd me wnaa ne gap mëed. ²⁰ Ib goc chopd guic me niab me bod nlid niac minë bnee Dios ga, sinque dzigole dib zdooraa me bnalo me Dios; haxta rdeed me xquizh lo Dios, ²¹ sac nanpaa me men nroob nac Dios zun me minë psan me diidz ga. ²² Ne sca nagon dib zdoo me rnalo me Dios, gane pcaania Dios me zig tib zha ne peet xtold.

²³ Zhobnee lo Xtiidz Dios sca pcaania me Abraham, ni laaw zhobnee zeena gacndion ne ²⁴ ye ne scaania me ne zig tib zha ne peet xtold, totsaque dib zdoo ne gnalo ne

Jesús, men̄ ndzon ne rnabey ne; ²⁵ men̄ ne gut ga bdiizh me xtol̄ ne, men̄ ne brieeban ga, par glu me nli psan̄mbe me ne n̄z lo Dios.

5

Jesús rsan̄mbe miech lo dol̄

¹ Nasi laa ne nacle zig zha ne peet xtold̄, laa ne biaan̄wenle lo Dios porne dib zdo ne rnalo ne Jesús, men̄ ndzon ne rnabey ne. ² Sac por gr̄etaa min̄e bded Jesús, laa ne bgaa guiel̄nzaac rii nacie me ne, ni ib csaand ne me. Tib guiel̄bley nrooba lo ne, sac ndion̄paa ne ib zgaa ne lo guiel̄ndzon ne no me.

³ Ni scaquegaa nagon̄ none gley ne zeene pe guiel̄n̄e ne nodzian̄ ne; sac ndion̄ ne gan̄le, ga cseed ne l̄eb ne dziits so ne lo min̄e rliladz ne. ⁴ Ni zeene sca dziits so ne, zlliladzraa ne dib zdo ne; ni zeene dib zdo ne rliladz ne, zacnan̄paa ne ib zgaa ne min̄e rliladz ne. ⁵ Ni ndion̄paa ne zgaa new, sac blu Dios rleyne me ne, pxeel̄ me Esp̄ritu Sant nacie ne.

⁶ L̄eetaaque zeene rdzieldraa miech zha gun̄ zho par guiaan̄mbe zho lo dol̄, hor co laa Dios pxeel̄ Jesús, biaad me gut me bdiizh me xtol̄ ne nac ne miech ngoopdol̄.

⁷ Ndion̄ ne gan̄le, niicle tib miech ne peet xtold̄a, tib miech ne mazdraa wena, led lega grieequiad tib zha ne cueeladz xquiel̄mban guet por zha. ⁸ Sangue Dios gon̄, niicle ne miech ngoopdol̄ nac ne, blu me gan̄le pa lotaa nquialadz me ne, pxeel̄ me Xp̄eēd me Jesús, men̄ co bleeladz xquiel̄mban gut me xcuent ne.

⁹⁻¹⁰ Gotsaa gwi ne gan̄le, zha nactaa guiel̄n̄e ne bded Jesús psan̄mbe me ne lo xtol̄ ne, psan̄wen me ne lo Dios; ni scaque nagon̄, ible me csilaa ne lo gr̄etaa guiel̄n̄edox ne csiaab Dios ygaa gr̄e miech ntseeb. Ne nligaa, csaand me dzian̄ ne guiel̄n̄e co; sac gon̄, tel̄ scataa min̄e been̄ me por ne zeene nac ne tib miech ngoopdol̄, zeene scataa ntseeb goc ne bl̄ēnie ne Dios, ꝑe lel̄ na dzigo ne laa ne biaan̄wenle lo Dios, laa ne biaan̄le zig tib zha ne peet xtold̄?

¹¹ Gacxe waa, niina ne psan̄wen Jesús ne lo Dios, none in̄e gley ne ne laa ne ngable lo Dios.

Zha nacne biaan̄ dol̄

¹² Znu gon̄ nacne laa dol̄ biaan̄: por min̄e been̄ Adán bind me xtiidz Dios, min̄ co nac ne biaan̄a. Ni por l̄eew pquiaqui laa guiel̄gut biaan̄aque, blozh ga gr̄ese miech laa zho ret, sac gr̄ese zho, tsod zha ne gun̄ctald xtol̄. ¹³ Desde hor co biaan̄ run̄ctal miech xtol̄ zho. Gr̄ese miech ne bre lo guidzliu, desde Adán haxta len̄ dze ne laa Moisés pcaania ley, been̄ctal zho xtol̄ zho, niicle ne guiend̄paa tib ley hor co nlu ne dol̄a. ¹⁴ Gacxe waa ye zho, gr̄ese zho gut; niicle ne bdiitsd zho merpaa xtiidz Dios zigne been̄ Adán.

¹⁵ Nli tib guiel̄n̄e ga psan̄ Adán, per niina-gaa mazdraa nroob guiel̄nzaac ne rneedz Dios lo ne. Por falt ne been̄ Adán, biaan̄ gr̄ese ne ne nac ne miech laa ne no guet; per niina ne biaad stib men̄ ne been̄d ni tib falt, por min̄ co laa Dios rquia zdo ne gr̄ese ne, laa me rneedz tib guiel̄mban ndzon lo ne; l̄eē men̄ co nac Jesús. ¹⁶ Tibaque nac dol̄ co been̄ Adán, per gr̄ese miech biabzi; sangue Jesús zeene laa me biaad, gr̄ese ne ne nac ne miech psilaa me ne lo gr̄etaa xtol̄ ne, psan̄wen me ne lo Dios. ¹⁷ Dol̄ ne been̄se Adán ga, min̄ co pquiaqui gr̄ese ne ne nac ne miech, laa ne biaan̄ ladznia guiel̄gut; sangue niina ne biaad Jesús, zrieelo ygaa ne tib guiel̄mban ndzon. Guiel̄mban ne ral zdo Dios gdeed me lo gr̄ese zha ne gbig lo me gun̄ me zho perdon. ¹⁸ Sca nagon̄ naca: por falt ne been̄ Adán ga, gr̄ese ne ne nac ne miech laa ne biabzi, per zeene laa Jesús biaad, pquia zdo me ne masaque me bdiizh gr̄ese caxtigw ne riogual̄ ne ga, laa me psan̄wen ne lo Dios parne grieelo ygaa ne tib guiel̄mban ndzon. ¹⁹ Golgan̄ gan̄le, porne bdiits Adán xtiidz Dios, gr̄ese ne ne nac miech laa ne goc zha ngoopdol̄; per scagaa, por bzoob Jesús gr̄ese xtiidz Dios, zha ne gacladztaa, zrieelo guiaan̄wen zho lo me.

²⁰ Ible laa ley biaan̄, par glu gan̄le pa lotaa nac gr̄e falt ne noyun̄ miech lo Dios. Per niicle scataa nac gr̄e dol̄ co, per blu Dios gan̄le mazdraa rquia zdo me miech.

²¹ Masaque bnabey dol̄ miech, pxeela zho n̄z ne nitlo zho; sangue zeene laa Jesús biaan̄, psan̄wen me ne lo Dios, gane niina zha ne gnalotaa Jesús zgaa zho tib guiel̄mban ndzon.

6

Zha ne mbanniele Jesús

¹ Laa ne bdzianle ganle zha noxcotaa Dios ne. Nana, ¿pe zdieets ne dziuunctalraa ne xtol ne zeena tsoxcoraa me ne? ² ¡Lëdraaw ga gon! Nodraa ne dziuun ne dol, sac gon, laa ne nacle niina zig tib zha ne gutle nëz lo dol.

³ Golgan ganle, zeene laa ne bziaab xnëz Jesús ni brobnis ne, rrieequia gut ne ga zigne gut me. ⁴ Zeene brobnis ne rrieequia bioliu ne ga, zigne bioliu Jesús. Ni zigne brieegan Jesús (por poder ndzon ne rap Dios), scaque ne rrieequia brieegan ne, stible guielmban ne rdziaap ne.

⁵ Ni zigne sca rrieequia gut ne zeene gut Jesús, scaquegaa ndionpaa ne zbeeban me ne zigne brieegan me. ⁶ Ndion ne ganle, miech ne goc ne glo zeene scataa bional ne guielntseeb, rrieequia ye miech co pquianie me lo cruz. Ga bnitlo mine goc ne ga, zeena ygadoodraa ne lo dol; ⁷ sac gon, deque bnitlo grë mine goc ne glo, grieelodraa gnabey dol ne.

⁸ Nana, telne scale gutnie ne Jesús, ndionpaa ne ib zbannie ne me.

⁹ Ndion ne ganle brieegan Jesús, ni gdziindraa dze guet me. Grieelodraa pe gun guielgut me.

¹⁰ Tibaque vuelt gut me bdiizh me xtol grëse miech, sangue niina mban me ni Dios mbannie me. ¹¹ Scagaa to nasca, golguien ganle laa to gutle lo dol, nodraa gnabey dol to stib, sinque laa to mbanle niina par gun to mine rnabey Dios. Golguien ganle, Jesúsle nacie to.

¹² Nana sca, gdeetraa to diidz gnabey dol xcuerp ben to i, tso to gun to grë ncuane ndzinlid ne racladz xcuerp to. ¹³ Ib gdeete to diidz guiab to lo dol stib, gun to grë guielntseeb; sinque golsan to ladznia Dios, ine golgun grë mine racladz me. Golguien ganle, laa to gutle lo grë dol, Diosle mbanne to niina; ¹⁴ zeena scagaa gnabeydraa dol lo to, zigne beena to zeene scataa bioxco to mine rnabey ley. Sac gon rnabeydraa ley to niina, laa Dios blule ganle pa lotaa nquialadz me to biaadsilaa me to.

Nli nquialadz Dios ne, rnabeydraa ley ne. ¹⁵ Per nana, ¿pe ne rnabeydraa ley ne,

pe ne nquialadz Dios ne dzieets ne dziuun ne grëtaa ncuane gunctal xtol ne? ¡Lëda ga gon! ¹⁶ Nanle to ganle, tib zha ne nanle cho lo yquia zho dziin, lo zha co ngadoo zho ni mine rnee zha co none gun zho. Zig nac zha ne ngadoo lo dol, niapse dol run zho ni mine tsieguial zho laa zho nitlo; sangue zha ne run mine rnabey Dios, scaania Dios zho zig tib zha ne peet xtold. ¹⁷ Nli glo lo dol ngadoo to, per xquizh Dios zeene laa zho biadseed to Xtiidz me gocnan to zha laa to lo dol, laa to bliladza ni noxco to mban tow niina. ¹⁸ Ni zeene laa to brieeladznia dol, laa to bgab lo Dios; zeena mine rnabeyle me mincole gun to. ¹⁹ Znu bzet naa grë min rii lo to, zeena guien to zha naca.

Nana sca, zigne scataa bio to ladznia dol been to grëtaa guielyozh, grëtaa guielntseeb, scagaa niina golsan to ladznia Dios, golban zigne rnabey me, zeena lozh guiaanmbe to zigne racladz me. ²⁰ Zeene scataa ngadoo to lo dol, ib wbande to zigne rnabey me.

²¹ ¿Pe nadien needz dol lo to? Lëe gdib mine ngaa to laa to nitlo. Zig nac niina, haxta rtoladz to zeene rsoladz to grë ncuane been to hor co. ²² Sangue niina, ne laa to brieeladznia dol laa to ngab lo Dios, ible ziaanmbe to zigne racladz me ni zгаа to tib guielmban ne gdziind dze lozh.

²³ Sac gon, zha ne runctal xtol, lëe gdib mine tsieguial zho laa zho nitlo; sangue zha ne gbig lo Jesús, mine ral zdoo Dios ygad me lo zho nac tib guielmban ne gdziindraa dze lozh.

7

¹ Bets, bzian, to ne nac to zha ne runbey Xley Dios, nanwen to ganle, zeene zombanse miech dzigo rrieelo rnabey ley co zho.

² Zig nac tib mgui ne rtsieelnia, rnabey ley ne mguise gbannie wnaa ne nac tsiel mgui. Per tel gzoob ne glo mgui guet, dzigo gacdraa gnabey ley ne mguipaa gbannie wnaa co; telne gacladz zho ctsieelnia zho stib mgui, zaca. ³ Nli nonguiel da ga gun wnaa ctsieelnia zho stib mgui laga bii zomban tsiel zho; laa zeene gutle tsiel zho, led doldraaw yguib zho stib zha ne ctsieelnia zho.

⁴ Bets, bzian, scadaa nagon bzhaac to. Zeene sca gut Jesús, rrieequia ye to gut ga gane niina ngadoodraa to lo ley, niicle lëëgaaw grieelod gnabeya to. Jesús, men ne brieeban ga, mele nac tsieel cub to niina. Niinasi, zrieelole gban to zigne racladz Dios; ⁵ sac glo (zeene scataa bdziuunctal ne xtol ne, bdziuun ne grëtaa ncuaane nonguieldraa niicle ne ndionpaa ne pe nac mine zhobnee lo ley no dziuun ne), niapse grë ncuaane nxeel ne zaatne nitlo ne, ncuaan co bdziuun ne. ⁶ Blactaa bgadoo ne lo ley, sangue niina rrieequia gutle ne nëz lo ley, laa ne mbanle zigne rnabey Espiritu Sant.

Rca dol gac mine rnabey ley

⁷ Nana, ¿pe zdieets ne dzigo por leypaa rdziuunctal ne xtol ne? ¡Coo, led scada! Tel naa gon, ib niacnand naa pe nac dol telne guiend ley. Niacnand naa ne dol ga gzoobladz ne chen ben, telne niacnand naa ne rnee lo ley: “Gzoobladz luu chen ben.”

⁸ Zeene gocnan naa zha nac ley, dzigoraa bien naa niapse dol nac mine noyun naa; sac zeene guiend ley, rlud pe nac dol.

⁹ Glo zeene riend naa zhapaa nac ley, tibaque rzaac naa ib peet dol rapd naa; per zeene gocnan naa zha nac ley, bien naa ne ib raguial naa nitlo naa, sac dol quiayun naa. ¹⁰ Nli laa ley biaan zeena guiend ne zha grieelo ygaa ne guielmban, per lel bluw ne raguial naa nitlo naa sac ngoopdol nac naa.

¹¹ Ne nligaa bdziitnie dol naa, mine rsopaa ley diidz nod gun miech mincopaa ben naa; ni blozh ga, lëëque ley blu ne ib raguial naa nitlo naa. ¹² Niicle ne scaw, per Dios psana ni rquiin grë mine zhobnee low.

¹³ Nana dzieets ne: conque telne wen nac ley, ¿zha nac dzigo ne lëëpaaw rlu ne rioguial ne guet ne? ¡Coo, led scada! Sinque znu naca: dol pteedquie ne lадznia guielgut. Ga rlu ganle zha nactaa dol, sac gon lëëque ley pquiin dol pteedquiew ne lo guielgut. Ga blu ley ganle zha ntseebtaa nac dol. ¹⁴ Gotsaa gwi ne ganle wen ley, led leyd rxin sinque ne rxin; sacne rrieequia ngadoo xcuerp ne lo dol.

¹⁵ Tel naa, riend naa pe nacne znu rac naa, niicle ne racladzpaa naa gun naa ncuaane nonguiel per nëda, lel ncuaane

rzoobladz naa min co run naa. ¹⁶ Grë ncuaane run naa, now rienpaa naa nonguiel; haxta guic naa, zdoo naa, rien naa wen ley sinque naa quiaguits mine rnabeya. ¹⁷ Nana, niicle ne rien naa scaw per gacd pe gun naa, sac ngadoo xcuerp naa lo dol, masaque dol rcheep naa run naa ncuaane ndzinlid. ¹⁸ Rien naa miech ngoopdol nac naa, ni palal ncuaane ndzinli gacd gun naa; niicle ne racladz naa gacwen naa, per rrieeloda. ¹⁹ Zeene racladz naa gun naa ncuaane rquiin, per rrieelod gun naaw; laa zeene ni naa gundraa naa ncuaane ndzinlid, lel mincole run naa. ²⁰ Ni ne znu lel grë ncuaane racladz naa, min co run naa, gase rlu ne led naadse quiayun grë ncuaan co; sinque dol quianabey xcuerp naa run naaw. ²¹ Rien naa niicle ne racladzpaa naa gun naa ncuaane wen, per lel guielntseeb run naa. ²² Zdoo naa, guic naa, rleynie naa Xley Dios, racladz naa gban naa zigne rnabey me; ²³ per dzigo rtse dol lo naa, rrieelod gun naa ncuaane nonguiel. Masaque dol rnabey xcuerp naa, racladzda gun naa ncuaane rnabey Dios; sac ngadoo xcuerp naa lo dol.

²⁴ ¡Probsaxe naa, znutaa nac xcuerp ngoopdol naa nu! ¿Cho samiech ne dien grieelo csilaa naa low; sac ncuaane gnitlo naa min co mazdraa rdziladza?

²⁵ ¡Xquizh Dios pxeel me Jesús bиаadsilaa me ne lo dol!

¡Jesús nac men ne psilaa naa!

(Znu nagon rzac naa: rien naa nonguiel gun naa mine nac Xley Dios, per xcuerp naa lel laaw zienal mine rnabey dol.)

8

None gban miech zigne racladz Espiritu Sant

¹ Laa ne gocndion nasca ganle, zha ne ngab lo Jesús ndziibdoldraa zho, ² sac zha ne ngab xnëz me, laa Espiritu Sant psilaale zho lo dol, laa me psilaale zho lадznia guielgut, laa me bdeedle tib guielmban cub lo zho.

³ Wlaltaa ib brieelod ley nsilaaw ne lo dol, gane mazd laa Dios pxeel Xpëed me bиаadsilaa ne. Brieelod ley, sac grëse miech laa ne tsienal zho mine rnabey ley, mazdraa zienal zho ncuaane runctal xtol zho.

Gane zeene pxeel Dios Xpëed me, goc me miech (lëëraasi ni tib dol beend me), men co gut bdiizh grëse xtol ne, dzigo ga laa me psilaa ne ladznia dol.

⁴ Gacxe waa, niinasi zrieelo dziuun ne grë mine rnabey ley, per none gdeed ne diidz guional ne mine rnabey Espiritu Sant, ni lalnu gdeete ne diidz gac mine racladz xcuerp ne nu.

⁵ Grëse zha ne mban zigne racladz xcuerp ngoopdol zho, loxaque grë min co rioxco zho; laa zha ne mban zigne racladz Espiritu Sant, mine rnabey Espiritu Sant rioxco zho.

⁶ Zha ne sca rioxco loxaque mine racladz xcuerp ngoopdol zho, nëz ne nitlo zho ga zie zho; sangue zha ne rioxco mine racladz Espiritu Sant, laa zho zie nëz ne ygaa zho tib guielmban; peet dzeb, peet zhgab ctsebdraa zho. ⁷ Ni stiba, zha ne rioxco loxaque mine racladz xcuerp ngoopdol zho, rlëënie zho Dios ga, sac nëd zho gban zho zigne rnabey xley me; ni niicle gacladzga zho, grieelod zho. ⁸ Min cocxe waa, ib rzacd zdoo Dios grë ncuaane run zho.

⁹ Sangue to, mbandraa to zigne racladz xcuerp to, sinque laa to mban zigne racladz Espiritu Sant. Sca mban to, sac Espiritu Sant nacie to. Nanle to ganle zha ne nacie Espiritu Sant, nlid xnëz Jesús no zho. ¹⁰ Ni to ne nac to zha ne nole xnëz Jesús, ible zgaa to tib guielmban ndzon, sac laa Dios psilaale to lo dol. Nli zig nac xcuerp to, ncuaane nitlo naca, sac por dol biaan sca no gaca; sangue zhiespírituw, nitloda. ¹¹ Dios bleeban Jesús, ni scagaa telne nli nacie to zhiEspiritu me, meque cueeban to.

¹² Bets, bzian, nodne dziuun ne ncuaane racladz xcuerp ngoopdol ne, zig nac zeene pe nzëeb ne low. ¹³ Sac telne grë ncuaan co tsienal to, ible znitlo to; sangue telne gnab to gacniën Espiritu Sant to csaan tow, dzigo ible zgaa to tib guielmban. ¹⁴ Sac grëse zha ne zienal zigne racladz zhiEspiritu Dios, ga rlu ne nlipaa xpëed Dios nac zho.

¹⁵ Golguien ganle, laa Dios bneedz zhiEspiritu me lo to, sac xpëedle me nac to niina. Tsode to sca gdziebd to me, zig nac zeene cho tib ngundziin win nac to lo me. Xpëed me nac ne, gacxe waa zac tibliladz

gnee ne lo me guiab ne: “¡Papá yeen!” ¹⁶ Ni Espiritu coque runquien ne ne nli xpëed me nac ne.

¹⁷ Nana ne laa ne nacle xpëed Dios, scagaa dzigo ye ne ible zgaa ne grëtaa ncuaane bdeed me lo Jesús.

Nli zgaa ne lo grë guielndzon ne no Jesús ga, per scagaa none dzian ne grë guielnë niina ne laa ne ngab lo me.

Guielndzon ne naraa guiaad

¹⁸ Guielnë ne dzian ne lo guidzliu rii, loxaque ne ngab ne lo Jesús, led ncuaane rnad ga; mazdraa nroobdoo nac lo guielndzon ne naraa dzian ne. ¹⁹ Zig nac grëtaa ncuaane bzaa Dios, masaque quiambëznëw gdzin dze zeene laa grë zha ne nac xpëed Dios ygaa lo guielndzon co; ²⁰⁻²¹ sac gon, gal dze co laa guidzliu guiaanmbe lo grëtaa ncuaan paat rquiind, lo grëtaa guielntseeb ne no low niina. Dios bdeed diidz biaan grë ncuaan co low, per zeene gal dze co, zeene laa grë zha ne nac xpëed Dios laa lo grëtaa guielntseeb, yew laaw laa.

²² Laga quiambëz grë ncuaan co gdzin dze co, masaque mban raca, rzaca zig rzac tib men wnaa ne quiayal xpëed. ²³ Ni ndion ne ganle, haxta ne, ne nac ne zha ne nacie Espiritu Sant (zeena glu ne ible zgaa ne grëtaa ncuaane gneedz me), mban rac ne quiambiaaz ne gdzin dze co, zeene laa Dios ctsëe xcuerp rii ne ni ycaania me ne zig xpëedpaa me.

²⁴ Ndion ne ible zbee Dios ne lo grëtaa ncuaane rac lo guidzliu rii, per nana laa ne quiambiaaz dzianpaa ne gaca. Tib ncuaane lëë ranle ne noyac, nod pe nacie yquiambëzraa new, ²⁵ per zeene quiambëz ne tib ncuaane naraa gac, dzigo nodne guieed ne, sinque ine tiblifique gac ne yquiambëz new.

²⁶ Ni scagaa zeene lëbdraa ne, riëndraa ne zha gun ne, Espiritu Sant nac men ne gacniën ne. Zig nac zeene gzodiidznie ne Dios, tel nesew nanë ne zhapaa nonguiel gnee ne lo Dios, dzigo Espiritu Sant runcnee ne grë diidz ne riënd ne zha nac. ²⁷ Ni Dios ne nac me men ne nanpaa pe rza zdoo miech, rien me pe rnee Espiritu Sant, sac mine racladz Dios gac min co rnab me.

Tsod ncuaane yquiaaqui csaanladz Jesús ne

²⁸ Ndion ne ganle, zha ne nli dib zdoo rleynie Dios, zha ne rioxco gac grë mine racladz me, grëse ncuaane rded zho, led lega rdete zhow, sinque no zaatne rquiina lo zho. ²⁹ Ni ndion ne ganle, zha ne nanle me ygab xnëz me, desde mazd glow, pso me zho gac zho zig nac Xpëed me Jesús. Lo grë zha ne nac xpëed me, Jesús nac men nroob. ³⁰ Ni grë zha co, laa me quiabedz zho, quiasilaa me zho lo dol, laa zho noy-aanwen lo me; zeena ygaa zho lo guielndzon ne no me.

³¹ ¡Zha nactaa ncuaane lëe run Dios! Nana, tel scataa racnie Dios ne, ¿cho nadien grieelo lega pe gun ne? ³² Golgotsaa gwi ne ganle, haxta xpëed me bdeed me gut xcuent ne, grëse ne ne nac ne miech. Nana, ¿pe lel grë pe stib cos dzigo yquia zdoo me gneedz me lo ne?

³³ Ible Dios bzooblo ne, gacxe waa, ¡choot rieguald glisqui gnë lëda nodziun ne! Sac gon, Dioszhal psanmbe ne lo dol. ³⁴ ¡Choot rieguald ycaadz dol ne! Sac gon laa Jesús gutle bdiizh me xtol ne; per brieeban me, ni na laa me zob cue Dios zaatne riegual me nac me men non. Ga no me quianab me lo Dios por ne. ³⁵ ¡Tibaque rleynie Jesús ne! Zeene nodzian ne guielnë, zeene mban rac ne, zeene rtsidil miech ne, ib guiabd ne togo bod rleynied me ne. Niicle zeene guielngaa pe gow ne, guielnd pe gacwxab ne, o noxtseebgaa ne guet ne, ib guiabd ne togo psaanladz me ne. ¡Tibaque rleynie me ne! ³⁶ Ni zig nac xcuent guielgut, laaw raquietaque lo Xtiidz Dios, zaatne rnee: Grëse no ne nac no zha ne ngab lo luu, tibaque noxtseeb no lo guielgut; masaque rzac miech no zig rzac zho grë mëcwxiiil ne golle guet.

³⁷ Niicxe peraa waa dieed ne, zdziun ne gan low ni palal csañwinda ne, sac Jesús nacie ne; ni rleyniedox Jesús ne.

³⁸ Nanween naa tsod ncuaane yquiaaqui csaanladz Dios ne:
per ni guielgut,
per ni guielmban,
per ni anjl,
per ni menox,

per ni grë ncuaane noyac niina, grëgaa ncuaane naraa gaca.

³⁹ Niicle grë ncuaane no glaa zhan gbaaw, niicle grë ncuaane no guietraa zhan guid-zliuw,

niicle grëragaa ncuaane bzaa Diosa.

¡Ni tiba ycada, sac tibaque rleynie Dios ne! Ni laaw blule me ganle, zeene pxeel me Jesús (men ne rnabey ne), men ne gut bdiizh grëse xtol ne.

9

Ible Dios bzooblo zha Israel

¹⁻³ Bets, bzian, ¡blactaa racladz naa guien grëraa zha Israel cho nac Jesús! Rquianë zdoo naa zho nac zho menladz naa, tibaque mban rac zdoo naa rsoladz naa zho. Haxta Jesús, haxta Espíritu Sant nan ganle rquiad zdoo naa naa niicle maase gdzibdee miech naa, maase nitlo naa guia naa zaatne gandraa naa Dios, telne niaca por min co laa zho guien zha gbig zho lo Dios.

⁴ Blactaa quiaayacnien Dios zho, ni rond zho xtiidz me. Bzooblo me zho gac zho zha ne ygab lo me, haxta bzënie me zho, gon zho ganle men ndzon nac me; biaan zho diidz grë zho me zha mod gunlay me zho. Psan me ley lo zho zeena guien zho zha gban zho, ni psan me diidz lo zho zha gleynie zho me. Nzian grë ncuaane bnee me gdeed me lo zho. ⁵ Lëe pxozgoldoo zho ga goc Abraham, goc Isaac, goc Jacob, ni lo dii co ga brieequia zha ne bded zig menlidz Jesús. Me nac Dios, me rnabey grëtaa ncuaane no, ni me riegual gacnon gzataa dze. Ible sca rieguala.

⁶ Nana, no zho guiab gocdaque grë mine bnee Dios ga ygaa zha Israel. Per led scada. Sinque lëe min co rgaa zha ne nlipaa rnalo Dios, sac zha co nac zha ne nlipaa nac zha Israel. ⁷ Nacda ne loxaque ziaad zho lo xtii Abraham, laa zho nacle merpaa zha Israel; sac gon, niicle ne nzian mëed pquianie Abraham, per rëb Dios loxaque Isaac gac cuent zig xpëed Abraham. ⁸ Gase naganle rlu, zig nac niina, grë zha ne ziaad lo xtii Abraham, led grëd zho ngab lo Dios; sinque zha ne bzooblöle me zigne bzooblo me Isaac, zha co ngab lo me. ⁹ Sac zig nac Isaac, ible Dios bnee lo Abraham grop Sar, ne laa Isaac gac mëed lo zho.

10-11 Ni scasaque xpëed Isaac. Bdzin dze, zeene laa Isaac ptsieelnia wnaa ne lë Rebec, dzigo gop Rebec tibnëz mëëdbgui. 12 Bii zoney Rebec grop mëdyeen co, laa Dios bzooblolle win ne brieelë Jacob rëb me, ne ible Jacob gac zha non lo Esaú, win ne glo gal. 13-15 Laaw zhobneeque lo Xtiidz Dios, zaatne znu rëb me: “Ible Jacob bzooblo naa beenlay naa, bzoblod naa Esaú.” Gard gal grop mëed co, per ni gard gacnan win zha nac guielntseeb, zha nacgaa guielwen, laa me bzooblolle tib win. Ga nagon, blu Dios ne mese nac men ne rieguial rzooblo tel cho zha ne ygab lo me, nacda por pe ncuaane noyun zho.

Nana, ¿pe zdieets ne guielntseeb ga sca run Dios? ¿Led guielntseebda! Tib vuelt rëb me lo Moisés: “Zha ne gacladz naa yquia zdoo naa, squia zdoo naa zho.” 16 Ga nagon, zha ne runlay me, nacda porne zha rquiaguiba, o rioxcogaa zho ygaa zhow; sinque laa zho rgaaw, porne me rquia zdoo zho. 17 Gotsaa gwi ne ganle zha beenndip me zdoo rey Egipt. Lo Xtiidz me zhobnee zeene rëb me lo rey co: “Ible laa naa bzo luu nac luu rey, luu yguib glu naa poder ne rap naa, zeena dib lo guidzliu guien miech ganle naa nac Dios.”

18 Ga nagon rlu, zha ne gacladz me yquia zdoo me, rquia zdoo me zho; ni scagaa, zha ne gacladz me gunndip me zdoo, runndip me zdoo zho. 19 Nana, no zho gnë: “Telne scaw, ¿pe nac dzigo rlisqui Dios mine run miech, tel mezhah r nabey zha nac zho tib tib zho?” 20 Per nana, ¿cho nac ne par glisqui ne mine run Dios? Zig nac tib guies ben, niacxe zlisquiw lo men ne bzaaw, guiaba: “¿Pe nacne znu bzaa luu naa?” 21 Led zha ne run dziin co, zrieelo gzaa zho tib guies zigne gacladzta zho; tib lë ben ne xen zho, zac gzaa zhow tib guies niow, o gzaagaa zhow tib guies beelze.

22 Scaquegaa nagon rzac Dios miech. Grë zha ne psanle me nitlo, ible rap me derech csiaabzhian me zho, glu me poder ne rap me; per laa me bii quiayap zho paciens nieeda gdzin dze co. 23-24 Grëgaa zha ne bzooblo me ygaa lo guielndzon ne no me, zigtaa new ne nac ne zha Israel, zigtagaa zha stib guiedza; ible rap me derech

bzooblo me ne, sac rquia zdoo me ne. 25 Golsoladz ganle zha bzeet Osé, men ne biadteed xtiidz Dios padzeela. Bzeet me ible zbedz Dios grë zha ne nacd zha Israel ygab zho lo me, zeena gleynie me zho niicle ne rleynied me zho glo. 26 Laa stib lugar bzeet Osé, zha bnee Dios lo zho, rëb me: “Ngabde to lo naa, per dzin dze ne laa to gac xpëed naa, ne nac naa Dios nguiamban.”

27 Laa Isá stib men ne biadteed xtiidz Dios padzeela, zeene bzeet me zha Israel rëb me: “Niicle ne ndaldoo nac zha Israel pale yuzh ne ndxie ro nisdoo, per zhis zho gac zha ne ycaania Dios; 28 sac ziaadyoble gun Dios xquielwxtis me lo guidzliu, zigne bnee me.” 29 Min co ga bzeet Isá mazd glo, rëb me: “Telne niaca mine yquiad zdoo Dios zha Israel, znitlo me zho grëse zho zigne bnitlo me zha Sodom ni zha Gomorr.”

Zha ne nacd zha Israel laa zho wbig lo Dios

30 Nana guiab ne: ¿Zha nac dzigo ne rcaania Dios zha zit? Laa me rcaania zho niina sac dib zdoo zho rnalo zho me, niicle ne waltaa ib bioxcd zho dien zha nsilaa me zho lo dol. 31 Laa zha Israel, niicle ne rioxco zho run zho grë mine r nabey ley parne csilaa me zho, per ib laad zho lo dol sca. 32 Laad zho, sac zienied guic zho gnalo zho Dios, rzac zho por grë ncuaane gunse zho laa zho laa lo dol. Mincoxe waa, zeene laa Jesús biaad, bzhaac zho me zig tib quie ne rriel ni ne riab ne liu. 33 Lëe min co ga zhobnee lo Xtiidz Dios, zaatne rnee: Sxel naa tib men lo zha Israel, me gac zig tib quie ne griel ni zho; sangue zha ne dib zdoo gnalo me, tsod dze ne tso zho guielnë, guiab zho pe nacne bnalo zho me.

10

1 Bets, bzian, ne nlipaa rzaac naa tebaa zha laa grëse zha Israel lo dol, tibaque r nab naa lo Dios guien zho gbig zho lo me, zeena laa zho lo grë xtol zho.

2 Parga nli ran naa noxco zho gbig zho lo me; per rund zho mine no gun zho. 3 Ib riend zho zdoo Dios ral rsilaa me miech lo dol, laa zho rzac por mine gun zho laa me csilaa zho. Ib nëd zho gun zho mine racladz Dios. 4 Sac gon, laa Dios racladz Jesús gnalo

zho zeena guiaanmbe zho lo grëse xtol zho; sac Jesússe nac men ne brieelo been grëse mine rnabey ley.

⁵ Bzeet Moisés rëb me, zha ne gnalo ley ne lëew csilaa zho, none gun zho grëse mine rnabeya; ⁶ sanque zha ne gnalo Jesús ne me csilaa zho, nacda dien peraa gun zho. Nacda ncuaane tso zho guiab zho, tebaa zha tsie zho lo me gbaa, gnab zho csilaa me zho (ncuaane gacda ga, dzigo rriequia racladz zho quiet me ga stib); ⁷ o guiaab-gaa zho tsie zho zaatne noliu grë ngutoo, tsienab zho lo me csilaa me zho (ncuaane gacdaque ga, ni stiba led gad no me, laa me brieabanle). ⁸ Rquiind paraa tsieguib zho csilaa me zho, zig rzac zho zdoo zho, zig rzac zho ro zho, sca gax lo zho zo me quiambëz me csilaa me zho. Min co nac mine noseed no miech, rnee no lo zho: ⁹ Zha ne cueero guiab zho Jesús nac men ne rnabey lo xquielmban zho, ni dib zdoo zho gliladz zho nli bleeban Dios me, dzigo silaa me zho lo grë xtol zho. ¹⁰ Sac none dib zdoo ne gliladz ne, dzigo sanmbe Dios ne lo dol; ni none cueero ne pe nac mine rliladz ne, dzigo scaania me ne. ¹¹ Rnee lo Xtiidz me: “Zha ne dib zdoo gliladz Jesús, quitnied me zho.”

¹² Grëse miech, niicle zha Israela, niicle-gaa zha stib guiedza ible sca ycaania me zho, sac led yed me rbe; me rnabey zho grëse zho, ni grëtaa ncuaane rap me, zdeed mew lo zha ne gnaba lo me. ¹³ Rnee lo Xtiidz me: “Grëse zha ne gnab lo Dios csilaa me zho lo dol, ible silaa me zho.”

¹⁴⁻¹⁵ Nana, no zho gnë: ¿Per zha gnab zho lo me, ni runbeyd zho me? Nli gunbeyd zho me, tel niaca mine gard cho cxeel zha ne tsienee Xtiidz me lo zho, parne gon zho cho nac me. Ni min co rzeet Isá, zeene rëb me: “¿Zha wentaa ziaad zha ne ziaadnie Xtiidz Ndzon Dios!”

¹⁶ Rgaaz Xtiidz Dios, per led grëd zho rzoobdiaga, zig rbiireque Isá, rnee me: “Dios, bui ganle choot nëd gliladz Xtiidz luu, mine rne naa.” ¹⁷ Sac gon, parne dib zdoo ne gnalo ne Dios, ib none yquiaadiag ne Xtiidz me ganle cho nac Jesús.

¹⁸ Zig nac zha Israel, ¿niacxe gard gon zho Xtiidz Dios? ¿Binle zhow! Blactaa zha ne ziyadnee Xtiidz me, haxta zaatne mazdraa

zita, laa miech quiayacnan Xtiidz me. ¹⁹ No hor rne naa: ¿Pe ib riend zha Israel, telne gbigd zho lo me csilaa me zho, laa me csilaa miech stib guiedz? ¿Per riendle zhow! Sac bzeetle Moisésa padzeela, zeene rëb Dios laa me ycaania miech stib guiedz, zha ne ib peet riend; zeena tednë zdoo zha Israel, togo ziaa zho biini. ²⁰ Mincoque ga pquiaa Isá, zeene rëb Dios:

Grë miech ne ni zienied guic yguib zho naa, laa zho beenbey naa.

²¹ Laa zha Israel, blactaa bzëeb nia naa lo zho ni naa niacnie naa zho, per pa nion zho xtidz naa, lel gocntseeb zho lo naa.

11

Zha Israel ne wbig lo Dios

¹ Per guiabd ne togo psaanladzle Dios zha Israel. Golgan ganle, zha Israelacxe waa nac naa, zha xtii Benjamín, zha xtii Abraham nac naa; ² dzigo led psaanladz Dios zho (nac zho zha ne padzeelale bzooblo me ygab lo me).

Golsoladz ganle, zha rëb Dios lo Lí, men ne biadteed xtiidz Dios padzeela, zeene bzodidznie Lí Dios ³ grëtaa ncuaane noyun zha Israel, ptsil zho zaatne riegan grë miech me, beet zho grë zha ne pxeel me noteed xtiidz me, ni laa zho quianaalacque gut zho Lí. Rzac Lí guiendaa zha ne ron xtiidz me, ⁴ dzigo hor co rëb me lo Lí: “Led tibd luu riaan, no zgadz mil zha ne gard yquitsgzhil lo Baal, naa bzooblo zho ygab zho lo naa.”

⁵ Scaquegaa niina nagon led grëd zha Israel psaanladz Dios, no palal zha ne pquia zdoo me ble me zho ygab zho lo me. ⁶ Rne naa pquia zdoo me zho, sac guiabd ne togo por demas wen zho gane ble me zho; sac gon, tel por wen zhow, nlid dzigo ne rquia zdoo me zho.

⁷ Znu nagon naca: Zha Israel ne bzooblome me, zha cose guiaanwen lo me. Laa los demas zho, lel lozh gacndip zdoo zho, ⁸ zigne zhobneeque lo Xtiidz me, zaatne rnee: “Beenndip Dios zdoo zho, riend zho zha gbig zho lo me; niicle ne zob lo zho, per rac zho zig rac zha ne rand; niicle zob diag zho, per rac zho zig rac zha ne peet rond. Ni scataque nac zho haxta lo

nadze.” ⁹ Miñcoque bzeet rey David, zeene rëb me:

Lëëque grë zhilni zho, lëëque grë ncuaañe row zho, gac zig len doo ne, len guieñe ne tsietsobe zho;

zeena ygaa zho guieñe ne rieguial zho.

¹⁰ Guiaañ zho zig tib zha ne rold lo, guiaañ zho zig tib zha ne blozh blengw zhits.

Psilaa Dios zha ne nacd zha Israel

¹¹ Grë zha Israel ne sca gocndip zdo, guiabde to togo laa zho bnitlole ga. ¡Lëda! Sinque laa me bdeed diidz sca goc zho, zeena gbig grë zha stib guiedz lo me csilaa me zho lo xtol zho; ni tednëgaa zdo zho gan zho laa me rcaania zha stib guiedz.

¹² Nana, telne scataa guieñzaac ne bgaa miech stib guiedz ne znu racndip zdo zha Israel, ¿pe lelgue dzigo zeene laa zho gbiire guiaañwen lo Dios stib? ¡Zha naczhe grëraa guieñzaac ne ygaa miech!

¹³ To ne nac to miech stib guiedz, led nanle to ganle, ible Dios bzo naa none naa Xtiidz me lo to. Scagaa naa, dib zdo naa rioxco naa run naaw, ¹⁴ zeena togo soobladz palal zha ladz naa ye zho squi gbig lo Dios csilaa me zho lo xtol zho. ¹⁵ ¡Que talzhe ndzona zeene laa zho gbiire gbig lo Dios stib! Nli laa Dios psaan zho, laa grëgaa miech stib guiedz laa zho biaanwen lo me. Gacxe waa, ¡tib guieñbley nrooba zeene laa me ycaania zha Israel stib! Sac gon, rriequia grieeban zho ga.

¹⁶ Zigne pcaania Dios xmengol zha Israel bgab zho lo me, scaquegaa scaania me xpëed zho; sac gon, zig nac tib zhan yag, zeene ndaan low mine naaza len liu, ndaanaque zhicwa. Scaque nagon, zeene bzooblo Dios xmengol zha Israel, yele zho ga bzooblo me.

Nana, gzoob ne nac zha Israel zig tib zhan yag oliv: low nac xmengol zho, laa zho nac zhicwa. ¹⁷ Bdzin dze brug palal zhicwa, dzigo ga bguiid zhicw yag oliv dan; lëe yag oliv dan co nac to ne nac to miech stib guiedz. Sca nac ne laa Dios pcaania to zigne pcaania me xmengol zha Israel; ye to laa to nogaa guieñzaac co. ¹⁸ Lëëraasi, guiabde to togo nonraa to lo zha ne nac

zhicwa mine brug ga. Golguien ganle, por lo yag ndaan zhicwa.

¹⁹ Nana, nend guiab to: “Per rioguial now, gacxe waa no biaan xlugar zhicwa, mine brug ga.”

²⁰ ¡Golgap cuidad gon! Nli lëe biche zho, laa to biaan xlugar zho, porne bnëd zho nalo zho Dios zigne bien to rnalo to me; per golguien gacniatsde to. ²¹ Golgan ganle, niicxe zha name zhicwpaa yag co nac zho ni ptiche me zho, ¡pelel to dzigo!

²² Golwi ganle zha wentaa Dios, per sca-gaa rdziladz me gats xtiidz me. Miñcocxe waa gondzed me grë zha co, laa to gon wen goc me lo to. Lëëraasi none gon to mine rnabey me, sac gon telne gonde tow, scaque gandzed me to.

²³ Nana, zig nac zha Israel ga, telne gbiire gbig zho lo me, ible squiid me zho lo yag co stib. ¡Golgan ganle men nroob nac Dios!

²⁴ Niicxe to na, nac to zig yag oliv dan, pquia zdo me to pquid me to zhicw yag oliv wen co, ¡pelel zha Israel dzigo yquiad zdo me, gbiire yquid me zho lo yag ne nacpaa zho!

Scaania Dios zha Israel ne bzozit lo me ga

²⁵ Bets, bzian, laa naa gni lo to ganle zha nac mine no guic Dios gun me. Niicle ne rienð miecha niina, per racladz naa gacnan tow, zeena gacniatsde to ne squi bzooblo me to: Nli ndal zha Israel racndip zdo zozit zho lo me niina, per zeene laa grë miech stib guiedz blozh wbig lo me, ²⁶ hor co grëse zho, laa zho gbiire gbig lo me stib ycaania me zho. Zigne bzeetle zha ne biadteed xtiidz me, zeene rëb zho:

Guiedz Sión, ga griece men ne cuee zha Israel lo xquieñtseeb zho.

²⁷ Dzigo laa Dios csilaa zho lo grëtaa xtol zho, zigne psanle me diidz lo zho.

²⁸ Len dze rii rlëe zha Israel ron zho none gnalo zho Jesús, par laa zho lo dol. Znu rac zho zeena gdeeda diidz gbig to lo Dios, nac to zha stib guiedz; sangue Dios rleyne me zho, sac scale rëb me lo grë pxozgol zho. ²⁹ Me bzooblo zho, dzigo ible scaania me zho; sac gon, led yed me ctsëe xtiidz. ³⁰⁻³¹ Glo to nac zha ne ib bind xtiidz Dios, laa niinagaa na zha Israel nëd gon xtiidz

me. Per zigne rquia zdoo me to niina, scaquegaa dzin dze ne yquia zdoo me zho. ³² Grëse miech, zigtaa zha Israela, zigtagaa tow ne nac to miech stib guiedza, laa Dios bneedz diidz sca gocntseeb to lo me, zeena grieelo glu me ganle ne lalga rquia zdoo me ne.

³³ ¡Gotsaa gwi ganle zha men nroobtaa nac Dios! ¡Pa lotaa rac me, pa lotaa rien me! ¡Pa lotaa rioxco me miech! ¡Cho grieelo guien pe nac mine no guic me gun me, pe nacgaa gun mew? ³⁴ Zigne zhobneeque lo Xtiidz me, zaatne rnee: “¡Choot nan pe no guic Dios gun me! ¡Choot grieelod guiab lo me, znu znu been! ³⁵ Wlaltaa choot gard pe gdeed lo Dios, par guiab ne laa Dios zëeb.” ³⁶ ¡Peet gon nzëëbd Dios lo miech! Sac grëtaa ncuaane no, me psana, me naaza, ni me rnabeya.

¡Mese nac men ndzon, tibaque gotsaa dziuunon ne me! Sca rieguiala.

12

Golban zigne rdziladz Dios

¹ Bets, bzian, laa to gocnanle ganle pa lotaa nquialadz Dios to. Nana sca, dib nase to golsan to ladznia me, gac to zig tib gon mbe, tib gon ne gley me ycaania me. Sca glu to ne nli rleynie to me.

² Ib tsienal draa to grë ncuaane ndzinlid ne noyac lo guidzliu rii, grëse zhgab ne paat rquiind, golcueew guic to; zeena gban to zigne racladz me, ni guien to ganle zha wentaaw zeene zienal ne mine rnabey me.

³ Ne znu nac naa zha ne pquia zdoo Dios noyun naa dziin rii, nligaa laa naa rso diidz lo to, ndzinli golgac, ib glude to ncuaane ni nade to, sinque golguien cho nac to, zha rnalo to Dios. ⁴⁻⁵ Golgan ganle zha niaa xcuerp ne: nzian lë niaaw, ni tib tiba nose zaatne rquiina; scaque nagon nac grë zha ne ngab lo Jesús, nzian nac ne, per tib tib ne nose zaatne rquiin ne, tsod zha ne yquiind. Grëse ne none gnalolsa ne grë zha ne nacgrë ne.

⁶ Tib tib ne bneedzse Dios guielbiini lo ne, par grieelo dziuun ne dziin ne pso me ne dziuun ne lo me. Gacxe waa, zha ne pso me cteed xtiidz me, none gnee zhow zigne csiaab mew guic zho;

⁷ zha ne pso me gun ncuaane yquiin lo grëraa miech, none gun zhow.

Zha ne pso me cseed miech, none min co gun zho;

⁸ zha ne pso me gdeedlban miech, none lban gdeed zho.

Zha ne pso me ygad, none dib zdoo zho ygad zho;

zha ne pso me so gnabey, none ndzinlise gnabey zho;

zha ne pso me cchoobladz zdoo zha ne mban noded, none nley gac zho tsienee zho lo miech.

⁹ Dib zdoo to golleynie samiech to. Gandzede to grë ncuaane ntseeb, niapse ncuaane rquiin goltsienal. ¹⁰ Ine niowse golleynie grë zha ne nacgrë to, gacnguizhde to, quitniede to zho.

¹¹ Nguieel golgac, gacmbechde to, dib zdoo to goltsoxco golgun mine nac xtsiin Dios.

¹² Nley golgac lo guielmban rii, golsoladz ganle zha nactaa grë ncuaane no gneedz Dios lo to; golxecw lo grë guielnë ne gan to; tibaque golzodiidznie Dios.

¹³ Goltsoxco xliaadz grë zha ne nacgrë to ngab to lo Dios; zaacse golcuëzlo zha ne ziaadted lidz to.

¹⁴ Grë zha ne rtsidil to, laa ne gdzibdee to zho, golnab gunlay Dios zho.

¹⁵ Zha ne no guielbley, golgacnie zho lo xquielbley zho; zha ne nogaa guielnë, golgacnie zho lo xquielnë zho.

¹⁶ Gacniatsde to. Grë zha ne rzac miech peet nond, goltsieelsa zho; guiabde to to nac zha ne racraa. Niowse golbannie zha ne nacgrë to.

¹⁷ Zha ne csacsi to, gunde to ne yeque to csacsi zho. Goltsoxco wen golgac lo grëse miech. ¹⁸ Tilniede to samiech to, goltsoxco tibaque wen golbannie zho. ¹⁹ Golguien, zha ne csacsi to, ib guiabde to ne tozhal ctsire guielnë co, sinque golsana ladznia Dios, metaa nan zha gun me xquielwxtis me; zigne ziaad lo Xtiidz me zeene rëb me: “Naa raguial gun guielwxtis, naa gunquizh miech tel pe nac dol ne zëeb zho. ²⁰ Gacxe waa, zha ne rlëë lo luu, zeene gan luu mban rac zho rcaabedz zho, mazd bdeed ncuaane gow zho; gangaa luu mban rac zho rnab zhis zho, bdeed ncuaane guie zho. Sac

zeene sca gun luu, stoladz zho csoladz zho mine been zho luu; rriequia gui ga cuib guic zho.” ²¹ Golguien sca, niapse guielwen goltsienal, zeena sca ycuëz to lo guielntseeb. Gdeete to diidz ne ye to gun guielntseeb.

13

Golgon mine rnabey wxtis

¹ Grëse to none gon to xtiidz zha ne nac-paa wxtis. Sac grëse zha ne nac wxtis, ible Dios rdeed diidz ne laa zho rac dziin co. ² Gacxe waa, zha ne racndaan lo wxtis, rriequia ye lo Dios ga racndaan zho; ni zha ne racndaan, lëëque zha rguib ted zho caxtigw ga. ³ Golgan ganle, ible laa wxtis zo, par zha cobey caxtigw ne tsieguial zha ntseeb. Telne racladzde to sca tsoxtseeb to lo wxtis, zaacse golgac; scagaa zha, tsod pe nacne ygaal zho to. ⁴ Dios psan rzo zho ni zha rteedlo to, ni scagaa, telne pe guielntseeb ne gun to, zhaque gnabey pe caxtigw ne yгаа to; sac gon, ible laa Dios bzo zho gun zho guielwxtis. ⁵ Gacxe waa, ib none gon to mine rnabey zho, zeena tsoxtseebde to lo zho, ni scagaa niicle nëz lo Diosa ine tiblise no guic to.

⁶ Scaque dimi ne no gdeed to lo zho, goldeeda; sac rquiin dimi co parne grieelo gun zho tel pe nac dziin ne no gun zho. ⁷ Golguien sca, dimi ne no gdeed to lo zho, goldeeda; mine rnabey zho to gun to, golguna. Golleynie zho, quitniede to zho, golguien zha non nac zho.

Golleynie samiech to

⁸ Grë ncuane rieguial to gun to, golgungazha zeena bdedgaw; sangue samiech to, none tibaque gleyne to zho. Zha ne rleyne samiech, grële mine zhobnee lo Xley Dios ga quiayun zho. ⁹ Sac telne rleyne to samiech to zigne rleyne to to, nod pe nacne csacsi to zho; guiab to: laa to yquidie zho, laa to gut zho, laa to cuan zho, laa to tsonie tsieel zho, gzoobladzga to grë ncuane quianie zho. Gacxe waa, zha ne rleyne samiech zigne rleyne zho zho, grële mine zhobnee lo Xley Dios ga quiayun zho. ¹⁰ Zha ne rleyne samiech, rsacsidraa zho zho; ni min co

rnabey Dios. Gacxe waa, grëse ne none gleyne ne samiech ne.

¹¹ Ib none gban ne zigne racladz Dios, golle na tsa ne biini; sac gon, laa dze ne ycaania Dios ne bii ziaadgaxraa, lëdle zeene psilo rnalo ne me. ¹² Dziuun ne cuent laa guieel lozhle ted, laa biini ne guini liu dze ndzon co ziaadle; gacxe waa, ni lalnu guionald ne mine racladz mendox, sinque mine racladz Dios, min co golgotsaa dziuun ne. ¹³ None ndzinli gban ne:

dziuund ne guielgonziu,
dziuund ne grë lni yozh,
yquiangobd ne zha ne led tsieeld ne,
dziuund ne grë guielyozh ne racladz xcuerp ne,
dilnied ne samiech,
glëenied ne zho zeene stib noded zho.

¹⁴ Golgotsaa gnab ne lo Jesús sca, zig zie dze lozh csanmbe me xquielrien ne, csanmbe me zdoo ne, gac ne zigne racladz me. Dziuundraa ne grë ncuane ndzinlid ne racladz xcuerp ne.

14

Gzeed zdoo to mine run zha ne nacgrë to

¹ Golcaania zha ne gard tsogucpaa zha nac Xtiidz Dios. Telne no palal mine riladz to zhaa rzac zho, glisquide tow lo zho. ² Gzoob ne, no to rzac peet nacda gow to grë lose guielwagw, laa zha ne na gard tsogucpaa Xtiidz Dios, rzacgaa wena telne scuaan guizhyese gow zho; ³ ga nagon, ni stib ni stib nod pe nacne glisqui dien cho pe row, dien cho pe rowdga; sac gon grëse to, Dios bzooblo to ngab to lo me. ⁴ Nana zig nac zho, lo Dios ngab zho, led lode tow; zcho nac to dzigo tso to glisqui to dien pe run zho? Dios nac men ne nan telne lëew o lëdgaaw ga quiayun zho; men nroob nac Dios, me gdeed guielbiini lo zho guien zho gban zho zigne racladz me.

⁵ Scaque, no zho zienal dien pa dzepaa none gleyne zho Dios, nogaa zho rnee zac tel pa dzetaa gleyne zho me. Per peet nacd ga, zac tib tib zho gunse zho mine rzac zho rdziladz me. ⁶ Tel pa dzetaa wena, tsaque run zhow par gunnon zho me. Scaquegaa guielwagw, wena zha ne gow grëlosew; niicle zha ne ncuanea ncuane gow, wenaquew, tsaque run zhow par

glu zho ne rleynie zho me, ni rdeed zho xquizh lo me.

⁷⁻⁸ Sca nagon naca, per led min cod dzieets ne dziuun ne mine gacladzta ne. Grëse ne ne nac ne zha ne ngab lo Dios, laa ne mban par dziuun ne mine rnabey Jesús, ni zeene guetgaa ne, lo me none gdzin ne. Gacxe waa, niicle niina ne zomban new, niicle zeene gutlegaa new, ladznia me no ne. ⁹ Sac gon, tel Jesús gut me ni brieaban me; gacxe waa, me rnabey ne grëse ne, zigtaa zha mbana zigtagaa zha guta.

¹⁰ Jesús rnabey ne tib tib ne. Gacxe waa, nonguielda glisqui to lo zha ne rund mine run to; nonguielda por mincose sac to zho zig zha ne peet nond, tso to gneedraa to lo zho. Ni stiba, gal dze ne laa Dios gun guielwxtis, grëse ne laa ne none gacredz lo me. ¹¹ Zigne raquetaque lo Xtiaz me, zaatne rnee me:

Naa nac Dios mban, gneli naa lo to ganle: grëse miech, ible squitsgzhiz zho lo naa, cueero zho ne nli naa nac Dios.

¹² Sca nagon gaca, tib tib ne ib laa ne no cueero lo me tel zha wban ne.

Csande to zdoo zha ne nacgrë to

¹³ Nana sca, zha ne sca rund grë mine run to, ible glisquidraa tow lo zho. Golguien, gunde to ncuaane rgobey to yquiaaqui gunctal zho xtol zho, o csaangaa zho Xtiaz Dios. ¹⁴ Tel naa, nanpaa naa led dolda gow ne grë lose guielwagw; sac niicle Jesús scaque nac xtiadz me. Sangue zha ne rzac dola, mazd gowd zhow; sac tel laa zho gowa, xtol zho ga gunctal zho. ¹⁵ Zig rne naa ga led dolda, per telne xtsiinpaa row to tib ncuaane rquiaaqui rsan to zdoo stib zho, ga rlu to ne rleyniede to zho. ¡Golguien sca, gowde to ncuaane yquiaaqui sozit zho lo Dios! Sac gon, blactaa guielne ne bded Jesús psilaa me zho.

¹⁶ Ib gunde to grë ncuaane yquiaaqui gneenë miech to, niicle ne nanpaa to led dolda. ¹⁷ Zha ne ngab lo Dios, mine none tsienie guic zho nac ne ndzinli gban zho, tilnied zho samiech zho, ine nley gac zho (min co nac mine rdeed Espíritu Sant); led tsod zho dien pe zac gow zho, pe zac guie zho, pegaa gacda. ¹⁸ Sca rdziladz Jesús, ni zha ne sca gban, zleynie Dios zho, niiclegaa grë miecha zleynie zho zho.

¹⁹ Goltsoxco sca, gunde to ncuaane codil to grë zha ne nacgrë to; zeena tipse gac to lozh tsoguic to zha racladz Dios gban to. ²⁰ Ib gunde to, ne por tib guielwagw codil to grë zha ne ngable lo Dios. Zig rnele naa ga, grëlose guielwagw mbew, peet nacda gow new; sinque mine nonguielda, nacne gow ne mine nanpaa ne yquiaaqui csa ne zdoo stib zho. ²¹ Mincocxe waa, mazd gowde to pe scuaan bëel, guiede to nziu, telne min co yquiaaqui gunctal to xtol zho; ni tel pe grëraa ncuaane nan to tsod zdoo zho, gunde tow.

²² Niicle ncuaane nanpaa to dolda gun tow, niiclegaa nëz lo Dios led dolda; per mazd gunde tow zeene zo zha ne rzac dola. ¡Wen zie zha ne sca niicle nanpaa zho dold nac mine gun zho, per rund zhow, parne gunctald zho xtol zho!

²³ Sangue zha ne racchop guic riend zho dien pe zow zho tib guielwagw, ni lozh ga row zhow, runctal zho xtol zho ga; sac beend zho mine rzac zho rdziladz Dios. Grëse ncuaane rzactaa zho wend ni gun zhow, xtol zho ga gunctal zho.

15

Golgacnie zha ne nacgrë to

¹⁻² Golguien sca, to ne nac to zha ne dziitsle zo lo Xtiaz Dios, golgacnie grë zha ne gard sodziits lo Xtiaz me. Golgun ncuaane tso zdoo zho, ncuaane yquien lo zho, zeena lozh guien zho zha gnalo zho Dios; led tsode to gun to ncuaane yquien lo to.

³ Golgan ganle, niicle Jesús bguibd me niac ncuaane nquien lo me. Zigne raquetaque lo Xtiaz Dios, zaatne rnee: “Grëtaa diidznë ne rnee zha ne rlë lo Dios, grësew pcon zho me.”

⁴ Grëse mine raquiet lo Xtiaz Dios, padzeela pquaw; ni ib laaw pquia zeena gacndion ne zha no gban ne. Lëew rnee none nley gac ne, lëew rnee guieete ne yquiambiaaz ne ygaa ne grë mine bzeetle Dios. ⁵ Dios men ne rneedz guielbley co, men ne racnien ne guieete ne, me gacnien to niowse gbannie to grë zha ne nacgrë to. Golleynie zho zigne rleynie Jesús to, ⁶ zeena grëse ne tipse gac ne dzioolnie ne Dios, Pxo Jesús, men ndzon ne rnabey ne.

Grëse miech noyon Xtiidz Ndzon Jesús

⁷ Golguien sca, grëse zha ne nacgrë to, golcaania zho zigne pcaania Jesús to. Sca golgun, zeena xoobnenraa lë Dios.

⁸ Golsoladz ganle, zeene biaad Jesús nroob ncuaane been me lo zha Israel, me bi-aadgun grëtaa mine bzeetle Dios padzeela. Ga blu Jesús grëse mine rnee Dios, ib run mew. ⁹ Ni golsoladz ganle, ye grë miech stib guiedz biaadsilaa me, gane niina grëse zho roolnie Dios, ne scataa pquia zdoo me zho. Min co raquiet lo Xtiidz me, zaatne rnee: Zoolnie naa luu, ni zlu naa lo grë zha stib guiedz ne men non nac luu.

¹⁰ Stib lugar rnee:

To ne nac to miech stib guiedz, jine nley golgac grë to zha Israel!

¹¹ Ni no stib zaatne rnee:

Grëse to ne nac to miech stib guiedz, jolleynie Dios! jolsannziuu lë me!

¹² Mincoque ga bzeet Isá, zeene znu pquiaa me:

Zriequia tib men lo xtii Isái; men co gnabey lo grëse miech stib guiedz, ni me gnalo zho grëse zho.

¹³ Mincoxe waa, to ne nac to miech stib guiedz, rnab naa lo Dios (men ne psanle didz pe nac grë ncuaane yгаа ne ga) gneedz me guiebley lo to, gacnie me to peet zhgab ctsebde to niina ne laa to riladzele me. Rnab naa lo me, gacnie Espiritu Sant to ine gley to yquiambëz to gac grë mine psanle me diidz ga.

¹⁴ Bets, bzian, nanle naa zha wen nac to, nacde to zha ne csan zdoo stib zho; rienle to zha racladz Dios gban to, rienle to zha cso to diidz lo grë zha ne nacgrë to; ¹⁵ per lo guits rii gon nzian ncuaane rso naa diidz lo to. Guiabde to togo ndox naa lo to, sinque laaw ben naa zeena guiaanladzde tow. ¹⁶ Ne nquialadz Dios naa, laa me bzooblo naa noyun naa xtsiin Jesús, none naa Xtiidz Ndzon me lo grë miech stib guiedz, zeena csanmbe Espiritu Sant zho; lozh ga gded naa zho lo Dios zig tib gon ne gley me ycaania me.

¹⁷ Gacxe waa, tel niina rley naa sac noyacnie Jesús naa noyun naa dziin ne pso Dios naa. ¹⁸ Me noyacnie naa none naa Xtiidz me lo grë zha stib guiedz, zeena gban zho zigne racladz me. Ni laa zho nobig lo

me, sac ran zho grëse mine rne naa mban naaw zigne naca, ¹⁹ ni ran zho zha racnie Espiritu Sant naa run naa grë milagr, grë ncuaane rzee zdoo zho. Sca nagon none naa Xtiidz Jesús lo zho, brie naa Jerusalén briequia naa haxta nëz xtan zha Ilir. Guiabde to togo rtix naa diidz. ²⁰ Ni laa naa noxco za naa zaatne waltaa gard gon zho cho nac Jesús, zeena gasëëbd naa zaatne ziyele zha ne güeynee Xtiidz me. ²¹ Laa naa zana zigne zhobnee lo Xtiidz Dios, zaatne rnee: “Grë zha ne waltaa gard gon cho nac me, zeene gan zho grëtaa ncuaane run me, laa zho gunbey me.”

Racladz Pabl tsie Pabl Roma

²² Nzian vuilt gocladz naa nialgan naa to, per ib bdeetew diidz, sac laa naa bia grë dan co biaseed naa miech. ²³ Izle ga na tibaque sca no guic naa, laa niina ne laa naa psiaal lo xtsin naa, nataa nagon ible zial naa. ²⁴ Laa naa no ga Spañ, dzigo lëë nëzle ga teed naa Roma i guialgan naa to. Tib guiebleya lo naa guialquiabdiuuzh naa to, dzigo lozh ga siguiel to gun to xyudar naa grieelo ga naa nëz Spañ.

²⁵ Laa niina, laa naa no ga Jerusalén gasan naa tib gon lo grë zha bets, zha bzian ne no ga; ²⁶ sac grë zha bets, zha bzian, ne no nëz Macedon, ni nëz Acay, laa zho bnediiz beenlo zho palal dimi cxeel zho yquii grë zha prob ne no nëz co. ²⁷ Niapse zdoo zho gol ptop zho gon co, sac rzac zdoo zho grëtaa mine been zha Jerusalén lo zho; sac gon, zha co güeynee Xtiidz Ndzon Jesús lo zho. Laa niina, laa zho rxeel palal ncuaane rgaa lo zho yquii zha Jerusalén.

²⁸ Zigne lozh nagon gasan naa gon co Jerusalén, dzigo laa naa teed guialgan naa to i zigne nile naa ga. ²⁹ Rien naa nroob guielnzaac ne gneedz Dios lo to zeene laa naa guial.

³⁰ Bets, bzian, golguien ganle Jesús rnabey ne grë ne; ni rleyne ne zha ne nacgrë ne, sac Espiritu Sant nacnie ne. Gane niina, laa naa rnab lo to, golgotsaa gnab ne lo Dios gacnie me naa; ³¹ golnab lo me, csilaa me naa lадznia grë zha Israel ne gard guien cho nac Jesús. Glnab lo me, ine gley grë zha bets ne, zha bzian ne, ycaania zho gon ne gasan naa lo zho nu; ³² zeena ine nley

no zdoo naa glanso naa lo to, ine gdziiladz naa len dze ne cuöz naa lo to i. Sca nagon no guic naa, totsaque gneedz Dios diidz gaca. ³³ Ni me ne nac me men ne rbee miech lo gröse zhgab, lo gröse guielxtseeb, me gacniën to. Sca gaca.

16

Bdiuzh

¹ Bets, bzian, len dze rii laa Feb, tib wnaa ne run xtsiin Dios guiedz Cencre, laa me guiaad nöz lo to i. ² Laa naa rso diidz lo to, zeene glanso me i niowse golcaania me, golcaania me zigne riegual ycaania ne zha ne ngab lo Dios. Golsiguiel goldeed grë ncuane yquii me; sac gon, tel me ndal grë zha ne ziyacnie me lo xliaadz zho, haxta naa blactaa ziyacnie me naa.

³ Ni rnab naa lo to, golsiguiel goldeed zhibdiuzh naa lo grë zha qui.

Goldeed tib zhibdiuzh naa lo Aquil i, grop tsieel me Priscil. Blactaa ziyacnie zho naa zidziuun no xtsiin Jesús, ⁴ haxta bdedlaa zho niet zho psilaa zho naa lo guielgut. Rzadox zdoo naa mine been zho ga, niicle grëragaa zha zit ne nacgrë new, rzac zdoo zhow.

⁵ Ni scagaa, grë zha ne rcaalsa lidz zho riegoalnie Dios, goldeed zhibdiuzh naa lo zho. Goldeed zhibdiuzh naa lo Epenet, rley naa rsoladz naa me; lëe me nac zha Asia ne glopaa bzëeb xnöz Jesús.

⁶ Goldeed zhibdiuzh naa lo Marí, blactaa noyun me xtsiin Jesús lo to.

⁷ Goldeed zhibdiuzh naa lo Andrónic, lo Junias, grop menladz naa zha ne no i; gapaa no zho bdzio ladzguiib. Glo zho bliladz Jesús lo naa, zha nziuu nac zho lo grë zha ne pxeel Dios nonee Xtiidz me.

⁸ Goldeed zhibdiuzh naa lo Ampliat, lëe stib zha ne rdzieel xtidz naa ga; ⁹ lo Urban, rsoladz naa me, tipse bdziuun no xtsiin Jesús grop no; lo Staquis, stib zha ne nziuu lo naa, goldeed zhibdiuzh naa lo zho; ¹⁰ lo Apel, ye me blactaa ncuane bded me blu me ganle ne nli dib zdoo me rnalo me Jesús; lo grë zha ne no lidz Ristob ne.

¹¹ Goldeed zhibdiuzh naa lo Herodion, ye me menladz naa nac me; lo grë zha ne no lidz Narcis, zha ne rliladzle Jesús;

¹² lo Trifen, lo Trifós, ni lo Pérsida, gza men wnaa rii blactaa noyun zho xtsiin Jesús.

¹³ Goldeed zhibdiuzh naa lo Ruf, zëeb xtiidz me lo grë zha ne nacgrë ne; goldeed zhibdiuzh naa lo xniaa me ne, run naa cuent lëe stib xnia naa ga, blactaa pteedlo me naa. ¹⁴ Goldeed zhibdiuzh naa lo Asinric, lo Flegon, lo Hermes, lo Patrob, lo Hermas ni lo grëragaa zha bets ne nacgrë zho.

¹⁵ Goldeed zhibdiuzh naa lo Filólogo, lo Jul, lo Nerew grop bzian me, lo Olimp ni lo grëraa zha bets ne nacgrë zho.

¹⁶ Grëse to bets, grëse to bzian, golcaania zhibdiuzh naa. Grëse zha ne rliladz Jesús nöz rii, laa zho rxeel bdiuzh lo to.

¹⁷ Nu ne laa naa csiaalle lo guits rii, laa naa rso diidz lo to, nsin golso lo grë zha ne ziaad loxaque dien zha codil zho to, dien zha gungüet zho to, rlu zho mine ni nacdraa Xtiidz Jesús; yquiaadiagde to zhiwseed zho.

¹⁸ Grë zha co, led xtsiindraa Jesús ga run zho, sinque laa zho noxco ncuane gdeed guxtxcuerp zho. Diidz nex, diidz ndooladz rnee zho; grë miech ne beelze pe rliladz, znuse rquidie zho zho. ¹⁹ Sangue to, zëeb diidz ne ib rsaande to mine nac Xtiidz Dios, zienal to mine rnabey me.

Rley naa ron naa squitaa nguzobdiidz to. Racladz naa tibaque squi niini gac to, zeena guien to niapse ncuane yquii gun to, ni lalnu tsoode to lo guielntseeb.

²⁰ Scagaa Dios men ne rtiche gröse zhgab, gröse dzeb, merle quixdze me Satanás, zeena peet grieelodraa gun ma. Jesús, men ndzon ne rnabey ne, me gacniën to.

²¹ Golcaania zhibdiuzh Timoté, men ne quianie naa xtsiin Jesús, laa me rxeel bdiuzh lo to; scaque zha ladz naa Lus, Jasón ni Sosípater, laa zho rxeel bdiuzh lo to.

²² (Naa nac Ters, naa noquia guits rii, ye naa laa naa rxel zhibdiuzh naa lo to i. Rleynie naa to, sac ye to ngab lo Jesús.

²³ Golcaania zhibdiuzh Gay, men ne rböz naa lidz, laa me rxeel bdiuzh lo to. Lidz me nu rcaalsa grë zha ne rliladz Jesús nöz rii. Ye Rast, men ne nac wxtis quianap xtimi guiedz rii, ni bets ne Cuart, laa zho rxeel bdiuzh lo to. ²⁴ Jesús men ne rnabey ne, me gacniën to grëse to. Sca gaca.)

²⁵ Laa naa r̄saṅ to ladznia Dios, me gac-nien̄ to lozh sodziits to lo Xtiidz me, miñe none naa lo miech. Haxta zeene gard tsaa guidzliu, znu no guic Dios csilaa me gr̄e miech lo xtol̄ zho, per choot gocn̄anda, naraa laaw bzhoobnen̄. ²⁶ Laa niina, nzian zaatne nogaaz Xtiidz me, zeena gr̄ese zho guien̄ Jesús none gnalo zho, ni miñe rnabey me miñ co no gun̄ zho. Gr̄e zha ne biad-teed xtiidz Dios padzeela, bzeetle zho ne znu gaca, ni ible Dios rnabey ne znu gaca. ²⁷ ¡Mese nac Dios, mese nac men̄ ne nlipaa rien̄! ¡Tibaque sca golgotsaa dziuun̄non ne me, gr̄ese ne ne nac ne zha ne ngab lo Jesús! Sca riegual̄a.

Pabl

GUTS NE GLO PXEEL PABL LO ZHA CORINT

¡Diuzh to grëse to! ¹ Naa nac Pabl, ible Dios bzooblo naa znu quiayun naa xtsiin Jesús. Grop no bets ne Sóstenes rquiaa guits rii rxeel no lo to.

² Laaw ziaad lo to i, grëse to ne nac to zha ne ngable xnëz Dios no to guiedz Corint i, nac to zha ne bredz Dios ngab lo me, psanmbe me to zeene laa to bliladz Jesús; zigne psanmbeque me grëse miech ne no dib lo guidzliu, zha ne bliladz Jesús, men ne rnabey ne grëse ne.

³ Dios men ne nac Pxoze, ni Jesús men ne rnabey ne, me gacnien to, me glu lo to ganle pa lotaa noxco me to; zeena peet tsienied guic to.

⁴ Gzataa zeene rzodiidznie naa Dios, rded naa xquizh lo me por grëtaa ncuaane zineedz me lo to, niina ne laa to rliladz Jesús. ⁵ Sac gon porne rliladz to Jesús, blactaa ziyunlay me lo xquielmban to, noy-acnien me to quiayoguicraa to zha nac zhiwseed me, rien to zha gnee tow lo miech. ⁶ Rlu zienal to mine nac Xtiidz Jesús, zigne binse tow, ⁷ gacxe waa bneedz Dios grëtaa guielbiini lo to, zeena guien to zha gban to, laga quiambëz to gdziñ dze ne guiaad Jesús men ne rnabey ne. ⁸ Ni Dios nac men ne gacnien to tiblque gac to lo Xtiidz Jesús, zeena ni tib falt rapde to gal dze co. ⁹ Sca nac xtiidz me, ni mesi gon ctsëed me mine rnee me, ible laa me bredz to gacnie to Xpëed me Jesús, men ndzon ne rnabey ne.

¹⁰ Gacxe waa bets, bzian, laa naa rso diidz lo to niowse golgac, tsodildraa to. Ine tipse golgac grë to, tel pe nac dziin ne gun to, tel pe rzac to, tipse golnee. Ne nligaa golgona, zig nac zeene Jesússhal noso diidz rii lo to. ¹¹ Sac gon në tib zhalidz Cloé lo naa nodillsa to i; ¹² no to dien cho xnëz ngab to. No to rnee: “Xnëz Pabl no naa”; riasaque zha ne rnee xnëz Apol no zho, rrieequiagaa zha ne rnee xnëz Pedr no zho; haxta no zho rzac zhase nac zha ne nlipaa no xnëz Jesús. ¹³ Ne squi rac to, ¿pe rzac to dzigo squi nzian lë nac Jesús? Zha ne rnee xnëz

Pabl no zho, ¿pe niacxe naa pquia lo cruz gozh xtol zho?, ¿te brobnis zho ye par ygab zho lo naa?

¹⁴ ¡Xquizh Dios led naad pchoobnis to grë to, lëese chop zha ne pchoobnis naa nac Crisp ni Gay! ¹⁵ Zeena tsod pe nacne guiab to xnëz naa ngab to, sac naa pchoobnis to. ¹⁶ Ah, ni naaque gon pchoobnis grë menlidz Stef. Bod lëese zha ne pchoobnis naa ga, ¹⁷ sac gon pxeeldaxe Jesús naa waa cchoobnis naa miech, sinque laa me pxeel naa cseed naa zho gacnan zho zha grieelo laa zho lo dol. Haxta bod ligase bzhaac to mine bialne naa lo to, sac ib zanaid naa pe guielrac, pe diidz ngan ne gne naa; sac nacda gleynie miech zha rnee naa, sinque gliladz zho cho nac Jesús, pe nacne gut me lo cruz.

Diosse nac men ne rien

¹⁸ Min co nagon noxco naa, maase niicle no grë zha ne rzac ncuaane paat rquiind ga been Jesús gut me lo cruz, per lëe zha co nole nëz ne nitlo zho; sangue ne ne nac ne zha ne psilaale me lo dol, ndion ne ganle ga blu pa lotaa nac poder ne rap Dios. ¹⁹ Noyaca zigne zhobneeque lo Xtiidz Dios, zeene rëb me:

Znitlo naa grë guielrac ne rzac zho csilaa zho,

niicle rzac zho mazdraa zhooba guic zho, ni lalnu yquiinda.

²⁰ Ni nligaaw, grë zha rac, grë zha rien, grë zha ne rzob dien cho nroobraa rac, ib blud grë zhiwseed zho ga lo zho zha csilaa Dios zho, chogaa nac Dios. Ga blu Dios ganle lega nacse grë guielrac ne no lo guidzliu rii. ²¹ ¡Diosse nac men ne rien! Bien me grieelod gunbey miech me por xquielrac zho, nacne bnabey me zha ne dib zdoo gliladz xtiidz me, zha co csilaa me; niicle ne rzhidznie miecha, rzac zho ncuaane paat rquiinda.

²² Zig nac grë zha Israel, grë zha Gres ncuaane paat rquiinda rzac zho. Grë zha Israel, racladz zho ganlo zho grë milagr nroob par glu ne diidzliw; laa zha Gres na zienalgaa gaca zigne nac zhiwseed zho, sac laa zho zienal guielrac ne no lo guidzliu rii. ²³ Gacxe waa zeene rnee no lo zho Jesús men ne pquia lo cruz, men cose csilaa miech, rlëe zha Israel ron zhow; laa zha

Gres, rzhidznie. ²⁴ Sangué ne, ne nac ne zha ne bredzle Dios bzëëb xnëz me, zigtaa zha Israela, zigtagaa grëraa miecha, ndion ne ganle Jesús nac men ne biaadlu pa lotaa nac poder ne rap Dios, me biaadlu pa lotaa nac xquielrac Dios. ²⁵ Mine rzac miech paat rquiind ga been Dios, ni nand zho ndziibguicraa nac min co lo grë xquielrac zho; zha ne rzacgaa cholze cho men nsis ga sca gut lo cruz, ni nand zho lëë men co mazdraa ndip lo grëse miech guidzliu.

²⁶ Bets, bzian, golgan ganle lo grë to ne nac to zha ne ngab xnëz Dios, led grëde to nac zha rien nëz lo miech, led grëde to nac zha non, zha ne ziaadgaa lo grë dii ne nziuu lo zho. ²⁷ Per ib laa Dios nobedz grë zha ne rzac miech peet riend, grë zha ne rzac zho nac zha nsis, parne gunctoladz me grë zha ne rzac zho nac zha rac, zha non. ²⁸ Laa me nobedz grë zha ne sca rzac miech paat rquiin, zha ne rzac zho peet nond, parne guioog ro grë zha ne rzac zho nac zha non, zha nziuu. ²⁹ Ga rlu me ganle ni tib choot grieelod gacniats lo me. ³⁰ Golwi ganle, niapse por me laa ne nacie Jesús, grë guielrac, grë guielrien ne rdziaap ne, Jesús bneedza, ni Jesús nac men ne psilaa ne lo grëtaa xtol ne, men ne psanmbe ne laa ne bziaab xnëz Dios. Dios bnabey sca goca. ³¹ Gacxe waa choot grieelod gacniats, zigne ziaadaque lo Xtiidz me zaatne rnee: “Zha ne racladz gacniats, mazd gunnon zho Dios por grëtaa ncuaane run me.”

2

Xtiidz Jesús bnee Pabl

¹ Gacxe waa tel naa, golsoladz ganle bets, bzian, len dze ne bialseed naa to Xtiidz Dios, bned naa dien pe diidz nroob, dien pe diidz ndzielguic lo to. ² Bend naa dien peraa nseed naa to, sinque mine nac zhiwseed Jesús min co bialne naa, zeena gacnan to cho nac me ni pe nac ne pquia me lo cruz. ³ Lega gzhe gzhe rac naa, haxta rzhidz naa, rdzieeb naa no naa lo to. ⁴ Zeene laa naa psilo bne Xtiidz Dios lo to i, gon to ganle ib bned naa zigne rnee grë zha ne nac zha rac lo guidzliu rii; per blu Espiritu Sant ganle nacda beelze pe wseed, ni blu ganle pa lotaa poder ne rap Dios. ⁵ Sca bne naa lo

to, sac laa naa racladz zha ne gbig sëëb xnëz Dios, me gnalo zho, gnalod zho grë mine nac xquielrac miech.

⁶ Parga nli no zaatne rnee no grë diidz nroob, diidz ndzielguic, per laa min co rnee no lo grë zha ne rienraa zha nac Xtiidz Dios, ni nacdgaaw zigne nac grë xtiidz ndzielguic grëraa miech, grë diidz ne rleyne grë zha rnabey ne no lo guidzliu rii; sac zigtaa zhaw, zigtagaa zhiwseed zhow, ncuaane tibrded naca. ⁷ Grë diidz ne rnee no, ndzielguic naca, sac zhiwseed Diosa, lëë xquielrac me ga. Ndzielguica, sac ga rlu me zha no guic me csilaa me miech gdziñ zho lo guielndzon ne no me; gocnand miecha padzeela, per nolew zeene bzaa me guidzliu. ⁸ Grë miech ne no len dze rii, rioguid zho zha nac xquielrac Dios; sac telne nioguid zhow nabeyd zho nquia men ndzon ne nac Jesús ga lo cruz. ⁹ Zigne zhobneeque lo Xtiidz Dios, zaatne rnee: Ncuaane waltaa gard guien miech, nac grë mine quianiele Dios gdeed me lo grë zha ne nlipaa gbig lo me gleyne zho me.

Ncuaane choot gard gana, ncuaane choot gard gona.

¹⁰ Sangué no laa no ndionlew, sac pxeel me zhiEspiritu me blu lo no zha naca, men co nan grëse mine no guic me.

¹¹ Zig nace tib miech, grieelod gacnanpaa ne dien pe nac mine no guic zho, pe nacgaa mine rza zdoo zho, loxaque zhiEspirituse zho nana; scaque Dios, loxaque zhiEspiritu me nan grëse mine no guic me gun me. ¹² Ni tel no, Espiritu co nacie no (nacie no espiritu ne quianzë lo guidzliu rii), ni ible laa Dios pxeel me lo no zeena gacndion no zha nactaa grë ncuaane nole guic Dios gneedz me lo ne. ¹³ Zeene rzeet no grë guielnzaac co, laa no rneew zigne rneedz zhiEspiritu me guielbiini lo no, rneed now zigne riab guic grë zha rac ne no lo guidzliu rii. Laa no rnee grë min co zigne rlu zhiEspiritu mew, ni ible laaw nac par grë zha ne rioguicle zha racladz Espiritu co.

¹⁴ Grë zha ne nacie zhiEspiritu Dios, cholze miech nac zho, grieelod tsoguid zho zha nac grë mine rlu Espiritu co lo no. Rzac zho ncuaane paat rquiind naca, sac

griee lod guien zhow ne zhase. ¹⁵ Sangue zha ne rioguicle zha racladz Espíritu co, rien zho pe nac miñe rlu me.

¹⁶ Ni nligaa zha guien zhow, zigne zhobneeque lo Xtiidz Dios, zaatne rnee: “Choot griee lod gacnañ pe nac miñe no guic Dios gun me, choot griee lod glu lo me pe nac miñe no gun me.” Per no, ndion now, sac grë ncuaane nañ Jesús, bneedz me diidz lo no ye no gocndiona.

3

Gnalod zho samiech zho

¹ Bets, bzian, ne nligaa gard griee lo gne naa lo to zigne rne naa lo grë zha ne rioguicle zha nac miñe racladz zhiEspíritu Dios, sinque tibaque laa naa rne lo to zigne rne naa lo grëraa miech guidzliu, sac rrieequia bii mëdyeen nac to lo zhiwseed Jesús. ² Niapse ncuaane ligase ziseed naa to, laa ne cseed naa to ncuaane ndzielguic. Rrieequia nidzse nonedz naa quiaye to, laa ne gow to grë ncuaane row zha gol. Haxta niinagaa gard tsoguic to zha nac grë miñe ndzielguic, ³ sacne laa to bii zienal miñe run miech guidzliu, laa ne gun to miñe racladz Dios. Golguien ganle zha rac to, no to rlozhd glëëlsa to, rlozhd tillsa to. ¡Led squid gon no gac zha ne nole xnëz Dios! ⁴ Pe i na rriee bla to rnee: “Tel no xnëz Pabl no no”, rrieequegaa zla zha ne rnee: “Tel no xnëz Apol no no.” Gase rlu ganle zienalde to miñe racladz Dios, sinque laa to zienal miñe no guic to.

⁵ Nana, ¿cho nac Pabl, chogaa nac Apol parne no yquiaaqui tsodil to? Nli no biadseed to Xtiidz Dios, per tib ngundziin winse nac no lo me, bdziuun no miñe rnabey me no. ⁶ Nac cuent rii zig nac tib guielgon, naa blo bni liu, laa Apol bgaala; per Dios nac men ne bnabey blana ni me pchooba. ⁷ Golwi sca ganle Diosse nac men non, sac me pchoob bni co, tel no peet ncuaane nroob bdziuund no, lëë gdib tib bloo bni liu, stib bgaala. ⁸ Zigtaa zha ne bloo bni liuw, zigtagaa zha ne bgaala, lal nac zho grop zho; ni Diosse nac men ne gdeed miñe rieguial zho tib tib zho por dziin ne been zho. ⁹ Tib ngundziin winse nac no lo Dios

grop no Apol; laa to nac zig tib lë liu ne quiayan Dios, zig tib yu ne quiazaagaa me.

¹⁰ Pa lotaa wen Dios, sac bzooblo me naa naa psilo yu co, ni blu me lo naa zhapaa none tsaaw. Nli naa bgaa blee xcimienta, per niina zhaale zha ne nosoquiaw. Tib tib zha ne nosoquia yu co, none guien zho zaacse gzhixcuuaa zhow, tsienal zho zigne nacse xcimienta ga, ¹¹ sac gon nod pe nacne csëeb zho stib cimient, tibaque cimient no, lëë cimient co nac Jesús.

¹² ¡Laa cimient co nole! Nana no zho gzaa yu co niapse guiib or, niapse guiib plat, no zho gzaaw grë quie niazh, no zho gzaaw yag, nogaa zho gzaaw grë pe guizh, pe yag xiidgaa. ¹³ Zeene gdziñ dze ne laa Jesús gun guielwxtis, ga glu dien zha nac xtsiin zho; sac gal dze co grësew laaw none ted lo gui, ga glu dien pa min lëbraa. ¹⁴ Zha ne pquiin ncuaane rlëb lo gui, ib tedsod zгаа zho miñe rieguial zho gdeed Dios lo zho; ¹⁵ laa zha ne pquiingaa grë ncuaane znuse rec, mbe scase nitlo xtsiin zho. Peet ycaaniad zho, haxta zha pense tel zha laa zho lo gui co, zigne rzac zha ne rec lidz.

¹⁶ Golgacnañ ganle xyadoo Dios gon nac to, sacne zdoo to rbëz zhiEspíritu me. ¹⁷ Tel xyadoo Dios, tib yadoo mbe, tib yadoo nda naca; gacxe waa, zha ne gnitlow ib tedsod znitlo Dios zho. ¹⁸ Golguien sca zaacse golgac, tel no zha ne rzac nroob rac zho wseed lo guidzliu rii, gnalod zho min co; nend lel lo co no zho, ygaad zho miñe nacpaa guielrac, guielrac ne rneedz Dios. ¹⁹ Sac gon grë guielrac ne no lo guidzliu rii, ncuaane beelze naca nëz lo Dios. Zigne raquietaque lo Xtiidz me zaatne rnee: “Grë zha rac ne no lo guidzliu rii, lëëque lo grë guielrac ne zienal zho, ga rlu Dios ganle paat rquiinda.” ²⁰ No stib zaatne rnee: “Nanle Dios grë zhgab ne nonie guic grë zha rac, ncuaane paat rquiinda.” ²¹ Tsode to sca lozhd gacniats to dien cho xnëz miech guidzliu rii no to, golguien ganle grëtaa ncuaane no, laa Dios psana par yquina lo to. ²² Zig nac guidzliu, guielmban, guielgut, ladznia to now, niicle ncuaane no niinaw, ncuaane naragaa ziaada, chen tow; haxta Pabl, Apol, Pedr, ib laa no zo nu par dziuun no xyudar to. ²³ Grëse to

tibaque xnëz men ne no to, lëe men co nac Jesús, men ne pxeel Dios.

4

Zha rzac zha ne rienee xtiidz Dios

¹ Golguien sca tib moz winse nac no lo Jesús, laa me bzoo no noseed no miech xtiidz me mine gocnand miech padzeela. ² Ni zha ne gon znu run tib dziin, ible none nguzobdiidz gac zho lo men ne rnabey zho. ³ Gacxe waa tel zha rzac to naa, tel zha rza-cгаа grëraa miech naa, peet zienied guic naa. Haxta ni mine rzaac naa nac naa, peet nonda, rieguiald guiep naa znutaa znutaa nac mine noyun naa. ⁴ Nli peet dzeb nonied guic naa guiep naa nend cho pe glisqui lo naa, per led mincod gni naa ni tib dol rapdraa naa; loxaque Dios nan zha nac naa, me gneedz mine gagual naa. ⁵ Gacxe waa, gunde to ne glole to guiab dien cho nac zha ne wenraa; sac min co gun men ne rnabey ne gal dze ne laa me guiaad. Gal dze co, me cxobnen ganle zhapaa nac ne tib tib ne, haxta grë mine rza guic ne, mine no zdoo ne, laaw glu me; grë no ne nodziun no xtsiin me, dze co laa me gneedz mine riogualpaa no tib tib no.

⁶ Bets, bzian, niina ne nozet naa no lo to nu grop no Apol, quiayun nond naa naa, niicle nosanwindгаа naa me. Ga sca ganle golwi, zeena cseed to gban to zigne nac Xtiidz Dios, tsoode to lozhd dien cho non, chogaa nond. ⁷ Stiba, ¿cho nadien në lo to ne gunnon to to? Grë ncuaane rap to, grë ncuaane rac to, ¿niacxe led Diosd bneedza lo to? Dios name bneedza lo to, ¿pe nac dzigo no to rlozhd gacniats to zig nac zeene por xquielliger to bgaa tow? ⁸ Niats rac to, masaque rzac to grële zhiwseed Dios nan to, gaxle zo to lo me, haxta rzac to tole nac zha rnabey, paat rquiindraa no. Wenzhe tebaa nligaa zha rnabeyle nac to, zeena haxta ye no zley no.

⁹ No hor rzaac naa, diunavez win psan Dios no ne nac no zha ne nonee xtiidz me, loxaque lo no rwi miech, rwi grë anjl dien zha rac no; zig run miech rieso zho lo zha ne rnabey zho ret. ¹⁰ Ne znu quiadziun no xtsiin Jesús, masaque zha yozh nac no lo miech, laa to gon xquizh me zha rien nac to lo zho. Zha nsis, zha zozhidzle rzoob

zho no, laa to zha ndaan, zha ndip nac to. Masaque zha nziuu nac to lo zho, laa no rzac zho ni gand zho lo no. ¹¹ Haxta lo nadze blactaa zaatne retgbin no, zaatne retnis no, per ni lidz no, per ni lar ne dziaacw no guiend, rdib rdzaag no rdziun no dziin rdziniaa no ncuaane rquiin no. ¹² Ni rlozh ga rreeque miech rsacsi zho no. Rreequia zha ne rdzibdee no, per rdzi-uund no gdzibdeequ no zho, sinque mazd rnab no lo Dios gunlay me zho; zha ne rtsidil no, rdziunscasd no zho. ¹³ Rreequia zha ne në rnee lo no, per no, diidz wen rtsire no lo zho. Masaque rzac miech no, zig rzac zho grë ncuaane paat rquiindraa, zig rzac zho grë ncuaane nole lo guizh.

¹⁴ Laa naa rzet grë min rii lo to, per nacda par gunctoladz naa to, sinque laa naa rzeta zeena guien to zaacse gac to, golguien ganle rleyne naa to, rzaac naa to zig tib xpëed naa. ¹⁵ Niicle niaca mine ndal zha ne guidseed to i, niicxe guiaad nzian mil zho waa, per led grëd zho tsoxcopaa to zig rioxco tib dad xpëed zho. Zigne rne naa ga, xpëed naa nac to, rreequia pxoz to nac naa, sac gon naa glo bialne xtiidz Dios lo to, laa to bzëeb xnëz Jesús. ¹⁶ Goltsocoo sca, golban zigne mban naa. ¹⁷ Ni ible mincopaa gon laa naa rxel Timoté ziaad lo to i, lëe stib xpëed naa i, ne nligaa rleyne naa me, tib zha nguzobdiidz nac me lo men ne rnabey me. Laa me ziaad i, me gzodiidz lo to ganle zigne rseed naa miech grëse zaatne ziya-teed naa, scagaa noxco naa mban naaw.

¹⁸ Rien naa no bla niats ne nac to i, rzac nlidraa guial naa lo to i stib. ¹⁹ Gacnan zho ganle, gneedzse Dios diidz, ible laa naa none guialniob, dzigo bii zdian ne dien pe nli na nacie zho xpoder Dios, te loxaque rnee zho ye. ²⁰ Sac gon zha ne ngab xnëz Dios, grë mine rnee zho none glu nacie zho xpoder me, nacda loxaque diidzse. ²¹ ¿To nadien zha racladz to? ¿Pe rdziladz to guial naa guialgactox naa lo to i, te mazd wen ye niapse diidz ndooladz, diidz nex guialne naa lo to?

5

Zha ne runctal xtol

¹ Zëeb diidz gon, lad to i no tib zha bgui ne quiayun tib dol nroob; per ni grëraa miech ne gard gliladz Xtiidz Dios rund min co. Bin naa lëëque xniaa pchoob zho quiangob zho. ² ;Yo na ne rzac to grële zhiwseed Dios nan to, gaxle zo to lo me! ;Laa ne ctoladz to, laa ne tso to guielnë, cuee to zha qui lad to, lel no to rlozhd gacniats to!

³ Niicle ne zozhaald naa lo to i, per zeene bin naaw tibaque nonie guic naa zha gaca. Nu laa naa gni lo to ganle zha rieguial gac zha co: ⁴ Grë to ne nac to zha ne ngab lo Jesús, rnab naa lo to ycaalsa to zigne rnabey me. Ndionle ne ganle zeene laa to ycaalsa, ga zo Jesús lo to, scagaa naa, golgun cuent lo to i zo naa. ⁵ Squi ndxie to grë to, golzonëz zha co, golcueegazh zho lo to i, tsie zho tsietsobe zho ladznia mendox, ga tednë xcuerp zho guien zho ganle pe noyun zho; nand new togo zzhixcuaa zho stib, zeena ycaania Jesús zho gal dze ne laa me gbiire guiaad.

⁶ ;Xlëse gon squitaa racniats to rzac to zha mbe nac to, ni randze to zha ne quiayun dolldox qui! ;Pe riende to telne glisquide to mine quiayun zho, ib tedsod zrieequiaraa zha ne squi gunctal xtol! ⁷ Zha ne squi nac, masaque nac zho zig nac grë guielguidzdox ne znuse rded; golcueegazh zho sca, zeena ine mbe gac to nëz lo Dios, tete to guielguidz qui. Golguien ganle laa Jesús psanmbele ne, mincopaa gut me, goc me gon nëz lo Dios zig carner yeen ne rgogon zho lo me lni Pascw. ⁸ Golgotsaa gban ne zigne racladz Dios, grëse tel zha wban ne glo, grëse guielyozh, grëse guielntseeb ne bdziun ne, none csaan new grësew. Ndzinli sca golgac, goltsienal mine nac diidzli; none mbe gac to nëz lo Dios, zig quietxtil ne notsd ncobi.

⁹ Lo stib guits ne pxel naa lo to ga, laa naa psole diidz lo to ganle ctsieelsade to grë miech yozh ne ndzinlid mban. ¹⁰ Zeene sca pso naa diidz lo to, guiabde to togo naca parne ctsieelsadraa to grë zha ne gard gliladz Xtiidz Dios, zha ne rquiangob zha ne led tsieeld, grë zha ne zienal lox- aque gunlo dimi, grë zha ne run guielgbaan, grëgaa zha ne rnalo grë mdio. Led zha coda, sac laga mban ne lo guidzliu rii, ible zanlsa ne grë ne zho. ¹¹ Sinqe zha ne

bzet naa ga ctsieelsade to, nac zha ne nac- cle diidz xnëz Dios no zho, ni noque zho quiayunctal zho xtol zho, no zho rquiangob zha ne led tsieeld zho, no zho zienal lox- aque gunlo dimi, zhiga zhiga laa ne gleynie zho Dios lel zhaa ncuaane rleynieraa zho, no zho rquiadiidzguizh samiech, no zho rzudz, nogaa zho run guielgbaan. Ne nligaa zha ne sca nac, per ni tib guielwagw gown- iede to zho. ¹² Tel grëraa zha ne gard gliladz Xtiidz Diosa, led ned riogual glisqui mine quiayun zho, Dios nac men ne gunquizh zhow. ¹³ Sangue zha ne nacgrë ne, zeene noyun zho tib ncuaane ndzinlid, ib rieguial glisqui new lo zho. Gacxe nana sca, zha ne squi quiayunctal xtol i, golcueegazh zho lad to, ni spalal gandzedraa to zho.

6

Zha none gac guielwxtis

¹ Laa to gocnanle ganle, to rieguial glisqui tel pe nac ncuaane nonguield run zha ne nacgrë to. Lëda i gon run to, zeene pe tib dil rap to, lëëled zie to lo wxtis laa ne gbig to lo zha ne nacgrë to, zha csiooglo lo xtil to. ² ;Niacxe nande to zha ne ngab xnëz Dios, zha co cobey zha nac xtol grëraa miech zeene gal dze ne laa Dios gnabeya? ;Pe nac dzigo grieelod tose csiooglo lo tel pe dil win ne rap to? ³ Haxta grë anjl name, ne gon cobey pe nac grë mine quiayun zho. Gacxe waa, grë dil ne rac lo guielmban rii, ne riogual cobey zha guiooglo low. ⁴ Sca gon gun to, led node to, rnadse pew laa to ziele lo wxtis. ⁵ ;Pe ni tib lë guielto guiend lo to? Lo grë to, ;niacxe goon guiend zha ne grieeo gnee lo to, cuëz lo xtil to? ⁶ Nazdpaa rdziladz to dil, ;pe i na lëëque zha ne nacgrë to quiadilnie to, ni rlozh ga zieque to zienie to xtil to lo zha ne rliladzd Dios? ⁷ Pe riende to tib guieltdoxle i squi no to lëëque to quiadilisa. Mazd golxecw tel cho pe run to.

⁸ Mazdraa gon mbana squi no to rsacsi to miech, ni haxta zha ne nacgrë to rsacsi to. ⁹ Nanle to ganle zha ne squi run guielntseeb, grieelod gdzin zho zaatne rnabey Dios. Tsieniewguite guic to sca. Golsoladz ganle grëse zha ne run guielyozh: zig nac zha ne rquiangob zha ne led tsieeld zho,

zig nac zha ne rquiangob zha ne nole tsiel,
 zig nac zha ne nac mrabh,
 zig nac zha ne rnalo grē mdio laa ne gnalo
 zho Dios,
 ni tib zho grieelod gdziñ zaatne rnabey
 Dios. ¹⁰ Scaque:
 zha ne nac ngbaan,
 zha ne zienie guic loxaque dien zha gunlo
 dimi,
 zha ne nac ngonziu,
 zha ne rzhixcuaa diidzguizh,
 zha ne rungüet miech par cuan zho zho;
 ni tib zho ygaad guielnzaac co. ¹¹ Blalaa to
 bio lo grē dol co glo, sangue niina miech
 mbele nac to nēz lo Dios, laa Jesús ni
 Espíritu Sant psanle to zig tib zha ne peet
 xtold, laa me psanwenle to nēz lo Dios.

Gunctald zho xtol zho

¹² Nli ndal ncuaane zac gun ne, gunctalda
 xtol ne, niicle choot rcaadgaaw, per led
 grēda rquiin. Tel naa, niicle no ncuaane
 zrieelo gun naa, per rund naaw; sac
 racladz naa guien naaw, lozh ga lēew
 gnabey naa. ¹³ Zēeb diidz rnee zho:
 “Laa guielwagw biaan par gow miecha,
 scagaa zdoo zho laaw biaan par tsodzēw
 guielwagw.” Nli scaw, per guiabd ne togo
 por min co lega gowcho ne. Pa rquiin
 ne lega tedso gow ne, sac gon zigtaa zdoo
 new, zigtagaa guielwagwa, zdziñ dze ne
 gnitlo Diosa. Guielwagw ga na, sangue grē
 guielyozh nerun miech rquiangob zho zha
 ne led tsiel zho, biaan ne par dziuun
 ne min co, sinque laa ne biaan par gban
 ne zigne rdziladz Dios, sac me rnabey ne.
¹⁴ Tel new nitlod ne, sac gon zigne bleeban
 Dios Jesús con poder ne rap me, scaque
 zbeeban me ne zeene laa dze co gdziñ.

¹⁵ Golgacnan ganle, rriequia lēē tiblē
 xcuerp Jesús nu gon nac ne tib tib ne. Nana,
 ¿pe nonguiela ga dzigo gdzieel tib lē xcuerp
 me ga xcuerp tib wnaa ro nēz? ¡Nonguiel
 da gon! ¹⁶ Sac gon zha ne raanie tib wnaa
 ro nēz, rriequia tibaque rac zho ga grop
 zho wnaa co. Rnee lo Xtiidz Dios, par me:
 “Zeene laa mguí racgrop tib wnaa, tibaque
 miech rac zho ga grop zho.” ¹⁷ Scagaa zha
 ne rzēeb xnēz Jesús, tibaque rac zho grop
 zho me, zhiEspíritu me racnie zho.

¹⁸ Gacxe waa, gunde to guielyozh yquian-
 gob to zha ne led tsielde to. Lo grē
 dol ne no, min riise nac mine xcuerppaa
 miech rguítne zho. Sac gon zha ne run
 guielyozh co, masaque rsanbeed zho zho
 ga. ¹⁹ Golguien ganle, zha ne nole xnēz
 Dios, masaque zha nac zig tib yadoo zaatne
 rbēz Espíritu Sant, Espíritu ne rdeed Dios
 rbannie zho. Led nedraa rnabey xcuerp
 ne, ²⁰ Diosle rnabeya, sac gon bzhiile me
 ne ni nroob gocnon ne lo me. Gacxe waa,
 zigtaa xcuerp new, zigtaa xpensar new,
 gotsaa yquiin new par cxobnen ne ganle pa
 lotaa men nroob nac me.

7

Rtsire Pabl lo zhiwnabdiidz zho

¹ Lo guits ne pxeel to lo naa, nzian
 ncuaane rnabdiidz to, nu ganle laa naa ct-
 sire lo wnabdiidz co: nli wena, telne niaca
 mine grieelow ctsieelnia ne. ² Per parne
 tsod pe yquiaaqui cho gun guielyozh, tsonie
 zho zha ne led tsiel zho, mazd wena zig-
 taamguiw, zigtaa wnaaw ctsieelnia zho,
 tib tib zho gbanniese zho tsiel zho zigne
 rieguiala.

³ Zha ne ptsieelniale, zig nac mguí none
 gnee zho lo tsiel zho zeene racladz me,
 scaquegaa wnaa zeene racladz tsiel zho
 gnee lo zho none siguiel zho. ⁴ Sac gon
 wnaa ne rtsieelnia, led zhadraa rnabey
 xcuerp zho, sinque tsiel-le zho rnabeya;
 scaquegaa mguí zeene laa zho rtsieelnia,
 tsiel-le zho rnabey xcuerp zho. ⁵ Golguien
 sca, niicle mguíw niicle wnaaw nodne yca
 zho xcuerp zho lo tsiel zho. Laa telne
 rzacgaa zho none yquiind zho tsiel zho tib
 blalaa dze, sac rquiablaz zho gzodiidznie
 zho Dios, wena totsaque guiaan zhow diidz
 grop zho. Per zigne ted ga, gbiireque gnee
 zho lo tsiel zho, sac gon zha ne grieelod
 cxcw, nend ccheep mendox zho gun zho
 guielyozh.

⁶ Ne znu rne naa lo to, guiabde to nagon
 togo rne naa nopaa ctsieelnia to. ⁷ Tel
 naa, rzac naa wena tebaa grēse to znu
 ctsieelnia, zigne nac naa; per na ncuaane
 gacd ga, sacne zhaase zhaase nac ne tib
 tib ne. No zho pso Dios ctsieelnia, nogaa
 zho pso me ctsieelnia, per rley zho mban

zho zigne nac zho. ⁸ Zig nac grë zha ne bii tib, grëgaa zha ne gutle tsieel, wena tebaa grieelo scase guiaan zho, ⁹ per telne rien zho lëbd xcuerp zho, dzigo mazd ctsieelnia zho. Mazd wena ctsieelnia zho, lëdle so zho tib zho ni tel rec rdzu zho.

¹⁰ Sanguë zha ne ptsieelniale, laa naa rso diidz lo zho csaand zho tsieel zho, ni nacda xtidz naa, sinque ible sca rnabey Dios. ¹¹ Laa tel zha ne guiaabgaa csaan zho tsieel zho, zaca, per lëëraasi grieelodraa gbiire ctsieelnia zho, mazd mine naca telne zrieelow ycatsieel zho stib, o guiaangaa zho tipse zho.

¹² Nu na ganle laa naa gnegaa chop lan xtidz naa lo zha ne led yed tsieel riladz Xtiidz Dios; tib diidzse naca gni naaw, nacda mine rnabeypaa Dios. Zha bgui ne mbannie tib wnaa ne riladz Xtiidz Dios, per telne rio guic wnaa gbannie wnaa zho, nodne csaan zho wnaa. ¹³ Scaquegaa wnaa ne mbannie tib mgui ne riladz Xtiidz Dios, nod csaan zho mgui co telne riopaa guic mgui gbannie mgui zho. ¹⁴ Zigtaa mguiw, zigtagaa wnaaw, zha ne sca mbannie tib zha ne riladzle xtiidz Dios, ye zho runlay Dios ga, nenda haxta zio dze ne ye zho gliladz xtiidz me. Sac telne ctso zho, laa ne gbigraa xpëed zho lo Dios, lel znu sozit mëed. ¹⁵ Nana, telne zhalgaa zha ne riladz Xtiidz Dios ga, rnab csaanlsa zho, peet nacda maase ctso zho, nod pe nacne gzoobguicpaa tsieel zho lo zho cuëz zho. Sac gon zha ne riladzle Xtiidz Dios, laa me bredz zho parne zaacse gban zho, bredzd me zho par tsodil zho; ¹⁶ stiba, nand zho dien pe zdziñ dze ne gliladz tsieel zho Xtiidz Dios.

¹⁷ Mine naca tib tib to goitsoxco gun to mine rdziladz Dios. Zigtaa zha ne pso me ctsieelnia, zigtagaa zha ne pso me scase guiaan, sca none gac to; scagaa zha ne ncaatsieel-le zeene riladz zho xtiidz me, none sca guiaan zho niicle telne riladz tsieel zho xtiidz me. Grëse zha ne ngab lo me, diidz rii rso naa lo zho. ¹⁸ Zig nac grë zha ne nole bey xcuerp zeene laa zho rzëeb xnëz me, sca no zho bey co gund zho ne yqueets zhow. Zha ne na nodgaa bey co zeene rzëeb zho xnëz me, scaque nod pe nacne tsopaa zho bey co. ¹⁹ Mine mazdraa

non lo me, gban zho zigne rdziladz me, guiendraa ne dien cho no bey, chogaa nod.

²⁰ Zigne rneque naa ga, grëse zha ne rzëeb xnëz Dios, tel zha nac zho zeene laa me bredz zho, scase none guiaan zho. ²¹ Zig nac zha ne nac ngundziin lo ben, peet tsienied guic zho guiab zho dien zha grieë zho ladznia zha ne rnabey zho; per telne gdeeda diidz, zac tsoxco zho dien zha grieë zho lo zha co. ²² Zha ne sca nac ngundziin lo ben zeene bzëeb zho xnëz Dios, guien zho ganle rriequia zonlaale zho, sac gon laa Jesús psilaale zho lo grëtaa dol ne bio zho. Zha ne nacdgaa ngundziin lo ben zeene bzëeb zho xnëz Dios, guien zho ganle tib ngundziinle nac zho lo Jesús niina, me rnabey zho. ²³ Golguien ganle, grëse to laa Dios bzhiile to ni nroob gocnon to, gacxe waa mele rnabey to; ni togaa, lo me none gun to dziin, gdeete to diidz lega gnabey miech to. ²⁴ Sca nasca gon bets gaca, tib tib to zigne nacse to zeene bzëeb to xnëz Dios scase no gban to, ine gleynie to me.

²⁵ Stib wnabdiidz ne run to ga dien zha gac zha ne gard ctsieelnia, gneli naa lo to ganle, guien tib xley Dios mine gnabeypaa dien zha gac zho. Per golquiaadiag mine gne naa nu ganle zha rzaac naa, nanle to ganle, zha ne znu rquia zdoo Dios rbedz me, mine rquiin min co rnee zho. ²⁶ Grë ne ne nac ne zha ne riladz Xtiidz Dios len dze rii, nligaa ngañ nac lo xquielmban ne, gane zoot naa wena zha ne sca gard ctsieelnia, maase guiaantib zho. ²⁷ Zha bgui ne na ptsieelnialegaa, grieelod gni naa guiaantib zho; sca mbannie zho tsieel zho; per tel zha ne gard ctsieelniaw, mazd sobd guic zho ctsieelnia zho. ²⁸ Zha ne racladzpagaa ctsieelnia, zigtaa mguiw zigtaa wnaaw, led dold ga gun zho telne laa zho ctsieelnia; per gacnan zho ganle, zeene laa zho pcatsieelle, ib tedsod nroob guielne ne gan zho por grë mine noyac len dze rii.

²⁹ Mine none guien to: zhisle nac dze ne so ne lo guidzliu rii, led nroob nac ngbidz ne grieelo dziuun ne xtsiin Dios; gacxe waa, zha ne nole tsieel, mazd sac zho zho zig tib zha ne guien tsieel. ³⁰ Zha ne quianie dimiw, zha ne no guielbleya, zha ne nogaa guielnëw, gdeete zho diidz

yca grë ncuiaan co lo zho par gun zho xtsiin me. ³¹ Zha ne bienle runfalte grëtaa ncuiaane rquiin zho, gdeete zho diidz ctse grë ncuiaan co lo zho, sac zigtaa guidzliuw, zigtaa grë ncuiaane no low, zdziñ dze ne nitlow.

³² Mine racladz naa peet zhgab ctsed lo to. Golwi ganle, zha bgui ne tib, tiblque zienie guic zho run zho mine rdziladz Dios, mine nac xtsiin me. ³³ Laa zha ne no tsiel, grielodraa sca gac zho, sac laa guic zho zienie zha gbannie zho tsiel zho, zha grielo gun zho mine rdziladz me, min co rionieraa guic zho. ³⁴ Scaque grë men wnaa, zha ne tib, rioxcoraa zho run zho mine rdziladz Dios, dib nase zho rbeeladz zho zho lo xtsiin me. Laa zha ne ptsieelniale, xco ne dien zha gbannie zho tsiel zho, dien zha grielo gun zho mine rdziladz tsiel zho, xco co rioraa zho.

³⁵ Laa naa rne min rii lo to, per guiabde to togo rca naa ctsieelnia to, sinque laaw rne naa parne guien to zha gun to, zeena grielo zaacse gac to gun to mine rnabey Dios. ³⁶ Zha ne quianie wnaa nguieg, telne rzac zho nonguielda ga scase ted lo xquielnguieg xpëed zho, sinque none ctsieelnia zho, peet nacda, led dold ga ctsieelnia zho. ³⁷ Laa telne rzacgaa zho, wenraaw ctsieelnia xpëdwanaa zho, ible scale pquiabladz zho guiaan mëed, wenaque ga telne sca rzac zho. ³⁸ Wen ga gun zha ne sca gdeed diidz ctsieelnia xpëdwanaa, per mazdraa wen ga gun zha ne rzac mazd ctsieelnia xpëed.

³⁹ Nana, wnaa ne retgaa tsiel, nli zeene mban tsiel zho rnabey ley ne tsielse zho gbannie zho; per zeene laa tsiel zho ret, zac ctsieelnia zho tel cho stib mgui ne racladz zho, totsaque zha ne noque xnëz Diosa. ⁴⁰ Per tel naa, rzac naa mazdraa wen gban zho telne tsodraa guic zho ctsieelnia zho stib; sca nagon rzaac naa wena, ni led xtiidzde naaw sac rien naa led tibd naa, Espiritu Sant nacie naa.

8

Bëel ne rgogon zho lo mdio

¹ Stib wnaabdiidz ne run to ga, dien zha nac guielwagw ne rgogon zho lo grë mdio, pe zrieelo gdiowa, te grieloda ye. Zootle

na grële to nan min co; per no hor zeene squi rzac ne grëlew nan ne, lel racniats ne, laa ne gacndooladz ne gnee ne lo grë zha ne nacgrë ne dien zha gun zho parne tsoguicraa zho Xtiidz Dios. ² Zha ne rzac grëlew rac zho, ga rlu zho ganle peet riend zho. ³ Tel Dios runbey me tib tib miech, nanpaa me cho nac zha ne rleynie me.

⁴ Zhapaa dzigo gaca, ÷pe wena dioow ne xpëel grë ma ne rgogon zho lo mdio ga, te wenda ye? Ndionle ne ganle grë mdio ne riegan miech led Diosd ga, tibaque men ne nac Dios no. ⁵ No zho rzac nziandox Dios, nziandox men rnabey no, no me no gbaa, nogaa me no lo guidzliu, ⁶ sangue ne ndion ne ganle tibaque Dios no, lëe men co nac Pxoz ne, me psan grëtaa ncuiaane no, me psan ne parne dziuunbey ne me. Ni scaquegaa, tibaque men ne rnabey ne, lëe me ga nac Jesús, me bzaa grëtaa ncuiaane no, me nac men ne rneedz xquielmban ne. ⁷ Per no zha ne rliladzle Xtiidz Dios, bii gardaque guien zho ne tibaque Dios no. Tibaque rzac zho mban mdio, gane zeene rquiin zho bëel ne rgogon zho lo mdio racchop guic zho, lëeque zha runctal xtol zho ga sca run zho. ⁸ Golguien sca, tel Dios rwid me dien cho pe row. Guiabd ne togo por gow ne o gowdgaa ne bëel co laa ne guianzuiu lo me.

⁹ Laa to nanle nasca, peet nacda yquiin to guielwagw co, per scagaa golcobey adel min co yquiaaqui gunctal to xtol tib zha ne squi bii racchop guic. ¹⁰ Sac gon, nenda tibliladz to zob to zaatne riegan grë miech mdio noquiin to bëel co, ni gan tib zha ne bii racchop guica. Zeene gan zho to, nend yeque zho gbig gow zhow, per zeene lozh ga tibaque laa guic zho tsienie lëda ga been zho. ¹¹ Zha ne sca gun, niicle ne nli rien zho peet nacd ncuiaane noyun zho ga, per por zha laa zha co gunctal xtol. Gunscade to, golguien ganle ye zho ga psilaa Jesús zeene gut me lo cruz; ¹² gacxe waa, telne sca gun to por to yquiaaqui gun zho tib ncuiaane rzac zho nonguield, lole Jesús ga quiaayun to falt. ¹³ Min co nagon, tel naa mazd maase gowd naa bëel co, telne por min co yquiaaqui gunctal naa xtol tib zha ne nole xnëz Dios; sac lëda ga gun naa gac

naa zig tib quie ne griel ni zho.

9

Mine rieguial zha ne run xtsiin Dios

¹ Zigne nagon zac gun to grë ncuane wen ne racladz to, scaquegaa naa, zac gnab naa ncuane wen ne racladz naa. Tel naa gonlo naa Jesús men ne rnabey ne, Dioszhal bzo naa pxeel me naa none naa Xtiidz me. Ne squi ptsëe Dios lo xquielmban to zeene bialseed naa to, i rlu ganle me nacie naa.

² No zha ne rzac nlid Dios pxeel naa, sangue to nanwen to ganle me pxeel naa, sac gonlo to mine ben naa, mine blu naa; ni scagaa niina, lo xquielmban to i rlu ganle ne nli xtsiin me quiayun naa. ³ Grë zha ne sca rzac nlid Dios pxeel naa, rzac zho peet raguiald naa, gacnan zho ganle: ⁴ ¡Raguial naaw gon! Ni grëragaa zha ne rdzi-uungza no xtsiin Dios, rioguial no gneedz to ncuane yquiiin no, gneedz to zaatne gbiaaz no. ⁵ Tel naa, haxta raguial yquianie naa tib men wnaa ne gac tseel naa, ine sënie naa me zigne run grëraa zha ne rdzi-uungza no dziin rii, zig nac Pedr, zig nacgaa grë zha bets men ne rnabey ne. ⁶ ¿Te lox-aque grop no Bernabé naye znu zhaaque no dziuun no stib dziin, par gdziniaa no ncuane dioow no? ⁷ Golgan ganle, zig nac zha ne rzëeb lo xtsiin menguiib, ¿niacxe zhaa lo dziin ne rdziniaa zho ncuane row zho rio zho lo xtsiin menguiib? ¿Zha ne rangaa, niacxe rieguiald zho yquiiin zho ncuane rac zaatne ran zho? ¿Zha ne na rangaa ma, niacxe rieguiald zho yquiiin zho ma zigne racladz zho?

⁸ Guiabde to togo bod guicse naa riab mine rne naa nu, golgan ganle haxta lo ley ne psan Moisés ⁹ no tib zaatne rnee: “Zeene gunçun to xcon to dziin gzëeni ma mzion zhobxtil gacmbew, code to guiox ro ma, golsaan gow ma mine ygaa ro ma.” Golwi ganle zha rnee Dios, nana pe nan to ngonse rquia zdoo me. ¹⁰ Lëda gon, grëse ne rquia zdoo me ne. Ga rlu me ganle, zha ne run xtsiin me, ible rieguial zho ycaa zho mine non xtsiin zho. Zig nacaque guielgon, zigtaa zha ne rana, zigtagaa zha ne runmbe grë guielnzaac co, ible rieguial zho yquiiin zhow. ¹¹ Tel no, rriequia nazho tib gon i

bdziuun no biadseed no to Xtiidz Dios, ¿niacxe rioguiald no dzigo gneedz to ncuane yquiiin no?

¹² Blalaa zha ne nale griin riaadted lo to i, rnabey zho to rdeed to ncuane rquiiin zho, ¿pe lel no dzigo rioguiald gnaba lo to? Mazdraa gon rioguial no gnab now, per haxta lo nadze gard dziuun no min co, notaa nan zha rdziniaa no ncuane rdioow no; zeena guiaand zdoo to, lozh ga laa to csaan mine nac Xtiidz Dios. ¹³ Led nanle to ganle, grë zha ne run dziin len xyadoo Dios, psan me diidz grë ncuane nac gon, ga xen zho pe yquiiin zho, zig nac zha ne run dziin zaatne nac lo pcoog, lo ncuane rielogon miech ga, ga rdioob ncuane row zho. ¹⁴ Ni scaquegaa psan Jesús diidz, zha ne cseed miech Xtiidz me, ib none lo dziin co gdziniaa zho pe yquiiin zho. ¹⁵ Per tel naa gon, wlalaa peet gard gnab naa lo miech.

Laa naa rzet min rii lo to, per guiabde to togo run naaw parne csilo to pe gneedz to lo naa. Ib zanaald naa min co, sac rley naa znu quiayazhd naa quiayun naa xtsiin Jesús, mazd maase guetgbin naa, lëdle ctiche zho guielbley rii lo naa. ¹⁶ Niicle ne znu quiayazhd naa quiayun naa dziin rii, per ni lalnu racniatsd naa, sacne ible laa Dios bzo naa par gne naa Xtiidz me lo miech; ni, jprobsaxe naa telne gned naaw! ¹⁷ Noyund naaw par dien pe premio ygaa naa, sac zig rne naa ga Dios bzo naa, me rnabey naa quiayun naaw, masaque nacse naa zig tib ngundziin. ¹⁸ Par naa, lëele premio nu nac guielbley rii ne znu liga quiaseed naa miech Xtiidz Dios, rnabd naa gneedzpaazho ncuane yquiiin naa niicle ne raguial naa gnab naaw.

Tsoxco zho ygaa zho premio

¹⁹ Stiba mazdragaa wena, znu choot noneedzd ncuane yquiiin naa, sac sca grielod cho gnabey naa; per niicle ne nagon choot rnabeyd naa, zhaal naa rac naa zig tib ngundziin lo grëse miech, parne gdeeda diidz tso guic zho sëeb zho xnëz Jesús. ²⁰ Gacxe waa zeene no naa lo grë zha Israel, rac naa zigne rac zho, zeena tso guic zho gliladz zho cho nac Jesús. Zeene nogaa naa lo grë zha ne zienal xley zha Israel, niicle ne rnalodraa naa ley, per

run naa grë ley ne zienal zho, zeena sca grieelo yquiablazd zho sëeb zho xnëz Jesús. ²¹ Scaquegaa zeene no naa lo grë zha ne runbeyd ley co, rioxco naa rac naa zig tib zha ne runbeyda; per guiabd ne togo haxta grë ncuaane rleyniedraa Dios run naa. Laa naa run min co, zeena ye zho sëeb xnëz Jesús. ²² Grë zha ne pense quiayacnan zha nac Xtiidz Dios, zeene no naa lo zho, rund naa gne naa grë ncuaane gard guien zho zha nac, rund naa csañwin naa zho, sac mine rioxco naa lozh gliladz zho cho nac Dios. Tib tib miech, rguib naa rac naa zigne rac zho, parne grieelo gzodiidz naa lo zho cho nac Jesús, zeena gacnan zho zha sëeb zho xnëz Dios. ²³ Laa naa run min co, parne gdeeda diidz gnee naa Xtiidz Dios grëse lo miech, ni scagaa, gley naa gan naa ye zho yгаа lo guielndzon ne zhobnee lo Xtiidz Dios.

²⁴ Nanle to ganle zha rzac zha ne rie tib lo corr, nzian zho nac zha ne rie per tibaque zha ne run gan, zha co rcaa tib premio. Golgun cuent nasca tib lo corr i no to, grëse to goltsoxco xoon to zeena grëse to yгаа tib premio. ²⁵ Grë zha ne sca rio tib lo wguil, par grieelo gun zho gan rioxco zho ran zho xcuerp zho, rund zho ncuaane csiaab xfuers zho. Nroob cuidad ne rap zho zho par gun zho gan tib coron guizh nguia ne znuse rgool. Scase nac premio ne rgaa zho, sangue ne gon, laa ne noxco yгаа ne tib premio ne gdzind dze nitlo. ²⁶ Gacxe waa, tel naa tibaque noxco naa dien zha xoonraa naa. Nanpaa naa pa gdzin naa, nacd naa zig zha ne riend dien pa gdzin, zha ne lega rquiaagaa puñet, rdeete zhow zaatne no yгааaw. ²⁷ Ni lalnu rdete naa diidz gac mine racladztaa xcuerp naa, tibaque rnabey naaw parne guiena ncuaane nonguiel min co none guna, led gunda ncuaane racladztaaw. Laa naa run min co zeena gun naa gan, sac gon, guieltdox ga grieequia naa znu no naa none naa lo miech zha gun zho, ni tel lozh ga naapaze biaan bend naa gan.

10

Nodne gleynie miech mdio

¹ Bets, bzian, golsoladz ganle zha bzhaac grë pxozgol ne zha ne sca bzënie Moisés

ga. Pxeel Dios tib xcow been ncal zaatne zieetaa zho, ni pteed me zho lo Nisdoo Nizhnie. ² Zigtaa lo xcow cow, zigtaa lo nisdoo cow, masaque rriequia lo co brobnis zho, parne tibaque niac zho niacnie zho Moisés.

³ Grëse zho gon milagr nroob ne been Dios, bnabey me bliaal quietxtil zhan gbaa bdeed me dow zho, ⁴ beencta me nis tib cho quie bdeed me go zho no zho dan bidz co. Lëele Jesús ga bdeed nis co go zho. Lo zho ga zo me, rriequia me ga nac quie ne bda nis go zho, sac mese rzhixcuaa lo grëtaa xliaadz miech. ⁵ Niicle scataa gon Dios zho, per led grëd zho bioxco nion xtiidz me, nacne ndal zho bnitlo bioliuse zho dan co. ⁶ Gase na ganle gotsaa gwi ne zha bzhaac zho, zeena gzooblazd ne dziuun ne grë ncuaane ndzinlid ne been zho. ⁷ Golguien gleyniede to mdio, zigne been zho. Rnee lo Xtiidz Dios: “Blozhse dow zho, go zho, laa zho psilo biee lo zhindio zho.”

⁸ Gotsaa gwi ne ganle, pe guielne ne bгаа zho zeene briequia bla zho lega bionie wnaa, tib dzeque bnabey Dios gut galptson mil zho. ¡Ni lalnu tsod guic to gun to min co! ⁹ Ib gunglëede to Dios, sac zha, zeene benngulëe zho me, bnabey me briequia grë meel pquiaa maw zho, ndal zho gut. ¹⁰ Niicle glisquidгаа to tel pe nac mine quiayun me, sac tel zha, sca been palal zho; nacne pxeelaque me anjl ne rnitlo, ndal zho bnitlo anjl co. ¹¹ Sca nagon bzhaac grë pxoz gol ne ga, gotsaa guien ne sca dziuund ne mine been zho, mine been zho ga laaw zhobnee lo Xtiidz Dios parne gacndion new, guien ne zaacse gban ne, ne nac ne miech ne mban len dze rii ne znu ziaadyoble nitlo guidzliu.

¹² Gacxe waa, zha ne rzac mbanpaa zho zigne racladz Dios, none nsin so zho zeena gund zho ncuaane gunctal xtol zho. ¹³ Nli no ncuaane rcheep ne gunctal ne xtol ne, per nacda ncuaane griin rien. Pe zhidaa miech ne zieded lo min co. Tsod mine guiab ne ib lëbd ne griee ne lo. Mine naca none gnalo ne Dios, sac tel me ib csaand me guiab ne tib lo ncuaane glëbd ne griee ne; sca nac xtiidz me, ni mesi gon ctsëed me mine rnee me. Me nac men ne gacnien ne grieelo griee ne low.

¹⁴ Bets, bzian, golguien sca ib none csaan to grë mdio, gnalodraa tow. ¹⁵ Miech nixbini nac to, grë mine rne naa lo to nu, nan to ganle ncuaane rquiina. ¹⁶ Golwi ganle, zeene rdioow ne quietxtil, rdio ne vin, rdziuun ne xtsee ne been Jesús ga, ga rlu tipse nac ne grë ne nacie ne me. ¹⁷ Niicle ne ndal nac ne, per ne tibaque quietxtil ne rdioow ne, min co gane tibaque cuerp nac ne grë ne, ni lëe xcuerp Jesús ga. ¹⁸ Scaque zha Israel, zeene row zho xpëel ma ne riogon lo Dios, ga rlu zho ne nacie zho me.

¹⁹ Zha ne rنالogaa mdio, zeene row zho grë ncuaane riogon lo mdio, scaque tibaque rac zho grë zho mdio. Per guiabde to togo mban mdio, togo mazdragaa nac bëel ne rgogon zho lo mdio. ²⁰ Mine racladz naa guien to, zeene sca run grë miech pe rgogon zho lo grë mdio, lo mendox ga rgogon zhow, led lo Diosda. Golguien sca, ib tsiesëebde to lo grë zha ne quia-ownie mdio, zeena gacniede to mendox. ²¹ Lëdraaw ga gon gun to, tel rlozhse rquiin to xtsee ne psan Jesús diidz ga dziuun ne, ni tsieque to tsieguie to, tsietow to zatne rownie zho mendox. ²² ¡Gunscaade to, gunglëede to Dios! ¡Golguien ganle, lëbd ne dzian ne xquielblëe me!

Zha gun zha ne rliadzle Jesús

²³ Zig rne naa ga: “Nli zac gun ne ncuaane gacladztaa ne, per led grëda nonguiel.” Tel naa, zrieelo gun naa ncuaane gacladztaa naa, per led grëda yquiin par gun naa xyudar grëraa zha bets ne, lozh tsoguic zho Xtiidz Dios; ²⁴ sac gon, ib none dzioxco ne grëraa zha ne nacgrë ne. ²⁵ Zig nac grë bëel ne rdo lo lgui, zac gow tow, ib gunde to gnabdiidz to dien zha naca, sac gon nend bëel ne biogon lo mdiow, dzigo laa dzeb co tsonie guic to. ²⁶ Golguien ganle, Dios psan guidzliu, scagaa grëtaa ncuaane no low chen me naca.

²⁷ Zeene tel zha tsiegaa to tib wagw lidz tib zha ne gard gliladz Jesús, bëel ne gneedztaa zho golgowa, per scaque gnabdiidzde to dien zha naca; zeena peet dzeb tsonied zdoo to. ²⁸ Per telne grieequia tib zha ne gnë bëel ne biogon lo mdiow, gowde tow; zeena csande to zdoo zho. ²⁹ Niicle ne

ndionpaa ne led dold ga gun to gow tow, per zha ne gana ga sadol zdoo zho.

Nana gnë to: “¿Pe nac dzigo por stib zho grielod gun naa mine racladz naa? ³⁰ Tel rded naa xquizh lo Dios zeene pe tib guielwagw ne rquiin naa, ¿pe nac dzigo por mine rzacse stib zho, grielod gow naaw?” ³¹ Golguien ganle, racda por zha cose; sac grëse ncuaane dziuun ne, haxta ncuaane dioow new, ncuaane dio new, none zeene nodziuun new cxobnen ne ganle pa lotaa men nroob nac Dios. ³² Gotsaa guien ne sca ganle dziuund ne ncuaane yquiaaqui csañ ne zdoo stib miech, zigtaa zha Israela, zha stib guiedza, zha ne nolegaa xnëz Diosa. ³³ Tel naa, zanañd naa ncuaane gdziladz naa naase, sinque rioxco naa grëtaa ncuaane run naa, run naaw par gacnie naa grëse miech, zeena grielo tso guic zho gnab zho lo Dios csilaa me zho lo xtol zho.

11

¹ Golwi sca, zigne ran to noxco naa mban naa zigne blu Jesús, scaquegaa to goltsoxco gban to zigne ran to mban naa.

² Bets, bzian, rleynie naa to gon sac tibaque rsoladz to naa, ni rioxco to zienal to grë mine pseed naa to. ³ Per golsoladz ganle: grëse men wnaa, none zha bgui gnabey lo zho, tel zha bgui Jesús rnabey lo zho, zigne rnabey Dios lo me. ⁴ Gacxe waa, tel tib zha bgui yase nozodiidznie zho Dios, quiateedgaa zho xtiidz me, ni zob xombrel zho; xquielto Jesús ga rbee zho. ⁵ Scagaa men wnaa, tel zhoobd bay guic zho ni zo zho nozodiidznie zho Dios, quiateedgaa zho xtiidz me, xquielto mgui ga rbee zho; sac ga rlu zho rond zho mine rnabey mgui. ⁶ Telne racladzdgaa zho gdze lad guic zho, mazd gnabey zho chug guitsguic zho. Laa telne rtoladz zho chuga, rtoladz zho gacruxa, dzigo mazd cxobguic zho xpay zho.

⁷ Grë zha bgui, nod pe nacne gdze lad guic zho, sac choot samiech guidzliu zho rnabeyd lo zho. Zeene bzaa Dios mgui, bzaa me zho zigne nac me, zeena glu zho ganle pa lotaa men non nac me; scagaa wnaa, laa wnaa biaan par glu zho ganle non mgui. ⁸ Gotsaa gwi ne ganle, letxe xcuxtid wnaa waa biaan mgui, sinque

xcuxti mgui brieë bīaa wnaa. ⁹ Stiba, zeene psan̄ Dios wnaa, ib laa me psan̄ zho par gacnie zho mgui. ¹⁰ Gacxe nagon̄ waa ib none gdze lad guic wnaa, zeenā glu gan̄le nguzobdiidz zho lo zha ne rnabey zho; haxta grē anjl̄ ne no gbaa zley zho gan̄ zho min̄ co.

¹¹ Per guiabde to togo peet nond wnaa, golsoladz gan̄le psan̄le Dios diidz zigtaa mguīw, zigtaa wnaaw rquiinsa zho; sac tel̄ne guiend̄ wnaa guiend̄ mgui, tel̄ne guiend̄gaa mgui guiend̄ wnaa. ¹² Gotsaa gwi ne gan̄le, zeene bīaa wnaa cho mgui brieë dzit ne bīaa wnaa, per zeene laa wnaa bīaan̄, haxta lo nadze wnaale rzo mgui; zigtaa mguīw, zigtaa wnaaw Dios psan̄ zho grop zho. ¹³ ¿To nadien̄ zha rzac to? ¿Pe nli nonguielā gdze lad guic wnaa zeene nonab zho lo Dios, te nonguiel̄da ye? ¹⁴ Gol̄wi gan̄le ib no gdze guic wnaa, bīaan̄le zho rroob guits guic zho parne ctsew lad guic zho; ¹⁵ tel̄ zha, haxta rleyne zhow zeene scataa noola, sangue ne nac ne zha bgui, guiel̄tow ga guiool guitsguic ne. ¹⁶ Tel̄ nogaa zha ne rzac led scada, maase gnee zho. Per ible znu gon̄ noseed no miech, ni grēragaa zha ne rliladzle Xtiidz Dios, rien̄ zho ne nli scaw.

Zha none gac xtsee ne psan̄ Jesús

¹⁷ Bets, bzian, ne nligaa rley naa tibaque rsoladz to naa, per bin naa zeene rcaalsa to row to xtsee ne psan̄ Jesús diidz, laa ne gley to ycaalsa to, lel̄ quiayunctal to xtol̄ to. Min̄cosi nagon̄ ni lalnu riod zdoo naaw. ¹⁸ Ziyon naa gzobtaa zeene rcaalsa to, pe na tsiegald̄ til̄diidz to, laa ne tipse gac to lel̄ rlēēlsa to. Ni rgobey naa nli scaw. ¹⁹ Rien̄ naa masaque rzac to ible sca none gac to, parne glupaa cho nac zha ne non xtiidz, zeenā guian̄nzīuu zho lo miech.

²⁰ Led zhixtseedraa Jesús i gon̄ run̄ to. ²¹ Sac ron naa zeene laa to row, masaque lēēlēd rac to row to ncuaneā zienie to, ib rwide to no zha ne rdziñ̄ ga quianied zho nroob ncuaneā gow zho. Squi rzob to rowcho to, haxta rzudz to; laa zha mbanse rac zho grieelod gow zho ncuaneā row to. ²² ¿Mod guiend̄ lidz to, ga sob to gow to, guie to haxta zaatne guiel̄taa to, led node to run̄ctoladz to zha ne squi guiend̄ pe yquiin̄?

I gon̄ rlu to rleyniede to grē zha ne no xnēz Dios. ¡Ni palal gon̄ rdziguiend̄ naa ncuaneā noyun̄ to!

²³ Golsoladz gan̄le zha nac ne laa xtsee rii bīaan̄, Jesús psan̄ diidz gaca, sca gocnan̄ naaw ni scagaa biallu naaw lo to. Wdze ne bnaaz zho Jesús ga, zeene blozh dowxtsee-nie me xpēēdscuel me, bzhen̄ me tib guietxtil, bdeed me xquizh lo Dios; ²⁴ blozhse bdeed me xquizh, nzian lē been̄ me guietxtil co, bdeed mew lo zho rēb me: “Gol̄quiina, rrieequia lēē xcuerp naa nu, sac gon̄ znu gun̄ zho xcuerp naa parne csilaa naa to grē to. Gol̄gun̄ xtsee rii, parne glu to gan̄le tibaque rsoladz to naa.”

²⁵ Blozh ga, scaque bzhen̄ me tib cop no vin, rēb me lo zho: “Lēē stib trat cub nu gon̄ rīaan̄ Dios grē me miech, rrieequia xchen naa nu nac vin rii, ren ne tso sell trat co par glu nona. Gzataa zeene znu guie to vin, golsoladz gan̄le zha naca.”

²⁶ Gol̄guien̄ sca, zeene gun̄taa to xtsee co zaacse gol̄guna, sac gon̄, ga quiaxobnen̄ to lo miech Jesús nac men̄ ne gut xcuent to, psilaa me to. Tibaque none gun̄ to xtsee co, haxta gdziñ̄ dze ne laa me guīaad stib.

²⁷ Gacxe waa, zha ne rieniewguit guic rquiind̄ zho xtsee co zigne no yquiin̄ zhow, dol̄ nroob ga run̄ zho, xcuerp Jesús ga, xchen me ga noguitnie zho. ²⁸ Zeene gun̄ to xtsee co, none wen wen sob to gan̄le zha naca, pe nacne laaw rac, dzigo lozh ga zac yquiin̄ tow. ²⁹ Sac gon̄ zha ne lega gow guietxtil co, lega guie zho vin co, sac zhow zig beelze pe xtsee; rrieequia guiel̄nē ne yгаа zho ga gow zho, guiel̄nē co ga guie zho. ³⁰ Min̄cocxe waa, blactaa zha ne nacgrē to i quiyaan̄ nsis, nogaa zho rzacnēle, haxta nzian zho gutle. ³¹ Tel̄ne niaca min̄e wen wen gwi ne gan̄le zha nac xtsee co, tsod pe nacne pe guiel̄nē ne cxeel̄ Dios dzian̄ ne. ³² Ni zeene scagaa rteed me ne tib caxtigw, laaw run̄ me parne tsāa ne biini gbiire gbig ne lo me, zeenā led yed ne nitlo gal̄ dze ne nitlo grēraa miech ne zienal̄ ncuaneā lo guidzliu rii. ³³ Bets, bzian, gol̄guien̄ sca zeene ycaalsa to gun̄ to xtsee co, gol̄cuēz grēraa zha ne nacgrē to dzigo tipse golsilo gol̄quiina. ³⁴ Tel̄ zha ne riengaa lēbd̄ zho lozh gdziñ̄ grēraa zha ne nacgrē zho, mazd

gowgazh zho lidz zho, zeena yguibd zho yгаа zho guielnë co.

No spalal mine racladz naa gacnan to, per naa zeene guial naa nëz qui dzigo gne naaw lo to.

12

Guieibiini ne rdeed Espiritu Sant

¹ Bets, bzian, nugaa na ganle laa naa gzet zha nac guieibiini ne rneedz Espiritu Sant, sac racladz naa wen wen guien to zha naca. ² Rsoladz to ganle zeene gard gliladz to Xtiidz Dios, nëzrii nëzrec bio to güeygan to stib stib grë mdio, ncuaane ni tib lan diidz rneed; sangue Dios ne rililadz to niina, led scad nac me. ³ Per nsin golso dien cho nac zha ne noteedpaa xtiidz me, sac nzian zha ne rnee xtiidz Espiritu Sant noteed zho lo miech, per tel rzo zho rdzibdee zho Jesús, ga rlu rquidie zho. Sac zha ne nli nacie Espiritu Sant, rdzibdeed zho Jesús, sinque rlu zho ne me rnabey zho, ni haxta dib zdo zho rnee zhow.

⁴ Tib tib zha ne rililadz Jesús, zhaase zhaase nac guieibiini ne rgaa zho, per tibaque men ne rdeeda, lëe men co nac Espiritu Sant. ⁵ Nzian mod zrieelo dziuun ne dziin lo Jesús, per grëse ne me rnabey ne. ⁶ Tib tib ne zhaase zhaase mod ne rlu Dios nacie me ne, per grëse ne me nac men ne rlu zha dziuun ne xtsiin me.

⁷ Guieibiini ne rneedz Espiritu Sant lo ne tib tib ne, laaw rneedz me parne dziuunlsa ne xyudar grë zha ne nacgrë ne gacndionraa ne zha racladz Dios.

⁸ No lo zho rdeed me guieibiini rien zho zha cso zho diidz lo miech,

no lo zho rdeed me guieibiini rseed zho grë ncuaane ngan ni rlu zhow lo miech.

⁹ No lo zho rdeed me guieibiini dib zdo zho rnalo zho Dios, niicle ncuaane mazdraa ngan rnab zho lo me, raca.

No lo zho rdeed me guieibiini zeene rnab zho lo Dios, riac grë men rzacnë.

¹⁰ No lo zho rdeed me guieibiini rnab zho lo Dios rac grë milagr,

no lo zho rdeed me guieibiini rteed zho xtiidz Dios lo miech,

no lo zho rdeed me guieibiini rien zho cho nac zha ne nlipaa nacie me, cho zhagaa nacie menodox.

No lo zho rdeed me guieibiini rnee zho stib diidz ne gard cseed zho,

no lo zho rdeed me guieibiini rien zho pe rnee zha ne rnee diidz co, dzigo rnee zhow.

¹¹ Grëse guieibiini, Espiritu Sant rdeeda, ni me nan pa mine rneedz me lo ne tib tib ne. ¹² Lo grëse ne ne nac ne zha ne no xnëz Jesús, rriequia xcuerp me nac ne. Tel cuerp, niicle ne nzian part niaaw, per tibaque naca. ¹³ Ndal miech ne nac xcuerp me, no zho nac zha Israel, no zho nac zha zit, lo grë zho no zho ngadoo lo ben, nogaa zho zonlaa, per grëse ne tibaque Espiritu ne nacie ne, sac tibaque Espiritu bgaa ne zeene brobnis ne.

¹⁴ Gotsaa gwi ne ganle, no ni ne, no nia ne, no diag ne, nzian lë niaa xcuerp ne, per tibaque naca. ¹⁵ Gacxe waa telne niaca mine rnee ni ne, grielod guiaba porne nacda nia ne, nacda xcuerp ne. ¹⁶ Scaque diag ne, grielod guiaba porne nacda bziaalo ne led yedraaw nac xcuerp ne. ¹⁷ Sac telne niaca mine gdipse xcuerp ne niaa bziaalo ne, ¿zha nadien gon ne? Telne gdipsegaa xcuerp ne niaa diag ne, ¿zha gzoobzhi ne? ¹⁸ Lëezhe wen led scad psan Dios xcuerp ne, sinque grëse part ne niaaw bzaa mew zigne gocladz me, psanse mew zaatne rquiina tib tiba. ¹⁹ Sac telne tipse niaa grëse part ne nac xcuerp ne, ¿zhazhe rlu ncuaan co! ²⁰ Gocda sca, sinque zhaase zhaase nac tib tib part co, per grësew tibaque cuerp naca. ²¹ Gacxe waa grielod guiab bziaalo ne lo nia ne: “Ib rquiind naa luu”; guiaabgaa guic ne lo ni ne: “Ni lalnu rquiind naa to.” ²² Grëse part ne niaa xcuerp ne nose zaatne rquiina, haxta mine mazdraa nda lëe min co rquiinraa.

²³ Stiba, no part ne niaa xcuerp ne rzac ne zhi nona, no part haxta rtoladznie ne, per gotsaa gwi ne ganle part co nac zaatne ranraa ne, rioxcoraa ne rdze; ²⁴ sangue part ne nziuu lo ne, zienied guic ne dien zha gdzew. Ible sca psan Dios xcuerp ne, zeena sca gacnon part ne rzac ne zhi non. ²⁵ Sca niaa xcuerp ne, grëse part ne niaaw rquiinlsaw xcompañera; led yeda rtsolsa. ²⁶ Golwi ganle, zeene në tib part xcuerp ne, grëse part ne niaaraaw zienie në co;

scaquegaa zeene rdioon tib part co grësew zienie guielbley co.

²⁷ Laa naa rne min rii lo to, sac racladz naa guien to sca none tipse gac to. Golguien ganle xcuerp Jesús i nac to grë to, tib tib part ne niaa cuerp co i nac to, rquiinlsa to zha ne nacgrë to. ²⁸ Ni zigne sca tib tib part ne niaa cuerp nose zaatne rquiina, scaquegaa grëse zha ne no xnëz me, bzose Dios zho pe nac dziin ne gun zho: no zho rienee xtiidz me lo miech, no zho rteed xtiidz me lo miech, no zho rseed miech xtiidz me, no zho rnab lo me rac grë milagr nroob, no zho rnab lo me riac men rzacnë, no zho rioxco run xyudar grë miech, no zho rzo rac zho zha rnabey, nogaa zho rnee grë diidz ne gard cseed zho. ²⁹ Golgan ganle, psod me zho grëse zho tsienee xtiidz me lo miech, grëse zho cteed xtiidz me, grëse zho cseed miech xtiidz me, grësegaa zho gnab gac milagr. ³⁰ Niicle psodgaa me zho grëse zho gnab guiac men rzacnë, grëse zho gnee stib diidz, grësegaa zho gnee zha nac grë diidz co. ³¹ Zhaase zhaase nac guielbiini ne rgaa tib tib zha ne no xnëz me, per goltsoxco yгаа to guielbiini ne mazdraa rquiin.

Sca nagon naca, per golquiaadiaga ganle, nu laa naa gzet lo to stib mine mazdraa non lo grë guielbiini rii.

13

Guiewleynie

¹ Mine mazdraa rquiin gon nac ne gleynie ne samiech ne. Tel niaca mine bgaa naa guielbiini rne naa grë lose diidz ne rnee miech, haxta grë diidz ne rnee xanjl Dios rne naa, ni tel rleynied naa samiech naa, ɔpa dien rquiin rac naa grëtaa diidz co? Rrieequia nac naa ga zig tib lë guib ne loxaque rzedz.

² Tel niaca mine rteed naa xtiidz Dios lo miech, rien naa pe nac mine naraa cxobnen me, grëse wseed ne no rien naa, ni rleynied naa samiech naa, jpaat rquiinda! Tel dib zdoogaa naa rnalo naa Dios, haxta ncuaane mazdraa ngan rnab naa run mew, ni rleynied naa samiech naa, jpeet nonda!

³ Tel quiizgaa naa grë ncuaane quianie naa lo grë zha ne guien pe yquiin, haxta gded naa naa tsec naa, per tel rleynied naa samiech naa, jzhlëse ga gun naa min co!

⁴ Sac gon zha ne nli mban zigne nac guiewleynie co:

riednied zho samiech zho,
wen rac zho lo samiech zho,
racnëd zdoo zho, niicle ran zho wenraa
noded stib miech lo zho,
rund zho ne lëëque zha gunnon zho,
racniatsd zho lo samiech zho,

⁵ rund zho ncuaane coguieinë zho,
gunglëëgaa zho samiech zho,
zienald zho ne tebaa lose zho yquiin grë pe
cos,

nacd zho zha ne lega zolëë,
rapguieinëd zho samiech zho,

⁶ ni lalnu riod zdoo zho mine run zha ne
rsacsi samiech,
mine rleynie zho nac diidzli.

⁷ Zha ne nli rleynie samiech, ni lalnu peet
griee lod yca gleynie zho zho; rquiaadiag
zho mine rnee zha co, rzhidznied zho zho;
tibaque rquiabladz zho wen grieequia zho,
rsaand zho zho, tibaque racnie zho zho.

⁸ Dzidz dze yquiindraa cho cteed xtiidz
Dios lo miech, yquiindraa gnee zho
stib diidz, yquiindraa grë guielrac, sangue
guiewleynie gdzind dze ne nitlow. ⁹ Niicle
ne nogaa ne guielbiini ne rneedz Espiritu
Sant, niicle no zha ne rien zha gnee zho Xtiidz
Dios lo miech, per palalse nac ncuaane
rien ne niina. ¹⁰ Sangue gal dze ne laa
Dios lozh gzhixcuaa ne zigne no gac ne,
grëse guielbiini ne rdziaap ne niina, paat
yquiindraaw.

¹¹ Masaque nac ne niina zig tib mëëdlas.
Tel naa, zeene goc naa mëëdlas grëse
ncuaane bne naa, grëse ncuaane bien naa,
grëse ncuaane pseed naa, grëse ncuaan co
ben naaw zigne run grëraa mëëdlas. Per
zeene laa naa broob, laa naa biala biini,
grëse ncuaan co laa naa bienpaa zha naca;
laa guielmëëdlas co bded. ¹² Scadaa nagon
rzaaac ne niina, palalse rien ne zha nac
Dios, rrieequia rdzianse ne me niina zigne
ran ne zhimlë ne lo beelze pe tib lë vidr; per
dzidz dze laa ne dzianlo me zigne nacpaa
me. Palalse ndion ne niina zha nac me,
palalse rsilo rdzian ne me, per gal dze co

laa ne dziuunbeypaa me zigne runbey me ne niina, nanpaa me zha nac zdoo ne tib tib ne.

¹³ Golgacnan sca ganle, grë guielbiini co zdzin dze ne yquiindraaw, sangue ne znu: dib zdoo ne rnalo ne Dios, noniepaa guic ne zac mine rnee me, ni rleynie ne samiech ne, lozhda. Per lo gza tsona nagon, guielwleynie co nac mine gdziind dze ne gdzëë.

14

Zha ne rnee stib diidz

¹ Laa to nanle pa min nac mine mazdraa non, igolleynie samiech to sca! Per scagaa golnab ygaa to guielbiini ne rneedz Espiritu Sant. Zig nac guielbiini ne rgaa zha ne rteed xtiidz Dios lo miech, golnab ygaa to min co zeena sca grielo cseed to miech xtiidz me.

² Sac tel zha ne rgaa guielbiini rnee zho stib diidz, zeene rnee zho diidz co choot riend dien pew, sac lo Dios ga rnee zho. Tel pe nac mine rnee zho ga, Espiritu Sant rsiaaba guic zho, per choot racnand dien zha naca. ³ Sangue zha ne rgaa guielbiini rteed zho xtiidz Dios lo miech, mine rnee zho ga rquiina par tsogucraa miech zha racladz me, par guien zho pe nonguiel gun zho, ni rchooblada zdoo zho.

⁴ Tib zha ne sca rnee stib diidz, lose zho rquiin guielbiini co, sac zhase riogucraa zha racladz Dios; sangue zha ne rteed xtiidz me, diidz ne rnee zho rquiina lo grëraa zha ne no xnëz me, grëse zho riogucraa zha racladz me. ⁵ Wena tebaa grëse to ygaa guielbiini co gnee to stib diidz, per mazdraa gon wena cteed to xtiidz Dios lo miech, cseed to miech xtiidz me; sac min co mazdraa rquiin, lëdle gnee to stib diidz. Zacaquegaa gnee to stib diidz co, totsaque lozhse gnee tow, gneegazhaque to dien zha naca; zeena sca yquiina lo grëraa zha ne no xnëz Dios. ⁶ Bets, bzian, to gase nadien, tel niaca mine glanso naa lo to i csilo naa gne naa stib diidz, ¿pa dien yquiina lo to? Per tel glanso naa, ine csilo naa clar gne naa lo to pe nac mine zinee Dios lo naa, pe nac grë mine rien naa, pe nac mine ziaadyob gac, zha nac grë mine zhobnee lo Xtiidz Dios, led grëse min co zien to zha naca, ni squiina lo to grëse to.

⁷ Haxta grë ncuane rool miech, zig nac bzie zig nacgaa vihuel, tel csilo zha ne noyoola tel zhataa gool zhow, ¿zha dien guien miech pa di noyool zho? ⁸ Zig nacgaa zha ne rcuedz cornet lo menguiib, telne tel zhataa ycuedz zhow, ¿zha dien gacnan menguiib pe nac vis ne quiayun zho? ⁹ Scadaa nagon run to zeene rnee to stib diidz lo miech, ¿zha nadien guien zho pe nonee to? Rrieequia lo mese ga rnee to. ¹⁰ Zig nac lo guidzliu ndal lo diidz rnee miech, per tib tiba nose mod ne rnee zhow, nose zha ne riena. ¹¹ Telne guiaad tib zho lo naa csilo zho gnee zho, ni riend naa pe quianee zho, grielod guien naa pe racladz zho, guienгаа zho zha rzaac naa.

¹² Nana sca, zha ne rquiabladz ygaa guielbiini ne rneedz Espiritu Sant, gnab zho ygaa zho mine grielo yquiin lo grëraa zha ne nacgrë zho, zeena grë zho tsogucraa racladz Dios gban zho. ¹³ Gacxe nagon waa, zha ne rneele stib diidz, none gnab zho gdeed Espiritu Sant guielbiini lo zho guien zho pe nac grë diidz co, parne gnee zhow lo miech; ¹⁴ sac zha ne sca rnee stib diidz, tel so zho gnab zho lo Dios, riend zho pe nonab zho, loxaque zhiespirituse zho quianee ga. ¹⁵ Gacxe waa zeene gnab ne lo Dios, zeene goolniegaa ne me, zac gnee ne stib diidz, per scagaa none gnee ne diidz ne rien ne, mine riengaa grëraa miech. ¹⁶ Sac gon tel stib diidz nonee ne noyoolnie ne Dios, nodeed ne xquizh lo me, ¿zha dien yquiab grëraa zha ne ndxie ni riend zho pe rnee ne? ¹⁷ Niicle ne ndzon sca nodeed ne xquizh lo Dios, per zha ne noquiaadiaga ga, paat yquiinda lo zho.

¹⁸ Xquizh Dios, tel naa ye naa rne stib diidz, ni mazdraa gon rne naaw que zha ne rneew lo to i, ¹⁹ per zeene zo naa zaatne ndxie grë zha ne noquiaadiag Xtiidz Dios rund naa ne gnee naa stib diidz, sinque rne naa mine guien zho. Rien naa wenraaw gne naa maase gaayaque lan diidz, per mine guien zho, lëdle so naa gne naa tsii mil diidz, ncuane ni tib choot guien.

²⁰ Bets, bzian, golguien sca golsaan guielmëedlas qui. Zacgaa gac to mëedlas per nëz lo guielntseeba, sangue xpensar to golgac zig zha ne biao biinile.

²¹ Gotsaa gwi ne ganle zha nac stib didz. Zhobnee lo Xtiidz Dios rëb me, laa me cxeel miech stib dan miech ne rnee stib diidz, par gnee zho lo zha Israel; per niicle tsienee zha co, ib guiend zhow. ²² Gase naganle rlu rquiind stib diidz co par grë zha ne rnalole Dios, sinque laaw rquiin parne grë zha ne nod xnëz me gan zho ganle nli no me. Zha ne nole xnëz me, zha co rquiin gon zho pe nac mine racladz me gacnan zho, pe nac mine zhobnee lo Xtiidz me. ²³ Per niicle scaw, telne zob bla zha ne sca gard gliladz Xtiidz me, zobgaa bla zha ne pense rsilo rquiaadiaga, ni csilo to gnee to stib diidz, zeene gan zhow lëëtaa mine guiab zho rzhiñle guic to sca rac to. ²⁴ Laa telne grëse to no noteed to xtiidz me, nonee to mine racladz me gacnan miech, zha ne sca gard gliladz Xtiidz me, zha ne sca pense rsilo rquiaadiaga, zeene gon zho grëtaa mine nonee to, haxta ziaa zho biini zien zho ne nli tib miech ngoopdol nac zho. ²⁵ Zigse quianee to laa zdoo zho lozh yguudz, laa zho ted yquitsgzhìb zho gnab zho perdon lo Dios; ga guiend zho ganle ne nli nacie me to.

²⁶ Bets, bzian, golguien sca zeene ycaalsa to cseed to Xtiidz Dios, zigtaa zha ne goola, zha ne cteed xtiidz Diosa, zha ne gnee stib diidza, zha ne gneegaa zha nac diidz co, none tsienie guic zho mine gun zho ga laaw yquiin parne tsoguicraa los demas zho zha racladz Dios gban zho. ²⁷ Zeene gnee zho stib diidz, none choptaa zho, tsontagaa zho gneew. None tibga zho gnee, ni rquiin zole zha ne gnee pe nac diidz co. ²⁸ Laa telne guiend zha ne grieelo gnee dien pe naca, nodne gnee zhow; mazd len zdoose zho gnee zhow, Diosse gon pe nonee zho.

²⁹⁻³⁰ Scaque zha ne cteed xtiidz Dios, choptaa zho, tsontagaa zho gneew, laa grëraa zha ne ndxie none yquiaadiag zho mine nonee zho. Telne lëëtaque nonee tib zho, ni csiaab Dios guic stib zho gnee, dzigo none cuëz zha ne quianeele ga zeena grieelo gnee zha co. ³¹ Sca none gaca, none tibga tibga zho gnee, zeena grëse zha ne ndxie grieelo gon zho dien pew, parne cseed zho, ni gacnguieelraa zho lo Xtiidz Dios.

³² Zha ne sca rteed xtiidz Dios, none

cseed zho gnabey zho zho, cuëz zho nieeda gdziñ hor ne gnee zho. ³³ Sac tel Dios, rdziladz me guiots gnaaz pe cos, rdziladz me ncuane nzhiitni. Mine rdziladz me zaacse gac tib cos, ni scagaa run grëraa zha ne no xnëz me.

³⁴ Ni stiba, zeene sca rcaalsa to, racladz naa guiend grë men wnaa dzese sob zho. Nodne so zho ye zho gnee, sac gon mgui rnabey zigne zhobneequ lo Xtiidz Dios.

³⁵ Ncuane racladz zho gacnan zho, ro yu ga gnabdiidz zhow lo zha bgui, sac gon, rdzieelda lëëpaaze wnaa gnee zaatne rcaalsa to rquiaadiag to Xtiidz Dios.

³⁶ Zaacse sca golgac, golguien ganle grieelod gun to mine notaa guic to, sac gon led loxaque todse nac zha ne runbey Xtiidz Dios, par guiab to zigne racladz to gac tib cos, sca none gaca.

³⁷ Mine rne naa lo to nu xtiidz Dios naca, zha ne rteed xtiidz me lo to i, zha ne rapgaa pe stib guielbiini ne rneedz Espiritu Sant, zha co gunbey ganle nli mine rnabey mew.

³⁸ Zha ne gliladzgaaw, maase gliladz zhow.

³⁹ Sca nagon naca. Goltsoxco sca yгаа to guielbiini cteed to xtiidz Dios lo miech, zeena gacnan zho zha racladz Dios gban zho; per scagaa, ib ycade to tel cho zha ne rnee stib diidz. ⁴⁰ Per zigne rne naa ga, grëse mine gun to none zaacse gun tow, tib tiba gacsew hor ne rieguiala.

15

Brieaban Jesús

¹ Bets, bzian, nu laa naa gbire gzet lo to ganle zha nac Xtiidz Dios. Zigne bialseed naa tow, scataque naca; led yeda rdzëë. Lëew ga pcaania to, ni haxta niinagaa rliladz tow. ² Lëew rlu zha grieelo ycaania Dios to, totsaque nli dib zdoo to bliladz tow, ni bii lëëgaaw rnalo to.

³ Zeene bial naa lo to i, pseed naa tow zigne pcaaniase naaw. Gocnan to cho nac Jesús, gocnan to por xtol ne gut me lo cruz, zigne zhobneesew lo Xtiidz Dios. ⁴ Gocnan to ganle zeene goc tson ngbidz pqueets zho me laa me brieaban, zigne raquetaquew lo Xtiidz Dios. ⁵ Len dze ne brieabanle me ga, gonlo Pedr me, niicle grëragaa zha ne nacgza Pedr bzënie zho me, gonlo zho me

sac güeyted me lo zho. ⁶ Güey me güeyted me zaatne ndxie ndziibsrāa gaay gayoo zha ne nole xnēz me, grēse zho gon me; ndal zha co bii mban niina. ⁷ Bded ga gonaque Santiagw me, ni biire güey me lo zha ne bzēnie me ga stib; ⁸ goc palal tiempa, lega naclew haxta lo naa brieequia me. Tel naa gon, rrieequia nac naa zig tib mēēd ne rzamēēd, ⁹ lo grēraa zha ne nac poxtl, ni lalnu peet nond naa, per ni rdzieeld gnee zho naa poxtl; sac gon pa lotaa ptsidil naa grē zha ne glopaa bzēēb xnēz Dios. ¹⁰ Per xquizh Dios tibaque noxco me naa, bzooblo me naa gane laa naa nac miñe nac naa niina. Ni led zhlēdgaa bzooblo me naa, sac gon nroobraa xtsiin me noyūn naa lo miñe noyūn grēraa poxtl; per rned naa togo naase quiayūna, sinque me noyacnie naa rrieelo noyūn naaw.

¹¹ Laa naa rzet miñ rii, per nacda par glu dien cho nroobraa noyūn xtsiin me, sac miñe mazdraa non nac ne noseed no miech Xtiidz me; lēēw biadseed no to, ni bliladzdgaa tow.

¹² Nana sca, racladz naa gnē to dien zha nacne no bla to i rnee nlid grieeban menḡut; led wen wen name gocnañ to brieeban Jesús. ¹³ Telne rnee to nlid grieelo grieeban menḡut, rrieequia gon rnee to ga nlid brieeban Jesús. ¹⁴ Nana telne brieeband me, paat rquiind miñe dzigo noseed no miech nu, zhlēse znu noteed-xtse ne rnalo ne Dios. ¹⁵⁻¹⁶ Rrieequia noquidiee no miech, sac gon tibaque rnee no lo zho bleeban Dios Jesús; ni telne nli rrieeband menḡut, ye Jesús dzigo bii noliu me niina. ¹⁷ Stiba, telne nlid brieeban me, zhlēse dzigo rnalo to me ycaania me to; telne nlid brieeban me, scase bii zēēb to grē xtol to. ¹⁸ Grē zha ne bliladz me, zha ne nacle menḡut niina, lēē bnitlole zho ga dzigo. ¹⁹ Nana telne loxaque lo guielmban riise nona gnalo ne Jesús, ne dzigo nac miech ne mazdraa nxen.

²⁰ Per gacnañ to sca ganle, jbrieeban Jesús! Me nac men ne glopaa brieeban lo grēraa miech guizhiu ne grieeban. ²¹ Grēse ne ne nac ne miech, ible laa ne none guet; sac laa guielgut biaan por miñe been Adán; per niina ne laa Jesús biaad, por miñe been me grēse menḡut laa zho none grieeban.

²² Zigne grēse miech ret porne ziaad zho lo xtii Adán, scaquegaa grēse zha ne gbig lo Jesús, zgaa zho tib guielmban ndzon.

²³ Ible sca none gaca, ndion ne ganle laa Jesús brieebanle, ni zeene laa me guiaad, grē zha ne no xnēz me laa zho grieeban.

²⁴ Gal dze co laa me lozh gnitlo menḡox ni grēraa ma ne nacie ma, dzigo laa me csañ grēse miech ne no xnēz me ladznia Dios men ne nac Pxoz me; dze cotaa nagon laa Dios gon guielwxtis. ²⁵⁻²⁶ Sac ible Jesús nonabey haxta gdziñ dze co, zeene laa me gnitlo grēse meyozh ne rlēē lo me; zig nac guielgut, lēēw nac miñe lultm gnitlo me.

²⁷ Zigne zhobneeque lo Xtiidz Dios, ladznia me biaan grētaa ncuaane no; per guiabd ne togo ye Dios no ladznia me, sac gon Dios nac men ne bdeeda lo me. ²⁸ Gacxe waa, zeene gal dze ne laa me sca lozh gnitlo grē zha ne rlēē lo me, Pxoz me nac men ne gnabey lo me; sac gon men co gocnie me been me gan, ni men co nac men ne rnabey.

²⁹ Nana, ne rnee to i nlid rrieeban menḡut, ipe nac dzigo no zha ne rrob-nis xcuent zha ne gutle? ³⁰ Telne niaca miñe nlid grieeban menḡut, ipe nac nadien znu gzataa dze quiabeeladz no no lo grē guielxtseeb? ³¹ Bets, bzian, nli-gaaw tel naa gon gzataa dze noxtseeb naa lo guielgut; nanle to ganle zeene rne naa rleyne naa to, diidzli rnee naa; scaquegaa niina, miñe rnee naa nu diidzliw. ³² Ne nligaa zeene glo bial naa guiedz Efés nu, ntseeb goc miech rii lo naa, pale grē ma ntseeb. Telne nlid grieeban menḡut, zhlēse dzigo nodeed naa grē miñ co; mazd tel zhataa dzigo gban ne, zigne rēbaque diidz ne rēb: “¡Golgotsaa dioow ne, golgotsaa dio ne, benque guielgutse quiambiaaz ne!”

³³ Per lēda ga gon. Zha ne zienal min co, ib yquiaadiagde to xtiidz zho, zeena gacde to zigne nac zho; zigne zēēbaque diidz: “Telne ndzinlid miech ne ctsieelsa luu, zdziñ dze ne gac luu zigne nac zho.”

³⁴ Golquix biini sca, gunctaldraa to xtol to; per rtoladzde to, golwi ganle no bla to i gard sēēb xnēz Jesús, haxta ni riend zho zhapaa nac Dios.

Zha grieeban menḡut

³⁵ Nana, no to gnë: “¿Per zha grieeban menġut? ¿Zhazhe nac cuerp ne grieebannie zho?” ³⁶ ¡Aque nxen wnabdiidz co! ¿Pe ranġe to zig nac grë midz ne rio liu rac bni, rlozhse rnitlo midz co dzigo laa guizh ne naca ga rlan? ³⁷ Tel rnee to zha nac cuerp ne grieebannie zho, golwi ganġe zig nac zhobxtil, zig nac grëragaa midz, ¿pe ni-acxe zigne nacsew riow liu, scasaque naca rlan? Led zeene laaw rlan, guizhle naca. ³⁸ Tib midzse naca riow liu, Diosle nac men ne rdeed zhiblaga zigne racladz me. Tib tib midz, psanġe me dien zha gluw zeene laaw glan. ³⁹ Zigne zhaase zhaase nac tib tib midz, tib tib guizh, scaque nzian lo cuerp no.

Zig nac miech, zhaa nac xcuerp zho lo xcuerp ma, niicle magaaw, zhaa nac xcuerp ma ne no lo liu, zhaa nac xcuerp ma ne no lo nis, ni zhaaque nac xcuerp ma ne rsiibe. ⁴⁰ Grë anġl ne no gbaa, zhaa nac xcuerp zho lo xcuerp ne nac ne miech guidzliu; zhaa nac xquielniow cuerp co lo xquielniow cuerp ne no lo guidzliu. ⁴¹ Gotsaa gwi ne ganġe, zig nac xbiini ngbidz zhaa naca lo xbiini mëë, lo xbiinigaa mel. Niicle melgaaw, zhaase zhaase nac xbiini ma tib tib ma, no ma palalse rlu, nogaa ma rol rna. ⁴² Scadaa nagon, zhaa rlu cuerp ne rap miech niina, ni zhaagaa glu miġe ygaa zho zeene laa zho grieeban. Cuerp ne rdziaap ne niina, ncuaane tib rded naca, sangue cuerp ne grieebannie ne gal dze co, led yedraa miġ co nitlo. ⁴³ Mban nac cuerp rii, sac rzacnëw, reta; sangue cuerp ne grieebannie ne, tib cuerp ne gdziġnd dze nitlo gaca. Lega zozhidz cuerp rii, sangue cuerp co tib cuerp ndip ndaan gaca. ⁴⁴ Cuerp ne rdziaap ne niina, tib cuerp ngoopdol naca, sangue cuerp ne grieebannie ne, miġ co gac tib cuerp ne gban zigne racladzpaad Dios. Sac zigne znu no cuerp ne rquiin lo guielmban rii, scaquegaa no miġe yquiin stib lo guielmban ne gneedz Dios.

⁴⁵ Golġsoladz ganġe, rnee lo Xtiidz Dios Adán goc miech ne glopaa biaan ni Dios nac men ne bdeed guielmban lo Adán; sangue Jesús, me rap guielmban, ni zrieelo gdeed me guielmban co lo miech. ⁴⁶ Scaque nagon, glo rgaa ne cuerp ngoopdol ne rdzi-

aap ne niina, dzigoraad ygaa ne cuerp ne gban zigne racladzpaad Dios. ⁴⁷ Gotsaa gwi ne ganġe, zeene biaan Adán yudiese bzaad Dios me; sangue Jesús, men gbaa nac me. ⁴⁸ Grëse ne nac ne miech, cuerp ne rdziaap ne lo guielmban rii, zigne gocdaad xcuerp Adán naca; per zha ne gnalo Jesús, zeene laa zho grieeban laa zho gaple tib cuerp zigne nac xcuerp me. ⁴⁹ Masaque nac ne niina zigne goc Adán, ni scaquegaa zdziġnd dze ne glu ne zigne rlu Jesús. ⁵⁰ Golġgacnan sca ganġe, cuerp ne rdziaap ne lo guidzliu rii, grielod gdziġna zaadne rnabey Dios; sac rdziġnd dze ne rnitlow, grielod gaca tib cuerp ne guete.

⁵¹ Wen wen golzoobdiag miġe gne naa lo to nu ganġe, wlaltaa choot gard gacnaa: Grëse ne ne nac ne zha ne rnalo Jesús, gal dze co zigtaa zha ne mbana, zha ne gutle-gaaw ible stsëë Dios xcuerp ne. ⁵² Znuse gac miġ co zig nacse zeene riab tib belye; lëë miġ co gac lultm vult ne ycuedz xanġl Dios zhitrompet zho. Zeene sedz trompet co, hor co grëse zha gut, laa zho grieebannie tib cuerp ne gdziġndraa dze nitlo; scagaa grë zha ne bii zomban, hor co laa xcuerp zho gdzëë. ¿Grëse ne dziaap tib cuerp cub! ⁵³ Ible sca none gaca, ib none gdzëë xcuerp ne gaca tib cuerp ne xiġnd, tib cuerp ne gdziġndraa dze nitlo. ⁵⁴ Zeene gac miġ co, ga griequia miġe raquiet lo Xtiidz Dios zaadne rnee: “Nasi laa guielġut bnitlo, guielmbanle nac miġe rnabey. ⁵⁵ Ah guielġuta, ¿yoraad na zeene scataa psacsi luu? ¿Yoraad zeene scataa gocndip xtiidz luu?” ⁵⁶ Grielodraa pe guġ guielġut ne hor co, sac led yedraa hor co tso dol, led yedraa hor co gnabey ley; sac por dol gane rrieelo rsacsi guielġut ne niina, ni por ley rlu pe nac xtol ne. ⁵⁷ ¿Xquizh xquielnzaac Dios pxeel me Jesús, sac gon por Jesús zrieelo griee ne ladzniad guielġut!

⁵⁸ Bets, bzian, ne nac to zha ne rleynie naa, golġguien sca tibaque dziits golġso lo Xtiidz Dios; zig zie dze golġsoxcoraad golġgun xtsiġn me, benque nanġe to ganġe, grëse xtsiġn me miġe rdziuun ne nacda ncuaane zhlëse.

Gon ne guey Jerusalén

¹ Laa zig nac gon ne noyaco guey gac xyudar grëraa zha ne no xnëz Jesús Jerusalén, laa naa rso diidz lo to zigne psoque naa diidz lo zha Galás.

² Tel palal run to gan tib len zhmal, lo co golcob mine ral zdoo to gdeed to gac gon co; gzobse dze goltsiesana lo zha ne noyunlow. Adel na ganle haxta glansoraa naa i, dzigora no to dien zha topa. ³ Ni golzoobloga dien bla zha ne tsie tsiesana, na zeene glanso naa i dzigo yquia naa tib guits ne güey zho tsiesan zhow; ⁴ ni tel rquiinpagaa ye naa ga, dzigo na maase ga naa ganie naa zho.

⁵ Len dze rii no guic naa gateed naa nëz Macedon, dzigo gale grie naa glanso naa lo to i. ⁶ Nend zbëz naa lo to i palal dze, togo iquegaa teed naa len mëe nal ne ziaad; ni racladz naa zeene gbi naa i, siguiel to gun to xyudar naa tel pa nëz ne no ga naa len dze co. ⁷ Telne zneedz Dios diidz cuëz naa lo to grë len dze co, zbëz naa, sac racladz naa tib gualteed naa lo to i. ⁸⁻⁹ Niina ne no naa Efés nu, len dze riipaa rlu ndal miech ne no liaadz ycaania Xtiidz Dios, gane zbëz naa nu haxta ted Ini Pentecostés. Nligaa ndal zha ne no liaadz co, per scagaa ndalque zha ne rtsidila.

¹⁰ Nacle diidz laa Timoté guiaad i; tel nand new naraa guiaad me, golsiguiel zeene glanso me zaacse golcaania me, zaacse golcuëzlo me, zeena tsonley zdoo me; golgan ganle, ye me quiayun xtsiin men ne rnabey ne. ¹¹ Golguien csaunwinda to me, sinque golgap me respet; zeena zeene glanso me lo naa nëz rii ine nley gac me csoladz me zha biaadted me lo to i. Laa naa quiambëz glanso me nëz rii, gza me zha ne guiaadnalraa zhits me.

¹² Sangue bets ne Apol, blactaa bnab naa lo me niaadgza me zha ne ziaad i niaadgan me to, per rzac me grieloda niina. Rien naa zeene gdeedtaaw diidz, ible ziaad me ziaadgan me to.

¹³ Bets, bzian, nsin golso, tibaque gólnalo Dios. Ib ctsëede to xtiidz to, tibaque goltsoxco tsienal to mine rnabey me.

¹⁴ Ncuane guntaa to, golconie guic to gun tow porne rleynie to Dios, porne rleyniegaa to samiech to.

¹⁵⁻¹⁶ Laa naa rso diidz lo to, niowse gon golgac lo grë zha bets ne, zha ne run xyudar to i; zig nac Stef grë menlidz me, golgon xtiidz zho. Led nanle to ganle, Stef nac tib men ne glopaa bliladz Xtiidz Dios nëz Gres i grë menlidz me; ni desde dze co laa me pquiabladz tibaque squi quiayun me xyudar grëraa zha ne no xnëz Jesús. ¹⁷ Rley naa gon zeene gon naa laa me blanso nu gza me Fortunat ni Acaic, haxta stib goc zdoo naa gocnan naa zha no to, masaque gun naa cuent grële lo to ga gon naa. ¹⁸ Ne nligaa bloonley zho zdoo naa, ni rien naa scaquegaa to nley gac to niina zeene gon to zha no naa. Golguien gon zha non nac zho, golwi ganle pa lotaa nac dziin ne quiayun zho.

¹⁹ Grëse zha ne no xnëz Jesús nëz Asia nu, laa zho rxeel bdiuzh lo to, golcaania zhibdiuzh zho. Scaque Aquil grop me Priscil, ni grëraa zha ne rcaalsa lidz zho rieseed Xtiidz Dios, grë zho laa zho rxeel bdiuzh lo to. ²⁰ Scagaa grë zha ne no nu, ye zho laa zho rquiaabdiuzh to. Zeene ycaalsa to i, ine golnaaznialsa, golqueedzlsa, golcaania zhibdiuzh no.

²¹ Nu laa naa cso schop lan xtidz naa lo to, ni golwi ganle naazhal yquiaw: ²² Grëse zha ne gon nëd gleyniepaa Jesús, miech ndziibdeele ga nac zho. ¡Ni ile gon ziaad me! ²³ Mese nac men ne gacnien to, me nac men ne no zhixco to, sac ne nligaa rleynie me to.

²⁴ Niicle naaw rleynie naa to, sac gon tibaque nac ne ngab ne lo me. ¡Lëed bii gdzieel ne sca!

Pabl

BROP GUILTS NE PXEEL PABL LO ZHA CORINT

¡Diuzh to grëse to!

¹ Naa nac Pabl, grop no bets ne Timoté, laa no rquia stib guits rii rxeel no guiedz Corinth. Nanle to ganle Dios bzo naa, pxeel me naa none naa Xtiidz Ndzon Jesús lo miech.

Laaw ziaad lo to i, grëse to ne nac to zha ne ngab xnëz Dios; zigtaa tow, zigtaa grëragaa zha ne no dib nëz Gres iw.

² Dios men ne nac Pxoze ne, ni Jesús men ne rnabey ne, me gunlay to, me glu ganle pa lotaa noxco me to zeena peet zhgab ctsebde to.

³ Bets, bzian, golgotsaa gwi ne ganle, ¡zha ndzontaa Dios, Pxoze Jesús men ne rnabey ne! Sac gon, pa lotaa rquia zdoo me ne, pa lotaa rchoobladz me zdoo ne ⁴ lo grëtaa guielnë ne rdieed ne. Ni laa me rchoobladz zdoo ne gon, zeena scagaa grëraa zha ne rdian ne no guielnë, mban rac zho, guio ne guiochoobladz ne zdoo zho zigne rchoobladzaque me zdoo ne.

⁵ Zig nac niina, nroob guielnë ne nodieed no loxaque ne riladz no Jesús, per scaquegaa ib rsaand me no tibaque nochoobladz me zdoo no. ⁶⁻⁷ Laa no nodzian grë guielnë rii, sacne noxco no nonee no lo miech zha laa zho lo dol, parne scagaa grieelo cchoobladz no zdoo to. Lo grë guielnë rii, me nac men ne nochoobladz zdoo no, gane ndion no scaque squia zdoo me to, schoobladz me zdoo to zeene gdzin dze ne laa to gan grë guielnë ne nodzian no nu niina. Ni me gon nac men ne gacnien to glëb to gan tow.

⁸ Bets, bzian, tel niaca mine nian to ganle zha nactaa grë guielnë nroob ne bdieed no zeene no no nëz Asia. Ne nligaa nroob psacsi zho no, ncuaane lëbdraa no lo grë guielnë co, tibaque rdzieets no bod gataa niet no. ⁹ Masaque bzhiaac no len dze co zig rzac tib zha ne nole guet, laa zho quiambëzse gal hor ne guet zho. Garaa bdzion no peet grieelod dziuun no ne nose,

sinque Dios none gnalo no, mese zac csilaa no lo grëtaa guielnë; sac tel me, haxta mengut rbeeban me.

¹⁰ Ni nligaa blee me no lo guielnë co, bla me no lo guielgut co; ni ndion no scaque zla me no lo grëraa guielxtseeb ne dzian no, ¹¹ totsaque gacnie to no tibaque gnab to lo me gacnien me no. Zeena, tibaque gac ne grëse ne gdeed ne xquizh lo me.

¹² Rley no sacne rien no choot noquidied miech, ndzinli mban no, zigtaa zeene zo no lo tow, zigtaa zeene zogaa no lo grëraa miecha. Per guiabd ne togo por niini now, sinque ne nquialadz Dios no gane quiaacnien me no znu mban no. ¹³ Grë mine rnee no lo guits ne zixeel no lo to, niapse didzliw, ni mine rgobey no grieelo guien to min co rquiaa no; gane racladz naa gdzin dze ne guien tow. ¹⁴ Nli runbeydpaa to zha nac naa, per racladz naa gley to zeene ran to naa, zigne gleyaque naa gan naa to gal dze ne laa Jesús, men ne rnabey ne guiaad stib.

¹⁵⁻¹⁶ Sca nagon rzaac naa, gacxe na ni naa glo nialgan naa to, dzigo ile nrie naa nia naa nëz Macedon. Ni zeene mbire naa nëz co, nialtedaque naa lo to i stib; zeena niac chop vult ne nionley zdoo to. Lozh ga, ine niowse nzonëz to naa nia naa nëz Judé. ¹⁷ Ni pasëe naa nial. Per guiabde to togo bod notiblid guic naa zeene sca bne naa, o nacgaa naa zig nac grë zha ne laglaase rnee tib diidz, laa len zdoo zho nanpaa zho gund zhow. ¹⁸ Dios zobwi ganle rdziuunscad no. Mine rnee no, rdziuun now.

¹⁹ Golgan ganle, zigtaa naaw, zigtaa Silvana, zigtagaa Timotéw, no biadseed to cho nac Jesús, men ne nac Xpëed Dios; ni zig nac Jesús, rquidied me. Grëse mine rnee me run mew, ²⁰ ni grëse mine psan Dios diidz gun me, grësew noyun mew; gane niicle nogaaw rnee no lo miech ganle ible run me mine rnee me, ga rlu ganle pa lotaa men nroob nac me. ²¹ Ni lëe Dios co gon nozhixcuaa lo xquielmban ne, laa ne ngab xnëz Jesús niina; me bzooblo no nonee no Xtiidz me. ²² Haxta pxeel me Espiritu Sant zdoo ne, rrieequia bloobey me ne ga, par glu ganle lo me ngab ne, ni ible zgaa ne

grëtaa guielnzaac ne bneelee me gneedz me lo ne.

²³ Me zobwi, me nan ganle pe nacne gard guial naa. Gard gon guial naa, per por tow; sac rquia zdoo naa to, racladzd naa loxaque guialquiago naa to i, lozh ga mban gac to. ²⁴ Guiabde to sca togo bod racladzd no guiaad no. Nli rquiindraa to guiadnee no lo to zha gliladz to Dios, sac dib zdoole to rililadz to me; per laa no racladz ine guiaadlonley no zdoo to i. Golguieñ sca, min co racladz no, racladzd no guiaadloguieñe no to.

2

¹ Min co nagon bend naa ne nial naa, ² sac nonguielda ga coguieñe naa to, ni to nac zha ne rgonley zdoo naa. ³ Ne racladzdaxe naa min co waa, gane pxel naa tib guits co lo to glo, zeena nzhixcuaale lo guielto ne nobee to i, zeene laa naa nlanso. Sac tel lega nlansose naa, laa ne ndzio ne guielbley, lel guieñe ndzio ne. Ni nan to ganle, tipse nac guielbley ne rdziaap ne; ¿niacxe zrieelo nley gac to telne ran to mban rac naa?

⁴ Tel gan to ganle zeene pxel naa guits co, ¿ne nlipaa mban rac naa no naa zhizhgab to! Haxta roon naa zeene noquiaa naaw. Laa naa pxel guits co lo to, per pxeld naaw par ngoguieñe naa to; sinque laaw pxel naa, zeena xixcuaaniob lo ncuaane ndzinlid ne noyac i; ni laa naa ben min co sacne rquia zdoo naa to. ⁵ Zeene bin naa zha nac dol ne noyun zha co i, zig rne naa ga: bio naa guieñe; per rien naa mazdraa nroob bio to guieñe. ⁶ Nana gon, ne squi laa to pteedle zho tib caxtigw, ¡lëëlew ga na! ⁷ Golguiaanladz mine been zho ga, golneewen lo zho stib, golchoobladz zdoo zho zeena gacmband zho. Sac telne csaanladz to zho, nend scase lozh guiuu zho lo xquieñe zho. ⁸ Rnab naa lo to, golleynie zho stib, zigne rleynieque to zho glo.

⁹ Ni stiba, laa naa pxel guits co lo to, zeena dien pe zon to diidz gun to mine rne naa lo to ga. ¹⁰ Golguiaanladz mine been zha co sca, tel naa laa naa biaanladzlew. Jesús zobwi ganle laa naa benle zho perdon, zeena gbiire zaacse gac to; ¹¹ ni scagaa gleyd mendox gungüet ma ne. Led nanle to ganle, zombëzle ma dien zha gnitnëz ma ne.

Tibaque noxco Pabl cseed miech Xtiidz Dios

¹² Bded ga nagon dzigo bia naa guiedz Troas. Zeene bdziñ naa ga, ne nligaa bneedz Dios diidz niun naa xtsiin me ga. ¹³ Nac diidz ga ndzieelo naa bets ne Tit, per zeene gon naa bdziñd me, biotiblidraa guic naa. Nacne brieque naa ga bia naa nëz xtan zha Macedon, biaguib naa me.

¹⁴ Per, ¡xquizh xquieñzaac Dios! Sac zatne ziotaa no, Jesús ner lo no, me rlu ganle rdziun no gan lo grëtaa ncuaane rca. Tibaque rnee no lo miech gacnan zho ganle cho nac me, sca quiaxobnen no Xtiidz me, zig rzëbxlaa tib ncuaane nex rlaa. ¹⁵ Haxta no, masaque nac no lo Dios zig tib ncuaane sca nex rlaa; sca nac no lo me sacne laa no ngable lo Jesús. Nëzrii nëzrec nex zëbxlaa gox co, zigtaa lo grë zha ne ngable xnëz Diosa, zigtagaa lo grë zha ne zie nëz ne nitlow. ¹⁶ Par grë zha ne nole nëz ne nitlo, masaque rzac zho no zig tib gox ne nguid rlaa, haxta rsoladz zho pe nac guielgut ne quiambëz zho; sangue grë zha ne nole xnëz Dios, rzac zho no zig tib gox nex ne runcsoladz zho guielmban ndzon ne no ygaa zho. ¡Ni led chold zha ne gon grieelo gun dziin rii! ¹⁷ Nu rquiin zha ne dib zdoo rquiabladz gun dziin lo Dios, glu zho ne nli Dios pxeel zho, ne nli Jesús nacie zho. Sac no zha ne, loxaque rquiaalo zho ye zho rseed miech Xtiidz Dios, per laa zho runa par cuee zho dimi.

3

¹ Nana ne znu rne naa, guiab to bod yeque no rdziun zig run zha ne sca rquidie ga, lëëque zha runnon zho, rio zho dieen pe diidz ne rquia rey zho par glupaa dien cho nac zho. Ni lalnu rdziunnon no no, niicle peet diidz rquiindгаа no. ² Led yed no rquiin pe diidz ne dzeey no, to rlu cho nac no. Grëse miech ne gan zha notsëe Dios lo xquielmban to, gase gunbey zho no, ga glu pe nac dziin ne rdziun no. ³ Gane rrieequia nac to zig tib diidz ne quialu ganle cho nac no. Jesúszhal pquiaa diidz co, ni pquiind me pe tint ne nquiaa mew, sinque laa me pquiaaw con guielbiini chen zhiEspíritu Dios, men ne nguianban. Ni

pquiindgaa me pe lo guits ne nquiaa mew, sinque laa me pquiaaw zdoos to.

⁴ Ni ndionpaa no nli scaw, sac Dioszhal rluw, ne nac no zha ne ngab lo Jesús. ⁵ Per guiabd ne togo nose rrieelo rdziuun grë mine rdziuun no, led scada, Dios nac men ne racnien no rdziuun now; ⁶ sac me bdixbiini no zha cseed no miech diidz cub ne psan me. Gane laa no noseed miech niina, per rseete no zho tsienal zho mine rnabey ley, sinque laa no noseed zho guien zho tsienal zho mine rnabey Espiritu Sant. Sac tel leya, lëë gdib rnabeya guet grëse miech ngoopdol; sangue Espiritu Sant, laa me rlu zha ygaa zho tib guielmban ndzon.

⁷ Golsoladz ganle, zha blu Dios biini ne nac xquielndzon me zeene pcaania Moisés ley ne rnabey guet grë zha ngoopdol. Binidoo ne biaan lo Moisés dze co, haxta lëbd lo zha Israel gwi zho lo me, per dzega dzega biuu biini co. ⁸ Scaque nagon nolu Dios xquielndzon me, niina ne laa Espiritu Sant nolu zha ygaa miech guielmban; per, mazdraa gon nroob nac guielndzon rii! ⁹ Sac gon, tel scataa blu xquielndzon Dios zeene biaan guet grë zha ngoopdol; mazdraa dzigo nroob nac guielndzon ne rlu niina. ¹⁰ Ne nligaa, palalse ga nac biini ne blu lo Moisés zeene pcaania Moisés ley co, mazdraa nroob biini ne ziaadnie xtiidz cub Dios niina. ¹¹ Ni stiba, bza dze ne been ley co dziin; sangue xtiidz cub me, gdziind dze ne gdzëew. Gacxe waa, mazdraa nac biini ne ziaadniew.

¹² Ni ne ndionaxe no waa gdziind dze ne gdzëew, gane tiblque laa no noneew lo miech; ¹³ rdziuund no zig been Moisés. Sac tel Moisés, pquia tib lë lar lo me dzigo gond zha Israel zha bnitlo biini ne biaan lo me ga. ¹⁴ Ni rriequia ye lo grë zha Israel ga sca bdze, gacxe waa, haxta lo nadze riend zho zha zhobnee lo Xtiidz Dios, mine psan me padzeela. Ible riend zho ne bdedle dze ne pquiin diidz gol co, Jesúsle none gliladz zho niina. Me nac men ne cxal lo zho. ¹⁵ Ne nligaa sca nac zho, haxta lo nadze niicle rlabraa zho lo guits ne pquiaa Moisés ga, tibaque ndip nac zdoos zho.

¹⁶ Per tel zha ne csaan grë guielntseeb, dib zdoos zho guien zho cho nac Jesús, ible zlit me lar co lo zho; ¹⁷ sac gon, miech

ne nacniele zhiEspiritu me, led yedraa zho ngadoo lo ley gol co. Ni ndion ne ganle, meque ga nac Espiritu. ¹⁸ Gacxe waa, grëse ne ne ngab ne xnëz Jesús, led yedraa lo ne ndze. Masaque nac ne niina zig tib quiewan, zeene ran miech zha mban ne, ga ran zho ganle pa lotaa nac xquielndzon Dios. Tibaque nozhixcuaa zhiEspiritu me lo xquielmban ne, zigse zie dze noluraa me zha nactaa guielndzon ne rap me.

4

¹ Ne nligaa noxco Dios ne, gane niicle peet nond no laa me bzo no quianee no Xtiidz Ndzon me lo miech; ni choot rsaand dziin rii.

² Zeene rseed no miech, choot rquidied zho par gliladz zhow. Choot nolud wseed ne ziaate lo Xtiidz Dios; guieltole ga, tel dzio no yquidiee no miech, cseed no zho ncuane nacdraa Xtiidz me. Me zobwi ganle niapse diidzli rnee no, niicle grëgaa zha ne rdziuunbey no, nan zho rquidieed no.

³ No grë zha ne ib nëd tsoguc zha nac zhiwseed Dios mine nonee no; sac lëëque grë xtol zho notse lo zho, laa zho zie nëz ne nitlo zho. ⁴ Nëd zho gliladz zhow, sac ible mendox (ma ne nonabey lo guidzliu rii) noyun ncow xquielrien zho; gane riend zho ycaania zho Xtiidz Ndzon Jesús, men ndzon ne biaadlu ganle zhapaa nac Dios.

⁵ Laa no quiaseed miech, per rseete no zho gacnan zho dien cho nac no, sinque laa no noseed zho gunbey zho cho nac Jesús. Gacnan zho, ne me nac men ne rnabey; laa no, tib ngundziin winse nac no lo to, sacne rleynie no me. ⁶ Ne nligaa tib ngundziin winse nac no! Golwi ganle Dioszhal, men ne bnabey biaan biini ne rziini guidzliu, me bdixbiini guic no bien no xquielndzon me ga biaadlu Jesús.

Rsaand Dios zha ne dib zdoos rnalos me

⁷ Ne nlipaa, lega nacse no zig nac tib guies yu ne notsow grëtaa ncuane ndzon ne zieneedz Dios lo no. Gase na ganle rlu, Dios naccheña grësew, peet nond no loxaque nose.

⁸ Me nacnie no, niicle nroob zhgab ne rio no, per racmband no; niicle nroob nac guielxtseeb ne rdzian no, per choot rdziebd.

⁹ Tibaque notsidil miech no, per rsaand Dios no; niicle rsacsi zho no zootle laa no nitlole, per rbiire riochee no ga stib. ¹⁰ Zaatne ziotaa no, quiana miech gut zho no, zigne beenaque zho Jesús; per me rsi-laa no lадznia zho. Ga rlu ganle ne men mban nac me, ni me nacie no. ¹¹ Gzataa dze noxtseeb no gut miech no, loxaque ne rdziuun no xtsiin me; per ga rdeeda diidz rlu no ganle pa lotaa nacie me no, niicle ne tib lēse ben nac no. ¹² Ne nligaa, tibaque noxtseeb no lo guielgut ne znu nonee no Xtiidz Jesús; per scagaa, porne biadnee now i laa to bgaa guielmban ne gneedz Dios lo to. ¹³ Niicle nagon ne znutaa noxtseeb no, per ndionpaa no me quianap no, gane rdzieebd no noseed no miech Xtiidz me; zig zhobneeque lo Xtiidz me, zaatne rnee: “Bliladz naa mine rnee me, gane rne naaw.” ¹⁴ Ni ndion ne ganle, zigne bleeban me Jesús, scaque zbeeban me ne, lozh ga tipse gac ne gdzinnie Jesús ne lo me.

¹⁵ Grēse guielnē ne nodzian no, laaw nodzian no sacne nligaa noxco no to; zeena grēse to sēeb xnēz me. Sac telne ndal grē zha ne sēeb xnēz me, scaquegaa ndal zha ne gdeed xquizh lo me, cxobnen zho pa lotaa men ndzon nac me. ¹⁶ Mincocxe waa, ib choot riablod. Nli zigse zie dze laa no bii noyoxraa, sangue zhiespíritu no, zigse zie dze laaw racncubraa, laaw riaanmberaa nēz lo Dios. ¹⁷ Ni stiba, niicle ne znutaa nodzian no grē guielnē rii, per ncuaane tib rded naca, led ncuaane rnada; sac gon, zeene laa no lozh dieed grē min rii, mazdraa nroob nac lo guielndzon ne ygaa no, ni mincosi gdziindraa dze lozha. ¹⁸ Gacxe waa, choot rdziuuncasd grē ncuaane quiazian no lo guidzliu rii, sinque laa guic no nonie ygaa no grētaa guielbley ne no gbaa. Sac grē ncuaane ran ne niina, ncuaane tib rded naca; sangue grē ncuaane gard dzian ne ga, led yedraa min co nitlo.

5

¹ Ni ndion ne ganle, zeene laa xcuerp rii ne nitlo, laa Dios gneedz stib mine gdziindraa dze nitlo. Masaque nacse xcuerp rii ne zig nac tib yu guizh win ne rbēz miech lo wga; sangue cuerp ne gneedz me lo ne, rrieequia naca zig tib yu ne

gbiaazpaa ne gbaa. ² ¡Blactaa guielnē ne rdieed ne niina ne rdziaap ne cuerp rii! Gacxe waa, quiambiaaznē ne gdziin dze ne gneedz me stib cuerp co. ³ Sac gon, led niapdse espíritu gdziin ga, sinque none gapa cuerp. ⁴ Ne nligaa, niina ne mbannie ne cuerp rii, zeene nē nodieed ne, rziaac ne tebaa laa ne mbanniele stib cuerp co. Per par ygaa ne cuerp cub co, ible none guet ne. Per zienied guic ne sca, sinque laa ne racladz zhits cuerp riise tsie cuerp co, zig nacse ne niina ygaa ne guielmban ndzon co. Sca rziaac ne, sac choot rdziladz guet. ⁵ Dioszhal bzo ne ygaa ne min co, ni ible zaca, sac gon laa me pxeelle Espíritu Sant nacie ne.

⁶ Tel no, min co nagon quiambiaaz no; ndionle no laga mbannie no cuerp rii, grielod ygaa no min co, grielod gdziin no zaatne no Jesús. ⁷ Nli rdziand now niina, per dib zdoo no riladz no ib laaw none gac. ⁸ Gacxe waa, haxta nley rac zdoo no quiambiaaz no gdziin dze co; rziaac no tebaa laa no briele len cuerp rii, zeena guibannie no Jesús. ⁹ Min co nagon, tibaque noxco no gac no zigne rdziladz me, zigtaa niina ne no no lo guidzliu riiw, zigtagaa zeene gdziin no lo mew. ¹⁰ Sac gon, grēse ne zdziin dze ne laa ne gacredz lo me zaatne gun me guielwxtis. Grēse ne ne nac ne miech, tel zha mban ne niina ne rdziaap ne cuerp rii: zigtaa zha ne zaacse mbana, zigtagaa zha ne tel zhataa mbana, ga ygaa ne mine guioquia ne tib tib ne.

¹¹ Min rii nagon nonie guic no, gacxe waa noxco no nonee no lo miech zha nac Xtiidz Dios. Ni me nan ganle dib zdoo no nodziuun no dziin rii, ni racladz naa guien to ganle sca nac no.

Zaacse golgac lo Dios

¹² Grē mine blozh bne naa nu, zig bnele naa ga: nacda par dziuunnon no no. Laa no rnee grē min rii, zeena guienpaa to ganle cho nac no; ni scagaa, guien to zha ctsire to lo xtiidz grē zha ne squi riaad i rlozhd gacniats zho. Tel zha, laglaase rlu zho miech wen nac zho. ¹³ Nligaa, dib zdoo no noxco no xtsiin Dios, laa miech masaque rzac zho riotsle guic no. Nana niicle tel riotsgaaw, per xtsiin Dios nodziuun no.

Sangué no, ndionpaa no riotsd guic no; laa no rdziuun grē min rii, sacne noxco no cseed to Xtiidz me. ¹⁴ Laa no nodziuun dziin rii, sacne rleynie no Jesús, maase tel zhataa rzac miecha.

Ndionpaa no Jesús bgaa guielgut ne nioguial ne; scaquegaa, ndion no niina ne laa no bziaab xnēz me, rrieequia gutle no lo grētaa ncuaane ndzinlid ne bdziuun no glo. ¹⁵ Gacxe nagon waa, grēse zha ne rzēēb xnēz me, nodraa gban zho zigne notaa guic zho, sinque laa zho none tsoxco gban zho zigne rdziladz me; guien zho ganle, me gut bdiizh me xtol zho (ni brieaban me), par ygaa zho tib guielmban ndzon ne gdziind dze lozh.

¹⁶ Gotsaa guien sca, zha ne nole xnēz Dios, ziaacd ne zho zig rzac grēraa miech zho, rzac zho peet nond zho. Tel naa glo sca bzhaac naa Jesús, masaque bzob naa cholze miech nac me; sangué niina, ndionpaa ne ganle cho nac me. ¹⁷ Sac gon, grēse zha ne ne nlipaa dib zdoo rliladz Jesús, stible miech nac zho. Grēse tel zha goc zho glo, laa min co bdedle. ¡Ncube nac lo xquielmban zho! ¹⁸ Ni loxaque Diosse gon zrieelo sca gunncub miech. Sac gon, me pxeel Xpēēd me Jesús biaadtizh grēse xtol ne, laa ne biaanwen lo me. Ni scagaa niina, me bzo no znu quiaseed no miech, zeena gacnan zho zha grieelo guiaanwen zho lo me. ¹⁹ Znu gon naca: Laa Dios nodeed diidz niina guiaanwen miech lo me, gunquizhd me zho tel pe nactaa xtol zho, totsaque gliladz zho cho nac Jesús. Min rii nagon bzo me no nonee no lo miech. ²⁰ Golgan sca ganle, xmandad Jesús nac no. Me zobwi ganle laa no rnab lo to niina: ¡Golguiaanwen lo Dios! Golguien ganle, rrieequia gon Dioszhal rso diidz rii lo to. ²¹ Sac gon, Dios bzo Jesús bgaadz me grēse xtol ne, niicle ne ni tib dol rapd me; zeena niina ne laa ne wbig lo me, grieelo ndzinli gban ne, zigne racladz Dios. ¡Masaque Jesús bdiizh grēse xtol ne, psanwen me ne lo Dios!

6

¹ Gotsaa gwi ne ganle pa lotaa noxco Dios ne. Gacxe waa, no ne nac no zhingundziin me laa no rso diidz lo to: golguien golgon

mine nonee me lo to niina. ² Lo Xtiidz me, no tib zaatne znu zhobnee:

Lēētse len dze ne nosilaa naa miech, laa to bnab gacnie naa to.

Lēētse len dze ne rdeeda diidz gac mine quiambēz to, laa grē xliaadz to blanso lo naa.

¡Ni lēē dze co nu nagon bdzin! ¡Nadzegazh quiambēz me gbig miech lo me, zeena csilaa me zho!

³ Dziin rii quiadziuun no, choot quiadz-iuunctald xtol miech, choot noguibd sozit zho lo Dios. Zaatne ziotaa no, tibaque noxco no zaacse gac no, zeena tsod pe yquiaaqui zho gneenē zho Dios. ⁴ Zigtaa ncuaane rdziuun now, zigtaa grēgaa ncuaane nodieed now, rlu no ganle ne nli xtsiin me nodziuun no. Tel pe nactaa grē guielnē ne nodieed no, tel pe nactaa grē xliaadz no, niicle no zaatne rsacsi miech no, per choot rietede. ⁵ Blactaa zaatne rguin zho no, zaatne rsioogyu zho no, zaatne rriee zho ndal zho racntseeb zho lo no. Blactaa rdib rdzaag no rdziuun no dziin, no zaatne rriee zhimcaalo no dipse guieel, no zaatne retgbin no.

⁶ Ne nligaa rdzioxco no ndzinli mban no, choot rietede, wen wen rdziuunbey no zha nac Xtiidz Dios, sca ran miech ganle ne nli Dios pxeel no. Dib zdoo no rleynie no samiech no, wen rac no lo zho, zilu no ganle pa lotaa racnie Espiritu Sant no.

⁷ Niapse mine nac diidzli min co rnee no, ni scagaa Dios, nolu me ganle ne nli scaw. Niapse guielwen, niapse diidz ndooladz rlu no ne nli lo Dios quiadziuun no dziin.

⁸ Choot rsaand mine pso Dios no nodziuun no, maase niicle mine runtaa miech no. No zaatne runnon zho no, nogaa zaatne rzhidznie zho no; no zaatne rneenē zho no, nogaa zaatne rleynie zho no. Niicle ne diidzli rnee no, per no zho rzac noquidiee no miech. ⁹ Runbeyd miech cho nac no, sangué Dios runbey me no. Niicle ne tibaque noxtseeb no lo guielgut, per peet gard gac no laa no bii mban; niicle ne rsacsi zho no, per choot gard guet. ¹⁰ Niicle ne no hor mban rac zdoo no, per znusaque rneedz Dios tib guielbley zdoo no. Nacd no zha dimi, per nroob nac grē guielnzaac

ne rgaa miech zeene rnee no lo zho. Rdziaapd no grē ncuaañe rap grēraa miech, per ncuaañe rdziaap no, nroob nona.

¹¹ Bets, bzian, ne no to Corint i, laa no rzodiidznie to, laa no rnee lo to grēse zigne rza zdoo no. Ne nligaa rleynie no to. ¹² Telne rzac to gard gacpaa ne tipse, per led nod naca. Tel no rleynie no to, sinque to gon rien no laglaase rleynie to no. ¹³ Ne nligaa peet rqueets naa lo to, laa naa rne lo to zig rnee tib dad lo mēēd. ¡Scaquegaa to, golsiguieł zaacse golgac!

Zhaa nac biini lo guiełcow

¹⁴ Golguien, guiabde to tipse gac to grē to zha ne gard sēēb xnēz Dios. Golgan ganle, tib zha ne nole xnēz me, rdzieeld gac zho zig rac zha ne bii no lo dol. Zig nacgaa biini, zhaa nac biini, zhaagaa nac lo guiełcow. ¹⁵ Sac gon, tel Jesús, ¿niacxe tipse nac me grē me mendox? Scaquegaa grē zha ne nole xnēz mew, grielod tipse gac zho grē zho zha ne no lo dol. ¹⁶ Tel xyadoo Dios, nacda zig nac xyadoo grē mdio. Ni rrieequia gon ne nac xyadoo me, zigne raquiet lo Xtiidz me zaatne rnee:

Na gbannie naa to, ine sēnie naa to.

Naa gliladz to, ni scagaa to, lo naa ygab to.

¹⁷ Gacxe waa, rbiire me rnee me:

¡Golriee lad grē zha qui, golbiche lo zho!

Gunde to grē ncuaañe ndzinlid ne run zho, golbig lo naa, naa ycaania to.

¹⁸ Naa gac Pxoż to grēse to, scagaa to, laa to gac xpēēd naa.

Lēē xtiidz meñ ne rnabey to nu.

7

¹ Bets, bzian, gotsaa gwi ne ganle zha nactaa ncuaañe psan Dios diidz yгаа ne. Gacxe waa, golgotsaa lozh griee ne lo grē zhgab yozh, lo grē ncuaañe ndzinlid ne runctal xtol ne. None zigse zie dze dzioxcoraa ne gban ne zigne rdziladz me.

² Ne nligaa, zaacse golgac golcaania no stib. Tel pe guiełnē ne noded to, tel zha rzac to, to bguiba; zig nac no, choot noquidiede to, choot nosacsid to. ³ Guiabde to togo noquiago naa to nu, laa naa nile ganle dib zdoo no rleynie no to. Len ngbidz ne gbantaa no lo guidzliu rii, ib csaand no to.

⁴ Laa naa rne grē miñ rii lo to, sacne nanpaa naa zha nac to, nanpaa naa zac gne naa lo to

zigne nose guic naa. Zeene rsoladz naa to, haxta riaanladz naa grē mine nodeed naa, ine riaad tib guiełbley zdoo naa; haxta riats naa ne runbey naa to.

⁵ Wlal ne blanso no Macedon nu, ni tib lē notiblid guic no; lala noxtseeb no lo grē zha ne quianal no, lala nonieque to guic no dien yo to. ⁶ Per rsaand Dios zha ne no lo zhgab, me pchoobladz zdoo no; sac zeene blanso Tit lo no nu, ⁷ blansonie me diidz zaacse pcaania to me. Per nli rley no bdzion ndzinlile mban to, nē me bio to guiełnē grē len dze ne bded ga, ni nē me nonie no guic to, quiambēz to tebaa zha ganniob to lo no stib.

⁸ Zeene pxel naa guits co lo to glo, mban goc zdoo naa sac bien naa ib zgoguielnew to, sangue niina racmbandraa zdoo naa; sac rien naa niicle ne bio to guiełnē tib bla dze, per na laa ncuaañ co bdedle. ⁹ Gacxe waa rley naa niina, per guiabde to togo rley naa bio to guiełnē, sinque rley naa gon naa laa to wbiire wbig lo Dios por guiełnē ne bio to ga. Ni sca nagon racladz Dios gon grē zha ne ngab xnēz me zeene runctal zho xtol zho, gane rienpaa naa led psacsid no to ga. ¹⁰ Zeene Dios rdeed diidz sca rio miech guiełnē, lo guiełnē co laa zho rbig lo me rsanmbe me zho lo xtol zho; rsaan zho tel pe nac ncuaañe ndzinlid ne noyun zho. Zha ne sca rac-wen lo Dios, nodne gacmban zho guiab zho pe nacne bded zho guiełnē co. Laa grēraa guiełnē ne ran miech, zig nac zha ne nod xnēz Dios, loxaque rlozh runmbana zho, laa zho bii zie nēz ne nitlo zho. ¹¹ Golgan ganle, pa lotaa bzhixcuaa to niina ne bio to guiełnē co. Haxta baa to biini, bioxco to blee to zha co lo dol ne quiayun zho ga; bien to ganle nonguiela rlisqui naaw. Gacxe waa, zeene gon to pa lotaa nac dol co, güeyniew guic to ni wbinladz to; gonzedraa to zho. Niicle ne gocladz to tebaa i zo naa nedz naa rson dien zha niun to; per tibaque beenquizh to zho mine been zho ga. Wen ne sca been to, ga blu to ganle rdziguiende to dol ne been zho.

¹² Ne nligaa tibaque noxco no zaacse gac to. Zeene pxeel no guits co lo to, guiabd ne togo zhizhgabpaa zha ne been dol co no no, zhizhgabpagaa pxoz zho; sinque laa no

pxeela sac tibaque noxco no zaacse gac to. ¹³ Gacxe waa, zeene bdzion no bin to diidz been to mine rnee no lo guits co, per nli rley no.

Ni zeene bdzion no grëse to zaacse blëzlo to Tit, mazdraa bley no; niicle megaa rley me ne squi niowse gon to me; haxta nguieel rac me niina. ¹⁴ Bzodiidzle naa lo me, ne squitaa wen miech nac to, gane rley naa psande to naa guielto. Tel naa niapse diidzli rne naa, zig nac niina, zig repse naa lo Tit scase gon me rac to. ¹⁵ Rleynie me to, rzac zdoo me zeene rsoladz me grëse to ndooladz goc to pcaania to me, ni bin to diidz been to mine bnabey me to. ¹⁶ ¡Ne nligaa, rley naa niina bin naa squi zaacse rac to! ¡Nasi, nanpaa naa racnie to naa zigne racnie naa to!

8

Dib zdoo to goldeed gon

¹ Bets, bzian, laa no gzodiidz lo to ganle pa lotaa quiayacnieñ Dios grë zha ne ngab lo Jesús nëz Macedon nu. ² Nli nroob grë guielne ne quiayan zho, per nguieel rac zho. Len dze ne bded nu beenlo zho tib gon, niicle ne zhis ncuaane rap zho, per nroob gon ne beenlo zho. ³ Laa naa rnew lo to, sac naazhal gona. Ne nligaa, dib zdoo zho bleeladz zho grë ncuaane bloogon zho; ncuaane rgaataa lo zho laa zho bdeeda. ⁴ Dzigo bnab zho lo no gdeed no diidz ye xgon zho guey lo grë zha ne nacgrë ne, zha ne guieñd pe yquuin. ⁵ Ni lëdsew ga, bzee zdoo no zeene bdzion no blozhse psan zho zho ladznia Dios, laa zho wbig lo no në zho, mine csiaabtaa Dios guic no gnabey no zho, zun zhow. Ni lalnu gon güeynied guic no gun zho grëtaa min rii.

⁶ Niina ne bdzion no znutaa biabgan zho nëz rii noyunlo zho gon rii, nacne rdzieets no lo Tit siguiel me guiaad me nëz lo to i stib; zeena lozh gunlo to gon ne bnabeyle me to i quiayunlo to. ⁷ Rdziuunbey no to: dib zdoo to rnalo to Dios, zha niini nac to, rien to zha gnee to Xtiidz Dios lo miech, nguieel rac to run to xtsiin me, ni pseed to rleynie to samiech to. Nana sca, zig nac gon rii, scaque dib zdoo to goltsoxco golgunlow.

⁸ Laa naa bzeta lo to nu zha been zha Macedon, per guiabde to bod nonabey naa

to scapaa gun to. Sinque laa naa bzeta lo to, zeena gacnan to ganle ye zha co pquiabladz bdeed gon co. Nu nagon rdeeda diidz glu to ne nli rleynie to grëraa zha ne nacgrë ne, led loxaque diidzsew. ⁹ Golwi ganle, zig nac Jesús pa lotaa noxco me ne. Niicle ne me nacchen grëtaa ncuaane no, per bdeed me diidz goc me zig tib zha ne peet rapd; ga bgaa ne grëtaa guielnzaac ne rap me. Laa me been min co sacne rleynie me ne.

¹⁰ Wena, tebaa tsoxco to lozh gunlo to gon qui. Golsoladz ganle, topaa psilo bleebey gaclow wdibiz ga, ine nguieel rac to psilo to. ¹¹ Nana sca, zigne psilo to hor co, scaquegaa niina nguieel golgac golsiaal lo dziin co. Golquiabladz tel palaltaa ncuaane rgaa lo to tib tib to, dib zdoo to goldeeda; ¹² sac zeene dib zdoo miech rquiabladz zho cogon zho, tel palaltaa mine ygaa lo zho, scaania Diosa. Nanle me palal ncuaane rgaa lo tib tib miech, gnabd me ncuaane ni quianied zho.

¹³ Sac nacda ne ygad to grëse ncuaane rap to lo stib zho, lozh ga guiaanmban to; laa zha yquianie grësew. ¹⁴ Led scada. Laa min rii rac, zeena grëse ne lalga ncuaane yquianie ne. Niina ne rgaaw lo to, goldeed palala yquuin grë zha ne rapd nrooba; dzingaa dze na pe gunfalt lo to, dzigo laa zho gneedz tel pe nacgaa ncuaane quianiede to. Sca none dziuunlsa ne xyudar zha ne nacgrë ne, zeena zig rne naa ga: lalga ncuaane yquianie ne. ¹⁵ Golsoladz ganle, znu rnee lo Xtiidz Dios: “Zha ne ptop nrooba, beenda sobr lo zho; niicle beenfaltegaaw lo zha ne ptop zhisa.”

Laa Tit guiaad i stib

¹⁶ Xquizh Dios psiaab me guic Tit, zigne rzacaque naa to scaque rzac me to; tibaque nonie to guic no. ¹⁷ Zeene bnab naa lo me siguiel me guiaad me lo to i, bzhiguielga me; ni nolegaa guic me guiaad me, sac ne nligaa racladz me guiaadso me lo to stib. ¹⁸ Nëz rii, no tib bets ne, nroob yudar quiayun me nogaaz Xtiidz Dios lo miech; zaatne rcaalsataa zha ne no xnëz Dios nu, grëse zho runbey me, tib men nziuu nac me lo zho. Me gacgrop Tit, niina ne laa no cxeel Tit lo to i; ¹⁹ ni meque bzooblo zho, sēnal zhits no zeene guiosan no gon

rii. Nozhal guiosana, sac ne nligaa dib zdoo no noxco no zha gac xyudar grë zha ne guiend pe yquuin. Nu rlu ganle pa lotaa men nroob nac Dios, sac me quiayacniën ne ne laa dziin rii noyac. ²⁰ Gza no bets co guio, zeena gzadold zdoo miech guiab zho nend zha lega zhieën no palal gon rii, sac gon nligaa nroob naca. ²¹ Dios zobwi ganle mbe lo no, ni racladz no ye miech gan zho ganle ne nli zha legal nac no. Min co nagon, nacne sca guio no gza no.

²² Rdziuunbey no stib bets ne nu, rdzian no nli dib zdoo me rleynie me Dios. Niina ne laa grop zha co guiaad i, ye me guiaadnal zhits zho. Rley me ne laa me guiaadgan to i, sac ziyon me ye to noxco gacnie to zha ne nacgrë ne.

²³ Tel nand new cho gnabdiidz lo to dien cho nac Tit, golguiab lo zho tipse nac no grop no me, xyudar naa noyun me quiaseed no to. Ni tel gnabdiidz zho cho nac schop zha ne ziaadnal zhits me i, dzigo golguiab grë zha ne ne no nëz rii pxeel zho, dib zdoo zho noxco zho mban zho zigne rdziladz Dios. ²⁴ Golguien sca, gza zho zigne ziaad zho lo to i, niowse golcuëzlo zho. Gollu ganle ne nli dib zdoo to rleynie to zho, zigne rleynieque to naa; zeena gacnan grëraa zha ne nacgrë ne nli mine rnee no zeene rzodiidz no lo zho zha nac to.

9

¹ Nanle naa, rquiindpaa gni naa lo to zha gdeed to gon ne gaclo nu gac xyudar grëraa zha ne nacgrë ne, sac laa to noyunlolew. ² Runbey naa to, nanle naa ible rquiabladz to gun to xyudar zho, gacxe waa rley naa rzodiidz naa lo zha ne no nëz Macedon nu, rne naa lo zho: wdibizlaa psilo to nëz Acay i quiayunlo to gon co. Min cocxe waa, zeene bin zhow, nzian zho pquiabladz laa zho bdeeda. ³ Per laa no rxeel gza bets rii ziaad i, ziaadguncsoladz zho to lozh gunlo niob tow; zeena glu ganle led lega rneed no zha nac to. ⁴ Sac gon guielto ga grieequia naa lo zha rii, tel guialnie naa bla zho i, ni gan zho peet gard gaclo. Nli ziaan naa guielto, per mazdraa gon nac guielto ne guiaan to. ⁵ Min co nagon, ni naa mazd cxel naa zha rii, ziaadnerga zho zeena gun zho xyudar

to lozh ycaalsa gon ne pquiabladz to gunlo to ga.

Laa naa rnab lo to, tel pe nac ncuaane cogon to, dib zdoo to goldeeda. Golguien zha cogon to. ⁶ Golwi ganle zha nac guielgon: Zha ne zhis ran, zhis guielnzaac ne rcaa zho; sangue zha ne nroob ran, scagaa nroob guielnzaac ne rlis zho. ⁷ Tib tib to sca, golcobey palal ncuaane gdeed to. Mine gdeedtaa to, dib zdoo to goldeeda; ib gunde to ne guiab to por rac-wnabsew laa to gdeeda. Sac gon, zha ne dib zdoo rdeed ncuaane rgogon zho, rleynie Dios zho. ⁸ Ni me ne nac me men ne rrieelo rneedz grëse ncuaane rquuin, me nac men ne gneedz grëtaa ncuaane yquuin to; ni haxta ziaan mine gdeed to gac xyudar grëraa zha ne nacgrë ne. ⁹ Zigne raquetaque lo Xtiidz me, zaatne rnee:

Zha ne nguzobdiidz lo Dios,

dib zdoo zho rgad zho ncuaane rap zho lo grë zha ne guiend pe yquuin;

ni scagaa sëeb diidz ne miech wen nac zho.

¹⁰ Dios gunlay ncuaane quianie to, ygaaw gdeed to, ni scagaa me gacniën to nroobraa guielnzaac ne yгаа to. Golwi ganle, zha runlay me zha ne ran: Me psan grëse lo bni ne ran zho, ni meque rchooba; rlozh ga, nroob guielnzaac ne rlis zho, rgaaw row zho.

¹¹ Ne nligaa, Dios nac men ne gunnroob ncuaane quianie to, zeena scagaa nrooba cogon to. Golguien ganle, zeene laa no guiosana lo grë zha ne yquiina ga, blactaa gley zho gdeed zho xquizh lo Dios. ¹² Led lega nacdse gon ne gdeed to i. Sac gon, led loxaque xyudardse zho guna, sinque zeene laa zho ycaaniaw, haxta squiabladz zho dib zdoo zho gdeed zho xquizh lo Dios. ¹³ Zley zho gan zho grëtaa ncuaane cxeel to yquuin zho; ni zleynie zho Dios gan zho ron to mine rnabey Xtiidz Jesús. ¹⁴ Haxta dib zdoo zho gnab zho gacniën Dios to, por grëtaa guielnzaac ne gdeed me ga yгаа zho.

¹⁵ ¡Xquizh xquielnzaac Dios, sac gon tel me nroobraa nac guielnzaac ne bneedz me lo ne! ¡Gotsaa gwi ne ganle, haxta Xpëed me bleeladz me!

10

Rieguial gnabey Pabl lo zha Corint

¹ Ziyon naa rnee zho i, zeene zose naa zit nguieex rzë xtidz naa rxel naa; laa zeene zo naa lo to, rdziel naa pe gne naa. Sangue tel naa, tibaque nac naa, ndooladz rac naa lo to, niicle zeen tel pe diidz ne rsogaa naa, ndooladz rne naaw; zig gun Jesús, tel niaca mine mezhah gnee lo to. ² ;Tebaa gdzind dze pe yquiaqui glu naa xquieldox naa lo to! Zha ne squi rzac lalaque nac no grë no grëraa miech, rnee zho mine run miech, mincoque rdziuun no, ;tebaa siguiel zho zaacse gac zho, sac racladzd naa tilnie naa zho!

³ Nli miechse nac no, per ib zionald no gacndaan no zigne racndaan grëraa miech guidzliu. ⁴ Sac tel no, choot rnalod grë guiib las ne rnalo zho, sinque laa no rnalo poder ro ne rap Dios; mincosi zrieelo gnitlo grëtaa guielntseeb ne racladz mendox gac. ⁵ Con poder rii, zrieelo csioog no ro zha ne squitaa lega rnee, zha ne racndaan nêd zho gacnañ miech cho nac Dios. Grë zha ne racntseeb lo Dios, con poder rii zrieelo co no guic zho gbiire gbig zho lo me, gac zho tib miech nguzobdiidz lo Jesús. ⁶ Ni poder co yquiin no gnee no lo to lozh guien to gban to zigne racladz Jesús; lozh ga, grëragaa zha ne racntseeb, lëëquew yquiin no par gacnañ zho ganle zha rieguial gac zho.

⁷ Zha ne rnee i loxaque rzedz yan naa, laglaase ga ran zho, nand zho zhapaa nac naa. Naasi xnëz Jesús no naa; gacxe waa, zha ne rnee xnëz me no zho, none guien zho ganle cho nac naa. ⁸ Nana no to guiab guielniatsle nu, sac rlu naa ne naa rnabey lo to. Per nacda guielniats, ible Dios bzo naa gnabey naa lo to, ni laa me bzo naa par glu naa zha tsienal to grë mine rnabey me, bzod me naa par yquidiee naa to tsienal to nêz ne nitlo to. ⁹ Golgacnañ sca ganle Dios bzo naa, guiabde to togo lega rnese naa par ctseb naa to. ¹⁰ Sac nanle naa no zha ne rnee i: “Gonde to mine rnee men qui. Loxaque lo guits ne rxeel me squitaa ndox rzë xtiidz me, per loxaque diidza. ;Zeene zo me lo ne, tib zha yozhsew, per ni riend me zha gnee me!” ¹¹ Per led scada gon. Niina ne laa naa guial i, laa naa glu lo zho ganle zigne rzë xtidz naa zo naa zit, sca nac naa.

¹² Ib guiabde to, togo ye naa quiayun zigne run zha qui, lëëque lëë zho runniats zho. Tib guieln xen ga, sac gon lëëque zha runnon zho. ¹³ ;Tel no, choot rdziuunniatsd no ncuane ni nacd no! Ni zeene rnee no cho nac no, per mine bzo Dios no nodziuun no min co rnee no; ni mecxe waa bzo no quiaseed no to.

¹⁴ Ible riogual ne no gnabey lo to, sac gon no glopaa biaad i biadseed no to zha nac Xtiidz Ndzon Jesús; choot noziaabd zaatne rioguald no. ¹⁵ Stiba, rdziladzd no gdaannie no xtsiin stib miech. Laa no bii cseed to lozh tsoguic to zha nac Xtiidz Dios, zeena haxta yele to gun xyudar no ygaazraa Xtiidz me. ¹⁶ Dzigosi nagon laa no guio grëraa guiedz ne ndxie dib nêz qui, guioseed no zho gacnañ zho zha laa zho lo dol; per zig rneque naa ga, guiosiaabd no zaatne psilole stib zho, zeena gan miech ganle rdaannied no xtsiin stib zho.

¹⁷ Znu ziaad lo Xtiidz Dios, zaatne rnee: “Zha ne zienie guic xoobnen lë zho por dziin ne run zho, mazd tsoxco zho xoobnen lë Dios.” ¹⁸ Sac paat rquiinda ne lëëque ne gunnon ne, mine mazdraa rquiin nacne Dioszhal glu zha non nac ne.

11

Nlid Dios pxeel zha qui

¹ Laa naa rnab lo to, ;golxecw yquiaadiag to mine gne naa nu, niicle tel no mine rzac to rquiind! ² Golgacnañ ganle, zigne rzac Dios to scaque rzaac naa to, ib racladzd naa cho guiaadquidie to. Mine racladz naa Jesússe gleynie to, zig run wnaa nguieg ne no xtiidz ctsieelnia. Sac tel wnaa nguiega, mgui ne no xtiidz zho mgui cose rleynie zho, haxta rdziñ dze ne rtsieelnia zho. ³ Sca none grieequia to lo me; per rdzieeb naa gon nend zha yguib mendox yquuil ma to, gondraa to mine rnabey Dios, dzigo laa to gac zig rac grëraa miech ndzinlid. Sac gon tel Ev, sca pquuil ma Ev.

⁴ Laa naa rzet min rii lo to, sac rien naa, zha ne riaadtaa i ween rdeed to diidz rquiaadiag to zhiwseed zho. No zho rzeet Jesús, rzeetgaa zho espíritu, per rzeete zho me zigne biadseed no to; rneegaa zho zha laa miech lo dol, per nacda zigne pseedle to glo. ⁵ Haxta rnee zho, rienraa zho lo

grëraa zha ne noteed Xtiidz Dios; san_gue naa, nan_paa naa led scada, zrieelo glu naa lo zho gan_le peet rien_d zho. ⁶ Nend nli gacd naa gne naa zigne rneetaa zho, per zeene rne naa rien_paa naa ne diidzli none naa; ni zian_legaa tow gan_le.

⁷ Rzaac naa lëda ga ben naa, zeene bial naa bialseed naa to Xtiidz Dios; sac rsoladz to gan_le ib peet bnabd naa lo to, scase bialseed naa to. Niicle mban bdeed naa, per bioxco naa wbig to lo Dios bgaa to guiel_nzaac nroob ne rap to niina. ⁸ To rieguial needz ncuaane nquiin naa, na lel grë zha ne nole xnëz Jesús len_dze co, zha co pxeel ncuaane pquiin naa, rriequia bla naa xtimi zho ga. ⁹ Niicle bdziin_dze ne peet guien_draa lo naa, per ni tib lo to ib psodziind naa; lëëtaque len_dze co biaad bla zha bets ne zha ne ziaad nëz Macedon, zha co biaadnie ncuaane pquiin naa. Ib peet bnabd naa lo to hor co, ni gdziind_gaa dze ne pe gnab naa. ¹⁰ Ni gol_gacnañ gan_le, ib tedsod sodiidz naa grë min_rii dib nëz Gres i. Ible zun_naaw, led yed naa rquidie, sac gon_runbey naa zha nac Xtiidz Jesús. ¹¹ Per guiabde to togo rlëënie naa to, racladz naa csañ naa to guiel_to; sac Dios zobwi gan_le rleynie naa to. ¹² Gol_gacnañ sca led scada, sinque laa naa gun_min_co, zeena csioog naa ro zha ne rlozhd gacniats i, rnee zho ye zho quiayun_xtsiin Dios zigne quiadziun now. ¹³ San_gue no, ndion no nlid Dios pxeel zho, lega noquidiese zho to i squi no zho, rquiaalo zho zig nacne nli xtsiin Jesús quiayun zho.

¹⁴ Ni led ncuaane gzeed zdoo ne ga. Sac ible sca run_mendox, no hor rzëëb ma rded ma zig tib xmandad Dios. ¹⁵ Gacxe waa, jzha ne squi run_xtsiin ma, min_coque run zho rquiaalo zho rac zho zig cho miech wen, rquidie zho miech! Per zdziin_dze ne laa zho ygaa guiel_nëdox ne tsieguial zho, zaatne tsietizh zho grëtaa mine noyun zho i.

Blactaa ncuaane zadeed naa

¹⁶ Laa naa rnab lo to nu stib, gol_quiaadiag mine gne naa, niicle tel_rzë xtiaz naa zig rzë xtiidz zha ne rzhin_le guic. Nli lega niats gne naa, per gol_xecw gon tow, sac laa naa gun_non naa zig run grë zha qui.

¹⁷ Led Jesús d rnabey znu gne naa, sinque masaque laa naa gun_min_rii, zig run_tib zha ne riotsle guic. ¹⁸ Tel_squittaa niats rac zha qui lëëque lëë zho runnon zho, lozhd gool zho lo to dien_pe nac ncuaane noyun zho; gol_quiaadiaggaa mine gne naa nu na gan_le:

¹⁹ Conque rzac to name nixbiini to, jzha nac dzigo rdeed to diidz rquiaadiag to ncuaane rnee grë zha yozh qui? ²⁰ jPe ib rien_de to gan_le quianabeyzhoole zho to i, quiasacsi zho to, quiaquidie zho to, quiala zho grë ncuaane rap to, quiasanwin zho to, ya zig zgap zho lo to? ²¹ jHaxta rtoladz naa gon, sac laa ne naa squi nabey to lel zhale squittaa no!

Grë ncuaane riats zho i nac zho, ye naa zrieelo sca gunniats naa naa (znu nagon rac zha ne rzhin guic). ²² jTel_ne riats zho rnee zho zha Israel nac zho? Yecxe naa waa zha Israel nac naa. jTel_ne rnee zho lo dii ne bzooblo Dios ga ziaad zho? Ye naa lo dii co zial naa. jTel_ne rnee zho Abraham nac xmengol zho? Men_cocxe waa nac xmengol naa. ²³ jTel_ne niats rac zho rnee zho xtsiin Jesús quiayun zho? Gacnan zho gan_le, naasi xtsiin_paa me quiayun naa. Nroob dziin ne ziyun naa, blactaa ncuaane zadeed naa, pe zhidaa zigo miech naa ladzguiib, blactaa zineedz dooguid zho naa, blactaa zaatne zadedlaa naa lo guielgut. ²⁴ Gaayle vuelt zisacsi zhiwxtis zha Israel naa, galptsibguieega nia dooguid bneedz zho naa. ²⁵ Tsonle vuelt zineedzyag zho naa, stib vuelt bneedzquie zho naa. Tsonle vuelt zadzieelo naa rdedquie barcw ne no naa len_nisdoo; tib vuelt, tib dze tib guieel bzhoobse naa lo nisdoo. ²⁶ Pa lotaa grë dan ne ziya naa. Nzian vuelt ne bdedlaa naa niet naa: zaatne bdedlaa naa lo nis guiubee, zaatne bdedlaa naa lo ngbaan, zaatne bdedlaa naa lo grë menzit, zaatne bdedlaa naa lo grë menladz naa. Ziy-oxtseeb naa lo guielgut, zigtaa zaatne nac len_guiedza, zaatne nac dana, zaatne nac lo nisdoo, zigtagaa lo grë zha ne laglaase rquiaalo rliladz Jesús. ²⁷ Blactaa rdib rdzaag naa run naa dziin, blactaa guieel ni niip raaguiess naa, blactaa zaatne retgbin naa, zaatne retnis naa, zaatne rcuan naa, zaatne mbanse rcuub naa ni guien_d lar ne

piix naa. ²⁸ Ni zhaaque tibaque nonie guic naa dien yo to, grëse to ne nac to zha ne nole xnëz Dios, zha no to tib tib guiedz zaatne squi blansole Xtiidz Dios. ²⁹ Zeene ron naa cho tib to racladz guiaan zdoo, mban rac naa zeene rrieelod gane naa lo zho; zeene rongaa naa cho tib to quiayunctal xtol stib zho, ni rrieelod galisqui naaw lo zho, scaque mban rac zdoo naa.

³⁰ Grë mine bne naa nu, nacda guieiniats; telne rieguialpaa gunniats naa naa, mazd gzet naa grë mine rlu ganle peet gacd gun naa naase. ³¹⁻³³ Zig bzhaac naa tib vuelt zeene bia naa Damasc, len dze co zob tib gobernador nac dziin lo rey Aret. Bnabey gobernador co xmenguiib me pquianap zho gzase puert ne rap biedz nroob ne ndze igo ro guiedz co; nan me naaz zho naa ngo zho naa ladzguiib. Per brieelod naaz zho naa, sac grë zha ne nole xnëz Jesús ga, zeene bin zhow dzigo bloo zho naa tib len chicuid pteed zho naa tib ro ventan ne quia cho biedz nroob co. Sca bdeeda diidz brie naa ga, biabd naa ladznia gobernador co.

Ni Dios gon, men ne nac Pxoz Jesús, men ne rieguial dziuunnon ne gzataa dze, me zobwi ganle diidzli rne naa.

12

Racniatsd Pabl

¹ Nanle naa nonguielda lëëque ne gunniats ne, per laa naa sodiidz lo to ganle zha nac grë ncuaane zinabey Dios zilulo lo naa, ni grëgaa mine zinee me lo naa.

²⁻³ Niina rac tsiida iz ga blis Dios naa güeynie me naa gbaa. Nand naa dien pe dib znu naa bia naa, te zhiespírituse naa ye güeynie me; loxaque mese nan dien zha güeynie me naa. Loxaque mine bien naa ne laa naa bia lugar ndzon co, ⁴ ga bin naa grë diidz ndzon ne wlaltaa gard gon miech, ncuaane guiend zho zha naca, ni nodgaa diidzbey gne naaw. ⁵ Zrieelopaa nagon gunniats naa naa ne laa naa bia ga, per ib gund naa min co. Laa ne gunniats naa naa zig rnele naa ga, mazd gzet naa grë mine rlu ganle peet gacd gun naa naase. ⁶ Ni tel gacladzgaa naa gunniats naa naa por mine blozh bzet naa nu, led guieinxend ga gun naa; sac mine nlipaa goca. Per rund naa min co, sac laa naa racladz tozhal guien

cho nac naa, benque ran to ganle zha mban naa, rangaa to zha rne naa.

⁷ Ne nligaa ndzondoo nac grë ncuaane blu Dios lo naa ga, zac nazho gunniats naa naa sac naa gona; per parne gund naa min co, laa Dios bdeed diidz biaad tib xmandad mendox psanwin naa, biaan tib yoob xcuerp naa zig nac zeene pe tib guiets nroob ne niaaz naa. ⁸ Tsonle vuelt zinab naa lo Dios ctiche me yoob rii; ⁹ biontaa vuelt në me lo naa: “Bui ganle laa naa nacniele luu, ni min co nac mine rquuinraa lo luu. Peet tsienied guic luu sca, zha ne squi nsis rac, ga rdeeda diidz rlu naa ne nli naa nacnie zho.” Min co nagon rley naa, sac ne znu nsis rac naa, grëse miech zeene ran zho grëtaa ncuaane rrieelo run naa, rien zho nli Jesús nacnie naa. ¹⁰ Ne nligaa rley naa, sac niicle ne miech gzhe gzhele rac naa, niicle nroob guieinë ne nodeed naa, niicle rbidzgo miech lo naa, rtsidil zho naa, no hor guiend pe yquuin naa, per rley naa sac laaw nodeed naa porne no naa xnëz Jesús. Rne naa rley naa, sac zeene sca zootle grieequiadraa naa lo zhgab ne no naa, hor co laa Dios rlu ne me nacnie naa.

¹¹ ¡Nligaa lega guieinxenle nu znu rne naa, rac naa zig tib zha ne rzhinle guic! Per to gon rap dol, sac laa ne cxobnen to nli miech wen no, lel zhaa mine noyun to. Nli nacd naa cho zha non, per tsod ncuaane csaunwin grë zha qui naa, niicle ne squitaa rzac zho zha rien nac zho, niicle ne rnee zho Dios pxeel zho. ¹² Golsoladz ganle, zeene bialseed naa to i, blu naa lo to ne nli Dios pxeel naa noteed naa Xtiidz me, blactaa grë ncuaane bneedz Dios diidz blu naa lo to, blactaa grë milagr, blactaa grë ncuaane bzee zdoo to gon to. Biod dze ne nieednie naa to. ¹³ Lëëse mine bend naa lo to i, nache nab naa needz to pe nquuin naa; sac grëraa zaatne ziyaseed naa miech, zha rneedz ncuaane rquuin naa. ¡Golgun dispensar telne rbinladz guic to min co!

Nonie zha Corint guic Pabl

¹⁴ Laa naa nozhixcuaale par guialgan naa to stib. Nu gac tson vuelt guial naa lo to i; ni scaquegaa niina gon ib csodziind naa lo to. Sac tel naa, noguibd naa dien pe gneedz to lo naa, sinque to guialguib

naa. Golguien ganle, niicle ne racladzde to, per rriequia gon mēed nac to lo naa; ni ndion ne ganle, led mēete rieguial gdeed ncuane yquiin dad, sinque dad none gdeed ncuane yquiin mēed. ¹⁵ Ne nligaa, tib guielbleya lo naa quiateedlo naa to, laa naa noxco guien to zaacse gban to, zeena gdziñ to zaatne gneedz Dios cuēz to. Xco co no naa, ib rquiad zdoo naa lozh grē ncuane rap naa, o lozhgaa naa lo xco co; maase niicle squi zootne laa ne rleynieraa naa to, lel nozozit to lo naa.

¹⁶ Nanle naa, no bla zha ne rnee i: “Nli peet bnabd me zeene biadseed me ne, per ne squi miech ndzielguic nac me bod no pa stib mod ne rienđ ne quiaban me ne.”

¹⁷ Nana, zig nac zha ne zixel naa ziyaadgan to i, ¿pe niacxe biaadban zho to? ¿Pe niacxe biaadquidie zho to? ¹⁸ Naa quia bnab naa favor lo Tit biaad me i, ni pxel naa stib zha bets ne biaadgrop me. ¿Pe no pe bnab zho lo to? Golgacnan ganle nodziuuñd no miñ co, sac zigtaa naaw, zigtagaa mew, dib zdoo no nodziuuñ no dziin rii, choot noquidied miech.

¹⁹ Nana gza zdoo to guiab to bod parne guiaanwen no lo to, gane znu rne naa. Dios zobwi ganle led scada. Bets, bzian, grē mine none naa lo to nu, laaw rne naa sacne racladz naa lozh tsoguic to gban to zigne nac Xtiidz Dios. ²⁰ Sac gon, rdziladzd naa telne glanso naa lo to i, ni gan naa racde to zigne racladz naa; dzigo niicle togaaw, tsod zdoo to zeene gan to laa naa glisquiw. Adel gon zeene laa naa glanso i, lel dil no to; zha ne nē rac zdoo dien cho stib noded, zha ne nozhixcuaa diidzguizh, zha ne quianeenē, zha ne quiayacniats; nend haxta chop tson diile nac to. ²¹ Tel gan naa sca rac to, mbe gon stoladznie naa to ni haxta siaabguielnē to naa; sac nanle naa ni lalnu rdziladzd Dios grē miñ co. Zig nac grē zha ne squi padzeelale quiayunctal xtol ni rsaand zho grētaa guielyozh, grētaa ncuane ndzinlid ne bii quiayun zho, mbe gon sigoon zho naa.

13

Rso Pabl diidz

¹ Niina nagon ne gac tson vuelt guialgan naa to, tel pe nactaa falt ne cho quiayun i,

guiaanda scase. Zigne rnee lo Xtiidz Dios: Tel no chop zho, tsongaa zha ne nanpaa zha nac falt co, zha ne beena ga ib none laa zho quizh xfalt zho. Nu rac bion vuelt ne rso naa diidz rii lo to. ² Laaw nile naa lo to lultm vuelt ne bialgan naa to, ni niina laaw rneque naa stib: Grēse zha ne quiayunctal xtol i, zigtaa zha ne padzeelale squi no, zigtagaa zha ne wriin psilow, gacnan zho ganle zeene laa naa glanso i, grēse mine quiayun zho ib tedlaad zho, laa naa gunquizh zhow zigne rieguial zho. ³ Ga gan to ganle nli Jesús rnabey naa, ni Xtiidz me none naa lo to; sac mesi gon, gdziguiend me sca gac to, sinque zigne racladz me sca none gac to. ⁴ Nli nguudz goc me bdeed me diidz pquiaa zho me lo cruz hor co, sangue niina men rnabey nac me; laa me mban niina niapse por poder ne rap Dios. Ye no, zig nac niina miech nguudz nac no, per ible zgaa no tib guielmban ndzon, sacne me nacnie no; ni zrieelo gnabey no to sacne rdziaap no xpodet me.

⁵ Nana sca, tozhal golcobey dien zha mban to. Wen wen golcobey dien pe nli dib zdoo to riladz to Jesús. ¿Pe nli mban to zig none gban zha ne riladz me? ¿Pe zig zie dze rienraa to ne me nacnie to, me rnabey lo to? ¿Te loxaque diidzse ye nac ne laa to riladz me? ⁶ Sangue no gon, wen wen ndion no zha mban no, ndionpaa no ne lo Jesús ngab no.

⁷ Tibaque rnab no lo Dios cxobnia me guic to zaacse gban to. Ni guiabde to togo par guiaanziiu no lo miech gane noxcopaa no zaacse gac to; sinque laa no rdziuuña parne gban to zigne rieguial gban zha ne nli no xnēz Dios. Miñ co nagon noxco no, niicle tel rzac to lēda nu quiadziuuñ no. ⁸ Sac tel no, laa no zional gac to miech wen, zha ne zienal mine nac diidzli; choot ziaate par lega gactox no lo to. ⁹ Gacxe waa, tib guielbley nroob ga lo no, telne zhal to znuse xixcuaa to, gac to zha ne nlipaa dib zdoo rleyne Dios; laa ne yquiambēz to guiaadlisqui no grē ncuane noyun to. Laa no racladz gdziñ dze ne gac to zigne rdziladz Dios, ni mincogaa quianab no lo me.

¹⁰ Laa naa rso diidz rii lo to lo guits ne rxel naa nu, sacne racladz naa gactox naa

lo to zeene laa naa glanso i. Nli Dios bzo naa rnabey naa lo to, ni mine racladzpa naa nacne lozh tsoguic to zhiwseed me; ib racladzd naa yquiaago naa to.

¹¹ Nu ne laa naa csiaal lo guits rii, laa naa rnab lo to bets, laa naa rnab lo to bzian: Nley golgac, goltsoxco gban to zigne racladz Dios, zha ne mban rac, golchoobladz zdoo zho; ine niowse golban, tipse golgac. Scagaa Dios zleynie me to, ni haxta zacnie me to zeena peet ctsebde to.

¹²⁻¹³ Nana sca, tib tib zha ne nacgrë to golquiaabdiuzh zho, ine golxen nia zho. Grëse zha bets ne, zha bzian ne, zha ne rliladz Jesús nëz rii; laa zho rxeel bdiuzh lo to. Golcaania zhibdiuzh zho.

¹⁴ ¡Dios sca guiaannie to! Ine nley golgac, golgan ganle pa lotaa rleynie me to. Peet tsienied guic to, Jesús nac men ne noxco grë zhizhgab to; ni scagaa Espíritu Sant gacniën to tibaque tipse gac to.

Pabl

GUITS NE PXEEL PABL LO ZHA GALÁS

¡Diuzh to grēse to!

¹ Naa nac Pabl, tib zha ne pxeel Dios nonee Xtiidz Ndzon me lo miech. Led miechd bzoo naa, led miechd pxeel naa, sinque Jesús pxeel naa, me ni Dios Pxoz me, men ne bleeaban me.

² Laa naa rxeel tib guits rii ziaad lo to zigne no to nēz Galás i, nac to zha ne ngab lo Jesús; rquiaabdiuzh naa to, ni scagaa grē zha rii laa zho rxeel bdiuzh lo to. ³ Dios men ne nac Pxoz ne, ni Jesús men ndzon ne rnabey, me nac men ne tsoxco grē zhizh-gab to, zeena peet tsienied guic to. ⁴ Jesús bdeed xquielmban bdiizh me xtol ne, psilaa me no lo grētaa guielntseeb ne no lo guidzliu rii, laaw been me zigne gocladzse Dios men ne nac Pxoz me. ⁵ ¡Gotsaa dziuunnon ne Dios sca, ni gdzind dze ne csaan ne dziuunnon ne me! Sca rieguiala.

⁶ Rzee zdoo naa gon ne gardle gac nroob dze ga, laa to bzozitle lo Xtiidz Ndzon Dios, men ne bredz to pcaania me to, porne nquialadz Jesús to. Wseed ne rililadz to niina, masaque rzac to na mincogaa csilaa to lo dol. ⁷ Per guiendraa stib wseed ne gon csilaa ne lo dol. Mine naca zha ne biadseed to i, lega rquidiese zho to, racladz zho ctsēē zho mine nac Xtiidz Ndzon Jesús.

⁸ Grēse zha ne guiaadnie stiblo wseed mine pseete no to, ni gnē zho lēē min co csilaa to lo dol; zha ne sca gun, miech ndziibdeele ga nac zho. Tel chotaa sca gun, niicle tel naazhala, tib anjl ne quietgaa gbaaw, ible zdzibdee Dios zho. ⁹ Bnele naaw lo to, ni na laaw rneque naa stib: Tel cho zha ne guiadseed to stiblo wseed mine pseete no to, ni gnē zho lēē min co csilaa to lo dol, ible zdzibdee Dios zho.

¹⁰ Nana gon ne znu rne naa, no to guiab parne guiannziiu naa lo miech gane znu rne naa; per golgacnan ganle, quiaguibd naa guiannziiu naa lo miech, sinque laa naa noxco gun naa mine rnabey Dios. ¡Sac telne lel ncuane gleynie miech noxco naa, nlid dzigo xtsiin Jesús ga noyun naa!

Jesús pxeel Pabl gnee Pabl Xtiidz me

¹¹ Bets, bzian, golgacnan sca ganle: Wseed ne nac Xtiidz Ndzon Jesús, mine bialseed naa to, led guicd miech biaba. ¹² Paat biad naa nseed miech naaw, sinque Jesús zhal bneedza lo naa.

¹³ Led nanle to ganle, zha nactaa grē mine ben naa zeene bii no naa lo zhiwseed zha Israel; ptsidil naa grē miech ne no xnēz Jesús, blēenie naa zho, pquiana naa nloozh naa zho. ¹⁴ Bzhoob diidz ne naa nac zha ne pseedraa lo grē menladz naa, zha ne tipse biagrēē naa scuel; naa nac zha ne neer lo zho, sac naa run grēse mine rnabey zhiwseed zha Israel, ni naa rioxcoraa run grēse mine been grē pxozgol no. Sca nagon goc naa lo zha Israel.

¹⁵ Ible güeynied guic naa, antes ne gal naa laa Dios bzooblote naa gunbey naa Xpēēd me; laa me bleextsole naa, niapse porne nquialadz me naa. Zeene bdziin dze co ¹⁶ laa me blu me lo naa, bzo me naa ga naa zaatne ndxie grē miech ne nacdreaa zha Israel, gaseed naa zho Xtiidz me mine glu zha laa zho lo dol. Zeene blozh gon naa Xpēēd me, biad naa niaguib naa ne goon dien cho nseed naa, ¹⁷ ni niicle biadgaa naa Jerusalén, nianabdiidz naa lo grē zha ne pxeelle me nonee Xtiidz me; sinque laa naa bia nēz Arab, wbirele naa nēz co, dzigora naa bdziin naa Damasc stib.

¹⁸ Gocle tson iza dzigora naa bia naa Jerusalén, hor coraa beenbey naa Pedr; blēz naa lo me ga tsiin ngbidz. ¹⁹ Gaque beenbey naa Jacob bets Jesús, laa grēraa zha ne pxeel Jesús noyun xtsiin me, ni tib zho gon naa. ²⁰ Dios zobwi ganle diidzli nac grē mine rne naa nu, led lega rned naaw.

²¹ Zeene brie naa ga, laa naa bia nēz Siria ni nēz Cilis. ²² Grē zha Judé zha ne nole xnēz Jesús, gard gunbey zho naa len dze co. ²³ Diidz ronse zho rnee zla zha ne nacgrē zho: “Men ne scataa pquiana ne, yele me noseed miech Xtiidz Dios, ni glo scataa gocladz me nitlo mew.” ²⁴ Dzigo rley zho, rdeed zho xquizh lo Dios ne yele naa rililadz Jesús.

2

Rcaania zho Pabl

¹ Zeene blozh tsiida iza, dzigo laa naa biire bia Jerusalén stib, bio no grop no Bernabé, ni bionie no Tit. ² Laa naa bia, sac ib Dios blu lo naa ne no ga naa. Dzigo ga pcaalsa no grè no zha ne zo rnabey lo grè zha ne no xnèz Jesús ga, bzodiidz naa lo zho zha noseed naa grè zha ne nacd zha Israel Diidz Ndzon ne rlu lo zho zha laa zho lo dol, ni naa zeena guien zho ganle ne nli rquiin dziin ne benle naa, ni mine quiayungaa naa. ³ Ni nligaa bley zho bin zhow.

Niicle ne led zha Israeld nac Tit, per bnabeyd zho niopaa Tit bey ne rio grè zha Israel. ⁴ Per lo zha ne zioobgza no ga, lad co brieequia bla zha ne bnab nio Tit bey co, per choot pquiaadiagd xtiidz zho. Nac diidz ye zho rililadz Jesús, per nlida; ib blud zho cho nac zho, ngeets bzëëb zho lad no biadleets zho dien zha mban no, niina ne Jesúsle rnabey no, rnabeydraa ley no. Gocladz zho nquiaadiag no xtiidz zho, biire ndziuun no mine rnabey ley. ⁵ Per ni palal bdeete no diidz niac mine rnee zho, laa no racladz guiaan̄nie to Xtiidz Ndzon Jesús mine rlu zha laa miech lo dol, sac min co nac diidzli.

⁶ Grè zha non ne zo rnabey lo grè zha ne no xnèz Jesús ga (zha non guiab ne, per ndion̄ ne ganle grèse ne tibaque nac ne nèz lo Dios) ⁷⁻⁸ ib peet blisquid zho lo naa, niicle peet pseetragaa zho naa. Sinque laa zho gocnan̄ ganle ne ib Dios bzoo naa gun̄ naa xtsiin̄ me, gaseed naa grè zha ne nacd zha Israel guien̄ zho zha laa zho lo dol; zigne bzoque me Pedr noseed Pedr zha Israel. Dios men̄ ne bzo Pedr quiaseed Pedr zha Israel, lëëque me bzo naa quiaseed naa grè zha ne nacd zha Israel.

⁹ Gacxe waa, zig nac Pedr, Jacob, Juan, zha ne zo rnabey lo grè zha ne rililadz Jesús ga, laa zho bien̄ ne ible naa bgaa guien̄zaac rii, bneedz Dios dziin rii lo naa. Dzigo rley zho haxta bzhen̄ zho nia no grop no Bernabé, laa no biaan̄ diidz ne zha tsieseed zha Israel, laa no guioseed grè zha ne nacd zha Israel. ¹⁰ Lëëse mine pso zho diidz lo no, dzioxco no dziuun̄ no xyudar grè zha ne guien̄d pe yquiin̄; ni nligaa ib nonguiel̄ min̄ co ni laaw noyoxco naa.

Ractox Pabl lo Pedr

¹¹ Laa zeene biaad Pedr Antioquí, dzigo ga nli laa naa goctox lo Pedr, sac ncuaane ndzinlidraa quiayun̄ Pedr. ¹² Glo, grèse zha ne nacd zha Israel zha ne rililadzle Jesús, rzènie Pedr zho, tipse rbenie Pedr zho zeene laa zho row; ni blozh ga, zeene laa bla zha ne pxeel̄ Jacob bdziñ ga, pasëraa Pedr sca tipse niownie zho, laa Pedr bzozit lo zho. Rdzieb Pedr zha ne bdziñ ga, sac lëë zha co racladz, grèse zha zit ne rzëëb xnèz Jesús ib none tso zho bey ne rio zha Israel. ¹³ Grè zha Israel ne nole xnèz Jesús ga, yeque zho laa zho gocnie Pedr lo xtseb Pedr ga, haxta ye Bernabé wbig lo zho. ¹⁴ Nacne zeene gon̄ naa sca zienaldraa zho zigne nacpaa wseed ne ziaadnie Xtiidz Dios, squi ndxie grèse zha ne rcaalsa ga goctox naa lo Pedr, rep naa: “Luugase name niicle ne zha Israel luu, ni mband luu zigne nac zhiwseed zha Israel, ¿pe nac dzigo ne racladz luu gnabey luu grè zha ne nacd zha Israel, gban zho zigne nac zhiwseed zha Israel?”

Zha rlaa miech lo dol

¹⁵ Gol̄quiaadiaga ganle, tel̄ no desde gol no zha Israel nac no, nacd no zigne nac grëraa miech ngoopdol̄ ne nac stib nacion; ible pseed no grè mine nac xley zha Israel. ¹⁶ Sangue niina laa no ndion̄ ganle, niicle mazdraa gun̄ miech mine nac ley grieelod guiaan̄wen zho lo Dios, sinque zha ne dib zdoo gliladz Jesús, zha co nac zha ne guiaan̄wen lo me. Gacxe waa, ye no laa no bliladz Jesús dib zdoo no, zeena guiaan̄wen no lo Dios; ni laa no guiaan̄wen lo me porne dib zdoo no rililadz no Jesús, nacda porne dziuun̄ no mine nac ley. Sac gon̄ niicle zha ne tsoxcoraa gun̄ zho grè mine nac ley, grieelod guiaan̄wen zho lo Dios.

¹⁷ Nana ne laa no wbig lo Jesús parne guiaan̄wen no lo Dios, no zha ne rzac dol̄ ga. Masaque rzac zho xtol̄ no ga rdziuun̄ctal no porne rililadz no Jesús, per, ¡led scada gon̄! ¹⁸ Mazd dol̄ ga gun̄ naa, tel̄ne rlozhle rseed naa miech rne naa lo zho ne led leyd nac mine csilaa ne lo dol̄, ni lozh ga naaque no lozhd tsoxco gun̄ grè mine nac ley. ¹⁹ Sac tel̄ naa, ib brieelod niun̄ naa grè mine rnabey ley, ni zha ne rguiits ley gon̄ ib none guet zho; gane niina masaque rrieequia laa naa gutle. Niina ne laa Jesús gut

por grē xtol naa, rrieequia ye naa gutnie me ga, zeena grielo gun naa mine rnabey Dios. ²⁰ Led naadraa nu znu mban, Jesúsle nu mbannie naa, ni guielmban ne mban naa niina, lëe min rii bneedz Dios lo naa porne riladz naa Xpëed me, men ne rquia zdoo naa, men ne bleeladz xquielmban ga beet zho me bdiizh me xtol naa. ²¹ Nana, telne niaca mine nli zrieelo guiaanwen ne lo Dios porne gun ne mine nac ley, zhlëse ga dzigo biaadguet Jesús. Golgacnan sca ganle, Jesússe nac men ne csañwen ne lo Dios, gacxe waa nonguiel da ga csañ ne me tibladd, ni pa lotaa ga pquia zdoo Dios ne.

3

Jesús none gliladz miech

¹ ¡Nadzpaa nxen to nac to zha Galás! ¿Pe goc to, cho biaadgun güt guic to squi rac to? Pe led zeene biadseed no to, wen wen gocnan to cho nac Jesús, ni zha nacne sca beet miech me lo cruz. ² Zhal to golcobey dien, ¿pe ne been to grē mine nac xley zha Israel, laa to bgaa guielbiini chen Espíritu Sant, te ne bliladz to Xtiidz Diosa ye? ³ Pa lotaa gon rdzin lo xquielnxen to i, conque laa to gonle ganle ne niapse por guielbiini chen Espíritu Sant laa to psilo mban tib guielmban cub, ni na nanaque to tsienal to ley. ⁴ Pe nlipaa rnee to, ¿pe lega scase nazho gon to grē guielnë ne pteed miech to, zeene psilo bliladz to Xtiidz Jesús? ⁵ ¡Golzhixcuua guic to! Golguien ganle, laa Dios bneedz zhiEspíritu me lo to, ni laa me noyun grē milagr lo to, per nacda porne run to mine rnabey ley, sinque porne dib zdoo to riladz to Xtiidz mew, mine biadseed no to.

⁶ Zig Abraham, porne dib zdoo me bliladz me xtiidz Dios mine rëb Dios lo me, gane pcaania Dios me zig tib zha ne peet xtold. ⁷ Golgacnan sca ganle, grëse miech ne dib zdoo gliladz Xtiidz Dios, grëse zha co laa Dios ycaania zho zig xpëedpaa Abraham. ⁸ Ni mine nodzian ne niina, ib lo Xtiidzle Dios zhobneew, zeene bnee me ne grëse miech ne nacd zha Israel, silaa me zho telne dib zdoo zho gliladz zho me. Lëe min co ga bnee me zeene znu rëb me lo Abraham: “Grëse miech ne ndxie dibdoo lo guidzliu, zha ne dib zdoo gliladz naa zigne riladz luu naa, zunlay naa zho.” ⁹ Gane

grëse zha ne dib zdoo riladz Jesús, runlay me zho zigne beenlayaque me Abraham, zeene laa Abraham bliladz me dib zdoo Abraham.

¹⁰ Sangue zha ne rnalo ley ne lëew csilaa zho, laa zho noyac ndziibdeele ga, sac lo Xtiidz Dios no tib zaatne rnee: “Ndziibdee grë zha ne grielod gun grëse zigne nac ley.” ¡Ni tsod zha ne gon grielo gun grëse mine rnabey ley! ¹¹ Gase naganle rlu tsod tib zha ne grielo guiaanwen lo Dios por gun zho mine nac ley; ni laaw zhobneeque lo Xtiidz Dios zaatne rnee: “Zha ne guiaanwen lo Dios, laa zho guiaanwen porne dib zdoo zho gliladz zho me; ni zha co ygaa tib guielmban ndzon.” ¹² Led yed ley rnab dien cho dib zdoo gliladz; sinque rneew: “Zha ne racladz gban, none gun zho grëse mine rnabey ley.”

¹³ Min co nagon, grëse ne nac ne miech laa ne biabdee, sac brielod mban ne zigne nac ley. Per niina, laa Jesús biaadsilaa ne lo grëtaa dee co, masaque lëe grë dee ne nac ne ga bi me zeene sca pquia me lo cruz; zigne zhobneeque lo Xtiidz Dios, zaatne rnee: “Miech ndziibdee ga nac grëse zha ne ret rquianga zho tib lo yag.” ¹⁴ Ni por mine sca bded Jesús ga, min co niina grëse miech ne nacd zha Israel, zac ygaa zho grëse guielnzaac ne bzeet Dios lo Abraham ga; ni niicle tib tibgaa zha ne ngab lo mew, scaania zho Espíritu Sant, Espíritu ne rëb me cxeel me lo grë zha ne dib zdoo gliladz me.

Zha ne nlipaa nac xpëed Abraham

¹⁵ Bets, bzian, laa naa gzet ncuaane rac lo guidzliu rii. Nanle to ganle, zeene laa chop miech run tib trat, rquia mine rnee zho ga lo guits ni rquia lë zho lo guits co grop zho; zeene laa lë zho pquiase ga, ni tib zho gacdraa ctsëe trat co. ¹⁶ Nana gotsaa gwi ne ganle zha been Dios: Psañ me xtiidz me lo Abraham, ni tib lo men ne grieequia lo xtii Abraham. Raquiete nzian zho, rëbd me: “grë zha xtii Abraham”, sinque tibaque men ne bzeet me, ni lëe men co ga nac Jesús.

¹⁷ Znu nagon nac mine quiane naa lo to nu: Tib trat ga been Dios grop me Abraham, zeene rëb me scaania me grëse zha ne dib zdoo gliladz me; ni ible laa xtiidz

co me biaan zig tib trat ne quia lë me lo. Min co nagon, grieelod ctsëë ley trat co; zig nac ley, blozhle tap gayoo galptsii iz biaan xtiidz co me zeene laa ley biaad. ¹⁸ Nana, telne por gun ne mine rnabey ley, laa ne ygaa grë guielnzaac ne bzeet Dios lo zhitrat me gdeed me por tib men ne grieequia lo xtii Abraham; ¿pazhe dzigo rquiin trat co? Sac lo trat co gon raquiet ne por tib men ne grieequia lo xtii Abraham, laa me gneedz guielnzaac co lo ne.

¹⁹ Nana gnë to: “¿Pa dzigo rquiin ley ne laa ley biaan, ni tel nole trat co glo?” Laaw biaan gon zeena glu ganle zha nac miech, ib rond zho mine rnabey Dios zho, laaw been dziin laga bdziñ dze ne laa men ne briequia lo xtii Abraham ga biaad, men ne bzeet Dios ga zeene psan me xtiidz me lo Abraham. Ni tel ley, dze ne pcaania zha Israela tib xanj Dios pxeel me bdeeda lo Moisés, dzigo Moisésle psana lo menguedz Israel. ²⁰ Sangue dze ne been Dios trat co grop me Abraham ne laa me csilaa miech lo dol, pxeeld me cho tib miech, cho tib anjlgaa niaadnie xtiidz me; sinque mezhad biadneew lo Abraham.

¿Pa rquiin ley?

²¹⁻²² Nana gnë to: “¿Zig gocladz dzigo lëë nsiooglo xley Moisés lo trat ne been Dios ga?” ¡Led scada! Sac grieelod ygaa ne guielmban ndzon ne gdziñd dze lozh ga, telne gnalo ne ley; ib grieelod ley csanwena ne nëz lo Dios. Telne niaca mine nrieelo ley nsilaaw miech lo dol, nod pe nacne dzigo nxeel Dios Xpëed me, biaad me biadbee me miech ladznia dol (sac rnee lo Xtiidz Dios masaque ngadoo miech lo dol). Jesússe gon zrieelo csilaa miech lo dol, totsaque dib zdoo zho gnalo zho me, mese zrieelo gdeed guielmban ndzon co lo zho.

²³ Zeene gard guiaad Jesús ga, laa ley co pquiin pquiapanapa ne zigne rquiapanap wxtis zha ne niogyu, laga bdziñ dze ne laa me biaad. ²⁴ Zig tib ngudziaan ne riaannie mëédwin, sca pquiin ley co lo ne, pseeda ne zha gban ne, ni gacan ne cho nac Jesús, men ne csilaa ne lo dol zeene dib zdoo ne gliladz ne me. ²⁵ Sangue niina ne laa Jesús biaadle, led ley codraa gnabey ne, ni niicle rquiindragaa pe cseeda ne. ²⁶ Gacxe

waa, tel to xpëedle Dios nac to porne dib zdoo to rliladz to Jesús, ²⁷ ni grëse zha ne brobnisle porne no zho xnëz Jesús, laa zho rlu ganle ne Jesúsle nacie zho, ni laa zho zienal gban zho zig racladz me. ²⁸ Min cocxe nagon waa, grëse ne tibaque nac ne niina, guien draa ne goon cho nac zha Israel, cho nacgaa zha zit; dien cho nac ngundziin, cho nacgaa zha ne rnabey; goon dien cho nonraa pe mguiw te wnaaw ye; sac grëse zha ne naciele Jesús, tibaque nac zho grë zho. ²⁹ Ga nagon, telne ngable to lo Jesús, dzigosi nli zha xtii Abraham nac to, ni zгаа to grë guielnzaac ne bzeet Dios zeene psan me xtiidz me lo Abraham.

4

Zha ne nac xpëed Dios

¹ Golgona ganle, nligaa tib mëédwin lëë, niicle guiaannie win ncuaane rap pxoz win, per lega nase win zig tib ngundziin win ne run xtsiin pxoz win. Niicle chen win grë ncuaan co, per grieelod win gnabey wina. ² Laa win riaan ladznia zha ne ran win, zha ne rseed win dien pe nac ncuaane gun win, laga gdziñ dze ne laa win zacle ycaania ncuaane psan pxoz win.

³ Scadaa nagon bzhiaac ne glo zeene gard guiaad Jesús, rriequia masaque ngadoo ne lo grë ley co, ni lo grëraa ncuaane rac lo guidzliu rii. ⁴ Laa zeene bdziñ dze ne laa Dios pxeel Xpëed me Jesús lo guidzliu (tib wnaa bded por xniaa me, bzoob me diidz been me grëse zigne rnabey xley zha Israel), ⁵ laa me biaadsilaa ne, biadbee me ne ladznia ley co, bdiizh me grë xtol ne, zeena ycaania Dios ne gac ne mëéd lo Dios. ⁶ Ni parne glu ganle ne nli xpëedle Dios nac ne, pxeel Dios zhiEspíritu Xpëed me blëz zdoo ne; gacxe waa niina laa ne rien rnee ne lo me: “¡Papá yeen!” Espíritu co rnee ne Pxoz ne nac me.

⁷ Ga nagon, led yedraa niina nac ne zig cholze cho ngundziin, sinque xpëedle Dios nac ne, ible ye ne ygaa grë guielnzaac ne rap Dios.

Rnee Pabl rnabeydraa ley

⁸ Bets, bzian, golsoladz ganle, zeene bii gard gunbey to men ne nacpaa Dios, masaque rriequia ngadoo to lo ncuaane

nac zhimdio to hor co, rdib rdzag to run to grē mine rzac to rdziladz grē mdio co.

⁹ Nana, laa to runbeyle Dios, mazd gni naa ganle ledaa Dios runbeyle to, ꝑe nac dzigo racladz to gbiire tsiegan to, tsiequitsgzhib to lo grē mdio co, gbiire guiab to ladznia grē ncuaane paat rquiind co, gnabeya to?

¹⁰ Rquia to gon run to grē lni, dien pa mēē ndzonraa, dien pa dze nac dze ndaraa, pa iz nac iz ne ndaraa, dien pa dze zac pe gow to, pa dzeegaa gacda. ¹¹ ꝑRdziebnie naa to gon! ꝑPe nlipaa zhlēse bialseed naa to, ne squi laa to racladz csaan mine bialne naa lo to!

¹² Bets, bzian, laa naa rnab lo to golban zigne mban naa, tel naa niicle ne zha Israel nac naa per zana draa naa mine nac xley zha Israel. Ngadoodraa naa lo ley, gane rne naa: Golban zigne mban naa. Ni guiabde to togo bod nend no pe falt ne been to lo naa. ¹³ Led rsoladz to ganle, rzacnē naa len dze ne psilo pseed naa to zha laa to lo dol; min co nacne nzianlaa dze blēz naa lo to i. ¹⁴ Niicle ne sca rzacnē naa, gon dze to naa; laa ne mbix zdoo to nian to xquielguidz naa, znu pquia zdoo to naa, rley to blēzlo to naa pale cho xanjl Dios o Jesús gaa, tel niaca mine mezhal niaadseed to. ¹⁵ ꝑNe nlipagaa rleydox to len dze co! Tel niaca mine niac mbee to bziaalo to, zootle zig mbee tow ngad tow lo naa. ꝑYo grē guielbley co na? ꝑYo ne scataa rleynie to naa len dze co?

¹⁶ Nana, pe rēb to rlēē naa lo to ne znu rne naa mine nacpaa diidzli. ꝑLēda gon!

¹⁷ Golquiaadiaga ganle, grē zha ne gon squi ziadseed to i niina, nli laa zho noxco to per zhaa ncuaane no guic zho. Laa zho racladz tebaa zha guiaanladz to naa, csaan to grē mine bialseed naa to, zeena gbig to lo zho. ¹⁸ Rtsidild naa pe nacne cho gacnie to, totsaque zha ne nli nquialadz tow. Zig nac naa tibaque noxco naa to, led loxaque zeene zodse naa lo to i. ¹⁹ ꝑXin, ne nlipagaa gon rdednē naa ran naa squi rac to! Masaque nac guielnē rii lo naa niina, zig tib yoob ne rquia grē men wnaa ne gap mēēd. Ni lēē nole naa guielnē rii nu nagon, haxta gdziñ dze ne gan naa laa to wbiire wbig lo Jesús stib. ²⁰ Tebaa niaca mine grielo guialzhaal naa lo to i niina, zeena gan naa zha no to, dzigo dien zha gnegaa naa lo to;

per na ne znu zit zo naa, nand naa dien pe nacraa ncuaane noyun to.

²¹ Zha ne racladz gnabey xley zha Israel zho, racladz naa gnē zho dien, ꝑe ib riend zho zha zhobnee lo guits ne ziaad Xtiidz Dios ²² zaatne raquiet xingan Abraham? Rneew: Chop xingan Abraham, tib mēēd co gop wnaa ne nac ngundziin lidz me, laa stib mēēd gop wnaa ne nacpaa tsieel me. ²³ Xpēēd wnaa ne nac ngundziin ga, laa win goc mēēd zig grēraa xpēēd miech; sangue mēēd ne gop tsieel me ga, laa win gol porne ib Dios rēb ne laa me yquianie win.

²⁴ Lo grop wnaa co, tibga me rlu ganle zha nac grop trat ne been Dios: Mine bzhaac Agar, ga rlu ganle zha nac trat ne been Dios guic gui Sinaí. Grēse zha ne zienal trat co, nac zho zig goc xpēēd Agar, ladznia trat co no zho. ²⁵ Gzoob ne Agar nac Gui Sinaí, gui ne riaan nēz Arab; me nac guiedz Jerusalén ne ndxie len dze rii, sac tel grē menguedz Jerusalén, masaque ngundziin nac zho lo ley. ²⁶ Sangue wnaa ne gocpaa tsieel Abraham ga, rrieequia me nac Jerusalén ne no gbaa, zaatne ngab grē zha ne no xnēz Jesús, sac led yedraa grē zha co ngadoo lo ley; ye ne ngab ga, ni gzoob ne lēē xnīaa ne ga nac wnaa co. ²⁷ Lēē Jerusalén co ga raquiet lo Xtiidz Dios, zaatne znu rnee:

Luu, ne nac luu wnaa ne brielod niap mēēd, bley niina;

nguieel goc, nguiedz broptsie lo guielbley qui,

luu ne bdziñ dze niacnan luu zha nac yoob mēēd.

Sac gon ndalraa xpēēd wnaa ne brielod niap mēēd,

lēdle grē xpēēd wnaa ne gop mēēd.

²⁸ Bets, bzian, golgacnan sca ganle, laa ne nacle niina zig Isaac, xpēēd tsieelpaa Abraham, wnaa ne gacd yquianie mēēd ga; sac tel Isaac, ib Dios psan diidz ne laa Isaac gac mēēd lo Abraham. ²⁹ Ni zigne sca blēēnie xpēēd wnaa ngundziin co Isaac, mēēd ne Dioszhal psan diidz gal ga; scasaque niina, no zha ne rlēē ran zho zionald ne mine rnabey ley, sinque laa ne zionald dib zdoo ne rliladz ne Jesús.

³⁰ Ni nana, led lo Xtiidzaque Dios zhobnee ganle zha rēb Dios lo Abraham, rēb me:

“Wnaa ne nac ngundziin lo luu i, bzonëz me grop xpëed me, nonguield ne ye mëed qui guiaan̄nie ncuane csañ luu lo xpëed tsieel luu.” ³¹ Gacxe nagon̄ waa, tel̄ ne nacd ne zig xpëed wnaa ngundziin co, sinque laa ne nac zig xpëed tsieelpaa Abraham.

5

Dziits golso

¹ Peet lo ngadoodraa ne niina, sac gon̄ laa Jesús biaadsilaale ne, sinque to none dziits so zeena ygadoode to lo xley zha Israel. ² Naa nac Pabl, ni naazhal rne lo to nu. Golgona sca gan̄le, tel̄ne laa to gdeed diidz tso to xbey zha Israel, nacdiedraa to Jesús ga dzigo. ³ Ni laaw gneque naa lo to nu stib, grëse zha bgui ne rio bey co, ib none gun̄ zho grëse zigne rnabey ley co. ⁴ Zha ne rzac por gun̄ zho grë mine rnabey xley zha Israel, min̄ co laa Dios csilaa zho lo dol̄, gacnan̄ zho gan̄le, lel̄ nozozit zho lo Jesús ga; ygaad zho guiel̄nzaac ne ygaa zha ne gnalo Jesús. ⁵ Sangue tel̄ no, ndion̄paa no silaa Dios no lo dol̄, sacne dib zdoos no riladz no Jesús ni nacie Espíritu Sant no. ⁶ Sac zha ne nli nole xnëz Jesús, peet liaadz nodraa zho bey ne rio zha Israel. Mine noxcoraa zho nac ne dib zdoos zho gliladz zho Jesús, ni scagaa grieelo gleynie zho samiech zho.

⁷ ¡Ese tow nli! ¿Pex goc to waa? Zaacse name rac to zeene psilo to bliladz to mine nac diidzli. ¿Cho pquiil to ne nëdraa to tsienal̄ tow? ⁸ Mine squi nonie guic to i niina, led zhiwseete Dios i, men̄ ne bredz to grieet to ladznia ley. ⁹ Golguien̄ sca, adel̄ ye to sac zig rëb diidz ne rnee: “Niipaxe ncobi waa run̄csibe ncob guietxtil.” ¹⁰ Per nan̄paa naa, ible men̄ ndzon ne rnabey ne men̄ co gacnie to, zeena csaande to mine nac diidzli; ni zha ne squi racladz gungüet to, tel̄ chotaa nac zho ib tedsod siaabzi Dios zho.

¹¹ Bets, sangue naa tel̄ niaca mine nli ye naa quianabey tso grë zha ne riladz Jesús xbey zha Israel zig quianee zha qui, bod goon̄zhe ni ctsidildraa zha Israel naa dzigo, glëedraa zho zig rlëetaa zho niina zeene ron zho rne naa zha nacne biaadguet Jesús lo cruz. ¹² Zha ne squi ziaadnabey tsopaa to bey ne rio zha bgui nëz Israel, ¡tebaa

mazd ladaque zho yga zho, niicxe gdib nacse zho waa cueniaal̄ zho, led tsod zho noyun̄need zho to! ¹³ Bets, golguien̄ gan̄le ne ygadoodraaxe to lo ley waa, min̄ co nacne biaadsilaa Jesús to. Per guiabde to togo ne laa me psilaale to, laa to gun̄ ncuane guiaabtaa guic to. Gun̄scade to, sinque tib tib to golleynie samiech to, ine golgun̄ ncuane rquiin grë zha ne nacgrë to; ¹⁴ sac niina totsaque gban to zigne rnabey Dios nu: “Bleynie samiech luu zigne rleynieque luu luu”; lëele grë mine nac ley ga gun̄ to. ¹⁵ Per tel̄ laa ne gleynie to zha ne nacgrë to, lel̄ dil̄ no to, zig run̄ grë ma ne lëëque ma noquiaalaylsa, lëëque ma noyowlsa; dzigo lëëque to gnitlo to ga. ¡Gun̄scade to!

Zha ne lega mbanse

¹⁶ Gacxe, laa naa rnab lo to: Gol̄tsoxco golban zigne racladz Espíritu Sant, ni me gacnie to; led tsode to dien̄ zha gun̄ to grë ncuane ndzinlid ne racladz xcuerp to. ¹⁷ Sac gon̄ grëse ncuane co, rleynied Espíritu Santa. Laa xcuerp ne run̄ ncuane racladz Espíritu Sant, ni ncuane racladz-gaa Espíritu Sant nëd xcuerp ne gac min̄ co. Gun̄de to mine racladz xcuerp to sca. ¹⁸ Tel̄ne gban to zigne rnabey Espíritu Sant, dzigosi nodraa pe nacne ygadoo to lo xley zha Israel.

¹⁹ Ni miech ne sca run̄ grë ncuane ndzinlid, ib paat ngueetsd zho: rionie zho zha ne led tsieeld zho, run̄ zho grë ncuane ndzinlid ne racladz-taa xcuerp zho,

²⁰ riegān̄ zho grë mdio, rnab zho pe sac samiech zho, rlëënie zho samiech zho, rdil̄nie zho samiech zho, rzac zho adel̄ cho glale tsieel zho, rnadse pew laa zho rlëële,

run̄ctil̄ zho miech, rguib̄ zho rtso miech, rbeextso zho dien̄ cho zha ne gacnie zho, ²¹ në rac zdoos zho ran̄ zho ncuane quianie stib miech, rzudz zho, rcaalsa zho zaatne loxaque rowcho zho, ni run̄ zho grë guilyozh.

Grë ncuane co run̄ zho ni grëragaa ncuane ndzinlid ne sca nac. Laa naa rbire rso diidz lo to, gun̄de to grë ncuane co;

sac gon grëse miech ngoopdol ne sca rban, grieelod gdziñ zho zaatne rnabey Dios.

²² Sangue zha ne zienal mine racladz Espíritu Sant, znu nac zha co: rleynie zho samiech zho, tibaque nguieel rac zho, peet dzeb nonied guic zho, rxecw zho, rieedniobd zho, niowse rnee zho lo samiech zho, niapse ncuaañ wen run zho lo samiech zho, run zho mine rnee zho gun zho, ²³ miech ndooladz nac zho, zha rnabey xcuerp zho.

Ni telne gban ne zigne nac grëse min rii, ni tib ley noguitsd ne ga. ²⁴ Grëse miech ne nli xnëzle Jesús no, zieniedraa guic zho gun zho grë ncuaañe ndzinlid ne bzoobladz zho padzeela, grë ncuaañe ndzinlid ne racladznë xcuerp zho, sac rien zho paat rquiind ncuaañ co lo zho. ²⁵ Gacxe nagon waa, telne nli mbannie ne guielmban ne rneedz Espíritu Sant, golgotsaa dzion ne mine rnabey me. ²⁶ Dzigosi gacniatsdraa ne lo samiech ne, tsienaldraa ne dien cho glaaraa guiaan, tso ne në gac zdoo ne gan ne grë ncuaañe rap zho, ncuaañe racгаа zho.

6

None gacnie ne samiech ne

¹ Bets, bzian, telne gan to laa cho tib zha ne nacgrë to noyun pe tib dol, dzigo to ne nac to zha ne nlipaa zienal mine rnabey Espíritu Sant, to golnee lo zho. Diidz wen, diidz ndooladz golco zdoo zho gbiire xixcuaa guic zho; ni scagaa tib tib to none nsin so to, sac gon adel nenda yeque to sca sac. ² Zeene ran to zha ne mban noded, golgun xyudar zho, golchoobladz zdoo zho, sac gon sca rnabey Jesús gban miech.

³ Tel zha ne rzac zha non nac zho, ni laa zho peet nond zho; lëëque zha noguitnie zho ga. ⁴ Tib tib to, wen wen golguien dien pe quiaayun to, telne ncuaañe ndzinliw inë golley, per tsode to glëë zdoo to gan to mine run stib zho. ⁵ Sac tib tib ne, ppose Dios ne pe nac xtsiin me mine gun ne.

⁶ Grë zha ne noseed Xtiidz Dios, ib none ncuaañe rgaataa lo zho gdeed zhow yquiin zha ne noluw lo zho.

⁷ Tsienie wguite guic to sca, sac gon led yed Dios guiab ne quitnie ne. Tib tib ne, tel pe nac mine run ne mincoque ct-sire me lo ne. ⁸ Zha ne run grë ncuaañe ndzinlid, lëë mine cueequia zho ga laa zho nitlo. Laa zha ne gun grë mine rnabey Espíritu Sant, lëë mine yгаа zho ga nac tib guielmban ndzon ne gdziñd dze lozh. ⁹ Gacxe nagon waa, tibaque gotsaa dzioxco ne dziuun ne ncuaañe ndzinli, ncuaañe rquiin, guieete ne; sac telne sca tibaque dzioxco new, zeene gal dze co laa ne yгаа mine guiogual ne. ¹⁰ Zeene gdeedtaaw diidz sca, golgotsaa dzioxco ne dziuun ne xyudar grëse samiech ne, ni nana zeene zha ne noque xnëz Dios nac zho, mazdraa rieguial dziuun ne xyudar zho.

Rso Pabl diidz

¹¹ ¡Golwi ganle, naazhal pquia nu! ¡Golwi ganle mbee mbee nac letr rii pquia naa rso naa diidz lo to! ¹² Grë zha ne gon squi racladz tsopaa to bey ne rio zha Israel, laa zho runa zeena glëëniend miech zho, zigne rlëënie zho grë zha ne rseed miech ne ib laa Jesús gut lo cruz, psilaa me grëse miech lo dol.

¹³ Nana, niicxe grë zha ne nole bey co, rundaque zho grë mine rnabey ley; sinque laa zha qui nagon quiaguib tebaa gdeed to diidz tso to bey, zeena sca lozhd guiats zho ne zha bnabey to bio to bey. ¹⁴ Sangue tel naa, ib quiaguibd naa ne dien zha gacniats naa, sinque laa naa quiaguib gacnañ miech ganle zha nac ne laa Jesús gut lo cruz. Sac tel naa, por grë mine bded Jesús ga, grëtaa ncuaañe no lo guidzliu laaw psan naa tib lad; ni niicle naagaa, sca rzac grë miech guidzliu naa. ¹⁵ Grëse zha ne ygab xnëz Jesús, nacda ne dien cho no bey ne rio zha Israel, chogaa noda; sinque mine non nacne ctsëë Dios lo xquielmban zho.

¹⁶ Grëse to ne nac to zha ne zienal diidz ne rso naa nu, Dios yquia zdoo to, ni me gacnien to ctsebd grë zhgab to; niicle tow ni niicle grëragaa zha ne ngable lo mew.

¹⁷ Bets, bzian, golgacnañ sca ganle, ib racladzdraa naa gon pe yquiaaqui gbiire gaquiet mine bnele naa lo to nu; sac tel naa, grëtaa mdel ne no xcuerp naa nu, lëëlew

nac bey ne rlu ganle ne nli lo Jesús ngab naa, ni xtsiin me noyun naa.

¹⁸ Jesús men ndzon ne rnabey ne, me tsoxco grè zhizhgab to. Sca gaca.

Pabl

GUITS NE PXEEL PABL LO ZHA EFÉS

¡Diuzh to grëse to!

¹ Naa nac Pabl, tib zha ne pxeel Jesús nonee Xtiidz me lo miech, sac ible Dios bnabey ne sca gaca.

Laa naa rxel guits rii lo to grëse to bets, grëse to bzian, zigne nose to guiedz Efés i, ne nac to zha ne ngable lo Dios niina ne tiblique laa to rliladz Jesús. ² Dios men ne nac Pxoz ne, ni Jesús men ndzon ne rnabey, me glu lo to guien to ganle pa lotaa noxco me to, ni me gacnien to ctsebd grë pe zhgab to.

³ ¡Gotsaa dzioolnie ne Dios, Pxoz Jesús, men ndzon ne rnabey ne! Sac gon, zha nactaa grë guielnzaac nroob ne bneedz Espíritu Sant lo ne niina ne laa ne ngab xnëz Jesús.

⁴ Haxta zeene gard cue guidzliu, bzooblo Dios ne gac ne zha ne gdziñ lo me zeene laa ne gliladz Jesús, gac ne tib miech peet xtold, zha ne gban zigne racladz me. ⁵ Nquialadz me ne, gane bzooblo me ne gac ne xpëed me zeene laa ne gliladz Jesús, ib me sca bnabey gaca sac ib sca gola zdoo me.

⁶ Miñcocxe waa tibaque none dzioolnie ne Dios, sac gon zha wentaa me lo ne, pxeel me Xpëed me men ne nquialadz me ga, bi-aadgunlay me ne. ⁷ Ne nligaa nquialadzdox Dios ne, gane pxeel me Xpëed me bzhiee xchen psilaa me ne lo grë dol ne ngadoo ne, been me ne perdon grë dol co. ⁸ Ni led loxaque miñcodse, sinque haxta bneedz me guielrien lo ne, bdixbiini me ne, ⁹ ni bneedz me diidz gocndion ne pe nac miñe no zdoo me, miñe mese nan, miñe nole me gun me. ¹⁰ Sac niina laa ne ndionle: Grëse ncuaane no gbaa, ncuaane no guidzliu, tibaque gaca grëw ni Jesús gnabeya grësew; sca gaca zeene laa dze co gdziñ.

¹¹ Grëse ncuaane bnabeyle Dios no gac, run mew zigne racladz me. Gotsaa gwi ne ganle, glole bzooblo me ne ygaa ne grë guielnzaac ne nacle diidz gdeed me lo grë zha ne no xnëz me, guielnzaac ne bgaa ne zeene laa ne bziaab xnëz Jesús. ¹² Ni laa me bzooblo ne, zeena ne ne nac ne zha

ne glopaa psilo bnalo Jesús, cxobnen ne lo miech ganle pa lotaa men nroob nac me.

¹³ Xquizh Jesús, ye to zeene laa to psilo pquiaadiag diidzli, Diidz Ndzon ne rnee ganle zha laa to lo dol, ni bliladz to cho nac Jesús, laa Dios pxeel Espíritu Sant lo to zig tib bey, bey ne rlu lole me ngab to; zigne bneele me glo. ¹⁴ Ne znu pxeel me Espíritu Sant nacie ne, ga rlu ganle ib nli zgaa ne grë miñe bneele me gdeed me lo grë zha ne ngab lo me, ni lëe miñ co ygaa ne zeene gal dze ne laa me blozh psilaa grë zha ne ygab lo me; zeena grë ne gleynie ne me por squitaa men nroob nac me.

Rnab Pabl guielbiini lo Dios

¹⁵ Zeene gocnan naa ne nlipaa dib zdoo to rliladz to Jesús, ni ne nli nquialadz to grëraa miech ne no xnëz Dios, ¹⁶⁻¹⁷ rded naa xquizh lo me. Zeene rzodiidznietaa naa me, rsoladz naa to, rnab naa lo me gneedz Espíritu Sant guielbiini lo to guien to cho nac me, zeena lozh gunbey to me. Lëe me nac xDios Jesús, lëe me nac Pxoz ndzon ne. ¹⁸ Rnab naa lo me quixbiini me guic to, guien to ganle zha nactaa grë ncuaane ygaa to ne laa me bredz to, guien to ganle zha ndzontaa, zha nontaa ncuaane gdeed me lo grëse miech ne ngab lo me, ¹⁹ ni guien to zha nroobtaa guielrnabey ne rap Dios, pa lotaa naca; lëe guielrnabey co nacie ne ne nac ne zha ne no xnëz me. Lëe guielrnabey co ga blu me ²⁰ zeene bleeban me Jesús bzoob me me cue me gbaa, zaatne riegual sob me ne nac me men rnabey, ²¹ bzo me me, me rnabey lo grëse zha ne rnabey, lo grëse zha ne non, ni lo grëragaa ncuaane no; niicle niinaw, niicle len dze ne naragaa guiaada. ²² Grëse ncuaane notaa, laa Dios psana ladznia me, ni bzo Dios me me rnabey lo grëse zha ne no xnëz me. ²³ Sac grëse zha ne no xnëz me rriequia xcuerp me ga nac zho, gacxe waa grëse zha ne nac cuerp co, zha none cxobnen ganle pa lotaa men nroob nac me. Tel pe lotaaw me nacie zho, sac grëtaa ncuaane no ladznia me now.

2

Ne noxco Dios miech gane psilaa me zho

¹ ¡Laa Dios bneedzle tib guielmban cub lo to niina, niicle ne ntseeb goc to glo! Golsoladz ganle, zeene scataa beenctal to xtol to, masaque nac to lo Dios hor co zig tib zha ne gutle, ² laa to güeynal niapse grë ncuaane ndzinlid ne rac lo guidzliu rii, been to grë mine rnabey ma ne rnabey lo mendox, ma ne rcheep grë zha ne ib néd gon xtiidz Dios.

³ Grëse ne sca wban ne glo, bional ne ncuaane ndzinlid ne bzoobladztaa ne, bdziuun ne ncuaane bdeedtaa guxt xcuerp ngoopdol ne, ncuaane biaabtaa guic ne. Ni ne scataa nac ne, ib biogual ngaa ne lo guielnédox ne cxeel Dios, lo guielnè ne noxtseeb grëraa miech niina. ⁴ Per ne nquialadz Dios ne nac ne miech, gane pquia zdoo me ne, ⁵ ni niicle ne rriequia men gutle nac ne ne scataa quiadziuun ne grë dol co, per bleeban me ne; lëe min co ga been me zeene bleeban me Jesús. ¡Laa me psilaa ne lo guielgut co, niapse por mezhah noxco ne! ⁶ Laa me bleeban ne, zeena yгаа ne guiosiobnie ne Jesús zaatne gnabey Jesús. ⁷ Zigtaa len dze riiw, zigtagaa len dze ne ziaadraaw, ga gan miech ganle pa lotaa nquialadz me ne, pa lotaa wen me lo ne, sac pxeel me Jesús biaadsilaa ne. ⁸ Golgan ganle, ne wen me mezhah noxco guiaanwen miech lo me, gane rsilaa me ne lo dol zeene laa ne riladz Jesús dib zdoo ne; guiabd ne togo por pe guielwen ne gun ne laa me csilaa ne. Ible zdoo me ral rsilaa me miech, ⁹ racda ne por pe guielwen ne gun zho; zeena gdaannied zho guielwen ne run zho. ¹⁰ Dios nac men ne psan ne, ni niina ne laa ne bziaab xnëz Jesús, laa me bredz ne dziuun ne grë guielwen ne racladz me, mine bzooblote me ne dziuun ne.

Grëse zha ne ngab lo Jesús, tipse nac zho

¹¹ Golsoladz ganle miech ngoopdol, miech ne ngabd lo Dios, miech beed, sca lë to lo grë zha Israel glo (sac zha, ne rio zho bey zigne rnabey xley zho, rzac zho miech wen, miech mbe nac zho, zha nac zha ne ngabpaa lo Dios). ¹² Len dze co gard ygab to lo Jesús, gard gac to tipse grë to zha Israel, led yede to no lo trat ne biaan Dios grë me zha Israel, nande to grë diidz ne psan me lo zho. Lega laa to mbanse, runbeyde to

Dios, ni tib guielnzaac quiambëzde to yгаа to. ¹³ Saingue niina ne laa to bzëeb xnëz Jesús porne bzhiee xchen me psanmbe me to, laa to ngable lo Dios.

¹⁴ Jesús nac men ne psanwen ne grë ne, ptiche me grëtaa ncuaane pca zaacse ndzianlsa ne; zigtaa zha Israela, zigtagaa zha zita, tibaque been me ne lo me niina. ¹⁵⁻¹⁶ Zeene pquia me lo cruz, gataa ptiche me grë ley ne zienal zha Israel, ne scataa rsanglaa zho zho; gane niina zigtaa zha Israela, zigtagaa zha zita, laa me been zho tipse, been me zho tib guiedz cub ne ngab lo me. Sca nac ne laa me psanwen zho grë zho, ni psanwen me zho nëz lo Dios.

¹⁷ Jesús nac men ne biaadnie Xtiidz Ndzon me lo ne grëse ne, gocndion ne zha guiaanwen ne nëz lo Dios, zigtaa tow ne nac to zha ne zit zo lo Dios glo, zigtagaa zha Israela ne nac zho zha ne gax zo lo me. ¹⁸ Gane niina, niicle zha Israela, niicle zha zita, zrieelo ygab zho lo Dios men ne nac Pxoz ne, zeene laa Espiritu Sant gunquien zho none gbig zho lo me. ¹⁹ Gacxe waa, tel to nacdreaa to menzit niina, lole Dios ngab to, lal non to, lal nac to grë to grëraa zha ne ngab lo me. ²⁰ Golguien ganle, grëse ne niina gzoob ne nac ne zig tib yu ne noyaa, yu ne psilo grë zha ne pxeel Dios nonee xtiidz me lo miech niina, grë zha ne pxeelgaa me pteed xtiidz me lo miech padzeela, ni Jesús nac quie ne naaz yu co. ²¹ Grëse zha ne zienal mine rnabey me, rriequia nosoquiaraa zho yu co ga, haxta guirew gaca tib yadoo ne nlipaa mbe nëz lo Dios. ²² Zig nac to gon, tib tib to ne nac to zha ne ngab lo Jesús, ye to nac yadoo co, zaatne rbëz Espiritu chen Dios.

3

Pabl nac zha ne güeyseed zha zit

¹ Ni ne bialnecxe naa Xtiidz Jesús lo to waa, gocnan to ne niicle men zit nac to zrieelo ygab to lo Dios, min co gane znu nioogyu naa nu. ² Nanlaxe to ganle ne wen Dios, laa me bzo naa gun naa dziin rii cseed naa grë menzit. ³ Laa me blu lo naa zha nac grë ncuaane no guic me gun me, mese nana per laa me blu lo naa zha naca, ni laa palala psilo bzetle naa lo to lo guits rii. ⁴ Zeene

glab tow i, dzigo guien to ganle ne nli nan naa zha nac grë mine gun Jesús, mine mese nan. ⁵ Wlaltaa choot miech gocnanda, laa niina laa Dios pxeel zhiEspíritu me bneedz guielbiini lo no gocndion now, zigtaa no ne nac no zha ne pxeel me nonee xtiidz me, zigtagaa grë zha ne pxeel me noteed xtiidz me. ⁶ Ni znu naca: grëse zha zit, zгаа zho guielnzaac ne rëb Dios gdeed me lo grë zha ne ngab lo me, tibaque nac guielnzaac ne ygaa zho grë zho zha Israel. Niicle zha Israela, niicle zha zita, laa Dios quiambëz gdeed me guielnzaac co lo zho, totsaque gliladz zho Xtiidz Ndzon Jesús.

⁷ Niicle ne tib miech peet nond nac naa, per laa Dios bzooblo naa gne naa lo miech gacnan zho mine blozh bzet naa nu, me nacie naa, me rneedz grëtaa poder ne rap me parne grieelo gun naa dziin rii. ⁸ ¡Ncuaane gzee zdoo new! Golwi ganle, naa nac tib zha ne mazdraa peet nond lo grë zha ne ngab lo Dios; per laa me bzooblo naa, naa bgaa dze ndzon rii gne naa Xtiidz Ndzon me nu lo grë zha zit, zeena gacnan zho ganle pe zhistaa grë guielnzaac ne gdeed Jesús lo zho. ⁹ Gne naa lo zho gacnan zho ganle zha nactaa grë mine no guic Dios gun me, mine wlaltaa choot gard gacnan; Dios, men ne bzaa grëse ncuaane no. ¹⁰ Nana gnë to: “¿Pe nacie sca been me?” Laa me beena zeena grëse zha non, zha rnabey ne no gbaa, zeene gan zho tipse nac zha Israel grë zho zha zit ngab zho lo me, ga guien grë zha gbaa co ganle zha ndzielguictaa Dios. ¹¹ Sca nac mine no guic me padzeela, ni zeene laa me pxeel Jesús laaw goc. ¹² Gacxe waa, niina ne laa ne ngable lo Jesús, peet lo ngadoodraa ne, niinasi zrieelo gbig ne lo Dios, sac ndion ne zha ne rnalo Jesús ible scaania Dios zho. ¹³ Laa naa rso diidz lo to sca, niicle ne znutaa quiadeed naa loxaque ne bialseed naa to, gunde to ne minriise laa zdoo to guiaan, sinque golley golwi ganle nu rlu zha nziuu, zha non nac to lo naa.

Nquialadz Jesús miech

¹⁴⁻¹⁵ Zeene rsoladz naa grëtaa mine no guic Dios gun me, ni mine beenlegaa me (me ne nac me Dad lo grëse zha ne ngab

lo me, niicle lo guidzliu nuw, niicle gbaa-gaaw); rded naa xquizh lo me. ¹⁶ Ni ne squitaa ndzon, ne squitaa ncuaane lozhd nac grëtaa guielnzaac ne rap me, laa naa rnab lo me cxeel me zhiEspíritu me gneedz xfuers to dziits so to. ¹⁷ Ni rnab naa lo me tibaque dib zdoo to gliladz to Jesús, zeena scagaa tibaque gbannie to me, parne guien to ganle pa lotaa nquialadz me to. ¹⁸ Ga guien to ganle grë to grëraa zha ne ngab lo me, ne nligaa pa lotaa nquialadz me to, nacda ncuaane grieelo ctiix ne, guiab ne lalnuw. ¹⁹ Niicle ne znu nacda ncuaane grieelo guiab ne znu znu naca, per laa naa rnab lo me zig zie dze guienraa to pa lotaa rleynie Jesús to; zeena glu ganle ne nli nacie Dios to.

²⁰ Ni Diossi gon ne nac me men ne ndzon, mazdraa ncuaane grieelo gneedz me lo ne, lëdle mine riab guic ne rnab ne lo me; ni ncuaane gaca gon, sac me nacie ne. ²¹ Grëse ne ne nac ne zha ne no xnëz Jesús, ¡tibaque golgotsaa gleynie ne me sca, ne squitaa ndzon me! Sca rieguiala.

4

None tipse gac zha ne rliladz Jesús

¹ Zigne rne naa ga, laa naa nioogyu nu loxaque ne run naa xtsiin men ndzon ne rnabey, per laa naa rnab lo to zaacse golgac, golban zigne rieguial gban grë zha ne bredzle Dios ngab lo me, sac gon laa me bredzle to. ² Golgac tib miech ndooladz, tib miech wen, tib miech nlëëguicd, tib miech ne guieednied samiech sinque ine gleynie to zho. ³ Wenle na ndxie to niina, ni Espiritu Sant nac men ne gacnien to; zeena tibaque squi tipse gac to. ⁴ Sac gon tibaque cuerp nac ne grë ne, tibaque Espiritu nacie ne, ni tibaque nac mine ndion ne gneedz Dios lo ne, ne laa me bredz ne. ⁵ Tibaque men ndzon ne rnabey ne, tibaque men ne rliladz ne, tibaque wrobnis ne no par grë ne ne dib zdoo ne rliladz ne me; ⁶ tibaque Dios no, me nac Pxoz ne grëse ne, me nac men nroob ne zo lo ne, me racnien ne grëse ne, ni me nacie ne.

⁷ Tipse nac ne, per tib tib ne ppose Jesús ne pe nac dziin ne grieelo dziuun ne lo me, zigne gola zdoo me. ⁸ Min rii ga raquiet

zaatne znu zhobnee lo guits ne ziaad Xtiidz Dios:

Blozhse psanwin me grëse zha ne rlëe ran me,

laa me biire zey gbaa stib;

ni ppose me tib tib miech pe nac dziin ne grieelo guñ zho lo me.

⁹ Golgotsaa gwi ne ganle, Jesús raquiet nu, rneew “biire zey me gbaa stib”, ga rlu ganle tib men ne biet gbaaw biaad me lo guidzliu.

¹⁰ Sac me biet gbaa, ni biire zey me gbaa stib, zeena glu ganle tel pa lotaa zrieelo gdziñ me. ¹¹ Ni mezhal rzo ne tib tib ne pe nac dziin ne dziuun ne; me rzo:

zha ne rxeeł me gnee xtiidz me,

zha ne rxeeł me cteed xtiidz me,

zha ne rienee Xtiidz Ndzon me tib tib lo miech zha laa zho lo dol,

zha ne rteedlo grë zha ne ngab lo me, ni

zha ne rseed zho zha nac Xtiidz Ndzon me.

¹² Laa me run min co, sac laa me racladz grëse zha ne ngab lo me lozh xixcuua lo xquielmban zho, zeena guien zho zha guñ zho xtsiin me; ¹³ haxta gdziñ dze ne tibaque mine gliladz ne grë ne, grëse ne dziuunbeypaa ne men ne nac Xpëed Dios. Laa ne lozh sodziits, haxta gac ne zig me.

¹⁴ Gacdraa ne zig chol cho mëedlas ne beelze pe riladz; niicxe guiaad grë zha ne guiaadnie stib wseed, zha ndzinlid ne zombëz loxaque dien zha gdeeda didz yquidie zho miech; yquidied zho ne.

¹⁵ Sinque guional ne mine nac diidzli, ine gleynie ne samiech ne, tibaque laa ne guional zigne nac Jesús, men ne rnabey lo ne grë ne ne ngab ne lo me (rrieequia xcuerp me nac ne, me nac guic cuerp co).

¹⁶ Ni ne me nac men ne rnabey lo ne, me rnabey zha gac tib tib dziin ne pso me ne dziuun ne; niicle ne nzian ne, per tipse nac ne laa ne nodziuun dziin ne pso me ne, zeena xixcuuaraa lo xquielmban ne, ni lozh guien ne zha gleynieraa ne samiech ne.

Guielmban cub ne rneedz Jesús

¹⁷ Laa naa rso diidz lo to nu, ni golquiaadiaga zig nac zeene men ndzon ne rnabey ne rneew lo to: gbandraa to zigne mban grëraa miech ne zozit lo Dios, grë zha ne mban zigne notaa guic; ¹⁸ sac tel zha, ncow nac guic zho. Gard ygaa zho guielmban ndzon ne rdeed Dios, nand zho

zha nac guielmban co sacne ndip zdo zho. ¹⁹ Laa zho gocnadle, niapse lo grë ncuaane ndzinlid no zho, ib rgobeyd zho run zho grëtaa guielyozh ne no. ²⁰ Sangue to gon, ne nac to zha ne no xnëz Jesús niina, led mincod noseed to; ²¹ telne nli noquiaadiag to ganle cho nac me, telne nli rien to zhiwseed me mine rlu ganle zha nac diidzli.

²² Miech yozh ne goc to glo, grëtaa ncuaane ndzinlid, grëtaa guielyozh ne gocladztaa xcuerp to been to, igolsaana! ²³ None gdzëe lo xquielmban to, zigtaa grë mine no zdo to, zigtagaa grë mine rza guic to, ²⁴ golgac tib miech cub, zaacse golban, ndzinli golgac; zeena glu ganle ne nli beenncuble me to zigne racladz me.

²⁵ Golguien sca, yquidiedraa to samiech to, sinque niapse mine nac diidzli golnee, sac gon tel ne pe nacne yquidielsa ne ni tibaque nac ne grë ne.

²⁶ Telne glëe to, code to guielblëe co zdo to dib dze, sac gon dol ga. ²⁷ Gunde to mine racladz mendox.

²⁸ Zha ne goc ngbaan lëe, cuandraa zho, sinque guñ zho dziin gdziniaa zho ncuaane yquiin zho, zeena scagaa grieelo guñ zho xyudar zha ne guien pe yquiin.

²⁹ Gneede to diidznë, sinque diidz ne ndzinli, diidz ne yquiin golnee, zeena zha ne gona ine cchooblada zdo zho, ine yquina lo zho. ³⁰ Golguien, gunde to ncuaane coguieñe to Espiritu Sant. Golgan ganle laa Dios pxeel me, nac me zig tib bey ne glu ganle ne nli lo Dios ngab to, gal dze ne laa me lozhpaa csilaa grë zha ne ngab lo me. ³¹ None csaan to:

guielnialadz, tso to gow gzhizh zdo to; glëedraa to,

sobzhiandraa to,

coredzdraa to,

gacntseebdraa to, ni

grëragaa guielntseeb ne no, gunde tow.

³² Sinque none:

wen gac to lo samiech to,

golquia zdo samiech to,

golgun samiech to perdon, zigne beenaque

Dios to perdon zeene laa to beenbey

Jesús.

5

None glu cho nac zha ne ngab lo Dios

¹ To ne laa to nacle xpëed Dios ni nquial-
adz me to, goltsoxco gac to zig me. ² Zaacse
golban, golleynie samiech to zigne rleynie
Jesús to, sac gon tel me, haxta bleeladz me
me gut me xcuent ne, gut me biogon me lo
Dios psanmbe me ne lo xtol ne, me goc tib
gon ne pcaania Dios.

³ Golguien sca, none glu to ne nli xnëz
Dios no to;

gunde to grë guielyozh ne run grë zha ne
zienałd zigne nacpaa guieltsieel,
gunde to grë ncuaane yozh ne run miech
ndzinlid,

gunde to grë ncuaane run grë zha ne zienał
loxaque dien zha gunlo dimi.

Gunde to grë ncuaan co, per ni gzodiidzde
tow.

⁴ Gneede to grë diidzguidz,

gneede to grë diidz ne paat rquiind,

gneede to grë diidz ro nëz;

sac gon rdzieeldraa gnee to grë ncuaan co;
sinque Dios golgoolnie, goldeed xquizh lo
me.

⁵ Nanle to ganle, grëse:

zha ne zienałdraa zigne nac guieltsieel,

zha ndzinlid ne run grëraa guielyozh,

zha ne mbidz (zha ne rleynieraa dimi, laa
ne gleynie zho Dios);

ni tib zho grieelod gdziñ zaatne rnabey
Jesús grop me Dios.

⁶ Gdeete to diidz lo zha ne gacladz yqui-
die to gnë zho peet nacd grë min co, sac
gon, grëcxe min co waa run grë zha ne nëd
gon xtiidz Dios, lozh ga, lëe mine tsieguial
zho laa zho ygaa lo guielzi ne csiaab me.

⁷ Golguien sca, yquiaadiagde to xtiidz grë
zha ne sca rnee, per ni ctsieelsade to zho.

⁸ Nli, ¿lëe?, ndzinlid wban to glo, rrie-
quia lo ncow ga bio to, gocnie to mendox;
sanguë niina ne laa to nacie Jesús men
ne nac biini, rriequia lo biinile no to.
Golguiena sca, zaacse golban, ⁹ sac niina ne
laa to nole lo biini, none gac to:

tib miech wen,

tib miech ne zienał gac mine nac diidzli,

tib miech ne rnee diidzli.

¹⁰ Goltsoxco guien to zha racladz Dios gban
to. ¹¹ Gandzede to grë ncuaane ndzinlid
ne run grë zha ne no lo ncow, sinque

gollisquiw; ¹² sac grë ncuaane run zho
ngueets zhliaan, haxta ncuaane ctoladz ne
gnee new. ¹³ Grëse zha ne gbig lo biini
co, zien zho ganle zha nactaa grë ncuaane
yozh ne noyun zho; sac gon telne biiniw,
tsod ncuaane guianngueets low. ¹⁴ No tib
zaatne znu zhobnee lo Xtiidz Dios, rneew:
Luu ne tibaque guieel no luu, blee mcaal lo
luu;

brieel lad grë zha ne squi nole ladznia
guielgut,

zeena gban luu lo biini ne nac Jesús.

¹⁵ Golguien sca:

Miech nixbiini golgac, ndzinli golban;
gbande to zig chol cho grë miech nxen ne
run mine notaa guic.

¹⁶ Cteed zhlëde to xtse to lo ncuaane paat
rquiind, niicle ne niapse grë min co zienał
grëraa miech len dze rii.

¹⁷ Gunde to ncuaane paat rquiind ne rza
guic to, sinque golguien dien pa minpaa
racladz Dios gun to, dzigo goltsoxco min co
golgun.

¹⁸ Gzudzde to, sac gon lo guielgonziu run
miech ncuaane nonguieldraa; sinque mazd
golnab gneedzraa Espiritu Sant guielbiini lo
to, zeena ine:

¹⁹ gool to grë salm, grë himno, grë cant
ne csiaab Espiritu Sant guic to; dib zdoo to
golgoolnie men ndzon ne rnabey.

²⁰ Goldeed xquizh lo Dios men ne nac
Pxoze ne, por grëtaa ncuaane ran to,
ncuaane rded to; golguien ganle lo Jesús
ngab to.

Zha none gban zha ne riladz Jesús

²¹ To ne nac to zha ne ngable lo Jesús, tib
tib to golgon mine rnee zha ne nacgrë to,
zeena glu ganle me nac men non lo to.

²² To ne nac to men wnaa ne ptsieelniale,
golgon xtiidz tsieel to, zigne rioxcoque to
ron to mine nac xtiidz men ndzon ne rn-
abey. ²³ Sac ible tsieel to nac men ne no
gnabey lo to, zigne Jesús rnabey lo grë zha
ne no xnëz me (ni me psilaa zho lo dol, laa
zho nac zig xcuerp me). ²⁴ Ni zigne sca ron
zho xtiidz me, scaque none gon to mine
rnabey tsieel to to.

²⁵ Togaa ne nac to zha bgui ne ptsieel-
niale, golleynie tsieel to, zigne rleynie Jesús
zha ne no xnëz me. Tel me haxta bleeladz

me xquielmban me, ²⁶blee me zho lo dol, ni biaanmbe zho zeene laa zho pquiaadiag xti-idz me, wban zhow ni brobnis zho; ²⁷zeena gal dze ne laa me ycaania zho, laa zho nacle miech ne rieguial gdziñ lo guielndzon ne no me, ni tib dol rapdraa zho, miech mbele nac zho, zig tib lë lar nquitsbie ne ni tib pxud neyd. ²⁸Sca nagon none gun mgui, none gantsi zho tsieel zho zigne rantsi zho xcuerp zho. Mgui ne rantsi tsieel, rriequia xcuerp zho ga rantsi zho; ²⁹sac gon, tsod tib zha ne lëëque zha csacsi xcuerp zho, sinque ran zhow. Ni scadaa nagon rzac Jesús grëse miech ne ngab lo me, ³⁰sac nac zho zig xcuerp me. Ni lëë tib lë cuerp co nu nac ne.

³¹Zha ne pcatsieel-le, ible tibaque cuerp nac zho grop zho, laaw zhobneeque lo Xti-idz Dios zaatne rnee: "Ib none greezhaa mgui lo pxoz zho, lo xniaa zho, zeena gbannie zho tsieel zho gac zho zig tibaque miech grop zho." ³²Rgobey naa ngañ tsoquic to zha nacne chop miech gac tibaque cuerp; per ga gon rlu ne niicle nzian ne per tibaque cuerp nac ne, ni lëë xcuerp Jesús ga. ³³Mine racladzpaa naa csoladz to nu: to ne nac to men bgui, none gleynie to tsieel to zigne rleynieque to xcuerp to; ni niicle togaa ne nac to men wnaa, none gon to xtiidz tsieel to, cueede to xquielto zho.

6

¹To ne nac to mëëd, golgon xtiidz pxoz to, xtiidz xniaa to, sac sca nonguiela, ni scagaa glu ne nli rleynie to Dios. ²Golgan ganle, lo grë xley Dios no tib mine znu rnee: "Bin xtiidz pxoz luu, xtiidz xniaa luu, zeena ine niowse gac lo xquielmban luu, ni nroob dze ne gban luu lo guidzliu rii." Ni lëëw glopaa rnee ganle pe nac mine ygaa zha ne gun mine rnabeya, ³sac rneew, niowse gac lo xquielmban zho, ni nroob dze ne gban zho lo guidzliu rii.

⁴Togaa ne nac to men nguzan, gunde to ncuaane yquiaaguieñe to xpëëd to, sinque golcobey dieñ zha gun to parne gon zho diidz, ni cseed zho gban zho zigne rdziladz Dios.

⁵To ne nac to zha ne ngadoo ladznia ben, golgon xtiidz men ne rnabey to. Golguieñ zha rnabey to, dib zdoo to, goltoxo golgun

xtsiin zho, zig nac zeene xtsiin Jesús ga noyun to. ⁶⁻⁷Gunde to ne loxaque zeene zose zho lo to, dzigose yquiaalo to gun to dziin zeena guianzuiu to lo zho, sinque ine nguieel golgac golgun xtsiin zho, zig nac zeene xtsiin Jesús ga quia to, ine dib zdoo to quiayun to mine racladz Dios. ⁸Benque nanle to, zigtaa zha ne ngadoo ladznia beña, zigtagaa zha ne rnabeya, zdeedse Dios mine tsieguial zho tib tib zho tel pe nac ncuaane wen ne noyun zho.

⁹Togaa ne nac to zha ne rnabey, niowse golgac lo zha ne quia xtsiin to, gacntseebe to lo zho. Golguieñ ganle, zigne rzacaque zho, scaque rzac to, no tib men ne rnabey to grë to, lëë me ga zob gbaa; ni tel me gon led yed me guiab dieñ cho rnabey, chogaa run dziin.

None nsin so zha ne riladz Jesús

¹⁰Bets, bzian, nu ne laa naa csiaalle, laa naa rnab lo to gon tibaque golnalo Dios; golgan ganle, con grëtaa guieñrnabey ne rap me, me gneedz grë lose fuerz lo to. ¹¹Zig nac grë menquiib, ible no grë ncuaane rquiin zho zeene laa zho rie lo dil, scaque to niina nagon, golquiin grë lose fuerz ne bneedz Dios lo to, zeena glëbd mendox gungüet ma to. ¹²Golgan ganle, led-xe miech guidzliud waa nodilnie ne, sinque laa ne nodilnie grë me yozh ne quianzë zhan gbaa, ma ne quianabey grëtaa guieñtseeb ne rac lo guidzliu rii.

¹³Gane nagon none yquiin to grëse lo fuerz ne zineedzle Dios lo to, zeena guiablode to zeene laa grë me ntseeb co csilo ygaal to; ni scagaa, zeene laa ma biablo, tibaque dziits so to grë to.

¹⁴Dziits sca golso:

Dziits golso lo mine nac diidzli, zigne dziits dziits rzhidoo len menquiib zeene laa zho tsie lo dil.

Golgun mine nonguiel zeena ctse to lo mendox, zigne rtse ncuaane racw menquiib lo grë ncuaane gnitlo zho.

¹⁵Nsin golso zeene laa to tsienee Xtiidz Dios lo miech gacnan zho zha guiaanwen zho lo me, zigne nsinle zo menquiib zeene laa zho no tsie lo dil.

¹⁶Guiaanladzde to, golnalo Dios, zeena peet grieelod gun grë me yozh co to, zigne

rnalo men_guiib guiiblag ne rsaac zho lo zha ne nodil_nie zho.

¹⁷ Golsoladz gan_le laa Dios psilaale to lo guiel_gut, golsaca zigne rzac men_guiib pchog guiib ne rzob guic zho, rsilaaw zho lo guiel_gut. Ni golsac Xtiidz Dios mi_ne rneedz Espíritu Sant lo to, zigne rzac men_guiib xquiib zho.

¹⁸ Nsin sca gol_so, guiablode to. Tibaque golzodiidznie Dios. Gol_nab lo me mi_ne rsiaab Espíritu Sant guic to, gol_nab gacni_n me gr_ese zha ne ngab lo me; ni ¹⁹ gol_nab lo me gacni_n me naa, csiaab me guic naa pe nac mi_ne gne naa, peet dzeb tsod lo naa gne naaw lo miech; zeena gacna_n zho gan_le, zha nac Diidz Ndzon ne rnee zha laa miech lo dol_l, mi_ne choot gocna_nd glo.

²⁰ Ib me bzo naa cteed naa xtiidz rii me lo gr_e zha zit, ni mi_ncocxe waa rquiaqui znu no gr_e guiib rii nia naa, ngoguiu zho naa nu. Gol_nab lo me gacni_n me naa, gdzieebd naa gne naa gan_le cho nac me. ¡Nsin sca gol_so!

²¹ Laa naa rxel_l Tic lo to, me nac tib men_n ziiuu lo naa, dib zdoo me laa me quiayun xyudar naa lo xtsiin_n men_n ndzon ne rnabey ne. Me guiaadnie diidz lo to gan_le zha rac naa, zha no naa nu. ²² Mi_ncopaa ziaad me i, ziaadnie me diidz zha no no n_ez rii, zeena i_ne gley to tsoxcoraa to mi_ne rliladz to.

²³ Rnab naa lo Dios men_n ne nac Pxoz ne, ni lo Jesús men_n ndzon ne rnabey, me gacni_n to peet zhgab ctsebde to, i_ne tibaque gliladz to me, i_ne gleynie to samiech to.

²⁴ Me gun_lay to, gr_ese to ne nac to zha ne nlipaa dib zdoo rleynie Jesús.

Pabl

GUILTS NE PXEEL PABL LO ZHA FILIP

¡Diuzh to grëse to!

¹ Naa nac Pabl, grop no Timoté laa no rxeel guits rii guiedz Filip i. Laaw ziaad lo to ne nac to zha ne ngable lo Dios, ni nacie to Jesús; zigtaa tow, zigtaa zha ne zo lo tow, zigtagaa zha ne run xyudar zhow. Nanle to ganle zigtaa naaw, zigtaa Timotéw, tib ngundziin nac no lo Jesús.

² Dios men ne nac Pxoze ne, ni Jesús men ndzon ne rnabey, me glu ganle pa lotaa noxco me to, zeena ni tib zhgab ctsebde to.

³ Zeene rsoladztaa naa to, rded naa xquizh lo Dios; ⁴ ni zeene rzodiidznie naa me, rley naa gon rnab naa lo me gacnien me to; ⁵ sac desde dze ne laa to psilo bliladz Jesús haxta lo nadze, tibaque laa to quiayacnie naa, quiayun to xyudar naa noseed naa miech Xtiidz Ndzon me. ⁶ Ni nanpaa naa, zigne squi psilo Dios nozhixcuaa me lo xquielmban to, zigse zie dze laa me gzhixcuaaraa to, zeena nsinle zo to gal dze ne laa Jesús guidaad stib.

⁷ Min co racladz naa, ni ib rieguiala sac ne nligaa rleyne naa to. Sac ib rsaande to naa, zigtaa zeene znu no naa ladzguiiba, zeene zonlaagaa naaw, zaatne racpaa rne naa ni rlu naa ganle ne nli diidzli nac Xtiidz Jesús. ⁸ Dios nan ganle pa lotaa nonie to guic naa, rquianë zdoon naa to, zigne rzaaque Jesús ne.

⁹ Rnab naa lo Dios gacnien me to, zig zie dze gleyneraa to samiech to, tsabiiniraa to, ¹⁰ zeena guien to cue to niapse grë ncuaane ndzinli gun to. Sca ine ndzinli nac lo xquielmban to, ni tib xtol to guien gal dze ne guidaad Jesús; ¹¹ zaacse gban to. Ga glu to ganle lëe min co blu Jesús lo to, zeena sca csanglaa to Dios.

¹² Bets, bzian, racladz naa gacnan to ganle niicle tel pe nactaa ncuaane nodeed naa, per led mincod gon cuëz ygaazdraa Xtiidz Ndzon Jesús, sinque lel znu mazdraa ndal miech ne noquiaadiaga. ¹³ Sac tel niina, zigtaa grë zha ne rquia dziin

lo gobierna, ni grëragaa miecha, laa zho nanle ganle ne loxaque noyun naa xtsiin Jesús gane znu no naa ladzguiib. ¹⁴ Sac ndal grë bets zeene gon zho laa naa znu biab ladzguiib, laa zho bguiaalraa laa zho noseed miech Diidz Ndzon rii; peet rto-ladzdraa zho, peet dzeb guien draa lo zho, masaque Dios rnalo zho.

¹⁵ Parga nli no stib dii zha ne psilo noyun dziin co, per laa zho noyuna loxaque par dien zha guianzuiuu zho, sac në rac zdoon zho ran zho zha none naa Xtiidz me. Per zigne no zha ne sca nac, noque zha ne nli dib zdoon zho quiaseed zho miech. ¹⁶⁻¹⁷ Lëe zha co nagon rlu ne nli rleyne zho naa; sac nan zho ib laa Dios bzo naa gne naa ni glu naa lo miech ganle ne nli diidzli nac Xtiidz Jesús; laa zha ne sca noyun dziin co par guianzuiuu zho, rzac zho na tel mazdraa glaa guiaan zho lo naa, mazdraa lozh coguieinë zho naa ne laa naa znule no ladzguiib.

¹⁸ Per par naa, pex gun naa zho. Tel zha ne zie dib zdoow, zha ne zieedgaa dib zdoow, totsaque ne Xtiidz Jesús quiaseed zho miech; min co nac mine mazdraa rley naa.

¹⁹ Ni zleyragaa naa, sac nan naa ib zrie naa zaatne niogyu naa nu; sac lala quianab to lo Dios por naa, ni lala nacie zhiEspíritu Jesús naa. ²⁰ Dib zdoon naa racladz naa, tiblque gac naa lëeb naa gan naa mine tedtaa naa, gdzind dze ne gun naa ncuaane cuee xquielto naa. Racladz naa cxobnen naa ganle zha men rottaa nac Jesús; niicle tel niaca por min co yquiaaqui gut miech naa. ²¹ Sac gon, par naa laa naa mban par gun naa mine rnabey Jesús, ni zeene guetgaa naa, nanpaa naa tib guiebley nroob ne ygaa naa. ²² Per tel laga mban naa, nzianraa ncuaane grieelo gun naa lo me; dzigo nagon riendaque naa dien pa min wenraa. ¡Pe wena gbanraa naa, te wena ye prontga gbi naa lo guidzliu rii! ²³ No hor rzaac naa gbanraa naa, nogaa hor rzaac naa tebaa laa naa while lo guidzliu rii; zeena ziagaa naa lo Jesús, sac nligaa zoot naa laa naa bdzinle lo me. ¡Min co mazdraa wen, lëdle cuëz naa lo guidzliu rii! ²⁴ Per rien naa ible none cuëz naa, sac rquinpaa to naa. ²⁵ Mincoxe nagon waa, rgobey naa zbanraa naa, zeena lozh cseed naa to

choobraa to lo Xtiidz Jesús, ine nley gac to laa to riladza; ²⁶ ni zeene laa naa gbire guial lo to i, rien naa nroob gley to, zdeed to xquizh lo Jesús porne racniën me naa.

²⁷ Per mine rsopaa naa diidz lo to gon: Goltsoxco golban zigne no gban zha ne ngab xnëz Jesús, zeena niicle telne grieelod guial naa, racladz naa gon naa tipse nac to grë to, tiblque dziits zo to lo Xtiidz Dios; ni noxco to dien zha gliladz grëraa miech Jesús, ²⁸ ni lalnu rdziebde to grë zha ne rlëë ran to. Ga guien zho ganle nëz ne nitlo zho zie zho, sangue to ga rlu ne laa Dios psilaale to lo xtol to, ni nacie me to. ²⁹ Sac gon, ible none gan to guielnë porne no to xnëz me, bzooblod Jesús to loxaque par yгаа to guielnzaac qui gnalo to me. ³⁰ Niicle tow, niicle naagaaw none dzian ne min co. Gonle to ganle zha nactaa grë ncuaane bdeed naa, ni ziyongaa to grë mine nodeed naa niina.

2

Goc Jesús tib men ndooladz

¹ Nanle to ganle Jesús rchoobladz zdo to, me rlu zha gleyne to samiech to, tipse nac to ni Espíritu Sant nacie to; nanle to ganle none yquia zdo to samiech to.

² Gacxe nana sca, golconley zdo naa, ine tipse golgac, golleynie grë zha ne nacgrë to, tipse golnee, ni tipse golgac tel pa lo dziin ne gnediudz to gun to. ³ Ncuaane gun to, guiabde to ne laa to guna par dien zha csanwin to stib miech, zeen dien zha guianzuiu to; sinque ine ndooladz golgac, masaque goltsienie guic ne nonraa stib miech lo to. ⁴ Ib yguibde to ne lose to yquiin ncuaane gun to, sinque golguib dien zha gun to xyudar grëraa miech.

⁵ Golsoladz ganle pa lotaa ndooladz goc Jesús len dze ne biaadted me lo guidzliu, scaquegaa nasca ndooladz golgac. ⁶ Sac tel me:

Niicle ne Dios nac me,
per led mincod niab me nrieed me lo
guielndzon ne no me,

⁷ sinque grëse zigne nac me, laa me psana
tib lad,

laa me goc zig tib ngundziin win,
biaad me gol me lo guidzliu rii goc me
miech.

Nacle me miech,

⁸ ni bii psanwin me me lo miech,
haxta bdeed me diidz pquiaa zho me lo
cruz,

zig run zho cho grë zha yozh.

⁹ Mincoxe waa, psanglaaraa Dios me,
biaan me men ne mazdraa non, men ne
mazdraa nroob;

¹⁰ zeena zeene laa me gaquiet,
grëse zha ne no gbaa, grëse zha ne no lo
guidzliu,

ni grëse zha ne no nëz len guidzliu, laa zho
yquiitsgzhib,

¹¹ ni grëse zho laa zho cueero, guiab zho
ganle ne nli me nac men ne rnabey.

Ga laa zho cxobnen ganle, zha men nroob-
taa nac Dios, men ne nac Pxoz me.

Zha ne nac biini lo guidzliu rii

¹² Bets, bzian, ne nligaa rleyne naa to.
Laa naa rnab lo to (zigne bioxco to bin to
xtidz naa zeene blëz naa lo to i, scaquegaa
niina niicle ne zit zo naa, golgon mine rne
naa nu), ib gdeete to diidz guiab to ladz-
nia dol stib, niina ne laa Dios psilaale to;
golguien tsieniewguite guic to. ¹³ Benque
Dioszhal rsiaab guic to rquiabladz to gun
to mine racladz me, ni scagaa me racniën
to rrieelo run tow.

¹⁴ Ni ncuaane rieguial to gun to, ine
nguieel golgac golguna, peet glisquide to, ni
niicle tilidiidzdgaa to; ¹⁵ zeena tsod pe nacie
cho glisqui guiab zho laa to pe falt, pe dol
ne quiayun. Gollu ganle nli xpëëde Dios
nac to; zaacse golban, niicle ne ladaque
grë miech ntseeb, miech ncow ne ndxie lo
guidzliu rii no to. Golgac zig tib biini lo
zho, zigne rziini mel gbaa lo ncow ne nac
guieel. ¹⁶ Ib csaande to Xtiidz Ndzon Jesús,
diidz ne rdeed guielmban, lëew golconie guic
to. Sca golgac, zeena gal dze ne laa Jesús
guiaad stib, per nli gley naa gan naa led
zhlëd brie naa bial naa, bialseed naa to.
¹⁷ Zig nac niina, tel niaca mine no gded naa
xquielmban naa gaca zig tib gon, parne dib
zdooraa to gliladz to Dios, haxta zley naa
gded naa xquielmban naa; sac racladz naa
ye to yгаа guielbley. ¹⁸ ¡Golley sca! Zigne no
guielbley rii zdo naa, scaquegaa to golco
nley zdo to, zeena grë ne gley.

Timoté ni Epafrodit

¹⁹ Telne gneedz men ndzon ne rnabey ne diidz, racladz naa cxeelnioab naa Timoté guiaadwi dien zha no to, zeena haxta stibgac zdoo naa zeene laa Timoté glansonie diidz lo naa. ²⁰ Me cxel naa, sac guienḁ stib zha ne zienie guic zig zienie guic naa, tel led med; sac tel me nonie to guic me. ²¹ Grëraa zho, ncuaane yquuin lo zho rioxco zho, laa ne tsoxco zho mine nac xtsiin Jesús. ²² Laa Timoté, led nanle to ganle zha ndzinli nac me, tel niina ine tib mëed nac me lo naa, nroob yudar ne quiayun me noseed no miech Xtiidz Ndzon Jesús. ²³ Ible laa guic naa no cxel naa me lo to i, loxaque gacnanse naa dien zha csan wxtis rii xcuent naa nu. ²⁴ Ni ye naa nend pronaque guialso naa i dien yo to, sac rien naa ible zneedz Dios diidz guial naa.

²⁵⁻²⁶ Ni rgobey naa nonguielaquew cxel naa bets ne Epafrodit guiaad me nêz qui, sac laa me rbanle to, ni no me zhgab bin me laa to gocnan ne laa me bzhaacnë. Nli laa to pxeel me lo naa nu, ni blactagaa noyun me xyudar naa ne znu mban nodeed naa, blactaa noyacnie me naa lo dziin ne nodziun no. ²⁷ Ni nligaa bzhaacnë me, nzhoog me zootle laa me nietle; per pquia zdoo Dios me ni pquiaagaa zdoo Dios naa peet god me, sac gon nole naa guielnë, ni tel pe niacaque me mazdraa niac nroob xquielnë naa. ²⁸ Min co nagon laa naa cxelgazh me, zeena gley to gan to lo me stib, ni scagaa niicle naaw zley naa. ²⁹ Golley sca gon golcaania me, golguien ganle bets to nac me, bets new grë ne ne nac ne zha ne ngab lo Dios; ni grëragaa zha ne nac zig nac me, golleynie zho. ³⁰ Golgan ganle, tel me haxta bdedlaa me niet me nu niina ne biaadgun me xtsiin Jesús; per ib pquiad zdoo me me, bleeladz me xquielmban me biaadgun me xyudar naa, porne brieelod niaad-zhal to.

3

Ncuaane mazdraa non

¹ Bets, bzian, golley ne laa to ngab lo Jesús men ndzon ne rnabey. Mine ziesole naa diidz lo to, guieete naa zneque naaw stib, sac ncuaane yquingaa lo tow: ² ;ib cxende to lo grë mëcw dox qui! Grë miech ndzinlid ne squi quianzë, racladz zho tsopaa zha

bgui bey, sac rzac zho zha ne sca tso bey, ga rlu xnëzle Dios no zho. ³ Sangue ne, ndionle ne zha nac diidzli, zha ne rleynie Dios zigne rsiaab Espiritu Sant guic zho, ni dib zdoo zho run zhow, zha co nac zha ne nlipaa no xnëz me. Ne ne nac ne zha ne no xnëz me, Jesús nac men ne rdziuunnon ne, sac ndion ne por me laa Dios ycaania ne; rnalod ne grë ncuaane laglaase, ⁴ sac telne scaw; zig nac naa pe zhistaa ncuaane dzigo zrieelo gnalo naa. Tel no zha ne rzac por ncuaane been zho min co laa Dios csilaa zho; tel scaw, nroobraa ncuaane ziyun naa lo zho: ⁵ Xon ngbidz raap naa laa naa biole bey co, zha Israel nac naa, lo xtii Benjamín zial naa, merpaa zha Israel nac naa; sac niicle pxoz naaw, niicle xnial naaw zha Israel nac me. Niicle xleygaa zha Israela, nroob pseed naaw, zha farisé goc naa; ⁶ bleyniedox naa grë mine zienal zha Israel, gacxe waa pquianal naa grë miech ne no xnëz Jesús; zig nac mine raquiet lo ley, grësew beḁ naaw zigne naca, ib biod dze ne cho zha pe nlisqui lo naa.

⁷ Lëe grë ncuaan co rnalo naa len dze co, sangue niina Jesús rnalo naa, grëse ncuaan co laaw psanle naa tib lad. ⁸ Ni led loxaque psandse naaw tiblād, sinque grësew peet nondraaw lo naa, mine non lo naa niina nacne beenbey naa cho nac Jesús, men ndzon ne rnabey naa. Niina ne laa naa runbey me, grëse ncuaan co rzaac naaw zig rzac ne grë pe guizh beed, sac laa naa racladz gbigraa naa lo me, ni gacniera naa me. ⁹ Zanaḁdraa naa gun naa mine rnabey ley par guiaanmbe naa lo dol, sinque laa naa zanaḁ dib zdoo naa gliladz naa cho nac Jesús; sac zha ne dib zdoo rnalo me, sanmbe Dios zho lo dol. ¹⁰ Racladz naa guienraa naa zha nac Jesús, ni gaap naa poder ne pquiin Dios zeene blische me me len baa, ye naa teed grë mine bded me, ni cueeladz naa xquielmban naa zigne bleeladz me xquielmban me; ¹¹ ni scagaa, nanpaa naa ye naa grieeban gal dze ne guiadbeeban me grë zha ne no xnëz me.

Stsëe Jesús xcuerp zha ne ngab lo me

¹² Gnid naa togo laa naa benle gan, nasi laa naa nacle zigne racladz Jesús gac naa; led scada, laa naa bii noxcow, sac nanpaa

naa zac naa zigne no guic me gac naa zeene psilaa me naa. ¹³ Bets, bzian, gard guñ naa gan; per xco co no naa; grëse ncuaañe bded laaw biaanladzle naa, laa guic naa zienie ncuaañe naraa ziaad. ¹⁴ Masaque rzaac naa niina zig rzac zha ne rie prueb lo corr, rded naa fuerz gdziñ naa zaatne gneedz Dios zhipremio naa, guieñzaac ne rbedz Dios ne ygaa ne zeene laa ne rililadz Jesús.

¹⁵ Ni ib znu none tsonie guic grë zha ne nlipaa dziits zo lo Xtiidz Dios; telne nogaa bla zha ne rzac led scada, per Dios gdeed guieñbiini lo zho guieñ zho ganle zha naca. ¹⁶ Ni negaa, grë miñe rienle ne zha nac, none gban new.

¹⁷ Bets, bzian, golwi ganle zha mban naa, ni zha mbangaa grë zha ne zienal miñe blu no lo to grë to; dzigo sca golban. ¹⁸ Sac gon nbian zha ne nacgrë to i (blactaale zizet naa zho lo to, ni niina haxta roon naa rzet naa zho stib), laa zho mban zigne racladztaa zho, rlëe zho ron zho pe nac gut Jesús lo cruz; ¹⁹ ni nëz ne nitlo zho ga zie zho. Laa ne tsienal zho miñe rnabey Dios, laa zho zienal grë ncuaañe gdeed guxt zdo zho, ncuaañe gdeed guxt xcuerp zho. Loxaque grë ncuaañe mbee guieñto zienal zho, per zha rlozhd gleynie zhow; niapse grë ncuaañ lo guidzliu rii nonie guic zho. ²⁰ Sañgue ne, laa ne zional ncuaañe ygaa ne gbaa, sac gbaa nac zaatne ngab ne, ni laa ne quiambiaaz guieñ Jesús gbaa guiaad me stib (me nac men ne psilaa miech lo dol, me nac men ndzon ne rnabey); ²¹ zeena ctsëe me xcuerp ben wiich ne nu, gaca zig nac xcuerp ndzon me. Ni ib zun mew, sac nroob poder ne rap me rnabey me grëtaa ncuaañe no.

4

Rnab Pabl nley gac zha Filip

¹ Bets, bzian, ne nlipaa gon rleynie naa to, haxta rzaac naa tebaa laa naa ranle lo to; to nac xquieñbley naa, to nac zig tib premio lo naa por grëtaa xtsiin Jesús miñe ben naa lo to. Laa naa rso diidz lo to, tibaque squi dziits golso, ib csaande to zhiwseed Jesús.

² Rnab naa lo bzian ne Evodia, ni lo bzian ne Síntique glëëlsadraa zho, none tipse gnee zho; sac gon bel zho, xnëz Dios no zho

grop zho. ³ Ni luu gon bets, ne nac luu zha ne tibaque quiayacnie naa lo dziin ne quiadziun ne, laa naa rnab lo luu bnee lo grop wnaa qui gneewen zho stib, sac gon ye zho blactaa miñe bded zho zeene bzënal zho zhits naa biotiiz no Xtiidz Jesús, ni zeene güeynalгаа zho zhits Clement, ni zla zha ne rdziuungza no dziin. Laa lë zho zhooble len libr ne quia lë grëse miech ne bgaale guieñmban ne gdziñdraa dze lozh.

⁴ ¡Golley sca, tibaque golley! ¡Golgan ganle lo Jesús ngab to! Ni rneque naaw stib: ¡Golley! ⁵ Golguien zaacse golbannie grëse samiech to, zeena haxta gzeëb diidz ganle ne nli miech ndzinli, miech ndooladz nac to. ¡Golguien ganle, ile ziaad men ndzon ne rnabey ne!

⁶ Tel pe nac grë ncuaañe quiatede to, tso de to zhgab, gdziebde to, sinque golzodiidznie Dios, golsan grësew ladznia me; per led loxaque gnabdse to, sinque golsoladz goldeed xquizh lo me. ⁷ Ni zeene sca csañ to grë xliaadz to ladznia me, haxta tibliladz guiaan zdo to, peet dzeb tsoniedraa zdo to, peet zhgab tsoniedraa guic to, masaque Jesús nac men ne nacnie to; grëraa miech ib guieñd zho zha nac ne scataa tibliladz rac to.

⁸ Bets, bzian, nu ne laa naa csiaalle guits rii laa naa rnab lo to, min rii golconie guic to:
niapse miñe nac diidzli,
niapse grë ncuaañe nonguieñ gac,
niapse grë ncuaañe rac zigne nac diidzli,
niapse grë ncuaañe mbe,
niapse grë ncuaañe gleynie miech,
niapse grë ncuaañe gley miech gon zho,
niapse grë ncuaañe yquiin,
niapse grë ncuaañe gzee zdo miech ni gleynie zho.

Grë min rii golconie guic to, ni lëew goltsoxco guñ to.

⁹ Ni golguien gon, grë miñe pseed naa to, miñe psan naa diidz lo to guñ to, grë miñe bin to bne naa lo to, miñe gon to ben naa, grë min co goltsienal; zeena scagaa zacnie Dios to ib peet zhgab ctsebdraa to.

Gon ne bdeed zha Filip

¹⁰ Ne nlipaa rded naa xquizh lo men ndzon ne rnabey ne, ni rley naa ne laa to

pxeel grë ncuaane yquuin naa stib. Nan naa ne led biaanladzde to naa, sac tibaque noxco to dien zha gun to xyudar naa; sinque bdeedniobda diidz. ¹¹ Rley naa ne laa to psoladz naa, maase niicle nodpaa naa zhgab co dien pa griee pe yquuin naa, sac pseedle naa peet zienied guic naa niicle tel zhataa nodeed naa. ¹² Nan naa zha nac guielprob, ni nanquegaa naa zha nac zeene quianie ne nroob ncuaane yquuin ne. Pseedle naa rzac zdo naa mine nodeedtaa naa, niicle zeene biodzë zdo naaw, zeene rcaabedzgaa naaw; niicle zeene nroob ncuaane yquuin naa no, zeene peet guiendgaa. ¹³ ¡Grësew rrieelo naa, sacne nacie Jesús naa, me rneedz xfuers naa! ¹⁴ Per wen ga been to, pxeel to ncuaane pquuin naa lëetaque len dze ne peet guiend lo naa.

¹⁵ Zeene brie naa nëz xtan zha Macedon i, len dze ne wriin psilo noseed naa miech Xtiidz Ndzon Jesús ga, tosaque nac zha ne been xyudar naa, beenlo to gon pxeel to lo naa, porne rleynie to dziin rii. ¹⁶ Scasaque len dze ne no naa Tesalónica, blalaa vuelt pxeel to pe pquuin naa.

¹⁷ Guiabde to togo bod ne dien zha ygadraa miech lo naa gane rzetpaa naaw; lëda, sinque rley naa ne squi rala zdo to rgad to, sac squi nroobraa guielnzaac ne ygaa to. ¹⁸ Tel na gon, grële ncuaane yquuin naa no, haxta nrooblew nu. Ni ne pxeelaque to Epafrodit biaadsan stib nëza, haxta bdedsole goclow lo naa nu. Grëtaa ncuaane bgad to lo naa, rrieequia naca zig tib gon ne bdeed to lo Dios, zig tib gox ndzon ne sac zdo me ycaania me. ¹⁹ Scagaa niina nagon, grëse ncuaane yquiintaa to, Dios men ndzon ne rliladz ne, me gneedza lo to, porne nligaa dib zdo to rliladz to Jesús; sac gon, nroobdoo grë guielndzon, grë guielnzaac ne rap Dios. ²⁰ ¡Lëë xDios ne ga, me nac Pxoz ne grëse ne! ¡Gotsaa dziuunnon ne me sca, mesi gdziind dze ne nitlo xquielndzon me! Sca rieguiala.

²¹ Goldeed tib zhibdiuzh naa lo grëse zha ne no xnëz Jesús i, grë zha ne squi noxco mban zigne racladz Dios. Scagaa golcaania zhibdiuzh grë zha bets ne, zha ne no lo naa nu. ²² Golcaania zhibdiuzh grëse zha ne no nu, zha ne rliladz Jesús; haxta ye grë zha ne

rquia dziin lo rey Roma nu, laa zho rxeel zhibdiuzh zho lo to.

²³ Jesús, men ndzon ne rnabey ne; me noxco to, me nonie grë zhizhgab to. ¡Me gunlay to grëse to!

Pabl

GUILTS NE PXEEL PABL LO ZHA COLÓS

¡Diuzh to grëse to!

¹ Naa nac Pabl, tib zha ne pxeel Jesús nonee Xtiidz me lo miech, sac ible Dios bnabey ne sca gaca. ² Grop no Timoté laa no rxeel guits rii Colós i, laaw ziaad lo to grëse to ne nac to zha ne noxco mban zigne racladz Dios, ni dib zdoo to rleynie to Jesús.

Dios men ne nac Pxoz ne, me glu ganle pa lotaa noxco me to, zeena peet dzeb tsonied guic to.

³ Gzobtaa zeene rzodiidznie no Dios, Pxoz Jesús men ndzon ne rnabey ne, rnab no gacniën me to, ni rdeed no xquizh lo me ne squitaa rneedz me guielbiini lo to; ⁴ sac zidzion no ne nlipaa dib zdoo to rililadz to cho nac Jesús, ni rleynie to grëse zha ne no xnëz Dios. ⁵ Min co nonie guic to, sac desde dze ne psilo pquiaadiag to Xtiidz Ndzon Jesús mine nac diidzli, laa to gocnan ganle no tib guielnzaac nroob ne ygaa to gbaa.

⁶ Golgacnan sca ganle, Xtiidz Ndzon Jesús, wseed ne rililadz to, nzianraa zaatne quia-gaaza, ni lëew notsëë lo xquielmban miech, zigne bdzëëque lo xquielmban to zeene pquiaadiag tow, laa to bien ganle ne nligaa pa lotaa noxco Dios to. ⁷ Lëë min co ga biadseed Epaftr to; tib men ne nziuu lo no, ye me rquiagza no dziin; ranaxe to ganle zha rioxcotaa me xtiiin Jesús. ⁸ Me bzodiidz lo no ne squitaa rneedz Espíritu Sant guielbiini lo to, rleynie to samiech to.

⁹ Gane zeene bdzion no squitaa ndzinli mban to, tibaque laa no quianab lo Dios quixbiiniraa Espíritu Sant guic to, guien to zhapaa nac grë mine racladz Dios gun to; ¹⁰ zeena grieelo gban to zigne no gban zha ne no xnëz Jesús, tibaque gun to ncuaane conley to zdoo me; dzigosi grëse ncuaane ndzinli ne gun to, zlupaa ncuaane rquiina, ni zioguicraa to zha nac Dios. ¹¹ Ni rnab no lo me, niapse por poder ne rap me gunndip me zdoo to, gunndip me guic to; zeena niicle tel pe nactaa guielnë ne gan to, ib peet tsienied guic to, ib sacxuude to, ¹² ine gley

to gdeed to xquizh lo me nac me Pxoz ne, ne squi laa me bzooblo to, psanmbe me to; zeena gdziin to lo biini zaatne ygaa to mine no gdeed me lo grëse miech ne no xnëz me. ¹³ Sac me nac men ne blee ne ladznia mendox, ma ne rnabey lo guielcow, psan me ne ladznia Xpëed me Jesús, men ne rleynie me ga. ¹⁴ Jesús nac men ne bdiizh grëse xtol ne zeene sca gut me lo cruz, me nac men ne psanmbe me ne nëz lo Dios.

Grë ncuaane been Xpëed Dios

¹⁵ Niicle ne gard dzian ne Dios, per laa Xpëed me biaad biaadlu lo ne ganle zha nac me, sac zigne nacse me scaque nac Xpëed me; ni ladznia Xpëed me no grëtaa ncuaane no. ¹⁶ Zeene bnabey me taa grëtaa ncuaane no gbaa, grëtaa ncuaane no lo guidzliu; Xpëed me bzaaw grësew, zigtaa grë ncuaane rdzian new, zigtagaa grë ncuaane grieelod dzian new, zig nac grë “me mban” ne rap guielrnabey, rap poder. Jesús bzaaw grësew, ni ible par me biaaw. ¹⁷ Nole Jesús zeene baa grë ncuaan co, me naaza, gane tib tiba nosew zaatne rieguiala. ¹⁸ Ni grëse zha ne no xnëz me, me nac men nroob ne rnabey lo zho; grëse zho laa zho nac zig tib cuerp, dzigo me nac guic cuerp co. Me nac men ne nole glo, ni me nac men ne glopaa brieeban; zeena glu ganle me nac men ne mazdraa nroob, me nac men ne mazdraa non; ¹⁹ sac ib Dios bnabey zigne nacse Dios scaque nac me.

²⁰ Niapse por Jesús grëse ncuaane no zigtaa lo guidzliuw, zigtagaa gbaaw, laaw biaanwen lo Dios, ni lëë min co goc zeene sca bzhiee xchen Jesús lo cruz. ²¹ Zig nac to, glo zit zo to lo Dios, rrieequia rlëenie to me, sac niapse grë ncuaane ndzinlid güeynie guic to been to; ²² sangue niina laa Jesús psanwenle to lo me, zeene sca goc me miech pquiaa zho me lo cruz. Ni laa me psanwen to, zeena ine mbele to, ni tib dol rapdraa to gdziin to zaatne no me. ²³ Per parne grieelo gdziin to ga, none tiblique golgun guic to, goltsienal Xtiidz Ndzon me mine rililadz to, ib guiaanladzde to guielnzaac ne no ygaa to, zigne raquiet lo Diidz Ndzon ne pquiaadiag to ga. Lëë Diidz Ndzon co quiaagaaz dipse lo guidzliu niina, ni ye naa nac tib zha ne quia quianeew lo miech.

Dios bzo Pabl tsoxco me zha ne ngab lo Dios

²⁴ Grë guielnë ne noyan naa porne rleynie naa to, rley naa noyan naaw. Laa Jesús gonle grë guielnë co zeene psilaa me grë zha ne ngab lo me niina, laa niina ye naa noyan spalala, loxaque ne noseed naa zho Xtiidz Ndzon me, ne nac zho zig xcuerp me. ²⁵ Ni ible Diosgaa bzo naa noyun naa dziin lo grë miech ne no xnëz me, zig nac to, gocniën me to bzo me naa bne naa grëse zigne nac Xtiidz Ndzon me lo to. ²⁶ Diidz ndzon ne gocnand grëtaa zha gol ne ziyaadmban wlal ne bre guidzliu, laaw gocnan grë zha ne no xnëz me niina. ²⁷ Ible zha gocladz me gacnan grëtaa guielnzaac ne ygaa zho zeene laa zho gacnan diidz co; haxta to ne nac to zha zit. Ni lëë diidz ndzon co nu: Zha ne nacie Jesús, me gdziinne zho zaatne nac lo guielndzon ne no me.

²⁸ Gacxe waa, zaatne ziotaa no, Jesús nac men ne rzeet no lo miech, ni megaa rneedz guielbiini lo no rseed no zho, rso no diidz lo zho; zeena gac zho tib miech ndzinli, zigne no gac zha ne ngab lo me. ²⁹ Min co nac dziin ne noxco naa, per led dziin ligada, gane dib nacse guielndaan, dib nacse fuerz ne rneedz me lo naa, noxco naa noyun naaw.

2

¹ Racladz naa gacnan to ganle ne nlipaa tibaque no to guic naa, zigtaa tow, zigtagaa zha Laodicéw, ni grëragaa zha ne gard ganlo naaw. ² Rnab naa lo Dios ib guiaand zdoo to, tipse gac to ine gleyne to grë zha ne nacgrë to, lozhraa tsa biini xquielrien to guien to ganle zhapaa nac Jesús, sac gon naraa bdeed Dios diidz gunbey miech me. ³ Me nac men ne rap grëse guielrac, grëse guielbiini nroob chen Dios. ⁴ Laa naa rne min rii lo to, zeena choot yquidiede to, niicle paraa ndzielguic rzë xtiidz zho. ⁵ Niicle ne nli zozhaald naa lo to i, per zhiespíritu naa nacie naa to, ni rley naa ran naa squi zaacse mban to, tiblique nac guic to dib zdoo to rliladz to Jesús.

Tib guielmban cub

⁶ Nana sca, zigne bzëëb to xnëz Jesús gnabey me to, scagaa goltsienal mine rnabey me, ⁷ masaque ladznia me golsan xquielmban to, me gólnalo, gollu ganle ne nli dib zdoo to rliladz to me, zigne pseed no to, ni tibaque goldeed xquizh lo Dios.

⁸ Nsin golsa: ib gac-wete to lo grë zha ne guiaadnie wseed lo guidzliu rii, grë godiidz ne paat rquiind, sac laa zho gacladz yquidie zho to. Tel zha, ib rzeete zho lo miech dien cho nac Jesús, sinque lel grë ncuanea run grë xmengol zho, grë wseed ne rleyne grë miech lo guidzliu, min co rseed zho miech. ⁹ Sangue ne, ndion ne ganle zigne nac Dios scapaa nac Jesús. ¹⁰ Gacxe waa, to ne nacie to Jesús, peet rquiindraa to. Me nac men ne rnabey lo grëse zha ne rap poder, lo grëse zha ne rnabey.

¹¹ Zeene bnalo to Jesús rrieequia hor co bio to tib bey, per nacda zig nac bey ne rio xcuerp zha bgui, sinque tib bey ne rlu ne laa to psaanle grë dol ne been to glo; ni Jesús nac men ne bloo to bey co. ¹² Ni zeene brobnis to, rrieequia bgueetsnie to me ga ni brieebannie to me, sacne bliladz to poder ro ne rap Dios men ne blische me len baa. ¹³ Glo zha gutle nac to nëz lo Dios, lala por grëtaa xtol to ni porne gard co Jesús to bey co; laa zeene bleeban Dios Jesús, men ne pxeel me biaadsilaa ne lo dol, laa to wbiire bgaa guielmban stib. ¹⁴ Ptiche Dios grëse mine rioguial ne, sac bdiits ne mine nac xley me; grëse dol co pcaadz me Jesús zeene laa Jesús pquia lo cruz. ¹⁵ Ni zeene sca bded Jesús, ga psiaablo me mendox; grë me yozh ne rap poder, me ne rap guielrnabey, psan me ma guielto; sac gasi laa me blu lo miech ganle ne nli ladzniale me no ma.

Grë wseed ne paat rquiind

¹⁶ Gacxe waa, ib guncasde to zha ne rlisqui dien pe nacne pe row to, pe nacne pe rie to, pe nacne runde to grë zhilni zha Israel, runndade to dze ne rquia mëë yeen, runndade to dze ne rdziiladz zha Israel lo dziin. ¹⁷ Grë min co bioxco miech zeene gard guiaad Jesús, per lega gocse ncuaan co zig tib zhimlë guielbiini ne biaadnie Jesús. ¹⁸ Ib gliladzde to xtiidz grë zha ne squi racladz csozit to lo Dios, niicle squitaa

rquiaalo zho ndooladz rac zho, squitaa rleynie zho grē anjl, rnee zho goon dieen pe ncuane gbaa ne zielulo lo zho, lēēque lēē zho rlozhd gunniats zho por grē zhiwseed zho. ¹⁹ Led yed zho ngab lo Jesús, men ne rnabey lo ne grēse ne ne nac ne zha ne ngab lo me. Tel ne, me racnieñ ne, tipse noyñ me ne, laa ne noyabiiniraa zigne racladz Dios.

²⁰ Zeene sca gut Jesús, gataa bnitlo me grēta minē nac to glo, gane niina ngadoodraa to lo grē ncuane zienal grēraa miech guidzliu. ¿Pe nac dzigo ne bii zienal to grē min co? ²¹ Zig nac grē minē rnabey zho to, rnee zho: “Nod gon yquiiñ to ncuanañ rii, nod gow to min rii, gacd ygaal to ncuanañ rii.” ²² Ncuane tib rded nac grē ncuane qui, zig nac guielwagw led ncuane gdiid ga, grēse wseed qui miechse bleebeya. ²³ Parga nli na zootle nixbiini nac grē wseed co, sac rioxco zho dien zha tsiegan zho grē anjl, rac ndooladz zho lo miech, ni rsacsi zho xcuerp zho; per rrieelod grē ncuanañ co ctsēew xpensar zho, zdoo zho, parne gnabey zho xcuerp zho.

3

¹ Golguien ganle, stible guielmban rap to niina, lēē guielmban co bgaa to zeene brieeban Jesús; gacxe waa, goltsoxco yгаа to grē guielnzaac ne no gbaa, zaatne zob Jesús cue Dios nēz derech. ² Grē guielnzaac ne no gbaa min co golconie guic to, led grēd ncuane no lo guidzliu rii; ³ sac gon, rrieequia gutle to lo grē ncuane no lo guidzliu rii, laa to mbanniele Jesús, zigne racladz Dios. ⁴ Laa ne rdziaap tib guielmban cub niina, sacne nacieñ ne Jesús; gal dze ne laa me guiaad stib, laa ne no gdziñ lo me gban ne zaatne nac lo xquielndzon me.

Zha gban zha ne rliidadz Jesús

⁵ Gacxe nana sca, golsaan grētaa guielntseeb ne run miech lo guidzliu rii: tsoniede to zha ne led tsieelde to, gunde to grē ncuane mbeeguielto, gdeete to diidz gnabey xcuerp to to, gunde to ncuane ndzinlid ne racladz to, ni gacblēde to lo dimi (sac tel scaw, dzigo dimi rsañ to xlugar Dios).

⁶ Grē dol rii run grē zha ne nēd gon xtiidz Dios, lozh ga lēē minē tsieguial zho laa zho yгаа lo guielzi ne csiaab Dios. ⁷ Zig nac to, grē min co been to glo; ⁸ sangue niina, none csaan tow, ni lalnu:

glēēniedraa to samiech to,
sobzhiandraa to,
gundraa to guielntseeb,
gneeñēdraa to samiech to,
gneedraa to diidzguidz,

⁹ yquidiedraa to samiech to.

Sac gon, nacdraa to zigne nac to glo, laa to briele lo grēta minē been to. ¹⁰ Stible nac lo xquielmban to niina: tib miech cuble nac to, ni laa to bii nodzēē haxta que ne gac to zigne racladz Dios men ne psan miech, zeena scagaa lozh gunbey to zha nac me. ¹¹ Zha ne bgaale guielmban cub rii, led yedraa zho cue dien cho zha nac zha Israel, dien cho zhagaa nac zha zit; dien cho no bey, dien cho nodgaaw; dien cho ziaad guiedz nroob, dien cho ziaadgaa guiedz win; dien cho rac, cho gacdгаа; dien cho run xtsiin ben, dien chogaa nac zha rnabey. Minē rquiinraa niina, nacieñ grēse zho guien ganle Jesús nac men ne mazdraa non, me none gnalo zho.

¹² Golgan ganle, zha nquialadztaa Dios to, ib laa me ble to gac to miech ne ygab xnēz me. Zaacse sca golban, ne nlipaa dib zdoo to:

golquia zdoo samiech to,
niowse golgac lo samiech to,
ndooladz golgac lo samiech to,
nguudzladz golgac lo samiech to,
guieedniede to samiech to.

¹³ Guieedniede to samiech to, ni zeene cho zha run pe tib falt lo to, golgun zho perdon. Golguien ganle zha been Dios to perdon; scaque to, none gun to samiech to perdon. ¹⁴ Ni minē mazdraa none tsoxco to, golleynie zha ne nacgrē to zigne racladz Dios, zeena tipse gac to; ni scagaa gleynie to grēraa samiech to. ¹⁵ Jesús nac men ne ctiche grēta ncuane ndzinlid ne no zdoo to, zeena niowse gbanniele to samiech to. Lēē tib guielnzaac co no yгаа to ne laa Dios bredz to, ni scagaa none gban to, zeena tipse gac to grē to. Golsoladz goldeed xquizh lo me.

¹⁶ Niapse mine nac Xtiidz Jesús golconie guic to, golco zdoo to. Golquuin grë guielbiini ne rneedz me lo to, golseed grë zha ne nacgrë to, ni zha ne rxin, golnee lo zho zaacse gac zho. Dib zdoo to goldeed xquizh lo Dios por grëtaa mine run me, ine golgoolnie me grë salm, golgoolnie me grë cant ne rdzioolnie ne me. ¹⁷ Ncuaañe guntaa to, niicle zeene gnee tow, zeene gungaa to tib dziina, golguna zigne rdziladz Jesús, men ne rnabey ne; ni tibaque goldeed xquizh lo Dios men ne nac Pxoz to, niina ne laa to ngable lo Jesús.

¹⁸ To ne nac to men wnaa ne ptsieelniale, golgon xtiidz tsieel to, sac ible sca nonguiel gban miech ne no xnëz Jesús.

¹⁹ To ne nac to men bgui ne ptsieelniale, golleynie tsieel to; gacnchogde to lo me.

²⁰ To ne nac to mëed, golgon mine rnee pxoz to, mine rnee xniaa to, sac sca rdziladz Dios.

²¹ Togaa ne nac to men nguzan, gunde to ncuaañe gunglëe to xpëed to, zeena csande to zdoo zho.

²² To ne nac to zha ne lega run xtsiin ben lo guidzliu rii, golgun grëse mine rnabey zho to; gunde to zeene zose zho lo to dzigose yquiaalo to gun to dziin, zeena guianñziuu to lo zho; sinque dib zdoo to golgun xtsiin zho, golguien ganle Dios zobwi ran me pe run to. ²³ Grëse dziin ne gun to, ine nguieel golgac golguna, zig nac zeene xtsiin zhal Dios noyun to. ²⁴ Benque nanle to, zgaa to mine gdeed Dios lo grë zha ne ngab lo me, telne gon to diidz; sac gon Jesús nac men ne nlipaa rnabey to, ni lo me quia to dziin. ²⁵ Golgon diidz sca, sac zha ne gonda, ib tedsod zdeed Jesús mine tsieguial zho; sac gon, tel me led yed lo me ncuuee miech.

4

¹ Togaa ne nac to zha ne quia miech xtsiin, zaacse golgac lo zho, csacside to zho. Golsoladz ganle, ye to tib ngundziin nac to lo men rnabey ne zob gbaa, ni me zobwi ganle pe run to.

Gnab zho gacniën Dios Pabl

² Bets, bzian, tel petaa rzac to tibaque golzodiidznie Dios, nsin golso, goldeed xquizh lo me. ³ Golnab lo me gacniën me

no, grieelo ziaab no zaatne guioseed no miech Xtiidz Ndzon Jesús, gnee no lo zho ganle cho nac Jesús men ne beenbeyd miech padzeela; sac zig nac niina por min co znu nioogyu naa nu. ⁴ Golnab lo me gneedzraa me guielbiini lo naa, zeene cseed naa miech xtiidz me, guien zho mine rne naa; gun naa dziin co zigne no gun naaw.

⁵ Golquuin guielbiini ne rneedz Dios lo to, zeena guien to zha gnee to, zha gac to lo zha ne gard gliladz Xtiidz Jesús; ni zeene sca rdeeda diidz sodiidznie to zho, golnee lo zho ganle zha nac Xtiidz me. ⁶ Golguien tib godiidz ndzinli, tib godiidz niowse, min co golzodiidznie zho, ni none guien to zha ctsire to lo xtiidz zho tib tib zho.

⁷ Laa bets ne Tic guiaad i, me guiaadnie diidz lo to ganle zha no naa nu. Rleyne no me, tibaque laa me noxco quiadzi-uungza no me xtsiin men ndzon ne rnabey ne. ⁸ Ga nagon laa naa rxel me, me gnë lo to ganle zha no no nëz rii, ni gnee me lo to zeena cchoobladz me zdoo to. ⁹ Ye menladz to Onésimo guiaadgrop me. Rleyne no Onésimo, ye me tibaque noxco me xtsiin men ndzon ne rnabey ne. Grop zho guiaadnie diidz i ganle zha nac grë ncuaañe quiayac nëz rii.

¹⁰ Golcaania zhibdiuzh Ristarc, men ne nioogyunie naa nu, zhibdiuzh Marcw betsyen Bernabé (laa naa nile lo to ganle, telne laa Marcw guiaadgan to i, niowse golcuëzlo me); ¹¹ ni zhibdiuzh Jesús, tib men ne rneeque zho Just. Lo grë zha Israel ne rliladz Jesús, lëese gza zha rii nac zha ne quiayun xyudar naa quiaseed no miech zha sëeb zho xnëz Dios, ni blactaa zichoobladz zho zdoo naa.

¹² Golcaania zhibdiuzh menladz to Epafri, ye me quiayun xtsiin Jesús nëz rii; tibaque rzodiidznie me Dios rnab me dziits so to lo Xtiidz Jesús, ni tiblrique gac guic to tsoxco to gban to zigne rnabey Dios. ¹³ Nanpaa naa ganle pa lotaa nonie to guic me, grë to zha Laodicé ni zha Hierápolis.

¹⁴ Golcaania zhibdiuzh Demas ne, ni zhibdiuzh Luc men ne run rmed, lëe stib men ne nziuu lo no nu.

¹⁵ Goldeed tib zhibdiuzh no lo grë zha ne no guiedz Laodicé, zha ne nacgrë ne. Goldeed zhibdiuzh no lo zhuz Ninfi, ni lo

grëraa zha ne rcaalsa lidz me i, riegoalnie zho Dios.

¹⁶ Zeene gon lozh glab to lo guits rii, dzigo golxeela lo zha Laodicé, zeena ye zho glaba; ni scagaa to, gollab mine cxel naa lo zho.

¹⁷ Ni golguiab lo Arquip, tsoxco me zaacse gun me dziin ne bdeed Dios lo me i.

¹⁸ Naa nac Pabl, golgan ganle naazhal pquia tib bdiuzh rii nu rxel naa lo to. Golsoladz ganle ladzguiib no naa. Dios nac men ne gunlay to, me glu lo to ganle pa lotaa noxco me to.

Pabl

GUITS NE GLO PXEEL PABL LO ZHA TESALÓNICA

¡Diuzh to grëse to!

¹ Naa nac Pabl, gza no Silas ni Timoté, laa no rxeel guits rii Tesalónica i; laaw ziaad lo to grëse to ne nac to zha ne ngable lo Jesús, men ndzon ne rnabey, ni lo Dios men ne nac Pxoze.

Dios ni Jesús, me glu ganle pa lotaa noxco me to, zeena peet zhgab ctsebde to.

² Tibaque rdeed no xquizh lo Dios men ne nac Pxoze, squitaa rneedz me guielbiini lo to; gzobtaa zeene rzodiidznie no me rzeet no to lo me. ³ Ni zeene rzeet no to lo me, rsoladz no grëtaa dziin ne run to niina ne dib zdoo to rleyne to me, ni zha quialëb to lo grëtaa guielnë ne noyan to, tibaque nonie guic to ne ible zdziñ dze ne laa Jesús guiaad stib.

⁴ Bets, bzian, rleynedox Dios to, ni ndion ne ganle me bzooblo to ygab to lo me. ⁵ Zeene biaad no biadseed no to Xtiidz Ndzon Jesús, znuse ptsëew lo xquielmban to, sac gocnie Espíritu Sant to bien to ganle niapse diidzli nac grë diidz ne nonee no lo to; scagaa no, gon to ganle zha mban no, ga blu ne nli diidzli nac grë mine noseed no miech. Ni golsoladz ganle zha biaadbannie no to i, bdzioxco no bdziuun no xyudar to, sac ne nligaa rleyne no to.

⁶ Scagaa to, pseed to wban to zigne mban no, ni zigne wban men ndzon ne rnabey ne. Laa to pcaania xtiidz me, blozh ga, niicle nroob guielnë ne bded to, per bneedz Espíritu Sant guielbley lo to, ib peet güeynied guic to. ⁷ Grëse zha ne riladz Jesús nëz Macedon, nëz Acay, zeene bin zho zha mban to, yeque zho laa zho pseed mban zho zigne mban to. ⁸ Ni ne squi ndzinli mban to, nzianraa zaatne rzeet miech Xtiidz Ndzon Jesús, led loxaque gropdse lugar rii. Zaatne ziotaa no, zhoob diidz ne squitaa dib zdoo to riladz to Dios, rquiindraa ne no gzodiidza lo zho. ⁹ Zhale rzodiidz grëse zha biaad no lo to i, zha scataa niow blëzlo to no len dze co, ni zha psaan to grë zhiwseed xmengol to, grë ncuaane nac

mdio lo to, laa to bliladz men ne nacpaa Dios ne nguiamban, ni laa to zienal mine rnabey me. ¹⁰ Ni rzodiidz zho zha zienie guic to ne ible zdziñ dze guiet Jesús gbaa guiaad me stib, ni quiambëz to gdziñ dze co. Xpëed Dios nac Jesús, Dios bleeban me lo guielgut, ni me psilaa ne lo guielnëdox ne ziaadyob guiaad.

2

Zha güeyseed Pabl zho

¹ Bets, bzian, nanle to ganle zeene biaad no lo to i biaad-zhlëd no, brieelo pseed no to. ² Niicle ne wriin psacsi zho no guiedz Filip hor co, per laa no bii biaad ladz to i, ni niicle igaaw bioxtseebaque no, per ib bdziebd no laa no pseed to Xtiidz Ndzon Jesús; sac ndion no Dios nacnie no. ³ Ni diidzli nac mine pseed no to, choot biaate par nquidiee no to, niicle biaategaa no par dien pe niaadla no lo to. ⁴ Xtiidz Dios bnee no, me bzo no gnee no lo miech zha laa zho lo dol, ni min co nac dziin ne quiadzuiun no. Nli nzian zha ne rlëeniew, per laa no bii rdziuun dziin co; sac zionald no gac mine rdziladz miech, sinque laa no zional gac mine rdziladz Dios, men ne nan ganle pe rza zdoo ne.

⁵ Gon to ganle, bneed no pe diidz niow lo to par nquidiee no to, niicle bguibdgaa no dien zha ndeeda diidz needz to dimi lo no. Dios zobwi rdziuund no min co. ⁶ Wlaltaa ib bguibd no dien zha niacnon no lo miech, niicle lo tow, niicle lo stibgaa miecha. ⁷ Laa ne nlu no ganle zha rnabey nac no, sac gon Jesús pxeel no, lel ndooladz goc no lo to. Masaque zigne rleyne men wnaa xpëdyeen me, nda nda ran me win; scadaa bleynie no to, ⁸ bio no bdzioxco no pseed no to Xtiidz Dios. Ne nlipaa bleynie no to, telne niaca mine niedziña haxta mbeeladz no no niet no por to.

⁹ Bets, bzian, rsoladzaxe to ganle ni lalnu ib psodziind no to; blactaa, dze guieel bdziuun no dziin, nozhal bdziniaa ncuaane pquiin no len dze ne biadseed no to. ¹⁰ Dios zobwi ran me ganle zha nac lo xquielmban no, ni niicle togaaw (ne nac to zha ne ngab lo me) gon to ganle ndzinli wban no zeene biaad no i, bdziuund no ncuaane mbee no diidz ro miech, sinque laa no bdziuun mine

rdziladz Dios. ¹¹ Masaque rziaac no to zig rzac tib dad xpëed zho, blactaa pchoobladz no zdoo to, bloonley no zdoo to tib tib to; ¹² pso no diidz lo to zaacse gac to, gban to zigne no gban zha ne no xnëz Dios, men ne bredz to gdziñ to lo xquiełndzon me, zaatne rnabey me.

¹³ Ne nligaa rdeed no xquizh lo Dios, sac zigne biadnee no Xtiidz me lo to, laa to pcaaniaaw, bien to Xtiidz me naca, nacda ncuaane bleebey miech. Ni nligaa Xtiidz Dios, gacxe waa zha ne rliladza zigne rzac tow niina, rzhixcuua lo xquiełmban zho. ¹⁴ Per zeene laa to bliladza, laa menladz to psacsi to; bded to zigne bdedaque grë zha Israel ne rliladz Jesús, sac tel zhaw psacsi menladz zho zho. ¹⁵ Ni lëëque zha ne psacsi zho ga, zha co bnab psacsi zho Jesús men ndzon ne rnabey, zigne beetaque zho grë zha ne pxeel Dios biadteed Xtiidz me; ni lëëque zho bençxoon no. Ncuuaane rbinladz Dios run zho, rlëenie zho grëse miech, ¹⁶ rtsidil zho pe nacne nonee no lo grë zhazit zha laa zho lo dol. Loxaque quiaayunctalraa zho xtol zho, per, jprobsaxe zho, sac guiełnëdox ne ziaadyob cxeel Dios ygaa zho!

Racladz Pabl tsiegan Pabl zho stib

¹⁷ Bets, bzian, nli gard dzianłolsa ne wlal ne wbii no i, per tibaque rsoladz no to; blactaa rnee no tel paa zha guiaaddzian no to. ¹⁸ Tel naa blactaa gocladz naa nial naa, nialgan naa to. Laa no niaadle, per ptse mendox lo no gon, pca ma xnëz no pasëe no niaad. ¹⁹ Guiabde to togo quiaayanladz no to, sac gon to rnalo no conley zdoo no gal dze ne laa Jesús guiaad stib. To glu nli bdziuun no xtsiin me, to glu ne nli riogual no ygaa no premio ne gneedz me. ²⁰ Ne nligaa rley no rdzian no zha mban to, haxta riats no zeene raquiet to; sac to rlu ganle ne nli xtsiin Dios nodziuun no.

3

¹⁻² Ni ne scataa tibaque nonie to guic no, dzigo mazd pxeelaque no bets ne Timoté biaad lo to i, laa no biaan guiedz Aten. (Nanaxe to ganle ye Timoté nacgza no quiadziuun no xtsiin Dios, quiaseed no

miech Xtiidz Ndzon Jesús.) Laa no pxeel me biaadgan me to, biadchoobladz me zdoo to, biadnee me lo to lozh sodziits to lo Xtiidz Dios; ³ zeena niicle tel pe guiełnë ne noyanta to, ib guiaand zdoo to. Nanle to ganle grëse ne ne rliladz ne Jesús, ib laa ne no dzian guiełnë. ⁴ Led rsoladz to zeene biaad no i, bneegazh no ne ib laa ne no dzian guiełnë; ni gon to ganle scase goca.

⁵ Ne nligaa tibaque bionie to guic naa, nacne mazd pxeelaque no Timoté, biaadso me dien pe bii zienal to mine nac Xtiidz Dios; sac ni naa nend pquuil mendox to biire zienal to ncuaane rnabey ma, dzigo zhlëse biadseed no to.

⁶ Laa niina ne laa Timoté blanso nu stib, blansonie me diidz, në me niowse mban to, rleynie to grë zha ne nacgrë to, dib zdoo to rliladz to Dios. Ni në me rleynie to no, ye to racladz tebaa zha gan to lo no, zigne rziaacaque no.

⁷ Min co nagon, bets, bzian, niicle ne nroob zhgab, nroob guiełnë ne nodieed no nu, haxta biaanladz no grë ncuaan co zeene gocndion no dziits zo to lo Xtiidz Dios, mine rliladz ne. ⁸ Haxta stib goc zdoo no bdzion no squi tiblque laa to rleynie men ndzon ne rnabey ne; ⁹ ni rdzieldraa no diidz ne gnee no gdeed no xquizh lo Dios por to. Ni ne znutaa bloonley to zdoo no, haxta Dios ran ganle pa lotaa rley no. ¹⁰ Dze, guieel, quianab no lo me gneedz me diidzbey gbiire dzian no lo to stib; zeena lozh cseed no to grëraa mine no gacnan to lo Xtiidz me.

¹¹ Dios men ne nac Pxoz ne, ni Jesús men ndzon ne rnabey ne, me gacnien no grieelo guiaaddzian no to. ¹² Jesús gacnien to tsaaraa to biini, zeena gleyneraa to grë zha ne nacgrë to ni grëraa samiech to, zigne rleynie no to. ¹³ Ni rnab no lo me, gacnien me to tiblque gac to lo Xtiidz me, zeena ine mbe zdoo to, ni tib dol rapde to zeene laa me gzo to lo Dios men ne nac Pxoz ne, gal dze ne laa me guiaad stib con grë zha ne nacie me.

4

Guiełmban ne rdziladz Dios

¹ Zig zobwi Jesús men ndzon ne rnabey, laa no rso diidz lo to: zigse zie dze goltsoxcoraa gban to zigne rdziladz Dios,

² benque nanle to zhaw, sac lëë min co bnabey Jesús no biadseed no to gun to. ³ Sac gon, laa Dios racladz mbe guiaan to lo me, gunde to guielyozh yquiangob to zha ne led tsieelde to.

⁴ Grë zha bgui, zeene laa zho gnee lo tsieel zho, none niowse ndzinli gac zho; ⁵ gund zho zigne run grëraa miech ne nan zha nac Xtiidz Dios; sac tel zha co, rzac zho loxaque par gdeedse guxt xcuerp zho, mincose rquinn wnaa. ⁶ Niicle yquiangobde to tsieel sabgui to; sac zha ne sca run, sabgui zho ga rguinie zho; ni dol co ible tedsod zunquizh Dios zhow. Golsoladz ganle psole no diidz rii lo to glo, ni na laa no rneequew stib. ⁷ Golguien ganle, bredzdaxe Dios ne waa parne dziuun ne grë guielyozh, sinque laa me bredz ne gban ne zigne racladz me. ⁸ Gacxe waa, zha ne zienald wseed rii, gacnan zho ganle xtiidz Dios ga (men ne rdeed Espíritu Sant lo zha ne ngab lo me) noguiits zho, led xtiidzd cholze samiech zhow.

⁹ Laa zig nac guielwleynie, nanle to zha no gleynie to grë zha ne nacgrë to. Rquiind cso no diidz lo to dien zha gun to, sac Dioszhal pseed to zha gleynie to zigtaa zha ne nacgrë tow, zigtagaa grë samiech tow. ¹⁰ Zig nac grë zha bets ne, zha bzian ne, zha ne no xtan zha Macedon, zëëb diidz rleynie to grë zha co. Goltsoxco sca, golleynieraa samiech to.

¹¹ Ni stib mine rso no diidz lo to: niowse golbannie samiech to. Mine nac xtsiin to tib tib to, min co goltsoxco, tozhal goldziniaa ncuaane yquinn to; ¹² zeena peet gunfalte lo to, ni scagaa grë zha ne gard gliladz Xtiidz Dios, haxta gzee zdoo zho gan zho zha mban to. Golsoladz ganle psole no diidz rii lo to glo.

Ib ziaad Jesús stib

¹³ Bets, bzian, nu na ganle laa naa gzodidz lo to zha gac grë zha ne ret, zha ne ngable lo Dios; zeena tsoode to guielnë zig rzac grë miech ne gard guien gnalo Jesús.

¹⁴ Ne, ne dib zdoo ne rliladz ne nli gut Jesús ni bleeban Dios me; scaquegaa none gliladz ne ible zbeeban Dios grëse zha ne dib zdoo rliladz Jesús, zeene laa Dios cxeel me guiaad me stib. ¹⁵ Golgacnan sca ganle, znu gon nac xtiidz me: Grëse zha ne ngab

lo me, zha ne bii zomban gal dze co (gal dze ne guiaad Jesús) tednerd zho lo grë zha ne gutle. ¹⁶ Zeene laa me guiet gbaa, redz ro ne yquia, zlu zëëb tsi tib zha ne quianabey, tsi tib anjl ne nonraa, ni tsi zhitrompet Dios; hor co laa me guiet gbaa, laa grë zha ne ngab lo me, zha ne gutle, laa zho grieeban. ¹⁷ Dzigo tipse gac zho grë zho zha ne bii zomban ga, laa zho soquia laglaa lo xcow tsiedzieelo zho me; dzigosi gdzindraa dze ne gbiche zho lo me.

¹⁸ Nana sca mine rne naa nu, golsodiidza lo grëse zha ne nacgrë to; zeena conley to zdoo zho.

5

¹ Bets, bzian, nana par gni naa lo to dien pe guidze te guieel guiaad me, choot ndionda. ² Golgacnan ganle, lega nacle zeene gan miech laa me ziaadle, zig nac zeene rzëëb ngbaan yu guieel, ¿cho dien nanpaa pa hor sëëb ngbaan? ³ Zeene laa grë miech guiab: “Nasi wen ndxie ne, peet guielxtseeb nodraa”, tibaque zeene guien zho laa dze ne nitlo zho bdzinle, ni gasi grieelodraa cho csilaa zho. Sac zig znuse rnaaz yoob men wnaa ne bdzinle dze gap xpëed; scadaa gdzin dze co.

⁴ Sangue to, bets, bzian, nacdreaa to zha ne nonziaab lo ncow, tel pa hortaa guiaad me nsinle zo to; sacdraa to dze co zig rzac miech ngbaan, lega nacle zeene ran zho laa ngbaan rdzin. ⁵ Miech ne nole lo xbiini Dios nac to, niini zo to; nacdreaa to zha ne no glowtaa guieel, zha ne no lo ncow; ⁶ gacxe nagon waa, niini golso, tsienalde to mine run zha ne zienald guielntseeb; sac nac grë zha co zig nac zha ne nixguies, tibaque guieel no zho. ⁷ Sac tel guieela, guieel raaguies miech, niicle zha ne rzuudzgaaw guieel rzudz zho. ⁸ Sangue ne ne nac ne zha ne niini zo, none guien ne pe nac ncuaane noyac. Tibaque dib zdoo ne gliladz ne Dios, gleynie ne samiech ne, zeena csaaca ne zig rsaac ncuaane racw menguiib lo grë ncuaane gnitlo zho; ni csoladz ne ganle laa Dios psilaale ne lo guielgut, gotsaa ziaac new zig rzac menguiib pchog ne rzob guic zho rsilaaw zho lo guielgut. ⁹ Sac gon bredzdaxe Dios ne waa ygaa ne guielnëdoh ne no guiaad, sinque laa me bredz ne csilaa

me ne lo guielnē co. Ni lēē min co rac zeene laa ne rliiladz Jesús. ¹⁰ Zeene gut Jesús, ga bdiizh me xtol ne; zeena yase mban ne o gutlegaa ne gal dze ne guiaad me, per me gbannie ne.

¹¹ Nana sca, tib tib to goldeed xfuers zha ne nacgrē to, niapse diidz ne gun xyudar zho choobraa zho lo Xtiidz Dios, min co golnee lo zho; zigne quiayunaque to niina.

Rso Pabl diidz

¹² Bets, bzian, laa no rso diidz lo to: Niowse golgac, niowse golnee lo grē zha ne pso Dios noyun xtsiin me lo to, zig nac zha ne zo lo to, zha ne rnee lo to zha no gban to.

¹³ Golguien ganle cho nac zho, golleynie zho, sac gon led lega nacd dziin ne quiayun zho lo to. Golsoladz sca: ꞑZaacse golban, tilniede to samiech to!

¹⁴ Tel cho zha ne nacgrē to i, rsilo quiay-acgbech, golgactox lo zho, zeena guien zho gun zho dziin. Grē zha ne quiasaan Xtiidz Dios, golnee lo zho zeena gleynie zhow stib; grēgaa zha ne gard tsoguicpaa zha naca, golgun xyudar zho tsoguic zhow; niicle grēragaa zha ne nacgrē tow, ib guieedniede to zho. ¹⁵ Golguien tel pe guielntseeb ne run miech lo to, guiabde to ne scaque gun to zho; sinque mazd goltsoxco tibaque niowse golgac lo grēse miech, niicle lo zha ne nacgrē tow, niicle lo grēragaa miecha.

¹⁶ Tibaque nley golco zdoo to.

¹⁷ Tibaque golzodiidznie Dios.

¹⁸ Goldeed xquizh lo Dios, niicle zeene noyan to guielnēw, zeena nogaa to guielbleya, sac sca racladz me gun grēse zha ne no xnēz Jesús.

¹⁹ Golquiaadiag mine rnee Espíritu Sant lo to, ni golguna.

²⁰ Golquiaadiag mine rnee grē zha ne rnee grē diidz ne rsiaab Dios guic zho; ²¹ wen wen golwi dien pe nac mine rnee zho, dzigo mine rzac to rquinraa lo to, min co golseed.

²² Golbiche lo grēse guielntseeb ne no.

²³ Dios, men ne rtiche grēse dzeb, grēse zhgab, mezhah csañmbe to lo grētaa guielntseeb; dib nacle to (zhiespíritu tow, xalm tow, xcuerp tow) zeena ni tib dol rapde to gal dze ne laa Jesús men ndzon ne rnabey ne gbiire guiaad stib. ²⁴ Me bredz

to, ni mesi run me mine rnee me, gane ndion no ne ib zun me min rii.

²⁵ Grēse to bets, grēse to bzian, laa naa rnab lo to golsiguiel golnab lo Dios gacnien me no.

²⁶ Golcaania zhibdiuzh no i, ine golxen nia grē zha ne nacgrē to, gollu ne nli rleynie to zho.

²⁷ Men ndzon ne rnabey, me rnabey naa laa naa rso diidz lo to, glab to guits rii lo grēse zha ne nacgrē to i.

²⁸ Jesús, men ndzon ne rnabey ne, me glu lo to ganle pa lotaa noxco me to.

Pabl

BROP GUILTS NE PXEEL PABL LO ZHA TESALÓNICA

¡Diuzh to grëse to!

¹ Naa nac Pabl, gza no Silas ni Timoté; laa no rxeel stib guits rii guiedz Tesalónica i, laaw ziaad lo to grëse to ne nac to zha ne nole xnëz Dios, meñ ne nac Pxoze ne, ni Jesús meñ ndzon ne rnabey.

² Dios meñ ne nac Pxoze ne, ni Jesús meñ ne rnabey, me glu ganle pa lotaa noxco me to, zeena peet zhgab ctsebde to.

³ Bets, bzian, ible rieguiala gdeed no xquizh lo Dios ne squitaa noneedz me guielbiini lo to; sac gon zigse zie dze dib zdooraa to riladz to Xtiidz me, ni rleynieraa to samiech to. ⁴ Zaatne rdzintaa no lo grë zha ne nole xnëz me, ne nligaa rley no rzodiidz no lo zho zha squitaa dziits zo to, tibaque dib zdoo to riladz to me niicle maase rtsidil miech to, niicle maase nroob guielnë ne quiaded to. ⁵⁻⁶ Nli nroob guielnë noyan to, per scagaa laaw noyan to zeena tsieguial to gdzin to zaatne rnabey me. Nu rlu ganle, Diossi zeene run me guielwxtis, zigne no gaca sca run mew. Zig nac niina, grë zha ne squi nosacsi to i, ib zgaa zho guielnëdox ne csiaab me.

⁷ To ne nac to zha ne quiaded grë guielnë qui, golgona ganle, gal dze ne guiet Jesús gbaa guiaad me stib, ible zgaa ne descans ne gneedz me. Gal dze co, laa me guietnie grë xanj me, zha ne rapraa poder; ⁸ masaque tib beldox ne guietnie me, sac dzigosi laa me guiaad csiaabzi me grëse zha ne nëd niunbey Dios, grëse zha ne nëd nquiaadiag Xtiidz Ndzon me. ⁹ Grëse zho laa me gnabey guey zho lo guielnëdox, zaatne gdzindraa dze grieese zho. Lëe bichele zho lo me ga, ib gdzind dze gan zho lo xquielndzon me, gangaa zho grëtaapoder ne rap me. ¹⁰ Dze co, grëse zha ne no xnëz me laa zho goolnie me, gunnon zho me. Grëse zho see zdoo zho gan zho me; ye to gacgrë zho, sacne bliladz to Xtiidz me mine biadseed no to.

¹¹ Gacxe waa, tibaque laa no quianab lo Dios gacniën me to grieelo gban to zigne racladz me; zeena glu ganle led zhlëd bzooblo me to. Ni rnab no lo me gneedz me xpoder me lo to, zeena grieelo gon to grëse ncuaañe rquiabladz to, zeena grieequia grëse dziin ne quiayun to porne riladz to me. ¹² Zeena sca cxobneñ to ganle pa lotaa meñ nroob nac Jesús, meñ ndzon ne rnabey ne; ni niicle megaaw, zunnon me to. Sac zigtaa mew, zigtagaa Diosa, noxco me to.

2

Ziaad Jesús stib

¹ Bets, bzian, ib laa Jesús meñ ndzon ne rnabey ne no guiaad, ni laa ne gbannie me.

² Zeene gon to laa miech gnë laa dze co bdzinle, niicle gnë zho Espiritu Sant bneew lo zho, gangaa to palo nonee zhow zaatne ndxie nzian miech, o cxeelgaa zho pe tib guits lo to zig nac zeene no pxeela; gliladzde tow. Laa no rso diidz lo to, peet tsienied guic to, gdziebde to. ³ Ib gdeete to diidz yquidie zho to. Sac gon ansraa ne gdzin dze co, ib nonee grieequia grë miech ne gacntseeb lo Dios; lozh ga, laa tib mgui ne nacie mendox grieequiaque, zacntseeb me lo Dios, per gabil ga nitlo me.

⁴ Lëe zha co ctsidil grëse zhiwseed Dios, grëse ncuaañe naclay lo miech; ni haxta zie zho ziesob zho zaatne nac len xyadoo Dios, guiab zho zha nac Dios. ⁵⁻⁶ Per no tib meñ ne notse lo zho niina, laga gdzin dze ne laa zho guiaad. Golsoladz ganle, blactaa bzeet naa min rii lo to len dze ne blëz naa i.

⁷ Grëse ncuaañe no guic zha ntseeb co gon zho, laaw rsilole; loxaque runfalt gdeed meñ ne notse lo zho ga diidz guiaad zho.

⁸ Zeene laa zho guiaad, hor co laa Jesús guiaadaque con grë xquielndzon me, dzigo me ne grieese ro me gloozh me zho, gnitlo me zho.

⁹ Masaque mendox gnabey zha ntseeb co, niapse xpoder ma gap zho, nzian ncuaañe glu zho; zun zho grë ncuaañe gzee zdoo miech, per led ncuaañe nlida. ¹⁰ Zun zho grë ncuaañe lozh yquidie zho grë zha ne nole nëz ne nitlo, zha ne ib bzhiguielndzon me mine nac diidzli. Tel niaca mine nliladz zhow, nleynie zhow, nsilaa Dios

zho. ¹¹ Saan Dios tsienal zho grë ncuuan co, ni zlliladz zhow zig nac zeene diidzliw; ¹² per ib siaabzi Dios zho, sac laa ne gliladz zho mine nac diidzli, lel mazdraa gleynie zho grë guie|ntseeb.

Zha ne bdedlaale lo dol

¹³ Bets, bzian, golguien sca tibaque golgotsaa gdeed ne xquizh lo Dios; sac gon tel to padzeelale bzooblo me to csilaa me to lo dol. Nacle diidz zeene laa to gliladz Xtiidz me, mine nac diidzli, laa Espiritu Sant csanmbe to lo me. ¹⁴ Min co nagon nacne pxeel me no biadseed no to xtiidz me, guien to zha laa to lo dol; zeena gdzin to zaatne nac lo xquie|ndzon Jesús, men ndzon ne rnabey ne. Gacxe waa, zha nziuu nac to lo me.

¹⁵ Golguien sca, dziits golso, ib csaande to grë mine pseed no to len dze ne biaad no i, niicle mine rneegaa no lo to lo guits ne rxeel no. ¹⁶⁻¹⁷ Ni Jesúsaque, men ndzon ne rnabey ne, ni Dios men ne nac Pxoz ne, me gneedz xfuers to dziits so to; zeena grëse mine gnee tow, mine gun tow, wen grieequiaw. Me blu ganle pa lotaa rleynie me ne, laa me bneedz tib guie|bley ne gdzind dze lozh lo ne, ni psan me diidz pe nac mine naraa no yгаа ne. Ga rlu ganle pa lotaa noxco me ne, niicle ne riogua|d new.

3

¹ Bets, bzian, nu ne laa no csiaalle, laa naa rnab lo to golnab lo Dios gacnien me no, zeena znuse znuse diiz no Xtiidz Ndzon men ne rnabey ne; ni zha ne gontaaw, guien zho ycaania zhow zigne pcaania tow. ² Ni golnab lo me csilaa me no ladznia grë zha ntseeb, zha ne run mine notaa guic; sac gon led grëd miech rliladz Xtiidz Dios.

³ Dios men ndzon ne rnabey, mine rnee me run mew; gacxe waa, ible zacnien me to dziits so to lo Xtiidz me, ni squianap me to tsobede to ladznia mendox. ⁴ Ndion no ne me noyacnien to noyun to grë mine pso no diidz lo to, ni scagaa me gacnien to bii gun tow. ⁵ Me gacnien to grielo gleynie to samiech to zigne rleynie Dios ne, ni guiuude to lo guie|në, sinque golgac zigne been Jesús.

None gun zho dziin

⁶ Bets zig zobwi Jesús, laa no rso diidz lo to: Tel cho zha ne nacgrë to i, nëdraa yquia dziin gdziniaa zho ncuane gow zho, ib ctsieelsade to zho; sac gon pseete no to min co. ⁷ Tel no, gon to ganle zha wban no zeene bliaaz no lo to i; ni sca gon none gban to. Ib bdeddzed no, ⁸ biod dze ne lega ndioow zhlë no xcuun miech, blactaa haxta guieel bdziuun no dziin bdziniaa no pe pquiin no; ib psodziind no lo to. ⁹ Niicle ne ib riegua| nab no lo to needz to ncuane nquiin no, per choot peet bnabd. Mine bdziuun no pquiaa no dziin bdziniaa no pe pquiin no, par gan to ganle zha nonguiel gban to. ¹⁰ Led rsoladz to len dze ne bliaaz no i, pso no diidz rii lo to: Zha ne nëd gun dziin, scagaa nodne gow zho. ¹¹ Laa niina laaw rzetaque naa stib, sac zidzion no no bla zha ne nacgrë to i, mbe rundraa zho dziin scase quialed dze zho; loxaque nëzrii nëzrec no zho rzëeb zho lo grë ncuane riegua|d zho. ¹² Zig zobwi Jesús men ne rnabey ne, laa no rso diidz lo zha ne sca run: none gun zho dziin gdziniaa zho ncuane yquiin zho.

¹³ Bets, bzian, ib guieete to, tibaque goltsoxco golgun niapse grë ncuane yquiin lo samiech to.

¹⁴ Tel cho zha ne nacgrë to i nëd gon diidz gban zho zigne rso no diidz nu, golwi dien chow, dzigo ctsieelsadraa to zho; zeena sca ctoladz zho. ¹⁵ Per gunde to zho zig run zha ne rlëenie samiech, sinque golnee lo zho gac-wen zho; golguien ganle bets to grë to.

¹⁶ Jesús nac men ne rtiche grëse zhgab, grëse guie|xtseeb, me cuee to lo grëse zhizhgab to, lo grëse guie|xtseeb gzataa dze. Me gacnien to grëse to.

¹⁷ Naa gon nac Pabl, naazhal pquia bdiuzh rii rxel naa lo to; naazhal pquia lë naa nu. Golgan ganle lëe xletr naa nu.

¹⁸ Jesús men ndzon ne rnabey ne, me gacnien to, me glu lo to ganle pa lotaa noxco me to.
Pabl

GUTS NE GLO PXEEL PABL LO TIMOTÉ

¡Diuzh Timoté!

¹ Naa nac Pabl, tib zha ne pxeel Jesús nonee Xtiidz Ndzon me lo miech. Ible Dios men ne psilaa ne lo dol, ni Jesús men ne rnalo ne, me bnabey quiayun naa dziin rii.

² Laa naa rxel guts rii lo luu, rzaac naa luu zig tib xpëed naa ne squi dib zdoo luu riladz luu Jesús. Dios men ne nac Pxoze, ni Jesús men ndzon ne rnabey ne, me yquia zdoo luu, me tsoxco grë zhizhgab luu zeena peet tsienied guic luu. Min co racladz naa, ni min co rnab naa lo Dios.

³ Zigne psoque naa diidz lo luu len dze ne laa naa za nëz xtan zha Macedon ga, laa luu biaan Efés i; scagaa niina laaw rneque naa lo luu stib: Sca no luu i, bnee lo bla zha ne squi no i, csetraade zho miech grë zhiwseed zho, sac ncuaane paat rquiinda. ⁴ Bnee lo zho, csaan zho grë cuent gox qui, zhale noyunroobraa goon dien zharaa, peraa been grë xmenjol ne. Ncuaane paat rquiind ga, loxaque runctildiidza miech; mazd lo lal ne nodildiidz zho, tsoxco zho cseed zho miech ganle pe nactaa grë guielnzaac ne rgaa grë zha ne rquiabladz dib zdoo riladz Jesús.

⁵ Laa naa rso diidz rii lo luu, sac racladz naa guiaanmbe zdoo grëse miech qui, guiaanmbe xquielrien zho ni dib zdoo zho gliladz zho Dios; zeena scagaa grieelo gleynie zho samiech zho. ⁶ Sac gon, no bla zha ne quiasaanle Xtiidz Ndzon Jesús mine nac diidzli, lel lo grë cuent ncuaane paat rquiind co no zho. ⁷ Racladz zho zha cseed miech zha nac xley Dios, ni niicle zha riend zha naca; zeene rseed zho miech ni zha riendaque dien pe rnee zho.

⁸ Ndionle ne ganle nli wen ley ne psan Dios, per tel niaca mine yquiin miecha zigne psan me yquiina. ⁹⁻¹⁰ Golguien ganle, biaan ley par gnabeya grë miech ne nole xnëz Dios, sinque laaw biaan par gnabeya grë: zha ne racndaan lo Dios,

zha ne rond xtiidz Dios,
zha ntseeb,
zha ngoopdol,
zha ne rzacdraa ne men nroob nac Dios,
zha ne rguitnie lë Dios,
zha ne rut pxoz,
zha ne rut xniala,
zha ne rut samiech,
zha ne rionie zha ne led tsieeld,
zha ne nac mrazh,
zha ne rban samiech rieta zho zho stib nëz,
zha ne rquidie,
zha ne rzeet lë Dios par gliladz miech xtiidz zho, ni nanaa zho led diidzlid rnee zho.

Par grë zha rii nagon biaan ley; grë zha ne mband zigne nac Xtiidz Ndzon Dios; ¹¹ wseed ne rlu ganle zha laa miech lo dol. Ni lëe wseed co gon pso Dios naa none naa lo miech.

Pquia zdoo Dios Pabl

¹² Rded naa xquizh lo Jesús men ndzon ne rnabey ne, porne bzooblo me naa gun naa xtsiin me, ni noyacniën me naa ne laaw quiayun naa. ¹³ Ne nligaa rded naa xquizh lo me, sac glo ntseeb goc naa, bneenë naa me, ptsidil naa grë zha ne no xnëz me, ntseeb goc naa lo zho. Ni niicle ne scataa nac grë ncuaane ben naa, per pquia zdoo me naa; sac len dze co gard gliladz naa cho nac Jesús, lega lo xquieln xen naa ga sca ben naa.

¹⁴ ¡Pa lotaa pquia zdoo Dios naa! Ga blu me ganle zha noxcotaa me naa, pxobnia me guic naa bliladz naa cho nac Jesús, ni zig nac niina dib zdoo naa rleynie naa me. ¹⁵ Mine rne naa nu niina, diidzliw, ni racladz naa grëse miech gliladz zho ganle, ible laa Jesús biaad lo guidzliu, biaadsilaa me grëse miech lo xtol zho; ni naapaa gon goc tib zha ne mazdraa ngoopdol. ¹⁶ Gacxe waa pquia zdoo Dios naa, niicle ne scataa miech ngoopdol naa per psilaa Jesús naa. Ga blu ganle pa lotaa paciens ne rap me; ni ga gwi grëraa miech ganle, zha ne gliladz me, zгаа zho tib guielmban ne gdziind dze lozh. ¹⁷ ¡Tibaque sca golgotsaa dziuunnon ne me, golgotsaa gnee ne grë diidz ndzon lo me, zigtaa niinaw zigtagaa len grëraa izdoo ne ziaada! Sac gon, me nac men nroob ne

rnabey, men ne gdziṅd dze ne nitlo. Sca rieguiala.

¹⁸ Timoté, xin, laa naa rso diidz lo luu gon: Tibaque dziits bzo, ib guiaand zdoos luu; psoladz ganle scaque nac diidz ne bnee grē zha bets ne zeene psiaab Dios guic zho bzeet zho pe nac grē mine pso Dios luu gon luu. ¹⁹ Bien tibaque dib zdoos luu bliladz Jesús, ib gund luu ncuaane nan luu ndzinlid, zeena ine mbe xquielrien luu; sac gon no zha ne niicle rienpaa zho pa min nac ncuaane ndzinlid, ni laa zho runa. ¡Min cocxe waa, grē zha ne sca nac, rsaanga zho mine bliladz zho! ²⁰ Zig nac Himené grop Lejandr, sca been zho; per laa zho bzonēzle naa sca tsie zho xnēz mendox telne sca racladz zho; zeena guien zho ganle nodne gneenē zho Dios.

2

Gac-wnab lo Dios por grē miech

¹ Laa naa rso diidz lo to: Golguien none gnab to lo Dios por grēse miech ne ndxie lo guidzliu, golnab lo me gunlay me zho, gacnien me zho; ni goldeed xquizh lo me por grētaa ncuaane run me. ² None gnab to lo me gacnien me grēse zha ne nac wxtis, grēse zha ne rnabey, gdeed me guielbiini lo zho zaacse gon zho guielwxtis, zaacse gnabey zho; zeena tibliladz cue miech, ine gban ne zigne racladz me, sin choot peet glisquid lo ne.

³ Sca nagon nonguiel dziuun ne, ni sca-gaa rdziladz Dios, men ne pxeel Jesús biaadsilaa grēse miech lo dol; ⁴ men ne racladz grēse miech sēeb xnēz Jesús, gacnan zho mine nac diidzli. ⁵ Guien zho ganle ne tibaque Dios no, ni tibaque men ne zac gdziṅnie grēse miech lo me: lēē men co nac Jesús, men ne goc miech biaad lo guidzliu; ⁶ sac gon Jesús nac men ne bdeed xquielmban, beet zho me, bdiizh me xtol miech. Min rii nagon racladz Dios gacnan miech len dze rii. ⁷ Ni laa me pxeel naa none naaw lo grēse zha ne nacd zha Israel, noseed naa zho grēse mine nac diidzli, zeena guien zho dib zdoos zho gliladz zho Dios. (Mine rne naa nu diidzliw, rquidieed naa.)

⁸ Laa naa racladz sca, zaatne notaa zha ne dib zdoos rliladz Dios, grēse zha bgui

none gzodiidznie zho Dios. Ni zeene gzodiidznie zho me, none ine mbe zdoos zho, choot lo zha rlēed zho, choot zha nodilnied zho. ⁹ Laa grē men wnaa, racladz naa tsoxco zho zaacse gacwxab zho, niowse, tibliladzse gac zho. Sac grē men wnaa ne rliladz Dios, par gluniow zho rquiind ne goon dien paraa xixcuaa guitsguic zho, dien pe quie rbebni, pe or gac xnil zho, gac zhibguiaa zho, pe lar niazh ne gacwgaa zho. ¹⁰ Par gluniow zho, rquiin zaacse gbannie zho samiech zho, zig none gban zha ne nole xnēz Dios. ¹¹ Zig nac len yadoo, none tibliladzse gac zho, dzese sob zho yquiaadiag zho tel pe nac wseed ne noyac; ¹² gnedzd naa diidz ne zha so cseed miech, o zhagaa gnabey lo mgui. None dzese sob zho, ¹³ sac gon zeene psan Dios miech lo guidzliu, glose bzaa me Adán, dzigoraabzaa me Ev. ¹⁴ Ni stiba, pquidied mendox Adán, sinque laa ma güeyquidie Ev; ni porne bliladz Ev xtiidz ma, ga bdiits Ev xtiidz Dios. ¹⁵ Per silaa Dios wnaa lo xtol zho, telne dib zdoos zho gliladz zho me, tsoxco zho gban zho zigne racladz me, guien zho gon zho mine rieguial wnaa, gap zho xpēed zho ni choob zho win.

3

Zha ne so lo grē zha ne ngab xnēz Dios

¹ Zha ne racladz so gnabey zho lo grē zha ne no xnēz Dios, tib dziin wen ga rquiabladz zho gon zho. Sca zēeb diidz rnee miech; ni nligaaw. ²⁻⁴ Per ga nagon rquiin:

tib zha ne zaacse mban,
zha ne mbannie loxaque wnaa ne nacse
tsieel zho,
zha ne tibliladz,
zha ne nixbiini, rien pe run,
zha ne mbe lo, choot lega gzhidznied zho,
zha ne ine nley rac, rbēzlo zho miech lidz
zho;
zha ne rien zha rseed miech,
zha ne rquiad lo nziu,
zha ne rleynied dil,
zha ne wen zdoos,
zha ne zaacse mbannie samiech,
zha ne rzonald dimi,
zha ne zaacse mban lidz,
zha ne rrieelo rnabey lidz, rnabey xpēed,

zha ne nguzobdiidz nac xpëed, rbeed mëed xquielto zho.

⁵ Sac tel zha ne rrieelod gnabey lidz, gnabey xpëed; ipe lel ne so zho gnabey zho lo grë zha ne no xnëz Dios dzigo grieelo zho?

⁶ Niicle tib zha ne griinpa psilo bliladz Xtiidz Dios grieelod gac zho dziin co; sac nend lëëque lëë zho gunnon zho, lozh ga lëëque zha yguib guiabdee zho. Golsoladz ganle zha bzhaac mendox. ⁷ Ni ye rquiin tib zha ne zëeb xtiidz ne miech ndzinli nac zho, haxta lo zha ne nod xnëz Dios; zeena tsod lega pe glisqui miech lo zho, sca gleyd mendox gac mine racladz ma.

Zha ne gun yudar len yadoo

⁸⁻¹² Scaquegaa zha ne so gun xyudar zha ne gnabey ga, ga rquiin: tib zha ne zaacse mban, zha ne rnee niapse diidzli, zha ne rleynied guielgonziu, zha ne zienald dimi, zha ne dib zdoo rliladz grëse mine zhobnee lo Xtiidz Dios (mine rliladz ne, mine nac diidzli), zha ne mbe lo, zha ne mbannie wnaa ne nacse tsiel zho, zha ne rrieelo rnabey lidz, zha ne rrieelo rnabey xpëed.

Ni stiba, antes ne so zho none glugazh zho dien pe nli zrieelo gun zho dziin co. Zig nac tsiel zhow, none gac me: tib wnaa ne zaacse mban, wnaa ne rleynied diidzguizh, wnaa ne rleynied nziu, wnaa ne rquidied.

¹³ Sac zha ne zaacse gun dziin co, zianziuuraa zho lo grë zha ne ngab lo Dios, ni scagaa ine mbe lo zho haxta no ro zho gnee zho lo miech zha nac ne laa zho rliladz Jesús.

Mine rliladz zha ne ngab lo Dios

¹⁴ Ib laa guic naa no guialniob naa i, guialgan naa luu; per laa naa rxel diidz rii lo luu, ¹⁵ zeena telne grieelod guialniob naa, per laa luu nanle naganle cho gzo luu yquiaanap grëraa zha ne ngab xnëz Dios nguiamban; zha ne runbey mine nac diidzli, ni rlu zho ganle ne nli diidzliw. ¹⁶ Ne nligaa nroobdoo nac wseed ne ziaad

lo Xtiidz Dios, mine rliladz ne, ngan guien miech zha naca. Nu raquiet mine been me: Goc Jesús miech biaad me lo guidzliu, ni blu Espíritu Sant ganle ne nli Xpëedpaa Dios nac me; ni gon grë anjl me. Brieets bliaal Xtiidz me grë guiedz, ndaldoo miech ne bliladz ganle cho nac me, blozh ga biire zey me lo guielndzon ne no me gbaa.

4

Zha ne rsaan Xtiidz Dios

¹ Ib laa Espíritu Sant rneele ne len dze ne ziaadyob guiaad Jesús stib, ndal grë zha ne rliladzle Xtiidz me, laa zho csaana laa zho tsienal grë mine rnee zha ne rquidie, grë mine nac zhiwseed mendox. ² Grë zha ne guiaadnie wseed co, ni lalnu yquiad zdoo zho zeene laa zho yquidie miech. ³ Haxta stsidil zho ctsieelnia miech, znabey zho ycuee ncuaane gow miech; zig nac zeene led Diosd psan ctsieelnia miech, zig nac zeene led med psan grë ncuaane gow zho. Me psana grësew, zeena grëse zha ne ngab xnëz me (zha ne beenbey diidzli), zeene laa zho yquiina gdeed zho xquizh lo me. ⁴ Sac grëse ncuaane psan Dios, wena; zig nac grë ncuaane rac wagw, peet nacda yquiin new, totsaque gdeed ne xquizh lo me zeene laa ne yquiina, ⁵ ni gnab ne gunlay mew; sac zeene rdeed ne xquizh lo me ni rnab ne gunlay mew, rsanmbe mew.

None gun Timoté xtsiin Jesús

⁶ Zeene cseed luu grë zha bets ne, zha bzian ne i, pseed zho grë mine rne naa lo luu nu, tibaque mine nac zhiwseed Dios güeynal; sac sca no gun zha ne squi zo quianap grë zha ne ngab lo Dios. ⁷ Ib yquiaadiagd luu grë cuent gox, grë cuent nxen ne paat rquiind; sinque Xtiidz Dios bioxco, min co bloonie guic luu. ⁸ Gzoob ne zha ne rguit, wguite ne run zho, nli rquiina lo zho par gac macis xcuerp zho; per zig nac Xtiidz Dios, mazdraa rquiin dzioxco new; sac mincosi squiina lo ne zigtaa lo guielmban riiw, zigtagaa lo guielmban ne naraa dzian new. ⁹ iNe nligaa sca rieguial gun miech, ni grëse zho none tsoxco zhow!

¹⁰ Ni gacxe waa, laa ne quia dien zha gliladz zhow, niicle ne nroob grë guielnë ne quiadzian ne; sac ible Dios nac men ne rnalo ne, men nguiamban ne rsilaa grëse miech lo dol; sac grëse zha ne dib zdoo rliladz me, rsilaa me zho. ¹¹ Bioxco sca pseed zho grë mine rne naa lo luu nu, ni bnee lo zho gun zhow.

¹² Nli lëe tib zha nguiegse nac luu, per blu lo zho ganle zha none gban zho: Zeene gnee luu, niowse bguib diidz ne gnee luu, zaacse goc, ine bleynie samiech luu, tibaque dib zdoo luu bliladz Xtiidz Dios, ine ndzinli wban; zeena gan zho ganle niicle ne zha nguieg luu, per nixbiini luu.

¹³ Laga gal dze ne glanso naa i, bioxco blab Xtiidz Dios lo grëse zha bets ne, zha bzian ne i, bnee lo zho zha naca, bnee diidz ne conley zdoo zho; zeena ine nguieel gac zho. ¹⁴ Ib csaand luu grë guielbiini ne bneedz Dios lo luu i (guielbiini ne bgaa luu zeene psiaab me guic grë zha ne rnabey lo grë zha ne no xnëz me, pxobnia zho guic luu). ¹⁵ Grëse mine rne naa lo luu nu, bioxcow; zeena gan grëraa miech ganle zigse zie dze laa luu quiayabiiniraa lo Xtiidz Dios. ¹⁶ Bien zaacse goc, bien mine nac Xtiidz Dios, min co pseed miech, ib csaand luuw; zeena tedlaa luu lo grëtaa guielnë ne no guiaad, ni scagaa haxta grë zha ne rquiaadiag wseed ne rlu luu ni rban zhow, ye zho zlaa zho lo guielnë co.

5

Men wnaa ne gutle tsieel

¹ Grë zha bgui gol ne nac bets ne i, zeene zha rxin zho, bien gactoxd luu lo zho, sinque zaacse bnee lo zho zig nac zeene lo pxoz luu nonee luu; niiclegaa zha nguiega, zaacse goc lo zho, been zho cuent zig tib bets luu. ² Scaque grë men wnaa ne nac zhagol, ndooladz bnee lo me, been cuent lo xniaa luu ga zo luu; lo grë wnaa nguiega, ndzinli goc, niowse bnee lo zho, bien ganle rrieequia tib bzian luu ga.

³⁻⁶ Grë men wnaa ne gutle tsieel, men ne nlipaa choot rapd, to none cteedlo me; totsaque nli Diosse rnalo me, dze guieel tibaque nozodiidznie me Dios. Sac no zho mban zigne notaa guic zho, laa zho zianal

loxaque grë ncuaane gdeed guxt xcuerp zho; zha ne sca run, rrieequia gutle zho ga. Laa tel men wnaa ne scaque gutle tsieel, ni no xpëed me, no xiag me, dzigo zha none cteedlo me; none cseed zho gan zho menlidz zho, gan zho pxoz zho, gan zho xniaa zho, sac gon me pchoob zho. Sca nonguiela, ni scagaa rdziladz Dios.

⁷ Pso diidz rii lo grë zha ne nacgrë to i, zeena cseed zho sca gban zho, ni scagaa tsod pe nacne gneenë miech zho. ⁸ Sac zha ne tsoxcod gan zha ne nacgrë zho, ni mine mazdraa telne niicle menlidz zho tsoxcod zho gan zho, rdzieeld dzigo guiab zho laa zho rliladz Dios, haxta mazdraa nac xtol zho que tib zha ne gard gliladz me.

⁹⁻¹⁰ Ni stiba, grë men wnaa viud qui zha ne rquiablazd gun pe xtsiin Dios, bien zha ne psale tsongal iz zha co psëeb lo list. Ni wen wen gonan telne:

bionied me stib mgui zeene bii zomban
tsieel me,
zaacse mban me,
zaacse pchoob me xpëed me,
dib zdoo me rbëzlo me miech lidz me,
ndooladz rac me lo grë zha ne no xnëz
Jesús,
run me xyudar grë zha ne no lo tib guielnë;
ni run me niapse ncuaane wen ne rquiin lo
samiech me.

¹¹⁻¹² Laa grë zha ne bii nguieg, ib yquiaad luu lë zho lo list co; sac nac wnaa nguieg, zeene sob guic zho ctsieelnia zho, laa zho ctsieelnia stib. Loxaque gunctal zho xtol zho ga, telne glo rquiablazd zho gun zho xtsiin Dios ni lozh ga laa zho csaanaquew. ¹³ Ni ye nac wnaa nguieg, rdziladz zho rquianzë zho; ni telne peet dziin gund zho, racgbech zho; ni stiba, zeene sca guieend pe gun zho dzigo laa zho rzhixcuaa diidzguizh, laa zho rzëeb lo grë cuent ne rieguialdraa zho. ¹⁴ Gacxe waa, racladz naa grëse wnaa nguieg ne sca ret tsieel, mazd ctsieelnia zho stib; zeena yquiaanap zho xpëed zho, yquiaanap zho ro lidz zho. Sca yguibd zho tso grë zha ne rlëeniele Xtiidz Jesús, gneenëraa zho zha ne rliladza. ¹⁵ Sac gon, blale wnaa ne sca gut tsieel zieriee xnëz Dios, lel laa zho zianal grë mine rnabey mendox.

¹⁶ Psoladza ganle, tel cho tib zha bets ne, tib zha bzian ne i raclidz tib men wnaa ne gutle tsieel, none zha gan me, laa ne gnalo zho ne to yguib dien zha gdioon me; zeena gre ncuane runlo to i, zgaaw yquiuin gre men ne nlipaa guiend cho gan.

Minie rieguial zha ne zo lo zho

¹⁷ Gre zha ne zo rnabey lo gre zha ne ngab xnöz Dios, zha ne zaacse noyun dziin co, zig nac zha ne tibaque rnee Xtiidz Dios lo miech, zha ne rseedgaa miech zha naca, tel palal ncuane rcaa zho, ible rieguial ycaa zho chop lalgaw. ¹⁸ Gotsaa gwi ne ganle zha quia lo Xtiidz Dios, rneew: "Code to guix ro xma to, zeene no ma ye noguiits ma zhobxtil; jgolsaan gow ma!" Laa stib lugar rnee: "Zha ne run dziin, ib none ycaa zho mine non xtsiin zho."

¹⁹ Bien gon Timoté, zeene guiaad zho lo luu, guiaad-zo zho tib men ne rnabey lo to, ib yquiaadiagd luu mine rnee zho, telne gzod zho chop tson zha ne gon ne nli been me mine rquiaqui zho me. ²⁰ Telne bind me diidz, bii noyun me dol co, dzigo squi ndxie gre zha ne nacgre to, goctox lo me; zeena sca gzieb greeraa zho gunscad zho. ²¹ Zig zobwi Dios, zig zobwi Jesús gre xanj me, laa naa rso diidz lo luu, been mine rne naa lo luu nu. Gdzieebd luu, yquiad zdoo luu, bnee lo zho tel chotaa nac zho.

²² Zeene gzo luu zha ne gun xtsiin Dios, gund luu ne lega tel chotaa gzo luu; sac gon, nend leetse zha ne rap pe tib falt gzooblo luu, dzigo laa miech guiab nanpaa luu zha nac zho ni rlisquid luuw lo zho. Ible gdeete luu diidz gun luu ncuane gunctal xtol luu. ²³ (Gnid naa togo ible grieelodraa guie luu vin, zac guie luu niipyeena maase poc poc, laa ne guie luu niab nis; zeena glunedraa zdoo luu.) ²⁴ Sac gre zha ne no lo dol, no dol co znuse rzhoobnen; nogaaw, haxta gal dze ne laa zho gacredz lo Dios, dzig-oraa xoobneena. ²⁵ Scaquegaa zha ne run guielwen, no ncuane co znuse glu; nogaaw, niicle ne rluda niina per ible dzin dze ne laaw glu.

6

Zha ne quiazhoo xtsiin ben

¹ Gre zha bets ne, zha bzian ne, zha ne lega run xtsiin ben, none gon zho xtiidz men ne quia zho xtsiin; zeena yguibd zho gneenē miech Dios, gneenē zho Xtiidz me mine noseed ne miech.

² Scaquegaa gre zha ne run xtsiin men ne rliladzle Xtiidz Dios, none gon zho mine rnabey me zho; led guiabd zho por bets zhow, gun zho mine racladztaa zho. Ni gale none tsienie guic zho wenraa grieequia gre dziin ne noyun zho; sac gon lo tib men ne no xnöz Dios ga, lo tib men ne rleynie zho ga yquiuin xtsiin zho.

Grese mine none naa lo luu nu, pseed gre miech quiw, ni pso diidz lo zho gun zhow.

³ Zrieequia zha ne guiaadnie stib wseed, mine ni nacdrea Xtiidz Jesús; sac zhiwseed Jesús rlu zha gban gre zha ne no xnöz Dios.

⁴⁻⁵ Zha ne sca rlu stib wseed, lega:

tib miech niats ga nac zho,

ible peet riend zho,

runbeyd zho mine nac diidzli,

rdziladz zho rdildiidznie zho miech; ga rlan,

laa miech rdillsa,

laa miech rleëlsa,

laa miech rbidzgosla; rlozh ga,

rliladzdraa zho pe rnee samiech zho.

Masaque nan zho telne seëb zho xnöz Dios, nroob dimi ne gunlo zho.

jBien ib ctsieelsad luu zha co! ⁶ Parga nli zha ne rzëeb xnöz Dios, zeene rzac zdoo zho mine rzoladztaa Dios lo zho, tib guielnzaac nroob ga rgaa zho. ⁷ Ni sca nonguiela, sac gon zeene rlanso ne lo guidzliu, peet rlansonied ne; ni scaquegaa zeene laa ne gbi, peet grieelod güey ne.

⁸ Gacxe waa, none sac zdoo ne ni gley ne totsaque gneedz Dios ncuane gow ne, ni ncuane gacwxab ne. ⁹ Sac gre zha ne rzoobladz xen nroob dimi, no zho rquuil mendox zho run zho ncuane ndzinlidraa par gdziniaa zho dimi co; rlozh ga rzhin lo xquielmban zho, haxta rnitlo zho. ¹⁰ Sac nac dimi, zeene rzoobladzdox miecha, ga rzoobni ne laa zho run gre guielntseeb. Ndal zha ne ziesaan Xtiidz Dios, sac laa zho zienal dien zha xen zho nroob dimi; per rlozh ga, stib stib guielne ne ziedzin lo zho.

⁸ Gacxe waa, none sac zdoo ne ni gley ne totsaque gneedz Dios ncuane gow ne, ni ncuane gacwxab ne. ⁹ Sac gre zha ne rzoobladz xen nroob dimi, no zho rquuil mendox zho run zho ncuane ndzinlidraa par gdziniaa zho dimi co; rlozh ga rzhin lo xquielmban zho, haxta rnitlo zho. ¹⁰ Sac nac dimi, zeene rzoobladzdox miecha, ga rzoobni ne laa zho run gre guielntseeb. Ndal zha ne ziesaan Xtiidz Dios, sac laa zho zienal dien zha xen zho nroob dimi; per rlozh ga, stib stib guielne ne ziedzin lo zho.

⁸ Gacxe waa, none sac zdoo ne ni gley ne totsaque gneedz Dios ncuane gow ne, ni ncuane gacwxab ne. ⁹ Sac gre zha ne rzoobladz xen nroob dimi, no zho rquuil mendox zho run zho ncuane ndzinlidraa par gdziniaa zho dimi co; rlozh ga rzhin lo xquielmban zho, haxta rnitlo zho. ¹⁰ Sac nac dimi, zeene rzoobladzdox miecha, ga rzoobni ne laa zho run gre guielntseeb. Ndal zha ne ziesaan Xtiidz Dios, sac laa zho zienal dien zha xen zho nroob dimi; per rlozh ga, stib stib guielne ne ziedzin lo zho.

⁸ Gacxe waa, none sac zdoo ne ni gley ne totsaque gneedz Dios ncuane gow ne, ni ncuane gacwxab ne. ⁹ Sac gre zha ne rzoobladz xen nroob dimi, no zho rquuil mendox zho run zho ncuane ndzinlidraa par gdziniaa zho dimi co; rlozh ga rzhin lo xquielmban zho, haxta rnitlo zho. ¹⁰ Sac nac dimi, zeene rzoobladzdox miecha, ga rzoobni ne laa zho run gre guielntseeb. Ndal zha ne ziesaan Xtiidz Dios, sac laa zho zienal dien zha xen zho nroob dimi; per rlozh ga, stib stib guielne ne ziedzin lo zho.

⁸ Gacxe waa, none sac zdoo ne ni gley ne totsaque gneedz Dios ncuane gow ne, ni ncuane gacwxab ne. ⁹ Sac gre zha ne rzoobladz xen nroob dimi, no zho rquuil mendox zho run zho ncuane ndzinlidraa par gdziniaa zho dimi co; rlozh ga rzhin lo xquielmban zho, haxta rnitlo zho. ¹⁰ Sac nac dimi, zeene rzoobladzdox miecha, ga rzoobni ne laa zho run gre guielntseeb. Ndal zha ne ziesaan Xtiidz Dios, sac laa zho zienal dien zha xen zho nroob dimi; per rlozh ga, stib stib guielne ne ziedzin lo zho.

Dib zdoo Timoté gliladz Timoté Dios

¹¹ Sangue luu gon, bien ganle xnöz Dios no luu, gund luu gre ncuane co. Bioxco

zaacse wban, tibaque bioxco gban luu zigne racladz Dios, dib zdoo luu bliladz me, bleynie me ni bleynie samiech luu, ndooladz goc lo zho, ni lalnu ib guiaand zdoo luu.

¹² Bleeladz luu been gre dziin ne run zha ne dib zdoo rliladz Dios, zigne run zha ne rie lo dil, rbeeladz zho zho. Gon ganle, laa luu nole nez ne yгаа luu guielmban ne gdziind dze lozh, ib csaand luu nez co; sac niicle Dios ible min co bzooblo me luu. Psoladz ganle, squi ndxie miech bleero luu ne dib zdoo luu rliladz luu Xtiidz Jesus.

¹³ Dios (men ne rdeed xquielmban gretaa ncuaane no), ni Jesus (men ne ni lalnu bdziebd zeene gueyzo zho me lo Pons Pilat, bnee me cho nac me); me zobwi ganle ¹⁴ laa naa rso gre diidz rii lo luu, bioxco beena zigne no gaca. Tibaque bioxcow haxta gal dze ne gbiire guiaad Jesus, men ndzon ne rnabey ne. ¹⁵ ib laa me no guiaad! Ni Dios cxeel me zeene laa dze co gdziin. Dios men nroob ne rnabey, men ne rnabey lo gretaa zha ne nac rey, lo gretaa zha ne rnabey. ¹⁶ Mesi ib gdziind dze guet me, lo biini ne no mew, tsod zha ne glëb gdziin ga; ni tib miech lo guidzliu rii gard gan me, ni grieelodgaa gan zho me. Gacxe waa, ible me none dziuunnon ne, sac gon men non, men rnabey nac me! Min co nagon no dziuun ne.

¹⁷ Gre zha ne rapchen, bnee lo zho cseed zho gdaannied zho gre ncuaane rap zho, ib gnalod zho gre ncuaan co; sac gon ncuaane tib rded ga. Dios none gnalo zho, ni mesi rneedz me gretaa ncuaane wen ne rquiin ne. ¹⁸ Gudz lo zho gacmbidzd zho, none gun zho gre ncuaane yquiin lo samiech zho, ycad zho ncuaane quianie zho, ine gun zho xyudar zha ne peet quianied. ¹⁹ Zha ne sca gun, tib guielnzaac nroob ne yгаа zho; lëë guielnzaac co gan zho len dze ne ziaadraa. Ni haxta zгаа zho tib guielmban ne gdziind dze lozh!

²⁰ Timoté, laa naa rbire rso diidz lo luu nu gon: ib csaand luu dziin ne bneedz Dios lo luu i. Yquiaadiagd luu gre wseed yozh ne ziaadnie stib miech, wseed ne rneenë Xtiidz Dios, niicle ne rnee zha ne ziaadniew zha rac nac zho, per nlid ne diidzli rnee zho. ²¹ Sac gon, blale zha ne ziaasaan mine

nac diidzli, laa zho zienal wseed co; per rien d zho lel znu rziaabnez zho ga.

Dios men ndzon ne rnabey, me noxco luu, me gzhixcuaa lo gre zhizhgab luu. Me gacnie luu peet tsienied guic luu.

Pabl

BROP GUITS NE PXEEL PABL LO TIMOTÉ

¡Diuzh Timoté!

¹ Naa nac Pabl, tib zha ne pxeel Jesús nonee Xtiidz Ndzon me lo miech. Ible Dios bzo naa quiaseed naa miech diidz ne rdeed guielmban lo zha ne rzëëb xnëz Jesús.

² Laa naa rxeel stib guits rii lo luu i gon xin; xin rne naa lo luu sac rzaac naa luu zig tib xpëëd naa. Mine racladz naa ni rnab naa lo Dios men ne nac Pxoze ne, ni lo Jesús men ndzon ne rnabey ne, yquia zdo me luu, ni me tsoxco grë zhizhgab luu; zeena peet tsienied guic luu.

³ ¡Gzataa zeene rzodiidznie naa Dios rzet naa luu lo me, niicle guidzew, niicle guieela, tibaque rded naa xquizh lo me ni rnab naa lo me gacnien me luu! Dib zdo naa noxco naa zana naa mine rnabey me, zigne bioxcoque grë xmengoldoo naa güeynal zhow.

⁴ Zeene rsoladz naa blactaa roon luu zeene wbi naa i, zoot naa tebaa zha gan niob naa luu stib; zeena tsonley zdo naa. ⁵ Ni rsoladz naa scataa dib zdo luu rliladz luu Dios; lëëdaaque xnanit luu Loid, ni xnial luu Eunis, ni nanpaa naa scataque dib zdo luu rliladz luu me.

⁶ Gacxe waa, laa naa rso diidz lo luu pquiin grëse guielbiini ne bneedz Dios lo luu zeene pxobnia naa guic luu, ni bnab naa beenlay me luu. ¡Ib csaand luuw! ⁷ Sac gon, laa Dios rneedz zhiEspíritu me lo ne, parne sodziebdraa ne, parne dziaapraa ne xfuers me, gleynieraa ne samiech ne, ni tsabiiniraa ne. ⁸ Gacxe nod pe nacne gdzieeb luu, bnee lo miech ganle zha nac Xtiidz Ndzon Jesús; ni niicle gdzieebdgaa luu ne znu nioogyu naa nu, loxaque ne rliladz naa me. Sinque bloo zdo luu ne ib laa luu no gan grë guielnë rii, loxaque ne quiaseed ne miech Xtiidz me, diidz ne rlu ganle zha laa zho lo dol. Ga nagon rquiin fuerz ne rneedz Dios lo ne. ⁹ Gotsaa gwi ne ganle laa me psilaa ne lo grëtaa xtol ne, ni bredz me ne gban ne zigne racladz me. Ni nacda por pe guielwen ne bdziuu ne, sac

haxta zeene gard cue guidzliu, laa me psan diidz ne laa me glu ganle pa lotaa rleynie me ne.

¹⁰ Ni niina ne laa me pxeel Jesús (men ne rsilaa miech lo dol), laa me blu ganle ne nli nquialadz me ne. Jesús nac men ne biaadtiche poder ne rap guielgut, ni biaadlu me ganle parne yгаа miech tib guielmban ne gdzind dze lozh, none gliladz zho Xtiidz Ndzon me. ¹¹ Ible min co nagon nacne bzo Dios naa gne naa Diidz Ndzon rii lo miech, pxeel me naa ga naa grë guiedz zaatne nodraa zha Israel, gaseed naa zho zha naca; ¹² mincocxe waa znutaa grë ncuaane nodeed naa. Per ni lalnu ib rtoladz naa, sac wen wen nan naa cho nac men ne rliladz naa, ni nan naa mesi zrieelo yquiaanap me naa nitnëzd naa haxta gal dze ne laa me guiaad.

¹³ Bien, güeynal grë mine pseed naa luu, sac gon min co nac mine rquiin. Tiblique bliladz Dios, ine bleynie samiech luu zigne no dziuun ne ne nac ne zha ne no xnëz Jesús. ¹⁴ Espiritu Sant men ne nacie ne, me yquiaanap luu, me gacnien luu ib csaand luu zhiwseed Dios, ib csaand luu dziin ne bzo Dios luu gun luu.

¹⁵ Nanlaxe luu ganle zha been zha Asia, grëse zho bzozit lo naa; zig nac Figel, zig nac Hermoj, mbe psaan zho naa. ¹⁶ Sangue Onesifr, rnab naa lo Dios yquia zdo Dios me grë menlidz me, sac blactaa biadchoobladz me zdo naa. Niicle ne znu nioogyu naa nu, per ib beend me ne ntoladz me niaadgan me naa; ¹⁷ sinque zigne blanso me lad guiedz Roma nu, pquiaguib me naa haxta bdziel naa lo me. ¹⁸ Ni zoladzaxe luu ganle, pe zhistaa been me xyudar ne zeene no ne guiedz Efés i; rnab naa lo Dios yquia zdo Dios me gal dze ne laa grëse miech gacredz lo Dios.

2

Dziits so Timoté lo Xtiidz Dios

¹ Xin, sangue luu gon tibaque squi dziits bzo lo Xtiidz Dios, gon ganle Jesús noxco grëse zhizhgab luu.

² Grëse mine gon luu pseed naa miech, scagaa niina bioxco bneew lo zha ne rgobey luu grieelo tsie tsieneew lo stib miech. ³ Ib gacmband luu zeene noyan luu

grë pe guielnë, sinque bioxco been xtsiin Jesús zigne no guñ luuw, masaque been cuent xmenguiib me nac luu. ⁴ Sac gon, tib zha ne nac menGUIIB, grieelod sëëb zho pe stib lo cuent ne nacd xtsiin menGUIIB, sac none nsin so zho guñ zho tel pe nac mine rnee men ne rnabey zho. ⁵ Bioxco been mine rnee men ne rnabey ne, zig run zha ne rie tib lo wguit; sac zha co telne tsoxcod zho quit zho zigne nacpaa lo wguit, ycaaniad zho premio. ⁶ Been xtsiin me zigne no gaca, zig run zha ne ran; gon ganle zha ne rioxco ran, zha glopaa rquiin guielnzaac ne rac zaatne ran zho. ⁷ Mine blozh bzet naa nu, blooniew guic luu, ni Jesús nac men ne gneedz guielbiini lo luu guien luu zha naca.

⁸ Tibaque psoladz ganle cho nac Jesús, zha brieequia me lo xtii rey David, ni zha brieegan me; zig nac naa min co rzet naa lo miech zeene rseed naa zho Xtiidz Ndzon me, par laa zho lo xtol zho. ⁹ Ni ne nonecxe naa Diidz Ndzon rii waa, gane nroob guielnë ne noyan naa; zig nac niina, laa naa ngadoo zaatne niogyu naa nu zootne cho zha dox. Ni niicle ne znu niogyu naa nu, sangue Xtiidz Dios led yeda niogyu. ¹⁰ Laa naa quiaxecw mine quiaanteedta naa, zeena grëse zha ne bzooblele Dios gliladz Jesús, grieelo yquiaadiag zho zha laa zho lo dol, ni zha yгаа zho tib guielmban ndzon ne gdzind dze lozh.

¹¹ Ni znu gon naca:

Telne xnëzle me no ne zeene laa ne guet, ib zгаа ne guiobannie ne me.

¹² Niicle nroob guielnë dzian ne porne rliladz ne me, scagaa ible zdzin ne zaatne gnabeynie me ne;

telne guiab ne runbeyd ne me, scaquegaa me ziaab me runbeyd me ne.

¹³ Niicle telne riaanladz ne me, sangue me riaanladz me ne; mine rnee me run mew, sac mesi rtsëed me xtiidz me.

Tsoxco Timoté greequia xtsiin Timoté

¹⁴ Bien, beencsoladz grë zha bets ne i, zha bzian ne i grë min rii. Zig zobwi Dios ganle laa naa rso diidz lo luu, gudz lo zho tildiidzniedraa zho miech grë godiidz ne paat rquiind; led ncuane ndzinlida, loxaque rungueta guic zha ne rquiaadiaga.

¹⁵ Tibaque bioxco zaacse greequia xtsiin Dios, mine noyun luu, zeena wen greequia luu zeene laa luu gdzin lo me. Zigne nacse Xtiidz me, sca pseed miecha. ¹⁶ Yquiaadiagd luu grë wseed yozh, ncuane ni lalnu paat rquiind; zha ne zienal wseed co, zig zie dze laa zho rzozitraa lo Dios. ¹⁷ Lega nac zhiwseed zho zig nac grë guielguidzdox; sac tel guielguidzdoxa, znuse rded miecha ni zha ne glana ible zet zho. Zig nac Himené grop Filet, wseed co rleyne zho, ¹⁸ sac tel zha zienaldraa zho mine nac diidzli; rnee zho bleebanle Dios grë mengut. No palal zha ne rliladzle Xtiidz Dios, zeene ron zho min co, riendraa zho dien pa mine gliladz zho. ¹⁹ Sangue zha ne nlipaa no xnëz Dios, tsod pe nacne grie zho xnëz me sac lole me ngab zho; zigne zhobneeque lo Xtiidz me zaatne rnee: “Runbey Dios cho nac zha ne nlipaa no xnëz me”; ni rneequew: “Grë zha ne nlipaa ngab xnëz Jesús, none csaan zho grëse guielntseeb.”

²⁰ Zaatne nac lidz tib zha ricw lëë, no grë xtsiin rotie zho mine niaa or, mine niaa plat, ni noquegaa mine niaa yag, mine niaa ben. Mine mazdraa niazh, min co rquiin zho rio ncuane row miech; laa mine beelze niaa, ga rgo zho ncuane row ma. ²¹ Scaquegaa miech, zeene csaan zho grëse ncuane paat rquiind, ible squiin zho lo Dios guñ zho xtsiin me mine mazdraa nroob, zigne rquiin grë trast niazh co.

²² Nac lo guielngueg, ndal grë ncuane ndzinlid rio guic miech run zho, sangue luu gon tsienied grë ncuane co guic luu, bioxco zaacse wban, dib zdoo luu bnalo Dios, ine bleyne grëse samiech luu, tilnied luu zho; grë zha ne squi nli mbe zdoo, rbedz zho Dios, zaacse wbannie zho. ²³ Ib yquiaadiagd luu grë godiidz ne paat rquiind, sac gon loxaque runctila miech.

²⁴ Zha ne squi run xtsiin Dios, nodne tso zho dien pe tildiidz zho; sinque none wen gac zho lo grëse miech. None guien zho zha cseed zho miech; ib guieednied zho miech, ²⁵ ndooladz gac zho gnee zho lo zha ne rlënie Xtiidz Dios. Ni scagaa Dios cxobnia guic grë zha co, yguudz zdoo zho csaan zho grë xquielntseeb zho, gacnan zho mine

nac diidzli; ²⁶ zeena tsaa zho biini griee zho ladznia mendox, zaatne ngadoo zho.

3

Len dze ne ziaadyob nitlo guidzliu

¹ Ni none gacnan luu ganle, zeene laa dze ziaadyobpaa nitlo guidzliu, nroob nac guielne ne gan gre zha ne no xnöz Dios.

² Zrieequia gre zha ne:

gacladz tebaa lose zho yquiin grëtaa ncuaane no,

loxaque dimi gleynie zho,

niats gac zho,

zdaannie zho ncuaane ni rapd zho,

zneenö zho Dios,

gond zho xtiidz pxoz zho, xtiidz xnüaa zho;

sacd zdo zho mine gun miech lo zho,

laa zho gban zigne notaa guic zho, ib yquiaadiagd zho Xtiidz Dios.

³ Gacnandraa zho pe nac guielwleynie, ib yquiad zdo zho,

loxaque diidz gzhixcuaa zho,

lëbd zho gnabey zho xcuerp zho,

sacsi zho samiech zho,

stsidil zho grese ncuaane rquiin,

⁴ zgo zho zha ne ndzieeldiidz zho nia zha ne quin zho,

ni lalnu guielto tsod lo zho,

loxaque dien zha gdeed guxt xcuerp zho tso zho, laa ne yguib zho xnöz Dios.

⁵ Squiaalo zho ye zho rliladz Dios, per lo gre ncuaane gun zho, ga glu ne rliladz zho me.

Bien, ib ctsieelsad luu gre miech ne sca nac. ⁶ Sac lëe zha ne nacgre zho ga,

rzëeb yu rietsitnie gre wnaa yozh ne zienal ncuaane gdeedtaa guxt xcuerp. ⁷ Tibaque

no zho dieen peraa rseed zho, per ib rioguid zho mine nac diidzli. ⁸ Zigne been chop

zha ne biil diidz dox padzeela, Janes grop Jambres, gocndaan zho lo Moisés; scaque

run zha co niina, rlëeniedox zho mine nac diidzli. Miech yozha, ndzinlidraa nac guic

zho, nacd zho zha ne gliladz Xtiidz Dios; ⁹ per gacdaquew xtse, zeene laa diidz guien

ganle pe clas miech nac zho, dzigo lëeque gre ncuaane yozh ne run zho cuee xquielto

zho; zigne bzhaacaque zha ne sca blëenie Moisés.

Csaand Timoté mine pseed me

¹⁰ Sangue luu, nanle luu ganle zha nac gre mine pseed naa luu. Wen wen nan

luu ganle zha mban naa, pe no guic naa gun naa, zha dib zdo naa rliladz naa

Dios, zha dib zdo naa rleynie naa samiech naa, rieednied naa zho. ¹¹ Nanle luu ganle

zha rneedz Dios xfuers naa, rlëeb naa grëtaa mine rteed miech naa, zig been zho

naa guiedz Antioquí, guiedz Icon ni Listr, blactaa pquiana zho naa; per tibaque

gocnie Dios naa, psilaa me naa lo grëtaa guielxtseeb co. ¹² Ni scagaa naca, gre zha ne

rquiabladz gban zigne rnabey Jesús, ible squiana miech zho. ¹³ Per probsaxe gre

zha ne sca quiayunctal xtol, zha ne sca noquidie miech, zig zie dze laa zho no-

teedquie zho nöz ne nitlo zho. Quiaguitnie zho miech, ni quiaguitniegaa mendox zho.

¹⁴ Sangue luu gon, csaand luu gre mine pseed luu. Nanween luu ganle diidzliw, ni

runbeygaa luu cho nac gre zha ne bneew lo luu. ¹⁵ Ni stiba, zigne ziadroob luu psilo

quiaseed luu Xtiidz Dios, ni lëew bdixbiini guic luu gocnan luu ne Jesús none gliladz

miech parne laa zho lo dol. ¹⁶ Dib nacse Xtiidz Dios, Espíritu Sant psiaaba guic zha

ne pquiaaw, laaw biaan:

rseeda ne mine nac diidzli,

rsow diidz lo ne guien ne pa lo quiaxin ne, rseeda ne zaacse gban ne.

¹⁷ Zeena sca grese zha ne no xnöz Dios, grieelo wen wen cseed zho, ni guien zho

zha gun zho grese dziin ne rquiin, dziin ne riegual zho gun zho.

4

None gnee Timoté Xtiidz Dios

¹⁻² Zig zobwi Dios, zig zobwi Jesús men ndzon ne rnabey ne, laa naa rso diidz lo

luu, bnee Xtiidz Dios lo grese miech. (Jesús nac men gunquish miech grëtaa ncuaane

been zho, zigtaa zha ne mbana zigtagaa zha ne gutlew, zeene gdziin dze ne laa me

guiaad gnabey me.) Bioxco tel pa hortaa bneew lo zho, niicle zeene rzac luu riobda.

Bloo guic zho gliladz zhow, bnee lo zho zeene gan luu pe falt ne noyun zho, ni

scagaa bloonley zdo zho. Bioxco tibaque pseed zho, ib guieednied luu zho. ³ Sac

gon, zdziñ dze ne siguieldraa miech yquiaadiag zho miñe nac diidzli; sinque laa zho yquiaguib zhaase zhaase dieñ cho cseed zho tel pe nac ncuaane rdziladzse zho yquiaadiag zho. ⁴Gleynied zho Xtiidz Dios, laa ne yquiaadiag zho miñe nac xtiidz me, lel laa zho tsoxco yquiaadiag zho grë miñe nac zhiwseed miech guidzliu. ⁵Sangue luu gon, nsin bzo gdeete luu diidz gungüet zho luu. Zaacse been grë miñe pso Dios luu gun luu, bnee lo miech zha laa zho lo dol; niicle tel pe nactaa guielñe ne noded luu, gacmband luu.

⁶Rien naa ziaadyoble ne laa naa gbi lo guidzliu rii, zhile gdziñ dze ne laa zho gut naa. ⁷Len ngbidz ne wban naa, tibaque dib zdoo naa bliladz naa Dios; xtsiin mew, laaw ben naa zigne bnabey me naa, ni laaw psiaalga naa niina. Zigne runda grë menñuib ne rie lo dil, sca bleeladz naa naa ben naa xtsiin me; ⁸laa na nagon, miñe quiambëzse naa nac premio ne no gneedz me lo naa. Lëe premio co gneedz me gal dze ne guiaad me guiaadgun me guielwxtis; ni led loxaque naadse ygaaw, sinque grëse zha ne rleyne me, grë zha ne dib zdoo quiambëz gdziñ dze ne guiaad me stib, grëse zha co ygaaw premio co.

Tsieniob Timoté

⁹Bzhiguiel guiaadniob luu guiaadgan luu naa nu; ¹⁰sac zig nac Demas, laa me bichele lo naa. Psañaque me naa nu laa me zie nëz Tesalónica; sac mazdraa nonie grë ncuaane lo guidzliu rii guic me. Bay zig nac Crescent, laa me brieie zie me nëz Galás; Tit na, zieegaa nëz Dalmás; laa zho zie zaatne nacle diidz tsie zho. ¹¹⁻¹²Niicle Tic guienñ nu, sac laa me pxel naa zie me Efés. Loxaque Lucse biaan lo naa nu.

Psoladz gon tsieguib luu Marcw, zeene laa luu guiaad nëz rii bzhiguiel guiaadnie luu me; sac rquiin me nu gun me xyudar naa lo xtsiin Dios. ¹³Ni psoladzpaa guiaadnie luu lar ne rbiix naa, miñe psan naa guiedz Troas lidz Carp; ni guiaadnie luu grë xquits naa. Ib guiaanladz luu miñe nac grë guits nroob ga.

¹⁴Tel gan luu ganle nzian ncuaane nonguieldraa been Lejandr naa, men ne nac wncadzguib ga; per Diostaa nan

zha gunquizh me Lejandr grë miñe been Lejandr ga. ¹⁵Ni niicle luugaa gon, nsinaque bzo lo me; sac ne nlipaa rlëenie me wseed ne nolu ne lo miech nu.

¹⁶Zeene glopaa gocredz naa lo wxtis, choot bzëd nriee xfavor naa, grëse zho biche lo naa; rnab naa lo Dios gunquizhd me zho miñe been zho, sca psaan zho naa. ¹⁷Sangue men ndzon ne rnabey ne psaan me naa, me pchoobladz zdoo naa, haxta bdeeda diidz bnee naa Xtiidz me lo grë zha zit rii. Sca gocniñ me naa, gun naa cuent role meedz psilaa me naa; ¹⁸ni niicle niinagaa, nanle naa ne ib silaa me naa lo grëtaa ncuaane racladz miech cteed zho naa, ni me yquiaanap naa haxta gal dze ne laa me gdziñnie naa zaatne rnabey me gbaa. ¡Me rieguial guiaañnon gzataa dze, niicle nadzew, gzhew, ni grëragaa len izdoo ne ziaada!

¹⁹Bzhiguiel bdeed tib zhibdiuzh naa lo Aquil i grop Priscil, ni lo grë zha ne no lidz Onesifr. ²⁰Gacnan to ganle, laa bets ne Rast biaan Corint, laa Trófimo biaan guiedz Milet, sac rzacñe me. ²¹Bioxco gon guiaadniob luu, zeena blansole luu nëz rii zeene laa mëe nal sëeb. Pcaania zhibdiuzh Eubul, zhibdiuzh Pudent, zhibdiuzh Lin, zhibdiuzh Claud; ni grëragaa zha bets ne, zha bzian ne, zha ne no nëz rii, laa zho rxeel bdiuzh lo luu.

²²Jesús men ndzon ne rnabey, me gacnie luu. Dios glu lo to ganle pa lotaa noxco me to. ¡Me gunlay to grëse to!

Pabl

GUILTS NE PXEEL PABL LO TIT

¡Diuzh Tit!

¹ Naa nac Pabl, tib ngundziin win nac naa lo Dios, tib zha ne pxeel Jesús nonee Xtiidz Ndzon me lo miech. Laa naa none xtiidz me, zeena grëse miech ne bzooblöle Dios, gliladz zho me, gacnañ zho zhapaa nac wseed ne zional ne (wseed ne rnee zha none gbannie miech Dios), ² wseed ne rlu ganle ible laa ne quiambiaaz ygaa ne tib guielmban ne gdziñdraa dze lozh. Ansraa ne tsaaguidzliu, laa Dios bzeetle ne laa me gneedz guielmban co, ni mesi gon led yed me rquidie. ³ Ni niina ne laa dze co bdziñ, laa me blu lo ne ganle zha nac xtiidz me, mincopaa nagon bzo me naa none naa lo miech. Lëe me ga nac Dios ne psilaa ne lo dol.

⁴ Laa naa rxel guits rii lo luu gon Tit. Rzaac naa luu zig tib xpëed naa, sac nañ naa nli dib zdoo luu rliladz luu Dios zigne rliladz naa me.

Rnab naa lo Dios men ne nac Pxoz ne, ni lo Jesús men ne psilaa ne lo dol, glu me ganle pa lotaa noxco me luu, zeena peet zhgab ctseebd luu.

⁵ Rsoladzaxe luu ganle, zeene psañ naa luu lo guidzliu win ne lë Cret i, laa naa psañ luu zeena lozh gun luu grëraa dziin ne no gac i, ni psañ naa diidz lo luu zha gzo luu zha ne so gnabey lo grë zha ne rliladz Jesús, tib tib guiedz qui. ⁶ Bien sca, zeene gzo luu zha co, ga rquiin:

tib zha ne zaacse mban, zeena peet glisquid miech lo zho;
tibaque wnaa ne mbannie zho, men ne nace tsieel zho,
zaacse quiachoob zho xpëed zho,
rliladz mëed Dios (zëebd diidz pe guielntseeb ne noyün mëed, o rondgaa mëed diidz).

⁷ Sac zha ne sca so lo grë zha ne no xnëz Dios, ib none gac zho tib zha ne ndzinli mban, sac gon xtsiin Dios ga gun zho. Nodne gac zho:
zha nlëëguic,
zha ngonziu,

zha nad ron diidz,

zha nguibdil,

zha ne rzonal dimi.

⁸ Sinque none gac zho tib zha ne:

ndzinli nac guic,

ine niowse rdeed zho zaatne rbëz miech ne rdziñtaa lidz zho,

rioxco zho run zho niapse ncuaane rquiin lo samiech zho,

zional zho gac niapse mine nac diidzli,

rioxco zho run zho niapse mine rnabey Dios,

rrieelo zho rnabey zho guic zho, rnabey zho xcuerp zho.

⁹ Ni none tibaque tsional zho mine nac Xtiidz Jesús, mine pseed zho; zeena guien zho zha gnee zhow lo grë zha ne gard tsoguic zha naca, ni grieelo zho glu zho lo grë zha ne rlëenie Xtiidz Jesús, guien zha co nonguiel da ga glëenie zhow. ¹⁰ Sac no ndal grë zha ne nëd gon Xtiidz Jesús niina, ncuaane paat rquiind rseed zho miech,

rquidie zho; ni lëepaa zha ne sca run nac zha Israel. ¹¹ Gacxe waa, ib none guioog ro zho; sac gon par cueexlëse zho dimi no zho noseed zho miech grë ncuaane paat rquiind; zaatne no tib yu miech, grëse zho rquidie zho.

Bien sca gon nsin bzo lo grë zha Cret i. Sac gon, ¹² tib menladzaque zho, tib men rac lo zho bzeet ganle zha nac zho zeene znu bnee me: “Nandraaque zha Cret, loxaque noquidielsa zho samiech zho. Masaque mban zho zigne mban grë ma ntseeb ne no guix; loxaque gowse zho zienie guic zho, rbech zho gun zho dziin.” ¹³ Ni nligaa sca nac zho. Gacxe waa, bien gdziguiend luu grë mine run zho, goctox lo zho zeena sodziits zho lo Xtiidz Ndzon Jesús mine no gliladz zho. ¹⁴ Bnee lo zho yquiaadiagdraa zho beelze pe grë godiizd ne rbeebey zha Israel, ni niicle yquiaadiagdga zho grë mine rnabey zha ne rlëenie Xtiidz Ndzon Jesús.

¹⁵ Golgan ganle, grë miech ne ndzinli nac guic, zha ne mbe xquielrien, ncuaane notaa, mbe naca lo zho; sangue zha ne rliladz Xtiidz Dios, zha ne ndzinlid nac guic, tsod tib ncuaane mbe glulo lo zho; sac desde zdoo zho, desde xquielrien zho mbed. ¹⁶ Rnee zho runbey zho Dios, per rlu

nlida sac ndzinlid mban zho. Zha yozha, xquielndaan yozh zho zienie zho, led zha ne guiabd ne gun ncuane yquiina.

2

Znu nac Xtiidz Ndzon Jesús

¹ Sangue luu gon, none gnee luu lo gre miech qui zigne nacse Xtiidz Jesús. ² Gre men bgui ne nac zha gol lo to i, bnee lo zho: tibliladz gac zho,

gund zho ncuane cuee xquielto zho, quix zho biini, ncuane ndzinli tsienal zho gun zho;

tiblique gac zho lo Xtiidz Jesús, gleynie zho samiech zho, ni dziits so zho tel pe nactaa gre guielne ne noyan zho.

³ Scaquegaa gre men wnaa ne nac zhagol, bnee lo zho:

gban zho zigne no gban zha ne nole xnöz Dios, gzhixcuad zho diidzguizh, gzuzd zho.

None zaacse gac zho, ⁴ zeena zha glu lo gre wnaa nguieg zha gban zho. Cseed zho gre wnaa nguieg:

gan zho tsiel zho, gan zho xpeed zho,

⁵ gac zho tib wnaa nix biini, quitnied zho tsiel zho;

zaacse gun zho xtsiin zho, niowse gac zho, niowse gnee zho, gon zho xtiidz tsiel zho; zeena tsod pe nacne gneenē miech Xtiidz Dios.

⁶ Ni scaquegaa bnee lo gre zha bgui nguieg, gac zha nix biini. ⁷ Luuzhal zaacse been grese ncuane no gun luu, zeena ga gwi zho ganle zha none gban zho. Zeene cseed luu zho, ine tibliladz goc, gund luu ne quitnie luu zho. ⁸ Bguib diidz ne gnee luu, zeena choot peet glisquid lo luu; ni scagaa, gre zha ne rleenie Xtiidz Jesús, stoladz zho zeene gan zho guieud pe glisqui zho lo ne.

⁹ Gre zha ne lega run xtsiin ben, pso diidz lo zho gon zho xtiidz men ne quia zho xtsiin, niowse gac zho, niowse gnee zho, yquiabrod zho lo me. ¹⁰ Ib cuand zho, sinque ine ti miech mbe lo gac zho; zeena ga gan miech ganle zha niowtaa nac lo

xquielmban zha ne zienal Xtiidz Dios, men ne psilaa ne lo dol.

¹¹ Gre diidz rii nagon pso lo zho. Got-saa gwi ne ganle zha noxcotaa Dios miech, gacxe psilaa me ne lo dol waa; ¹² sac laa me racladz csaan ne grese guielntseeb, csaan ne gretaa ncuane rleyne zha ne nod xnöz me, guien ne ndzinli gban ne, tibaque gwi ne dien pa min wen, pa mingaa wend, ine dzioxco ne gban ne zigne racladz me. ¹³ Sca none gban ne, haxta dzianlo ne gdzin dze ne laa Jesús guiaad stib, zigne psanle Dios diidz; gal dze co, laa me guiaad con gre xquielndzon me. Me nac Dios ro ne rliladz ne, me psilaa ne lo dol. ¹⁴ Sac gon, me bgaadz guielgut ne niogual ne, me bdiizh gretaa guielntseeb ne bdziuun ne, psanmbe me ne lo gretaa ncuane bdziuun ne; gane niina, lo me ngab ne, ni none dzioxco ne gban ne zigne rnabey me.

¹⁵ Gre min rii nagon pseed gre miech qui, bnee lo zho gban zhow. Zeene riegala gdieebd luu goctox lo zho, sac gon luu riegual gnee lo zho. ¡Sca been, zeena choot quitnied luu!

3

Znu riegual gban zha ne no xnöz Dios

¹ Beencsoladz zho ganle none gon zho mine rnee gre zha ne nac wxtis, gac zho tib zha nguzobdiidz, ni ib soliaadzd zho gun zho gre tel pe ncuane yquiin lo samiech zho. ² Guien zho gneenēd zho samiech zho, ine zaacse gbannie zho samiech zho, niowse gac zho, niowse gnee zho, ni zeene cho lo gnee zho none ndooladz gac zho, ndooladz gnee zho.

³ Sac gon haxta ne, ib peet riend ne glo, ntseeb goc ne, bdiits ne gre mine rnabey Dios; laa ne ziole nöz ne nitlo ne hor co, masaque bgadoo ne lo gretaa ncuane racladz xcuerp ne, lo gretaa ncuane ndzinlid ne bley ne bdziuun ne. Niapse guielntseeb bional ne, nē rac zdoo ne rdzian ne ncuane quanie, ncuane run stib miech; zigtaa row rziizh zdoo zho gon zho ne, scaque ne, zha ne rdziantaa ne, row rziizh zdoo ne bdzian ne zho. ⁴ Per bdzin dze, zeene laa Dios (men ne psilaa ne lo dol) blu ganle pa lotaa nac xquielwen me, pa

lotaa nquialadz me miech, ⁵ laa me psilaa ne; per guiabd ne togo por pe ncuaañe wen ne bdziuuñ new, sinque porne pquia zdoo me new. Psañmbe me ne lo grëtaa xtol ne, rrieequia gol ne ga stib, ni bzhixcuaa Espíritu Sant lo xquielmban ne. ⁶ Niapse por Jesús meñ ne psilaa ne ga, laa Dios pxeel Espíritu Sant rneedz me grëse guielbiini ne rquiin lo ne. ⁷ Por miñe been Jesús ni miñe been Espíritu Sant laa ne biaanwen lo Dios; ni porne noxco me ne gane bnabey me sca goca. Gane niina, ndion ne ib zгаа ne tib guielmban ne gdziñd dze lozh, sac ib sca nac xtiidz me.

⁸ Miñe rne naa lo luu nu, diidzliw. Racladz naa tibaque gnee luuw lo grë zha qui, zeena grëse zho ne nac zho zha ne rliladz Dios, tsoxco zho gun zho niapse grë ncuaañe ndzinli; sac gon, min co nac miñe nonguiel, ni mincogaa rquiin lo grëse miech.

⁹ Biche lo zha ne racladz tildiidznie luu grë ncuaañ paat rquiind, zig nac grë godiidz dien pe been grë mengol padzeela, dien pe nonguiel tsienal ne ley, te nonguiel da ye. Ncuaañe paat rquiind ga, loxaque runctila miech; ni lalnu rieguald gaquieta.

¹⁰ Tel cho zha ne rsilo rgodil grë zha ne rliladz Dios, blisquiw lo zho. Bnee lo zho tib, tel gan luu rond zhow, bnee lo zho stib; telne rondaque zhow, dzigo bzonëz zho gan zho dien pa nëz tsie zho. ¹¹ Zha ne sca run, gase rlu ne zieniedraa guic zho gon zho miñe rnabey Dios; sac nanpaa zho dol ga, ni laa zho runa.

¹² Laa naa no cxel tib zha ne guiaad i, yase cxel naa Artem o cxeelga naa Tic. Zeene glanso zho i, siguieel luu guiaad luu Nicópolis ga gdzieel ne; sac ib ga ni naa cuëz naa len mëe nal ne ziaad nu. ¹³ Laga no luu i, bioxco zaatne grieelotaaw been xyudar Apol grop me licenciad Zenas. Bdeed grë tel pe ncuaañe yquiin zho nëz; zeena peet gunfalte lo zho, grieelo gdziñ zho zaatne no tsie zho. ¹⁴ Grëse zha ne nacgrë ne ne rliladz ne Jesús, none cseed zho gun zho xyudar zha ne no liaadz; glu zho ganle rquiin zho, led zhlëd mban zho.

¹⁵ Grëse zha ne no lo naa nu, laa zho rxeel bdiuzh lo luu i. Bzhiguiel bdeed tib

zhibdiuzh no lo grëse zha ne rleynie no i; sac ye zho rliladz Jesús.

Guiaannie Dios to sca dien. Peet tsienied guic to, me gacniñ to; sac gon me noxco grëse zhizhgab to.

Pabl

GUILTS NE PXEEL PABL LO FILEMÓN

¡Diuzh Filemón!

¹ Naa nac Pabl, laa naa no ladzguiib nu loxaque ne quiayun naa xtsiin Jesús; grop no Timoté laa no rquia guits rii.

Laa no rxeela lo luu gon Filemón, ne nligaa rleyne no luu squi ye luu noyun xtsiin Jesús. ² Laaw ziaad lo to i gza to bzian ne Apia, bets ne Arquip tib zha ne noyunaque dziin rii, ni grëraa zha bets, zha bzian ne rcaalsa lidz luu i.

³ Dios, men ne nac Pxoze ne, ni Jesús men ndzon ne rnabey, me glu ganle pa lotaa noxco me to, zeena peet zhgab ctsebde to.

⁴ Ib riaanladz naa luu, zeene rzodiidznie naa Dios, tibaque rded naa xquizh lo me squitaa noneedz me guielbiini lo luu. ⁵ Sac ziyonle naa squitaa dib zdoo luu rliladz luu Jesús, rleyne luu me, ni scaque rleyne luu grë zha ne ngab lo me. ⁶ Rnab naa lo Dios, grëse mine noseed luu grë zha ne no i, tsoguc zhow, zeena ygaa zho grëse guielnzaac ne rdeed Jesús lo grë zha ne ngab lo me. ⁷ Rley naa gon bets, sac zigtaa naa zigtagaa grëraa zha ne ngab lo Diosa, blac-taa ziechoobladz luu, zigonley luu zdoo no, rlu luu ganle nli rleyne luu no.

⁸ Niicle ne rieguiala gnabey naa luu mine racladz naa gun luu, sac gon Jesús bzo naa none naa Xtiidz me, ⁹ per gnabeyd naa luu, sinque laa naa rnab lo luu yquiaadiag luu ganle zha racladz naa; sac gon ndion ne zigne rleyne naa luu, scaque luu rleyne luu naa. (Gon ganle, mengol ne nac Pabl nu nonee lo luu, laa naa nioogyu nu loxaque ne quiayun naa xtsiin Jesús.) ¹⁰ Niina gon ne laa Onésimo glanso lidz luu i stib, bzhiguiel zaacse pcaania me, gon ganle rrieequia mëed nac me lo naa niina, sac nu len ladzguiib nu bne naa Xtiidz Dios lo me, xquizhgaa Dios bliladz mew.

¹¹ Nli glo tib zha peet xtsiind nac me lo luu, sangue niina gon, zigtaa lo luuw zigtagaa lo naaw nroob yudar ne gun me. ¹² Laa me biire ziaad lo luu i, niowse pcaania me; masaque been cuent naa i zial i. ¹³ Gocladz

naa mbëz me lo naa nëz rii, zeena me niun dziin lo naa nu xcuent luu, ne znu nioogyu naa nu loxaque ne noseed naa miech Xtiidz Ndzon Jesús. ¹⁴ Per gocladz naa niunga naa mine no guic naa, ni nand naa dien pe gnë luu; gane ni naa mazd telne zrieelow, per zdoo luu gala.

¹⁵ Nli laa Onésimo biche lo luu palal dze; per niina ne laa me glanso lo luu stib, lëe guiaanle me lo luu i. ¹⁶ Per bien gon, sacdraa luu me niina zig tib zha ne runse xtsiin luu, gon ganle rrieequia tib bets luu i, tib zha ne nziuu lo luu i nac me. Tel naa, sca rzaac naa me, gacxe waa none gleynie luu me; sac gon tel niina, led loxaque tib ngundziindse nac me lo luu, sinque ye tib bets luu nac me, sac gon yele me ngab lo Dios.

¹⁷ Telne nlipaa rzac luu naa zig tib bets luu, porne tibaque men ne rliladz ne, nana sca been cuent naa i zial i, pcaania me zig nac zeene naa glanso lidz luu. ¹⁸ Ni tel no pe guielqui ne been me lidz luu, tel pe zëebgaa me lo luu, lo naa bnaba. ¹⁹ Wi ganle, naazhal pquia diidz rii nu: Naa quizha. ¡Zig nac luu, gon ganle zëeble luu lo naa, ni haxta nroobraa zëeb luu! Sac gon, naa bnee Xtiidz Dios lo luu laa luu bgaa guielmban ndzon ne gdzind dze lozh.

²⁰ Sca gon bets gaca, bzhiguiel been guielnzaac co; bloonley zdoo naa, bien ganle tibaque lo men ne ngab ne.

²¹ Laa naa pxel guits rii lo luu, sac rien naa ible zon luu mine rne naa lo luu nu, rgobey naa haxta nroobraa mine gun luu lo mine rnab naa. ²² Lëe nëzle nu rnabaque naa lo luu, siguiel luu gneedz luu lidz luu cuëz naa zeene laa naa guial i; sac rien naa ib zun Dios mine quianab to lo me, zneedz me diidz guial naa guialgan naa to.

²³ ¡Dios guiaanle luu sca! Pcaania zhib-diuzh Epafra, men ne nioogyunie naa len ladzguiib nu loxaque ne rdziun no xtsiin Jesús. ²⁴ Scaquegaa zla zha ne quadziiungza no dziin, zig nac Marcw, Ristarc, Demas ni Luc, gza zho laa zho rxeel bdiuzh lo luu.

²⁵ Jesús men ne rnabey ne, me glu ganle pa lotaa noxco me luu. ¡Me gunlay luu!

Pabl

GUILTS NE BEY LO GRË ZHA ISRAEL

¹ Padzeela, ndal vuelt bnee Dios lo grë pxozgoldoo ne, pxeel me grë zha ne biadteed xtiidz me lo zho, bnabey me grë zha co zhaase zhaase mod ne bnee zho. ² Saṅgue niina, Xpëëdpaa me Jesús pxeel me biadnee xtiidz me lo ne. Jesús meṅ ne bzaagrop me grëtaa ncuaane no, ni meṅ ne bzo me gnabeya grësew. ³ Zeene biaad Jesús lo guidzliu, me blu ganle zha ndzontaa Dios, zhapaa nac Dios, sac Dios nac me; me naaz grëtaa ncuaane no, ni por xtiidz me laaw quiayun dziin. Ni zeene blozh bdiizh me xtol ne, dzigo laa me biire zey gbaa bzob me cue Dios, zaatne rieguial me ne nac me meṅ ne rnabey.

⁴ Ga rlu ganle meṅ nroob nac Jesús, led lega lëd me Xpëëd Dios; meṅ nroob nac me lo grë anjl. ⁵ Ni tib lo anjl bneed Dios zigne bnee me lo Jesús, zeene rëb me: “Xpëëd naa nac luu. Desde nadze laa zho gunbey ne Xpëëd naa nac luu.” Stib vuelt zeene bzeet me Jesús, rëb me: “Xpëëd naa nac me, naa nac Pxoze me.” ⁶ Ni zeene biaad Jesús lo guidzliu; meṅ ne nac Xpëëdpaa me ga, rëb me: “Grëse xanj l naa, none yquitsgzhib zho lo me.”

⁷ Zaatne raquiet anjl, rneew: Tib mandadse nac zho lo Dios, pale zigne rzhoon me sca rzhoon zho rie zho zaatne rnabey me zho; me rnabey rlu zho zigne rlu bel.

⁸ Saṅgue zaatne raquiet Xpëëd me, rneew: Dios, luu nac meṅ ne zobnabey, ni gdziṅd dze ne grie luu; zeene run luu guielwxtis, zigne rieguiala sca run luuw.

⁹ Ni palal rdziguiend luu grë guielntseeb, niapse ncuaane ndzinli, ncuaane nonguiel, miṅ co rleyne luu; miṅ co gane bzooblo Dios luu, nac luu meṅ ne rnabey, luu nac meṅ ne mazdraa nroob guielbley bgaa.

¹⁰ Laa stib lugar rnee:

Meṅ rnabey nac luu, luu bzaa guidzliu, luu bzaa gbaa dib nacsew.

¹¹ Nli zdziṅ dze nitlo grë ncuaan co, grësew zlozha zigne riozh grë lar,

¹² dzigo laa luu ctibëda, zig rdibëd grë lar, laa luu cuee stib miṅ cub; zigne run zha ne rtsëëxab.

Saṅgue luu, tibaque nac luu, nacd luu meṅ ne nitlo, nacd luu meṅ ne lozh xquielmban.

¹³ Haxta rëb Dios lo me:

Cue naa nëz derech, nu bzob, nieeda lozh gnaz naa zha ne rlëe lo luu, csaṅ naa zho ladznia luu.

Nligaa meṅ nroob nac me lo grë anjl, sac ni tib lo anjl bneescad Dios. ¹⁴ Lo me ga sca bnee Dios, sac gon grë anjl, mese nac zho run zho dziin lo Dios, rxeel me zho rquianap zho zha ne nacle diidz laa lo grëtaa guielnë ne csiaab me.

2

¹ Gacxe nagon waa, gotsaa guien ne ganle ib none dzioxcu ne wen wen gwi ne zha nac Xtiidz Ndzon Jesús miṅe zidzion ne; zeena gnitnëzd ne. ² Sac gon, niicle zeene xanjlse Dios biadteed xtiidz me lo miech padzeela, ni gocnona; grëse zha ne güeynalda, pteed Dios zho caxtigw ne rieguial zho. ³ ¿Pe lelgue niina dzigo ne Jesús zhal biadnee zha laa ne lo dol? ¿Zha dien tedlaa ne lo caxtigw, telne dzioxcod ne miṅe rnee me? Nli zha ne binlew zha co biadneew lo ne, per me nac meṅ ne psilo bneew; ⁴ niicle Diosgaa, blactaa grë ncuaane quialu me, blactaa grë milagr ne run me, rlu me ganle ne nli diidzli biadseed zho ne; ni zhaagaa grë guielbiini ne ral zdo me rdeed Espiritu Sant lo grë zha ne dib zdo rnaló Jesús.

Jesús nac meṅ ne grieelo gdziṅnie miech lo Dios

⁵ Zig nac lo guidzliu cub ne ndion ne naraa gneedz Dios, psand me ne anjl gnabey low. ⁶ Lo Xtiidz me zhobnee ganle zeene znu rëb David lo me:

¿Cho nac miech ne squitaa noxco luu zho? Zig nac tib meṅ qui, ¿pe nacne squitaa runnon luu me?

⁷ Tib blase dze psanwin luu me palal lo grë anjl; na laa luu psanglaa me stib,

beennon luu me, bzo luu me mele gnabey.

⁸ Grëtaa ncuaane no, laa luu psana ladznia me.

Nli gard gac grë mine bnee David ga, ⁹ per ndionle ne ganle zha psanwin Dios Jesús lo grë anjl tib bla dze, ni blozh ga zeene laa me gut xcuent ne grëse ne, hor co laa Dios biire psanglaa me, laa Dios biire beennon me. Ni nligaa noxco Dios miech, nquialadz me ne, gane bdeed me diidz gut Jesús psilaa me ne lo grëse xtol ne.

¹⁰ Ible sca gocladz Dios, men nroob ne bzaa grëtaa ncuaane no, ible me bdeed diidz scataa grë guielne ne gon Jesús; gane niina, Jesússe nac men ne grieelo ner lo grëtaa miech guizhiu ne no ygab lo me, gdziinne Jesús zho lo guielndzon ne no me.

¹¹ Grëse ne ne nac ne zha ne psambe Jesús ngab ne lo Dios, yele ne nac mëed lo Dios. Gacxe waa, rley Jesús rnee me bets me nac ne; ¹² no tib lugar lo Xtiidz Dios zaatne raquiet zeene znu rëb me:

Zne naa lo grë bets naa, gacnan zho ganle cho nac luu;
ni zeene ycaalsa zho grë zho, tipse dzioolnie no luu.

¹³ Stib vuelt rëb me:

Dios nac men ne rnalo naa.

Ni rëb me:

Laa naa nu, quiayacnie naa grë zha ne nac xpëed Dios.

¹⁴ Min co gane, zigne znu nac ne miech, scaque Jesús goc me miech zigne nac ne. Sca bdeeda diidz gut me, ni zeene gut me, ga psanwin me mendox, sac glo masaque ladznia ma no miech par gnitlo ma zho.

¹⁵ Sca psilaa me grë miech ne ngadoo lo guielgut; rrieequia ngadoo zho, sac tibaque nonie xtseb guielgut guic zho.

¹⁶ Ni wen wen ndion ne ganle, zeene biaad Jesús, biaate me par gacnie me grë anjl, sinque laa me biaad par gacnie me grë zha ne no ygab lo Dios. ¹⁷ Gacxe waa, goc me zig nac miech, zigne nac ne ne nac ne bets me; ni parne scagaa grieelo gac me pxoz nroob ne gnab lo Dios por ne. Pquia zdoo me ne, bloogon me me bdiizh me grëtaa xtol ne; ¹⁸ nroob nac grë guielne ne bded me, pquiana mendox nquuil ma me niab me lo dol. Ni ne mezhal bded grë min co,

nanpaa me zha rzac zha ne nodeda, gane ible zacnie me zho.

3

Gunndipde to zdoo to

¹ Bets, bzian, to ne nac to zha ne bredz Dios ngab to lo me; golguien cho nac Jesús, men ne pxeel me biadteed xtiidz me lo miech, men ne bzo me nac pxoz nroob ne rnalo ne niina.

² Tib men nguzobdiidz brieequia Jesús lo Dios, zigne nguzobdiidzaque brieequia Moisés zeene pquianap me grë zha Israel.

³ Per Jesús nac men ne non, sac gon lo me ngab grë miech co, laa Moisés loxaque pquianap me zho. ⁴ Zig nac zha ne rzhixcuaa tib yu, nli non zho, per mazdraa non men ne bzaa grëtaa ncuaane no; ni lëe men co nac Dios. ⁵ Nli bin Moisés diidz been me xtsiin Dios, per laa me gocse zig tib ngundziin pquianap me grë zha Israel co, ni pteed me xtiidz Dios lo zho. ⁶ Sangue Jesús, Xpëed Dios nac me, ni me rnabey grëse zha ne ngab lo Dios. Ni grëse ne, ne nac ne zha ne no xnëz me, lo Dios ngab ne; totsaque ine nley gac ne dib zdoo ne yquiambiaaz ne gac grë mine nacle diidz gneedz me lo ne.

⁷ Ndionle ne sca ganle, men ro nac Jesús, gacxe waa gotsaa gwi ne ganle zha raquiet lo Xtiidz Dios rnee Espiritu Sant lo ne, rnee me:

Telne gon to gnee me lo to nadze,

⁸ gunndipde to zdoo to,

gunde to zigne been grë pxozgol to, gontseeb zho lo Dios, zeene sca mban noded zho, no zho grë dan ngan co.

⁹ Ga raquiet ganle zeene znu rëb Dios:

Ncuaane lëbdraa guic naa been zho,
per dipse len choo iz, blactaa ncuaane gon zho beñ naa.

¹⁰ Zeene gon naa scataa nac zho,

laa ne gon zho diidz tsie zho nëz ne rlu naa lo zho, lel zhaa ncuaane run zho;
nacne nli benngulëe zho guic naa.

¹¹ Lo guielblëe co, bdeete naa diidz ndzin zho zaatne nded naa ndziiladz zho.

¹² Bets, bzian, golguien sca ganle ib gunndipde to zdoo to, zeena sozite to lo me ne nac me Dios nguiamban. ¹³ Gzataa dze, golnee lo grë zha ne nacgrë to (nasraa laga rdeeda diidz), zeena ni tib tsienald

grë ncuuaane runctal xtol miech, lozh ga lëew yquiaaqui gacntseeb to lo Dios. ¹⁴ Sac gon, par gdziñ ne zaatne no Jesús, ib none tiblifique gac ne, tibaque gnalo ne Dios zigne bnalo ne me zeene psilo bdziuunbey ne me.

¹⁵ Ni nadzegazh none dzioxcó ne miñ co. Golsoladz ganle zha rnee lo Xtiidz me: Telne gon to gnee me lo to nadze, gunndipde to zdoo to, gunde to zigne been grë zha ne sca gocntseeb lo me ga.

¹⁶ Ni lëe miñ co gon bzhaac zha ne güeybee Moisés Egipt. Bin zho bnee Dios lo zho ni blozh ga gocntseeb zho lo me, ¹⁷ beenctal zho xtol zho. Dipse len choo iz ne sca bio zho dan co, bieednie me zho. ¹⁸ Zeene gon me rond zho xtiidz me, nacte bnee me lo zho rëb me gdziñd dze ne gdziñ zho zaatne ndeed me ndziiladz zho. ¹⁹ Ni nligaaw bdziñd zho, grëse zho gut dan co; sac sca beenndip zho zdoo zho, ib bliladzd zho miñe rnee me.

4

¹ Sca nagon bzhaac grë miech co. Gacxe nagon waa, zig nac niina ne laa me rnee ganle laa me gneedz lugar ne gdziiladz-gaa ne, none ndzinli gac ne, zeena ni tib choot sacd zig bzhaac grë zha co. ² Sac zigne nagon nonee Dios lo ne niina dien zha gdziñ ne zaatne gneedz me ga, znuque bnee me lo zho; per zhlëse bin zhow, ib bliladzd zhow dib zdoo zho. ³ Sac loxaque zha ne dib zdoose riladz xtiidz Dios, zha cose zrieelo gdziñ zaatne nacle diidz ga gdeed me gdziiladz zho. Miñcocxe waa, zeene gon me bliladzd zha co xtiidz me, bdeete me diidz ndziñ zho ga.

Niaale zaatne gdziiladz zho ga, nolew zeene blozh bzaa Dios grëtaa ncuuaane no. ⁴ Sac gon rnee lo Xtiidz me: “Xoop ngbidz bzaa me grëtaa ncuuaane no, laa zeene gol ngbidz gadz laa me bdziiladz.” ⁵ Niaalew nagon, sinque ne gocntseeb zho lo me gane bdeete me diidz ndziñ zho.

⁶ Grë zha ne glo gocnan xtiidz me ga, brieelod ndziñ zho; per zig nac niina, laa me bii quiambëz sëeb grëraa zha ne no sëeb. ⁷ Gacxe waa, laa me biire pso stib dze ne ygaa zho guielnzaac co. Lëe miñ co ga znu bzeet David, zeene rëb me: “Telne gon to

gnee me lo to nadze, gunndipde to zdoo to.” Ndaldoole iz sca bzhaac grë zhagol co, dzigora znu bzeet David; ⁸ ga nagon rlu no stib lugar ne gdziiladz miech. Nacdraaw zaatne bdzinnie Josué grë zha ne biaan zeene blozh gut grë zha ne gocntseeb ga; sac telne lëele lugar co ga, nsodraa Dios stib dze ne ygaa miech guielnzaac co. ⁹ Miñ co nagon, ndion ne ible no stib lugar co, ni ga gdziñ grëse zha ne ngab lo Dios. ¹⁰ Grëse zha ne gdziñ ga, gasi laa zho gdziiladz lo grëtaa xtsiñ zho, zigne bdziiladzaque Dios zeene blozh bzaa me grëtaa ncuuaane no.

¹¹ Gacxe nana sca, goltotsaa dzioxcó ne dziuun ne miñe rnabey Dios, zeena gdziñ ne ga; dziuund ne zigne been grë zha wladz ne sca bind xtiidz me. ¹² Sac Diossi gon, diidz ne rnee me, nona. Zeene rnee me, rien ne grëse miñe nac ne. Nan me pe no guic ne, pe rza zdoo ne; niicle ncuuaane rzac ne mazdraa ngueetsa, nan mew. ¹³ Tsod ncuuaane tsongueets lo me. Grëse ncuuaane rac, me rana; ni tib tib ne, lo me cueero ne grëse tel zha mban ne.

Lëe pxoz nroob ga nac Jesús

¹⁴ Per zig rne naa ga, rdziaap ne tib pxoz nroob niina, ni pxoz cosi men ne bzoquia gbaaw. Lëe me ga nac Jesús, men ne nac Xpëed Dios, me none gnalo ne; none tiblifique gac ne. ¹⁵ Sac gon mesi rquia zdoo me ne, csaand me ne zeene zootle laa ne guiabile lo dol, sac tel me gonle me zha nac lo guidzliu rii, gonle me grëtaa mod ne rquiil mendox ne par gunctal ne xtol ne. Bzhaac me zigne rziacaque ne niina, lëeraasi biabd me lo dol. ¹⁶ Gacxe nagon waa, ine tibliladz goltotsaa gbig ne lo Dios, ndion ne ganle ible squia zdoo me ne, ni ible zacniñ me ne zeene rquiinpaa ne gun me xyudar ne, sac ne nligaa noxcó me ne.

5

¹⁻³ Ible Jesús nac zhipxoz nroob ne niina. Gotsaa gwi ne ganle, men ne rgaa rac pxoz nroob, ladaque miech rcuee me run me dziin co, ni laa me rzo rteed me xtiidz miech lo Dios. Zig nac grë gon ne rgogon miech lo Dios, xchen ma ne rut zho par guiooglo lo xtol zho, me riesana lo pcoog; ni scaquegaa riesan me miñe guiooglo lo xtol

me; sac gon, miech guidzliuque nac me. Ye me rzac zigne rzac grëraa miech, gane rien me rquia zdoo me grë zha ne peet rien, grë zha ne mazdraa ngoopdol.

⁴Ni zha ne sca rac pxoz nroob, led zhald zho rzëëb zho rac zho dziin co, sinque Dioszhal rzooblo zho zigne bzooblo Dios Aarón, men ne glopaa goc pxoz nroob. ⁵Zig nac Jesús, Dioszhal bzooblo me ne laa me nac zhipxoz nroob ne; men ne znu rëb lo me: “Xpëed naa nac luu. Desde nadze laa zho gunbey ne Xpëed naa nac luu.” ⁶Ni rëb me: Luu nac pxoz nroob, gdziñd dze ne gdzëë luu,

luu gac zig pxoz Melquisedec.

⁷Zeene bii zo Jesús lo guidzliu rii, tib vuelt mban rac me zig zet me lo guielnë, haxta roon me, nguedz bnee me bnab me lo Dios csilaa Dios me lo guielgut co; scagaa Dios psilaa Dios me, sac tib men nguzobdiidz nac me. ⁸Niicle ne Xpëed Dios nac me, per tib men nguzobdiidz goc me, maase mincopaa pquiaqui nroob guielnë ne bded me. ⁹Ni ne sca bin me diidz been me grëse mine bnabey Dios me, gacxe waa grëse miech ne gban zigne nac xtiidz me, me gdeed tib guielmban ne gdziñdraa dze lozh lo zho; ¹⁰ni bzo Dios me nac me pxoz nroob niina, zigne gocaque Melquisedec pxoz nroob.

Gacde to zig cho mëdyeen

¹¹Racladz naa gneraa naa lo to nu pe run zhipxoz nroob ne, zha nac me, per ne squi rac to peet nëde to yquiaadiag to, ngan gne naa lo to zha naca. ¹²Lo lal dze ne psilo rnalo to Jesús, haxta none tole cseed miech niina, per na gon lel rquiin to dien cho gbiire csilo cseed to stib. Rac mëdyeen to i gon, laa ne gow to ncuaane row zha brooble lel racladz to tibaque nidz guie to. ¹³Sac gon, mëdyeen rie nidz, ni rien win dien pe nac ncuaane ntseeb, pegaa nac ncuaane wen. ¹⁴Sanguë grëloraa guielwagw, min co rquiin grë zha gol, ni zha co niinile zho, rien zho pe nac ncuaane wen, pegaa nac ncuaane ntseeb.

6

¹Gacxe waa, none tsoxco to gac to tib zha gol. Gunde to ne mine pseedse to glo zeene

psilo bnalo to Jesús, lo min co ib grieede to. Laa to pseedle ganle:

zha none csaan to guielntseeb gbig to lo Dios,

zha none gnalo to Dios,

²zha cxobnia to guic stib zho, gnab to lo Dios por zha,

zha nac wrobnis,

zha cueeban Dios grë mengut,

zha gun Dios guielwxtis ne gloozh grëtaa guielntseeb.

³Grële min rii nan to. Laa niina telne zneedz Dios diidz, laa to cseed mine noraa gacnan to.

⁴Sac gon, no ncuaane grieelod gac telne gneedzd Dios diidz gaca. Zig nac zha ne squi bienle zha nac Xtiidz Ndzon Dios, bley zho gon zho gol zdoo Dios psilaa me zho, bdeed Espíritu Sant guielbiini lo zho, ⁵bien zho zha wentaa nac xtiidz me, zha grieele sëëb zho zaatne ziaadyob gdziñ zho (zeene glu Dios grë poder ne rap me), ⁶ni lozh ga csaan zhow, tsienal zho guielntseeb stib; grieelod nose co guic zho gbiire sëëb zho xnëz Dios. Ni zha ne gon sca run, rriequia noquiaa zho Jesús lo cruz ga stib, gbiire gzhidznie miech me. ⁷Zig nac tib lë liu ne rgaa grëse nisguie ne riab, zeene rriequia grë ncuaane ran zho low, runlay Diosa; ⁸laa telne niapse yag guiets, niapse grë guizh guiets rroob low, paat rquiinda; ib tedsod zdzibdee Diosa, ni lozh ga znabey me tseca. Scaque nagon nac miech ne runbey Xtiidz me.

⁹Bets, bzian, laa naa rne min rii lo to, per guiabde to togo mine run to rzet naa. Tel to, rien naa brieete to lo grë guielntseeb, lole Dios ngab to niina. ¹⁰Nanle to ganle, Diosi ncuaane rieguial tib tib miech, min co rdeed me lo zho. Grëtaa ncuaane noyun to niina ne rlynie to me, grë tel zha rquia zdoo to been to xyudar grëraa zha ne no xnëz me, ni noyungaa tow niina; grësew ible guiaanladzd mew. ¹¹Mine rzoobladz naa, tibaque squi nguieel gac to, zeena scagaa zgaa to grë ncuaane nacle diidz gneedz Dios lo to. ¹²Sac dzigosi guieete to, ib gbechde to; masaque laa guic to tsienie ycaania to grëtaa mine bnee me gneedz me lo ne; zigne been grë zha ne nlipaa bnalo me.

Mine rnee Dios run mew

¹³⁻¹⁴ Golsoladz ganle, zeene psan Dios xtiidz me lo Abraham been mew zigne bneese mew. Lëë hor co rëb me laa me gunlay Abraham, ni ndal gun me lo xtii Abraham. Ni lëëque lë me bzeet me, par glu ne ible zun me mine bnee me. ¹⁵ Scagaa Abraham, tiblique bliladz me ne laaw gac; lëë gdib pquiambëz me bdzin dze co.

¹⁶ Zig nac miech, par glu ne zun zho mine rnee zho, dzigo rzeet zho lë tib men ne mazdraa non lo zho; ni deque sca run zho ga rlu ne gdzëedraa xtiidz zho. ¹⁷ Scagaa Dios, laa me bzeet lë me sac guiendraa stib men ne mazdraa non lo me. Ga blu me ne ible zun me mine bnee me ga.

¹⁸ Zeene sca rsan Dios diidz, ni rzeet me lë me, choot grieelodraa ctsëë mine rnee me, ni niicle megaaw nacd me men ne rquidie. Gacxe waa, grëse ne ne nac ne zha ne wbig lo me, none ine nley gac ne, sac ndionpaa ne ne ible zneedz me mine psan me diidz ygaa ne. ¹⁹ Min co nagon, none tiblique gac ne zig tib barcw ne dziits zob lo nis, sac no ncuaane naaza len nis; ndion ne ganle, ible zdzin ne len yadoo nroob ne zob Jesús. ²⁰ Laa me bner bdzin me ga nonab me lo Dios por ne. Me nac pxoz nroob niina, ni gdzindraa dze ne gdzëë me; laa me nac zig goc pxoz Melquisedec.

7

Pxoz nroob ne lë Melquisedec

¹ Nanle to ganle Melquisedec goc rey guiedz Salem, ni meque goc pxoz lo Dios ro ne zob gbaa. Golsoladz ganle, zeene znu wbirele Abraham güeygunxoon me zha ne no grë guiedz ne rlëë lo me, Melquisedec goc pxoz ne güeydzieelo me, beenlay Melquisedec me. ² Dzigo lo grëse ncuaane bla me lo grë zha co, been mew tsii lal, bdeed me tib lalgaw lo Melquisedec.

Melquisedec nac zig nacte rnee ne “guielwxtis”, min co nac ne rnee zho me “rey ne run guielwxtis”; ni rneeque zho me “rey ne rcuëz lo dil”, sac Salem (guiedz ne goc me rey ga) nac diidz co zig nac ne rnee ne “zaatne guiend dil”. ³ Ib raquiete dien cho goc pxoz me, dien cho goc xniala me, dien cho gocgaa xmenlog

me; niicle raquietegaa dien zha blanso me lo guidzliu, dien pe gutgaa me. Ziaad gac me zig Xpëed Dios, men ne nac zhipxoz nroob ne, men ne gdzind dze gdzëë.

⁴ Rlu men non goc Melquisedec; sac gon:

a) Golwi ganle, haxta pxozgol ne Abraham bdeed palal ncuaane bla me ga, lo Melquisedec. ⁵ Nana, telne niac Melquisedec zha xtii Leví guiab ne por min co pcaa mew, sac zeene laa ley biaad rnabeya ne grëse zha Israel, tel pe nactaa ncuaane quanie zho run zhow tsii lal rdeed zho tib lala lo zha xtii Leví, sac zha co nac pxoz; ni tibaque dii ne nac zho. ⁶ Laa Melquisedec, niicle ne led zha xtiid Leví nac me, per bnab me bdeed Abraham tib lal grë ncuaan co lo me.

b) Me beenlay Abraham; ni laa Abraham biaaniele diidz pe nac mine gdeed Dios lo Abraham. ⁷ Ni ndion ne ganle men nroob nac zha ne runlay.

⁸ c) Grë pxoz ne sca rcaania gon co, rdzin dze ne laa zho ret; sangue Melquisedec, zigne raquiet me lo Xtiidz Dios rlu ne mban me.

⁹ d) Rrieequia ye grë pxoz ne brieequia lo zha xtii Leví ye zho ga bdeed gon lo Melquisedec, zeene sca bdeed Abraham gon co lo me. ¹⁰ Sac niicle ne gard gal Leví hor co, per racle Leví cuent ga, sac xpëëdaque Abraham goc Leví.

¹¹ e) Grë pxoz ne brieequia lo xtii Leví ga, zig nac Aarón; zha co nac zha ne blu ley lo menguedz Israel; per brieelod zho mbee zho miech lo dol, gane laa ne nxeel Dios stib pxoz ne ziaad lo xtii Aarón, mazd pxeel me tib pxoz zig pxoz Melquisedec.

¹² Zeene sca ptsëë Dios lo dii ne ziaad pxoz, hor co nacte bdzëëque grë xley pxoz.

¹³⁻¹⁴ Ndion ne ganle, Jesús men ne nac pxoz cub niina, lo xtii Judá brieequia me, ni ni tib zha dii co gard gac pxoz, sac ib bzod Moisés zha dii co ne laa zho niac pxoz.

¹⁵ Ga nagon rlu ne nli grëw bdzëë. Sac gon, Jesús men ne nac pxoz niina, men ne nac zig pxoz Melquisedec, ¹⁶ nacd mew porne ziaad me lo xtii Leví, sinque porne nac me tib men ne gdzind dze lozh xquielmban.

¹⁷ Zigne raquietaque me, zaatne rnee: Luu nac pxoz nroob, gdzind dze ne gdzëë luu,

luu gac zig pxoz Melquisedec.

¹⁸ Gataa laa grë xley pxoz biaan tib lad, sac grëse minë bnabey pxoz hor co run miech, paat pquiinda. ¹⁹ Ni lalnu brieelod nsañwena miech lo Dios; sangue niina, mazdraa wen zio ne, sac ndionpaa ne Jesús nac men ne csañwen ne lo Dios, sac me nac men nroob ne rnalo ne.

²⁰ Dioszhal rëb Jesús gac tib pxoz ne gdziñd dze gdzëë, ni haxta bzeet me lë me parne glu ne ctsëed me xtiidz me; ²¹ laa grëraa pxoz ne ziezo, ib beend me ne sca nzeet me lë me. Sac gon, lose Jesús znu rëb me:

Luu nac pxoz nroob, gdziñd dze ne gdzëë luu,

luu gac pxoz nroob zig Melquisedec.

Naa nnew, ni naasi ctsëed naa xtidz naa.

²² Mincocxe waa ndion ne, diidz ne biaan nie Dios miech ga gdziñd dze ne gdzëew; sac gon, por Jesús laaw noyac. ²³ Glo, ndaldoo zha ne goc pxoz, sac grëse zho miech nac zho, rdziñ dze ne laa zho ret, zeene laa tib zho ret laa stib zho rzo. ²⁴ Sangue Jesús, led yed me griece par dien cho stib so, sac mesi gdziñd dze ne guet me. ²⁵ Gacxe waa, grëse ne ne nac ne miech, zha ne gbigtaa lo me parne ycaania Dios zho, ible silaa me zho lo dol, ni lëë blaale zho ga. Tibaque laa me gnab lo Dios por zha, sac gdziñd dze ne guet me.

²⁶ Jesús nac tib men ne nlipaa mbe, ni tib dol rapd me, ib rdziguiend me guielntseeb; gacxe waa, beennon Dios me, ni lëepaa pxoz nroob co nagon rquiin ne. ²⁷ Led yed me nac zigne goc grëraa pxoz nroob ne bio glo. Grë pxoz co, gzobse dze rut zho ma ne rgogon zho lo Dios, parne csañmbe me zho lo xtol zho; ni rutaque zho ma ne riogon lo Dios parne guiaanmbe grëraa menguietz; sangue Jesús, tibaque vult bdeed me gon co, ni mezhal goc gon co. ²⁸ Stiba, glo, zha ne rgaa rac pxoz nroob zigne rnabey ley, ye zho runctal zho xtol zho; sangue niina ne laa Dios psañ stib xtiidz me, laa me bzo Jesús nac me zhipxoz nroob ne, mesi tib men mbe nac me, ni gdziñd dze ne gdzëë me.

8

Jésusle nac men ne rteed xtiidz ne

¹ Lo grë minë quiane naa nu, minë racladzpaa naa gacnañ to nac min rii: Jesús nac zhipxoz nroob ne, ni zaatne zob Dios, men nroob ne rnabey, ga zob me.

² Gbaa no me, ga quiayun me dziin zaatne nacpaa yadoo, Dios bzaa yadoo co, led yedraa min co bzaa miech.

³ Ndion ne ganle, zha ne rac pxoz nroob, laa zho rzo, zeena grë ma, grëgaa ncuaane rgogon miech, zha rdeeda lo Dios; scaquegaa Jesús, ye me bdeed me gon lo Dios.

⁴ Tel niaca minë bii no me lo guidzliu niina, grieelod gac me pxoz nroob, sacne nole pxoz nroob ne rdeed grë gon co lo Dios, zigne rnabey ley. ⁵ Grë dziin ne run grë zha ne rac pxoz nroob lo guidzliu rii, lega nacsaw zig zhimplë grë minë rac gbaa; yadoo ne rio zho lo guidzliu riiw, lega nacsaw zig zhimplë yadoo ro ne zob gbaa. Golsoladz ganle, zeene laa Moisés gzaa yadoo, rëb Dios lo me: “Zigne gon bluse naa lo luu guic gui ga, sca none gzaa luuw.” ⁶ Gacxe waa, tel Jesús men ne nac zhipxoz nroob ne niina, mazdraa non dziin ne quiayun me; sac gon, zeene pso Dios me gac me pxoz nroob, psañ Dios diidz stib zha grieelo ygaa ne grë guielnzaac nroob ne gneedz Dios lo ne, ni me gunctsin ne lo Dios.

⁷ Wenraa nac diidz ne psañ Dios ga, sac telne niaca nlëb diidz ne biaan glo ga zeene rëb me zha guiaanwen miech lo me, dzigo nod pe nacne mbiire nsañ me stib xtiidz me. ⁸ Ni bzeetlegaa me ne laa me csañ stib xtiidz me, sac grë zha ne biaan nie xtiidz me glo, loxaque beenctal zho xtol zho. Min co ga raquiet lo Xtiidz me, zaatne znu rnee: Rnee men ndzon ne rnabey: Zdziñ dze ne gbiire guiaan no diidz grë no zha Israel, ni zha Judá.

⁹ Per gacdraaw zig diidz ne biaan no grë no xmengol zho, zeene rriequia bzheen naa nia grë zha gol co, blee naa zho lo caxtigw ne noded zho Egipt;

sac ni lalnu güeynalz zho diidz ne biaan no ga,

nacne niicle naagaaw, psaanladz naa zho.

¹⁰ Zeene gdziñ dze co,

znu nac diidz ne guiaan no grë no zha Israel:

Grëse xley naa, nis nis gacnañ zhow,

zig nac zeene haxta len zdoos zho, len guic zho zhobneew.

Dzigosi laa zho gunbey naa ne naa nac xDios zho,

ni niicle naagaaw, laa naa gunbey zho ne lo naa ngab zho.

¹¹ Dzigosi yquiindraa tso zho gnee zho lo menlidz zho, lo menladz zho: "None gunbey luu Dios gon."

Sac len dze co, grëse zho runbeyle zho naa, niicle zha ne mazdraa wina, niicle zha ne mazdragaa nona.

¹² Tel pe nactaa xquientseeb zho, zun naa zhow perdon;

gdzindraa dze csoladz naa grë falt ne been zho lo naa.

¹³ Zeene sca bzeet me ne laa me csan stib xtiidz me, ga rlu ne rquiindraa mine biaan glo ga; sac nac grë ncuuan gox rquiindraaw, laaw nole par nitlow.

9

Yadoo ne no gbaa

¹ Zeene glo biaan Dios diidz ga grë me zha Israel, hor co biaan diidz lo zho zha tsiegan zho me, ni zha tsa yadoo ne gac zaatne tsiegan zho me. ² Dzigo bzaa zho tib yu mantiad ne goc yadoo co, groltaa len yu co pquiaancaan zho tib lar nroob, goc len yu co chop len. Tib lena, mine riaan nëz rō yadoo, ga nac zaatne Nda, ga rzo tib candeler ne niaa niapse or, ni rzo tib mezh ne rbib quietxtil ne naclayle. ³ Laa stib lena, mine riaan nëz zhits lar co, ga nac zaatne Ndadoo; ⁴ ga rzo tib yag ndiaab niapse or lada, dzigo lo co rec yaal; leen coque zhoob tib guin scaque niapse or ndiaab lada. Len guin co no grop lë quie lag ne pquia ley ne pcaania Moisés, ga no bar ne bzhen Aarón, bar ne bdzib ben ga; leen coque no tib guies win niaa niapse or, len guies co no palal maná, quietxtil ne bguiaan Dios grë mengol co. Lëe guin co biaan par csoladz zho zha nac diidz ne biaannie Dios zho. ⁵ Zhits guin co zoli chop anjl ne bzaa zho, masaque rbebel grop anjl co rtsiig me xiil me rtse me zhits guin co, zaatne rliaal xchen grë ma ne riogon lo Dios, par guiooglo lo xtol menguedz. Par gne naa zha nacraa grë ncuuan co, rneedzraaw diidz nu niina.

⁶ Sca nagon biaa yadoo co, dzigo grë zha ne rac pxoz tibaque rzëeb zho zaatne Nda ga; ga riegun zho dziin ne rnabey ley zho gun zho. ⁷ Laa stib lena, zaatne Ndadoo ga, loxaque men ne nacse pxoz nroob rrieelo rzëeb ga, ni tibaque vuelt tib len iz rzëeb zho. Zeene rzëeb zho, rienie zho xchen ma ne rgogon zho par guiooglo lo xtol zho, ni guioogloogaa lo grë xtol menguedz, dol ne biend zho been zho. ⁸ Gase na ganle rlu Espiritu Sant lo ne, gacd sëeb grëraa miech zaatne Ndadoo ga, laga bii sca chop len nac yadoo.

⁹ Golgotsaa gwi ne niina na ganle zha naca: Glo, niicle ne scataa riesan zho gon, scataa rut zho ma ne rgogon zho, per brieelod grë ncuuan co nsanmbew zdoos zho; ¹⁰ sac hor co, laa zho güeynal grë ncuuan laglaase, rio zho dien pe zac gow zho, dien pe zac guie zho, dien zha gaz zho, dien zha tsar nia zho par guiaanmbe zho. Laa zho been min co, sac hor co gard gacncub diidz ne biaan Dios zho ga. ¹¹ Sanguë niina ne laa Jesús biaad, niina ne mele nac pxoz nroob, por me laa miech yгаа grë guienzaac ne bneele Dios ga. Bdzin dze laa me bzëeb yadoo ro ne zob gbaa (yadoo ne mazdraa non, yadoo ne mazdraa nzhixcuaa, yadoo cosi led yeda bzaa miech), ¹² zeene bzëeb me, bzëebnied me pe xchen chiv yeen, pe xchen ngon yeen, zigne been grëraa pxoz nroob; sinque xchenpaa me bzëebnie me zaatne Ndadoo ga; tibaque vuelt bzëeb me, ni lëe psanmbele me ne lo grëtaa xtol ne ga. ¹³ Nana, telne scataa pquiin zho xchen ngon yeen, xchen chiv yeen, rio zho rzëeg zho tib vac yeen rliaal xquidie co lad zha ne rap falt, par gbiche dol co guiaanmbe zho lo Dios. ¹⁴ ¿Pe lel xchen Jesús dzigo? Mazdraa gon nac xchen me, ible sanmbew ne lo grëtaa ncuuan paat rquiind ne bdziuun ne glo, niinasi zrieelo dziuun ne mine rnabey Dios nguiamban. Sac gon, tel Jesús ni tib dol rapd me, ni Espiritu Sant bloo zdoos me bdeed me me goc me tib gon mbe. ¹⁵ Gacxe waa, Jesúsle nac men ne gdzinne ne lo Dios, niina ne laa Dios psan stib xtiidz me. Zeene gut me, ga bdiizh me grëtaa xtol miech, zigtaa zha ne biaannie diidz glo cow, zigtagaa zha ne

nobedz me len dze riw; niinasi grëse zho zrieelo ygaa zho guielmban ne gdzind dze lozh ga, zigne nacle xtiidz me.

¹⁶ Gotsaa gwi ne ganle, xtiidz miech, mine rsan zho par dien zha gac grë ncuane rap zho zeene laa zho guet, laga bii mban zho grielod gacnon diidz co; ¹⁷ sinque haxta ret zho, dzigo laa diidz co racnon. ¹⁸ Scaque nagon, zeene psan Dios xtiidz me glo, gutgash ma ne brieen ren bzhiee dzigoraa laa diidz co psilo gocnon. ¹⁹ Golgotsaa csoladz ganle, zeene blozh bnee Moisés lo menguedz zha nac diidz ne psan Dios ga, laa xchen ngon yeen, xchen chiv yeen ndxiembëzle notsa nis; dzigo bzoob me tib lë guits mëcwxiil rna nizhnie tib guic bar, blozh ga, psëeb mew lo ren co blaal me ren co lo guits ne quia grë diidz co, ni blaal mew lad grëse miech co, ²⁰ ni rëb me lo zho: “Laa ren rii bzhiee, zeena gacnan to desde nadzetaa laa diidz ne psan Dios lo to nu csilo gacnon, none gun to mine rnabeya.” ²¹ Blozh ga, blaalaque me ren co gdipse len yadoo, ni blaal mew grëse lad ncuane racdziin len yadoo.

²² Sca nagon nac ley co, grëse ncuane no guiaanmbe, ib ren rsanmbew; scaque miech, haxta rzhiee xchen ma ne riogon dzigoraa riooglo lo xtol zho. ²³ Mincocxe waa, sca pxiee Moisés xchen ma biaanmbe yadoo co ni grë ncuane racdziin lena (nacse yadoo co zig zhimplë yadoo gbaa); sangue yadoo gbaa, ga pquiin ren ne mazdraa non lo xchen ma, ni lëe ren co goc xchen Jesús. ²⁴ Zeene bzëeb Jesús zaatne Ndadoo güeynee me lo Dios por ne, güeyd me len yadoo ne bzaa miech, sinque len yadoo gbaa güey me; sac gon, nacse mine no lo guidzliu rii zig zhimplë mine no gbaa. ²⁵ Grë pxoz nroob, gzob iz rie zho zaatne Ndadoo rienie zho xchen ma; sangue Jesús, xchenpaa me güeynie me, ni tibaque vult güeylogon me me. ²⁶ Telne ye me niun zig run grëraa pxoz co, pe zhistaale vult na ziyet me wlal ne bre guidzliu, jper na, led yed me! Zeene laa dze bdzin, laa me bиаad, xchenpaa me bzhiee, ni tibaque vult bzhieew psanmbew ne lo dol grëse ne ne nac ne miech. ²⁷ Zigne biaan tibaque vult ret miech, lozh ga zeene laa Dios

gun guielwxtis, laa zho none gacredz lo me; ²⁸ scaquegaa tibaque vult gut Jesús bdiizh me xtol grëse miech; ni dzin ne guiaad me stib, per guiaatraa me par biire quizh me xtol miech, sinque laa me guiaadsilaa grë zha ne quiambëzlo me, zeena gand zho grëtaa guielnë ne csiaab Dios.

10

Tibaque vult goc Jesús gon

¹ Grë mine rnabey ley run pxoz, lega nacsew zig tib zhimplë grëtaa mine been Jesús por ne. Horco niicle gzobse iz rienie grë miech co gon zigne rnabey ley, per brieeloda nsanmbew zho lo dol. ² Tel niaca mine gon cose nsanmbe zho, dzigo tibtaa vult ne nisan zhow lëe niaanmbele zho ga; niicle zhagaaw, nienpaa zho ne laa zho mbele. ³ Per na, gzobse iz zeene laa zho riansan gon co rsoladz zho ne bii no zho lo dol, ⁴ sac gon, grielod ne xchense ngon yeen, xchense chiv yeen guiaanmbe miech lo dol.

⁵ Mincocxe waa, zeene laa Jesús bиаad lo guidzliu, pe led znu rëb me lo Dios: Grë xchen ma, grë ncuane riaadlogon zho lo luu, racladzdraa luuw; gane bnabey luu goc naa miech, zial naa lo guidzliu.

⁶ Grë ncuane rzëeg zho, grë ren ne rxiee zho, par guiaanmbe zho lo dol; racladzdraa luu gan luuw.

⁷ Gane niina, laa naa zial nu Dios, zeena gun naa mine gnabeytaa luu; zigne zhobneele lo Xtiidz luu gac naa.

⁸ Gotsaa gwi ne ganle, blozhse rëb me racladzdraa Dios tso zho pe ncuane tsielogon zho lo me, tso zho cxiee zho xchen ma, gzëeg zho ma par guiaanmbe zho (niicle ne lo ley sca rnabey gun zho); ⁹ dzigo rëb me: “Dios, laa naa zial nu zeena gun naa mine gnabeytaa luu.” Gase nagon rlu ptiche me diidz ne psan Dios ga glo, laa stib diidz cub ne biaanmie Dios miech ga psilo noquiin. ¹⁰ Ni nligaa been me mine bnabey Dios, bdeed me me gut me lo cruz; ne sca nagon been me mine bnabey Dios, ga psanmbe me ne lo dol. Tibaque vult sca goc me gon co, ni lëe psanmbele me ne ga.

¹¹ Grë pxoz, gzobse dze rio zho len yadoo rdziib zho grë gon ne riesan miech; blactaa iz tibaque sca nodziib zho grë gon co, per brieloda nsañmbew miech lo dol; ¹² sangue Jesús gon, tibaque vuelte bzhiee xchen me goc me gon psañmbe me miech lo dol. Laa niina, cue Dios nöz derech ga zob me, ¹³ quiamböz me gdziñ dze zeene grëse zha ne rlëe ran me, laa zho guiaanwin lo me. ¹⁴ Tibaque gon ne bdeed me ga, psañmbegazh me grëse zha ne nodziñnie me lo Dios. ¹⁵⁻¹⁶ Ni nligaa scaw, haxta Espiritu Sant, zeene blozh bzeet me zha rëb Dios guiaanñie me zha Israel diidz stib, zha nis nis gacnañ zho xley Dios, zig nac zeene haxta len zdoo zho, haxta len guic zho zhobneew; ¹⁷ dzigo bzeet me zeene znu rëb Dios: “Tel pe nactaa xquielntseeb zho, tel pe nactaa xtol zho, gdziñdraa dze ne csoladz naaw.”

¹⁸ Golgotsaa gwi ne sca ganle, rsoladzdraa Dios xtol ne sac laa Jesús bdiizhlew; gacxe waa, nodraa dzio ne dieñ pe gon ne gdeed ne par csañmbe me ne.

None gbig ne lo Dios

¹⁹ Bets, bzian, glo loxaque men ne nase pxoz nroob rzëeb len yadoo zaatne Ndadoo ga; sangue niina, haxta zaatne Ndadoo len yadoo gbaa zrieelo gdziñ ne, sac xquizh xquielnzaac Jesús, bdeed me me bzhiee xchen me psañmbe me ne. ²⁰ Zeene sca gut Jesús, rrieequia tib nöz cub ga pxal me par gdziñ ne zaatne yгаа ne guielmban; lëe nöz co ga bzhiäl zeene sca briez lar ne quia len yadoo ga. ²¹ Ni ne me nac zhipxoz nroob ne no me yadoo gbaa, ²² niinasi zacle gdziñ ne haxta lo Dios. Nana sca, dib zdoo ne golgotsaa gbig ne lo Dios, dib zdoo ne golgotsaa gnalo ne me, benque laa me psañmbele ne lo grëtaa ncuaane yozh ne rza zdoo ne, rza guic ne; rrieequia bgaz me ne tib nis mbe. ²³ Tiblique sca golgotsaa gac ne, benque ndion ne ganle ible zdziñ dze ne gac mine rliladz ne; sac Dios psañ diidz co, ni ndion ne rquidied me.

²⁴ Golgotsaa dzioxcö ne cseedlsa ne gleyne ne zha ne nacgrë ne, ni dziuun ne ncuaane yquiiñ lo ne grë ne. ²⁵ Dze ne nacle diidz ycaalsa ne dzioolnie ne Dios, ible none ycaalsa ne grëse ne, guionald ne

mine run grë zha ne rzozit. None cso ne diidz lo grë zha ne nacgrë ne, conley ne zdoo zho dziits so zho lo mine rliladz ne; xco co none dzio ne niina ne laa dze ne guiaad Jesús ziaadgaxle.

²⁶ Zha ne beenbeyle zha nac diidzli, ni lozh ga xtsiinpaä gunctal zho xtol zho, tsodraa gon ne csañmbe zho lo dol co; ²⁷ lëetaa mine tsieguial zho nac guielndöx ne yгаа zho zeene laa Dios gun guielwxtis; dze co laa me cxeel zho lo guidox, zatne nitlo grëraa zha ntseeb ne gocndaan lo me. ²⁸ Gotsaa gwi ne ganle, niicxe ley ne na pcaania Moisés padzeela ga, zha ne rguiits mine rnabeya, ni tel no chop tson zha ne gon ne nliw, niicle mazdraa mban rac zho ib rdedlaad zho rut zho zho. ²⁹ Nana, ¿pe lelgue zha ne dzigo quiits mine rnabey Jesús? Mazdraa gon nac guielne ne yгаа zho, sac noguitnie zho xchen Jesús ga, rzhidznie zho Espiritu Sant ga sca gun zho. Noguitnie zho ren co, ni lëew bzhiee biaanmbe zho lo dol, lëew bzhiee zeene psañ Dios stib xtiidz me zha gbig miech lo me; rzhidznie zho Espiritu Sant, ni men co no zhixco zho. ³⁰ Zha ne sca gun, ible nroob guielne ne yгаа zho; sac ndion ne ganle zha nac xDios ne, me znu rnee: “Naa raguial gun guielwxtis; naa gded mine rieguial tib tib miech.” Ni zhobneeque lo Xtiidz me: “Grëse miech, lo me cueero zho grë ncuaane been zho.” ³¹ ¡Ne nligaa ncuaane gdzieb ne ted grë zha ntseeb ne sca guiab ladznia Dios, men nguiamban!

³² Sangue to, golsoladz ganle zha bded to zeene griinpaä psilo bnalo to Jesús, niicle ne scataa nroob guielne ne gon to, per beenctalde to xtol to. ³³ Blactaa bdziitnie miech to, squi ndxie zha ne nowi laa zho nosacsi to; ni blactagaa gon to nosacsi zho zha ne nacgrë to. ³⁴ Grë zha ne biab ladzguiib, mbanse rac zdoo to ran to zha rac zho; niicle zeene biaad zha ne biaadla grë ncuaane nacchen to, psaan to ptiche zhow, peet güeyniedaque guic to; sac nanle to mazdraa nac guielnzaac ne yгаа to gbaa, ni mincosi gdziñd dze ne nitlow. ³⁵ Nana sca, scaque dziits golso; sac telne tibaque gnalo to Dios, ible zгаа to guielnzaac ne gneedz me. ³⁶ Ible guiaan d zdoo to, tibaque dziits golso golgun mine rnabey me; zeena

ygaa to grë ncuuaane bneelee me gneedz me lo to. ³⁷ Golsoladz ganle, znu zhobnee lo Xtiidz me:

Ible ile ziaad men ne nacle diidz guiaad ga, led nroobdraaw, laa me glansole.

³⁸ Grë zha ne zienal mine nac diidzli, ible zban zho sac rnaló zho naa; laa telne guiaan zdoo zho sozit zho lo naa, ni lalnu gleynd naa zho.

³⁹ Sangué ne gon, nozozite ne lo Dios, sinque dib zdoo ne rnaló ne me. Grë zha ne sca rzozit lo me, nëz ne nitlo zho ga zie zho; laa ne gon, ible zgaa ne tib guielmban ne gdzind dze lozh, sacne znu dib zdoo ne rnaló ne me.

11

Zhapaa nac ne dib zdoo ne gnalo ne Dios

¹ Znu nac ne dib zdoo ne gnalo ne Dios. Zha ne dib zdoo rnaló Dios, tiblique zienie guic zho ne ible zgaa zho mine quiambëz zho gdeed me lo zho; niicle ncuuaane gard gan zhow, per rzac zho zig nac zeene ranle zhow. ² Zig nac grë xmengol ne, ne scacxe waa bnaló zho Dios gane bleynie me zho.

³ Scagaa niina, ne dib zdoo ne rnaló ne Dios, gane rliladz ne me bzaa guidzliu ni grëragaa ncuuaane no, zeene bnabey me biaaw, niicle ne peet guiend hor co.

⁴ Gotsaa gwi ne ganle lëë bla zhagol ne dib zdoo bnaló Dios nu:

Zig nac Abel, ne dib zdoo me bnaló me Dios, gane bleynie Dios gon ne bdeed me, lëdle gon ne bdeed bets me Cain. Ne sca bnaló me Dios, gane pcaania Dios me zig tib zha ne peet xtold, ni pcaania Dios gon ne bdeed me ga; gacxe waa, haxta lo nadze, niicle ne gutle me, bii raquiet ganle pa lotaa dib zdoo me bnaló me Dios.

⁵ Scaque Enoc, ne dib zdoo me bnaló me Dios, gane gute me, zomban me zeynie Dios me gbaa, choot gondraa me. Zeene bii zomban me lo guidzliu, blu Dios ne rdziladz Dios zha mban me. ⁶ Sac zha ne rnalod Dios dib zdoo, grieelod gban zho zigne rdziladz Dios. Zha ne racladz gbig zho lo Dios, none dib zdoo zho gliladz zho ne nli no me, ni gliladz zho ne nli rcaania me zha ne nlipaa rio liaadz rbig lo me.

⁷ Zig nac Noé, ne dib zdoo me bnaló me Dios, gane bliladz me xtiidz Dios zeene rëb

Dios lo me pe nac ncuuaane ziaadyob gac; bin me diidz bzaa me tib barcw nroob, ni len barcw co bio me gza xpëed me ni tsiel me, blaa zho lo guielnë co. Ni ne sca bnaló me Dios, gane ible zgaa me grë mine gdeed Dios lo grë zha ne biaanmbele lo Dios; laa grë zha ntseeb co, ib bnalod zho Dios, gane sca bnitlo zho.

⁸ Zig nac Abraham, ne dib zdoo me bnaló me Dios, gane zeene bredz Dios me ycaania me zaatne gdeed Dios lo me, binga me diidz brieë me zie me, niicle ne nand me zha nac dan co. ⁹ Ni ne sca rnaló me Dios, gane niicle bdziñ me lo liu co, laa me wbanse ga zig tib menzit. Lega nace len grë yu mantiad bio me grop me Isaac, scaquegaa Jacob; sac ye grop zha co biaan diidz nacchen liu co. ¹⁰ Scase bio Abraham ga, sac nanpaa me no tib guiedz ndzon ne bzaa Dios, ni ga nac zaatne gdeed Dios gdziñ me.

¹¹ Scaque Sar, wnaa ne goc tsiel Abraham, ne dib zdoo me bnaló me Dios gane gop me mëed, niicle ne nacd me wnaa ne gap mëed, ni lala gol-le me; laa me gop win, sac zeene rëb Dios lo me laa me yquianie win, dib zdoo me bliladz me ible zun Dios mine bnee me ga. ¹² Ye Abraham, mengol-le me, men ne yquianiedraa mëed nac me, ni zeene laa Sar gop mëed co, miech guizhiu ne brieëquia lo dii co; pale mel ne ndziib gbaa, yuzh ne ndxieгаа ro nisdoo.

¹³ Gza zha ne blozh goquiet nu, gardaque ygaa zho grë mine bnee Dios gdeed me lo zho, laa zho gut; zeene bii zomban zho lo guidzliu rii, dib zdoo zho bnaló zho me gane bliladz zho ne ible zgaa zhow, rzac zho zig nac zeene ranle zhow. Bien zho ne tib ziaadtedse zho lo guidzliu rii, nace zho zig tib menzit. ¹⁴ Ni ne sca bien zho tib ziaadtedse zho lo guidzliu rii, ga rlu ne dzigoraa gdziñ zho zaatne gacpaa ladz zho. ¹⁵ Sac telne niend zho ne scaw, znuse mbire zho ney zho zaatne brieë zho ga. ¹⁶ Tibaque laa guic zho güeynie ne ib zdziñ zho zaatne gacpaa ladz zho gbaa; gacxe waa, rtoladzd Dios ne nac me Dios ne rliladz zho, laa me bzhixcuaale guiedz ne gac ladz zho ga.

¹⁷ Zeene been Dios Abraham prueb dien pe nli rnaló Abraham me, rëb me cogon

Abraham xpëed Abraham Isaac; ne dib zdoos Abraham rnalos me Dios gane niicle tibaque mëed ga lo me, per bleeladz me mëed co, laa me niutle win niac win gon. ¹⁸ Ni laa xtiidz Dios nac ne win gunctal lo xti me! ¹⁹ Laa me niut win, sac nanpaa ne nroob poder ne rap Dios, telne niet win nrieelo mbeeban Dios win; ni nligaa rrieequia gut win ga ni biire brieaban win stib.

²⁰ Niiclegaa Isaac, ne dib zdoos me bnalos me Dios, gane zeene bnab me gunlay Dios grop xpëed me, Jacob ni Esaú, bzeet me zha gac lo xquielmban zho.

²¹ Scaque Jacob, ne dib zdoos me bnalos me Dios, gane niicle laa me nole guet me bnab me gunlay Dios grop xpëedbgui José, bzeet me zha gunlay Dios zho; menqolle nac me, yagale zhoob me per tibaque rleynie me Dios.

²² Scaque José, ne dib zdoos me bnalos me Dios, gane zeene laa me merle guet bzeet me ne ib zdziñ dze grieeg zha Israel Egipt; haxta psañ me diidz güey zho xtsit me zeene laa zho grieeg ga.

²³ Zig nac pxoz Moisés, xniala Moisés, ne dib zdoos me bnalos me Dios, gane bloolan me mëed niow yeen co lidz me tson mëe; ib bdziebd me mine bnabey rey Egipt.

²⁴ Niiclegaa Moisés, ne dib zdoos me bnalos me Dios, gane zeene laa me broob bdeetraa me diidz niunbey zho me zig xpëedmiag rey; ²⁵ laa ne niaan me lidz rey nleynie me grë ncuane niunctal xtol me, mazd bleeladz me me psacsi zho me grë menladz me. ²⁶ Bien me ne nonguielraaw ted me guielnë zig pteed zho Jesús, lëdle niaan me grë ncuane non ne no Egipt; sacne mine mazdraa nonie guic me nac guielnzaac ne gdeed Dios lo me.

²⁷ Ne sca rnalos me Dios, gane bdziebd me xquieldox rey, tiblifique been me guic me brieeg me Egipt; sac nanpaa me niicle rand me Dios, per Dios nacie me. ²⁸ Ne scaque rnalos me Dios, gane bnabey me been zha Israel lni Pascw, ni bnabey me bdiaab xchen carner yeen grëse ro lidz zho, zeena guete xpëed glo zho wdze co.

²⁹ Grë zha Israel co, ne dib zdoos zho bnalos zho Dios gane wbiig lo Nisdoo Nizhnie, bzhal tib nëz mbidz bded zho; laa

zeene gocladz grë xmenquib rey Egipt nded zho, znuse bdzieel lo nisdoo co stib, grëse zho gut. ³⁰ Ne scaque dib zdoos zho bnalos zho Dios, gane bliaal biedz nroob ne ndze igo guiedz Jericó, zeene bza gadz ngbidz noyecw zho igo biedz co.

³¹ Zig nac Rahab, wnaa ro nëz ne bio guiedz Jericó, ne dib zdoos me bnalos me Dios, gane peet gocd me dze ne bnitlo grëse menladz me, sacne bnalod zho Dios; me ga bdeed zaatne blëz zha ne glole pxeel zha Israel güey wleets ga.

³² Ni noragaa zha ne sca dib zdoos me bnalos me Dios, haxta tiemple ygaad gzet naa zho. Zig nac Gedeón, zig nac Barac, Sansón, Jefe, zig nac David, zig nac Samuel, ni grëragaa zha ne biadteed xtiidz Dios lo miech. ³³ Ne sca dib zdoos zho bnalos zho Dios, no zho beenchen grë guiedz nroob, no zho bnabey grë guiedz zigne nonguiela, no zho gonlo grë mine bzeet Dios gdeed me lo zho, no zho role meedz bdedlaa zho; ³⁴ no zho lo beldox bio zho ni peet gocd zho, no zho lo spadle bdedlaa zho, no zho gzhe gzhele rac zho per bdaan zho; no zho biablolle lo dil ni biire pcaa zho fuerz stib, haxta benxoon zho zha zit ne nodilnie zho. ³⁵ Grë men wnaa, no zho gonlo brieaban menlidz zho.

Nzian grë zha ne sca bnalos me Dios, no zho psacsixuu miech zho, per ib bdeete zho diidz niun zho mine racladz miech, mazd bleeladz zho zho beet miech zho; sac nanle zho mazdraa ndzon guielmban ne ygaazho zeene laa zho grieegan. ³⁶ Nogaa zho bgaa beennguzee miech zho, bdiñ zho zho, bzoob zho zho lo caden, ni bloo zho zho ladzguiib; ³⁷ no zho bdeedquie miech zho haxta gut zho, no zho bgaa bloosier miech zho, no zho bgaa gut zho lo spad. Nogaa zho mbanse rac, pquianguzhoon zho lo miech, nëzrii nëzrec zie zho, mbanse rac zho guien pe gow zho, guien xab zho, tib lëse guid mëcwxiil, tib lëse guid chiv nriel zho. ³⁸ Miech wen nac zho, ni rieguiald grë miech guidzliu rii guiaadban zha co lo zho, per scataa bded zho. Niapse grë dan bidz, grë dan gui, bio zho; zaatne blëz zho grë len blë, zaatne blëz zho grë len bliee.

³⁹ Ni golgacnan ganle, niicle nli bianzuii zho lo Dios ne sca dib zdoos zho bnalos zho me, per gardaque ygaazho guielnzaac ne

psan me diidz ga yгаа zho; ⁴⁰ sacne laa Dios racladz tipse ygaanie ne zho guielnzaac ne psanle me diidz gneedz me lo ne niina, sac min co nac mine mazdraa nroob.

12

Choot gbiched lo Jesús

¹ Nziandox grē zha ne sca dib zdoo bnalo Dios. Ni niina, grēse zha co laa zho ndxiewi lo ne; sac rrieequia tib lo prueb no ne noquiaa ne corr. Gacxe waa, golgotsaa csaan grē ncuaane runctal xtol ne, zeena ycadraaw parne grielo tiblque dzio ne nēz gdziñ ne zaatne no gdziñ ne.

² Tibaque golgotsaa guionie guic ne laa ne gdziñ lo Jesús ga, men ne zo lo ne grēse ne ne rnalo ne Dios, ni me lozh gzodziits ne. Tel me gon, niicle ne nroob psacsi miech me, haxta lo cruz pquiaa zho me, per tibaque güeynie guic me nroobraa nac guielbley ne gan me zeene lozh ga. Ncuaane mbeeguieito ga zeene sca quia me lo cruz, per ptoladzd me.

Ni nligaa, zig nac niina cue Dios nēz derech ga zob me gbaa.

³ Golguien sca, zeene racmban zdoo to, zeene racladz guiaan zdoo to, ib gdeete to diidz; golsoladz ganle, zha pxecw Jesús bded me grētaa mine pteed grē miech ngoopdol co me. ⁴ Parga nli, nē noded to noxco to gunctalde to xtol to, per gard guiab ne yгаа to ne gut miech to. ⁵ Golsoladz ganle zha rnee Dios lo grē zha ne nac xpēed me. Znu raquiet lo Xtiidz me, zaatne rnee:

Xin, zeene rso Dios diidz lo luu gundraa luu grē ncuaane nonguield, none sac zdoo luuw;
niicle zeene gactoxгаа me lo luu, gacmband luu.

⁶ Sac gon zha ne sca rso me diidz lo, ga rlu ne rleynie me zho;
zha ne ractoxгаа me lo, ga rlu ne nli xpēed me nac zho.

⁷ Golguien sca, gacmbande to tel pe caxtigw ne cteed Dios to. Golgan ganle, nicixe miech na, ractox zho lo xpēed zho zeene rond win diidz. ⁸ Nana, tel ib peet glisquidгаа me lo to, gase dzigo rlu ne led xpēete me nac to; sac gon, zha ne nac xpēed me, rlisqui me zeene rond zho xtiidz me. ⁹ Golsoladz ganle, zeene rac ne

mēedlas rlisqui pxoz ne zeene rdziuun ne ncuaane nonguield; scagaa ne, rien ne ne me rnabey lo ne. Nana, ¿pe lel Pxoz ne dzigo men ne zob gbaa gnabeyd me ne? Ni none gon dzion ne xtiidz me, zeena yгаа ne guielmban. ¹⁰ Gotsaa gwi ne ganle, zig nac pxoz ne, rquia me rlisqui me zeene rdziuun ne ncuaane nonguield, sac racladz me zaacse gban ne, ni chop tsonaque dze nac lo guielmban rii; sangue Dios gon, laa me noseed ne par gac ne tib miech mbe zdoo, zig me; ni lēe min co nonraa. ¹¹ Parga nli, tsod zha ne gley zeene noded zho caxtigw, sinque nē rzac zhow; per zeene rded ga, zha ne rienpaa rquiina haxta wen riaan zdoo zho, sac rseed zho zaacse rban zho.

Nodne gbiche miech lo Dios

¹² Nana sca, telne bdzagle to, golgun ndip nia to, golgun ndip ni to stib, ¹³ zaacse golsē, tib nēz goltso zeena gziaabnēzde to; dzigo scagaa zrieelo gacnie to zha ne lega noyobe.

¹⁴ Goltsoxco niowse golbannie samiech to, ib gunctalde to xtol to; sac zha ne mbed zdoo, grielod gdziñ zho lo Dios. ¹⁵ Tibaque golteedlolsa zha ne nacgrē to, golguien ganle racladz Dios gacnie me to, napaa na lel nozozit to lo me. Sac zha ne rzozit lo Dios, zeene laa mine nac zho rzhoooben, nzian zdoo zha ne rsan zho, rlozh ga grēse zha co runctal xtol. ¹⁶ Ib gunde to grē ncuaane tsod zdoo Dios, ib quitniede to guielnzaac ne bneedz Dios lo to; gunde to zigne been Esaú, tel Esaú, por tib plat nis scuaan psaan me guielnzaac ne bgaa me ne nac me mēedglo; ¹⁷ ni nanwen to ganle, zeene laa me gocladz nab pxoz me niunlay Dios me zig mēedglo, brieelodraaw. Dzigoraa rquia zdoo me, haxta roon me rnab me yгаа me guielnzaac co stib, per pe xtsiinraaw.

¹⁸ ¡Golguien sca ganle, nroob nac guielnzaac ne bneedz Dios lo to niina! Led yede to ndziñ pa tib cho gui, zig bdziñ xmengol to cho Gui Sinaí padzeela. Grē xmengol to, zeene ndxie zho zhan Gui Sinaí, beldox ne gon zho rso guic gui co, ni goc tib ncow, lala rio bi ratsie nguzi ni rriee me; ¹⁹ ni lala nguiedz rcuedz trompet, ni nguiedz zēeb tsi Dios rnee me lo zho. Zeene gon zho scataa nguiedz rnee me, bdzieb

zho; dzigo bñab zho lo me gneedraa me. ²⁰ Bdzieb zho bin zho rëb me, zha ne tsep cho gui co none gdeedquie zho zho, gliz lanzgaa zho zho haxta guet zho; scaque grë ma. ²¹ Ncuaañe gdziebdoo ne gon zho ga; haxta Moisés rzhidz lo dzeb co.

²² Sañgue to, rriequia haxta Jerusalén, zaatne no Dios nguiamban gbaa bdziñ to, zaatne ndxie grë anj guizhiu ne roolñe Dios; ²³ zaatne ndxie grë zha ne glopaa bzëëb xnëz me, grë zha ne zhooble lë gbaa ga. Laa to bdziñle lo Dios, men ne run guielwxtis; zaatne ndxie grë zha ne psañmbe Dios biaan zho zig tib zha ne peet xtold. ²⁴ Laa to bdziñle lo Jesús, men ne rdzinnie miech lo Dios niina ne laa Dios psañ stib xtiidz me; laa to bdziñle zaatne rriequia bliaal xchen Jesús len yadoo gbaa, lëë ren co mazdraa non lëdle xchen Abel.

²⁵ Min co nagon, golguien golgun miñe rnabey Dios to. Golsoladz ganle, zha bnitlo grë zhagol ne sca ib bind xtiidz me, ni tib miechse pteed xtiidz me lo zho. ¿Pe leñ na dzigo ne mezhal quianee lo ne? Ib diedlaad ne gon telne dziond ne miñe rnabey me. ²⁶ Zeene bnee me lo grë zhagol co, haxta beencxidz me guidzliu, ni rnee me: “Zbire naa guñcxidz naa guidzliu stib, haxta ye gbaa guñcxidz naa.” ²⁷ Gase na ganle rlu, lo grëse ncuaañe bzaa me zdziñ ne laa me csiniw, dzigo laaw nitlo; lozh ga, guiaan miñe gdziñdraa dze nitlo; ²⁸ ni ga nagon gneedz me gbiaaz ne. Gacxe waa, golgotsaa dziuun ne miñe rnabey me, golgotsaa gdeed ne xquizh lo me, guien ne men nroob nac me; ni scagaa me zley me. ²⁹ Golguien ganle, tel me ne nac me Dios ne rliladz ne, nac me zig nac tib beldox ne peet rdedlaad lo.

13

Golban zigne racladz Dios

¹ Bets, bzian, golleynie grë zha ne nacgrë to, golguien ganle tibaque men ne nac Pxoos to. ² Goldeed zaatne cuëz grë menzit ne zo nëz. Blac zha ne sca bdeed lidz blëz zha ne zo nëz, no hor biend zho haxta xanj Dios blëz lidz zho. ³ Goltsiegan grë zha ne nioogyu ladzguib, goltso xliaadz zho zig nac zeene ye to nogrë zho ga. Golgacnie grë

zha ne nosacsi miech, nanle to ganle zha rzac ne zeene no ne tib lo guielñe.

⁴ To ne nac to zha ne ptsieelniale, sacde to guieltsieel zig beelze pe wguet, ib yquidiede to tsieel to; sac zha ne yquiangob tib zha ne nonguield tsonie zho o yquiangobgaa zho tib zha ne nole tsieel, ib tedsod zunquizh Dios zho dol co.

⁵ Tsienalde to loxaque dien zha gunlo to dimi; sinque golley totsaque no miñe yquiin to. Golsoladz ganle, led znu rnee Dios lo ne: “Tibaque gacnie naa to, ib csaand naa to.” ⁶ Gacxe waa, nod pe nacne ctseb zhgab ne, none tibaque dzionie guic ne dzieets ne:

Dios nac men ne nacnie naa, ¿pe nac nadien gdzieeb naa?

¡Peet grielod gun miech naa!

⁷ Golsoladz zha goc men ne bzo lo to pseed to Xtiidz Dios, ni dib zdoos to golnalo Dios zigne bnalo me Dios.

⁸ Golguien ganle, gdziñd dze ne gdzëë Jesús, zigne goc me padzeela, scaque nac me niina, ni scaquegaa gac me grëtaa len iz ne guiaadraa. ⁹ Ib gliladzde to grë wseed ne ziaadnie stib miech sca, wseed ne ni nacdraa Xtiidz Jesús. Diosse nac men ne lozh gzodziits ne lo miñe rliladz ne; nacda por tsienal to dien pe gow to, pegaa gowde to; sac zha ne zienal min co, paat yquinda lo zho. ¹⁰ Grëse zha ne guiab tsienal miñe rnabey ley parne ycaania Dios zho, tib laddle rsan zho miñe been Jesús ga. Rriequia no tib lo pcoog, ni nese zrieelo yquiin gon ne ndziib lo co; laa grë pxoz ne zienal miñe rnabey ley, grielod yquiin zho gon co.

¹¹ Glo, zeene ret ma ne riogon lo Dios, rlozhse rielaal pxoz nroob xchen ma zaatne Ndadoo parne guiooglo lo xtold menguedz, dzigo rienie zho xcuerp ma ro guiedz, ga rzëëg zhow. ¹² Scaque Jesús, zeene bzhiee xchen me psañmbe me miech lo dol; ro guiedz ga güeysacsi zho me gut me. ¹³ Scagaa ne niina, golgotsaa griee ne lo grë ncuaañe lo guidzliu rii, golgotsaa cueeladz ne ne guional ne zhits Jesús dzian ne grë guielñe, telne no dzian new. ¹⁴ Benque ndion ne ganle, nacd lo guidzliu rii zaatne gbiaazpaa ne, sinque laa ne zional ygaa ne zaatne naraa gneedz Dios gbiaaz ne.

¹⁵ Laa ne ndionle ganle, Jesús nac men ne gunctsin ne lo Dios; gacxe waa, golgotsaa gleynie ne Dios, golgotsaa gdeed ne xquizh lo me. Lëë min co gac zig tib gon ne gdeed ne lo me. ¹⁶ Goltsoxco golgun grë ncuaane yquiiin lo samiech to, ncuaane rgaa lo to, goldeed palala lo grë zha ne guiend pe yquiiin; sac rrieequia lëë stib gon ga gdeed to lo Dios, ni mincogaa rleynie me.

¹⁷ Golgon xtiidz zha ne zo lo to noseed to Xtiidz Dios, golguien zha rnabey lo to, sac gon zha quianap to ni zha gdeed cuent lo Dios zha pquianap zho to. None gon to xtiidz zho, zeena ine gley zho yquiaanap zho to; sac gon, telne lel nogoguielnë to zho, lëda ga gun to.

¹⁸ Golnab lo Dios gacnien me no tibaque znu dzioxco no dziuun no mine racladz me, me nan ganle mbe zdoo no, mbe xquielrien no. ¹⁹ Ni mine rsopaa naa diidz lo to, golsoladz golnab lo Dios gneedz me diidz gbiire guialniob naa i, guialgan naa to.

²⁰ Jesús nac men ne quianappaa ne, zig rquianap baxtor xpëcwxiil zho; me gut bzhiee xchen me zeene psan Dios diidz stib zha gdziñ miech lo me; ni diidz cosi gdzindraa dze ne gdzëëw.

Dios men ne bleeban Jesús, men ne racnien miech peet zhgab rtsebd zho, ²¹ me gneedz guielbiini lo to grieelo to gun to mine rnabey me. Jesús sca golnalo, zeena grieelo gban to zigne rdziladz Dios. Dios nac men ne riegual dziuunnon ne, zigtaa niinaw, zigtagaa grëraa len izdoo ne guiaada. Scaw nagon.

²² Bets, bzian, laa naa rnab lo to ib glëed guic to, golcaania palalse diidz ne pso naa lo to nu.

²³ Racladz naa gacnan to ganle, laa bets ne Timoté brielee ladzguiib; telne zlanoniob me lo naa nu, grop no me guiaad lo to i.

²⁴ Golsiguiel goldeed tib zhibdiuzh naa lo grë zha ne zo lo to i, ni lo grëragaa zha ne nacgrë to ngab to lo Dios. Ye grë zha ne no nëz Italia nu, laa zho rxeel zhibdiuzh zho lo to.

²⁵ Guiaannie Dios to sca. Me glu ganle pa lotaa noxco me to.

GUILTS NE PQUIAA SANTIAGW

¡Diuzh to grëse to!

¹ Naa nac Santiagw, tib zha ne quiayun xtsiin Dios, tib zha ne quiayun xtsiin Jesús, men ndzon ne rnabey. Laa naa rquiaabdiuzh to grëse to ne nac to zha ne ziaad lo xti Israel, tel pa lotaa nac guidzliu ne no to.

² Bets, bzian, ndal ncuaane rded ne parne glu dien pe nli dib zdoo ne rnalo ne Dios. Tel pe nactaa ncuaane noded to i, ib gacbande to, sinque golley. ³ Sac gon, zeene squi ran ne gre pe guielne, ga rseed ne tibliladz rac ne tel petaa noded ne.

⁴ Golseed sca tibliladz golgac. ¡ib guiaan zdoo to tel petaa nac guielne ne gan to! Sac zeene sca cseed to gan to guielne, zac to tib zha ne dziits so lo Xtiidz Dios, tib zha ndzinli, tib zha ne ib peet gdziebd.

⁵ Zha ne racladz yгаа guielbiini co, zac gnab zhow lo Dios, ni mesi gon zeed mew; sac guielbiini ne gnabtaa ne lo me zneedz mew. Led yed me yca, led yed me glisqui pe nacne pe gnab ne lo me. ⁶⁻⁸ Lëëraasi dib zdoo ne none gnab new, nodne gacchop guic ne; sac zha ne racchop guic, gdzind dze yгаа zho mine rnab zho. Nac zho, tib dze dib zdoo zho rliladz zho zгаа zho mine rnab zho, stibгаа dze na rliladzdraa zhow, ib ractiblid guic zho; masaque nac zho zig nac gre mtsiin ne rbib lo nisdoo, sac tel mtsiin co loxaque nezrii nezrec zienie mew.

⁹ No zha bets ne, zha bzian ne, quianied zho ncuaane yquiin zho, par mieh peet nond zho; per none gon ine gley zho sac nroob non zho lo Dios. ¹⁰⁻¹¹ Scagaa zha ne rapchen, none ine gley zho niina ne biaanwin zho, sac nez lo Dios gre ncuaane rap zho nonda. None guien zho niicle ne nroob rapchen zho, zeene laa zho gbi lo guidzliu rii nuque guiaan gre ncuaane rap zho. Masaque nacse zho zig nac guieen gre guizh ye, tel guiee cow, zhixtsëese ngbidz rcuidz guizh ne zoba lo, rlozh ga rliaalgaw, gataa rnitlo xquielniowa.

¹² Dichos zha ne ib rzozite lo Dios niicle no nzian ncuaane rcheep zho gunctal zho xtol zho, per rund zhow; sac zha cosi

zгаа zho tib guielmban ne gdzind dze lozh, guielmban ne bneele Dios gdeed me lo grëse zha ne rleynie me. ¹³ Zeene sca no ncuaane rcheep ne gunctal ne xtol ne, guiabd ne togo Dios noquiil ne gun new; sac gon led yed Dios rzoobladz ncuaane ndzinlid, ni niicle rquildгаа me mieh gun zhow. ¹⁴⁻¹⁵ Gre ncuaane ndzinlid ne rzoobladz ne, gre ncuaan yozh ne rionie guic ne, min co nac mine rquiil ne. Lëew nac mine rcheep ne runctal ne xtol ne, ni ndionle ne ganle, lëe gdib mine gdeed dol lo mieh nac guielnedox ne yгаа zho.

¹⁶ Bets, bzian, gac-wete to sca. ¹⁷ Golguien ganle, ncuaane rquiin, ncuaane ndzinli, min co nac mine rneedz Dios. Tibaque nac me, led yed me rdzëe par guiab ne meque rnabey rac guielntseeb. Me nac tib biini ne gdzind dze guiuu, ni tib le guielcow guien zaatne no me. ¹⁸ Zdoo me gola bneedz me tib guielmban ndzon lo ne niina ne laa bliladz Xtiidz me, masaque rrieequia ne nac mëedglo lo me.

Nacda yquiaadiagse mieh Xtiidz Dios

¹⁹ Bets, bzian, ne nac to zha ne rleynie naa: Golgacnan ganle, ne ne nac ne zha ne no xnëz Dios, none dzioxcoraa ne yquiaadiag ne, zeene gnee ne none guien ne pa lotaa gnee ne, ni gund ne ne rnadse pew laa ne glëele. ²⁰ Sac gon, zeene rlëe ne, grieelod gun ne ncuaane rdziladz Dios. ²¹ Golguien sca, golsaan grëtaa ncuaane ndzinlid ne ziyun to, golbiche lo gre guielntseeb ne znu-taa quiayac niina. Ine ndooladz golgac, golleynie Xtiidz Dios, diidz ndzon ne pseedle to; sac gon lëew rlu zha laa to lo dol.

²² Per guiabde to togo loxaque yquiaadiagse to Xtiidz Dios lëelew ga; sinque ib none gban to mine rquiaadiag to, sac tel ib gbande tow lëeque to noquidie to ga. ²³ Sac zha ne rquiaadiag Xtiidz Dios, ni rband zhow, rzac zho zig rzac ne zeene rwi ne lo ne lo quiewan: ²⁴ Sac zeene nowi ne lo quiewan, hor cose ran ne zha rac ne; zeene laa ne rbiche low rsoladzdraa ne zha rac lo ne. ²⁵ Sangue zha ne rquiaadiag Diidz Ndzon ne rlu zha laa mieh ga, ni zigne rquiaadiagse zhow scasaque rioxco zho rban zhow, zha cosi ib zunlay Dios zho lo grëtaa ncuaane gun zho.

²⁶ Gacxe waa, zha ne rnee xnëz Dios no zho ni rgobeyd zho pe rnee zho, lëëque zha noquidie zho ga, ga rlu nlid zianaḷ zho mine rnabey Dios.

²⁷ Sac gon, par Dios men ne nac Pxoz ne, zha ne no xnëz me none tsie zho tsiegun zho xyudar grë mëëdbziab, tsiegun zho xyudar grë wnaa ne ret tsieel, ni tsoxco zho zaacse gban zho, ib tsienald zho ncuaane ndzinlid ne run grëraa miech.

2

Lëda ga run zha ne rbe

¹ Bets, bzian, gunde to ne ncueese lo miech ne gnee to, sac zha ne sca run, zha dien guiab zho xnëz Jesús no zho. ²⁻³ Ron naa, zeene rlanso tib zha ricw zaatne rcaalsa to i, nacw zho xab niazh zho, no grë xnil or zho nia zho, lëëlëd rio to dien pa lo wenraa sob zho; laa zeene rlanso tib zha mban beelze nac xab yeen, rnee to lo zho: “Ise bzo, telne racladzgaa luu sob luu, lo liuse i bzob.” ⁴ ¿Pe sca na rac zha ne no xnëz Jesús? Zha ne gon sca run, ga rlu zho niapse guielntseeb no guic zho.

⁵ Lëda ga gon bets, lëda ga gon bzian. Golgacnaḷ ganle, ible Dios ble miech ne peet rapd lo guidzliu rii, zeena dib zdoo zho gnalo zho me, zeena ygaa zho zaatne bneele me gdeed me cuëz zha ne noxco rleynie me. Gotsaa gwi ne sca ganle, zha ricw nac zho nëz lo Dios; ⁶ laa to gon, no to rlozhd gzhidznie to zho. ¿Pe ib riende to, grë zha ricw co nac zha ne rsacsi to? Rgobniu zho to, riego zho to lo wxtis; ⁷ haxta rdzibdee zho Jesús, men ndzon ne nacie to niina.

⁸ Ib none gban ne zigne rnabey Xley Dios, lo xley me zhobnee: “Bleynie samiech luu, zigne rleynie luu luu.” ⁹ Golguien gon, dol i noyun to squi rbe to dien cho nac zha ricw, chogaa nac zha mban; sac Xley Dios i quiaguiits to. ¹⁰ Golgacnaḷ ganle, zha ne rguiits tibaque xley Dios, niicle maase zianaḷ zho grëraaw, laa zho beenctal-le xtol zho ga, rzacaque zho zig zha ne noguiits grëw. ¹¹ Sac tibaque men ne psana grësew. Gacxe waa, tel zha ne zianaḷ mine rnee: “Gute luu samiech luu”, per rguiits zho mine rnee: “Yquiangobd luu zha ne led tsieeld luu”, laa zho beenctal-le xtol

zho ga. ¹² Niowse sca golgac, niicle zeene gneegaa tow, niowse golnee; sac gon, zdzin dze cxobdol ne dien pe wban ne zigne rnabey Jesús, te wband new ye. ¹³ Grë zha ne ni lalnu rquiad zdoo samiech, gal dze co scaque ni lalnu yquiad zdoo Dios zho; sangue zha ne rquia zdoo samiech, ible zdedlaa zho lo guielnedox ne cxeel me.

Zha ne rnalo Dios none glu zhow

¹⁴ Bets, bzian, ¿pa dien rquiin guiab ne dib zdoo ne rnalo ne Dios, xnëz me no ne, ni tel rund ne xyudar samiech ne? ¿Ni-acxe scase laa Dios csilaale ne? ¹⁵ Gzoob ne no zha ne nacgrë to i, yase tib bets tow, tib bziangaa tow, ranlo to guiend xab zho, niicle quianied zho ncuaane gow zho; ¹⁶ ni guiab to lo zho: “Csacsid luu luu, got xabnal luu, dow ncuaane racladz luu”, per loxaque diidz sca guiab to, ni gdeete to ncuaane run falt lo zho. ¿Pa dien yquiin diidz co? ¹⁷ Scadaa nagon paat rquiinda guiab ne rnalo ne Dios, ni tel rund ne mine rieguial ne gun ne. ¹⁸ Gacxe waa, zha ne rnalo Dios ni run zho mine rieguial zho, no zho gnë lëda i run zha ne rnee lëëlew ga totsaque gnalo ne Dios. Ni rap zho rson, sac grieelod glu ne rnalo ne me, telne rund ne mine rieguial ne.

¹⁹ Nli wena run zha ne rililadz tibaque Dios no, per grieelod guiab zho lëëlew ga, sac gon zig nac mendox ye ma rililadz tibaque Dios no, per led por mincod laa ma lo guielnë ne cxeel me, sinque haxta rdzieb ma me. ²⁰ Nadzpaa nxen zha ne sca rzac, pe ni lalnu riend zho paat rquiinda guiab zho rililadz zho Dios ni telne rund zho mine rieguial zho. ²¹ Golgan ganle, zig nac pxozgol ne Abraham, porne been me mine rieguial me gane pcaania Dios me zig tib zha ne peet xtol. Led rsoladz to ganle, zeene rëb Dios lo me tsielogon me xpëed me, güey me zaatne pxeel Dios me. ²² Gotsaa gwi ne ganle, zeene been Abraham mine bnabey Dios me ga, ga blu ne nli rnalo me Dios, ni hor co mazdraa dib zdoo me bnalo me Dios. ²³ Lo Xtiaz Dios zhobnee ne scataa dib zdoo Abraham bnalo me Dios, gane pcaania Dios me zig tib zha ne peet xtol; zëeb diidz, tib zha ndzieeldiiz Dios goc me.

²⁴ Golgacnan sca ganle, led loxaque gliladzse miech Dios, laa me ycaaniale zho; sinque none glu zho nli rililadz zho me, gun zho mine rnabey me zho. ²⁵ Golsoladz ganle, scaque wnaa ro nēz ne brieelē Rahab, por been me xyudar samiech me, gane pcaania Dios me zig tib zha ne peet xtold; sac zeene gon me noxtseeb zha ne pxeel Josué zie wleets ga, bdeed me zaatne biolan zho, ni blu me stib nēz ne wbire zho, bgaad zho. ²⁶ Gase na ganle rlu, paat rquiinda guiab ne rililadz ne Dios ni tel rund ne mine riegual ne, nacse ne dzigo zig tib xcuerp ngutoo, tel cuerp cow, ŷpa dien yquiina?

3

Ncuaane run ludz miech

¹ Bets, bzian, guiabde to lega tso to glisqui to ncuaane run stib miech, sac tsod zha ne demaste wen lo guidzliu rii. Zha ne sca run, rzac zho zha so cseed zho miech, per gacnan zho ganle zha ne rseed miech, mazdraa nroob ncuaane tsasqui lo zho gal dze ne laa zho gacredz lo Dios.

² Grēse ne nzian mod ne rxin ne lo samiech ne. Tel niaca mine no tib zha ne grieelo ycuēēz ludz pa lotaa gnee zho, zha cosi cxind zho, haxta xcuerp zho zrieelo zho gnabey zhow. ³ Gotsaa gwi ne ganle zig nac guay, con tib lē win guib ne rgo miech ro ma rrieelo rnabey zho ma, rienie zho ma nēz ne racladztaa zho. ⁴ Scaque barcw, niicle ne nrooba, no hor rriee medox lo nis rcheepa, per con tib lē yag lag win ne rsēē miecha, rrieelo rienie zhow nēz ne racladztaa zho. ⁵ Scapaa nagon nac ludz ne; niicle ne winsew, per nroob guielqui ne runa. ¡Ran to ganle tib bzhil yeense name rzobgui dan! ⁶ Ni tel ludz ne gon, rrieequia tib bel ga naca. Tib lē win xcuerp ne naca, per guielqui nroob ne runa, runctala xtold miech. Gun ne cuent tib lē gui ne brieegabil naca; ni dipse lo xquielmban miech noxtseeb zho low.

⁷ Golwi ganle, rrieelo miech runndoo zho grē ma ne rsiibe, grē ma ne rzēlen liu, haxta grē ma ntseeb, haxta grē ma ne no nisdoo, rnabey zho ma. ⁸ Per guiend zha ne gon grieelo gnabey ludz; ncuaane ntseeb naca, choot grieelod gnabeya; masaque laaw no par gnitlow miech, zigne run grē

guizh ncuaan. ⁹ Lēew name rquiin ne roolnie ne Dios men ne nac Pxoz ne, ni rlozh ga lēēquew rdzibdee ne samiech ne, ni lalnu riend ne me bzaa zho, biaan zho zigne rlu me. ¹⁰ ŷPe ga nadien, ro ne roolnie ne Dios, ni roque ne rgodee ne samiech ne?

¹¹ Bets, bzian, led scada gon. Zig nacse tib zhlian, ŷniacxe zaatne rlanaque nis nex gaque rlan nis yuzed? ¹² Tib yag nexgaaw, ŷniacxe rquia xnex yag oliv lo yag guigw, yquiaagaa guigw lo lbē uv? Nanle to ganle racd min co.

Zha ne nixbiini

¹³ Lo grē zha ne nacgrē to i, tel no zha ne rzac zha nixbiini nac zho, none glu zhow ine zaacse gbannie zho samiech zho, gac zho tib miech ndooladz zig none gac tib zha nixbiini. ¹⁴ Per tel tibaque nē rac zdoo zho ran zho zha ne stib noded, tibaque noguib zho csañwin zho samiech zho; gacnan zho ganle, led scad rac zha nixbiini. Ni lalnu rieguald tso zho csañziuu zho zho. ¹⁵ Led scad nac guielbiini ne rdeed Dios, sinque lēē zhiwseed mendox ga, lēē min co zienal grēraa miech guidzliu.

¹⁶ Zeene sca nē rac zdoo miech ran zho cho stib noded, zeene sca tibaque no zho dien zha guianglaa zho lo samiech zho, loxaque dil, loxaque grē guielntseeb rzobni zho ga.

¹⁷ Zha ne nli rap guielbiini ne rdeed Dios, rund zho min co, laa zho zienal:

ndzinlise gban zho,

rleynied zho dil,

rguib zho zaacse rnee zho lo miech,

wen rac zho lo grēse miech,

rquia zdoo zho samiech zho,

rund zho cue zho zha ne mazdraa gacnie

zho,

ncuaane run zho dib zdoo zho run zhow,

niapse ncuaane ndzinli rioxco zho.

¹⁸ Zha ne sca rleynied dil, rioxco zho rnee zho lo miech tipse gac zho, tipse gnee zho; scagaa rdzin dze ne ran zho zeene laa grē miech co rac tib miech wen.

4

Zha ne rleynie guielntseeb

¹ Ne squi tibaque rlēēlsa to, tibaque quiadil to, lēē min qui gon riegat por grē guielntseeb ne rio guic to. ² Rio to riogui to ncuaane grieelod yquianie to, rlozh ga,

haxta rut to samiech to parne yquianie tow. Nē rac zdoo to ran to cho zha quianie ncuane quianiede to, zeene ran to rriee lod yquianie tow laa to rlēenie zho, haxta rdilnie to zho. Rriee lod yquianie to ncuane racladz to, sacne rnabde tow lo Dios. ³ Niicle tel r nabgaa tow lo me, rneedzd mew, sacne laa guic to zienie yquianie tow loxaque par gdeedguxt zdoo to, gdeedguxt xcuerp to.

⁴ ¡Que tal ntseeb to! ¿Pe ib riende to, Dios gon rlēenie to zeene squi rio to rleynie to grē guie_lntseeb? Sac miech ne squitaa rleynie guie_lntseeb, lo Dios ga racntseeb zho. ⁵ Golgan ganle, zha rnee lo Xtiidz Dios: “Espíritu Sant, men ne pxeel Dios nacie ne, rleynie me ne, ni racladz me zhaa ncuane gleynie ne laa ne gleynie ne me.”

⁶ Ni tel Dios gon, noxco me ne, ib zacnie me ne griee ne lo guie_lntseeb; sca rnee lo Xtiidz me, zaatne rnee: “Zacnie_n Dios grē zha ndooladz, sa_ngue grē zha niats, rdziguiend me zho.”

⁷ Golguie_n sca, ine ndooladz golgac, golgon mine rnabey Dios. Gdeetraa to diidz yquiiil mendox to, sca golgun zeena zhal ma gbiche ma lo to. ⁸ Dib zdoo to gol_sēēb xnēz Dios, zeena scagaa me zacnie me to. Goltsoxco guiaanmbe to lo grētaa xtol to, golnab lo me csa_nmbe me zdoo to, mese gnalo to, gacchopdraa guic to. ⁹ ¡Golguie_n ganle, ndzinlid i squi mban to! ¡Mban golgac, goltso guie_lnē, golgoon, laa ne tso to gzhidz to, laa ne tso to gley to! ¹⁰ ¡Ndooladz golgac lo Dios, zeena cuee me to lo grē ncuane nac to, csa_nglaa me to!

¹¹ Bets, bzian, ib gneenēde to zha ne nacgrē to. Zha ne rneenē bets zho, bzian zho, bel zho, ni rdziibdol zho zho, Xley Dios ga rguuits zho. Laa ne so zho gacladz zho zha gun guie_lwxtis, mazd tsoxco zho gban zho zigne rnabey ley. ¹² Golguie_n ganle, Dios psan ley, ni mese riegual gun guie_lwxtis, me nan zho cuibdol, chogaa csilaa me; per to nadien, ¿cho nac to par gdziibdol to samiech to?

¹³ Togaa ne nac to zha ne rnee: “Na gzhe widz dien pa tib guiedz ne guioo ne, guiobi-aaz ne ga tib iz, ga dziuun ne wzi dziuun ne wto, dziuunlo ne dimi”, golquiaadiag mine gne naa lo to ganle. ¹⁴ Ne sca rnee to, ipe

wen wen nan to dien yo to gzhe widz co! ¿Pe rande to lega nacse xquie_lmban ne zigne nac xcow las ne rbe ral sil? Zhisaque rbew, zeene rlozh ga rludraa dien yow. ¹⁵ Mazd golguiab: “Telne zneedz Dios diidz gbanraa ne, min rii, min rii dziuun ne.” ¹⁶ Led tsode tibaque guie_lniats qui zienie guic to, golguie_n guie_lntseeb ga run zha ne rac niats. ¹⁷ Ni gol_soladza ganle: Grēse zha ne nanpaa pe nac ncuane ndzinli ne no gun zho ni rund zhow, xtol zho ga runctal zho.

5

Zha ricw ne zienal guie_lntseeb

¹ ¡Grē zha ne rapchen, zha ne zienal loxaque guie_lntseeb, golquiaadiaga ganle! Golgoon, golquiaadan redz niina, sac gon nroob nac guie_lnē ne gan to. ² Grē ncuane beenlo to i, peet nonda, lega naca zig nac grē ncuane biodzle; grē xab to i, rrieequia ncuane dowle mxila. ³ Grē guiib or, grē guiib plat ne squitaa quianie to, rrieequia noloozhle bioochena; ni scadaa gon nitlo to, masaque gac to zig tib ncuane riab lo gui.

Laa to beenlo grētaa dimi qui, rzac to lēew yquiiin to len dze ne ziaad, ni nande to gon laa dze ne nitlo to ziaadyoble. ⁴ Lēē grē dimi qui gon zēēb to lo grē zha ne quia xtsiin to, noquidie to zho rguizhde to xtse zho. Per golgacnana ganle, grēse redz ne rquiaa zho zeene mban rac zho squi rsacsī to zho, laa Dios binlew. ⁵ Lo grētaa iz ne mban to lo guidzliu rii, loxaque grē ncuane gdeed guxt zdoo to, grē ncuane gdeed guxt xcuerp to noxco to, ncuane yozh ne riaabtaa guic to laa to runa, ib riende to laa dze ne nitlo to ziaadgaxle. ¡Lēē to noyun xcuent ma ne noro par guet ma! ⁶ Pe zhistaa guie_lntseeb ne quiayun to, haxta zha ne peet xtold, zha ne nand glis nia lo miech, rquiaqui to zho ncuane rund zho, rnabey to ret zho.

Nodne guieed zha ne rnal Dios

⁷ Bets, bzian, sa_ngue to gon tiblrique golgac haxta gan to gdziin dze ne laa Jesús guiaad stib, tel petaa run miech to peet tsienied guic to. Golgac zig zha ne ran, tel zha cow, zeene rlozh rlaal zho bni liu, tiblrique rac zho gdipse len mēē guie,

rquiambëz zho haxta rdziñ dze ne rlaap zho. ⁸ Tiblique sca golgac. ÿib guiaand zdo to, sac gon zhile gdziñ dze ne laa men ndzon ne rnabey ne guiaad stib!

⁹ Ib tsođe to guieednie to grë zha ne nacgrë to, zeena gunctalde to xtol to; sac zhile gdziñ dze ne laa men ne no gun guielwxtis guiaad. ¹⁰ Golsoladz ganle, grë zha ne biadteed xtiidz Dios padzeela, niicle nroob guielnë gon zho, per tiblique goc zho. ¹¹ Zig nac Job, nanaxe to ganle zha nactaa guielnë ne gon Job, per ib bieete me, ni blozhse gon me guielnë co nroobraa guielnzaac ne bdeed Dios lo me. Ga rlu ganle, zha ne sca rdeed me diidz ran guielnë, led lega ran zhow; sac nquialadz me miech, rquia zdo me zho. Dichos grë zha ne sca nac.

¹² Bets, bzian, zeene tsiegala glu to diidzli rnee to, tsođe to gzeet to gbaa, gzeetgaa to guidzliu par gliladz miech xtiidz to; guiab to: “Lëpaa gbaa qui”, “lëpaa guidzliu rii”, dien peragaa gzeet to. Tib diidz ne nliw, golguiab: “Nliw”, tib diidz ne nlidgaaw, golguiab: “Nlida”, zeena gunctalde to xtol to; sac gon zha ne runctal xtol, ible zgaa zho guielnë ne csiaab Dios.

¹³ Lo grë to, zha ne no pe tib lo guielnëw, gnab zho lo Dios gacnieñ me zho. Zha ne no pe tib guielbleya, goolnie zho me. ¹⁴ Zha ne rzacnëgaaw, gnabey zho gacredz bla zha ne zo lo to, zha co quëëb nceit guic zho gnab zho lo Dios guiac zho. ¹⁵ Telne dib zdo zha co gnab zhow lo Dios, zunguiac Dios zha rzacnë co. Zlische me zho lo xquielguidz zho, ni tel por pe falt ne beengaa zho lo me sca rzacnë zho, zun me zhow perdon.

¹⁶ Gacxe waa, tib tib to zeene run to pe tib falt, yqueetsde tow, golzodiidza lo zha ne nacgrë to, lozhse ga glnab lo Dios gun me to perdon, zeena guiaanmbe to lo me. Sac tib zha ne biaanwenle nëz lo Dios, zeene sca pe rnab zho lo me run mew, niicle ncuaane mazdraa ngana. ¹⁷ Golsoladz Lí ganle, men ne biadteed xtiidz Dios lo miech padzeela, samiechaque new, per dib zdo me bnalo me Dios. Tib dze bnab me lo Dios csiaabd Dios nisguie, ni scase goca, dipse len tson iz groñ ni tib lab nis guie biabd; ¹⁸ haxta bnabraa me lo Dios guiaba stib, dzigoraab biaba, laa guidzliu biire bdeed guielnzaac.

¹⁹ Bets, bzian, tel cho tib zha ne nacgrë to i sozit lo Xtiidz Dios, ni grieelo cho tib to ct-sire zho nëz yozh ne zie zho ga; ²⁰ golgacnan ganle, ladzniale guielgut ga rsilaa zho zho, grëse xtol zha co zun Dios zhow perdon.

Santiagw

GUITS NE GLO PQUIAA PEDR

Bets, bzian, ¡diuzh to grëse to!

¹ Naa nac Pedr, tib zha ne rxeeł Jesús nonee Xtiidz Ndzon me lo miech. Laa naa rxel tib guits rii ziaad lo to grëse to ne nac to zha Israel, no to stib ladz beñ: zig nac nëz Pont, nëz Galás, nëz Capadós, nëz Asia ni nëz Bitin.

² Dios meñ ne nac Pxoż ne, ible me bzooblo to mazd padzeela, sac nanle me laa to gac xpëed me. Bdziñ dze, zeene laa me pxeel Espiritu Sant bleextso to laa to ngab xnëz me, zeena gban to zigne rnabey me, ni lozh csañmbe Jesús to; sac ible miñ co nacne bzhiie xchen me. Dios glu ganle pa lotaa noxco me to, zeena peet zhgab ctsebde to.

³ Xquizh xquielnzaac Dios, Pxoż Jesús meñ ndzon ne rnabey ne, sac gon pquia zdoo me ne ptsëe me lo xquielmban ne, rrieequia gol ne stib. Xquizh me bleeban me Jesús, sac gon ga rlu ib zgaa ne guielnzaac nroob ne no diidz gneedz me lo ne, ⁴ guielnzaac cosi ncuaane mbe naca, nacda ncuaane nitlo, nacda ncuaane gdzëelo, ni gbaa ga quianie mew.

⁵ Ne squi dib zdoo to rnalo to me niina, gane quianap me to con grëtaa poder ne rap me, parne ygaa to guielnzaac co. Zeene laa dze co gdziñ, zanlo to ganle zeene laa me ycaania to.

⁶ Gacxe waa ine nley golgac. Nli zan to grë pe guielnë, per ncuaane tib rded ga.

⁷ Ib none gan to grë guielnë, parne ga glu dien pe nli dib zdoo to rnalo to Dios. Zig nac guiib or, parne glu dien pe nli ora, none teda lo gui; scaquegaa to, none gan to guielnë parne glu to nli dib zdoo to rnalo to Dios; ni zig nac or, ncuaane rnitlo ga. Grëse zha ne tibaque gnalo me, niicle mazdraa guielnë ne gan zho, gal dze ne guiaad Jesús stib, ine zunnon Jesús zho, sanğlaa me zho, zley me gan me zho, sac blu zho nli dib zdoo zho rnalo zho me. ⁸ Me i squitaa rleyne to, me i squitaa rnalo to, niicle ne gonde to me, niicle ne rande to me. Tib guielbley nrooba lo to, tib guielbley ndzona,

nacda ncuaane grieelo gnee to zha naca; ⁹ sac gon, ne squi dib zdoo to rnalo to me, ib scaania me to.

¹⁰ Grë zha ne biadteed Xtiidz Dios lo miech padzeela, bzeet zho laa Dios glu ganle pa lotaa noxco me ne, laa me csilaa ne lo dol; per ib biend zho dien zhapaa gun me. ¹¹ Zeene bdeed zhiEspiritu Jesús guielbiini lo zho bzeet zho ne ib laa Dios cxeel me, pe nac guielnë ne ted me, ni pe nac guielndzon ne guiaadnie me; gocladz zho niacnan zho dien cho nac meñ co, pa hor gac miñ co. ¹² Nacne blu Dios lo zho gocnan zho nacda ncuaane gac len dze co, sinque haxta nele ygaa dziana. Sangue niina, nanwen to ganle laa grë miñ co gocle, lëe diidz cub co i gocnan to niina, gbaa biet Espiritu Sant bdeed me guielbiini lo zha ne biadneew lo to. ¡Ncuaane ndzona, haxta grë anıl racladz tebaa zha gacnanraa zho dien zha naca!

None gban ne zigne racladz Dios

¹³ Golquix biini xquielrien to sca. Tiblique golgun guic to ne laa to ygaa grëtaa mine ral zdoo Dios gneedz me lo to, zeene laa Jesús guiaad stib. ¹⁴ Zig grë mëed ne ron xtiidz pxoz, sca nguzobdiidz golgac lo Dios; gundraa to grë ncuaan ndzinlid ne been to zeene gard gunbey to me ga. ¹⁵ Goltsoxco golban zigne racladz me, zeena ine mbe guiaan to lo dol; sac gon tel me, meñ mbe nac me, nacd me meñ ne rdziguien dol. ¹⁶ Zigne zhobneeque lo Xtiidz me, zaatne rnee: “None guiaanmbe to lo dol, sac gon meñ mbe nac naa.” ¹⁷ Pxoż to nac me, me rnalo to, nanle to zeene laa me gun guielwxtis, led yed me cue; mine been tib tib miech, zunquish me zhow. Golguien sca, golgon xtiidz me gzataa dze ne gbanse to lo guidzliu rii.

¹⁸ Golsoladz me blee to lo grë wseed ndzinlid ne psan grë xmengol to; nanwen to gozh brieet to ga; per pquiind me ncuaane rnitlo zig nac pe dimi or, pe dimi plat; ¹⁹ sinque laa me pquiin xchen ndzon Jesús. Ren ne bzhiie goc zig tib gon, zigne rgogon miech carner yeen ne mazdraa niow, carner yeen ne mazdraa ndaan parne guiaanwen zho lo Dios. ²⁰ Padzeelale, haxta zeene gard cue guidzliu bzo Dios me

gac me gon co, ni nligaa zeene laa dze co bdziñ laa me biaad, biaadsanwen me to lo Dios; laa Dios been min co sacne rleynie me to. ²¹ Gacxe waa, zrieelo dib zdoo to gnalo to Dios, mese none gliladz to. Me nac men ne bleeban Jesús, blu me ne men non nac Jesús.

²² Ni niina ne laa to mban zigne nac Xtiidz Dios, mine nac diidzli, laa zdoo to biaanmbele lo dol; nasi zrieelo gleynie to zha ne nacgrë to. Dib zdoo to sca golleynie zho, ²³ golguien ganle, tib guielmban cuble rap to niina, rriequia gol to stib; per nacdraaw zigne gol to glo, sinque lëe guielmban qui bgaa to zeene bliladz to Xtiidz Dios, diidz ne rneedz guielmban, diidz ne gdziñd dze nitlo. ²⁴ Zigne zhobneeque low, zaatne rnee:

Grëse ne nac ne miech, zdziñ dze ne lozh ne,

lega nacse ne zig nac grë guizhye, grë xquielndaan ne, lega nacsew zig nac guieen guizh co.

Sac tel guizhyew, zeene laaw rbidz, laa guieena rliaa laque;

²⁵ sangue Xtiidz Dios, gdziñd dze ne nitlow.

Ni lëe diidz co ga gon biadseed zho to, lëew rlu zha laa miech lo grë xtol zho.

2

¹ Nana sca: gundraa to grë guielntseeb, yquidiedraa to samiech to, gundraa to ne laglaase glu to guielwen, gacnëd zdoo to gan to cho zha stib noded, gzhixcuaadraa to diidzguizh.

² Sinque Xtiidz Dios goltsoxco, zeena lozh tso tibli guic to dziits so to low. Zig rzac mëdyeen ne wriin ral, nidzpaar dziladz win guie win; scadaa golsac Xtiidz me, zeena ygaade to grë guielnëdox ne csiaab me. ³ Laa to gonle ganle zha wentaa zdoo me, Xtiidz me sca goltsoxco.

Jesús nac zig tib quie mban

⁴ Golbig lo Jesús, golgan ganle lëe me nac zig tib quie ne rio squin yu, per tib quie mban. Ib bleynied miech me, sangue Dios, men non, men nziuu nac me lo me. ⁵ Golbig lo me sca, zeena ye to gac quie mban ne tsaa xyadoo me. To gac grë pxoz ne nliipaa mbe zdoo, gun to dziin len yadoo co; golban

zigne rdziladz Dios, zeena guielmban co gac zig tib gon ne gdeed to lo me, ne nac to zha ne ngab lo Jesús. ⁶ Zigne zhobneeque lo Xtiidz Dios, zaatne znu rnee:

Men ne bzo naa cxel naa Jerusalén, me gac zig tib quie nroob ne gnaaz dziits xyadoo naa,

ni lëe yadoo co nac grë zha ne ngab lo naa. Men non nac me, ni grëse zha ne gnalo me, ible csaand naa zho.

⁷ Ne nligaa tib men non nac me lo ne, sangue grë zha ne riladz me cholze miech rzoob zho me; zigne zhobneeque lo Xtiidz Dios, zaatne rnee:

Quie ne sca bron zho tib lad zeene quiazaa zho yu,

laaw bron zho sac rzac zho paat rquiinda, ni niina lëepaaw nac quie ne nlibdziits xcox yu.

⁸ Ni ziaad stib zaatne znu rnee:

Quie co griel ni miech, quie co gron zho.

Grëse zha ne nëd gliladz Xtiidz me zaatne rnee cho nac me, scapaa sac zho me, ni ib zhobneeque ne min co ygaa zho.

⁹ Sangue to, lo Diosle ngab to, me ble to, zigne rnee lo Xtiidz me: tole nac zhipxoz me, tole nac zha non ne quiayun xtsiin me; miech ne mbele lo dol nac to lo me, mele rnabey to sac me bredz to laa to briece lo guielcow bzëeb to lo xbiini ndzon me; zeena gnee to lo miech ganle zha nactaa grë ncuaane run me. ¹⁰ Glo peet nonde to, sangue niina non to sac gon lo me ngab to; glo nande to pa lotaa rquia zdoo me to, sangue niina rley to ran to ganle squitaa rquia zdoo me to.

Tibaque golgun mine racladz Dios

¹¹ Bets, bzian, rleynie naa to. Ndion ne ganle, nacse xquielmban ne lo guidzliu rii zig zha ne tibrded stib ladz ben; gane rso naa diidz lo to, ib gzoobladzde to gun to grë ncuaane ndzinlid ne racladz xcuerp to; sac min co rsacsi xalm miech. ¹² Golguien zaacse golgac lo grëraa zha ne gard gunbey Dios; niicle ne gneenë zho to niina, sac zho to zig cho grë zha ntseeb, per zeene gan zho ne ndzinli nac grë ncuaane run to, haxta zleynie zho Dios gal dze ne laa Jesús guiaadgun guielwxtis.

¹³ Golgon xtiidz grëse men ne nac wx-tis lo guidzliu rii, sac sca rdziladz Dios:

zigtaa presidenta, ne nac me zha nonraa, ¹⁴zigtagaa grë zha ne nacie me dziina, sac zha run guielwxtis, rdeed zho caxtigw ne rieguial grë zha ntseeb, ni scagaa runnon zho grë miech ne run ncuaane rquiin. ¹⁵Ible laa Dios racladz zaacse gac to, zeena grë zha nxen, grë zha yozh ne rienð pe rnee, haxta ni ro zho tsod pe gneenë zho to.

¹⁶Gollu ne peet lo ngadoodraa to, per guiabde to ne peet lo ngadoodraa to laa to gun grë ncuaane ndzinlid ne gacladztaa to. Led scada gon, mine racladz Dios min co golgun, gollu mele rnabey to niina.

¹⁷Zaacse golgac lo grë samiech to, golguien cho lo zo to. Golleynie grë zha ne nacgrë to, ndooladz golgac lo Dios, golguien ne men ro nac me; ni scagaa golgon xtiidz grë zha ne nac wxtis nroob.

¹⁸Bets, bzian, to ne nac to zha ne quia xtsiin ben, golgon mine rnabey men ne rree to; tel zhataa nac zho, zigtaa men wena, zigtagaa men ne ntseeba. ¹⁹¡Nley golgac, goldeed xquizh lo Dios, tel porne noyun to mine rnabey me, laa zho rsacsi to! ²⁰Sac gon, telne nosacsi zho to por xquientseeb to, niicle paraa cxecw to paat yquiinda; sangue tel rxecw to nosacsi miech to porne noyun to ncuaane rdziladz Dios, dzigosi zleynie me to. ²¹Golgacnan ganle, ible none ted to min co ne nac to zha ne ngab lo Dios; sac gon, niicxe Jesús, blactaa guielnë ne bded me bdiizh me xtol ne. Glo me sca bded, nana negaa ible none sca dieed ne. ²²Tel me ni tib dol beend me, ni tib miech pquidied me. ²³Niicle zeene blooredz zho lo me, ible ptsired me lo diidz co; niicle zeene quiasacsile zho me, ib gocntseebd me lo zho; sinque grësew psan me ladznia Dios, men co gun guielwxtis zigne no gaca.

²⁴Masaque Jesús bgaadz grëse xtol ne, blactaa psacsi zho me pquia me lo cruz bdiizh mew; laa me been min co, zeena grieelo griee ne ladznia dol, gban ne zigne rdziladz Dios. Ne scataa psacsi zho xcuerp me, ga bi me grëse xquielnë ne. ²⁵Glo lega nac to zig nac grë mëcwxiil ne zonziaab, sangue niina mele quianap to. Me nac tib baxtor ne rleyniepaa to.

Zha gban zha ne ptsieelniale

¹⁻²Bzian, to ne nac to men wnaa ne ptsieelniale, golgon xtiidz tsieel to. Niicle tel nëd zho gliladz zho Xtiidz Dios, per zeene gan zho ne nligaa ndooladz nac to, ine ndzinli rac to, haxta zhal zho laa zho yquiabladz gliladz zhow. Yquiindraa ne goon chopaa yquia gneew lo zho. ³Golguien sca, tsode to ne goon dien pa xixcuaraa to par gluniow to lo miech; dieen pa xixcuaraa guitsguic to, dieen pe bguiaa or ne yquia diag to, dieen pe grë guib or tso yan to, tso nia to, dieen pe lar niazh ne gacwraa to. Tsienalde to grë guielniow co, sac gon ncuaan laglaase ga; ⁴sinque none xixcuua zdo to, gac to tib zha tibliladz, tib zha ne ndooladz. Lëe guielniow co nac mine niowraa nëz lo Dios, ni min co gdzind dze nitlo. ⁵Lëe guielniow co bioxco grë men wnaa ne bi-aadban padzeela, zha ne brieel lo dol wban zho zigne racladz Dios; tel zha, dib zdo zho bnalo zho Dios, ni bin zho xtiidz tsieel zho. ⁶Zig nac Sar, sca goc me, bin me xtiidz tsieel me Abraham, haxta rëb me masaque Abraham nac men ne rnabey me. Ni scagaa to, telne tsoxco to xixcuua to, zac to zig goc Sar, dzigosi laa to gac zig xpëed me; haxta ni tsoxtseebde to pe glisqui tsieel to lo to.

⁷Scaquegaa to bets, ne nac to zha ne ptsieelniale, goltsoxco tsoguc to zha nac tsieel to. Golgan me zigne nonguiela gan to me, golguien ganle nda men wnaa; ni lala, non me lo Dios, sac gon ye me yгаа guielmban ne psan Dios diidz gneedz me lo to. Sca golban, zeena scagaa zeene gnab to lo Dios, squiaadiag me xtiidz to.

⁸Nana sca, tipse golgac grë to. Ine niowse golleynie zha ne nacgrë to, miech wen, miech ndooladz golgac. ⁹Zha ne gacntseeb lo to, gunde to ne yeque to gacntseeb lo zho; zha ne coredzgaa lo to, gunde to ne yeque to coredz lo zho; sinque mazd golnab lo Dios gunlay me zho, zeena scagaa to, zunlay me to; sac gon, ible min co bredz me to. ¹⁰Zigne zhobneeque lo Xtiidz me, zaatne rnee:

Zha ne racladz ine gley zho ne laa zho mban, wen ted zho len ngbidz ne gban zho,

none tsoxco zho ycuëez zho ro zho, gneenëdraa zho, yquidiedraa zho;

¹¹ none csaan zho grëtaa guielntseeb, niapse ncuiaan wen tsoxco zho gun zho, yguib zho cuwen miech, niicle zhagaa wen gac zho lo grëse miech.

¹² Sac grë zha ne sca wen rac nëz lo Dios, tibaque quianap me zho, ni rquiaadiag me xtiidz zho tel pe r nab zho lo me; sangue grë zha ntseeb, ni lalnu rdziguiend me ncuane run zho.

Dichos zha ne mban rded lo samiech

¹³ Golguien sca, ncuane yquiin golgun; scagaa tsod pe nacne ctsidil miech to. ¹⁴ Laa telne ncuane yquiinaquegaa noyun to, ni laa miech rtsidil to, ¡dichos to ga! Ib gdziebde to grë miech guidzliu, niicle peraa gnë zho gun zho to. ¹⁵ Tibliladz golgac, tibaque golgunnon Jesús men nroob ne rnabey ne, tibaque golconie Xtiidz Dios guic to, zeena nanle to pe guiab to lo zha ne gnabdiidz dien zha nacne rnalto to Jesús; ine niowse golgac, diidz ndooladz golnee lo zho.

¹⁶ Zaacse sca golban, zeena grë zha ne rneenë to porne nac to zha ne no xnëz Jesús, zdziñ tib dze ne ctoladz zho, zeene guien zho lega bnexuu zho to. ¹⁷ Wen zie zha ne ran guielnë, telne Dios rnabey gan zhow zeene noyun zho ncuaan wen; ledle gan zhow por xquielntseeb zho.

¹⁸ Golgan ganle niicxe Jesús, zha nactaa grë guielnë ne gon me. Niicle ne ni tib dol beend me, per haxta beet miech me bdiizh me grëse xtol ne nac ne miech ntseeb, psanwen me ne lo Dios. Nli gut xcuerp me, per zhiespíritu me gutew; ¹⁹ gane güeyted me zaatne niogyu zhiespíritu grë zha ne wban padzeela, güeynee me lo zho. ²⁰ Lëe grë zha co ib bzhiguield nliladz Xtiidz Dios, niicle ne dipse len dze ne nozaa Noé barcw nroob co pquiambëz Dios niac-wen zho. Nanlaxe to ganle, xonaque nac zha ne bd- edlaa lo nis co. ²¹ (Lega rriequia goc nis co zig nis ne rrobnis ne. Zeene rrobnis ne, ga rlu ne laa ne briele ladznia dol, ygaadraa ne guielnëdox ne tsieguial zha ngoopdol, sac gon por mincopaa gut Jesús ni brieaban me; ni guiabd ne togo nis co r sanmbe ne

lo xtol ne, sinque ga rxobnen ne ne laa ne rnab lo Dios ctsëe me lo xquielmban ne.)

²² Sangue niina gbaa ga no Jesús, ga zob me cue Dios nëz derech, grëse anjl non, grëse zha non ne no gbaa, rquiitgzhiz zho lo me ni run zho mine rnabey me zho.

4

¹ Golguien ganle, zha nactaa grë guielnë ne bded Jesús bdiizh me xtol ne; nana sca, scaque to gdziebde to golcueladz to gan to guielnë. Ib rquiin guielnë, sac zha ne no tib lo guielnë, rioguid zho grë ncuane gunctal xtol zho, ² zëeb rguib zho gban zho zigne racladz Dios. ³ Grëtaa ncuane ndzinlid ne run grëraa miech, golguiaanladza. Golguiaanladz zeene scataa ptsieelsa to zho, bzud to, lega dowcho, lega gocho to nziu, haxta bionie to zha ne nacd tsieel to; bio to lo grë lni, bleyne to grë mdio.

⁴ Grë zha co, rien naa rlëe zho ran zho rtsieelsadraa to zho lo grë ncuane ndzinlid co, gane haxta rneenë zho to. ⁵ Per golsaan zho, benque zha quizha zeene gacredz zho lo men ne guiaadgun guielwxtis, gal dze ne gdeed me mine tsieguial tib tib miech, zigtaa zha mbana, zigtagaa zha ne gutlew. ⁶ Sac niicle zha ne gutlew, no zho gocnanpaa zho zha nac Xtiidz Dios zeene bzomban zho. Ible rquiinpaa Xtiidz me, sac zha ne rquiaadiaga, niicle ne zetaque zho, per nëz lo Dios mban zhiespíritu zho.

Golgacnie zha ne nacgrë to

⁷ Zhile gdziñ gdze ne laa grë ncuane rac lo guidzliu rii nitlo; golquix biini zaacse golban, tibaque golzodiidznie Dios. ⁸ Ine golleynie grë zha ne nacgrë to, sac zeene nlipaa rleyne ne samiech ne, tel pe falt ne guntaa zho zrieelo cteed new zdoe ne. ⁹ Zha ne guiaad lidz to, goldeed zaatne cuëz zho; ine golcuëzlo zho, guieedniede to zho.

¹⁰ Tib tib to bneedzse Dios tib guielbiini lo to. ¡Golquiina sca, golgunlsa xyudar zha ne nacgrë to! Ib ga rquiin guielbiini co bneedz mew lo to.

¹¹ Zha ne rseed miech Xtiidz Dios, none gnee zhow zigne racladz me. Zha ne runгаа pe stib xtsiin Dios, ib yquiad zdoe zho none gun zhow dib nacse guielndaan ne rdeed Dios lo zho. Ncuane guntaa

to, goltsienie guic to ne laaw gun to par csañnon to lë Dios. Ga glu ne xtsiin Jesús quiayun to, men ndzon ne rnabey, men ne gdziñd dze gdzëë. Sca rieguiala.

¹² Bets, bzian, ne nligaa rleyne naa to. Golsoladz sca, tel pe guielnëtaa gan to porne no to xnëz Jesús, peet tsienied guic to, sac ib scale no gaca. ¹³ Mazd ine golley; sac gon ye Jesús sca gon guielnë, ni scagaa nroob guielbley ne tso to gal dze ne glu ganle zha nactaa guielndzon ne rap me. ¹⁴ Zeene rgodee miech to, rquiaago zho to loxaque ne no to xnëz Jesús, nley golgac; wen zie to ga, sac gon zhiEspíritu Dios nacie to.

¹⁵ Guieltow sca csacsi miech to, telne bgaa to laa to beet, laa to wban, laa to bzëëb lo cuent ne rieguialdraa to, pe stib guielntseeb ne noyunragaa to. ¹⁶ Sangue telne rsacsi zho to loxaque ne no to xnëz Jesús, led guieltod ga. Laa ne ctoladz to, igoldeed xquizh lo Dios, sac gon tib guielnzaac nroob bgaa to ngab to lo me! ¹⁷ Golgacnan ganle, grëse ne ne nac ne zha ne ngab lo Dios, len dze rii laa ne csilo dzian guielnë. Nana, telne ye zha ne ngab lo me ted guielnë, ¿zha naczhe mine ted grëraa zha ne nëd gliladz Xtiidz me, gal dze ne laa me gun guielwxtis? ¹⁸ Zigne zhobneeque lo Xtiidz me, zaatne rnee: “Niicle zha ne wenle nëz lo Dios, nroobaque nac guielnë ne ran zho haxta gdziñ dze ne ycaania me zho, ¿pe lelgue grë zha ne dzigo racntseeb lo me?” ¹⁹ Gacxe nagon waa, niicle tel pe nactaa guielnë ne gnabey Dios ted to, tibaque golban zigne rnabey me, golsan xquielmban to ladznia me; sac gon me nac men ne rneedz xquielmban to, ni mesi ib csaand me to.

5

Golgon xtiidz zha ne rnabey lo to

¹ Laa niina nagon, laa naa cso choplan diidz lo to, ne nac to zha ne rnabey lo grë zha ne no xnëz Jesús. Ye naa, dziin co nac naa, naa nac tib zha ne gonpaa zha psacsi zho Jesús, ni nanpaa naa zgaa naa lo guielndzon ne no me, zaatne rnabey me, gal dze ne laa me guiaad.

² Rso naa diidz lo to gon, zaacse golquianap grë zha ne bgaa to noquianap to. Dib zdoo to golgun dziin qui, sac sca

racladz Dios, ib tsienied guic to guiab to dien zha lega cob to dimi lo zho. ³ Gunde to ne gnabey to zho zig cho xmoz to, sinque zaacse golgac lo zho, zeena lo to cseed zho zaacse gban zho. ⁴ Scagaa, zeene laa men nroob ne quianap ne guiaad, zgaa to lo guielndzon ne gneedz me, lugar co gac tib premio ne gdziñd dze lozh lo to.

⁵ To ne nac to zha nguieg, golgon xtiidz grë zha ne zo rnabey lo to. Tib tib to, golgon xtiidz zha ne nacgrë to, sac gon: “Grë zha niats, rdziguiend Dios zho, sangue grë zha ndooladz, racniën me zho.” ⁶ Telne guiaanwin to lo men ro ne nac Dios, ine ndooladz gac to lo me, scagaa me zunnon me to zeene laa dze co gdziñ. ⁷ Tel pe nactaa grë zhizhgab to, grë xliaadz to, ladznia me golsana, sac gon me quianap to, noxco me to.

⁸ iNsin golso lo mendox, sac gon tibaque quiana ma gnitlo ma ne! Masaque rac ma zig rac grë meedz ne rgobeedz quiaguib ma ne gow. ⁹ Dziits golso gdeete to diidz yquuil ma to. Tibaque dib zdoo to golnalo Dios. Nanle to ganle dipse lo guidzliu, zha ne notaa xnëz me, scaque quiaded zho. ¹⁰ Tel pe nactaa guielnë ne noyan to, ible csaand Dios to sacne rleynedox me to, zeene laa dze co gza, hor co laa me gzhixcuaaraa lo xquielmban to, gzodziits me to, guntibli me guic to. Me nac men ne bredz ne ygaa ne lo guielndzon ne no me grop me Jesús, guielndzon ne gdziñd dze nitlo. ¹¹ Mese nac men ne rnabey grëtaa ncuaane no, ni gdziñd dze ne gdzëë me. Nligaa sca nac me.

¹² Laa naa rxel guits rii lo bets ne Silas, ziaadnie mew lo to, bets ne rne naa me, sac nligaa dib zdoo me rleyne me Dios. Mine rne naa lo to lo guits rii, laaw rne naa sac racladz naa guien to ganle pa lotaa noxco Dios to, pa lotaa rleyne me to; zeena tiblrique gac to gbichede to lo me.

¹³ Grëse zha ne rliladz Jesús Babiloin nu, zha ne bzooblo Dios gac xpëëd me zigne bzoobloque me to, laa zho rxee bdiuzh lo to; scaque Marcw, men ne rzaac naa nu zig tib xpëëd naa, ye me laa me rquiaabdiuzh to. ¹⁴ Laa naa rnab lo to, golquiaabdiuzh grëse zha ne nacgrë to, ine golxen nia zho.

Dios gacniēn to peet zhgab ctsebde to,
nac to zha ne no xnēz Jesús.
Pedr

BROP GUITS NE PQUIAA PEDR

Bets, bzian, jdiuzh to grëse to!

¹ Naa nac Simón Pedr, tib ngundziin win ne pxeel Jesús nonee Xtiidz Ndzon me lo miech. Laa naa rquia guits rii rxel naa lo to, ne nac to zha ne squitaa ndzonse dib zdoo rnalo men nroob ne zob gbaa, zigne rnaloque no me. Xquizh Jesús men ne rsilaa miech, men ne nac Dios ne rliladz ne, sac gon me gocniën to squi rnalo to me niina; sac mesi mine nonguiel gac, min co run me.

² Zigse zie dze, goltsoxco lozh gunbey to zha nac Dios, zha nac Jesús men ne rnabey ne, zeena scagaa zig zie dze zunlayraa me to, zacniënraa me to, parne peet zhgab ctsebde to. ³ Sac zeene gunbey to zha nacraa me, con grëtaa poder ne rap me, zneedz me guielbiini lo to parne tibaque gban to zigne racladz me, tibaque gleynie to me. jGotsaa gwi ne ganle zha nactaa ncuaane ro, ncuaane gzee zdoo ne been me parne gbig ne lo me! ⁴ Ni psan me diidz pe nac grë ncuaane ndzon ne gneedz me lo ne. Psan me diidz, ib laa me cuee ne lo grëtaa guilyozh ne rac lo guidzliu rii, parne gac ne tib miech mbe zigne nac me.

⁵⁻⁷ Nli laa to rnalole Dios, per parne yгаа to min co, none tsoxco to:
zaacse golban,
goltsoxco guien to zha nac Dios,
golseed gnabey to xcuerp to,
guieete to,
tibaque goltsoxco golgun mine racladz Dios,
ine niowse golbannie grë zha ne nacgrë to,
golsac zho zig tib menlidz to;
golleynie samiech to.

⁸ Nana, telne tsoxco to znu gban to, dzigosi mazdraa tsoguc to mine racladz Dios, dzigosi zlu run to mine rnabey Jesús men ndzon ne rnabey ne, led loxaque runbeydse to me. ⁹ Sac zha ne tsoxcoda, rriequia rchool lo zho ga, rriequia rcowle guic zho ga, sac gon rsoladz zho zha nactaa lo grë dol ne blee Dios zho.

¹⁰ Bets, bzian, golguien sca, niina ne laa Dios bzooblote to, laa me bredzle to ngab to

lo me, goltsoxco sca golban, parne guiabde to lo dol stib. ¹¹ Niicle par gdzingaa to zaatne rnabey Jesús, men ne psilaa ne lo dol, men ne rnabey ne, tsod pe yca lo to, ine nzhal nëz zaatne ted to gdzin to ga.

¹² Nli nanle to grë mine rne naa nu, nli dziitsle zo to lo Xtiidz Dios, per ib none guncsoladz naa tow. ¹³⁻¹⁴ Laa Jesús men ndzon ne rnabey ne, blule lo naa zhile gdzin dze ne laa naa gbi lo guidzliu rii, gane niina laga bii mban naa rgobey naa ible nonguiela znu cso naa diidz lo to; ¹⁵ zeena niicle wbile naa lo guidzliuw, tibaque csoladz tow.

Gonpaa Pedr Jesús

¹⁶ Grëse mine bnee no lo to zeene pseed no to zha nactaa poder ne rap Jesús, ni zha guiaad me stib, guiabde to togo bod guicse no biaba. Led scada gon, tel naa grop lo naa gon naa xquielndzon me ¹⁷⁻¹⁸ guic gui ne scataa pxobnen Dios ne men non, men ro nac me. Binpaa naa zëeb tsi Dios gbaa hor co, në me: “Lëë Xpëed naa i gon, rleynie naa me, nziuu me lo naa.”

¹⁹ Ga nagon rlu ne diidzli nac grë mine bzeet grë zha ne biadteed Xtiidz Dios lo miech padzeela; gacxe waa, zig nac to ible nonguiel guien to zha naca. Masaque lëew quaziini lo to niina, zig rziini tib biini guieel, haxta riini liu zeene laa Mel Ngol rlan; ni lëë Mel Ngol co nac Jesús. ²⁰ Per scagaa, racladz naa gacnan to ganle, grielod ne lega tel zha guiaabtaa guic miech, guiab zho sca nac mine bzeet zha ne biadteed Xtiidz Dios, ²¹ sac gon tel zha co, bneed zho ncuaane biaabtaa guic zho; sinque laa zho bnee mine bnabey Dios psiaab Espiritu Sant guic zho.

2

Zha ne rquidie (Judas 4-13)

¹ Grë zha ne biadteed Xtiidz Dios padzeela, mine bnabey me zho min co bnee zho; per briequiaque zha ne pquidie rëb zho Dios pxeel zho, ni nlida. Ni scaquegaa niina, grë zha ne rseed to, zriequia zha ne yquidie lad co. Dzega dzega csilo zho glu zho grë zhiwseed yozh zho, ib gunbeydraa zho men ndzon ne

rnabey ne, men ne psilaa zho lo xtol zho; per nand zho zha nactaa guielnedox ne ygaa zho, tibaque zeene guien zho laa zho nole lo caxtigw co.

² Ndal miech ne grieequia tsienal gre ncuuan yozh ne gun zho, niapse por zha laa greraa miech csilo gneenë Xtiidz Dios. ³ Zha yozha, laa zho tsienal loxaque dien zha gunlo zho dimi, zguib zho yquidie zho to gdeed to dimi lo zho. Per ib tedsod zguizh zho min co, sac bzeetle Dios ganle zha nactaa lo guielnedox ne ygaa zho; ⁴ sac Diossi gon, mine run gre zha ntseeb, csand mew scase. Golgan ganle, niicxe gre anjl ne sca been falt lo me, gondzed me zho, bleegazh me zho gbaa, bnabey me bioogyu zho tib lo ncowdoo, ga nioogyu zho nieeda gal dze ne laa me gunquizh zho mine been zho. ⁵ Padzeela zeene wban Noé, gre miech ntseeb ne bnéd nion xtiidz me niicle ne bneepaa Noé lo zho, scaque gondzed me zho, psiaab me tib guiedox bnitlo zho grese zho; loxaque Noé ni zgadz menlidz Noé psilaa me lo nis co; sac wban Noé zigne racladz me. ⁶ Scaque len dze ne wban Lot, bdziguiend me gre miech yozh ne bio guiedz Sodom ni guiedz Gomorr, blaal me gui grop guiedz co, bnitlo me zho grese zho, xquidiese biaan. Laa me been min co, zeena ga gan greraa zha ntseeb ganle pe nac mine tsieguial zho telne csaand zho xquielntseeb zho. ⁷⁻⁸ Lotse psilaa me, sac bioxco Lot mine rnabey me. Gapaa no Lot, ranpaa me zha run gre miech co; haxta mban rac zdoo me, ran me gzataa dze loxaque gre guielyozh noyun zho. ⁹ Gase na ganle rlu ib rsaand Dios zha ne rnalopaa me, rsaand me guiab zho lo dol; ni scagaa gre zha ne rsaand guielntseeb, ib tedsod zho lo guielnedox ne cteed me zho gal dze ne laa me gun guielwxtis.

¹⁰ iZig nac zha ne guiaadquidie to ga, mincopaa ygaa zho! Ni lalnu gandzed Dios zho; sac gon, laa zho zienal loxaque gre guielyozh ne gdeed guxt xcuerp zho. Miech nad, miech niats nac zho, rzhidznie zho mine rnabey Dios, ni lalnu dzeb guien lo zho rdzibdee zho gre men non ne no gbaa. ¹¹ Per ni gre anjl, niicle ne zha nroob nac anjl, niicle ne rap anjl poder, per

rdzin anjl lo Dios gdzibdee anjl zho. ¹² Per zha, lo xquielyozh zho ga, haxta ncuane rien zho zha nac, rdzibdee zho. Lëédaa gre ma nac zho, tel ma laa ma ralse par ygaa ma nitlo ma; guien draa xquielrien zho, ncuane racladzta zho run zho. Per zdzin dze ne nitlo zho, zigne rnitlodaque gre ma, ¹³ por grëta guielntseeb, grëta guielyozh ne squitaa rley zho run zho haxta zobna ngbidz.

Miech mbixladza, miech ngubeeguie tow, rquiaalose zho miech wen nac zho zeene riaadsobnie zho to lo zhilni to. ¹⁴ Wnaa ne gantaa zho, pe na gzoobladz zho tsonie zho wnaa co, tibaque quiayunctal zho xtol zho. Rio zho rquuil zho gre zha ne gard sodziits lo Xtiidz Dios; rienle zho zha gla zho ncuane rquiin lo zho. Miech ndziibdeele nac zho, ¹⁵ sac laa zho psaanle xnëz Dios, nëz ne nitlole zho no zho; lëë zho run xcuent Balam, xpëed men ne lë Beor. Tel Balam, haxta mine nonguieldraa been me par gun me gan dimi; ¹⁶ per bdzin tib dze zeene laa Dios blisqui lo me grëta ncuane quiayun me ga. (Bnabey Dios lëëque xpurr Balam bnee, dzigora a bien Balam psaan me xquielyozh me ga.)

¹⁷ Masaque nac zho zig nac gre bzie ne bidzle nis, zig nacgaa xcow bidz ne nëzrii nëzrec zienie me; ni lalnu paat rquiind zho. iLaa zho nole guey zho lo guielcowdoo ne rieguial zho, zaatne gdzindraa dze griee zho!

¹⁸ Niats rzë xtiidz zho, per ncuane paat rquiind rnee zho. Mine mazdraa mban run zho, rio zho lëëque lo gre guielyozh ne rdeed guxt xcuerp zho rquuil zho gre zha ne pense brie lo dol, rlozh ga rbiire riab zha co lo gre dol co stib. ¹⁹ Rnee zho zac tel zhataa gban ne, nodne gnabey xley Dios ne. Rzac zho na choot rnabeyd zho, ni rien zho dol quianabey lo zho; sac grese zha ne gacdraa csaan tel pe gre guielyozh ne run zho, lëële gre ncuane co rnabey lo zho. ²⁰ Tib zha ne sca briele lo grëta ncuane ndzinlid ne no lo guidzliu rii (porne bliladz zho Jesús, men ndzon ne rnabey, men ne rsilaa miech lo dol), ni gbiireque zho gdeed zho diidz guiab zho low gnabeya zho, mban gon tsie zho; sac dzigole mazdraa mban guiaan zho. ²¹ Lëda

ga gon, telne gocnanle zho zha racladz Dios gban zho, ni lozh ga csan zho xtiidz me tib lad, gbiire zho tso zho lo grë ncuaan yozh ne been zho glo. Nroobdox caxtigw ne gan zha co, mazd zhi mine ygaa zha ne gocnan zha nac xtiidz me. ²² Zha copaa nagon run mine rnee diidz ne znu rëb: “Nandraaque mëcw, ncuaane bdzible ma rbiire ma row maw”; ni stib mine znu rnee: “Ngutzhe, rlozhle raz ma nis mbe, ni rlozh ga rie-gaaque ma lo nis beñ.”

3

¿Zha nacne gard guiaad Jesús?

¹ Bets, bzian, golgan ganle lëele guits rii raca chop zixel naa. Gropse low, rso naa diidz lo to tsoxco to zaacse gban to, ine niini gac guic to. ² Golsoladz ganle, zha nac grëse mine bnee grë zha ne biadteed xtiidz Dios padzeela; golsoladz zha nac grë mine rnabey Jesús, mine biadseed no to. (Jesús, men ndzon ne rnabey ne, men ne psilaa ne lo grëtaa xtol ne.)

³ Racladz naa gacnan to ganle, len dze ne ziaadyob guiaad Jesús, zrieequia zha ne gzhidznie xtiidz me, csilo zho gun zho grëtaa guilyozh ne gzoobladz zho; ⁴ guiab zho: “iPe gliladz ne nazho guiaad Jesús! Telne nli rëb me laa me guiaad, ¿yo me na? Grë xmen gol ne, zha ne scataa pquiambëz me, laa zho gutle, ¿cho na zho guiaad? Znutaque nac lo guidzliu wlal ne brew.”

⁵⁻⁶ Squiaalo zho rsoladzd zho zha bnitlolle guidzliu tib vuelte, ni zhagaa nitlo mine no niina. Wen wen nan zho ganle zha bnabey Dios biala guidzliu, me bnabey brieew lo nis, ni masaque lo nis now; mincocxe waa nis bnitlow glo. ⁷ Scaque, nacle xtiidz Dios, zigtaa gbaaw, zigtaa guidzliu ne no niinaw, laaw nitlo, per lo guile nitlow; ni lo gui co nagon ygaa grëse zha ne run guielntseeb ted zho caxtigw.

⁸⁻⁹ Zha ne rzac quiayaanladz Jesús diidz ne psan me ga, per led quiayaanladz mew; sinque laa me quiambëz tebaa grëse miech gac-wen lo me. Laa me racladz, grëse zho csaan xquielntseeb zho, zeena ni tib zho nitlod. Bets, bzian, nanle to ganle led yed me ngab xtse. Sac tel me, ncuaane gun ne tib milraa iz, tib dzeque gun mew; nroob rzac

ne tib mil iz, per par me rzacse mew, lal ne rzac ne tib dze. ¹⁰ Ib laa me no guiaad, per choot nan dien pa horpaa guiaad me; laa me guiaad zig rzëebse tib ngbaan yu, tibaque zeene gan miech laa me ziaadle. Grëse ncuaane no, hor co laaw lozh; bidox ne gdzieb ne tso zeene laa gbaa nitlo; grë mel ne ndziib gbaa, masaque gazbel ma; haxta guidzliu, dib nacsew laaw tsec.

¹¹ Scataa nagon nitlo guidzliu rii, ni grëraa ncuaane rdzian ne niina, igolguien sca golban zigne racladz men ndzon ne rnabey ne, gunctaldras to xtol to! ¹² Tibaque golconie guic to ne ib laa me no guiaad; tibaque ndzinli golban, gollu ne quiambëz to gdziinniob dze ne sca gazbel grë ncuaane ran ne gbaa, dze ne sca tib guiaalse grë ncuaane niaaw. ¹³ Horco nagon laa ne dzian tib gbaa cub, laa ne dzian tib guidzliu cub ne psanle me diidz ygaa ne; zaatne tsodraa guielntseeb.

¹⁴ Bets, bzian, nligaa goltsoxco ndzinli golban, gunctalde to xtol to; niowse golbannie samiech to, zeena gal dze ne laa Jesús guiaad, ine gleyne me to gan me mban to zigne racladz me. ¹⁵ Golsoladz ganle, porne quiambëz me gbig grëraa miech lo me csilaa me zho lo dol, min co gane gard guiaad me.

Ye bets ne Pabl, men ne nziuu lo ne, lo grë guielbiini ne rdeed Dios lo me rquiaa me grë guits ne zixeel me, zineele me lo to grë mine none naa nu. ¹⁶ Parga nli no mine rnee me ga, ngan guien ne zha naca; grë zha ne rdziinpaa racladz ctsëe Xtiidz Dios, zeene laa zho rneew, laa zho rneew zigne racladz zho; zigne runaque zho grëraa mine zhobnee lo Xtiidz Dios. Zha ne sca run, lëëque zha noguib nitlo zho ga.

¹⁷ Laa naa rzet grë min rii lo to nu, zeena nsin so to, ib gdeete to diidz cho grë zha ntseeb ne sca nac guiaadquidie to, yquuil zho to csaan to mine nac diidzli, csaan to nëz ne ziele to i. ¹⁸ Goltsoxco zig zie dze guienraa to pa lotaa rleyne Dios to, ni guienraa to cho nac Jesús, men ndzon ne rnabey ne, men ne psilaa ne lo dol.

Me nac men non, me nac men nziuu, ible me riegual gunnon miech, zigtaa niinaw, zigtagaa grë izdoo ne ziaadraaw. Sca rieguala.

Pedr

GUILTS NE GLO PQUIAA JUAN

¡Diuzh to!

Laa naa gzodiidznie to ganle cho nac Jesús.

¹ Jesús nac Diidz Ndzon ne rdeed guielmban. Notaque me, nole me zeene bre guidzliu. Bdziñ dze biaad me lo guidzliu; grop diag no bdzion no grē miñe bnee me, grop lo no bdzion no grē miñe been me; sac bdzionpaa no zha rac me, zha rnee me, haxta bzhiēen no nia me. ² Ni niina laa no quianee lo miech ganle cho nac me; golgacnañ ganle, me rneedz tib guielmban ne gdziñd dze lozh. Zaatne no Dios meñ ne nac Pxoze, ga no me; zeene biaad me lo guidzliu dzigo bdziuuñbey no me. ³ Gacxe waa, miñe rnee no lo to led lega rneed now; nozhal bdziona, nozhal bdziona. Laaw rnee no lo to, zeena tipse gac ne grē ne, gacnie to no zigne nacie Dios no (meñ ne nac Pxoze), zigne nacie Jesús no, meñ ne nac Xpēēd me. ⁴ Laa naa rnee grē miñ rii lo to lo guits ne rxel naa nu, zeena zigne nonley zdoo no scaquegaa to tsonley zdoo to.

⁵ Znu nac miñe bdzion no pseed Jesús miech, rēb me: Nac Dios zig nac tib biini, ni tib lē guielcow guieñd zaatne no me; laa grē dol, masaque naca zig nac guielcow. Ni miñcoque gon rnee no lo to. ⁶ Gacxe waa, telne rnee ne naciele ne me, ni rlozh ga tibaque lo guielcow co no ne, rquidie ne ga dzigo. ⁷ Telne nlipaa mban ne lo xbiini me, zigne mban Jesús lo biini co, dzigosi haxta tipse nac ne grē ne; ni scagaa, xchen Jesús nac miñe csañmbe ne lo grētaa xtol ne.

⁸ Nana tel guiab ne: Tel naa ib peet dol rapd naa. Lēēque ne noquidie ne ga, rneelid ne ga zha nac ne. ⁹ Sañgue telne cxobdol ne grēse xtol ne lo Dios, ible tedsod silaa me ne lo grētaa dol co, sañmbe me ne lo grētaa guieñtseeb ne zidziuuñ ne; sac ible laa Jesús gut par csañmbe me ne. ¹⁰ Telne sca guiab ne rapd ne dol, rrieequia dzigo rzoob ne Dios zig tib meñ ne rquidie; sac tel me, nañpaa me grēse ne miech ngoopdol nac ne.

2

¹ Xin yeena, laa naa rso diidz lo to: Gunctaldraa to xtol to; telne nandgaa new cho tib to zha been pe tib dol, golsoladz ganle no tib meñ ne quianab lo Dios meñ ne nac Pxoze ne yquia zdoo me ne, lēē meñ co nac Jesús, lo me golbig (tel me ni tib dol rapd me). ² Sac me bded grētaa guieñe ne rioguañ ne ndieed ne por grētaa xtol ne, psañwen me ne lo Dios; me goc zig tib gon ne pcaania Dios gozh grēse xtol ne, ni xtol grēraa miech ne ndxie dibdoose lo guidzliu.

Golleynie samiech to

³ Golgona ganle: Telne run ne grēse miñe rnabey Dios, gase rien ne ne nli xnēz me no ne. ⁴ Laa tel zha ne rnee: “Xnēz me no naa”, ni rlozh ga rund zho grē miñe rnabey me, rquidie zho ga. ⁵ Sac zha ne nli rleynie Dios, rioxco zho rban zho zigne nac xtiidz me; ni tel ne, ndion ne ganle nli xnēz me no ne. ⁶ Gacxe nagon waa, zha ne rnee xnēz me no zho, ib none zaacse gban zho, zigne wban Jesús zeene biaad me lo guidzliu.

⁷ Bets, bzian, golgacnañ ganle, none gleynie to samiech to. Guiabde to togo ncub miñe rne naa lo to nu gun to, laa naa rzet miñe binle to glo zeene psilo pquiadiaag to Xtiidz Dios. Niicle ne padzeelale zhobneew, niicle ne pquiadiaagle tow, ⁸ per rrieequia ncuba niina; sac gon zeene biaad Jesús, me blu ganle zha none gleynie ne samiech ne. Ni scagaa niina ne laa to zienala, laa to noriee lo guielcow ne no to glo, laa to nozēēb nēz lo xbiini Dios.

⁹ Ga nagon, tel zha ne rnee lo biini co mban zho ni rlēēnie zho samiech zho, rquidie zho ga; bii lo guielcow ga mban zho. ¹⁰ Zha ne rleynie samiech, zha cosi nli lo biini co mban zho, noxtseebd lega tsobe zho, sac rañpaa zho pa lo zie zho; ¹¹ sañgue zha ne rlēēnie samiech, lo guielcow ga no zho. Masaque nac zho zig zha ne rold lo, niicle zha rien dien pa nēz tsie zho, sac guielcow co quiantse lo zho.

¹² Xin yeena, laa naa rne grē miñ rii lo to, sac gon, tel to laa Jesús bdiizhle tel pe nactaa grē xtol to. ¹³ To ne nac to dad, laa naa rxel diidz rii lo to, porne nac to zha ne rliladzle Jesús, nanle to ganle notaque me, nole me zeene bre guidzliu. Togaa ne nac

to zha nguieg, laaw rxel naa lo to, sacne nli-gaa dziits zo to, rriee lodraa mendox yquuil ma to. To ne nac to mēēd las, xin yeēna laa naa rxel diidz rii lo to, porne nac to zha ne nole xnēz Dios men ne nac Pxoze.

¹⁴ Nana sca, zigtaa tow ne nac to dad ne runbeyle Dios; zigtagaa tow ne nac to zha nguieg, ne nataa ndip ndaan to laa to pcaaniale Xtiidz Dios dib zdoo to, ne nac to zha ne lēbdraa mendox yquuil, ¹⁵ golguien, gleyniede to grē ncuane rap to, gleyniede to grē ncuane ndzinlid ne rac lo guidzliu rii. Zha ne rleyne grē ncuane co, nlid rleyne zho Dios men ne nac Pxoze; ¹⁶ sac grēse ncuane rac lo guidzliu rii (zig nac zha ne ziana ncuane gdeedguxt xcuerp, zha ne rzoobladz yquianie ncuane rdziladztaa, zha ne racniats lo samiech), grēse ncuane co led Diosd rnabeya, sinque lēē mine rzona grēraa miech lo guidzliu ga. ¹⁷ Ni na tel zig nac guidzliu, zig zie dze laaw quialozh grēw grē ncuane rleyne miech low; sangue zha ne mban zigne rnabey Dios, laa zho bgaale tib guielmban ne gdzind dze lozh.

Zha ne rlēēnie Jesús

¹⁸ Xin yeēna, zhile gdzind dze ne laa guidzliu nitlo. Led binle to ganle ib zrieequia tib zha ne glēēnie zhiwseed Jesús, ni nligaa niina len dze rii ndal-le zaatne norieequia grē zha ne rsilo quiatsidil Xtiidz me; gane ndion no ne laa dze co ziaadgaxle. ¹⁹ Nli ladaque zha ne nacgrē ne brie grē zha co, per nlid naciepaa zho ne; sac tel niaca mine nlipaa nacie zho ne, nrieextsod zho. Ga nagon blu zho ne nlid nacgrē zho ne.

²⁰ Sangue to, nacde to zig nac grē zha co, sac nacie Espiritu Sant to, bneedz me guielbiini lo to runbey to mine nac diidzli. ²¹ Guits ne rxel naa lo to nu, nacda par cseed naa to mine nac diidzli, sac runbeyle tow ni haxta rien to pa min nac guielwquidie; sinque laaw ziaad lo to par gacan to ganle zha nac zha ne noquidie i.

²² Grē zha ne rnee i nlid lēē Men ne zēēble diidz cxeel Dios lo guidzliu ga nac Jesús, noquidie zho miech ga. Ni zha ne sca run, rlēēnie zho me ga; ni ne sca rliladz zho cho nac me, yele Pxoze me ga rliladz zho.

²³ Sac zha ne rlēēnie men ne nac Xpēēd

Dios, ga rlu ne nlid rliladz zho cho nac Dios; sangue zha ne rxobnen cho nac Xpēēd me, zha cosi nli rliladz zho cho nac me. ²⁴ Laa naa rso diidz lo to sca: Goltsienal grē mine pseed to zeēne glopaa psilo bliladz to Xtiidz Dios, zeēna zigtaa Dios, zigtagaa Xpēēd mew, tibaque gbannie to me. ²⁵ Golsoladz ganle, laa Jesús psanle diidz ne ib zгаа ne tib guielmban ne gdzind dze lozh; lēē guielmban co yгаа grēse zha ne nacie me.

²⁶ Laa naa rzet min rii lo to, sac ne squi no grē zha ne ziaad racladz yquidie to. ²⁷ Sangue to laa Jesús pxeelle Espiritu Sant nacie to, rquiind ne goon chora cseed to; sac Espiritu Santzhal rneedz guielbiini lo to rien to zha nac grēraa ncuane no gacan to, ni mesi gon mine nac diidzli min co rseed me to, led yed me rquidie. Golguien sca, Jesús golbannie, golbannie me zigne noseed Espiritu Sant to.

Zha ne nac xpēēd Dios

²⁸ Xin yeēna, nanle to sca sozite to lo Jesús, sinque tibaque golgacie me; zeēna ine tibliladz gac to gal dze ne laa me guiaad. Sac zha ne sozit lo me gban zho zigne gacladztaa zho, zeēne laa me guiaad mban gac zho; sac guielto ne guiane zho lo me. ²⁹ Nanle to ganle, mesi zigne rieguial gac guielwxtis sca run mew; gacxe waa, grēse zha ne nac xpēēd me ible zdeed me mine rieguial zho.

3

¹ Golwi ganle pa lotaa rleyne Dios ne, laa me rneedz diidz laa ne gac mēēd lo me. ¡Ni nligaa tel ne, xpēēdle me nac ne! Grēraa miech rliladz zhow, sacne runbeyd zho cho nac me.

² Bets, bzian, ne nligaa xpēēdle Dios nac ne. Nli ndiond ne niina dien zha glu ne gal dze ne laa Jesús guiaad, per mine ndionpaa ne, zeēne gal dze co laa ne gac zigne nacpaa me; ni dzigosi laa ne dzian me grop lo ne.

³ Ni grēse zha ne zienie guic yгаа guielnzaac co, tibaque rioxco zho zig zie dze nosaan zho ncuane runctal xtol zho, sac tel Jesús randzed me dol.

⁴ Grē zha ne runctal xtol, xley Dios ga rguiits zho, sac grēse dol ne runtaa miech ga rlu ganle ne rond zho mine rnabey me.

⁵ Per nanle to ganle, laa Jesús baaad lo guidzliu, baaadsilaa me miech lo grëtaa xtol zho; ni mesi ni tib dol rapd me. ⁶ Gacxe waa, zha ne nlipaa nacie me, ziana draa zho ncuane gunctal xtol zho; laa grë zha ne tibaque noyunctal xtol, gase rlu ne gard guien zho cho nac me, gard gunbey zho me.

⁷ Xin yeena, ib gliladzde to mine rnee zha ne racladz guiaadquidie to. Golgan ganle, zha ne mban zigne rdziladz Dios, lëe zha co nli mbe zdo, zigne men mbe nac Dios; ⁸ sangue grë zha ne tibaque quiayunctal xtol, xnëz mendox ga ngab zho; sac tel mendox, desde padzeela tibaque guientseeb quiayun ma. Ni min co nagon nacie baaadpaa Xpëed Dios lo guidzliu, baaadnitlo me grëtaa ncuane run ma. ⁹ Zha ne nac xpëed Dios, rdeetraa zho didz gunctal zho xtol zho, sacne laa guic zho zienie gban zho zigne racladz Espiritu Sant, men ne nacie zho; rienle zho nodne gunctal zho xtol zho, sac laa zho nacle xpëed Dios.

¹⁰ Nienpaa cho nac xpëed Dios, chogaa nac xpëed mendox, sac grëse zha ne run guientseeb, grëse zha ne rleynied samiech, led xpëete Dios nac zho; ¹¹ sac gon, desde dze ne psilo bliladz to Xtiidz Dios, bingazh to ib none gleynie ne samiech ne. ¹² Zig nac Caín, xnëz mendox ngab Caín, gane beet me bets me loxaque ne ndzinli mban bets me, laa me niapse guientseeb run me. Ib gunde to mine been Caín. ¹³ Gacxe waa, bets, bzian, zeene gan to laa grëraa miech rlëenie to, ib tsoode to zhgab guiab to pe nacie sca run zho. ¹⁴ Sangue ne rleynie ne samiech ne, gane ndion ne noxtseebdraa ne guioo ne gabil, laa ne bgaale tib guientseeb ndzon ne gdzindraa dze lozh; sac zha ne rleynied samiech, nëz ne nitlo zho ga zie zho. ¹⁵ Grë zha ne sca rlëenie samiech, rriequia rut zho ga, ni nanle to ganle zha ne rut samiech, gard yгаа zho guientseeb ndzon ne gdzind dze lozh ga. ¹⁶ Ndion ne zha gleynie ne samiech ne, sac Jesús zhal blu zhaw zeene sca bleeladz me me gut me bdiizh me xtol ne. Gacxe waa, zha ne nlipaa rleynie samiech, none cueeladz zho zho, cueeladz zho ncuane rap zho, gacnie zho samiech zho. ¹⁷ Gzoob ne, tib zha ne rnee xnëz Dios no zho, nroob rapchen

zho, ranlo zho rcaalsad pe yquuin tib zha ne nacgrë zho, per ib rdeete zho palal pe yquuin zha co. ¿Niacxe na nli rleynie zha co samiech zho ga? ¹⁸ Xin yeena, golgan sca ganle, led loxaque diidzde, led loxaque laglaadse gnee ne rleynie ne samiech ne; sinque none glu ne nli rleynie ne zho.

¹⁹ Sca nagon none dziuun ne, dzigo niicle new ndionpaa ne nli xnëz Dios no ne, ni scagaa tsod pe nacie pe dzeb tsonie zdo ne zeene laa ne gbig lo me. ²⁰ Tel zha ne rdzieb zdo, sac rien zho noyund zho mine rnabey Dios, ib tedsod zlisqui Diosa lo zho; sac tel me grësew nan me. ²¹ Xin yeena, laa zha ne desde zdo zho nan zho noguiitsd zho mine rnabey me, scagaa tibliladzse gbig zho lo me; ²² hor cosi ncuane gnabtaa zho lo me squiaadiag mew, sacne mban zho zigne rnabey me, ni noxco zho noyun zho ncuane rdziladz me. ²³ Ni lëe min rii rnabey me: Grëse miech, none dib zdo zho gliladz zho Jesús men ne nac Xpëed me, ni gleynie zho samiech zho zigne psanle me diidz ga. ²⁴ Grë zha ne ron diidz run min co, ga rlu ne nlipaa mbannie zho me, ni scagaa me mbannie me zho. Ni ndion ne ganle, ib nli mbannie me ne, sac pxeel me Espiritu Sant nacie ne.

4

¹ Bets, bzian, zha ne gnë zhiEspiritu Dios nacie zho, goon ye zho quianee Xtiidz me lo miech; ib gunde to ne lëelëd gliladz to xtiidz zho, sinque golwigazh dien pe nli zhiEspiritu Dios nacie zho. Sac ndal grë zha ne quianzë lo guidzliu, rquidie zho rnee zho Xtiidz Dios noteed zho. ² Parne guien to dien pe nli zhiEspiritu Dios nacie zho, golwi dien zha rzac zho Jesús: Tel zha ne rliladz ne nli zig tib miech goc me baaad me lo guidzliu, ga rlu ne nli zhiEspiritu Dios nacie zho. ³ Laa tel rliladz zho ne nli sca baaad me, nlid dzigo zhiEspiritu Dios nacie zho; sinque lëele espiritu ne rtsidil Jesús ga nacie zho. Laa to binle ganle ib laa espiritu co guiaad; ni lëele espiritu ntseeb co nacie grë zha ne squi quianzë lo guidzliu niina.

⁴ Xin yeena, sangue to xnëzle Dios ngab to, yquidiedraa zha co to, sac gon mazdraa nroob poder rap men ne nacie to, lëdle

espíritu ne nacie grē zha ne sca zianl grē wseed yozh ne no lo guidzliu. ⁵ Grē zha co, ncuaane rac lo guidzliu rii nonie guic zho; gacxe waa, niapse lēew rnee zho, ni gagaa grēque zha ne rleyne grē ncuaan co, zha co rliladz zhiwseed zho. ⁶ Sangue ne xnēz Dios no ne. Ni scagaa zha ne runbey Dios, zha co rquiaadiag miñe rnee ne; laa grē zha ne runbeyd me, rquiaadiagd zhow. Gase na ganle rlu cho zha nacie zhiEspíritu Dios, ni cho zhagaa nacie espíritu ne ziaadquidie miech.

Rleyne Dios miech

⁷ Bets, bzian, golgotsaa gleyne ne samiech ne, sac gon, tel Dios grēse ne rleyne me ne. Gacxe waa, zha ne rlu nli rleyne zho samiech zho, gase rlu ne nli xpēed Dios nac zho, nli runbey zho me. ⁸ Laa grē zha ne rleynied samiech, runbeyd zho Dios ga gane sca run zho; sac gon ib Dios rneedz guielbiini lo ne gleyne ne samiech ne. ⁹ Gotsaa gwi ne ganle, pa lotaa rleyne me ne: Tibpaa Xpēed me, ni pxeel me me biaadtizh me xtol ne, zeena ygaa ne tib guielmban ndzon ne gdzind dze lozh. ¹⁰ Led guiabd ne togo glo miech bleynie Dios gane rleyne me zho niina; led scada, sinque ible zdoo me gola rleyne me ne. Ne nligaa gotsaa gwi ne ganle zha pxeel me Xpēed me, goc me zig tib gon ne gozh grēse xtol ne. Ga nagon rlu pa lotaa rleyne Dios ne.

¹¹ Bets, bzian, zigne scataa rleyne Dios ne, scaquegaa ne nagon none gleyne ne samiech ne. ¹² Gard tso tib zha ne gan Dios, per zha ne rleyne samiech, me ga nacie zho; ni zigse zie dze dib zdooraa zho rleyne zho samiech zho.

¹³ Me nac men ne pxeel zhiEspíritu me nacie no, parne glu nacie me no, ni scagaa no nacie no me. ¹⁴ Ni stiba, grop lo no bdzion no biaad Xpēed me biaadsilaa me miech lo dol; ni miñ co nonee no lo miech niina. ¹⁵ Grēse zha ne rliladz Xpēed Dios nac Jesús, ni rnee zhow lo miech, ga rlu ne nacie Dios zho, ni scagaa zha nacie zho me.

¹⁶ Ndion ne ganle nli rleyniedox Dios ne, sac rienpaa ne rleyne me ne, ni rliladz ne zeene rnee me pa lotaa rleyne me ne. Ible niaa me par gleyne me, me rdeed

guielbiini lo miech gleyne zho samiech zho, zigne rleyne me zho; gacxe waa, zha ne rleyne samiech, ga rlu nacie zho Dios, ni scagaa me nacie me zho. ¹⁷ Zig nac ne, niina ne laa ne naciele Jesús, zig zie dze laa ne lozh cseed gleyne ne me, ni gleyne ne samiech ne zigne racladz me; ni scagaa tsod pe nacie ctoladz ne, pe nacie gdzieb ne gdziñ dze ne laa me gun xquielwxtis me; sinque haxta gley ne dzian ne me gal dze co. ¹⁸ Nod pe nacie gdzieb ne me, sac gon ndion ne pa lotaa rleyne me ne. Led yedraa niina pe dzeb ne dzio ne, sac grēse dzeb rbiche zeene rien ne rleyne me ne. Zha ne rdzieb, zienie guic zho pe nac grē guielnē ne gan zho, ga rlu zho gard guien zho ne rleyne me zho, ni gardgaa guien zho gleyne zho me.

¹⁹ Gotsaa guien sca ganle, nli laa ne rleyne Dios, laa ne rleyne samiech ne, per glo me blu ganle pa lotaa rleyne me ne. ²⁰ Tel zha ne rnee, rleyne zho Dios, ni rlozh ga rlēenie zho samiech zho, rquidie zho ga. Sac gon, tel nand zho gleyne zho samiech zho, zha ne ranlopaa zho, ¿pe lel Dios dzigo gliladz ne nli rleyne zho, ni nac me men ne rand zho? ²¹ Sac gon, znu nac xtiidz Jesús: Zha ne rleyne Dios, zigne rleyne zho me, scaque none gleyne zho samiech zho. Ni miñ rii rnabey me dziuun ne.

5

Zac csaan ne ncuaane runctal xtol ne

¹⁻² Grēse zha ne dib zdoo rliladz ne ible lēe Men ne zēeble diidz cxeel Dios lo guidzliu ga nac Jesús, grēse zha co xpēed Dios nac zho.

Grēse zha co, par guien ne dien pe nli rleyne ne zho, none guien ne dien pe nli rleyne ne Dios, dien pe nli run ne miñe rnabey me. Nac cuent rii, zig nac tib yu miech, zha ne rleyne pxoz mēed, scaquegaa rleyne zho mēed. ³ Sac zeene rleyne ne Dios, zun ne grēse miñe rnabey me. Ni grē miñe rnabey Dios, nacda ncuaane guiab ne grieelod gun ne; ⁴ sac grēse zha ne nacle xpēed Dios, totsaque rnalo zho ne Jesús gun xyudar zho, gac-wetraade zho lo grē ncuaane gunctal xtol zho. ⁵ Golgacnan sca: zha ne dib zdoo rliladz Xpēed Dios nac

Jesús, zrieelo zho csaan zho grëtaa ncuaane runctal xtol zho.

⁶ Tel ne, ndion ne ni rliladz ne ganle nli Xpëed Dios nac Jesús, sac zeene biaad me horne norobnis me, horne nolozh me, ga blu ganle cho nac me. Ni ye Espíritu Sant nolu ganle ne scaw, ni mine rnee me diidzliw.

⁷⁻⁸ Gotsaa gwi sca ganle, tson mod rlu cho nac Jesús: Tiba por mine nolu Espíritu Sant, stiba por mine blu zeene norobnis me, ni stiba por mine blu zeene nolozh me. Zigtaa mine nolu Espíritu Santa, zigtaa zeene brobnis mew, zigtagaa zeene nolozh mew, blu ganle Xpëed Dios nac me. ⁹ Mine rnee Dios, none gliladz new. Xtiidz samiech ne name rliladz ne, ¿pe lel mine rnee Dios dzigo gliladz ne? ¹⁰ Zha ne gliladz mine rnee Dios, rriequia rzoob zho me ga zig tib zha ne rquidie; sangue zha ne gliladz mine rnee me, zien zho ganle nli Xpëed me nac Jesús. ¹¹ Laa me bneele ganle: zha ne gnalo Xpëed me, zgaa zho tib guielmban ndzon ne gdziñd dze lozh; sac Xpëedse me rdeed guielmban co. ¹² Gacxe waa, zha ne rnalo Xpëed me, laa zho bgaale guielmban ndzon co; sangue zha ne rnalod Xpëed me, gard yгаа zhow.

Bgaale to guielmban ne gdziñd dze lozh

¹³ To ne nac to zha ne rnalole Xpëed Dios, laa naa rzet min rii lo to zeena gacnan to ganle laa to bgaale guielmban ne gdziñdraa dze lozh ga. ¹⁴ Ni scagaa, ndionpaa ne rquiaadiag Dios xtiidz ne, zeene ncuaane rio zdoo me rnab ne lo me; ¹⁵ ni zigne ndion ne rquiaadiag me xtiidz ne, scaquegaa none gliladz ne ib zneedz me ncuaane rnab ne.

¹⁶ Zig nac zeene gan to cho tib zha ne nacgré to been pe tib dol, ni rlu nacda dol ne gnitlo zho, zac gnab to lo Dios gun me zho perdon; ni gacnan to ganle, ible zun me zho perdon. Sac gon no dol ne rnitlo, ni zha ne gun dol co, nodne gnab to lo Dios gun me zho perdon. ¹⁷ Nli grëse guielntseeb dol naca, per no mine rnitlod miech. ¹⁸ Ni ndion ne ganle, zha ne nacle xpëed Dios rundraa zho ne lega gunctal zho xtol zho; sac Jesús men ne nac Xpëed Dios,

men co quianap zho, grieelodraa lega pe gun mendox zho.

¹⁹ Zig nac ne, ndionpaa ne xnëz Dios no ne. Nli ndalraa zha ne zienal ncuaane rnabey mendox, ²⁰ sangue ne, laa Xpëed Dios biaad bdixbiini me xquielrien ne bdziuunbey ne men ne nacpaa Dios. Niinasi laa ne ngable lo men ne nacpaa Dios ga, ni lëe me ga nac Jesús. Me nac Dios nguiamban, ni me nac men ne rdeed guielmban ndzon ne gdziñd dze lozh.

²¹ Xin yeena, golguien Diosse nac men ne gleynie to; gunde to ne lel grë ncuaane no lo guidzliu rii gleynie to, laa ne gleynie to Dios.

Juan

BROP GUITTS NE PQUIAA JUAN

¡Diuzh to grëse to!

¹ Laa tib zhagol rii rxeel tib guits rii ziaad lo to i, ne nac to zha ne no xnëz Jesús. Dios bzooblo to, bredz me to ne laa to ngab xnëz me.

Ne nlipaa rleynie naa to gon, ni led naad-segaa, sinque ye grëraa zha ne runbey diidzli ne nac Xtiidz Dios. ² Rleynie no to sacne tibaque nac diidzli ne riladz ne, ni tsod dze ne csaan new.

³ Dios ni Jesús men ne nac Xpëed me, me glu ganle pa lotaa noxco me to, zeena peet tsienied guic to, ni yquia zdo me to; ni zunpaa mew, sac rleyniedox me to.

⁴ Ne nlipaa gon bleydoo naa zeene gon naa nzian zha ne nocaania Xtiidz Dios i, noxco zho mban zho zigne nacpaa diidzli; zigne rnabey Dios men ne nac Pxoze ne.

⁵ Bets, bzian, laa naa rnab lo to, golgotsaa gleynie ne samiech ne. Guiabd ne togo ncub mine rne naa lo to nu gun to; sac gon, lëequew ga bdzion ne zeene psilo bliladz ne Xtiidz Dios. ⁶ Telne nli rleynie ne Dios, dzigo none gban ne zigne rnabey me; gacxe waa, none niowse gban ne, in gleynie ne samiech ne, sac gon min co rnabey me.

⁷ Ndal zha ne quianzë lo guidzliu nina, noquidie zho miech, rnee zho nlid goc Jesús zig tib miech zeene biaad me lo guidzliu. Nsin golso lo zho, sac gon notsidil zho mine nac diidzli ga, rlëenie zho Jesús ga sca run zho. ⁸ Golguien, ib gdeete to diidz guiaadquidie zho to, zeena dziin ne quiayun to i gacda zhlëse. Goltsoxco tiblque golgac, zeena ygaa to grëtaa guielnzaac ne no gneedz Dios lo to.

⁹ Sac gon, zha ne csaan mine nacpaa zhiwseed Jesús, led xnëzdraa Dios ga no zho; ni scagaa, zha ne zienalpaaw zigne naca, zha cosi xnëz Dios ga, xnëz Xpëed me Jesús ga no zho. ¹⁰ Gacxe waa, zha ne guiaad lo to i ni tel ziaadnied zho wseed ne nacpaa Xtiidz Jesús, ycaaniade to zho. Ib gdeete to lidz to cuëz zho, ib tsode to gnee to pe diidz ne csaanziiu to zho; ¹¹ sac telne sca gun

to, rrieequia yele to rleynie grë zhiwseed yozh zho ga.

¹² Ndal grë ncuaane no gne naa lo to, per racladzd naa gzet naaw lo guits rii. Laa guic naa no guialgan naa to i, dzigo mazd hor co naazhal gnew lo to; zeena nroob guielbley ne dzio ne grë ne.

¹³ Grë zha rii, zha ne bzooblo Dios bredz me zigne bredzaque me to bzëeb to xnëz me, laa zho rxeel bdiuzh lo to grëse to.

Juan

BION GUITTS NE PQUIAA JUAN

¡Diuzh bets!

¹ Laa zha gol rii, pquiaa tib guits rii ziaad lo luu i gon Gay, ne nac luu tib zha ne nziuu lo naa.

² Bets, rnab naa lo Dios zigne squi wen mban luu nēz lo me, scaque zaacse grieequia grētaa ncuaane gun luu, ni gneedz me guielndaan lo luu. ³ Ne nlipaa bley naa, zeene biaad bla zha bets ne nu, bzodiidz zho lo naa squitaa ndzinli mban luu, tibaque noxco luu zienal luu mine nac diidzli. ⁴ Ne nligaa, nodraa pe stib conley zdoonaa zigne rleytaa naa zeene ron naa ine niowse mban grē zha ne biane naa xtiidz Dios lo, zienal zho mine nac diidzli.

⁵ Bets, ziyon naa squitaa tibaque noxco luu run luu xyudar grē zha ne nacgrē ne, ni mazdraa zeene nac zho zha ne ziaad stib guiedz. ¡Wen ga! ⁶ Squi ndxie grēraa zha ne rliladz Jesús, rzodiidz zho squitaa nquialadz luu zho. Bzhiguiel sca, bioxco tibaque squi been xyudar zho zeena griee lo gdziñ zho zaatne no tsie zho. Sca rdziladz Dios. ⁷ Sac gon, niapse porne rleynie zho Dios, laa zho brie ziegun zho xtsiin Jesús, ni ib rziguiel zho ycaania zho ncuaane rdeed grē miech ne rliladz Xtiidz Dios. ⁸ Min co nagon, ib none ne yquiambiaazlo zho, ne none gdeed ncuaane yquiin zho, zeena dziuun ne xyudar zho ygaaz Xtiidz Dios.

⁹ Pxelle naa tib guits lo grēse zha ne no xnēz Dios i, per zig nac Diótrefes gon, men ne racladz so gnabey lo to i, rond me mine rnee no. ¹⁰ Gacxe na, telne laa naa guial i, dzigo laa naa glisqui lo me dien pe nacne quianeene me no.

Ni tebaa mincose, na haxta run me ib rbēzlod me grē zha bets, zha bzian ne rlanso i; niicle rdeetegaa me diidz cho gdeed zaatne cuēz zho. Zha ne rund mine racladz me, rbee me zho lad grē zha ne nacgrē zho.

¹¹ Bets, sangue luu gon ib tsienald luu mine run grē zha ne sca run guielntseeb, sinque bioxco güeynal ncuaane ndzinli. Sac gon, zha ne run niapse ncuaane

ndzinli, xnēz Dios no zho; laa grē zha ne run ncuaane ntseeb, gard sēeb zho xnēz Dios.

¹² Zig nac Demetr, grēse miech rnee ganle zaacse mban Demetr. Ni rlugaa nliw, sac gon tibaque zienal me mine nac diidzli. Niicle nogaaw, mincoque rnee no, ni nan luu ganle led yed no rquidie.

¹³ Ndalraa ncuaane no gne naa lo luu, per racladz naa gzodiidz naaw lo luu lo guits rii; ¹⁴ sac laa guic naa no guialgan niob naa luu i, dzigo hor co ziodiiz ne grop ne.

¹⁵ Guiaanne Dios luu sca; peet tsienied guic luu. Grēse xamigw luu zha ne runbey luu nu, laa zho rxeel bdiuzh lo luu. Scagaa bzhiguiel bdeed tib zhibdiuzh naa lo tib tib zha ne nac xamigw ne nēz qui.

Juan

GUILTS NE PQUIAA JUDAS

¹ Naa nac Judas, bets Santiagw; xtsiin Jesús quiayun naa.

Laa naa rxel guits rii lo to, grëse to ne nac to zha ne bredz Dios bzëëb xnëz me. Ne nligaa nquialadz me to, ni haxta quianap Jesús to.

² Dios glu ganle pa lotaa rquia zdoo me to, pa lotaa rleyne me to, ni pa lotaa noxco me to zeena peet tsienied guic to.

³ Bets, bzian, mine gocladz naa nzet naa nu ganle zha nactaa mine been Dios psilaa me ne lo xtol ne; per na rgobey naa nonguielraaw cso naa diidz lo to, ib gandzede to grë zha ne rtsidil mine rliladz ne. Dios bneedz diidz gocndion new, ne nac ne zha ne brieë lo dol bziaab ne xnëz me. ⁴ Sac gon, blalaa zha ne rquiaalo rliladz Dios, ngueets zhlian laa zho bzëëb lad to i. Miech yozha, niapse lo dol no zho, rnee zho zac gun ne ncuaane guiaabtaa guic ne, sac nquialadz Dios ne; ib rliladz zho Jesús, Men ro, Men nroob ne rnabey ne. Padzeelale goquiet, ne grëse miech ne sca nac, lëëque lo xtol zho nitlo zho.

⁵ Golsoladz ganle zha bzhaac grë zha ne gocntseeb lo Dios padzeela. Niicle ne nanle tow, per laaw gzet naa lo to nu, zeena csoladz tow: Zeene psilaa Dios grëse menladz ne lo guielne ne noded zho Egipt ga, zha ne brieëquia ib bnëd niunbey me, ib gondzed me zho, bnitlo me zho. ⁶ Scaque grë anjl ne biche lo me, psaan zho dziin ne pso me zho; bdziguiend me zho, laa me nsioogyu zho tib lo guielcowdoo, ga quiadoo zho haxta gdzin dze ne laa me gun guielwxtis. ⁷ Rsoladz to ganle zha goc guiedz Sodom, guiedz Gomorr, ni grëraa guiedz las ne bre gax ga. Grë miech ne bio grë guiedz co, laa zho güeynal mine nacdraa guieltsieel, tel chotaa pquiangob zho, bionie zho haxta grë mrazh; grëse zho, lo gui ga bnitlo zho. Ga rlu ganle, grëse zha ne csaand xquielntseeb, no tib lo guidox ne gdzind dze guiuu, ni ga nitlo zho. ⁸ Ni zha ne gon blanso lo to i, scadaa run zho; sac

tel zha, niapse guielyozh zienal zho, laa zho nosanbeed xcuerp zho, ib rond zho mine rnee zha ne rnabey, haxta rdzibdee zho grë men non ne no gbaa. ⁹ Per ni anjl Miguel, anjl rnabey ne bdilnie mendox zeene güeyla me xcuerp Moisés, ib beend me ndziibdee me mendox; lëë gdib rëb me: “¡Dios nac men ne gunquizh luu mine run luu i!” ¹⁰ Laa grë zha qui, haxta grë ncuaane run Dios, ncuaane ni rioguicd zho zha nac, laa zho rdzibdeew; masaque mban zho zigne mban grë ma, laa zho run ncuaane rdeedtaa guxt xcuerp zho; lëëque zha nonitlo zho ga. ¹¹ ¡Probsaxe zho! Sac gon, nëz ne zey Caín ga zienal zho. Lo guielblë dimi, laa zho brieë xnëz Dios zigne brieë Balam; ni zigne gut Coré zeene gocntseeb me lo Moisés, scaque nitlo zho.

¹² Zeene riaad zho lo guielwagw ne run to, loxaque rzhidznie zho, loxaque runnguzee zho, rzob zho rlozhd gowcho zho, zieniedraa guic zho dien chora no gow; ni lalnu guielto guien lo zho. Nëzrii nëzrec quianzë zho, masaque nac zho zig nac xcow ne ziaadnied nisguie, loxaque nëzrii nëzrec rienie mew; zig nac tib yag bgool ne guien nex lo, len dze ne no yquia nex low. Laa zho bnitlole ga, masaque nac zho zig tib yag bidz ne bliadzle dib lo; sac tel yag bidza, gdzindraa dze ne yguiaw. ¹³ Zigne nëzrii nëzrec rchoon nisdoo grë mtsiin beed ne ndziib low, scadaa nëzrii nëzrec nolu grë ncuaane mbeeguielto ne quiayun zho. Laa zho ziele nëz lo guielcowdoo ne rieguial zho, zaatne gdzindraa dze griee zho; zig tib mel gbaa ne bnitnëzle, laa ma nonziaabse lo guielcow.

¹⁴ Lëële zha qui ga bzeet Enoc (men ne brieëquia lo dii ne rac xoop xtii Adán), zeene psiaab Dios guic me, rëb me: “Golwi ganle laa Dios ziaad, pe zhidaa grë anjl ne ziaadnie me, ¹⁵ ziaadgun me guielwxtis. Grëse miech ntseeb, laa me gunquizh zho grëtaa dol ne been zho, grëtaa diidz dox ne brieë ro zho bneenë zho me.” ¹⁶ Ni nligaa sca nac grë zha qui, ib nod ncuaane tso zho conform, tibaque wlisqui no zho; laa zho zienal grëtaa guielyozh, ncuaane racladztaa xcuerp zho. Rto zho guieldzin, rlozhd dieen pa rac zho, rio zho pe diidz wen ne rnee

zho lo miech, loxaque ne dien zha yquidie zho miech, guñ zho miñe racladz zho.

Laa naa rso diidz lo to

¹⁷ Sangue to bets, bzian, gol_{soladz} miñe bnee grè zha ne pxeel Jesús bnee Xtiidz me, zeene biadseed zho to; ¹⁸ led znu rnee zho: “Zeeñe zhile gdziñ dze ne laa guidzliu rii nitlo, zrieequia grè miech ntseeb ne gzhidznie zhiwseed Jesús, laa zho gban zigne nactaa grè zhgab yozh ne guiab guic zho.” ¹⁹ Ni nligaa rañ to niina ganle sca quiayaca, lëë grè zha co i squi nogodil grè zha ne no xnèz Jesús. Nacnied zho Espíritu Sant, gane niapse grè ncuaane dol ne racladz xcuerp zho, miñ co run zho.

²⁰ Bets, bzian, gol_{guien} sca tibaque dziits gol_{so} lo Xtiidz Dios miñe rliladz to. Gol_{zodiidznie} Dios, zigne csiaab Espíritu Sant zdoo to. ²¹ Sozite to lo Dios, gol_{guien} ganle zha rleynietaa me to; gol_{quiambèz} dzian ne gal dze ne yгаа ne guiel_{mban} ne gdziñd dze lozh, miñe ndion_{paa} ne gneedz Jesús meñ ne rnabey ne, porne rquia zdoo me ne.

²² Tel cho zha ne racchop guic lo Xtiidz Dios, gol_{nee} lo zho biire sodziits zho stib. ²³ Zha ne bii no lo dol, gol_{nee} lo zho guien zho csaan zhow; gol_{cuee} zho lo gui ne noxtseeb zho yгаа zho ga; scagaa grèraa miech, gol_{quia} zdoo zho, per ib cxende to lo zho. Ni lalnu gdziguiende to grè dol ne run zho, gol_{saca} zig rzac to tib ncuaane rbixnë zdoo to rañ to.

²⁴⁻²⁵ Tibaque Dios no, me psilaa ne lo dol, ni megaa csilaa grèraa miech. Meñ nroob nac me, ni zrieelo gacniën me to guiabde to ladznia dol stib; zeena ine mbe to, ine rley to laa me gdziñnie to zaatne nac lo guiel_{ndzondoo} ne no me. Niina ne laa ne rdziuun_{beyle} Jesús, zrieelo dziool_{nie} ne me, mese nac meñ nroob, meñ ndzon, meñ ne rap guiel_{rnabey}. Tibaque nac me, niicle mazd glow, niicle niinaw, ni gdziñd dze ne gdzëë me.

Judas

MIÑE BDEED DIOS DIIDZ GON JUAN

¹ Nu raquiet grë ncuaañe ziaadyoble gac. Dios bnabey Jesús glu mew lo grë zha ne no xnëz me. Nacne pxeel Jesús tib xanj me biaad biaadluw lo ngunđziin win ne nac naa nu, parne sca gacnañ zhow. ² Grëse miñe gon naa, grëse miñe bin naa ga, laaw gne naa zigne gonse naaw, zigne binse naaw. ¡Diidzliw! ³ Dichos grë zha ne glab lo guits rii, ni dichos grë zha ne yquiaadiag grë miñe zhobnee low nu, ycaania zhow ni gliladz zhow; sac gon xtiidz Diosa, ni laa dze ne gac grë miñe rzeeta nu, ziaadgaxle.

⁴ Naa nac Juan, laa naa rquia guits rii rxel naa ziaad lo to i, ne nac to zha ne ngab xnëz Jesús, zigne nose to gza gadz guiedz ne ndxie nëz Asia i.

Dios meñ ne no padzeela, meñ ne no niina, meñ ne nacle diidz guiaad, me gacniën to lo grë zhizhgab to, me cchoobladz zdoo to peet tsienied guic to; me ni Espiritu ne zo lo me zaatne nac lo xcan ndzon ne zob me; Espiritu ne rlu zha nac gadz guielbiini ne rap me; ⁵ ni Jesús meñ ne rnee niapse diidzli, meñ ne glopaa brieëban lo guielgut, meñ ne rnabey lo grëse zha non ne rnabey lo guidzliu.

¡Gotsaa dziuunnon ne Jesús! Sac gon pa lotaa rleyne me ne, bleeladz me me bzhiee xchen me psanmbe me ne lo grëtaa xtol ne, ⁶ tibaque been me ne, psannon me ne; bzooblo me ne gac ne pxoz ne gun dziin lo Dios meñ ne nac Pxoz me. ¡Mese nac meñ ne rap guielndzon, mese rap grëtaa guielrnabey! ¡Tsod cho stib zig me, ni gdziñd dze ne nitlo xquielrnabey me! Sca nac me.

⁷ ¡Bii zanaque to ganle zeene laa Jesús ziad-zëeb lo xcow! Grëse miech zan zho me, zig nac zha ne sca bdiñ me, zha ne sca bliz lanz cue me, zanlo zho me; dibdoo guidzliu, hor co mbanse gac miech, haxta zoon zho, haxta zdieb zho. Ible sca none gaca.

⁸ Znu rnee Dios, meñ nroob ne rap grëse guielrnabey: “Grëse ncuaañe notaa, naa psilow ni naa csiaala; naa nac zigne nac letr “a” ni letr “z” lo grëse letr, “a” rsilow,

“z” riala, zigne nac naa niina sca goc naa padzeela, ni scaque gac naa zeene laa naa guial stib.”

Gon Juan Jesús

⁹ Naa nac bets to Juan, tibaque nac ne niina grë ne, sac ye naa no xnëz Jesús; ye naa nodeed grë guielnë ne noded to. Zigne rneedz me paciens lo to lëb to lo grëtaa guielnë ne no gan to, scaque racniën me naa; ni ye naa gdziñ lo me, zaatne no gdziñ to.

Sodiidz naa lo to ganle zha bzhaac naa. Lëëtaaque no naa lo guidzliu win ne lë Patmos, ga ngoguiu zho naa loxaque ne noseed naa miech Xtiidz Dios, miñe biaadlu Jesús zeene biaad me lo guidzliu.

¹⁰ Tib dze, lëëtaaque nacie Espiritu Sant naa nozodiidznie naa Dios, tibaque zeene nguiedz zëeb tib tsi meñ co, pale tsi tib trompet; ¹¹ në me lo naa:

—Grëtaa ncuaañe ran luu nu niina, pquiaaw tib lo guits pxeela lo grëse zha ne ngab lo naa, grë zha ne no gza gadz guiedz rii nëz Asia: Efés, Smirn, Pérgamo, Tiatur, Sardis, Filadelf, ni Laodicé.

¹² Ptsire lo naa ni naa gwi naa dien cho ga sca rnee lo naa. Zeene bui naa, gon naa gadz candeler niaa niapse guiib or. ¹³ Glowtaa lo gza candeler co zo tib mgui zigne rlu miech lo guidzliu rii, nacw me tib lar nool rdziña haxta yan ni me, ni ndxie tib cinch niaa niapse guiib or ngali ro zdoo me. ¹⁴ Ine bie rna guitsguic me, zootle zhiil nquits, zootgaa luu guieg, masaque riaazbel bziaalo me. ¹⁵ Ni mew, masaque rquiabniw zigne rquiabni guiib brons zeene rlozh riaanmbew, zeene rrieenëzgaaw lo gui; tsi mew, masaque rio bi rnee me zig rio bi grë guiubee nroob ne zhoob naal nis. ¹⁶ Nia me miñe nëz derech, nzheñ me gadz mel gbaa; ni zob tib spad ro me, zigtaa nëz zhits spad cow zigtaa nëz low, gropse nëza ndox. Masaque biinidoo ne rriee lo me, zigne rlu lo ngbidz zeene lega recye lo ngbidz.

¹⁷ Zeene gon naa me, mbe biaab naa zhan ni me zig tib zha ne gutle. Dzigo blis me nia derech me pxobnia me guic naa, në me lo naa:

—¡Gdzieebd luu! Naa psilo ni naa csiaal, naa psan grëtaa ncuaañe no, ni naa

gnitlow; ¹⁸ ni mban naa. Nli gut naa per briebaan naa, mban naa niina, ni gdziindraa dze ne guet naa; ladznia naa no guielgut. ¡Gdziebd luu sca! ¹⁹ Grëse ncuane noyañ luu nu niina, pquiaaw lo guits grësew, niicle miñe noyaclew, miñe naragaa gaca. ²⁰ Znu goñ nac miñe blozh goñ luu ga: gadz mel gbaa ne goñ luu nzheen naa ga con nia derech naa, tib tib mel co nac tib tib zha ne quianap yadoo ne no gza guiedz co; laa gza gadz candeler co, nac tib tib yadoo co.

2

Diidz ne bnee Jesús lo zha Efés

¹ Blozh ga në me lo naa:

—Miñe gni naa lo luu nu niina, pquiaaw pxeela Efés, lo zha ne quianap grë zha ne ngab xnëz naa ga, gudz lo zho: “Znu nac xtiidz meñ ne nzhen gza gadz mel gbaa co, meñ ne zodeed vüelt lo gza gadz candeler ne niaa niapse guieb or ga, rnee me:

² 'Nañ naa zha mban to, nañ naa pa lotaa noxco to ruñ to xtsiñ naa, ni nacde to zha ne lega znuse guiaañ zdo; stiba, ib ranzede to grë zha ntseeb. Grë zha ne ziyaad i rnee zho Dios pxeel zho ziadnee zho xtiidz me, per pquia to been to zho prueb, haxta gocnañ to rquidie zho. ³ Nañ naa zha nactaa guielñe ne noded to loxaque ne rliladz to naa; per niicle scaw tibaque dziits zo to, ib riaand zdo to.

⁴ 'Loxaque naca no tib ncuane glisqui naa lo to: ¡Rleyniedraa to naa niina, zigne rleynietaa to naa glo, zeene glopaa bliladz to xtidz naa! ⁵ Golisoladz pa lo pxin to. Golbiire golgac stib zigne nac to glo zeene psilo bliladz to xtidz naa; sac goñ, telne gac-wende to, ible zial naa i zialtichee naa xcandeler to zaatne zow.

⁶ 'Nli rleyniedraa to naa scataa, per rley naa ran naa ib rdziguiende to grë ncuane ndzinlid ne ruñ zha Nicolaít, sac tel naa, ni lalnu ib rdziguiend naa ncuane ruñ zho.

⁷ 'Zha ne rioguicle godiidz rii, yquiaadiag zho ganle zha rnee Espíritu Sant lo grë zha ne no xnëz naa, rnee me: Grëse zha ne gdeete diidz gac-wet zho lo ncuane gunctal xtol zho, zha co ygaa gow xnex yag

ne rdeed guielmban ga, miñe zob len huert ndzon ne rap Dios ga.”

Diidz ne bnee Jesús lo zha Smirn

⁸ Blozh ga në me lo naa:

—Pquiaa miñe gni naa lo luu nu, pxeela Smirn, lo zha ne quianap grë zha ne ngab xnëz naa ga, gudz lo zho: “Znu nac xtiidz meñ ne psilo grëtaa ncuane no, meñ ne csiaala, meñ ne gut ga ni brieaban me, rnee me:

⁹ 'Rañ naa zha nactaa grë guielñe ne noded to. Rañ naa mban rac to guieñd grë ncuane yquiin to (nligaa peet rapde to lo guidzliu, per guielñzaac ne bgaa to i ngab to lo Dios, nroob nona). Rañ naa, grë zha ne rnee i xpëed Dios zho sac zhasi zha Israel nac zho, no zho rneenë zho to; per nlid goñ xpëed Dios nac zho, sac zhiwseed menox zienal zho.

¹⁰ 'Nroob grë guielñe ne ziaadyob gan to, per gdziebde to. Squiil menox miech, gnab zho tso to ladzguieb; ga nagon glu to dieñ pe nli dib zdo to rliladz to naa. Nli nzianlaa to guiab ladzguieb, per tib tsiise ngbidz sca yquiaanal zho to. Laga mban to lo guidzliu sca, ible csaande to zhiwseed naa, zeena ycaania to guielmban ndzon ne gnedz naa lo to.

¹¹ 'Zha ne rioguicle godiidz rii, yquiaadiag zho ganle zha rnee Espíritu Sant lo zha ne no xnëz naa, rnee me: Zha ne tiblrique tsoxco gun miñe rnabey Dios, led yedraa zha co tsoxtseeb guey gabil.”

Diidz ne bnee Jesús lo zha Pérgamo

¹² Blozh ga, nëque me lo naa:

—Miñe gni naa lo luu nu, pquiaaw pxeela Pérgamo, lo zha ne quianap grë zha ne ngab xnëz naa ga, gudz lo zho: “Znu nac xtiidz meñ ne nzobro tib spad lots ne ndox gropspe nëz, rnee me:

¹³ 'Nanpaa naa masaque menox rnabey lad guiedz ne no to i, per ran naa tiblrique dib zdo to rnalo to naa, niicle goñ to zha psacsi zho Antip, beet zho me i, meñ ne scataa bioxco bnee xtidz naa lo miech.

¹⁴ 'Per no chop ncuane goñ glisqui naa lo to: Lëda i ruñ to ranze to grë zha ne squi ruñ zigne been Balam, meñ ne pquiil Balac bloo Balac guic grë zha Israel beenctal zho xtol zho, dow zho xpëel grë ma ne biogon lo

mdio, ni pquiangob zho zha ne led tsieeld zho. ¹⁵ Lëë tiba ga, laa stiba, randze to zha ne bii zienal zhiwseed yozh zha nicolaít; tel naa, ni lalnu rdziguiend naa wseed co.

¹⁶ 'Laa naa rso diidz lo to: golnab perdon, ni golnee lo grë zha co csaan zho grë ncuaane ndzinlid ne run zho; sac gon, telne gond zho diidz, ible zial naa zialtilnie naa zho con spad ne zob ro naa nu.

¹⁷ 'Zha ne rioguicle godiidz rii, yquiaadiag zho ganle zha rnee Espíritu Sant lo grë zha ne no xnëz naa, rnee me: Zha ne gdeete diidz lo grë ncuaane gunctal xtol zho, zded naa guielwagw ne rap naa gbaa yquiiin zho; ni zded naa tibga quie nquits lo zho, lo quie co quia lë cub zho, ni zhase gacnan zha nac lë co zho."

Diidz ne bnee Jesús lo zha Tiatur

¹⁸ Blozh min co, në me:

—Ye lo zha ne quianap zha ne no xnëz naa guiedz Tiatur, pxeel diidz rii, gudz lo zho: "Znu nac xtiidz Xpëed Dios, men ne masaque riaazbel bziaalo, men ne masaque rquiabni ni zigne rquiabni guuib brons ne tibaque riar; rnee me:

¹⁹ 'Nan naa grëse zha mban to; ran naa pa lotaa rleynie to naa, dib zdo to rliladz to cho nac naa, noxco to quiayun to xtsin naa, tiblrique rac to dziits zo to lo xtidz naa; ran naa noxcoraa to quiayun to xtsin naa niina.

²⁰ 'Per no tib ncuaane no glisqui naa lo to: lëda i gon run to randze to wnaa ne lë Jezabel i, rnee me Dios rsiaab guic me grë ncuaane rnee me, per nlida; sac gon, loxaque noquidie me grë zha ne no xnëz naa, noquiiil me zho rquiangob zho grë zha ne led tsieeld zho, ni row zho xpëel grë ma ne riogon lo mdio. ²¹ Blactaale pquiambëz naa nab me perdon, ntsëe me lo xquielmban me; per nëd me csaan me grë guielyozh ne run me i.

²² 'Gacnan to sca ganle, laa naa gnabey glan me tib guielguidzdox, tsiechedraa me lo caxtigw co; scaque grëse zha ne zienal zhiwseed me, nroob guielnë ne gnabey naa ted zho, tel laa zho csaand grë guielyozh co. ²³ Ni haxta zut naa zho, zeena sca gan grëse miech ne no xnëz naa ganle, naasi nan naa pe rza guic miech, pe rza zdo zho; gacxe

waa, tel pe ncuaane run zho, zdedse naa mine rieguial zho tib tib zho.

²⁴ 'Sangue to grë to zha ne zienald guielyozh ne rlu wnaa qui (wseed ne rnee zho i rdeed nroob guielbiini, per nand zho gon zhiwseed mendoxa), peet glisquidraa naa lo to. ²⁵ Per none gon tiblrique golgac, zeena ine dib zdo to rnalo to naa gal dze ne laa naa guial stib. ²⁶⁻²⁸ Sac gon, grëse zha ne gdeete diidz lo grë ncuaane gunctal xtol zho, sinque tibaque tsoxco zho gban zho zigne rnabey naa, haxta gdziin dze ne nitlo guidzliu, zded naa tib mel gbaa lo zho, mel ne rlan ral sil, ni so naa zho gnabey zho grë guiedz. Naa gded guielrnabey co lo zho, zigne bneedz Pxoza naaw lo naa; ni lalnu yquiad zdo zho, grëse miech ntseeb, zunquizh zho zho grëtaa guielntseeb ne been zho.

²⁹ 'Grëse zha ne rioguicle godiidz rii, yquiaadiag zho ganle zha rnee Espíritu Sant lo grë zha ne no xnëz naa!"

3

Diidz ne bnee Jesús lo zha Sardis

¹ Blozh ga, në me:

—Mine gni naa lo luu nu, pquiaaw pxeela guiedz Sardis, lo zha ne quianap grë zha ne ngab xnëz naa, gudz lo zho: "Znu nac xtiidz men ne nzhen gadz mel gbaa, men ne nacie zhiEspíritu Dios, Espíritu ne rdeed gadz guielbiini, rnee me:

'Nan naa gon pe nac grë ncuaane run to, niicle zëeb diidz mban to, per par naa miech gutle nac to. ² 'Golcuee zhimcaalo to sca! Golsodziits lo spalalse xtiidz naa mine rsoladz to, sac gon zhile laa to lozh guiaanladza. Ne nligaa, ran naa quiayunde to xtsiin Dios zig none gaca. ³ Golsoladz ganle zha nac grë wseed ne gocnan to, grë wseed ne bin to; dzigo goltsienala, ni golnab lo Dios gun me to perdon. Sac gon, telne tsienalde tow, zeene laa naa guial, lega nacle zeene gan to laa naa zole lo to; zig rzac zha ne rzëeb ngbaan lidz.

⁴ 'Sca nac to, per lo to i gon no bla zha ne bii mbe zdo, sac zienald zho grë ncuaane run to; rriequia rdeete zho diidz guiacbeed xab nquits zho ga. Ni zha co

nagon rieguial sēnal zhits naa, sac gop zho xab zho cuidad.

⁵ Golgona ganle, grēse zha ne gdeete diidz lo grē ncuane gūntal xtol zho, scaania zho tib lar nquitsbie gacw zho; lē zhow, lēē quialew lo guits ne quia lē grē zha ne yгаа tib guielmban ndzon ga; haxta zanie naa zho lo Pxoз naa ni lo grē xanj me, guiep naa: Lēē zha rii gon no xnēz naa.

⁶ Zha ne rioguicle grē godiidz rii, yquiaa-diag zho ganle zha rnee Espiritu Sant lo grē zha ne ngab xnēz naa.”

Diidz ne bnee Jesús lo zha Filadelf

⁷ Blozh ga nē me:

—Mīne gni naa niina, pquiaaw pxeela guiedz Filadelf, lo zha ne quianap grē zha ne ngab xnēz naa, gudz lo zho: “Meñ mbe ne rapd ni tib dol, meñ ne rnee niapse diidzli, meñ ne rnabey zigne bnabey rey David; zaatne rxal me, tsod zha ne grieelo csiooga, zaatne csiooggaa mew, tsod zha ne grieelo cxala; znu nac xtiidz me, rnee me lo to:

⁸ Nan naa grēse zha mban to; niicle ne squi bii nsis rac to, per rioxco to ron to xtidz naa, ni rqueetsde to ne nli rliladz to naa. Gacxe waa, rrieequia laa naa rxal tib puert ted to, ni choot grieelod csioog puert co. ⁹ Bii zan to ganle, zeene laa naa cxel gza zha ne ngab lo mendox i, guiaad zho guiadquitsgzhib zho lo to, zha ne noquidie i rnee zho xnēz naa no zho. Ga gan zho ganle nli rleynie naa to. ¹⁰ Ne squi tiblīque rac to ron to xtidz naa, peet güeynied guic to niicle pquianał miech to, ible squianaap naa to, gande to guielnēdox ne gan grē miech ne ndxie lo guidzliu.

¹¹ Golsoladza ganle, merle guial naa. Golguien csaande to xtidz naa mīne nanle to, zeena tsod stib zha ne ctiche mīne rieguial to gnedz naa lo to. ¹² Grēse zha ne gdeete diidz lo grē ncuane gūntal xtol zho, so naa zho gac zho zig grē pilar nroob ne zo len xyadoo ro Dios, ni gdziandraa dze ne grieel zho ga; cho pilar co, ga yquia naa lē Dios, ga yquia naa tib lē cub naa. Laa zho ngable guiedz ne rnabey Dios ga; lēē guiedz co nac Jerusalén cub ne gnabey me quiet gbaa.

¹³ Zha ne rioguicle godiidz rii, yquiaa-diag zho ganle zha rnee Espiritu Sant lo grē zha ne no xnēz naa.”

Diidz ne bnee Jesús lo zha Laodicé

¹⁴ Ni nē me:

—Mīne gni naa niina, pquiaaw pxeela guiedz Laodicé, lo zha ne quianap grē zha ne ngab xnēz naa ga, gudz lo zho: “Meñ ne rnee niapse diidzli, meñ ne run grēse mīne rnabey Dios, meñ ne bzo Dios psan grēse ncuane no, znu nac xtiidz me, rnee me lo to:

¹⁵ Nan naa grēse zha mban to. Ran naa noxcod to grē mīne rnabey naa to, ni niicle rsaandgaa tow; nac to zig nac tib ncuane loxaque ndzēyopse, niicle niagda ni niicle nlēēdgaaw. ¡Tebaa nac to zig tib nis yag, zig tib nis lēēgaa! ¹⁶ Per na gon ne squi nac to zig tib nis ndzēyopse, ni lalnu rdziguiend naa ncuane run to. ¡Zhile gon laa to gūntsib naa!

¹⁷ Rnee to grēse ncuane rquīin to laaw quianiele to, ible peet liaadz racdraa lo to, ini riende to gon ni lalnu peet nonde to! To nac miech ne mazdraa mban, peet rapde to, ni lar ne ctse lad to guiend, rrieequia haxta ni lo to roldraa. ¹⁸ Laa naa rso diidz lo to: Telne racladz to nlipaa gapchen to, goltē lo naa, naa cto guiib or ne mazdraa wen lo to; xab tow, naa cto lar ne mazdraa nquits gacw to, zeena ctoladzniedraa to to ne squi guiend pe ctse lad to; haxta nis rmed ne tso bziaalo to, naa gnedza, zeena gbiire gan to stib.

¹⁹ Grē zha ne rleynie naa, rlisqui naa grē ncuane nonguield ne run zho, rted naa zho tib caxtigw parne cseed zho ndzinli gban zho; gacxe waa golgac ndzinli stib, goltsoxco mīne rnabey naa. ²⁰ Laa naa quiambēz to gon gbiire gbig to lo naa. Rrieequia ro lidz to zo naa, quiabedz naa to. Zha ne yquiabladz cxal ro lidz sēeb naa, zdeed naa, ni haxta sobnie naa zho diowxtsee no grop no. ²¹ Grēse zha ne gdeete diidz lo grē ncuane gūntal xtol zho, zded naa diidz sob zho cue naa, zaatne sob naa gnabey naa; zigne zoob naa cue Pxoз naa niina nonabey no; sac tel naa, bdete naa diidz niun naa mīne rnabey mendox.

22 'Zha ne rioguicle godiidz rii, yquiaadiag zho ganle zha rnee Espíritu Sant lo grë zha ne no xnëz naa."

4

Roolnie zho Dios gbaa

1 Zeene bui naa stib, gon naa laa tib puert quia zhan gbaa, nzhialse puert co. Horco biire bin naa tsi men ne bnee lo naa ga glo, men ne nac tsi ga zig tsi tib trompet, në me:

—Biep, dë nu ganle, zeena glu naa lo luu zha nac grë ncuane ziaadyob gac.

2 Zigne sca në me, hor co blu Espíritu Sant lo naa, gon naa laa tib xcan zo gbaa, tib xcan ne rzob men ne rnabeya. Lo xcan co, ga zob tib men co, 3 masaque rbebni me zigne rbebni quie ne rnee zho jasp, quie ne rneegaa zho cornalin. Igose xcan co quia tib gitye, rbebniw zigne rbebni quie ne rnee zho smerald; 4 ni zo zgalptap xcan igow, tibga men gol zob tib tib lo xcan co, dib nquitsbiese rna xab me, ni zob tibga coron or guic me. 5-6 Masaque riab belye, ratsie rnee nguzi, ni zëeb tsi miech zaatne zo xcan ne riaan glowtaa ga. Zaatne nac delant lo xcan co, masaque rluw zig rlu lo nisdoo ni rbebela zig rbebel quie zed; ni noquia gadz biini nroob ga, lëë gadz biini co nac gadz guielbiini ne rap Dios.

Igo xcan co, ga zo tap bult mban, tibgaw zo tib nëz; nëz low, nëz zhitsaquew zob bziaalow. 7 Tiba rlu zig rlu meedz, stiba rlu zig rlu tib ngon yeen; laa schop mine riaan ga, tiba rac lo zig rac lo miech, laa stiba rlu zig rlu tib msi nroob ne quiasiibe. 8 Tib tiba zob xoopga xiila, ndziib bziaalow zhits xiila, len xiila ne; tibaque nguiedz zëeb tsiw, rneew:

¡Men ndzondoo nac Dios!

¡Men rnabey nac me, nroob poder ne rap me!

Notaque me, me ga no padzeela, me no niina, ni lëëque me ga no guiaad.

9 Gza tap bult mban co, roolniew men ne zob lo xcan co, (men ne gdziñd dze guet) rsañnona me, ni rdeeda xquizh lo me. Zigse sca run gza bult co, 10 scasaque gza galptap men gol ne zob ga, rquitsgzhib me lo men ne zob lo xcan ro co, gzase me, rgob me xcoron me rguix mew nëz lo men ne zob lo xcan co, ni rnee me:

11 Luu nac xDios no, luu nac men ne rnabey no.

Luuse nac men ne rieguial dziuunnon no, ni gnee no grë diidz ndzon lo luu.

Nroob poder ne rap luu, sac grëtaa ncuane no, luu bzaaw;

laaw biala sac ible sca gocladz luu, ni laaw niaagaa niina, sac ible sca racladz luu.

5

Tib guits ne nzhidoo gadz lë cint

1 Zeene bui naa stib, gonpaa naa men ne zob lo xcan ro co, nose tib guits nroob nia derech me. Gropse nëz guits co quia, ndibëdsew, nzhidoo gadz lë cint. 2 Ni gon naa tib anjl, tib men macis rlu me, nguiedz zëeb tsi me, bnabdiidz me rëb me:

—¿Cho rieguial cchug cint ne nzhidoo guits qui, cxal zho low?

3 Ni tib choot pxald lo guits co, niicle gbaaw niicle lo guidzliuw, niicle zhan guidzliugaaw, brieequiad tib zha ne nchug cint co, nwi zho lo guits co.

4 Mban goc naa, psilo naa nguiedz roon naa, gon naa sca brieequiad tib zha ne rieguial nxal lo guits co, nlab zho low.

5 Dzigo bnee tib men gol ne zo gax lo xcan co, në me lo naa:

—Goond luu. Lëz ganle, men ne brieequia lo xtii Judá, lo xtii rey David, me cchug gza gadz cint ne nzhidoo guits qui, me cxal low. Ible me rieguiala, sac gon psiaablo me grëse zha ne rlëë lo me; rrieequia nac me zig tib meedz.

6 Horco bui naa zaatne nac lo xcan ro co, gon naa glowtaa lo gza bult mban co ni lo gza men gol co, ga zo tib Carner yeen. Rlupaa zha psacsi zho ma, zeene beet zho ma. Zob gadz zhoz ma, ni zob gadz bziaalo ma, rrieequia gza gadz bziaalo ma ga, min co nac gadz guielbiini ne rdeed zhiEspíritu Dios.

7 Dzigo wbig men ne nac Carner yeen co, bnaaz me guits ne no nia derech men ne zob lo xcan ro co. 8 Zigne bnaaz me guits co, laa gza bult mban co, ni gza galptap men gol co pquitsgzhib lo me. Tib tib men gol co nzhenese me tib arp ni tib ptsigui or, rso tib gox ndzon len ptsigui co (rrieequia gox co

nac grë diidz ndzon ne rnee grë zha ne no xnëz Dios zeene rzodiidznie zho me).

⁹ Dzigo psilo gza menḡol co biil me tib cant cub. Znu rnee lo cant co:

ıble luu rieḡual yaania guits qui, luu rieḡual cchug gza cint ne nzhidoow i!

Sac luu bded grëtaa ḡuelnë co psacsi zho luu, haxta bzhiee xchen luu;

sca psilaa luu grëlose dii miech,

teḷ pa ḡuedztaa nac zho, teḷ pa diidztaa rnee zho, teḷ pa naciontaa ngab zho.

¹⁰ Laa luu bzhii no grë no gac no tib ḡuedz cub,

ḡuedz ne gnabey Dios;

no gac pxoz ne ḡun dziin lo me,

masaque tipse ḡban no zeene gnabey me lo ḡuidzliu.

¹¹ Zeene bui naa, ḡon naa anjl ḡuizhiu ne ndxie zaatne zo xcan ro co, led zha ne grieelod ḡlab new. ¹² Nḡuedz zëeb tsi zho grë zho gza bult mban co, ni grë menḡol co, rnee zho:

ıMeḡ non nac meḡ ne nac Carner yeen ne squi rlu beet zho!

Me rieḡual ḡnabey, meḡ ro nac me, choot grieelod csiaablo me.

Ladznia me no grëse ḡuelnzaac, me rap grëtaa ḡuelrien,

Meḡ ndzon nac me, me none dziuunnon ne, me none dzioolnie ne.

¹³ Horco grëse miech, grëse ma, grëse ncuane bzaa Dios, zigtaa ḡbaaw, zigtagaa lo ḡuidzliuw; zigtaa zhan ḡuidzliuw, zigtagaa lo nisdoow; nḡuedz zëeb tsi zho, rnee zho:

ıNliw, meḡ ne zob lo xcan ro qui, ni meḡ ne nac Carner yeen qui,

ıble rieḡual dziuunnon ne ḡrop me!

ıMe rnabey, lo me none gnee ne grëtaa diidz ndzon;

nadzew, ḡzhew, ni grëragaa izdoo ne zi-aadraaw!

¹⁴ Pḡuiab gza tap bult co, rëb zho:

—ıScaw, sca no gaca!

Dzigo ḡzase menḡol co, laa zho pḡuiits-ḡzhib lo meḡ ne zob lo xcan ro co; psilo zho rnee zho grë diidz ndzon lo me.

¹ Blozh ga, ḡonḡpaa naa zeene laa meḡ ne nac Carner yeen co pchug primer cint ne nzhidoo guits co. Horco laa tib bult mban co bnee; masaque nac tsiw zig rio bi rnee nḡuzi, nëw lo naa:

—ıDë ḡanle ḡwi luu!

² Dzigo wbig naa, ḡon naa tib ḡuay nḡuits. Zhits ḡuay co zob tib meḡ co nzhene me tib yag arcw ne rḡuiaa zho flech; blozhse pcaania me tib coron ne rzob ḡuic zha rnabey, dzigo laa me brieë. Ine zob nze me lad ḡuay co, laa me zie zieḡun me ḡan lo grë zha ne rlëë lo me.

³ Blozh ga, laa meḡ ne nac Carner yeen co pchug stib cint ne nzhidoo guits co. Dzigo bredz stib bult co naa.

⁴ Dzigo bia naa, ḡon naa laa stib ḡuay nizhnie brieë, zob stib meḡ co lad ma. Blozhse pcaania me tib spad nroob, ni pcaa me diidzbey tsielodil me miech lo ḡuidzliu, zeena ḡutlsa zho; laa me brieë ga, laa me zie.

⁵ Zeene laa meḡ ne nac Carner yeen co pchug bion cint ne nzhidoo guits co, dzigo bredz stib bult co naa, nëw lo naa:

—ıDë ḡanle ḡwi luu!

Dzigo ḡon naa tib ḡuay ngas, scasaque zob stib meḡ co lad ma, nzhene me tib zhiguiib. ⁶ Ni ḡroltaa zaatne zo gza bult mban co, zëeb tsi tib meḡ co, rnee me:

—Tib kiltaa zhobxtil ḡon yaac zha ne ḡun dziin tib dze; teḷ zhobḡaaw, tsonḡaa kila yaac zho; sanḡue nceit ni vin ib yḡaalḡluuw.

⁷ Laa zeene ḡoc cint co tap ziechug meḡ ne nac Carner yeen co, dzigo laa stib bult mban co bredz naa.

⁸ Horco, zeene bui naa, ḡon naa tib ḡuay nḡuets; lad ḡuay co zob tib zha co lë ḡuelḡut; zhiits co nal stib zho lë ḡabil. Lo tap lal ne nlë miech ne ndxie lo ḡuidzliu, pcaa ḡrop zha co diidzbey tsieḡut zho tib lal grë miech co; zha ne ḡuet lo dil, zha ne ḡuet lo ḡbin, zha ne ḡuet lo ḡuelḡuidz, zha ne ḡuetḡaa lo grë ma ntseeb.

⁹ Dzigo pchug meḡ ne nac Carner yeen co stib cint co, ḡoca ḡaay. Horco, zaatne nac zhan mezh ne nac mezh lo pcoog, ga ḡon naa grëse zha ne psacsi miech, beet miech zho loxaque ne bnee zho Xtiaidz Dios, ni dib

6

Gza ḡadz sell co

zdoos zho biladz zhow. ¹⁰ Nguiedz zëeb tsi zho rnee zho:

—Luu ne nac luu meṅ nroob ne rnabey, luu ne nac luu meṅ ne rnee niapse diidzli, ¿pa hor dzigo cuedz luu grë miech ne ndxie lo guidzliu, zha ne scataa psacsi no? ¿Pa hor guṅquizh luu zho grëtaa miṅ been zho ga?

¹¹ Dzigo bdeed me lar nquits got zho; rëb me lo zho no cuëz zho zniip, sac grëraa zha ne nacgrë zho ngab zho lo Jesús, no spalal zha ne naraa csacsi miech zigne psacsi miech zho; haxta gza zho dzigo laa me guṅ guieḷwxtis.

¹² Blozhse ga, laa Carner yeṅ co pchug stib cint co, goca xoop; hor co laa tib zhdox bni. Goṅpaa naa zeene laa lo ngbidz pcow, zig nac zeṅ tib lar ngas pquia lo ngbidz; laa mëë zig rludaa ren, sca nizhnie rlu lo mëë; ¹³ grë mel ne ndziib gbaa, masaque bliaaḷ ma lo guidzliu zig rliaaḷ grë guigw yeṅ zeene rrieed medox. ¹⁴ Znuse bdibëd gbaa, goca zigne racse grë guits ne rdibëd; grë gui, grë guidzliu win ne no lo nisdoo, nëzrii nëzrec biaanā. ¹⁵ Dzigo grëse zha ne nac zha rnabey lo guidzliu, grë zha ne nac zha non, grë zha ne rapcheṅ, grë zha nroob ne rnabey lo meṅguib, grë zha nroob ne non xtiidz, ni grëragaa miech, niicle grë zha ne ruṅ xtsiin beṅa, niicle grëgaa zha ne ruṅ xtsiin zhala, grëse zho biolan, zha ne biolan leṅ grë bliee, zha ne biolangaa leṅ grëraa quie ne no dan; ¹⁶ nguiedz roptsie zho rnee zho lo grë gui co, lo grë quie co:

—¿Golliaaḷ lad no, golcolan no, zeena gandraa meṅ ne zob lo xcan ro co no! ¿Golcolan no, zeena dziaṅd no grëtaa guieḷnë ne cxeel meṅ ne nac Carner yeṅ co! ¹⁷ ¿Sac nasi laa dze ro co bdzin! ¿Laa guieḷnëdox co nagon ziaadle! ¿Ncuaneaṅ lëëbd no low!

7

Zha ne pcuee lo grëse zha Israel

¹ Bded ga, goṅ naa tap anjl. Lo gza tap lad guidzliu, tibga anjl co zo tib lad nocuëëz me me. Wdzeepaaw, per ni tib zhiblag yag rnidraa, niicle lo nisdoow dzese biaca; sac ni palal rrieedraa me lo guidzliu.

² Tibaque zeene brieequia stib anjl nëz ne rlan ngbidz, neyse me xsell Dios; nguiedz bnee me lo gza tap anjl co (anjl ne pcaa diidzbey ga guṅ guieḷqui lo guidzliu ni lo nisdoo) rëb me:

³ —¿Golcuëz zniip! Guṅde to guieḷqui lo guidzliu niina, niicle lo nisdoow, niiclegaa grë yaga; sac naraa lozh guioquiaa no xsell xDios ne quia grë zha ne ruṅ xtsiin me.

⁴⁻⁸ Zeene blozh pquia sell co quia grë miech co, bin naa lo grë zha ne ziaad lo xtii zha Israel, rgaa zho tib gayoo chooptap mil:

Tsiipchop mil zha xtii Judá,
tsiipchop mil zha xtii Rubén,
tsiipchop mil zha xtii Gad,
tsiipchop mil zha xtii Aser,
tsiipchop mil zha xtii Neftalí,
tsiipchop mil zha xtii Manasés,
tsiipchop mil zha xtii Simeón,
tsiipchop mil zha xtii Leví,
tsiipchop mil zha xtii Isacar,
tsiipchop mil zha xtii José,
stsiipchop mil zha xtii Benjamín.

⁹ Zeene bui naa zaatne zo xcan ro co, zaatne zo meṅ ne nac Carner yeṅ co, miech guizhiu ne goṅ naa ndxie ga; grë lose dii miech ne ndxie dib lo guidzliuw. Ne nligaa miech guizhiuw, led miech ne lëbd ne glab new; grëse zho niapse lar nquits nacw zho, ni no tiblëga zin nguia nia zho; ¹⁰ nguiedz zëeb tsi zho, rnee zho:

Dios, meṅ ne rdziuunbey ne, meṅ ne zob lo xcan ro qui,
me nac meṅ ne psilaa ne lo grëtaa xtoḷ ne;
me ni meṅ ne nac Carner yeṅ qui.

¹¹ Horco grëse anjl ne ndxie igo xcan ro co, igo zaatne zob grë meṅgol co, ni zo gza tap bult mban co; grëse zho laa zho pquitsgzhib nëz lo xcan co, haxta bzooblo zho lo liu, rdeed zho xquizh lo Dios ¹² rnee zho:

¿Scaw! Luu none dzioolnie no,
none tibaque gneedz no xquizh lo luu,
luu rieguiaḷ dziuunnon no; sac luu nac xDios no.

Luu nac nac meṅ ne rienraa, meṅ ne rap poder;
gacxe waa luu none ycaania grëse diidz ndzon,

gzataa dze, niicle nadzew, gzhew, ni grëragaa izdoo ne ziaada. ꞑSca none gaca!

¹³ Dzigo bñabdiidz tib menḡol co, nē me lo naa:

—ꞑPe naḡ luu sca cho nac grē zha ne nacw lar nquits qui? ꞑPe naḡ luu pa nēz ziaad zho?

¹⁴ Dzigo rep naa lo me:

—Naḡ naaw. Bzhiguiel bñew lo naa.

Nēchaa me:

—Lēē grē zha qui goḡ bded grētaa guielnēdox ne goc lo guidzliu. Laa zho nacw lar nquits qui, sac wbig zho lo Jesús psanmbe xchen me zho lo dol. ¹⁵ Gacxe waa squitaa ndzon ndxie zho gax lo zhixcan ro Dios, dze guieel quiayoolnie zho me len xyadoo ro me. Me nac men ne quianap zho grēse zho; ¹⁶ led yedraa niina guet gbin zho, guet nisgaa zho; led yedraa niina ctsuu ngbidz zho, sonēēggaa zho. ¹⁷ Men ne nac Carner yeen ne zo delant lo xcan ro qui, me gdeed ncuaane gow zho, ni zigne rienie baxtor xpēcwxiil zho ro guiuu, sca zienie me zho zaatne quiada nis ne rdeed guielmban. Led yedraa niina goon zho.

8

¹ Laa zeene laa men ne nac Carner yeen co pchug stib cint ne nzhidoo guits co, cint ne naca gadz ga, dzese biac gbaa; xtselaa sca biac dze gbaa.

² Blozh ga, goḡ naa zeene pcaania gadz anjl ne rzo lo Dios, tibga trompet. ³ Ni brieequia stib anjl nzhen tib ptsigui niaa niapse guuib or. Zigne bdziḡ me, bzo me delant lo xcan ro co, zaatne zo mezh or ne nac lo pcoog; ga pcaania me nroob yaal parne ctsieel mew grē diidz ne rnee grē miech ne no xnēz Dios zeene rzodiidznie zho Dios. ⁴ Dzigo bzēēg anjl co yaal co, tipse goc gox co grēw xtiidz grē zha ne no xnēz Dios, laaw bdziḡ lo Dios. ⁵ Blozh ga, ptop me grē gui ne ndziib lo pcoog co bloo mew len ptsigui ne nzhen me ga, blaal mew lo guidzliu; dzigo psilo masaque rnee nguzi, rio bi, riab belye ne, ni bni tib zhodox.

Pcuedz gadz anjl trompet

⁶ Horco laa gza gadz anjl ne pcaania gza gadz trompet co, laa zho nsinle nzheḡa, parne ycuedz zhow.

⁷ Zeene laa tib anjl co pcuedz zhitrompet zho, hor co psilo bliaal guiequie lo guidzliu ni bliaal guilēē notsa ren. Gzoob ne telne glē guidzliu tson lal, dzigo masaque tib lala bnitlo, bnitlo grēse yag, grēse lo guizh nguia ne no low.

⁸ Blozh ga, zeene laa stib anjl co pcuedz xquuib, hor co biab tib ncuaan co nisdoo, masaque rluw zig rlu tib gui nroob ne quiayazbel. Gzoob ne tel glē nisdoo tson lal, bnitlo tib lala, bialow niapse ren zeene laa ncuaan co biab low. ⁹ Bnitlo grēse ma, grēse guizh ne no lo tib lalga nis co, haxta grē barcw ne no low bnitlo.

¹⁰ Loxaque blozh goc min co, laa stib anjl co pcuedzaque xquuib zho, hor co laa tib mel nroob bringaa gbaa, masaque rso ma bel zig razbel tib lē guier, biab ma lo guidzliu. Lo grē guiubee, lo grē zhlian ne no lo guidzliu, lo tson lal ne gzoob ne naca, pxin ma tib lala. ¹¹ Grēse nis co goc nlayag, ndal miech ne gut low. Nacne bleelē zho mel co Nlayag.

¹² Zeene laa stib anjl co pcuedz xquuib goc zho tap, hor co zigtaa lo ngbidza, zigtagaa lo mēēw, biuu tib niaza, schop ni-azaquew biaan rziini; grē mel ne ndziib gbaa, gzoob ne lo tson lal ne nac ma, hor co biuu tib lal ma. Rlupaa lega net net rquiaa ngbidz; zaatne nacgaa guieel, ni palal peet rlud.

¹³ Laa naa nowi, tibaque zeene goḡ naa laa tib anjl bded groltaa zhan gbaa, haxta rlupaa rio bi zie me lo me, nguiedz zēēb tsi me rnee me:

—ꞑProbsaxe grē miech ne ndxie lo guidzliu! Sac ncuaane ntseebraa gac, zeene laa stson anjl qui ycuedz xquuib me.

9

¹⁻² Zeene laa anjl ne nac zho gaay ga pcuedz xquuib, hor co goḡ naa laa anjl ne brieē gbaa padzeela ga pcaania tib liow, pxal zho ro tib guierdoo ro. Zeene laa ro guieer co bzhal, per nli goxdoo ne brieē ga, tib psioogsew zhan gbaa, per ni palal rludraa lo ngbidz. ³ Lo gox co, ga brieē tiblo metso bliaal, bioogse ma gdipse lo guidzliu, grēse ma zob xcots ma, zig zob xcots meegu. ⁴ Nacle diidz, peet gund ma grē guizh nguia, grē yag ne zēēb lo guidzliu,

sinque laa ma tsie tsiesacsi ma grëse miech ne quiad xbey Dios quia. ⁵ Yoobdox ne yquia zaatne yquiaaxcots ma, zigne rquia yoob zaatne rquiaaxcots meegu; per gute ma zho, loxaque sca csacsi ma zho dipse len gaay mëë. ⁶ Len dze co, haxta zhal miech yguib zho dien zha guet zho, per grieelod guet zho; soobladznë zho, tebaa zha gdziñ guielgut lo zho, per lel sozita.

⁷ Masaque rac grë metso co zig rac grë guay ne tsienie zho lo dil. Rac lo ma zig rac lo miech, ni zob tib ncuaan co guic ma, rluw zig rlu tib coron or; ⁸ zëëb guitsguic ma zig zëëb guitsguic men wnaa, ni zëëb lay ma zig zëëb lay grë meedz. ⁹ Dipse lad ma ntse tib ncuaan co, rluw zig rlu guuib; rio bi rzedz lo xiil ma, pale bi ne rio zeene rded tib dzoon carret ne rgob guay, zie lo dil.

¹⁰ Lëëdaa meegu, sca zob xcots grë metso co lo xcol ma, miñe yquiaaxcots ma miech dipse len gaay mëë co. ¹¹ Lëë grë metso co pxeel anjl dox ne rnabey guierdoo co, anjl ne rnee zha Israel Abadón, laa xtiidz zha Gres rnee zho ma Apolión. (Nac diidz co, zig rnee ne xtiitsë ne: Zha ne rnitlo.)

¹² Lëë tib guielnë ne gan miech ga, per bii ziaad schopa.

¹³ Gon naa zeene laa anjl ne nac zho xoop ga pcuedz xquuib, hor co bin naa zëëb tsi tib men co lo mezh or ne nac lo pcoog ne zo lo Dios ga. ¹⁴ Zëëb tsi men co rnee me lo anjl ne blozh pcuedz xquuib ga:

—Güey, güeyxadz gza tap anjl dox ne quiadoo ro guiubee nroob ne nac guiubee Eufrates.

¹⁵ Ible bzole gza tap anjl dox co par gun ma guielqui zeene laa dze co, laa hor co gdziñ; dzigo nac ne hor co laa ma blaa, parne tsiegut ma miech. Gzoob ne telne gac miech ne ndxie lo guidzliu tson tant, masaque tib tant zho gnitlo ma. ¹⁶ Bin naa chop gayoo millon zhaguiib ne gacnie ma, niapse guay sob grë zhaguiib co; masaque ma gnabey lo zho.

¹⁷ Gonpaa naa zha rlu grë zhaguiib co zob zho lad grë guay co. Grëse zho quiantse tib lë guuib gdipse zdoo zho; masaque tson color rbeew, rbeew color nizhnie, color nguia gbaa, ni color guts. Laa grë guay co, niaa guic ma zig niaa guic meedz, masaque

rriee bel, rriee gox, rriee zufr ro ma; ¹⁸ lo gza ncuaan ne sca rriee ro ma, miñ co beet lalga miech co.

¹⁹ Lala rap grë guay co xquielntseeb ma ga nëz ro ma, ni rapaque maw nëz lo xcol ma; masaque nac xcol ma zig nac grë meel dox, rias xcol ma rquiaa maw lad miech.

²⁰ Niicle scataa nzian miech ne gut, zha ne biaan ib bdziebd zho. Tibaque laa zho no ziegan zho mendox, ziegan zho grë zhimdio zho, mdio ne niaa guuib or, mdio ne niaa guuib plat, mdio ne niaa guuib brons, mdio ne niaa quie, mdio ne niaa-gaa yag; ncuaane randa, ncuaane ronda, ncuaane rzëda, per laa zho no tibaque ziegan zhow. ²¹ Laa zho no quiayut zho samiech zho, quianab zho pe sac samiech zho, quiangob zho zha ne led tsieeld zho, tibaque quiaban zho, ini palal zienied guic zho csaan zho grë guielntseeb co gbig zho lo Dios!

10

Anjl ne nzhen tib libr win

¹ Blozh ga, gon naa biet tib anjl gbaa, rlupaa tib anjl nona, masaque no me tib lo xcow, ni quia tib guitye glaa guic me. Biinidoo ne rriee lo me, lëëdaa lo ngbidz; scasaque ni me, masaque riaazbela.

² Nzhen me tib libr win, nzhialse lo libr co.

Bdziñ me lo guidzliu, bzo me ni derech me lo nisdoo, laa miñ revés bzo me lo guidzliu. ³ Ga zo me pquiaa me tib redz nroob, lëëdaa zeene rgobeedz tib meedz; loxaque blozh pquiaa me redz co, zeene laa gadz nguzi bnee, pquiab lo redz ne pquiaa me ga.

⁴ Laa naa zale yquia naa miñe bnee gza nguzi co, tibaque bin naa tsi tib men co gbaa, në me lo naa:

—iCoo, yquiaad luu miñe bnee gza nguzi qui! Sac nodne gacnañ miecha.

⁵ Dzigo gon naa blis anjl co nia derech me nëz gbaa, ⁶ bzeet me Dios (men ne gdzind dze guet, men ne bzaa gbaa, bzaa guidzliu, bzaa nisdoo, ni grëtaa ncuaane no low), rëb me:

—Dios zobwi ganle, nasi gon laa dze co bdzin. ⁷ Grëse mine bnee me lo zha ne biadteed xtiidz me, laaw gac niina zeene laa stib anjl qui ycuedz xquuib zho. Grëse miñe

no guic me guṅ me ni gocnaṅ miecha, niina laa zho gaṅa.

⁸ Dzigo wbiire bnee meṅ ne zëeb tsi gbaa ga, nē me lo naa:

—Güey, bnaaz libr win ne nzheṅ anjl ne squi zo i.

⁹ Nacne bia naa lo anjl co, rep naa lo me gneedz me libr win co, dzigo nēchaa me lo naa:

—Ledaaw nu, per lëeraasi none gow luuw. Zeene laa luu noyowa, nex sac luuw; per zeene gdziṅa zdoo luu, laaw gacnla.

¹⁰ Dzigo bnaz naa libr win co nia me, dow naaw. Nligaa nex rdioowa now ro naa, per zeene laaw bdziṅ zdoo naa, beennēw.

¹¹ Blozh ga, nēchaa meṅ ne bin naa tsi glo ga:

—Naraa goṅ none gnee luu gaṅle zha nac ncuane ted grëraa miech, zigtaa zha ne no guiedz wina, zha ne no guiedz nrooba, zha ne rnabeygaaw.

11

¹ Dzigo biaad tib meṅ co bneedz me tib yag ne rbix lo naa, rgaaw zig tib metr; bnabey me naa ctix naa xyadoo Dios, ctix naa zaatne nac lo pcoog, ni glab naa dieṅ palal miech ne rie yadoo co riegana zho Dios. Pso me diidz lo naa, nē me:

² —Lëeraasi ctiixd luu nēz ley, sac laa lugar co nole ladznia zha zit; zha gnabeya, zha gnabey guiedz ndzon ne naccheṅ Dios i; dipse leṅ tson iz groḷ ne ziaad nu, guṅ zhow zigne gacladztaa zho. ³ Gane leṅ dze riique laa naa cxel chop zha ne runbeyppaa cho nac naa, tib lar beelze gacw zho, zig racwxab zha ne no guieḷnē; dipse leṅ tson iz groḷ co gnee zho gaṅle pe nac grë ncuane ziaadyob gaṅ miech.

⁴ Lëe zha co nac grop zhan yag oliv ni grop biini ne raquietle lo Xtiiidz Dios ga zo lo Dios (meṅ ne nac bizhuan guidzliu). ⁵ Zeene laa grop zha co bdziṅ, choot brieelod lega nsacsi zho, sac grëse zha ne wbig gocntseeb lo zho, tib bieese zha co lo bel ne brieer ro zho. ⁶ Bdeed Dios poder lo zho ycuëez zho nisguie, zrieelo gnabey zho guiabda dipse leṅ dze ne nonee zho lo miech ga, haxta zrieelo gnabey zho tsaalo nis gaca ren; ni horne gacladztaa zho,

zrieelo ndalraa grë guieḷzi ne gnabey zho gaṅ miech.

⁷ Zeene bzase dze ne bnee zho lo miech ga, hor co laa tib madzabdoo brieer leṅ guierdoo co; ntseeb rac ma lo zho. Mbe blëbd zho lo ma, beet ma zho. ⁸⁻⁹ Tson ngbidz groḷ goot xcuerp zho groḷ leṅ guiedz ro co, guiedz ntseeb co. Pale Sodom, pale Egipt, sac goṅ guiedz coque, ga pquiaa miech meṅ ne rnabey zho lo cruz. Ib bdeete miech diidz ngeets zho, grëse miech ne no dib lo guidzliu goṅ sca nix zho ga; ¹⁰ dipse lo guidzliu, masaque tib guieḷbleydoo ne bio miech gza dze co, goṅ zho laa grop zha co gut, sac nroob benneed zho miech. Lo guieḷbley co, haxta bioxco miech pe ncuane bgadlsa zho lo samiech zho.

¹¹ Zeene blozh tson ngbidz groḷ co, tibaque zeene laa zhiEspiritu Dios bdeed guieḷmban lo grop zha co stib, laa zho guche ga; grëse miech ne ndxie lo guidzliu, zeene goṅ zhow, per nli bdzieb zho, rdzieldraa zho zha guṅ zho. ¹² Horco nguiedz zëeb tib tsi meṅ co gbaa, bredz me grop zha co. Goṅlo grë miech ne rlëe ran zho ga, masaque no zho tib lo xcow, laa zho bzoquia gbaa; ¹³ loxaque laa zho bzoquia gbaa, zeene laa tib zhodox bni. Gzoob ne telne nlë guiedz ro co tsii tant, tib tanta bnitlo lo zho co; gut gadz mil miech. Grëraa zha ne biaan, mazdraa bdzieb zho, lo dzeb co laa zho psilo roolnie zho Dios.

¹⁴ Sca gaṅ miech stib guieḷnē co. Lëe broppa ga, per znusaque guiaad stiba. ¹⁵ Sac loxaque blozh ga, zeene goṅ naa laa stib anjl ne nac zho gadz ga, pcuedzlaque xquiib; hor co nzian tsi meṅ co zëeb gbaa, nguiedz rnee me:

Nasi nagon,

laa Dios gnabey grëse guiedz ne ndxie lo guidzliu, grop me Meṅ ne pxeel me ga.

Mele gnabeya, grëta leṅ izdoo ne ziaad.

¹⁶ Psiloque gza galptap mengol ne zob lo xcan ne zo lo Dios ga, pquitsgzhil zho lo me, haxta bzooblo zho lo liu, rdeed zho xquizh lo me, ¹⁷ rnee zho:

Xquizh xquieḷnzaac luu,

sac nasi laa luu glu meṅ nroob nac luu, laa luu csilo gnabey.

Luutaque nac men ne mazdraa nroob.

¹⁸ Grëse guiedz, brieequia zha ne gontseeb lo luu; per nasi laa dze bdziñ, laa luu glugaa xquie|blëë luu lo zho.

Grëse zha ne gutle, niina laa luu gdeed miñe rieguial zho tib tib zho.

Grë zha ne been xtsiin luu, pteed zho xtiidz luu lo miech,

grë zha ne ngab lo luu, zha ne runnon lë luu,

zigtaa zha gola, zigtagaa zha wina, niina laa luu gdeed zhipremio zho;

zha ne na loxaquegaa guie|ntseeb been, niinataa laa luu gnitlo zho.

¹⁹ Loxaque blozh sca bnee gza mengol co, zeene laa yadoo ne no Dios gbaa bzhal, nieenpaa guin ne notsow quie lag ne pquia diidz ne psan me lo miech. Horco psilo bliaal tib guiequiedox, loxaque nëzrii nëzrec riab belye, ni rio bi ratsie nguzi; guiequiedox co noliaal, zeene laa tib zho-dox bnique.

12

¹ Horco gon naa blu tib ncuaane gzee zdoo ne zhan gbaa. Ga brieequia tib wnaa, masaque igose me riab tib biini, zig riab xbiini ngbidz, ni zob tib coron guic me, quia tsiipchop mel cho coron co; ngali ni me zob mëë. ² Rlupaa zoney me mëëd, rquiaadan me redz, laa me rquiale yoob ne gap me xpëëd me.

³ Tibaque brieequia tib ma ngol, dipse ma rna nizhnie, niaa ma zigne niaa ngutsiets; zob gadz guic ma, ni tsii zhoz ma, tibga coron zob tib tib guic ma. ⁴ Znuse bzieecw ma xcol ma, blaal ma palal mel gbaa lo guidzliu; gzoob ne nlë mel tson tant, masaque tib tant mel co blaal ma. Wbig ma lo wnaa co, quiambëz ma gal xpëëd me, parne gow ma win.

⁵ Per zigne gol mëëd co, znuse bdziñ win nëz lo Dios, zaatne zob me rnabey me; tib mëëdbguiw, nacle diidz tib men ndip xtiidz gac win, win gac men ne gnabey grëse guiedz ne ndxie lo guidzliu.

⁶ Horcogazhaquew bzhoon wnaa co ga, laa me zie tib dan zit, zaatne psanle Dios diidz gan zho me dipse len tson iz grol.

⁷ Nacne bio tib dil gbaa. Psilo anjl Miguel, grë me grëraa anjl ne nacie me, bdilnie me ma ngol co grë ma xanjl dox ma; ⁸ per blëbd ma, benxoon zho ma gbaa. ⁹ Lëë ma ngol co ga nac meel dox ne notaque padzeela, lëë mendox ga, lëë Satanás ga, ma ne scataa tibaque noquidie miech; hor co laa zho bzonëz ma nëz lo guidzliu, grë xanjl dox ma.

¹⁰ Dzigo bin naa, nguiedz zëëb tib tsi men co gbaa, rnee me:

¡Lëëw nagon!

¡Nasi laa dze ne ycaaniapaa Dios zha ne ngab lo me, laa dze co bdziñ!

Nasi laa me blu poder ne rap me, nasi laa Men ne pxeel me lo guidzliu ga gnabey lo grëse zha ne ngab lo me.

¡Laa me benxoonle mendox!

Ma ne scataa dze guieel nolisqui dien pe run zho,

nac zho zha ne nacgrë ne.

¹¹ Peet brieelod ma niun ma zho, sac niapse men ne nac Carner yeen ne gut lo cruz ga bnalo zho;

ni lalnu ib bdziebd zho, bnee zho lo miech cho nac me,

bleeladz zho xquie|mban zho, no zho haxta beet miech zho.

¹² ¡Gacxe waa tib guie|bley nroob ne rac gbaa niina!

¡Grëse to ne nac to zha ne no gbaa, golley!

¡Per probsaxe grë zha ne no lo guidzliu, sac laa mendox co tsiesacsi zho!

Ntseeb rac ma laa ma zie nëz co, rien ma riaanndraa nroob dze ne sonlaa ma.

¹³ Zeene gon ma sca bzonëz zho ma lo guidzliu, dzigo ptsidil ma wnaa ne gop mëëdbgui co. ¹⁴ Nacne bzoob zho chop xiil me, lëëdaa xiil msidoo; par grieelo xoon me

lo ma, guey me dan zit ne nole diidz gan zho me dipse len tson iz grol co. ¹⁵ Gocladz ma nsiloow ma me, blee ma tib nis naal ro ma, pale tib guiubee ro, ¹⁶ per psaand guidzliu me, znuse bzhal low psi grëse nis naal co.

¹⁷ Horco mazdraa blëënie ma me, psilo ma noguib ma zha csacsi ma grëraa zha ne ziaad lo xtii me. Lëë grë zha co zienal miñe rnabey Dios, ni rdziebd zho rlu zho xnëz Jesús no zho. ¹⁸ Nacne güey ma, bzo ma ro nisdoo.

13

Brieequia chop ma ntseeb

¹Tibaque zeene gon naa laa tib ma nroob brieequia lo nisdoo co, ntseeb niaa ma. Ncuane gdieb ne rlu ma, gadzraa guic ma zob ni zob tsii zhoz ma; tibga coron zob tib tib zhoz ma. Gzase guic ma quia diidznë ne rneenë ma Dios. ²Rna ma zig rna grë meedz rabon, per ni ma niaa zig niaa ni os, laa ro ma niaa zig niaa ro meedz. Dzigo bzo ma nizhnie co ma guiaan ma xlugar ma co, male gnabey.

³No tib guic ma no tib mdel nroob, rlu mer niet ma zeene sca goc guic co ma. Min co gon miech, grëse zho psilo zho rleyne zho ma, mine rnabeytaa ma zho, run zhow. ⁴Horco grëse zho rleyne zho ma nizhnie co, rquitsgzhil zho lo ma, rdeed zho xquizh lo ma bzo ma ma ntseeb co; scasaque rquitsgzhil zho lo ma ntseeb co, rnee zho:

—¡Tsodraa stib zha zig luu! ¿Cho dien grielo tilnie luu?

⁵Dzigo rëb ma nizhnie co lo ma gnee ma grë diidz dox, grë diidznë, gneenë ma Dios; bdeed ma co diidz gnabey ma lo guidzliu dipse len tson iz gro. ⁶Nacne psilo ma rneenë ma Dios, rdzibdee ma me, rdzibdee ma grë zha no gbaa ne. ⁷Grë zha ne no lo guidzliu, zha ne ngab xnëz Dios, bdeed me diidz psacsi ma zho, haxta beet ma zho; masaque ma bnabey grëse miech ne ndxie lo guidzliu. ⁸Laa grëraa miech, güey zho güeygan zho ma, lëë grë zha co quiad lë lo xlibr men ne nac Carner yeen ne gut ga. Haxta zeene biala guidzliu no libr co, lo co quia lë grëse zha ne ygaa guielmban ne gdzind dze lozh.

⁹Lo grë to ne nac to zha ne rnalo Dios, zha ne no liaadz mine none naa nu, golquiaadiag mine gne naa nu ganle: ¹⁰Zha ne gnaaz to co zho to ladzguiib, yeque zho zio zho ladzguiib; zha ne csacsigaa to, tel zha gut zho to, scaque gut miech zho. Gacbande to sca, sac gon ga glu to nli rnalo to Dios, nli zlëb to tel pe nactaa guielnë ne gan to.

¹¹Blozh ga, gon naa brieequia stib ma nroob lo guidzliu, scaque ntseeb niaa ma, zob chop zhoz ma zig zob zhoz carner, per

ncuane gdieb ne zeene laa ma roptsie. ¹²Ye ma rap ma poder, squi zo ma ne no mdel nroob co guic rnabey ma tel zha racladz ma; bnabey ma yquitsgzhil grëse miech lo ma co. ¹³Ncuane gzee zdoo miech run ma, haxta brielo bnabey ma biet gui gbaa bliala lo guidzliu. ¹⁴Ne scataa grë ncuane ro ne rrielo ma run ma, pquidie ma miech, bnabey ma zho bzaa zho tib mdio zig niaada ma ne bdedlaa lo guielgut ga, ma ne scataa nat guic ga bga.

¹⁵Blozh ga, bdeed ma xquielmban mdio co, parne grielo gneew. Bnabey ma guet grëse zha ne soliaadz yquitsgzhil low, ¹⁶ni bnabey ma grëse miech güey zho tib bey, yase yquian nia derech zho, yquiaa-gaaw quia zho; grëse zho zigtaa zha gola, zigtagaa zha lasa, zigtaa zha ne rapchena, zigtagaa zha ne peet rapda, zigtaa zha ne run xtsiin bea, zigtagaa zha ne choot rnabeyda. ¹⁷Zha ne tsod bey co, grielod gun zho wzi niicle grielodgaa cto zho; sac bey co rlu cho nac zha ne ngab lo ma, lëë lë ma ga, lëë número co rlu zha lë ma. ¹⁸Tib lë miech nac número co; xoop gayoo tsongal xoop naca. Zha ne ligier, zha ne niini, zien zho cho nac ma co.

14

Biil tib gayoo chooptap mil zho

¹Tibaque zeene gon naa men ne nac Xcarner yeen Dios ga zo guic Gui Siön, miech guizhiu ne zonie me ga; lëë grë zha co nac tib gayoo chooptap mil zha ne quia lë me guic ga, grop me Pxoz me. ²Horco bin naa tib bi nroob gbaa, zig rio bi rrieengaa tib nis naal tib ro quie, zig ratsiegaa grë nguzidox, ni bin naa ndal tsi zha co zëëb noyool zho tib cant, rlu niapse arp noyoolnie zho cant co. ³Tib cant cuba, laa zho noyoolala lo men ne zob lo xcan ro co, zaatne zo gza tap bult mban co, zaatne zob grë mengol co. Loxaque tib gayoo chooptap mil zha ne pcuee lad grë miech guidzliu ga, zha cose brielo pquiab lo cant co. ⁴Sac zha co ib beenctald xtol, rrieequia nac zho zig tib wnaa ne bgaald mgui; tibaque zo zho lo Men ne nac Carner yeen co, zaatne zieetaa me. Masaque nac zho lo Dios, ni lo men ne nac Carner co, zig tib nex ne glojaa

riet riogon lo me. ⁵ Biod dze ne nquidie zho, mbe zdoo zho, mbe lo zho nēz lo me.

⁶ Horco brieequia tib anjl nosiibe zhan gbaa, ney me Diidz Ndzon ne rdeed guielmban, diidz ne gdziṅd dze nitlo ga; laa me ziaad par gnee mew lo grēse miech ne ndxie dipse lo guidzliu. ⁷ Nguiedz zēēb tsi me, rnee me:

—iGolguien golgon mine rnabey Dios, ine golleynie me, sac gon laa dze ne gun me guielwxtis bdziṅle! Ine golquitsgzhib lo me, golgan ganle me bzaa gbaa, me bzaa guidzliu, me bzaa nisdoo, me psan grēse zaatne rlan nis.

⁸ Zhits anjl co nal stib anjl, nguiedz rnee me:

—iNasi laa guiedz Babiloin nitlo! iGuiedz nroob ne scataa pquuil grēraa guiedz, been grē menguedz co ncuaan ndzab ne beena, pxina guic zho!

⁹ Zhiits co nalaque stib anjl, scaque nguiedz zēēb tsi me, rnee me:

—iGrēse zha ne yquitsgzhib lo ma ntseeb ne brieequia lo nisdoo ga, yquitsgzhib zho lo mdio ne niaa zig niaa ma ga, gdeedgaa zho diidz yquia xbey ma nia zho, yquiaa-gaaw quia zho, ¹⁰ ib tedsod ye zho ygaa lo grētaa guielnēdox ne csiaab Dios! Squi zobwi grē xanjl me, squi zobwi Men ne nac Xcarner yeen me, laa zho guey lo guidox ne rieguial zho, zaatne tibaque quiayazbel tiblo ncuaane rtsuu lē zufr. ¹¹ Dze guieel cso laan ne tsec guidox co, ni palal gapd zho descans ga; sac sca pquitsgzhib zho lo ma ntseeb co, pquitsgzhib zho lo mdio ne niaa zig niaa ma ga, ni pquia zho xbey ma. ¹² iGa naganle gan grē zha ne ngab lo Dios, zha ne mban zigne rnabey me, zha ne tiblque zianaḷ zhiwseed Jesús, zeena gacband zho niicle tel pe nactaa grē guielnē ne noyan zho!

¹³ Dzigo bin naa zēēb tib tsi men co gbaa, nē me:

—Pquiaa mine gni naa nu.

Nēchaa me:

—Dichos grēse zha ne rnalo Jesús, niicle niinaga guet zho.

Pquiabaque Espiritu Sant, rnee me:

—Nligaa dichos zho, sac grē guielnē ne bded zho, nataa laaw blozh; nasi laa zho ygaa guielnzaac nroob ne gdeed Dios lo zho, porne wban zho zigne rnabey me.

¹⁴ Zeene bui naa stib, dzigo laa naa gonle tib xcow nquits; lo xcow co zob tib men co, rlu me zig rlu Men ne pxeel Dios ga biaad lo guidzliu. Zob tib coron or guic me, ni nzhen me tib yaguiits nroob.

¹⁵ Dzigo brieet tib anjl len yadoo ro ne zob gbaa, nguiedz bnee me rēb me lo men ne zob lo xcow co:

—iNinaga blooyaguiits grē zhob ne squitaa zēēb lo guidzliu! iSac gon gol-lew, laa dze ne tsasa bdziṅle!

¹⁶ Dzigo pteed men co yaguiits dipse lo guidzliu, ptop me grēse zhob co.

¹⁷ Blozh ga, brieet tib anjl len yadoo ro co nzhen me tib guib hoz, rlupaa per nli ndox low.

¹⁸ Loxaque brieet anjl co, laa anjl ne quianap gui ne ndziib lo pcoog brieequet; nguiedz bnee me rēb me lo anjl ne nzhen hoz ga:

—iNinaga pchug grēse mzhiig uv ne squitaa zēēb lo guidzliu, sac gon laaw gule!

¹⁹⁻²⁰ Horco znuse pteed anjl co hoz lo guidzliu, pchug me grēse mzhiig uv co, güeycodzēē mew tib len pil nroob ne zob tib lad ro guiedz. Ga güeyzēēni zho grē uv co, ptaadz zhow; dzigo ren naaldox ne brieet zhan pil co, masaque lal ne rzēni miech xoop ngbidz, lal ga wbiig lo ren co igo pil co; tel niaca mine sēēb tib guay low, zdziṅa haxta zhan cho ro ma. Rrieequia sca nagon gac mine gnabey Dios ted grē zha ntseeb.

15

¹ Tibaque zeene gon naa, ncuaane ro, ncuaane gzee zdoo ne goc gbaa. Brieequia gadz anjl, tib tib anjl co tibga guielnē guiaadnie me ted grē miech ne ndxie lo guidzliu; guielnē co lozh cueezhian Dios miech.

² Dzigo gax lo naa gon naa tib dzoon miech, masaque rquiabni, masaque rna gui zaatne zo zho, nēzrii nēzrec rac lo co, pale lo nisdoo. Lēē grē zha co been gan, pquitsgzhibd zho lo ma ntseeb co, pquitsgzhibd zho lo zhimdio ma, niicle biodgaa zho xbey ma. Grēse zho tibga xarp Dios nzhen zho, ³ quiayool zho zig biil grē zha ne psilaa Moisés Egipt. Rley zho, sac niina laa Xcarner yeen Dios psilaa zho lo ma ntseeb co; rnee zho:

Dios, luu ne nac luu men ne grësew rrieelo run,
ncuaane nroob, ncuaane gzee zdoo miech,
nac grë ncuaane run luu.

Luu nac men ne rnabey,
lo grëse zha ne ngab lo luu, niapse diidzli
rnee luu, niapse mine nonguiel rnabey luu.

⁴ ¿Zha rna zha ne dien gdzieebd luu?
¿Zha rna zha ne gleyd goolnie luu?
Sac luuse nac men mbe zdoo, men ne ni tib dol rapd.

Grëse guiedz ne ndxie lo guidzliu,
zriee miech guiaad zho yquitsgzhil zho lo luu;
sac nasi laa luu blu zha run luu guielwxtis.

Gadz anjl ne pxeel guielne lo guidzliu

⁵ Horco gon naa bzhiäl zaatne nac Lu-gar Nda len xyadoo Dios gbaa, ⁶ ga briece gza gadz anjl ne guiaadnie guielne ne no guiaad lo guidzliu ga. Ine nquitsbie rna xab gza anjl co, haxta rzëeg lada, ndxiega tib cinch or haxta ncaan len zhiw me.

⁷ Dzigo wbig tib bult mban co, bdeeda tibga cop nroob niaa niapse guieb or lo tib tib anjl co; len cop co ga nodzë grëse guielne ne nac xquielblëe Dios, men ne gdziind dze guet. ⁸ Horco grëse xquielndzon Dios, grëse poder ne rap me, biodzë len yadoo co, rluw zig rlu tib gox; choot brieelodraa nzëeb len yadoo co, haxta blozh gon miech gza gadz guielne ne güeynie gza anjl co.

16

¹ Dzigo bin naa guiedz zëeb tib tsi men co len yadoo ro co, bnee me lo gza gadz anjl co, rëb me:

—Goltsie, goltsiexiee gza guielne ne nac xian Dios i lo guidzliu.

² Dzigo briece tib anjl co, güey me, güeylaat me xcop me lo guidzliu, hor co grëse zha ne noquitsgzhil lo zhimdio ma ntseeb co, zha ne quia xbey ma ga, psilo biall dipse lad zo, yoobdox ne rquia zho.

³ Güeyaque stib anjl co, bdziin me blaate me xcop me lo nisdoo, zeene laa ncuaan co bzhiie lo nisdoo, grëse nis co biaalo ren ctoo; ni stib ma ne no low biaan draa.

⁴ Laa min co bded, zeene laa stib anjl ne rac zho bion ga güey, güeylaat me xcop me grëse guiubee, grëse zaatne rda nis; nacne

grëse nis co biaalo ren. ⁵ Dzigo bin naa tsi anjl ne rnabey nis, rëb me lo Dios:

—Dios, ible rieguial mine been luu i; luu ne nac luu men mbe ne ni tib dol rapd, men ne tibaque nac, men ne gdziind dze gdzëe. Lëew i been luu, squi beenquizh luu grë miech qui mine zëeb zho, ⁶ sac gon blactaa grë zha ne ngab lo luu, blactaa grë zha ne biadteed xtiidz luu psacsi zho, pxiee zho xchen grë zha co. Min qui rquiin zho, guie zho grë ren qui na.

⁷ Zëebaque tsi stib men co zaatne nac lo pcoog len yadoo co, rnee me:

—iDios, luu ne nac luu men ne nroob ne grësew rrieelo run, nligaa ible rieguiala squi beenquizh luu grë zha qui mine been zho!

⁸ Blozh ga, briece stib anjl ne rac zho tap ga, güey me güeylaat me xcop me lo ngbidz, hor co gocnlëëraa xbiini ngbidz, ptsuuw miech. ⁹ Niicle scale nodzu grë miech co, per ib biablod zho, laa ne nsaan zho xquielntseeb zho, nleynie zho Dios, lel psilo zho rneene zho me, pe nacne noxee me grë guielne co.

¹⁰ Zeene briece stib anjl co, güey me güeylaat me xcop me zaatne zobnabey ma ntseeb ne briecequia lo nisdoo ga, dzigo znuse goc tib ncowdoo grëse guiedz ne rnabey ma. Lo yoobdox ne rquia grë miech co, haxta rowye zho ludz zho; ¹¹ per niicle scaw, ib psaand zho xquielntseeb zho, lel psilo zho rneene zho Dios, pe nacne scataa rquia zho yoob, pe nacne scataa quiayaal gdib lad zho.

¹² Zeene laa anjl ne rac zho xoop ga güey, güeylaat me xcop me len guiubee Eufrates, hor cogazh wbidz nis naal ne zhoob guiubee ro co. Nacne bio nëz ted grë men ne zobnabey grë guiedz ne ndxie nëz ne rlan ngbidz.

¹³ Horco gon naa tson me yozh, niaaw zig niaa mbiich, tiba briece ro ma ngol nizhnie co, tiba briece ro ma ntseeb ne briecequia lo nisdoo ga, laa stiba briece ro zha ne noteed xtiidz ma ntseeb co. ¹⁴ Chen mendox nac gza me co, runa grë ncuaane nroob ne rzee zdoo miech; dzigo güeya güeyzodiidzniew grëse zha rnabey ne no dipse lo guidzliu, parne tipse gac zho tilnie zho men ro ne nac

Dios, gal dze ro ne gdeed me mine rieguial tib tib miech.

¹⁵ Tibaque zeene laa men ne rnabey ne ga bnee, në me:

—Zhile gon laa naa guial. Nsin sca golsso, sac zigne racnand bizhuan yu pa hor seeb ngbaan yu, scaque gacnande to pa horpaa guial naa. Dichos zha ne yquiambez naa, ine mbe xab zho nacw zhow; sac gon mban tsie zho telne scase zo zho zeene laa naa glanso, ni lala tib guieltodox ga grieequia zho.

¹⁶ Dzigo pcaalsa gre zha rnabey co gre xmenquib zho, zaatne rnee zha Israel Armagedon.

¹⁷ Horco guey anjl ne nac zho gadz ga gueylaate me xcop me lo me ne rree lo guidzliu; dzigo bnee tib men co zaatne nac lo zhixcan Dios len yadoo gbaa ga, nguiedz zeeb tsi me rnee me:

—iNasi nagon ledaaw blozh bza!

¹⁸ Dzigo psilo nezrii nezrec riab belye, loxaque bi rio ratsie nguzi. Lo belye co, lo bidox co, laa tib zhodox psiloque bni; wlaltaa ne ndxie miech lo guidzliu, gard gni tib zhodox zig min co. ¹⁹ Gre guiedz ne ndxie lo guidzliu, per ni rludraa zha niaaw; zig nac guiedz nroob ne nac Babiloin ga, haxta tson le goca. Horco beenquish Dios zha Babiloin, gretaa guielntseeb ne zeeb zho; psiaabzi me zho por gretaa zhian ne pquiaa zho me. ²⁰ Grese guidzliu win ne no lo nisdoo, rludraa dien yow; gre gui glaa, loxaque nezrii nezrec bliaala. ²¹ Min co blozh, zeene psilo bliaal tib guiequiedox lad gre miech co, tib tib guiequie co new maase choo kil. Gon zho scataa noyab guiequie co, laa zho noque rdzibdee zho Dios.

17

Zob tib wnaa yozh lad tib ma ntseeb

¹ Lo gza gadz anjl ne sca blaate gre guielne co lo guidzliu, lad co brie tib me biaad, ne me lo naa:

—De ganle, zeena glu naa lo luu zha nactaa caxtigw ne ygaa wnaa yozh ne ran luu squi zob lo grese nis ne no lo guidzliu.

² Lee wnaa qui pxin guic grese miech ne no lo guidzliu gueynal zho gretaa guielyozh ne been me; haxta gre zha rnabey, gueynal min co.

³ Sca nolu Espiritu Sant gre ncuuan co lo naa, dzigo gueynie anjl co naa tib dan zit. Ga gon naa laa wnaa co zoble lad tib ma nroob, ntseeb niaa ma co, zob gadzraa guic ma ni zob tsii zhoz ma; gdipse ma rna nizhnie, gdipse lad ma quia gre diidz ntseeb ne rneene ma Dios.

⁴ Glaa glaa zhits ma ntseeb co zob wnaa co, masaque nizhnie nlaan, nizhnie ren rna xab me, loxaque gre guib or, gre quie rbebni, gre quie perl, ngalguiee lad lar co. No tib cop nroob niaa me, niaaw niapse guib or, rriequia leen co nodze gretaa guielntseeb, gretaa guielyozh ne run me. ⁵ Ni quia bla lan diidz quia me, rneew: “Lee guiedz nroob ne nac Babiloin nu, guiedz ne nac xniaa grese wnaa yozh, guiedz ne nac xniaa grese zha ne run ncuane mbixladz.” Lee le me ga, hor coraa bzhoobnen zha nac le me. ⁶ Dze rwi naa lo me, dzigo gon naa rac me zig rac zha ne rzudz. Nziandox zha ne no xnez Jesus beet me, rriequia gretaa ren ne pxiee me ga sca noyun me. Bzee zdoo naa, ni bdzieeb naa gon naa zha rac wnaa co. ⁷ Dzigo nechaa anjl co lo naa:

—iPe nacne rdzieeb luu? Na ganle gni naa lo luu cho nac wnaa co, cho nac ma ne sca zob me lad ga. ⁸ Padzeela no ma ntseeb co, guien ma niinapaa, per zhile laa ma grie leen guerdoo ne niogyu ma, laa ma grie ga parne diunavez nitlo ma; gre zha ne quiad le lo libr ne zhobnee cho nac zha ne ygaa guielmban ga, seedox zdoo zho zeene gan zho laa ma griequia stib, sac tibaque nan zho gutle ma. ⁹ Wen wen pquiaadiaga ganle: gza gadz guic ma ga, rriequia leew nac gza gadz gui win ne zob wnaa co zobnabey me. ¹⁰ Ni rriequiaque lee gadz zha ne rnabey ga: gaay zho bnabeyle, tib zho quianabey niina, laa stib zho naraa gnabey; per zeene laa zha co guiaad, zhis dze ne gnabey zho. ¹¹ Lozhse gnabey zha co, laa ma gnabeyaque, ma gac zha rnabey co xon, niicle ne yele ma ga goc zha co gadz; gataa laa ma nitlo.

¹² Zhoz ma, rriequia lee stii zha ne gnabey ga, gzase zha co naraa gnabey zho, tipse ycaania zho guielrnabey gza zho ma. Zhisaque dze sca gnabey zho, ¹³ dzigo laa gza tsii zha co guiaan diidz gzo zho ma, ma

gac zha nroob lo zho. ¹⁴ Zacnie zho ma, grëse zho tsie tsietilnie zho Xcarner yeen Dios, per znuse guṅ meṅ ne nac Carner yeen co gan lo zho; sac me nac meṅ ne rnabey lo grëse zha ne rnabey, lo grëse zha ne non. Grëse zha ne tsienal zhits me, tsietilnie zho ma co, lëë grë zha co nac zha ne bzooblo Dios bredz me zho bgab zho xnëz me, ni ib psaand zho me.

¹⁵ Blozh ga, nëchaa anjl co lo naa:

—Lo grëtaa nis ne goṅ luu sca zob wnaa yozh co, rrieequia lëë nis co nac grëse guiedz, grëse dii miech ne ndxie lo guidzliu. ¹⁶ Per zdziṅ dze lëëque ma ntseeb co, tilnie wnaa co, grë ma gza tsii zha ne rrieequia nac zhoz ma ga; zlēenedox zho wnaa co, sanwin zho me, haxta xab me cuee zho, znitlo zho me, sëëg zho me lo gui. ¹⁷ Ib Dios csiaab guic zho gnitlo zho wnaa co, ni meque csiaab guic zho gzo zho ma co gac ma zha ne gnabey lo zho; laa me guṅ miṅ co, parne grieequia grëse miṅe bneelee me no gac. ¹⁸ Laa wnaa co, rrieequia me nac guiedz ro ne rnabey lo grëse guiedz ne ndxie lo guidzliu.

18

¹ Blozh ga, goṅ naa laa stib anjl ziad-zëëb gbaa, rlu tib anjl nona, dipse lo guidzliu biab biinidoo ne ziaadnie me, ² nguiedz zëëb tsi me rnee me:

—iNasi laa guiedz nroob ne nac Babiloin ga nitlo! iLoxaque mēndox yquianzë ga, loxaque grë ma guix, loxaque grë ma mbixladz cuew! ³ Laaw nitlo, sac noquiila grëse miech ne ndxie lo guidzliu, grëse zha ne rnabey, quiayun zho grëtaa guielyozh ne runa. Lo grëtaa guielyozh co quiayun ricwa grëse zha ne run wto; quiaxin grë ncuaan co zho, masaque quiayuna zho zig run nziu.

⁴ Dzigo zëëb stib tsi meṅ co gbaa, rnee me:

—iGrëse to ne nac to miech ne ngab xnëz naa, golgon diidz, golriee guiedz qui! Ib gunde to dol ne quiayuna; zeena ygaade to grëtaa guielnë ne ygaaw, ⁵ sac nroob-dox nac grë dol ne quiayuna, telne nica ncuaane cue monton, rrieequia haxta gbaale rdziṅ guic monton co; gane ib ted-sod zunquizh Diosa grëtaa guielntseeb co.

⁶ Gacxe na grëse miṅe beena miech, miṅcoque saca. Grëse tel zha psacsiw miech, chop lalga miṅe teda. ⁷ Zigne squitaa now lo grëtaa ncuaane racladza; scagaa na guielnedox ne gana, haxta goona lo grëtaa guielnë co. Niats raca rneew: “Naa rnabey. Nacd naa cho zha ne zotib, zig rzac grë wnaa viud; naasi gdziṅd dze ne tso naa guielnë.”

⁸ Nli squitaa niats raca, per zeene guiaba ladznia guielgut, ladznia gbin, ladznia grëraa guielnë ne gana, tib dzeque lozha. Ni lozh ga, haxta zeca lo gui; miṅ co gnabey Dios teda. iMe nac meṅ ro ne guṅquizha grëtaa miṅe beena! ⁹ Grë zha ne rnabey grë guiedz, zha ne scataa bley been grë guielyozh ne runa; zeene gan zho goxdoo ne rso noyeca, mban gac zho, zoon zho zio zho xquielnëw. ¹⁰ Zdieb zho gan zho grëtaa guielnë ne nodeda ga, lo dzeb co, ni lalnu gbigd zho. Lëë gdib so zho goptsie zho, guiab zho: “iProbsaxe luu Babiloin, guiedz nroob, guiedz non nac luu! iPa brieë guielnë qui squi znuse nitlo luu!”

¹¹ Grë zha ne run wto dipse lo guidzliu, ye zho zio zho xquielnëw, mban gac zho guienndraa cho si lo zho. ¹² Sac masaque lëëw rzi:

guiib or,
guiib plat,
grë quie non,
grë perl,
grë lar niazh,
grë lar sed,
grë lar nizhnie nlaan,
grë yag ne nex rlaa,
grë ncuaane niaa marfil,
grë ncuaane niaa grë yag wen,
grë ncuaane niaa guiib,
grë ncuaane niaa brons,
grë ncuaane niaa quie mármol,
¹³ grë blad canel,
grë guizh scuaan,
grë yaal ne ndzon rlaa,
grë guizh, grë nceit ne nex rlaa,
grë nziu,
grë nceit,
grë zhobxtil,
grë rin niazh,
grë ma ne rey yo,

grë mëcwxiił,
grë carret,
haxta grë miech ne runzhoo dziin lo samiech.

14 'Zrieequia zha ne guiab lo guiedz co: "¡Bdzinaque dze ne blozh luu, pa sëraa scataa yquianie luu grë ncuaañe rdziladz luu! ¡Grëtaa ncuaañ niazh, grëtaa ncuaañe rap luu, gdziñdraa dze ne gbiire gañ luuw!"

15 'Grë zha ne run wto ga, zha ne scataa gocricw lo grë wto ne been zho guiedz co, zdieb zho, zit so zho gañ zho grëtaa guielñe ne nodeda. Zio zho xquielñew, haxta zoon zho 16-17 guiab zho: "¡Probsaxe guiedz ro qui, squi znuse bñitlow! Biopaa dze gocnona, masaque goca zig tib wnaa ne racw grë lar niazh, grë lar nizhnie nlaan; wnaa ne rna grë guiib or, grë quie non, grë quie perl, rio yañ, rio yañ nia."

'Grë zha ne rnabey barcw, grë zha ne rsëew, zha ne no leña, ni grëragaa zha ne run dziin lo nisdoo, zit so zho gañ zho tsec guiedz co; 18 zeene gañ zho goxdoo ne rso noyeca, ziaab zho: "¡Zha rnaraa dze ne dziañ ne stib guiedz nroob zig guiedz qui?" 19 Mban gac zho, zio zho xquielñew, zoon zho, squiaadan zho redz, guiab zho: "¡Probsaxe guiedz ro qui squi znuse bñitlow! Lo grëtaa dimi ne pquianiew, blactaa beenricwa ne grë ne grëraa zha ne run dziin rii."

20 'Sca nagon nitlo guiedz co. Grëse to ne nac to zha ne no gbaa, grëse to ne nac to zha ne ngab lo naa, grëse to ne nac to zha ne pxel naa güeynee xtidz naa, zha ne güeyteed xtidz naa, zeene gañ to laa guiedz co nonitlo, golley, sac gon ga gunquizh Dios miech ne no ga grëtaa miñe been zho to.

21 Zeene blozh bnee men co, dzigo gon naa tib anjl, rlu tib anjl macisa, znuse blis me tib quie nroob, niaaw zig niaa quie molin zhobxtil dipse gan bron mew lo nisdoo; blozhse bron mew, nëchaa me:

—Squi nagon nitlo guiedz ro ne nac Babiloin ga, gdziñdraa dze ne gbiire gañ miecha. 22 Masaque nroobladzdoo ne raca niina, loxaque di noyac grë ro xnëza, zaatne noyool zho vihuel, zaatne noyool zho bzie, zaatne nocuedzgaa zho trompet, nëzrii nëzrec rac miech zie zho lo xtsiin zho, loxaque lo grë quie molin rzedz nozuu

zho zhob; per gal dze co grësew lozh. 23 Squitaa biini ne rquiaw niina, squitaa tibaque quiayac guieltsieela, per gal dze co ncowse gnaw, pa sëraa gac lniw. Laaw nitlo, sac blactaa noyungüeta miech ne no grëraa guiedz ne ndxie lo guidzliu lo grë zhiwseed mendox; pe zhidaa noyunricwa grë zha ne run wto por grë wseed co; 24 pe zhidaa miech zëeba. Nzian zha ne ngab lo Dios, nzian zha ne riadteed xtiidz me, rnabeya ret zho.

19

1 Zeene blozh ga, bin naa zëeb ndal tsi men co nëz gbaa, rlu miech guizhiuw, nguiedz rnee zho:

¡Zha ndzontaa xDios ne! Me nac men ne rsilaa miech, parne ygaad zho lo caxtigw.

Me nac men ne rap poder,
me nac men ne rieguial dziuunnon ne;

2 sac gon mesi run me guielwxtis zigne no gaca.

Gacxe waa, sca gunquizh me guiedz qui grëtaa guielyozh ne noyuna, grëtaa xchen zha ne ngab lo me, zha ne bnabeya gut;

rrieequia naca zig tib wnaa yozh,
quiayungüeta miech quiayunctal zho xtol zho.

3 Blozh ga, biire bin naa tsi zho, rnee zho: ¡Zha ndzontaa Dios! ¡Min qui nagon rieguiala, gdziñd dze ne lozh csow gox!

4 Horco laa gza galptap mengol co, ni gza tap bult mban co pquitsgzhil lo Dios lo xcan ne zob me ga, haxta bzooblo zho lo liu, beennon zho me, rnee zho: "¡Nliw! ¡Luuse nac men ne ndzon!"

5 Zëebaque stib tsi men co zaatne nac lo xcan co, rnee me:

¡Grëse to ne nac to zha ne quiayun dziin lo me,

zha ne rien men non nac me,
zigtaa zha wina, zigtagaa zha nona,
golgoolnie me!

6 Dzigo wbiire bin naa tsi grë miech guizhiu co nëz gbaa, rio bi zëeb tsi zho, pale zeene rio bi nisdoo, zeene riogaa bi rnee grë nguzidox, rnee zho:

¡Golgotsaa dzioolnie ne me!

¡Me nac xDios ne, me nac men nroob ne rnabey!

⁷ Golgotsaa gley ne, golgotsaa dzuuunnon ne me,
 sac gon laa dze bdziñ laa Carner yeen ne
 nac Xpëed me ga ctsieelnia;
 grë zha ne ngab lo me,
 zha ne rreequia nac ndzooop ne ctsieelnia
 Carner yeen co, laa zho nacwxable.

⁸ Masaque rlu zho zig tib ndzooop ne ctsieel-
 nia,
 ine nquitsbie, ine rbebni lar niazh ne nacw
 zho;
 me bdeed diidz got zho lar co,
 ga rlu ganle mban zho zigne racladz me.

⁹ Dzigo rneechaa anjl ne sca bron quie co
 lo nis:
 —Wen zie grë zha ne bredz Dios tsie lo
 xquieltsieel men ne nac Carner yeen co.
 Bnabey me naa pquia naa diidz co,
 blozhse ga, nëchaa me lo naa:

—Xtiidz Dios ga gon, me rneew.

¹⁰ Horco pquitsgzhil naa lo anjl co ni
 naa gunnon naa me, per bzhiguiel d me.
 —¡Coo! —në me lo naa—. ¡Guso i! Gocnan
 ganle ye naa tib ngundziinse nac naa lo
 Dios, nac naa zigne nacaque luu grë luu
 grëraa zha ne squi noxco zienal mine nac
 zhiwseed Jesús. Dios none gunnon luu, sac
 gon tib ngundziinse nac naa bzet naa min
 co, lëe gdib bne naa ganle zha nac xtiidz
 Jesús.

¹¹ Dzigo hor co gon naa bzhial zhan gbaa,
 ga briequia tib men co zob me lad tib
 guay nquits, zëeb diidz niapse diidzli rnee
 me, sac run me guielwxtis zigne no gaca,
 ni rdilnie me zha ne rieguial tilnie me.
¹² Masaque rbebel bziaalo me, nzian xcuaa
 coron zob guic me, ni quia stib lë me quia
 me, loxaque mese nan dien zha nac lë co
 me. ¹³ Rnadraa xab me di ren, lëe me ga
 rnee zho: Xtiidz Dios. ¹⁴ Ndal grë men-
 guuib ne no gbaa nal zhits me, ye zho niapse
 guay nquits zob zho; niapse lar niazh nacw
 zho, ine nquitsbie rna grë lar co. ¹⁵ Rlu
 choot grieelod gacndaan lo me, masaque
 zob tib spad lots ro me, laa me nzobro spad
 co parne tilnie me grë guiedz ne gacntseeb
 lo me. Masaque me gnabey grëse guiedz,
 ndip gac xtiidz me, ni tib choot quiitsd
 mine gnabey me; zeene laa me gunquizh
 miech grë xquielntseeb zho, cxeel me zhian
 ne csiaab Dios ygaa zho, zun me zho zigne

run miech uv zeene rzëeni zhow. ¹⁶ Lad
 lar ne nacw me ga, ni tib cho cor me, ga
 quia cho nac me, rneew: “LËË MEN RII
 NONRAA LO GRËSE ZHA NON, ME RNABEY
 LO GRËSE ZHA NE RNABEY.”

¹⁷ Blozh ga gon naa zo tib anjl lo ngbidz,
 nguiedz zëeb tsi me rbedz me grëse maxiil
 ne row grë magut, rnee me:

—¡Ligier golcaalsa! ¡Goltë zeena yquiin
 to guielwagw ne gneedz Dios lo to niina!
¹⁸ Goltë zeena gow to grë zha ne rnabey grë
 guiedz, grë zha ne rnabey lo men-
 guuib, grë zha ne rnabey lo men-
 guuib ne zëeb diidz nac zha valor; goltë
 gow to grë guay, gow to grë zha ne rzob lad
 ma. Goltë gow to grëse miech, zigtaa zha ne
 runcunzhoo miech dziina, zigtagaa zha ne
 choot rnabeyda, zigtaa grë zha ne nac zha
 nona, zigtagaa grë zha wina.

¹⁹ Dzigo gon naa ma nroob ne briequia
 lo nisdoo ga, ma ne scataa ntseeb rlu ga,
 psilo ma ptop ma grëse zha ne rnabey grë
 guiedz ne ndxie lo guidzliu. Pcaalsa zho
 grë xmen-
 guuib zho, zha guizhiuw, laa zho
 brieie zietilnie zho men ne zob lad guay
 nquits co grë xmen-
 guuib me. ²⁰ Lo dil co,
 ga bgaa ma nroob co, ni bgaa zha ne pteed
 xtiidz ma lo miech; zha ne scataa squi zo
 ma been zho grë milagr co pquidie zho
 miech, bio guic zho bio zho xbey ma, ni
 beennon zho mdio ne rlu zig rlu ma ga.
 Zigtaa maw, zigtaa zha ne pteed xtiidz ma
 ga, nguia mban zho laa zho biab tib lo
 guidox zaatne noyec zufr. ²¹ Laa grëraa
 zha ne scataa gocnie ma ga, grëse zho gut
 lo spad ne nzobro men ne zob lad guay
 nquits co, hor co bdzinbe grëse maxiil ne
 row magut, güeytow ma grëse ngutoo co
 haxta biel ma.

20

Bnabey Jesús tib mil iz

¹ Blozh ga, tibaque zeene gon naa laa
 tib anjl biet gbaa, nzhen me tib liow, ni
 nzhen me tib caden. ² Dzigo bnaaz me ma
 ngol ne rna nizhnie ga, meel ne notaque
 padzeela ga, ma ne nac mendox ga, ma ne
 nac Satanás ga, bzoob me ma caden co;
³ con liow ne nzhen me ga pxal me tib ro
 guierdoo, psëeb me ma len guierdoo co.

Blozh ga dziits dziits psioog mew, zeena grielod griee ma tsiequidieraa ma miech.

Ga tsogyu ma dipse len tib mil iz, lozhse tib mil iz co ible laa ma no griee ga, sonlaa ma zniip.

⁴ Horco gon naa laa gre zha ne bzo Dios cobey pe nac xtol tib tib miech, laa zho bzob lo xcan ne rieguial sob zho. Gonaque naa xalm gre zha ne psacsi miech, bga zho yan zho, beet zho zho loxaque ne no zho xnöz Jesús ni bnee zho xtiidz me lo miech; gon naa gre zha ne bzhiguield nquitsgzhib lo ma ngol ne brieequia lo nisdoo ga, bzhiguield zho niunnon zho mdio ne rlu zig rlu ma, niicle bzhiguield zho nio zho xbey ma. Gon naa brieegan zho grese zho, par gbannie zho Jesús, gnabey me gre me zho dipse len tib mil iz.

⁵ Lëe gre zha co nac miech ne glopaa grieeban, laa grëraa mengut, zha co grieeban zeene laa tib mil iz co gza. ⁶ Dichos gre zha ne glo grieeban ga; lo Diosle ngab zho ga, noxtseebdraa zho guey zho gabil, masaque lo Dios, lo Jesús gun zho dziin, gac zho zig tib pxoz lo me; tipse gnabey me gre me zho len tib mil iz co.

⁷ Zeene blozh tib mil iz co, dzigo gon naa laa mendox brie zaatne nioogyu ma ga, ⁸ güey ma güeyquidie ma zha Gog, güeyquidie ma zha Magog, grese guiedz ne ndxie lo guidzliu güeyquidie ma miech, tipse been ma zho grese zho parne tilnie zho Dios. Miech guizhiuw, miech ne lëb ne glab new, gun ne cuent yuzh ne ndxie ro nisdoo, ⁹ ntseeb rac zho, grese zho laa zho bdzin zaatne ndxie guiedz ne rleyne Dios, zaatne no gre zha ne ngab lo me ga; per zeene laa zho ndxiele igo guiedz co parne gnitlo zhow, hor co bnabey Dios bliaal gui lad zho, bzëega zho grese zho. ¹⁰ Laa mendox, bnabey me bga ma bey ma lo guidox ne nac gabil, zaatne nole ma ngol ne sca brieequia lo nisdoo, grop ma co zha ne pteed xtiidz ma ga. Lo guidoxa, niapse zufr noyec lugar co, ga tsu ma dze guieel, gdzindraa dze ne griee ma ga; caxtigwdox ne ted ma.

Beenquizh Dios miech mine been zho

¹¹ Blozh ga, gon naa tib men co zob me tib lo xcan ro, dib nquitsbiese rna xcan co.

Zigtaa guidzliu, zigtaa gbaaw, zeene gona me znuse bichew, per bdzield pa niolana lo me. ¹² Grese zha ne brieeband glo ga, zigtaa zha nona, zigtaa zha wina, laa zho bdzin lo me. Laa zho ndxie ga, zeene laa lo bla libr co bzhial, ni bzhialaque lo mine quia lë zha ne bga guielmban cub ne rdeed Dios ga; hor co bgaase zho mine rieguial zho tib tib zho tel zha zhobnee lo libr co wban zho. ¹³ Grese zha ne biaan len nisdoo, blieequia nisdoo zho, gre zha ne bioliu blieequia baa zho; grese zho blieequia guielgut zho. ¹⁴⁻¹⁵ Blozh ga, zigtaa guielguta, zigtaa zha ne quiad lë len libr ne no lë zha ne bga guielmban ga, laa zho biobe lo guidox ne nac gabil; lëe guielgut brop ga.

21

¹ Dzigo gon naa tib gbaa cub, ni tib guidzliu cub; sac zigtaa gbaa ne rdziunbey ne, zigtaa guidzliuw, zigtagaa nisdoo gresew bnitlo. ² Grop lo naa gon naa laa Jerusalén, guiedz ne nacchen Dios ga, ziad-zëeb zhan gbaa brieew zaatne zob me; tib guiedz cuba. Tib guiedz nzhixcuaa naca, pale tib ndzooop nguieg dze ne rtsieelnia zho. ³ Dzigo bin naa nguiedz zëeb tib tsi men co zaatne nac lo xcan ro ne zo gbaa ga, rnee me:

—Nasi nagon laa Dios cuöz lo miech, nasi laa me gbannie zho; zanlo zho me, peet gunfaltraade lo zho. ⁴ Led yedraa niina pa glunë zho, led yedraa niina tsoxtseeb zho lo guielgut, led yedraa niina mban gac zho cuedz zho dien cho gun xyudar zho, led yedraa niina goon zho; grese nis ne zo lo zho zeene biin zho, niina laa me gunmbew. Grese ncuaan co, gdzindraa dze gan zhow.

⁵ Zëeb tsi men ne zob lo xcan co, rnee me:

—Grese ncuaane no niina ncuble naca, ni naa beencuba.

Blozh ga, nëchaa me lo naa:

—Grese diidz ne gni naa lo luu nu niina gon, pquiaaw, ib none gacnan miecha, sac ncuaane no gaca. ⁶ ¡Lëew nagon, grese mine no gac, laaw blozh ben naa! ¡Naa psilow, ni naa psiaala, naa nac zigne nac letr “a” ni letr “z” lo grese letr, “a” rsilow “z” riala!

¡Zha ne në rnab zhis, naa gded nis ne rdeed guielmban guie zho, ygad naa nis co lo zho, peet gacnonda! ⁷ Ni golgacnan

ganle, grëse zha ne gdeete diidz lo grë ncuaañe gunctal xtol zho, ible zгаа zho grë guielnzaac ne noyaquiet nu, naazhal gbannie zho peet gunfalte lo zho, masaque tib mëed gac zho lo naa. ⁸ Sangue grë zha ne rdzieb gban zigne rnabey naa, grë zha ne rbiche lo naa, grë zha ne run grë ncuaañ mbixladz, grë zha ne rut samiech, grë zha ne rionie zha ne led tsieeld zho, grë zha ne rleynie guielbruj, grë zha ne rleynie grë mdio, grë zha ne tibaque noquidie samiech, grëse zha co mine yгаа zho nac lo guidox ne noyec zufr ga; lëe guielgut brop ga.

Guiedz ne gdziñ zha ne ngab lo Dios

⁹ Lo gza gadz anjl ne bzheñ cop ne bio grë guielnë ne gon miech ga, biaadgax tib me lo naa në me:

—Dë ganle zeena gan luu ndzoop nguieg ne gac tsieel meñ ne nac Xcarner yeen Dios i.

¹⁰ Blozh ga, dzigo güeynie anjl co naa tib guic gui nroob, tib guic gui glaa, ga gon naa guiedz Jerusalén stib, guiedz ne naccheñ Dios ga, gonpaa naa bieta zaatne zob Dios, laaw ziad-zëeb gbaa. ¹¹ Masaque rbebela guielndzon ne rap me, lëedaa grë quie niazh ne lë jasp, ni rol rnaw lëedaa grë vidr. ¹² Rna tib biedz nroob, tib biedz glaa ndze igow, quia tsiipchop puert cho biedz co, tibga anjl zo quianap tib tib ro puert co, tib tib puert co neysew tib lë men goldoo ne goc xpëed Israel. ¹³ Tson puert co quia nëz ya, tsona quia nëz quiet, tsona quia ngali nëz ne rlan ngbidz, stsona quia ngali nëz ne rzëeb ngbidz. ¹⁴ Lo tsiipchop quie nroob ne zob biedz co, tibga lë xpoxtl meñ ne nac Xcarner yeen Dios ga quia lo co.

¹⁵⁻¹⁶ Rlupaa cuadrad niaa guiedz co; dzigo gon naa no tib bar ne rbix nia anjl co, niaaw niapse guuib or, psilo me ptiix me guiedz co, ptiix me biedz ne ndze igow ga, ni ptiix me xpuerta. Zeene blozh ptiix mew, tib tib nëza no gaay gayoo choo kilómetro, lal ne rzëni miech tsiipchop ngbidz; lal ne zioola lalga nzhen, ni lalgaque glaaw; ¹⁷ laa xquielnaal biedz co nzhen lal ne rgaa tsiipchop docen dzit nia ne; ptiix mew zigne rtiixaque ne nac ne miech.

¹⁸ Niapse guuib or niaa guiedz co, zigne rne naa ga, rol rnaw lëedaa vidr. ¹⁹⁻²⁰ Biedz ne ndze igow ga, niapse quie niazh ne lë jasp niaaw; scaque gza tsiipchop quie ne naaz biedz co, niapse quie niazh ngalguieew:

tiba ngalguiee quie niazh ne lë jasp,
tiba ngalguiee quie niazh ne lë zafir,
tiba ngalguiee quie niazh ne lë ágata,
tiba ngalguiee quie niazh ne lë smerald,
tiba ngalguiee quie niazh ne lë ónice,
tiba ngalguiee quie niazh ne lë cornalin,
tiba ngalguiee quie niazh ne lë crisólito,
tiba ngalguiee quie niazh ne lë beril,
tiba ngalguiee quie niazh ne lë topás,
tiba ngalguiee quie niazh ne lë crisoprás,
tiba ngalguiee quie niazh ne lë jacint,
tiba ngalguiee quie niazh ne lë amatist.

²¹ Gza tsiipchop puert ne quiaw ga, tibga quie perl niaa tib tib puert co; nëzyu ne rded rol guiedz co, niapse guuib or niaaw, masaque mbe rol rnaw.

²² Ni tib yadoo gond naa, sac dipse lad guiedz co rleynie zho Dios, rleynie zho meñ ne nac Xcarner yeen me. ²³ Led yedraa ga rquiin xbiini ngbidz, rquiin xbiini mëe, sac masaque xquielndzon me, ni xquielndzon meñ ne nac Xcarner yeen me ga nac biini.

²⁴ Grëse miech ne ngab lo me, ine gziini biini co lo zho së zho lad guiedz co; zha ne bnabey grë guiedz ne bre lo guidzliu, bio dze zha goc zha non, per zeene gdziñ zho ga ye zho zunnon zho me. ²⁵ Led yedraa ga ycow liu, tibaque niini gnaw, tibaque gzhial gza xpuerta. ²⁶ Grëse ncuaañe mbe ne gocnon lo grë guiedz ne bre lo guidzliu, laaw gdziñ ga; ²⁷ sangue grë ncuaañe mbixladz gdziñda ga. Zig nac grë miech ne run grë guielntseeb, grë zha ne tibaque noquidie, gdziñd zhow; loxaque zha ne zhoob lë leñ xlibr meñ ne nac Carner yeen co (libr ne no lë zha ne yгаа guielmban cub ne gdeed Dios ga), zha cose gdziña.

22

¹ Blozh ga, blu anjl co tib guiubee lo naa, në me zha ne guie nis co, zгаа zho guielmban; mbe rol rnaw, haxta rbebel low. Merse zhan xcan ne zob Dios ni zhan xcan ne zob meñ ne nac Carner yeen co, ga rrie

guiubee co, ² rdeda groltaa nëzyu ne rded len guiedz co. Gropse nëz ro guiubee co zëëb yag ne rdeed guielmban, gzobse mëë rquia nex low, tsiipchop vuelt rdeeda nex tib len iz, haxta ye zhiblaga rquiin grë zha ne no ga, parne sacnëd zho. ³ Led yedraa ga no ncuaane ndziibdee, ga zo zhixcan Dios ni zo zhixcan men ne nac Carner yeen co; grëse miech ne ngab lo me, rleynie zho me runnon zho me. ⁴ Ranlo zho me, grëse zho quia lë me quia zho. ⁵ Led yedraa ga yquiin zho pe gziini lo zho, yquiingaa zho xbiini ngbidz, sac Dioszhal rziini lo zho, led yed ga ycow liu; ga gban zho gdziindraa dze ne grieë zho ga.

Ile ziaad Jesús

⁶ Dzigo nëchaa anjl co lo naa:

—Grëse ncuaane quiayan luu nu, ible ncuaane no gaca. Bui ganle Dios men ne rdeed guielbiini lo grë zha ne rieteed xtiidz me lo miech, rnee zho ncuaane naraa gac, mezhal pxeel xanjl me ziadnee lo luu, zeena gacnan grëse zha ne ngab lo me ziaadyoble gac grë ncuaan rii. ⁷ Ible nacle xtiidz men ne rnabey ne, zhile laa me guiaad. ¡Dichos grë zha ne gliladz grë mine noxobnen Dios nu!

⁸ Grop lo naa gon naa grë ncuaan rii, naazhal bin znu bnee anjl co. Nacne pquiitsgzhib naa lo me ni naa gunnon naa me; ⁹ dzigo nëchaa me lo naa:

—Guso i, rieguiald gunnon luu naa, laa naa nile lo luu ye naa tib nguñdziinse nac naa lo Dios, nac naa zigne nacaque luu grë luu grë zha ne noteed xtiidz men ne rnabey ne lo miech, ni grëraa zha ne gliladz mine noxobnen me nu. Me none gunnon luu.

¹⁰ Blozh ga, nëchaa me:

—Bien, grëse mine quiayan luu nu, yqueetsd luuw, sac zhile gdziñ dze ne gaca. ¹¹ Lo spalalse dze ne riaan niina, grë zha ne noyun guielntseeb, telne racladz zho mazdraa guielntseeb ne gun zho, maase gun zhow; zha ne runga guielyozh, telne mincota rleynie zho, maase gunraa zhow. Sangue grë zha ne noxco gun mine rnabey Dios, none tsoxcora zhow; zha ne ngablegaa lo me, none gunraa zho mine racladz me, gbiched zho lo me.

¹² Horco bin naa tsi men ne nac Carner yeen co, në me:

—Psoladza sca gon, ible zialniob naa; zeene laa naa guial, hor co gded naa mine rieguial tib tib miech, tel zha wban zho.

¹³ Notaque naa, zig nac grë ncuaan rii naa psilow ni naa csiaala; nac naa zig nac letr “a” ni letr “z” lo grë letr, “a” rsilow, “z” riala. ¹⁴ Dichos grë zha ne noxco guiaanmbe zho nëz lo Dios, sac rriequia xab zho ga nosanmbe zho, parne grieelo ted zho ro puert ne quia guiedz cub ne nac Jerusalén ga; gdziñ zho ga ine gow zho xnex yag ne rdeed guielmban ga. ¹⁵ Sangue grë miech ne racntseeb lo Dios, zha ne rleynie guielbruj, zha ne rionie zha ne led tsieeld, zha ne rut samiech, zha ne rleynie grë mdio, zha ne loxaque noquidie samiech, ni tib zha co grieelod ted ro puert co. ¹⁶ Naa gon nac Jesús, naa pxel xanjl naa ziaadlu grë ncuaan rii lo luu, zeena grëse zha ne no xnëz naa gacnaa. Naa ga briequia lo xti rey David, per naa psan grëse xmengol me. Rriequia naa nac mel ngol ne rziini ral sil.

¹⁷ Zigtaa Espiritu Sant, zigtaa grë zha ne no xnëz me, zha ne rriequia gac tsieel me ga, laa zho quiambëz me; niicle zha ne gacnanageraa laa me no guiaad, none yquiambëz zho me. Zha ne në rnab zhis, telne gacladz zho zac gbig zho lo me, me gdeed nis ne rdeed guielmban guie zho; ygad me nis co lo zho, peet gacnonda.

¹⁸ Grëse zha ne gon grë mine pxobnen Dios nu, laa naa rso diidz lo zho: Gneed zho ncuaane nacda, sac zha ne gdziibraa diidz zeene gnee zhow, scagaa me, lo grë guielnë ne raquiet nu yгаа miech, dzziibraa me mine yгаа zho; ¹⁹ zha ne ctichegaa palala zeene gnee zhow, scaque stiche me lë zho lo libr ne zhobnee cho nac zha ne yгаа guielmban ne gdeed me, grieelodraa gdziñ zho guiedz ne blozh goquiet nu, ygaadraa zho yquiin zho xnex yag ne rdeed guielmban ga.

²⁰ Men ne blozh bnee lo naa ga, ible ziaadniob me rnee me. Gacxe waa, dib zdoo naa laa naa rne lo me nu:

—¡Scaw gon Jesús! ¡Dë, laa no quiambiaaz luu!

²¹ Me nac men ne gacniën to grëse to, me gunlay to.

Juan